



Lerérun Búngiu To Lánina Iséri Darádu

Garifuna New Testament

Contents

| | |
|----------------------------|-----|
| SAN MATEO | 1 |
| SAN MARCOS | 53 |
| SAN LUCAS | 86 |
| SAN JUAN | 140 |
| HECHOS | 180 |
| ROMANOS | 227 |
| 1 CORINTIOS | 248 |
| 2 CORINTIOS | 269 |
| GÁLATAS | 283 |
| EFESIOS | 291 |
| FILIPENSES | 298 |
| COLOSENSES | 303 |
| 1 TESALONICENSES | 308 |
| 2 TESALONICENSES | 312 |
| 1 TIMOTEO | 315 |
| 2 TIMOTEO | 321 |
| TITO | 325 |
| FILEMÓN | 328 |
| HEBREOS | 330 |
| SANTIAGO | 346 |
| 1 PEDRO | 351 |
| 2 PEDRO | 357 |
| 1 JUAN | 361 |
| 2 JUAN | 366 |
| 3 JUAN | 367 |
| JUDAS | 368 |
| APOCALIPSIS | 370 |

Lerérún Búngiu To Lánina Iséri Darádu New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

© 2012, Wycliffe Bible Translators, Inc. All rights reserved.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

ISBN 978-1-5313-0120-0

PDF generated on 21 Sep 2016 from source files dated 20 Sep 2016

df8e4807-f4f9-5f4a-ab14-d1f7ffe98b0a

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

UGÁNU BUÍTI LE LABŪRŪJABEI MATÉO LUÁGU JESÚSU

Linébaanfaangu Jesúsu

(Lc 3.23-38)

¹ Niján jíri linébaanfaangu Jesucrístu le jádaangiñebei meja ladúgawagun Davíd lúma Abrahám.

² Abrahám lúguchibei Isáac, Isáac lúguchi Jacób, Jacób lúguchi Judá jáu lamúlenu, ³ Judá lúguchi Fáres lúma Zára, Támar tugúya jáguchu, Fáres lúguchi Esróm, Esróm lúguchi Arám, ⁴ Arám lúguchi Aminadáb, Aminadáb lúguchi Naasón, Naasón lúguchi Salmón, ⁵ Salmón lúguchi Booz, Raháb lúguchu, Booz lúguchi Óbed, Rut lúguchu, Óbed lúguchi Isaí, ⁶ Isaí lúguchi urúei Davíd, urúei Davíd túma tó meja lúmari Urías, jagía lagúbürigubaña Salomón.

⁷ Salomón lúguchibei Roboám, Roboám lúguchi Abías, Abías lúguchi Ása, ⁸ Ása lúguchi Josafát, Josafát lúguchi Jorám, Jorám lúguchi Uzías, ⁹ Uzías lúguchi Jótam, Jótam lúguchi Ácaz, Ácaz lúguchi Ezequías, ¹⁰ Ezequías lúguchi Manasés, Manasés lúguchi Amón, Amón lúguchi Josías, ¹¹ Josías lúguchi Jeconías jáu lamúlenu lídan dan le janáanwagunbei Israelítagu adáürawagua Babilónia.

¹² Láriñe le, Jeconías lúguchibei Salatiél, Salatiél lúguchi Zorobabél, ¹³ Zorobabél lúguchi Abiúd, Abiúd lúguchi Eliaquím, Eliaquím lúguchi Azór, ¹⁴ Azór lúguchi Sadóc, Sadóc lúguchi Aquím, Aquím lúguchi Eliúd, ¹⁵ Eliúd lúguchi Eleázar, Eleázar lúguchi Matán, Matán lúguchi Jacób, ¹⁶ Jacób lúguchi José le túmari María, tugúyati lúguchuboun Jesúsu le giribei Crístu.

¹⁷ Catoúrusuñanu lubeíti linébaanfaangu Jesúsu lúmagiñe Abrahám lúmoun Davíd, catoúrusu lúmagiñe Davíd lúmoun janáanwagúniwa Israelítagu Babilónioun, catoúrusu lúmagiñe dan ligía lúmoun lagúriajóun Crístu.

Lagúriajóun Crístu

(Lc 2.1-7)

¹⁸ Ítara líña ligáburi lagúriajóun Jesucrístu. María to lúguchu, gadáraduñoun lúma José lun tamárieidun lúma, lubáragiñeti jaganóun jámagua, lubáragiñe lasúbudirunun quei wúri, ába tadáriragun túngua láu dagáñu tíña lan láu lubáfu Sífiri Sándu. ¹⁹ Quei ában lubeí wügúri buídu tigáburi José le tadári, májati lasúbudirúniwa le asúseredubei tun María, busénrügüti lígirunun, míchugunga tidúnrun. ²⁰ Dan le niján lubeí arítagua luágu cátei le, ligía larúfudagun ában láni Wabúreme Búngiu ánjeli lúngua lun lídan luwénedi, ába larinagun lun.

—José, ladúgawagun Davíd, manúfudebá lun berésibirunun María queísi búmari, ladúga irájü le lúnbei tagáraüduni, lúmagiñe Sífiri Sándu liábin. ²¹ Tagáraüduba ában irájü, ábame bíchuguni líri Jesúsu. Ítara lúba líri ladúga lasálbarubaña lan lumútuniña lídaangiñe jafígoun.

²² Lasúseredunbei sun cátei le lun lagúnfulirun dimúrei le laríñagubei Wabúreme Búngiu liyúmulugugiñe proféta.

²³ Tadágeinaduba ában irájü, ábame tagáraüdüun ában irájü, Emanuel, ligíaba líri, líla íri ligía, “Búngiu wáma”.

²⁴ Dan le lagágudunbei José lídaangiñe uwénedi ligía, ába ladúgüni le lubeíbei ánjeli ligía lun, ába lerésibirunun María queísi lúmari, ²⁵ masúbudirungaloún queísi wúri darí tagúriajani furúmiñeti tiraú, ába líchuguni líri Jesúsu.

¹ Lídán fulásu le gíríbei Belén, lumúanrugu Judéa, ñi lagúriajouá Jesúsu dán meja le Heródes lan urúeibeí lídán jageíra juríu. Ábati jachúlürün fiú wügúriña chu táu ubúrugin Jerusalén lueígiñe oubaü le ñígiñe lubeí labouúcha wéyu. ² Ába jálügüdjajan.

—¿Jageisan jarúeite juríu le agúriajoubei? Aríja wamáaru luwáruguman le ñígiñe lubeí láfuara wéyu, wayábiñati lun wájuduragun lun.

³ Dan le lagáambuni urúei Heródes cátei le, ába medéraguagüdünjaali lan, jáu sun Jerusalénna. ⁴ Ábati lagúarun joun sun jábutigu fádirigu lídán jaffínen juríu, jáma ja arúfudajabalin lilúrudun Moisés joun gúriña, ába lálügüdaguniña jalíabei lan libíti fulásu lagúriajouá Cristu. ⁵ Ába jaríñagun lun.

—Belén, le lumúanrugubei Judéa, ladúga ítara líña labúrídüni proféta.

⁶ Amúrü Belén, lumúanruguna Judéa,

amúrü ában lídaangiñe ubúrugu weírigitimaati lídán múa le, láu sun biñúraü,

ladúga láfuriduba ában ábuti bídaangiñe

le lúnbei lounigiruniña numútuniña ja Israelítagu.

⁷ Ábati lagúarun Heródes joun chu táu arámudaguariñü, ába lálügüdüniña luágitima dan le tarúfudaguagüle warúguma túngua joun. ⁸ Ábati lounajaniña Belén, laríñaga joun.

—Jeíba, ábame jáluajani irájü le buídu, dánme le darí jumaali, jawísaraname, ñüdüin námuga gíñe ájuduragua lun.

⁹ Lárigiñe jagáambuni chu táu lerérun urúei, ába jóüdin. Warúguma bugáti to jaríjboun le ñígiñe lubeí láfuara wéyu, ába tídin jabá jabá, darí taráramun louígiñe fulásu le ñí lubei irájü le. ¹⁰ Dan le jaríjinun chu táu ja warúguma, ába jagúndaaragun sarágu. ¹¹ Dánti le jebélurun tídon múna, ába jaríjini irájü le túma lúguchu to María. Ábati jájuduragun, ába jabúluchagun lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gífiti. ¹² Lárigiñe, ába jawísarúniwa lídán jawénedi lun magíríbudun jamá ñígiñe lubeí Heródes, ába jagíríbudun jageíroun lídaangiñe ámu úma.

Anúrjani lun Ejíptoun

¹³ Lárigiñe jóüdin chu táu jagá, ába larúfudagun ába láni Búngiu ánjeli lúngua lun José lídán luwénedi, ába laríñagun lun.

—Sarába, barúbei irájü le táu sun lúguchu, anúrabá Ejíptoun, ábame beréderun ñi daríme nawísarunibu, ladúga láluaajaali Heródes irájü le lun láfaruni jilágubei.

¹⁴ Ábati lásaarun José, ába lanúgüni irájü táu sun lúguchu árieibu ligía, ába lídin jáu Ejíptoun. ¹⁵ Ába jeréderun ñi darí lounwen Heródes. Lasúseredunbei sun le lun lagúnfulirun le laríñagubei Búngiu liyúmulugugiñe proféta. “Sagá numuti Niraú Ejíptogiñe.”

Láfaraguagüdüniña Heródes irájüñü

¹⁶ Dan le ladáriragun Heródes lúngua luágu yéegua jamá lan chu táu, ába lagáñidun, ába lounajan áfaraguaña sun irájüñü ja bíama tíña irúmu jáu lun únabun, ja aganoubaña Belén lúma sun fulásu geyégua láu, según dan le jaríñagubei chu táu luágu lagúriajouniwa irájü ligía. ¹⁷ Ítara líña lagúnfulirun le labúrüjabei proféta Jeremías.

¹⁸ Agaambúati lagúarajan ában umálali Ramá láu oúnwenbun igárigu, umálali ligía tumálali Raquéel, to ayájuboun járigi tirájüñü, mabúseeruntu lun támalijoún ladúga jilágua jamá.

¹⁹ Lárigiñe lounwen Heródes, ába liábin ába láni Búngiu ánjeli lun José lídán luwénedi yágüta Ejípto, ába laríñagun lun.

²⁰ —Sarába, barúbei irájü le táu sun lúguchu, giríbu jumá jageíroun Israelítagu ladúga jilágua ja abúseerubaña meja jáfaruni irájü le.

²¹ Ába lásaarun José, ába lanúgüni irájü táu sun lúguchu jageíroun Israelítagu. ²² Dan le lasúbudiruni José luágu Arqueláo lan agúmadijabei Judéa lewéñegua Heródes le lúguchi,

ába lanúfudedun lídin ñjjin, ába laríñawagúniwa lun lídan uwénedi lun lídin Galiléoun.
²³ Lachúlürün ñi, ába lídin agánawa lídan fulásu le gíríbei Nazarét, le lumúanrugubei Galiléa. Lasúseredunbei sun cátei le lun lagúnfulirun le jaríñagubei profétagu luágu Nazarétna lan Jesúsu.

3

Lapúrichijan Juan le abásteragüdjabei lídan fulásu mageírawati

(Mr 1.1-8; Lc 3.1-9, 15-17; Jn 1.19-28)

¹ Lídoun dan ligía, ába liábin Juan le abásteragüdjabei apúrichija lídan fulásu mageírawati, Judéa, ² ába laríñagun lídan lapúrichijan.

— Sáansi jumeí jóuserun, ladúga yaráfaali larúeijan Búngiu.

³ Juan le, ligía le uágubei meja labúrúja proféta Isaías ítara.

Agaambúati lumálali ában gürígia agúaraja lídan fulásu mageírawati ítara.

“Aráanse jumouún janígi lubá liábin Wabúreme,

queísi ladárarúniwa úma surúti.”

⁴ Lanáangun Juan, láutu lúra caméyu, liábin lagúrúga liránaagua, guéru, chigángaru leígubaña lúma síruudu le áraabuna. ⁵ Ábaja jayábin ubúrugugiñe Jerusalén, lúma Judéagiñe, lúma lubádugiñe dúna Jordán agáambe lapúrichijan, ⁶ dántija le jagúfeseruni jafígoun, ába labásteragüdüniña lídan dúna le gíríbei Jordán.

⁷ Dan le laríjin Juan luágu sarágu jáña lan gürígia lídaangiñetiña jadámurin fariséogu jáma saduséogu ñúbintiña lun jabásterun, ába laríñagun joun.

— Jarásan jéwe jugúya le! ¿Ca awísarubadün lun janúrajan lueí lanárima afáyeiragülei luágu figou le lúnbei liábin? ⁸ Oúsera jumá buídu, arijúa lámuga furáangu luágu sáansigua lan ligáburí jóuserun. ⁹ Mapántajan jugúyame, aríñaga jídaangu. “Linébaanfaangu Abrahám wagía”, ladúga naríñajare jun luágu gayára lan ladúgün Búngiu linébaanfaangu Abrahám lídaangiñe dúbü le. ¹⁰ Madíseeli lagúnfulirun le laríñagubei Búngiu, luágu yaráfaali lan lidáani abeichúni luágu figou, aráanseeru jaráwa lun lánchuajóun wéwe, áni sun wéwe le mabuídunti lin, chaúnwati, ába lagudún. ¹¹ Áu, láu dúna nabásteragüdaün, arúfudei luágu sáansi jumáali lan ligáburí jóuserun, ánjeinti le lúnbei liábin nárígi, labásteragüdübadün láu Sífiri Sándu, áni lafáyeiragüdübadün luágu figou queísi láu wátu geméti. Gabáfuti nuef darí lun madúna nan ni lun narágachunun ligeídin. ¹² Nújeinjaru lichóbulin lújaburugu, larúmadagüdübei türígu, ábame lanúadiruni lídaangiñe sagádi mábeijali. Ábame lareíduni türígu, ábame láguduni sagádi le mábeijali lídan wátu geméti le meñeguchadíbei.

Labásterun Jesúsu

(Mr 1.9-11; Lc 3.21-22)

¹³ Dan le liábin Jesúsu Galiléagiñe, ába lachúlürün luágun dúna le gíríbei Jordán le ñi lubei Juan lun labásteragüdüni. ¹⁴ Májati yebéti Juan labásteragüdüni, ába laríñagun lun Jesúsu.

— Nugúya lúnbei babásteragüdüniña, ¿amúrú lubeí núbin nun lun nabásteragüdüniibu?

¹⁵ Ába laríñagun Jesúsu lun.

— Ítara lúba guetó, ladúga lúnti wadúgüni le lubeíbei Búngiu.

Ába labásteragüdüni Juan Jesúsu, ¹⁶ larígiñe labásterun Jesúsu, ába láfuridun dúnarugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun. ¹⁷ Ába lagaambún ába umálali siélugiñe le aríñagubei.

— Niraú le jínsiñebei nun le, le áubei oúnwenbun lan nugúndan.

4

Loucháguni Máfia Jesúsu

(Mr 1.12-13; Lc 4.1-13)

¹ Ába lanúgüni Sífiri Sándu Jesúsu lídoun fulásu mageírawati lun loučhaguni Máfia.

² Lárígiñe leréderun Jesúsu bián-wein wéyu lúma bián-wein áriebu meíginga, ába lalámachun. ³ Ábati liábin Máfia lubádun, ába laríñagun lun lun loučhaguni.

—Ánjein liraú bubei Búngiu, salíguagüdadei dúbü le feínme.

⁴ Ába louñabun Jesúsu.

—Tariñajare Lerérun Búngiu. “Mámarügübei táu fein labágarida güriñgia, labágariduba gíñe láu sun dimúrei le laríñagubei Búngiu.”

⁵ Ábati lanúgüni Máfia Jesúsu Jerusaléoun, ubúruyu le sándubei joun juríu, ába laweínragüdüni tábulugun témpulu, ⁶ ába laríñagun lun.

—Ánjein liraú bubei Búngiu, chubába yágiñe lun únabun, ladúga tariñajare Lerérun Búngiu.

Laríñaguba Búngiu joun láni ánjeligu lun jóunigirunibu.

Janíügübadibu jájaburugu lun machúgeragun lan bugúdi luágu dúbü.

⁷ Ába louñabun Jesúsu.

—Aríñagatu gíñe Lerérun Búngiu. “Moúchaguabeí Babúreme Búngiu.”

⁸ Ába lanúgüni Máfia Jesúsu luágun ában wúbü íñuti, ába larífuduni sun arúejani le ubouáguubei lun, lúma buri luewéirigun, ⁹ ába laríñagun lun.

—Níchugubei sun le bun ánjabu ájuduragua nun.

¹⁰ Ábati laríñagun Jesúsu lun.

—jBeíba nueí, Máfia! ladúga tariñajare Lerérun Búngiu. “Lúnrüğüba Babúreme Búngiu bájuduragua, lúnrüğüba gíñe besériwida.”

¹¹ Ábati ladisedun Máfia lueí, ába jayábin ánjeligu esériwidei.

Lagúmeseruni Jesúsu luwádigimari, Galiléa

(Mr 1.14-15; Lc 4.14-15)

¹² Dan le lagáambunbei Jesúsu luágu níjein lan Juan furísunruyu, ába lídin lárígouñ Galiléoun. ¹³ Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabulón lúma Neftalí. ¹⁴ Lasúseredunbei sun le lun lagúnfulirun le labúrújabeí meja Isaías, lé meja proféta.

¹⁵ Lageíra Zabulón lúma Neftalí,

lídan úma lubádu barána, luegiñe oubáü le ñígiñe lubeí láfuara wéyu libítí Jordán, Galiléa le ñí lubei jagánawa ja mámbañia juríu.

¹⁶ Jugúya lé meja lídaanbei lubúriga aríjaadün ában óunwenbun larúgounga, jugúya lé meja lídaanbei lamúñounga le lánina óuweni, jarúgoungagüdwaaali jáu.

¹⁷ Lúmagíñe dan ligía, ába lagúmeserun Jesúsu apúrichija ñi ítara.

—Sáansi jumeí jigáburí, ladúga yaráfaali larúejan Búngiu.

Lagúarun Jesúsu joun gádürü esénijatiña lun lánime disípulugu

(Mr 1.16-20; Lc 5.1-11)

¹⁸ Eíbugeina líña Jesúsu lárú lárú dúna Galiléa, ligía laríjin bián gamúlenuguátiña, ában jádaangiñe, Simón le méme gíribeí Pédro, le ában, Andrés. Esénijani jabágaribeí, jáguruñati. ¹⁹ Ábati laríñagun Jesúsu joun.

—Falá jumana, ábame mesénijanjadün lan úduraü, anájarügaadünme güriñgia nun lun nanígume.

²⁰ Furése furése ába jígirunun jasénin, ába jóúdin lúma.

²¹ Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedéo. Tídaañanu ában ugúnein lúma jáguchi arámadajoun jasénin. Ába lagúarun Jesúsu joun lun lánime disípulugu, ²² lídan óra ligía ába jígirunun ugúnein, ígira jáguchi, ába jóúdin lúma Jesúsu.

Larífudajan Jesúsu joun sarágu güriñgia

(Lc 6.17-19)

²³ Ábajei lebuguni Jesúsu sun Galiléa arúfudajeina tídan buri jalígilisin jurú to lídaan-boun ságü fulásu. Ábaja lapúrichijani ugánu buíti luágu larúeijan Búngiu, areídaguagüda ligía sun luwúyeri sándi le jawáguti gürígia. ²⁴ Ába lagaambúniwa luágu Jesúsu lídan sun Síria, ába janúgüniña sun ja asúfurirubaña láu ámuñegueinarügü sándi, igárigu, ja gawágubaña lagúbüri espíritu, ja góuwejadibaña, jáma ja deréguádaña úgubu, ába lareídaguagüdüniña. ²⁵ Sarágu jáña gürígia afálaruti Galiléagiñe, lídaangiñe buri fulásu Decápolisna, Jerusaléngiñe, loúbawagugiñe Judéa, lúma lueigiñe oúbaü le ñígiñe lubef laboucha wéyu libíti Jordán.

5

Lapúrichijan Jesúsu wúbüwaügügiñe

¹ Dan le laríjinbaliña Jesúsu sun gürígia jagía, ába laweinrun luágun ában wúbü, ába lañúurun ñi. Ábati jóundaragun lání disípulugu geyégua láu, ² ába lagúmeserun arúfudaja joun ítara.

³ —Fuleiseiwatün jugúya le asúbudirubalin luágu mégei jumáni lídejan Búngiu lun jadúgüni le labúserubei, ladúga méreengunbei jun lun jebélurun lídoun larúeijan Búngiu siélu.

⁴ Fuleiseiwatün jugúya le jírubei, ladúga líchuguba Búngiu gurásu jun.

⁵ Fuleiseiwatün jugúya le únabugubei, ladúga jerésibirubei le uágubei laríñaga Búngiu luágu líchugubei lan jun.

⁶ Fuleiseiwatün jugúya le weírubei jabúseerun lúaradagun jabágaridun, ladúga líder-agubadün Búngiu lun jadúgüni.

⁷ Fuleiseiwatün jugúya le gudémebabubei, ladúga gudémebadün giñe lun Búngiu.

⁸ Fuleiseiwatün jugúya le jarúmabei anígi, ladúga jaríjubei Búngiu.

⁹ Fuleiseiwatün jugúya le áfaagubei lun jámalijan sun cátei, ladúga lagúarubadün Búngiu queisi lirájüñü.

¹⁰ Fuleiseiwatün jugúya le asúfurirubei eíbaajóuni luágu lúaragun jibágari, ladúga jebéluruba lídoun larúeijan Búngiu siélu.

¹¹ Fuleiseiwatün dan le janábagunün gürígia, eíbaaja jamaún, aríñaga jagía sun luwúyeri iyéeni juágu, nueigiñe. ¹² Gúndaañu jumá, ladúga jerésibiruba ában oúnwenbun fáyeiti siélu, ítara líñá meja giñe jebaajóuniwa profétagu ja ñúbinbaña jubáragiñe.

Ítara jíña queisi sálu lúma lámpu lun ubouí

(Mr 9.50; Lc 14.34-35)

¹³ Ába lasígirun Jesúsu aríñaga.

—Ítara jíña quei sálu joun lílana ubouí le lun jeréderuniña lueí jagádeirun, ánjein lefériDIRA sálu lubásuan, ¿cábago un ju lan? Úaalime ju lan ni ca un lueídügüya lun lágurúniwa, ábame jadúgüraguni gürígia.

¹⁴ Ítara jíña quei lámpu joun lílana ubouí le. Ában ubúruge le luáguti ában wúbü siñáti larámudagun, furáanguti larijóuniwa. ¹⁵ Mebedúnti giñe ában lámpu lun líchugúniwa tábugiñe ában gáfu, luágu dábula líchugúya lun larúgoungadágüdün jáu sun ja múnad-abaña. ¹⁶ Ítara jumá giñe, durúnguagüda jumeí jilámpun jádan gürígia, lun dánme lan jarjini buíti le jadúgübei, ábame giñe jadímurejan buíti luágu Wáguchi Búngiu le siélubei.

Larúfudajan Jesúsu luágu lilúrudun Moisés

¹⁷ Marítagua jumátia luágu niábiña lan agídarei lilúrudun Moisés, ni le jarúfudajabei profétagu, máma niábiña agídarei, niábiña arúfudei líla le tímatimaati. ¹⁸ Ninárün lubeiti jáu luágu níjeingua rügáli ligía lan siélu lúma ubouí, magídaránwabei ni ában púntu, ni ában létüra lídaangiñe lilúrudun Moisés daríme suséreeli le lúnbei lasúseredun. ¹⁹ Ligía, le lubeí íchuguti mebéreseni luágu furúmierügü gumádi lídaangiñe lúrudu, íbini le lan

ñúraütimaabei lídaangiñe, arúfudaja ligía joun güirgía lun jadúgüni líbe le ladúgübei, ñúraüraübei lanügüniwa yágüta siélu lídan larúeijan Búngiu. Ánjeinti le ñúdünbei láu sún buri gumádi lídan lúaragun, ítara gñe larúfudajan, weíríbei lanügüniwa yágüta siélu.²⁰ Naríñajare jun luágu ánjein lan mabuídun ligáburí jouserun sarágu weíyaasu jawef arúfudajatiña lilúrudun Moisés, jáma fariséogu, mebelúbadiün lídoun larúeijan Búngiu siélu.

Larúfudajan Jesúsu luágu igáñi
(Lc 12.57-59)

²¹ ‘Agáamba jumáali luágu aríñawagúa lán meja joun binádu jagúbürigu lun máfarajan jamá, ladúga furúmieguarügü lan le áfarajati, lagúseragüdüwaba. ²² Wel, nariñajare jun luágu furúmieguarügü lan le agáñiduti lúma güirgía líledi lagúseragüdüwaba. Le anábuti güirgía líledi lagúseragüdübei luweírín-ágei lúrudu, le aríñaguti lun güirgía líledi, “ibídiougua táu”, luáguñein úma lun máfiougatin. ²³ Ítara líña lubeíti, ánjein banúga bedéweejan luágun láni Búngiu latárü, báu ñi ába barítaguni luágu níjein lan cátei lídan furúmieguarügü güirgía bubá, ²⁴ ígirabef le lúnbei bedéweejani ñi ligíbugiñe latárü, ábame bídin aráandara lúma güirgía ligía. Lárigiñemeti, gayáaraajalíme bagíríbudun luágun latárü íchigei bedéweejan.

²⁵ ‘Ánjein abúseera ában güirgía lanúgünibu ligíbugiñoun lúrudu, belúba lídoun úarani lúma luágu jefbuguniwagu lueí ledéregerunibu lun agúseragüdüti, ledéregerabume agúseragüdüti lun polísía, ábame badaürún. ²⁶ Ninárün báu, máfurídumbadibu ñígiñe darí bafáyeiruni lagúmujoún gáwaníun.

Larúfudajan Jesúsu luágu adultériu

²⁷ ‘Agáambaadün luágu aríñawagúa lán meja. “Magámarida jumá jámari ámu, adultériu líra.” ²⁸ Áu nariñajare jun luágu furúmieguarügü lan le awámadirutu ában wúri, adúgaali adultériu túma tídan lanígi.

²⁹ ‘Ánjabu lubeíti lafigoungüda bágu le lueígiñebei boúnwenren, sagábei, fíbei díse, buítimaati lun beféridirun ában lídaangiñe umégeguni le buágubei sügü láu bídin láu sun búgubu máfiougatin. ³⁰ Ánjein bújabu lubeí le boúnwenren afigoungüdúbadibu, dúrúbei, fíbei díse, buítimaati lun leféridirún ában lídaangiñe umégeguni le buágubei sügü láu bídin láu sun búgubu máfiougatin.

Larúfudajan Jesúsu luágu ígiraguni
(Mt 19.9; Mr 10.11-12; Lc 16.18)

³¹ ‘Aríñawagúati meja gñe luágu furúmieguarügü lan le ígirutu lúmari lúnti líchugun gárada lánina ígiraguni tun. ³² Áu nariñajare jun luágu furúmieguarügü lan wügúri ígirutu lúmari, ánjein máma lubeí ladúga tagámaridun ligíbuagun, ába taganoún lúma ámu wügúri, adúgagüda lumútu furúmiñeti wügúri adultériu. Le gñe agámaridutu wúri ígiraguauu ladúgüña gñe adultériu.

Larúfudajan Jesúsu luágu áfiñuruni

³³ ‘Agáambaadün gñe luágu aríñawagúa lán meja joun binádu agúbürigu lun jagúnfulirun láu le jaríñagubei láu áfiñuruni ligíbugiñe Búngiu. ³⁴ Áu nariñajare jun luágu moún lumuti lan jáfiñurun ni ca uágu—ni luágu siélu ladúga ñi lan lañúura Búngiu, ³⁵ ni luágu múa ladúga ñi lan líchigei Búngiu lugúdi, ni luágu Jerusalén ladúga ligía lubúrugutebei Warúeite Búngiu le weirígubei, ³⁶ ni luágu jichúgü ladúga siñáti ni jájarudagüdün ni jáuridagüdün ában ídiburi. ³⁷ Aríñagarügü jumá “ánja” o “uá”, máfiñurunga ni ca uágu, ámu cátei lueí líra lúmajiñeti Máfia.

Larúfudajan Jesúsu luágu laguyugüdüniwa wuríbani
(Lc 6.29-30)

³⁸ ‘Agáambaadün luágu arñiwagúa lán meja. “Águu luágu águu, ári luágu ári.” ³⁹ Áu naríñajare jun lun máguuyugüdiün jumá wuríbani luágu wuríbani, lubáragiñe líra, ánjein ichiga mútu agúfudein luágu ában louba jigíbu, rúya jumeí le ában oubaü lun. ⁴⁰ Le áluguti lanúgünün ligíbugiñoun lúruudu tueígiñe jísímisin, ígira jumeí lun gíñe lanúgünun jabíte. ⁴¹ Ánjaün lafósura ában güirgía lun janúgün ában anúgüni ában máili, barújumei bián máili. ⁴² Furúmieguarügü le amúriajati ában cátei júma, rújumei lun, míchiga jumeí gíñe janágan luágun le afúredeijati júma.

Ísiñejabuni joun áganiñu

(Lc 6.27-28, 32-36)

⁴³ ‘Agáambaadün gíñe luágu arñiwagúa lán meja. “Jínsiñelá bumáda bun, liyéreegu-dame bágani bun.” ⁴⁴ Áu naríñajare jun. Jínsiñe jamá jáganiñu jun, buídulá jayúmajan jabá ja wuríbabei jayúmajan jubá, adúga jumá buíti joun ja iyéreejabúbaña jun, ayúmuragua jumá lun Búngiu jawágu ja anábagubadün, ja wuríbabei ouserunün. ⁴⁵ Ítara lúba jagáburiduña lan queísi lirájüñü Júguchi Búngiu le siélubei, ligía oúnaja lumúti wéyu joun buítiña jáma wuríbatiña, oúnajalei júya dándu joun múraantiña queísi joun úaratiña. ⁴⁶ Ánjein já rügúbaña lubei jínsiñejabúbaña jun ínsiñeda jun, ¿cábago fáyeiti jerésibira luágu líra? Adúga jamúti gíñe ja agúburajabalin liseínsuna gumádi itara. ⁴⁷ Ánjein jóün rügúñein lubei jumádagu jayoúragua, ¿ca buíti jadúgübei láu líra? Íbini ja ibídiñejabubaña lun Búngiu adúga jamúti líra. ⁴⁸ Úaragua jumá le gumúti queísi úaragua lan Júguchi Búngiu le siélubei.

6

Larúfudajan Jesúsu luágu ladúgün cátei buíti

¹ Ába lasígirun Jesúsu arúfudaja joun güirgía wúbüwaügügiñe, laríñaga.

—Tóunigi jumá lueí jadúgün cátei buíti jagíbugiñe güirgía lúnrügü jaríjinün. Ánjein jadúga itara, míchubei Júguchi Búngiu le siélubei fáyeiti buíti jun. ² Ligía, dánme lubei jíderagun ában gudémeti, masúbudiragüda jumeí lun sun uboué quei jadúga ja biánguabaña igíbu ligílisirugu lúma úmadarugu. Jagía, jadúgüni líra lúnrügü jadímurejan güirgía buídu jawágu. Ninárün jáu luágu láu lan jadúgüni líra, ibíja jamáali jafáyeiruája. ³ Dan le jíchugun ában cátei lun gudémeti, masúbudiralei ni lubuídun-ágei jumáda, ⁴ adúga jumeí lábugiñe libídiñewa. Júguchi Búngiu le aríjubalin le jadúgübei lábugiñe libídiñewa, líchuguba jafáyeiruája.

Larúfudajan Jesúsu luágu ligáburi ayúmuraguni lun Búngiu

(Lc 11.2-4)

⁵ ‘Dan gíñe le jayúmuragun lun Búngiu, mítaran jumá quei ja biánguabaña igíbu ja jínsiñebeí joun lun jayúmuragun rára tídan jalgílisin juríu lúma lídan legéyedun úma lun jaríjiniña güirgía. Ninárün jáu luágu láu lan jadúgüni líra ibíja jamáali jafáyeiruája. ⁶ Dan le jayúmuragun lun Búngiu, belújuma jirúmuragun, darú jumeíme jubéneri, ábame jayúmuragun lun Júguchi Búngiu le lábuguabei júma ñi. Júguchimeti Búngiu, le aríjubalin le jadúgübei lídan límanin, líchuguba jafáyeiruája. ⁷ Lídan le jayúmuragun, máguuyugüda jumá luágu dimúrei le málati quei jadúga ja ibídiñejabubaña lun Búngiu, jarítaguatiñati luágu lagáambubaña lan Búngiu ladúga líbe jadímurejan. ⁸ Mítaran jumá lubeíti quei jagía, ladúga lubáragiñe jayúmuragun lun Búngiu subúdi láali ca lan jabúseerubei. ⁹ Ítara lúba lubeíti jayúmuragun.

Wáguchi Búngiu le siélubei, inébewalá bíri.

¹⁰ Núbínlá bidáani lun barúeijan ya ubouágu,

adúgúwalá bugúndan ubouágu quei ladúgüniwa bugúndan siélu.

¹¹ Rúba fein buídurügütu woun lun wéyu le ugúñebei,

¹² ferúdunabeí wuríbati le adúga wamáalibei quei ferúduna wamániña ja adúgübaña wuríbati woun.

¹³ Mígira báwa lun wáburujan lídoun wuríbani, dísegüdarügü báwa lueí,

ladúga amúrú le arúeijabei, amúrú le Súntibei Gabáfu, amúrú le weírigubei lun sun dan. Ítaralá.

¹⁴ Ítara líña lubeíti, ánjaña ferúduna jumá ámu luágu wuríbati le adúga jamáalibei jun, ferúduna lubádün gíñe Júguchi Búngiu le siélubei, ¹⁵ ánjein úa ferúduna jumá ámu, úabei gíñe ferúduna láani Júguchi Búngiu jífígoun.

Larúfudajan Jesúsu luágu ayúnaruni

¹⁶ Ába laríñagun Jesúsu.

–Jugúya, dánme le jayúnarun, marúfuda jumá lírun igíbu quei jadúga biángua tigíbu, jagía jadúgünbalin ítara lun jaríjini gürígia luágu jayúnaruña lan. Ninárün jáu luágu láu lan jadúgüni líra ibíja jamáali jafáyeiruája. ¹⁷ Ánjein jugúya, dan le jayúnarun, amúriga jumeí jídíburi, chibá jumeíme jigíbu, ¹⁸ meféen jamámuga gürígia luágu jayúnaruña lan. Júguchirügüba Búngiu le júmabei ñi geféen luágu jayúnaruña lan, ábamei líchugun jafáyeiruája.

Irisini siélu

(Lc 12.33-34)

¹⁹ ‘Mouñdaragua jumá irisini ya ubóuagu le ñí lubei gayára lan jájúchün jamútiri áni gayára ligía lagájüdüñ ámu luwúyeri irisini, le gíñe ñíjin lubei gayára lan jebélurun jíwerutiña lun jíwerujan. ²⁰ Oúñdaragua jumá irisini siélu, le ñí lubei siñá lan jájúchün jamútiri, magájüdadí ni cáta, mebélú jagía jíwerutiña íweruja ñi. ²¹ Le ñí lumuti jírsin, ñíñoun gíñe janígi.

Lilámpun úgubu

(Lc 11.34-36)

²² Ítara líña bágu quei ában lámpu lun búgubu, ánjein lubeíti buídu lubeí bágu, aríja ligía luágun irisini siélu, camá jamuga jarúgoungabei gíñe láu sun búgubu, áni buídubei gíñe sun bigáburi. ²³ Ánjein sándi lubeí bágu, aríja ligía luágun irisini ya ubóuagu, camá jamuga lídaanbei lubúriga sun búgubu, áni wuríbabei gíñe bigáburi. Ánjein ñúbin larúgounga le bídaanbei lun lubúrigame, ¡luweírin méfuna líwurin lubúriga ligía!

Búngiu lúma seínsu

(Lc 16.13)

²⁴ ‘Úati ni ában gayáraati lesériwidun joun biáma iyúbudirigu, ladúga lísiñeduba ában jádaangiñe lun, liyéreegudáme le ában lun, úaraguabei lúma ában jádaangiñe, líchigame mebéreseni luágu le ában. Siñáti lesériwidúniwa lun Búngiu lúma lun seínsu.

Tóunigi lumútiña Búngiu lirájüñü

(Lc 12.22-31)

²⁵ ‘Naríñajare lubeíti jun, madjíeri jumá luágu cába lan jeíga o cába lan játa lun jabágaridun, ni tuágu anáanguni to lúnboun jadáürunun. ¿Máfunagi gebégitimaati ibágari sügü láu eígini, gebégi úgubu sügü táu anáanguni? ²⁶ Aríja jumá joun dunúru ja ájamajabaña garábalirugu. mábunagun jáña, malúbajan, mareídun jameí alúbajani lídan lágei, láu sun líra, rúti Júguchi le siélubei eígini joun. ¡Sarágu gebégitima jumá sügü jáu dunúru! ²⁷ ¿Cáteigi jádaangiñe gayáraabei líchugun bián ugúdi lánwoun lúgubu, ca lan lanárimebei láfaagun luágu?

²⁸ ‘¿Ca uágu jadjíerida tuágu anáanguni? Aríja jumá ída líña lan laweínamudun fulúri. láu sun mawádigimari lan, madúgün ligía gamísa, ²⁹ ni méja urúei Salomón láu sun luwéndegun, mawéñdentí meja ladáüragun quei fulúri. ³⁰ Ánjeinti daúguagüda

lubálin Búngiu jǵduru ítara le ugúñebei lǵjúcha, jarúgabei yebe lagudúña, ǵgúbumésan líderaguajún loúgua taffínen jugúya le? ³¹Madǵjerida jumá lubefti aríñaga. “ǵCába weíga?” o “ǵCába wadáúra?” ³²Gürǵgia ja lánigu ubou le, luágu rǵgúñeín buri cátei le jaritagua, ánjein jugúya, níjein júguchi Búngiu siélu le subúdíjabúbei cátei lan jemegeirubei. ³³Seríwi jumá lun Búngiu furúmiñe, álujaja jumeí ibágari surúti le áubei lagúndaara, ábame líchuguni sun le jemegeirubei jun. ³⁴Madǵjerida jumá lubefti luágu jarúga, ladúga barú lumuti gíñe jarúga lidǵjeridúna lúmagua. Ságu ában wéyu gǵbeti cátei lun.

7

Míchiga jumá jadúnrun ámu

(Lc 6.37-38, 41-42)

¹Ába lasǵgírur Jesúsu aríñaga joun gürǵgia wúbüwaügúgíñe.

—Míchiga jumá jadúnrun ámu, míchugun lámuga gíñe Búngiu jidúnrun, ²ladúga quei ligáburu jíchugun jadúnrun ámu, ítara lúba gíñe líchugun Búngiu jidúnrun, le áubei jamísuraja, láuba gíñe lamísurajajún Búngiu. ³ǵÍda lubásan gayára lan jarǵjini liraúraü ífei le lídaanbei lágu jamúlen áni masánda jumúti durúsu le lídaanbei jágu? ⁴ǵO ída lúba gayára lan jarǵnagun lun jamúlen. “Sagáneí liraúraü ífei le lídaanbei bágu,” áni níjein ában durúsu lídan jágu? ⁵ǵBiángua tigǵbu jugúya le! Sagájumeí durúsu le lídaanbei jágu furúmiñe, ítara lúba gayára lan jarǵjin buídu lun jaságaruni liraúraü ífei le lídaanbei lágu jamúlen.

⁶“Míchiga jumeí arúfudajani luáguti asálbaruni joun gürǵgia ja gáñitiña, garábagua jáñein juágun quei óunli lun jágürünün. Míchiga jumeí gíñe arúfudajani ligía le gebégibeí sarágu joun gürǵgia ja búirujuduátiña, dügúgua jañálin.

Agáamba lumúti Búngiu wamúriajan lúma

(Lc 11.9-13, 6.31)

⁷Jamúriaja lúma Búngiu, ábame líchugun jun, jáluaja, ábame jadárirun, daúnjuma luágu béna, ábame lánjunrenchún jun. ⁸Ladúga le amúriajati, abǵjati, le áluguti, darfti, le adaúnjati luágu béna, jurénwati lun.

⁹ǵNíjein funági ában jídaangiñe gayáraati líchugun ában dúbü lun lisáani dan le lamúriajan feín lúma? ¹⁰ǵo líchugun lan ában jéwe lun dan le lamúriajan úduraü lúma? ¹¹Ánjein lubefti láu lubeí sun wurǵba jumá, gíchigaditún cátei bufti joun jisáanigu, ǵgúbuméti líchiga Júguchi Búngiu le siélubeí cátei bufti joun ja amúriajatiña lúma!

¹²“Súnwandanlá lubefti jadúgün joun ámu quei le jabúseerubei lun jadúgüni jun, ladúga ligía laríñagubei lílúruden Moisés túma jalǵburun profétaгу.

Bürúraüti lubéneri siélu

(Lc 13.24)

¹³“Belújuma lídaangiñe béna le бүрúraübei. Béna lúma úma le anúgübei gürǵgia lídoun féridi, tuléburi líña, gabáranouga ñi, áni sarágu jáña ebélurutiña lídaangiñe. ¹⁴Ánjeinti béna lúma úma le anúgübei gürǵgia lídoun ibágari le magúmuchaditi, бүрúraü líña, murúga, mǵbetiñati adáriruti.

Luágu cátei le wadúgübei lasúbudirúa cátawa lan

(Lc 6.43-44)

¹⁵“Tóunigi jumá jaweí yéetiña ja aríñagubaña luágu lerérur lan Búngiu jadímureja. Jayábin jun quei mudún bougudigiñe jabíti, ánjein múnadagiñe, ítara jáña quei anímaalu gáñitiña. ¹⁶Jugúya, gayáraabeí jasúbudiruniña luágu le jadúgübei, malúbajoúntu beíbei lídaangiñe jíyu, ni ígo lídaangiñe gurǵbiyuwa. ¹⁷Sun lubefti wéwe le bufti, bufti lin, wéwe le wurǵbati, wurǵbati lin. ¹⁸Wéwe le bufti, siñáti wurǵba lan lin, wéwe le wurǵbati, siñáti gíñe

buídu lan lin. ¹⁹Sun wéwe le mabuídunti lin, chaúnwati, ába lágudúniwa. ²⁰Jasúbudirubaña lubeíti yéetiña jagía luágu le jadúgübei.

*Másubaña ebélura lídoun arúejani le siélubei
(Lc 13.25-27)*

²¹‘Máma sun ja aríñagutiña nun. “Nabúreme, Nabúreme,” jebéluruba lídoun arúejani le siélubei,’ líña Jesúsu. ‘Ja rügúbaña adúgúbalin lugúndan Núguchi Búngiu le siélubei ebélura. ²²Dánme lachúlrün wéyu lánina agúseragüdüni, sarágubaña aríñagutiña nun. “Wabúreme, Wabúreme, apúrichijatiwa mejátia luágu bíri, sagá wagía espíritu gu wurfbatiña lídan bíri, adúga wagía sarágu miláguru lídan bíri.” ²³Ábamei naríñagun joun. “Íbidiñegubeiñadün nun, díse jumá nueí, jugúya le adúga jumáalibe le wurfbabei.”

*Jawúyeri gürgia ja agáambubalin lerérun Búngiu
(Lc 6.47-49; Mr 1.22)*

²⁴‘Le agáambutina, adúgaleí le nubeíbei, ítara líña quei ában wügúri gunfaráandati le adúgübei lúban ligíbuagu dúbü. ²⁵Ába liábingua júya, ába liñúrun dúna, fúgua garábali tuágun múna tugúya, meíguaduntu ladúga luáguñein lan dúbü tuágaburi. ²⁶Ánjeinti le agáambutina, madúgün lumúti le nubeíbei, ában wügúri íbidiougua táu ligía, le ábunagubei ligíbuagu ságoun. ²⁷Ába liábingua júya, iñúra dúna, fúgua garábali tuágun múna tugúya, ¡ma lanárime táburujan!

²⁸Dan lásurun ladímurejan Jesúsu, ¡ma luweírin janígi gürgia láu le larúfudajabei! ²⁹ladúga láu lan ubáfu larúfudaja, máma quei arúfudajatiña lilúrudun Moisés.

8

*Lareídaguaqüdün Jesúsu ában gawáguti gumeín le mareídaguaðibeí
(Mr 1.40-45; Lc 5.12-16)*

¹Dan le larárirunbei Jesúsu lueígiñe wúbü, sarágu jáña gürgia afálaruti. ²Ába liábin ában wügúri gawáguti gumeín le mareídaguaðibeí, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguaqüdünina.

³Ábati lagúurun Jesúsu luágu láu lújabu, aríñageina ligía.

—Buséntina, areídaguaqüda numútibu.

Quei laríñagun ítara, ába lareídagun sánditi ligía. ⁴Ába laríñagun Jesúsu lun.

—Maríñaga beítia ni ca un, ñúdünrügübá arúfudagua búngua lun fádiri, rubeíme edéweejani le uágubei laríñaga Moisés, lun jaríjini gürgia luágu areídaguaadibu lan.

*Lareídaguaqüdüni Jesúsu lumúsun ában gumándan Rómána
(Lc 7.1-10)*

⁵Dan le lebéllurun Jesúsu lídoun fulásu le gíribei Capernaúm, ába liábin ában gumándan Rómána lubároun, ⁶ába layúmuragun lun ítara.

—Nabúreme, níjein numúsun roun láu sándi le derégüdaü, lúma sarágu gáriti luágu.

⁷Ába laríñagun Jesúsu lun.

—Neíbuga agáranija lun.

⁸Ába loúnabun gumándan.

—Nabúreme, madúnatina lun bebélurun núbiñoun, aríñagarügübeí dímei, ábame lareídagun numúsun. ⁹Naríñagubaa lin líra ladúga nugúya lábugiñeñadina gíñe gumadí le ínutimaati, áni añájein gíñe súdaara lábugiñe nagúmadijan. Dan le naríñagun lun ában jádaangiñe lun lídin, ñúdünti, dan le naríñagun lun ában lun liábin, ñúbinti, dan le naríñagun lun numúsun lun ladúgün furúmieguarügü cátei, adúga lumúti. Ítara lúba, luágu berérun mósu lídin sándi lueí numúsun.

¹⁰ Dan le lagáambunbalin Jesúsu le laríñagubei gumándan ligía ába laweíridun lanígi, ába laríñagun joun ja afálarubalin.

—Ninárún jáu luágu madárigidina lan wügúri weíri taffínen ni jádan numútoniña Israelítagu quei wügúri le. ¹¹ Naríñajare jun luágu sarágujaba lan já meja ibídiñejabubaña lun Búngiu ñúbintiña lueígiñe oúbaü le ñígiñe lubeí laboucha wéyu, jáma le ñígiñe lubeí lálüda, ábame jañúurun eíga lúma Abrahám, Isáac lúma Jacób lídan arúejiani le lánina siélu. ¹² Ánjeinti já yebe lúnbaña lídan jamá arúejiani ligía jaságarúba bougudín, ábame jádarúniwa lídoun luweírin-ágei lubúriga, ábame jayájuaajan, ábame lacúnrinjan jári le luweírin jagárigu.

¹³ Ába laríñagun Jesúsu lun gumándan ligía.

—Beíba búbiñoun, le uágubei bafíñera, ladügúiba bun.

Ába lareídagun músu ligía lídan óra ligía.

Lareídaguagüdünun Jesúsu límenidi Pédro

(Mr 1.29-31; Lc 4.38-39)

¹⁴ Ába lídin Jesúsu lúbiñe Pédro, ába ladárirunun límenidi Pédro roun láu abíruaü.

¹⁵ Ába lagúurun luágu tújabu, ába lagídarun abíruaü tuel, ába tásaarun, ába tagúmeserun esériwidaña.

Lareídaguagüdün Jesúsu sarágu sánditiña

(Mr 1.32-34; Lc 4.40-41)

¹⁶ Dan le lagúñedunbei, ába janúgün sarágu gürígia ja gawágutiña espíritugu wuríbatiña lun Jesúsu, ába laságajaniña espíritugu wuríbatiña jagía jaweí láurügü ában dimúrei, areídaguagüda láña sun ja sándibaña. ¹⁷ Lasúseredunbei sun le lun lagúnfulirun lé meja uágubei ladímureja proféta Isaías dan le laríñagunbei luágu Jesúsu. “Barú lumuti wadébilin, gidálei wasándigu.”

Já yebe abúseerubaña jafálaruni Jesúsu

(Lc 9.57-62)

¹⁸ Dan le laríjin Jesúsu luágu sarágu jáña lan gürígia geyégu láu, ába líchugun dimúrei lun jájiñuragun ligía jáma láni dispulugu loubáfurugun dúna. ¹⁹ Ába layárafadun ában arúfudajati lílúrudun Moisés lun Jesúsu, ába laríñagun lun.

—Maésturu, buséntina nafálarunibu le ñíjin lumúti bídin.

²⁰ Ába loúnabuni Jesúsu.

—Darítiña gasígamu júyu lun jaganoun ñi, gádibutiña gíñe dunúru, ánjeinti áu le Wügúri Garaúwarügüti, madáritina ni jalába lan nabálachagüdei nichúgü.

²¹ Laríñaga ában jádaangiñe láni dispulugu lun.

—Nabúreme, buséntina nafálarunibu, lárigiñeme loúnwen nóguchi, buná neíme, ábame nafálarunibu.

²² Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúejian Búngiu lun jábununiña jegéburi.

Lagálumaruni Jesúsu garábali lúma lugúdi barána

(Mr 4.35-41; Lc 8.22-25)

²³ Ába ládinun Jesúsu tídoun ugúnein, ába jóúdin láni dispulugu lúma. ²⁴ Sódini ába láfuragun ában garábali jéreti, ába lebélujan lugúdi barána tídoun ugúnein. Larúmuguñati Jesúsu. ²⁵ Ába jagágudajani láni dispulugu, ába jaríñagun lun.

—¡Wabúreme, séfu báwa! ¡Wadíbiragua!

²⁶ Ába loúnabuniña.

—¿Cásan uágu janúfudeda? ¡Lougua taffínen jugúya le!

Ába lásaarun, ába ladeínjan lun garábali lúma barána, ába lagálumadun. ²⁷ Ába laweíridun janígi, ába jaríñagun.

—¿Cáteisán wügúri le, agáamba lubálin garábali lúma barána?

*Laságarun Jesúsu espíritugu wuríbatíña jádaangiñe bián wügúriña Gadárana
(Mr 5.1-20; Lc 8.26-39)*

²⁸ Dan le lachúlürün Jesúsu loubáfurugu dúna, jageíroun Gadárana, ába jáfuridun bián wügúriña lídaangiñe buri umúajaü achigíti luágu dúbü, ába jayábin luágun. Biángubei jagía, jáuñanu espíritugu wuríbatíña áni janárimetiti jagáñi darí lun siña lan jásiügürin güriñgia lídaangiñe úma ligía. ²⁹ Ábati jagúarajan ítara.

—¿Cásan uágu bemétera wámoun, Jesúsu Liraú Búngiu? ¿Biábiña asúfuriragüdawa lubáragiñe dan le lánina asúfuriruni?

³⁰ Níñanu sarágu búiruju eíga madíse nígiñe, ³¹ ába jayúmuragun espíritugu wuríbatíña ja lun Jesúsu, jaríñaga lun.

—Ánjawa baságara, ígirabá lun webélurun jádoun búiruju ja.

³² Ába laríñagun Jesúsu joun.

—Jelbati jádoun!

Ába jáfuridun espíritugu wuríbatíña jagía jádaangiñe wügúriña jagía, ába jebélurun jádoun búiruju, ába jáguragun búiruju jagía jóingua lueígiñe ában gudúungu, ába jáburujan dúnarugun, ába jañáradagun.

³³ Ába janúfudedagun ja ónigirubaliña búiruju, ába jefbaagun, jachúlün aúdübü, ába jabájüdaguni le asúseredubei joun búiruju lúma joun wügúriña já buga jáubaña espíritugu wuríbatíña. ³⁴ Ábati jayábin sun lílana fulásu ligía lúmoun Jesúsu, ába jayúmuragun lun lún láfuridun jageíragiñe.

9

*Lareídagugüdüün Jesúsu ában wügúri derégüdaali
(Mr 2.1-12; Lc 5.17-26)*

¹ Ábati ladinun Jesúsu tídoun ugúnein tugúya, ába lánjiñuragun loubáfurugun dúna, ába lachúlürün lageíroun. ² Ába janúgün ában wügúri derégüdaali lun, roun tídan lubárari. Dan le laríjmbalin Jesúsu luweírin jafiñen, ába laríñagun lun sánditi ligía.

—Ragúba gurásu, niraú, ferúdnawati bífígoun.

³ Níñanuti jádaangiñe arúfudajatiña lilúrudun Moisés, aríñagutiña jóinguarügü. “Lanábaguñeigan wügúri le Búngiu láu dimúrei le laríñagubei.” ⁴ Queíti subúdi lubálin Jesúsu le uágubei jasáminara, ába laríñagun joun.

—¿Cásan uágu luríbanbei jisáminan ítara? ⁵ ¿Cátimasan ménreengúnbei laríñawagúniwa. “Ferúdnawati bífígoun”, ódi “Sarába, befbuga”? ⁶ Narúfudaaliti joun luágu gabáfu nan, áu le Wügúri Garaúwarügüti, lun ferúduna nan figóu.

Ába laríñagun lun sánditi ligía.

—Sarába, budáboun bubárari, beíba búbiñoun.

⁷ Ába lásaarun sánditi ligía, ába lídin lúbiñoun. ⁸ Dan le jaríjinbaalin güriñgia cátei le, ába laweíridun janígi, ába jadímurejan buíti luágu Búngiu luágu líchuguni ubáfu le joun wügúriña.

*Lagúarun Jesúsu lun Matéo lun lánime dispulu
(Mr 2.13-17; Lc 5.27-32)*

⁹ Ába lídin Jesúsu nígiñe, ába laríjinina, áu le gíribei Matéo, le abúrtijabarun líburu to. Agúburajatina meja liseínsuna gumádi, ñun níña lídan nubára lánina agúburajani wéyu ligía dán le lásügürünbei Jesúsu nígiñe. Ába laríñagun nun.

—Falábana, queímoun núma queísi náni dispulu.

Ába násaarun, ába nafálaruni.

¹⁰ Lárigiñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gaffínguntiña eíga lúma úara jáma láni disípulugu. ¹¹ Dánti le jaríjini fariseógu cátei le, ába jaríñagun joun láni Jesúsu disípulugu.

—¿Ída liñásan leígnbei jumáesturun jáma agúburajatiña liseínsuna gumádi lúma jáma ámu gaffínguntiña?

¹² Ába lagáambuni Jesúsu, ába laríñagun joun.

—Ja magádiebaña mabúseeruntiña surúsia, ja sándibaña, jagía busénbaña surúsia.

¹³ Furéndeí jumeí ca lan laníchigubei le uágubei laríñaga Búngiu tídan Lerérun. “Buséntina lun gudemejabu jumá, máma lun jadágaragüdün anímaalu nun.” Máma niábiña áluajaña ja magádiebaña ligíbugiñe Búngiu, niábiña áluajaña gaffínguntiña lun jasáansiruni ligáburi jóuserun.

Jálügüdüni Jesúsu libígürü ayúnaruni

(Mr 2.18-22; Lc 5.33-39)

¹⁴ Ábati jayábin ja láni Juan le abásteragüdjabei disípulugu, ába jaríñagun lun Jesúsu.

—¿Ánsan wagía jáma fariseógu ayúnara wabeí sarágu, ánjaña báni disípulugu mayúnaruntiña?

¹⁵ Ába líchuguni Jesúsu jémpulu le joun luágu iséri larífudajan lúma binádu, laríñaga.

—¿Gayáraati funági jíruñu jamá ja amísurajoubaña lídoun ában maríei dan le niján lan adári jáma ñi? Lachúlürüba wéyu lun lúadun adári jáma, ligíaalime jayúnarun.

¹⁶ ‘Siñáti táfadajóun gamísa ñilújaru táu murúsun to derégiru ladúga dánme le tacháwaragun to derégiruboun ábame tajeíridagun to ñilújaruboun, ábatimámeti laweíridun jeíríti. ¹⁷ Siñáti giñe léserúniwa bínu le isérgili lídoun guéru le binádujali, ánjein adúguwa ítara, ábame lafaúñchün guéru dánme le liñürun bínu, férídiwa ligíameti guéru, férídiwa bínu. Ligía lúnti lubeí léserúniwa bínu iséri lídoun guéru iséri, ítara lúba lesériwidun biángubei.

Liraú Jáiro túma wúri to agúurubarun lanáangun Jesúsu

(Mr 5.21-43; Lc 8.40-56)

¹⁸ Dan ñíñein lan Jesúsu arífudajei sún buri cátei le, ligía liábin ában ábuti jádaangiñe juríu, ába lájuduragun ligíbugiñe, ába laríñagun lun.

—Sun líña toúnwen nisáani, ánjabu ñúdün lun bíchuguni bújabu tuágu, táguyuguba.

¹⁹ Ába lásaarun Jesúsu, ába lídin lúma ñi jáma láni disípulugu. ²⁰ Ñíñounti ában wúri úmada sánditu, dúusu irúmu táu láu lésejan jítaü tídaangiñe, ába tayárafadun lun Jesúsu lanáangiñe, ába tagúurun luágu táru lanáangun, ²¹ taríñaga túnguarügü. “Láurügü nagúurun tuágu lanáangun nareídaguba.” ²² Ába lagáragun Jesúsu, ába laríjinun, ába laríñagun tun.

—Ragúba gurásu niraú, areídaguaadibu ladúga baffínen.

Lúmagiñe óra ligía ába tareídagun.

²³ Dan le lachúlürün Jesúsu lúbiñoun buga ábuti ligía, dan le laríjiniña ínaajatiña aráanseña lun ábunajani, añája gürgia areíncha, ²⁴ ába laríñagun joun.

—Furíjuma yágiñe, moúnwengiru irájü to, tarúmuguña.

Ába jéjerajan láu. ²⁵ Dan le furígüda láaña sun gürgia, ába lebélorun, ába lárügüdüni tújabu irájü tugúya, ába tásaarun. ²⁶ Ába labúruchagun luágu le asúseredubei lídan sun fulásu ligía.

Lareídagugüdüni Jesúsu bián maríjintiña

²⁷ Dan láfuridun Jesúsu ñígiñe, ába jóudin bián wügúriña maríjintiña lárígi, agúarajeina ítara.

—¡Gudéme wamá bun, amúrü le ladúgawagun Davíd!

²⁸ Dan lebélorun Jesúsu múnadoun, ába jachúlürün maríjintiña jagía lúmoun, ába laríñagun joun.

—¿Affñetün luágu gayára lan nareídaguagüdünün?

Ába jaríñagun.

—Ánja, affñetiwa, Wabúreme.

²⁹ Ába lagúuruni Jesúsu jágu, ába laríñagun joun.

—Ítaralá quei ligáburi jaffñen.

³⁰ Ába léfegechun jágu, ába léredun Jesúsu jawágu lun jóuchun lun masúbudirúniwa lan luágu ligía lan agáranijabei joun.

³¹ Quei jáfuridun nígiñe, ába jabájüdaguni le ladúgübei Jesúsu lídan sun fulásu geyégua láu.

Lareídaguagüdün Jesúsu ában meréngaditi

³² Dan le áfurideina jamá, ligía jayábin fiú gürígia láu ában wügüri meréngaditi, gawáguti ában espíritu wuríbati, ába jayábin láu lun Jesúsu. ³³ Lárígiñe laságaruni Jesúsu espíritu wuríbati ligía lueí meréngaditi ligía, ába lagúmeserun adímureja. Ába laweíridun janígi gürígia, ába jaríñagun.

—Maríjiñajágidiwa líbe le jageíra Israelítagu.

³⁴ Jaríñagaídan sun fulásu geyégua ti fariséogu luágu láu lan lubáfu Máfia le jábuti espíritugu wuríbatiña laságaja Jesúsu espíritugu wuríbatiña.

Lugúdemejabu Jesúsu joun gürígia

³⁵ Eíbuga lumúti meja Jesúsu sun fulásu arúfudajeina tídan jalgílisin juríu, apúrichijeí ugánu buíti luáguti arúeijani le lánina siélu, areídaguagüdeina sun luwúyeri sándi lúma gáriti. ³⁶ Dan laríjiniña gürígia, ába jagúdemedagun lun, ladúga nidjjeri jamá, magúraasun jagía, camá mudún ja moúniritiña. ³⁷ Ába laríñagun joun láni dispulugu jabúgürü gürígia jagía.

—Sarágu jáña gürígia buséntiña jagáambuni ugánu luáguti asálbaruni, ítara jáña quei nádü lun lalúbajoún, áni louguatiña ñadágimeintiña. ³⁸ Lúnti lubefti jamúriajan lúma Labúreme nádü lun loúnajan ñadágimeintiña lun japúrichijan joun.

10

Láni Jesúsu dúusu dispulugu

(Mr 3.13-19; Lc 6.12-16)

¹ Ába lagúarun Jesúsu joun dúusu láni dispulugu, ába líchugun ubáfu joun lun gayára lan jaságajan espíritugu wuríbatiña jaweí gürígia lúma lun jareídaguagüdün sun luwúyeri sándi lúma gáriti. ² Niján jjíri dúusu láni Jesúsu dispulugu jagía. Furúmiñeti, Simón le méme gíribei Pédro, lúma Andrés le lamúlen, Jacóbo lúma Juan le lamúlen—lirájüñü Zebedéo, ³ Felípe, Bartolomé, Tomás, núma, áu Matéo le agúburajabei meja liseínsuna gumádi, Jacóbo le liraú Álfeo, Lébeo, le méme gíribei Tadéo, ⁴ Simón—ában meja wügüri áfaaguti lun jawáanserun juríu, lúma Júdas Iscarióte, le alúgurubalin Jesúsu.

Louñajaniña Jesúsu dispulugu apúrichija

(Mr 6.7-13; Lc 9.1-6)

⁵ Dan louñajabaliña Jesúsu dúusu ja apúrichija, ába laríñagun joun ítara.

—Mídmun jamá le ñí jamuti ja mámabaña juríu, mebélú jugúyame lídoun buri fulásu le láni Samária, ⁶ jabúgürülá gürígia féridijaña ja Israelítagu jídmun. ⁷ Jeíba, apúrichijeina luágu yaráfaali lan larúeijan Búngiu. ⁸ Areídaguagüda jumáña ja gawágutiña gumeín luágu jára, jáma ja gawágutiña ámu luwúyeri sándi, sarágüda jumá jiláaña, sagá jumaña espíritugu wuríbatiña. Mafáyeijántün lun jibjini ubáfu le, magúburaja jumá gñe luágu.

⁹ Manúga jumá seínsu, ¹⁰ manúgün jugúyame lágei ni cáta. Ábanrügütá simísi janúga, manúgün jugúyame sabádu ni bádun, ladúga le ñadágimeinbei garíchatí lun leígin lídaangiñe luwádigimari.

¹¹ ‘Dánme le jachúlürün lídoun ában ubúruo o ában lan liraúraü fulásu, ábame jálugun güriqia ja ánjatiña lun jerésibirunün ñi, ábame jeréderun jáma jábiñe darí jídin. ¹² Dánme jebélurun tídoun ában múna, ábame jabúsurun, ayúmuraqueina magádiei jawágu tílana múna tugúya. ¹³ Ánjaün jerésibira tílana múna tugúya, ígira jumei jabúsurun jáma, ánjaün merésibirun jamá, giríbugüda jumei busúguauí ligía lun úa lan magádiei joun. ¹⁴ Ánjaüiti merésibirun jamá, mája jagía jagáambunün, ábame jáfuridun tídaangiñe múna tugúya o lídaangiñe lan fulásu ligía, ábame jáfuriduni calíqui lueígiñe jugúdi lun jarúfuduni luágu mabuídun lan jagáburu güriqia jagía, ígira jumáña quei jádáriragun jóungua. ¹⁵ Ninárün jáu luágu dánme lan le lachúlürün wéyu lánina agúseruni, weírítimaabei jasúfurirun lílana fulásu ligía sügú láu jasúfurirun lílana Sodóma lúma Gomórra.

Eíbaajoüni le lúnbei jasúfuriruni láni Jesúsu disípulugu

¹⁶ ‘Nóunajaadüntia quei mudún jagánaguouün ánimaalu gáñitiña. Aráanseñu jumá lubeiti ítara quei jéwe, áni ítara jumá quei únjun madúgünga wuríbani. ¹⁷ Touñigi jumá ladúga j jurú. ¹⁸ Janügúwaba jagíbugiñoun gumádimatiña lúma jagíbugiñoun urúeigu lueígiñe jesériwidun nun, ítara lúba gayára lan jádímurejan nuágu jagíbugiñe, lúma jagíbugiñe ja mámabaña jurú. ¹⁹ Dánme le jederegerúniwa joun lúrudugu, májüchúra jumá luágu cába lan jaríñaga o ída lúba lan jaríñaguni, ladúga dánme lachúlürün óra lun jádímurejan, líchugubei Búngiu le lúnbei jaríñaguni jun. ²⁰ Mámaba jugúya adímureja, láni Júguchi Búngiu Espírítu, ligíaba adímureja jídaangiñe.

²¹ ‘Jalúgurubaña wügúriña jabríña guánarü lun jafarún jilágubei, alúgura jamáñame agúbüriqiu jasáanigu, garábagua jagíame isáanigu jawágun jagúbüriqiu lun jáfaragüdüniña. ²² Jeyéregudúba lun sun ubou nueígiñe, áni le derégüdaguati darí lúmoun lagúmuchun libágaru, lebéuruba siélun. ²³ Dánme le jeíbaajoün lídan ában fulásu, ábame janúrajan lídoun ámu, ninárün jáu, niábinyaba, áu le Wügúri Garaúwarügüti, lubáragiñe jeíbuguni sün buri jabúrugute Israelítagu.

²⁴ ‘Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti gíñe jasúfurirun. ²⁵ Lúnti gúndan lan disípulu láu lachúlürün ítara da quei lumáesturun, lúma músu quei liyúbudiri. Ánjein aríñawagúa lubei nuágu luágu jábutiná máfianu, gúbume janábawagua ja afálarubalina.

Cába lan ueí lanúfudedúa

(Lc 12.2-9)

²⁶ ‘Ligía manúfudeda jumá lubei jawei güriqia,’ líña Jesúsu joun láni disípulugu lubáragiñe loúnajaniña apúrichija. ‘Úati cátei darúguati láu lun machúlaagunbei lan, úa ni cáta le arámudagúati lun masúbudirúnwabei lan. ²⁷ Le naríñagubei jun lídan lubúriga aríñaga jumei lídan larúgounga, le naríñagubei jun ibídiñoun joun ámu, wágua jumei íñugiñe tibíti múna. ²⁸ Manúfudeda jumá jawei ja gayáraabei jáfaruni úgubu jilágubei áni siñáti jáfarunun uwáni, Búngiu le gayáraabei lasúfuriragüdüni úgubu túma uwáni máfiougati lun sun dan, ligía lúnbei janúfudedun lueí.

²⁹ ‘¿Malúgurúntiña funági bián jarájüñü dunúru luágu ában liraúraü seínsu? Áni máburujantu ni ában jádaangiñe múarugun ánjein mabúseerun lubei Júguchi Búngiu. ³⁰ Ásta ídiburi le jábulugubei, abájüdüwati ában ában. ³¹ Manúfude jumá lubeiti, gebégütün sügú jáu dunúru.

Ja mayéedagúnbaña láu Jesúsu jagíbugiñe güriqia

(Lc 12.8-9)

³² ‘Sun ja arúfudagutiña jóungua jagíbugiñe güriqia luágu númagiñeñánu lan, naríñaguba gíñe ligíbugiñe Núguchi Búngiu le siélubei luágu nánigu jamá. ³³ Ja ayéedagutiña náu jagíbugiñe güriqia, nayéedaguba gíñe jáu ligíbugiñe Núguchi Búngiu le siélubei.

Le busénbei lun lafálaruni Jesúsu

(Lc 12.51-53, 14.26-27)

³⁴ ‘Marítagua jumátia luágu niábiña lan lúnrgü níchugun gáluma ubouágu, máma niábiña íchiga gáluma, niábiña íchiga wuríbu. ³⁵ Láu niábin, jafánreinraguba ja mafñebaña nuágu jáma ja afñebaña nuágu, lawúribujaba wügúri lúma lóguchi, isáani túma tóguchu, ídiñu túma tágürü, ³⁶ lagáganiraguba cáda ában jáma lidújeñu.

³⁷ ‘Le jínsiñejabuti lun lóguchi o lóguchu sügú láu nísíñe lun, madúna lumúti nánigu lan, le jínsiñejabuti joun lirájüñü sügú láu nísíñe lun, madúna lumúti gñe nánigu lan.

³⁸ Le mawándunti asúfuriruni líbe lasúfurirúniwa luágu gurúwa lun lafálarunina, madúna lumúti nánigu lan. ³⁹ Le busénbei leséfuragun lúngua ya ubouágu lefériDIRUBEI IBÁGARI le magúmuchadibei siélu, ánjein le ánjabei lefériDIRAGUN lúngua ya ubouágu nueígiñe, libíjubei íbágarí magúmuchaditi siélu.

Ja lúnbaña jerésibiruni jafáyeiruaja lúmagiñe Búngiu

(Mr 9.41)

⁴⁰ ‘Le erésibirutün resíbi lumúti, le erésibirutina resíbi lumúti le ouñajabalina. ⁴¹ Le erésibiruti ában proféta ladúga liábin láu líri Búngiu, lerésibirubei afáyeiruajau le libíjubei ában proféta, le erésibiruti ában wügúri buíti ladúga lubuídun, lerésibirubei afáyeiruajau le lerésibirubei ában wügúri buíti. ⁴² Furúmieguarügü le íchuguti ában wéru dúna dílti lun ában jádaangiñe únabugutiña ja ladúga nánigu jamá, libíjuba lafáyeiruaja lúmagiñe Búngiu.

11

Ja louñajabaña Juan le abásteragüdajabei adímureja lúma Jesúsu

(Lc 7.18-35)

¹ Dan le lásurunbei laríñaguni Jesúsu le lúnbei jadúgüni láni disípulugu, ába lídin ñgígiñe lan larúfudajan, apúrichija ligíame lídan buri fulásu geyégua láu ubúrgu le Capernaúm.

² Dan ligía, furísunruguein Juan, ába lagáambun luágu sun le ladúgübei Cristu. ³ Ába louñajan biáma jádaangiñe láni disípulugu aríjei Jesúsu lun jalügüdüni itara.

—¿Amúrü Cristubei le lúnbei liábin ódi lúnti wagúraban ámu?

⁴ Ába laríñagun Jesúsu joun.

—Jeíba jaríñageime le jaríjubei lúma le jagáambubei lun Juan. ⁵ Jabájüdagúame lun luágu aríjaaña lan já meja maríjinbaña, eíbuga já meja meíbugunbaña, areídagua jagía já meja gawágubaña gumein luágu jára, agáamba já meja magáambubaña, sará jagía jiláaña, apúrichijoua luágu ugánu buíti le lánina asálbaruni joun gudémetiña. ⁶ Áni fuleíseiwati le mefériDIRUNBALIN lafíñen nuágu.

⁷ Dan le jóúdin, ába lagúmeserun Jesúsu adímureja joun güirgía luágu Juan, ába laríñagun.

—¿Cásan jídinbei meja aríja lídan fulásu le mageírawati? ¿Ában wügúri le medéraaguagüdünti larítangun queísi ában mabúru le lánjingichun garábali? ⁸ Ánjein máma lubei líña, ¿cáti jídinbei aríja? ¿Ában wügúri wéndeti ladáurangun? Subúsi jun luágu ja lan wéndeabaña adáurangun, tídaañanu lan jában urúeigu. ⁹ ¿Cáteiti jídinbei aríja? ¿Ában proféta? Ánja, ligía, áni ában wügúri weiriguti sügú láu ában proféta Juan. ¹⁰ Ligía le uágubei taríñaga Lerérun Búngiu.

Nouñajañein nouñagüle bubáragiñe,

lun laráansejani úma bubá.

¹¹ Ninárün jáu, jádan sun güirgía, úagili ni ában weiriguti lueí Juan le abásteragüdajabei, láu sun líra, le únabutimaabei lídan arúejani le siélubei weírítimaati lueí le anúgarügübalin ugánu luágu arúejani ligía.

¹²“Lúmagiñe dan le liábinbei Juan le abásteragüdjabei darí lúmoun dan le, murúgu jáña güriña áluga jebélurun lídoun larúeijan Búngiu. Ja ebélurubaña, ragú jamuti jabára ñi queísi ában cátei le gebégiti sarágu. ¹³Lilúrudun Moisés jáma sun profétagu, adímurejatiñá meja luágu larúeijan Búngiu, láu liábin Juan, ába lagúmeserun jerérún profétagu jagía luágu larúeijan Búngiu agúnfulira. ¹⁴Ánjeinti busén jubeí jafíñerun, Juan ligía proféta Elías lé meja lúnbei liábin lubáragiñe liábin arúejiani ligía. ¹⁵Ja garígeirugubaña lun jagáambun, agáamba jamá.

¹⁶“¿Cábasan úma núaradaguágüdaña güriña ja lánina dan le? Magúndaatiña ni ca áu, ítara jáña quei irájüñü ja añúurubaña adíbirija mágidirugu, ába jagúarajan joun jíbiriugu ítara. ¹⁷“Íñaajatiwa fídu jun, mabínajantün, erémuja wagía urému jírtutu jun, mayájuntün.” ¹⁸Ladúga liábin Juan meígin líña buídu quei leígin furúmieguarügü, mátun, ába jaríñagun luágu níjein lan espírítu wuríbatí lídan. ¹⁹Lárigiñe, ába niábin, áu le Wügúri Garaúwarügüti, jou áu quei leígin furúmieguarügü, gurá, ába jaríñagun luágu geígadi nan, gátadi, jamáda áu gafígountiña jáma agúburajatiña liseínsuna gumádi. Wel, ja chúbána áu, subúdi jamúti luágu buídu lan le ladúgübei Búngiu láu lichú láu.

Lílana buri fulásu ja magáambadibaña

(Lc 10.13-15)

²⁰Ábati lagúmeserun Jesúsu adeíña joun güriña lídan fulásu buri le ñi lubeí meja ladúgei líbe-ágei lání miláguru, ladúga masáansirun jamágili lan jóuserun. Ába laríñagun.

²¹—¡Fugiábu jugúya Corazínna! ¡Fugiábu jugúya Betsáidana! Lun jamúga lídan lan ubúrugu le gíríbei Tíro lúma Sidón ladúgüwa miláguru buri le adúgübei jagánagua, binárü jamúga lasáansiragua jagáburi lílana, ába jamúga jarífuduni láu jadáuragun lúdu lúma balígi. ²²Naríñajare jun luágu dánme lan lachúlürün wéyu lánina agúseraguni, weírítimaabei jabeichún sügú jáu ja Tírobaña jáma ja Sidónbaña. ²³Amúrúti ubúrugu le Capernaúm, ¿jarítaguatibu luágu weírígubadibu lan queísi siélu? Maweírígúnbadibu ítara quei maweírigin lan máfiougati. Ladúga lun jamúga lídan lan ubúrugu Sodóma ladúgüwa miláguru le adúgübei bídan, níjeingua jamúga fulásu ligía lúmoun dan le. ²⁴Naríñajare jun luágu lídan lánme wéyu lánina agúseraguni, weírítimaabei jabeichún sügú jáu Sodómana.

Jigóugu lun Jesúsu, eméraqua jumámuga

(Lc 10.21-22)

²⁵Lídan dan ligía, ába laríñagun Jesúsu lun Búngiu.

—Adímurejatina buíti buágu, Núguchi le Labúremebei siélu lúma ubou, ladúga bará-muduni buri cátei le jaweí chu táu jáma gunfaráandatiña, ába baráfuduni joun ja mafún-rendeirungiñábaña queísi irájüñü. ²⁶Ánja, Núguchi, ladúga ítara líña lan babúseeruni.

²⁷“Derége láali Núguchi sun cátei nun. Ibídíñeti Búngiu Irájü ni ca un buídu buídu lueídügüya lun Búngiu Úguchili, ibídíñeti giñe Búngiu Úguchili ni ca un buídu buídu lueídügüya lun Búngiu Irájü jáma ja únbaña labúseera Búngiu Irájü lasúbudiragüdüni.

²⁸Jigóugu númoun, sun jugúya ja bucháañabaña uágu lárígi juwádigimari lúma líjürü janúgün, eméraquagüda námugaün. ²⁹Resíbi jumeí naráfudajan, furéndeí jugúyame númagiñe, láu gagúraasun nan, ñulú tugúya nanígi, ábame jadárirun eméraquni tun juwáni. ³⁰Ménreengunti lun jesériwidun nun, juáliti giñe anúgüni le níchugubei jun lun janúgüni.

12

Játünjan disípulugu túriugu lídan wéyu le eméraquagülei

(Mr 2.23-28; Lc 6.1-5)

¹Luágu ában wéyu le eméraquagülei eíbugeina líña Jesúsu jáma lání disípulugu labádinagua nádü. Ába jalámachun lání disípulugu, ába játünjan lílewe túriugu, ába jeígini líla. ²Dan le jaríjini fariséogu cátei le, ába jaríñagun lun Jesúsu.

—Añájatia báni disípulugu adúga wadágimanu le mouñ lumuti ladügún lídan wéyu le eméraaguagülei.

³ Ába laríñagun joun.

—¿Malíjangidün luágu lé meja ladügübei David luágu ában dan, dan le lámachunbei, ligía jáma ja úarabaña lúma? ⁴ Ába lebélorun tídon lúban Búngiu, ába leígin tídaangiñe fein to sagráuboun to moun luboún yebe leíginun, ni ligía ni ja úarabaña lúma, fádírígu rügúñanu lun jeíginun fein tugúya según lilúrudun Moisés, áni mámati figóu le ladügübei David ligíbugiñe Búngiu. ⁵ ¿Ódi malíjangidün lídan lilúrudun Moisés luágu ñadágimein jamá fádírígu tídan lúban Búngiu lídan wéyu le eméraaguagülei áni máma figóu? ⁶ Naríñajare jun luágu níjein lan ában weiriguti sügú táu lúban Búngiu ya, áu. ⁷ Jugúya, úagili gunfaráanda jumáni le laríñagubei Búngiu tídan Lerérun. “Jímein numúti lun gudémejabu jumá sügú láu jadágaragüdün anímaalu nun.” Lun jamúga gunfaráanda jumáni, madímurejaantün jamúga wuríbati jawágu güriáya ja madügünbaña ni cáta wuríbati. ⁸ Gabáfutina giñe, áu le Wügúri Garaúwarügüti, lun naríñagun cába lan gayára ladügúniwa lídan wéyu le eméraaguagülei.

Wügúri le jiláalíbei ában lújabu
(Mr 3.1-6; Lc 6.6-11)

⁹ Ába lídin Jesúsu ñígiñe, ába lebélorun tídon jalígílin juríu. ¹⁰ Ñínein ában wügúri jiláali ában lújabu, queiti busén jamá fariséogu jáma arúfudajatiña lilúrudun Moisés jadárirun lichára Jesúsu, ába jaríñagun lun.

—¿Gayáraatísan lagáranijoun lun ában sánditi lídan wéyu le eméraaguagülei?

¹¹ Ába laríñagun Jesúsu joun.

—¿Ca jídaangiñe, ánjein galúgün lubei ában mudún, ába teíguadun lídon ában wélu wéyu le eméraaguagülei, lun mídinbei lan aságaroun? ¹² ¿Ma gebégítimaati ában wügúri sügú táu ában mudún! Gayáraati lubeiti ladügún buíti lídan wéyu le eméraaguagülei.

¹³ Ába laríñagun lun wügúri ligía.

—Tulébei bújabu.

Dan le látuleruni, ába lareídagun quei le ában. ¹⁴ Ába jáfuridunga fariséogu, ába jagúmeserun áluaja ída lúba lan jáfaruni Jesúsu jilágubei.

Lé meja laríñagubei Isaías luágu Jesúsu

¹⁵ Dan lasúbudirunbalin Jesúsu cátei le, ába lídin ñígiñe, ába jafálaruni sarágu güriáya, ába lareídaguagüdúniña sun sánditiña. ¹⁶ Ábaja laríñagun joun lun maríñagun jamáni cáteiñein lan. ¹⁷ Lasúseredunbei líra lun lagúnfulirun lé meja laríñagubei proféta Isaías.

¹⁸ Niján numútun le nanúadirubei lun lesériwidun nun, le jínsiñebei nun, le áubei nagúndaara, líña Búngiu.

Níchugubei náni Espíritu luágu,

ábame larúfudajani joun ja mámbaña juríu ída lúba lan gayára lan júaradun nigíbugiñe.

¹⁹ Mageíndagunbei, magúaragun,

mareínjabei úmada.

²⁰ Gudémejabubei joun güriáya ja gudémebaña queisi ában mabúru le barúguaali, lúma joun ja débilibaña lídan jafíñein queisi ában lámpu le ñegúmemeeli.

Ítara méme lúba daríme adúga láali larúeijan le úaraguabei.

²¹ Ábame jíchuguni ja mámbaña juríu jeménigi luágu.

Laríñawagún luágu lubáfu lan Máfia lúmabei Jesúsu
(Mr 3.19-30; Lc 11.14-23, 12.10)

²² Ábati lanügúniwa ában wügúri lun Jesúsu, maríjin líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába laríjin, adímureja ligía. ²³ Ába laweíridun janígi sun ja ñibaña, ába jaríñagun.

—¿Niján funásan ladúgawagunbei Davíd?

²⁴ Dan le jagáambunbalin fariséogu cátei le, ába jariñagun.

—Wügúri le, láu lubáfu Beelzebú, le Máfia, le jábuti espíritu wuriñatiña laságajaña.

²⁵ Quei subúdi láani Jesúsu le jariñagubei, ába lariñagun joun.

—Furúmieguarügü arúejani le afánreinraguti lun jageíndagun jámagua, lagúnrinch-aguba, ánjaña gñe afáreinragua lílana ában ubúru gu o ában lan família ladúga wuribu, siñabei jadúrurun. ²⁶ Ítara líña giñéti, ánjein laságara Máfia máfia guánarügü, ligía guánarügü afánreinragubei, áni ¿ída lubáti ladúrurun lubáfu ítara? ²⁷ Jugúya, aríñagatün luágu láu lan lubáfu Beelzebú, o Máfia, naságaja espíritu wuriñatiña, ánjein ítara líña lubei, ¿cáti íchugubei ubáfu joun ja jánigu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulfeigua jumá. ²⁸ Áu, láu lubáfu láni Búngiu Espiritu naságaja espíritu wuriñatiña. Arúfuda lumúti líra luágu chúlújali lan larúeijan Búngiu jídoun.

²⁹ ¿Ída lubági gayára lan lebélorun ában gürígia lúbiñoun ában wügúri jéreti lun lanúgüni lílago ánjein magúragun lan furúmiñe? Ítara rügúñein lun gayára lan lanúgüni lílago.

³⁰ Le mámabei númagiñe, náganiñein, le míderagun lumútina, güríngua lumúti le nadúgübei.

³¹ Jugúya aríñagatün luágu láu lan lubáfu Máfia naságaja espíritu wuriñatiña, áni láu lubáfu Sífiri Sándu naságajaña. Ligía naríñagunbei jun luágu gayára lan ferúdnawa lan sun figou luma sun wuriñati le jariñagubei gürígia, ánjein lun jadímurejan wuriñati luágu Sífiri Sándu, siñabei ferúdnawa lan figou líra. ³² Furúmieguarügü gñe le aríñaguti furúmieguarügü cátei wuriñati nuágu, áu le Wügúri Garaúwarügüti, gayáraati ferúdnawa lan, ánjeinti le adímurejati wuriñati luágu lubáfu Sífiri Sándu le nídaanbei, úabei ferúdnawa lan ni lídan ubou le, ni lídan le ában.

*Luágu lin ídibu lasúbudirúa ca lan luwúyeribei
(Lc 6.43-45)*

³³ Ánjein buídu lubei ídibu, buídubei gñe lin, ánjein mabuídun lubei ídibu, mabuídunbei gñe lin. Luágu lin ídibu lasúbudirúa ca lan luwúyeribei. ³⁴ Jarásan jéwe jugúya le! Siñáti jadímurejan cátei buíti, wuriñatiñgan. Cátei le buinbei tídan anígi, ligía lariñagubei iyúmaü. ³⁵ Wügúri le buídubei, cátei buíti lariñagubei ladúga tídaañein lan lanígi ubuíduni, wügúri le wuriñabei, cátei wuriñati lariñagubei ladúga tídaañein lanígi wuriñati. ³⁶ Naríñajare jun luágu dánme lan lachúlürün luwéyuri agúseruni, sun gürígia geféenbaña luágu sun dimúrei málati le jariñagubei, ³⁷ ladúga luáguba le bariñagubei bagúseragúdúwa, ligíaba arúfudei ánjein gadúnrun bubei lúmoun madúnrun ban.

*Jamúriajan gürígia wuriñatiña seíni láuti milágu
(Mr 8.12; Lc 11.29-32)*

³⁸ Ába jariñagun jádaangiñe fariséogu jáma arúfudajatiña lilúrudun Moisés lun Jesúsu.

—Maésturu, buséntiwa waríjin badúgün ában seíni le láuti milágu luágu lúmagiñe lan Búngiu biábin.

³⁹ Ába lariñagun Jesúsu joun.

—Gürígia wuriñatiña áni magúnfuliruntiña amúriajatiña seíni láuti milágu, míchugunbei ámu seíni joun luei le asúseredubei lun proféta Jonás. ⁴⁰ Ladúga quei leréderun Jonás úruwa wéyu úruwa áriebu lurágeirugu údu, ítara lúba gñe neréderun, áu le Wügúri Garaúwartügüti, lídan numúaja úruwa wéyu, úruwa áriebu, según ligáburi jabájüdüni jurú dan. ⁴¹ Já meja aganoúbaña Nínive jásaaruba lídan luwéyuri agúseruni dánme jagúseragúdúniwa gürígia ja lánina dan le, ábame jíchugun jadúnrun ladúga sáansiguati jagáburi Nínivena dan le lapúrichijanbalin Jonás lugánute Búngiu joun, áni anája áu, ában weíríguti sügú láu Jonás, áni májatün jagáambunina. ⁴² Tásaaruba

gíne lurúeitena Súru lídan luwéyuri agúseruni dánme le jagúseragüdúniwa gürígia ja lánina dan le, ábame tíchugun jadúnrun, ladúga núbintu lídaangiñe lidíse-ágei ubouú lun tagáambuni lichú láu Salomón, áni anája áu, ában weíríguti sügú láu Salomón, áni májatün jagáambunina.

Espíritu wuríbati le agíríbuduti

(Lc 11.24-26)

⁴³ ‘Dan le láfuridun ában espíritu wuríbati lídaangiñe ában gürígia, ába ebugañaja lan lídan fulásu mábeiti áluaja leméraagun, dan madári láani, ába laríñagun lúnguarügü. ⁴⁴ “Nagíríbuda tídoun núban to ñígíne lubei náfurida.” Dan le lagíríbudun, ába ladáriruni gürígia buga ligía queísi ában múna to málatu, abuídajouáaru, aráanserúa. ⁴⁵ Ábati lídin, ába líábin jáu sedú espíritugu wuríbatimaatiña sügú láu, ába jebélurun sun jagía agánawa lídan gürígia ligía, wuríbatimájaliti le gádaanbalin sügú láu meja furúmiñe. Ítara lúba gíñeti lasúseredun joun gürígia wuríbatíña ja lánina dan le.

Lúguchu Jesúsu jáma lamúlen

(Mr 3.31-35; Lc 8.19-21)

⁴⁶ Ñígíli Jesúsu adímureja joun gürígia, ligía tiábin lúguchu jáu lamúlen. Ába jeréderun bougudi, buséntíña yebe jadímurejan lúma. ⁴⁷ Ába laríñawagün lun Jesúsu.

—Nuján bóguchu jáma bamúleni ya bougudi, buséntíña jadímurejan búma.

⁴⁸ Ába laríñagun Jesúsu lun le awísarubalin.

—¿Ca nóguchuboun, ca namúlenubaña?

⁴⁹ Ába larúfudun jawágun láni disípulugu, ába laríñagun.

—Añája nóguchubaña, jagía gíne namúlenubaña, ⁵⁰ ladúga furúmieguarügü le adúgüti lugúndan Nóguchi le siélubei, ligía namúlenbei, nítu, nóguchu.

13

Jémpulu luáguti ábunaguti

(Mr 4.1-9; Lc 8.4-8)

¹ Wéyu ligía, ába láfuridun Jesúsu múnadagiñe, ába lañúurun láru dúna. ² Quei jagíbedagun gürígia le ñí lubei, ába ládinun tídoun ában ugúnein, ába lañúurun, ába jeréderun sun gürígia láru dúna. ³ Ába larúfudajan sarágu cátei joun láu jémpulu, ába laríñagun.

—Ñíñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láb burujan lídaangiñe luágun úma, ába jayábin dunúru, ába jeígini. ⁵ Líbiri, ába láb burujan labádinaguóun dúbü le ñí lumuti úa lan sarágu múa, ába laboučhun furése ladúga majúlin lan múa. ⁶ Dan le lásüdün wéyu, ába lásaurün queíti málagüle lan, ába louñwen. ⁷ Líbiri ílaú, ába láb burujan labádinaguóun jýyu, ába laweinamudun jýyu úara lúma, ába láfaruni. ⁸ Ñíñein lídaangiñe, áburujati lídoun múa buíti, alúbajouáti buídu, nýjein lídaangiñe, íchuguti san águu luágu cáda ában águu, líbiri rúti úrtiwa-wein, líbiri darándi. ⁹ Jugúya le garígeirugubei lun jagáambun, agáamba jumána.

Ca lan laníchigubei jémpulu le

(Mr 4.10-12; Lc 8.9-10)

¹⁰ Ábati jayábin disípulugu, ába jaríñagun lun Jesúsu.

—¿Cásan uágu badímureja joun gürígia láu jémpulu?

¹¹ Ába laríñagun joun.

—Jugúya, subúdigüda láali Búngiu sun cátei arámudaguati le lánina larúeijan jun, ánjein jagía, siñáti jasúbudiruni. ¹² Le agúnfuliruti lúma inárüni le lagáambubei, líchugúba lánwoun lun, ánjein le maténirunti lun, gidáwarügübei murúsun larúgounga le lúmabei lueí.

¹³ Ligía nadímurejanbei joun láu jémpulu ladúga aríja jamáni le nadúgübei, ába jeréderun camá maríjintiña, agáamba jameí le naríñagubei, ába jeréderun úaga gunfaráanda jamá

camá jamuga magáambuntiña. ¹⁴Jawágu lagúnfulira lé meja laríñagubei proféta Isaías dan laríñagunbei.

Jugúya, jagáambuba, úabei gunfaráanda jumá,
jaríjuba, ibídiñebei jun ca lan lílabei le jaríjubei,

¹⁵ladúga deréeru janígi,
wuríbaaliti jagáambun,
murúñu líña jágu,
lun maríjin jumá láu,
magáambun láu jarígeirugu,
úa gunfaráanda jumá táu janígi,
magáragun jugúyame nun lun nareídaguagüdüün.

¹⁶‘Ánjeinti jugúya le nánigubei, fuleíseiwatün ladúga aríjatün láu jágu, agáamba jugúya láu jarígeirugu. ¹⁷Nináriün jáu, sarágu jaña meja profétagu jáma ámu güriquia gúnfulitiña lúma Búngiu abúseerutiña jamúga jaríjinina quei jaríjinina jugúya guetó, maríjin jamútina, buséntiña jamúga meja jagáambuni le jagáambubei jugúya, magáambun jamúti.

Lafúnraanguagüdüni Jesúsu jémpulu luáguti ábunaguti

(Mr 4.13-20; Lc 8.11-15)

¹⁸Agáamba jumeíti le lílabei jémpulu luáguti ábunaguti. ¹⁹Ja agáambubalin ugánu luáguti arúejani le lánina siélu áni úati gunfaráanda jamáni, ítara jáña quei úma le ídounbei láburuja lídaangiñe líla nádü, ába líabin Máfia, ába laságaruni ugánu buíti le ábunúbei tídaangiñe janígi. ²⁰Dúbü le ñíjin lubeí láburuja ílaü, ítara líña quei güriquia ja agáambubalin ugánu, ába jerésibiruni láu ugúndani, ²¹quei márügüdüñ lubeí buídu tídan janígi, madúrati jádan. Dánti le lachúlürün dan lun jóuchawagún lúma jeíbaajoún lueígiñe ugánu ligía, ába leíguadun jarúna. ²²Jíyu le ñíjin lubeí láburuja ílaü, ítara líña quei güriquia ja agáambubalin ugánu, weíritimaati jafúudun luágu cátei le lánina íbágari le, ába leyéeduniña írisini. Sun le, ába láfaruni ugánu tídaangiñe janígi, mígiruntiti lun lalúbajoún jádan güriquia jagía. ²³Múa buíti le ñíjin lubeí láburuja ílaü, ítara líña quei güriquia ja agáambubalin ugánu, ába gunfaráanda jamáni, ába jíchugun ában alúbajoúni buíti. Añájein, ítara jáña quei ílaü le íchugubei san águu luágu ában, jíbiri quei le íchugubei úríwa-wein, jíbiri quei le íchugubei darándi.

Jémpulu luáguti jíduru wuríbati labádinagua túriгу

²⁴Ábaya líchuguni Jesúsu jémpulu le joun.

—Arúejani le lánina siélu, ítara líña quei ában wügúri le ábunagubei ílaü buíti lídan lufúlasun, ²⁵dan añája lan sun ja ñíbaña arúmuga, ába lebelurun ában lágani labúreme fulásu ligía, ába lábunun jíduru wuríbati labádinagua túriгу, ába lídin. ²⁶Dan le lawefnamudun túriгу ába legélewejan, ába gíñe lachúlaagun jíduru wuríbati. ²⁷Ába jóúdin músu, ába jaríñagun lun jayúbudiri. “Wayúbudiri, ánjein buídu lubeí ílaü le bágunagubei bumúanrugu, ¿jalágiñésan lasálira jíduru wuríbati le?” ²⁸Ába laríñagun iyúbudiri joun. “Ladúga ában ágani le.” Ábati jaríñagun músu lun. “¿Buséntibu lun wájulajani jíduru wuríbati le?” ²⁹Ába laríñagun joun. “Uá, ladúga dánme jájulajani jíduru wuríbati, julá jíñein lin gíñe túriгу úara lúma. ³⁰Ígiragubei jumeí lun lawefnamudun úara daríme lidáani alúbajani, ábame nariñagun joun ñadágimeintiña lun jájulajani jíduru wuríbati furúmiñe, ábame jagúraguni lun lágudúniwa, lárigiñeme, ábame jareíduni túriгу tídan lágei.”

Jémpulu luáguti tíla mostása

(Mr 4.30-32; Lc 13.18-19)

³¹Rúlumuti gíñe Jesúsu jémpulu le joun.

—Ítara líña arúejani lánina siélu quei ában tíla mostása le lábunubei ában wügúri lufúlasunrugu. ³²Tíla mostása, ligía ílaü ñúraütimaabei lídaangiñe sun ílaü, áni dan

labouchun, ligía weírritimaabei lídaangiñe sun nádü, ába liábin lun ábanbei lan wéwe weíriti darí lun jayábin dunúru adúga jádibu luágu lílímun.

Jémpulu luáguti ísi
(Lc 13.20-21)

³³ Rúlumuti gíñe jémpulu le joun.

—Ítara líña arúejiani le lánina siélu quei ísi le tagúbudubei ában wúri tídán úrtiwa líburu fulúwaaru, ába terésirun sun fulúwaaru tugúya.

Ca lan lébunabei líchuguni Jesúsu jémpulu buri le
(Mr 4.33-34)

³⁴ Láu jémpulu larinagei Jesúsu sun cátei le joun güirgía, mariñagunti ni cáta joun mayúsurunga jémpulu. ³⁵ Sun cátei le, lun lagúnfulirun le larinagubei meja Búngiu liyúmulugugiñe proféta.

Nadímurejaba láu jémpulu jun,

nafunraanguagüdübei cátei lé buri meja arámudaguabei jun lúmagiñe nadúgüni uboú.

Lafúnraanguagüdüni Jesúsu jémpulu le luáguti jíduru wuríbati labádinagua türígu

³⁶ Ába loúnajaniña Jesúsu güirgía jábiñoun, ába lebélorun múnadoun, ába jayábin lání disípulugu, ába jaríñagun lun.

—Furáanguagüdebéi jémpulu le luáguti jíduru wuríbati woun.

³⁷ Ába larinagun Jesúsu joun.

—Áu le Wügúri Garaúwarügüti, áu le ábunagubalin flaú buíti, ³⁸ múa, ligía uboúbei, flaú buíti, jagía güirgía ja lílana larúejian Búngiu, jíduru wuríbati, jagía güirgía ja lánigu Máfia, ³⁹ áganiti le ábunubalin jíduru wuríbati, Máfia méme, alúbajani, ligía lagúmuchunbei uboú, ja alúbajabaña, ánjeligu. ⁴⁰ Ítara quei labúdajoúniwa jíduru wuríbati ába lágurún wáturugun lun lágudun, ítara lúba gíñe lasúseredun dánme lagúmuchun uboú, ⁴¹ áu le Wügúri Garaúwarügüti, nouñajabaña náni ánjeligu aságaraña sun ja affgoungüdübaña ámu, jáma ja adúgübaña wuríbati, lídaangiñe narúejian, ⁴² ábame jácharaguniña lídoun wátu geméti lánina máfiougati. Ábame jayájuañan ñi, ábame lacúnrinjan jári. ⁴³ Jámeti adúgübalin le lubeibeí Búngiu, ábame jámiridun quei wéyu lídan larúejian Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti irisini le arámudúañubei

⁴⁴ Ítara líña arúejiani le lánina siélu quei irisini le arámudúañubei lábugiñe múa. Ladárireí ában wügúri irisini ligía, ábaya larámuduni ñi méme, le luweírin lugúndan, ába lídin, ába lalúguruni sun le lúmabei, ába lagáñijani fulásu ligía.

Jémpulu luáguti pérta le weírubei ebégi

⁴⁵ Ítara líña gíñe arúejiani le lánina siélu quei ában alúgurajati le efbugañajabei áluaja pérta finuti, ⁴⁶ dánti ladárirun ában le weíriti lebégi, ába lídin, ába lalúguruni sun le lúmabei, ába lagáñijani pérta ligía.

Jémpulu tuáguti séni

⁴⁷ Ítara líña gíñe arúejiani le lánina siélu quei ában séni to agurúboun baránaja, ába tañúgun sun jawúyeri úduraü. ⁴⁸ Dan tabuínchun, ába jacháwarunun esénijatiña lárun béya, ába jañúurun ñi amúadajaña úduraü, ába jareíduniña ja buídubaña, ába jachágaruniña ja wuríbabaña. ⁴⁹ Ítara lúba dánme lagúmuchun uboú, jayábiba ánjeligu lun jafánreinruniña ja buídubaña jádaangiñe ja wuríbabaña. ⁵⁰ Ábame jádaruniña ja wuríbabaña lídoun wátu geméti lánina máfiougati, ñíba lubei jayájuaña, acúnrijame jári.

Irisini buri iséri lúma binádu

⁵¹ Ábati lálügüdüniña Jesúsu, larinaga joun.

—¿Gunfaráanda jumútisan sun cátei le?

Ába jaríñagun.

—Ánja, Wabúreme.

⁵² Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúejjani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirísín lun líchuguni joun tílana lúban dan le jemégeiruni, queígubeirügü, gayáraati larúfudajan joun güirgía luágu lilúrudun Moisés lúma gíñe luágu cátei le narúfudajabei, áu le Jesúsú.

Jesúsú lídan fulásu le gíríbei Nazarét

(Mr 6.1-6; Lc 4.16-30)

⁵³ Dan lagúmunchunbei líchuguni Jesúsú jémpulu buri le, ába lídin nígiñe, ⁵⁴ ába lachúlürün lagefroun. Ába lagúmeserun arúfudaja tídan jalígílisín juríu to lídaanboun fulásu ligía, ába laweíridun janígi güirgía, ába jaríñagun.

—¿Jalíasan lafúnrendeirei wügúri le sun lichú áu le? ¿Ída liñásan gayára láani miláguru buri le adúga? ⁵⁵ Liraúga saráfangei le, María lúguchuboun, líbugaña Jacóbo, José, Simón lúma Júdas, ⁵⁶ ya gíñe jagánawa lamúlenú jáma lítunu wádan. ¿Jalíagiñeti lasúbudirei sun le?

⁵⁷ Ába jamájarun lun jerésibiruni. Ába laríñagun Jesúsú joun.

—Sun güirgía jínsiñeti ában proféta joun, mámarügaali ligía lídaangiñeti fulásu le ní jabeí o tílana lan jában.

⁵⁸ Madúgúntiti sarágu miláguru ní ladúga maffínen jamá luágu.

Lóunwen Juan le abásteragüdajabei

(Mr 6.14-29; Lc 9.7-9)

14

¹ Lídan dan ligía, ába lagáambun Heródes, le gumándan lídan fulásu le gíríbei Galiléa, luágu Jesúsú, ² ába laríñagun joun ja lúmabaña.

—Juan le abásteragüdajabei le, sará jádaangiñe jílaaña, ligía gabáfu lubeí lun ladáagun miláguru.

³ Lé meja suséreelebei, daúlumuti meja Heródes Juan, ába lagúraguagüdüni láu güirgüri tueigiñe Heródias tó meja lúmari Felipe, le lamúlen. ⁴ Aríñagaali meja Juan lun Heródes luágu moun láni lagámaridunun lúmari lamúlen, madúgúnti Heródes gásu láu.

⁵ Busénti yebéti Heródes láfaruni Juan jílagubei, ladúga lanúfude jaweí güirgía, madúgun lumúti ladúga sun lan güirgía afíñetiña luágu proféta lan Juan. ⁶ Dánti le efédujani luágu lagúnfulirun Heródes irúmu, ába tíábin tiraú Heródias, ába tabínajan jagíbugiñe amísurajóutiña, léti línsiñe tabínajan lun Heródes, ⁷ ába laríñagun tun láu fiñún luágu líchugubei lan furúmieguarügü cátei le tamúriajan lúma tun. ⁸ Ábati taríñagun túguchu tun lun tamúriajani lóbulugu Juan le abáste jílagubei, ladúga, lun jíchuguni tun lídan ában asíedu, ába tamúriajani lúma ítara.

⁹ Ába lírudagun Heródes lueigiñe cátei le, quei aríñaga láali lan láu fiñún, agáamba jameí amísurajóutiña, ába laríñagun lun líchugúniwa tun. ¹⁰ Ábati laríñagun lun ladúrürúniwa lóbulugu Juan furísunrugu, ¹¹ ába janúgüni lídan ában asíedu, ába líchugúniwa tun irájü tugúya, ába tíchuguni tun túguchu.

¹² Ábati jayábin l-íñagun tun láu fiñún luágu lanigu Juan, ába janúgüni lúgubu, ába jábununi, lárígiñe, ába jóúdin awísarei Jesúsú.

Líchugun Jesúsú eígini joun seíngü mílu wügúriña

(Mr 6.30-44; Lc 9.10-17; Jn 6.1-14)

¹³ Dan lagáambuni Jesúsú cátei le, ába lídin nígiñe jáurügü láni disípulugu tídan ában ugúnein lídoun ában fulásu mageírawati. Ába jasúbudiruni güirgía, ába jáfuridun lídaangiñé buri aúdú, ába jóúdin lárígi, eíbu. ¹⁴ Dan larárirun Jesúsú tídaangiñe

ugúnein, ába laríjin luágu sarágu jaña lan gürígia jagía, ába jagúdemedagun lun, ába lareídaguagüdüniña ja sándibaña jádan. ¹⁵ Queíti agúñedeinaali lubef, ába jaríñagun láni Jesúsu disípulugu lun.

—Dárüjalitia áni úatiña gürígia aganoútiña lídan fulásu le. Oúnaja báña gürígia ja, ñúdüñ jamámuga lídoun buri lirájüñü fulásu yaráfa agáñija eíginu lun jeígin.

¹⁶ Ába laríñagun Jesúsu joun.

—Mídinbaña, rújuma eíginu joun.

¹⁷ Ába jaríñagun lun.

—Seíngü rügüñoun fein wáma ya, jáma bián úduraü.

¹⁸ Ába laríñagun Jesúsu joun.

—Barújumoun nun ñájoun.

¹⁹ Ába laríñagun joun gürígia lun jañúurun luágu jíduru. Ába lanúgünun seíngü fein jáma bián úduraü jagía lújaburugu, ába laríjin siélun, ába leteíngiruni Búngiu tuágu. Ábati lagúbachagunun fein, ába líchugunun joun láni irun Jesúsu tídaangiñe ugúneidisípulugu, ába jafánreinjanun jádan gürígia. ²⁰ Sun jagía jóutiña quimúle, lárigiñe, ába jabuínchagüdün dúusu faniñe táu to ígiragutu. ²¹ Seíngüñanu mílu wügúriña eígitíña, mabájüdünga wúriña jáma irájüñü.

Leíbugun Jesúsu ligíbuagu dúna

(Mr 6.45-52; Jn 6.16-21)

²² Ába loúnajaniña Jesúsu láni disípulugu lubá tídan ugúnein tugúya lun jánjiñuragun loubáfurugun sun niján lan oúnajaña gürígia águyu. ²³ Lásun loúnajaniña, ába laweínrun lábugua luágun wúbü ayúmuragua lun Búngiu. Dan le lagúñedunbei, ñíñein Jesúsu lábugua, ²⁴ sun núnguran tan ugúnein lamídan dúna. Ába láfarajan lugúdi barána tuágu ugúnein ladúga tubárouñein lan garábali. ²⁵ Ába liábin Jesúsu jawágun lubá larúgan, eibugeina ligíbuagu dúna. ²⁶ Dan jaríjini láni disípulugu eibugeina ligíbuagu dúna, ába janúfudedagun, ába jagúaragun láu anúfudei.

—¡Úfiaü!

²⁷ Ába ladímurejan Jesúsu joun, ába laríñagun joun.

—¡Ragújuma anígi, áu le, manúfueda jumá!

²⁸ Ába laríñagun Pédro lun.

—Nabúreme, ánjein amúrü lubef, eíbugagüda bána gñe ligíbuagu dúna chülú le ñí bubei.

²⁹ Ába laríñagun Jesúsu lun.

—Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubef Jesúsu ligíbuagu dúna. ³⁰ Dan le lasándiruni lére garábali ába lanúfudedagun, ába lagúmeserun abúlucha, ába lagúaragun.

—¡Séfu bána Nabúreme!

³¹ Ába lárügüdüni Jesúsu lújabu, ába laríñagun lun.

—¡Louíguati gñe baffñen! ¿Ca uágu lalouíguada baffñen?

³² Dan jádinun tídoun ugúnein, ába lagálumadun garábali. ³³ Játi buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraü ban Búngiu.

Lareídaguagüdüniña Jesúsu sánditiña Genésaret

(Mr 6.53-56)

³⁴ Ába jánjiñuraguni dúna, ába jachúlürün Genésaret. ³⁵ Dan le jíchugunbei líflana fulásu fe luágu Jesúsu lan, ába jabúruchaguagüdüni lídan sun fulásu ligía, ába janúgüniña sun sánditiña le ñíjin lubef. ³⁶ Ába jayúmuragun lun lun lígirun lúnrügü jagúuruni táru lanáangun, sun ja agúurubarun, areídaguatiña.

15

Cátei le marúmadagüdünbaliña güriña ligíbugiñe Búngiu
(Mr 7.1-23)

¹Ába jayábin fiú fariséogu jáma arúfudajatiña lilúrudun Moisés, ñúbintiña ubúrugugiñe Jerusalén lúmoun Jesúsu, ába jaríñagun lun.

²—¿Ansan jáalachagunbalin báni disípulugu binádu jagáburi wéyaaña mútu? Magún-fuliruntiña láu lachibúniwa újabu lubá eígini, según wagáburi.

³Ába laríñagun Jesúsu joun.

—¿Ánti gíñe jáalachagunbalin lerérun Búngiu lun jafálaruni binádu jigáburi?

⁴Laríñajare Búngiu. “Inébe jamá bagúbürigu bun, le anábagubaliña lagúbürigu, jilála.”

⁵Ánjeinti jugúya, aríñagatün luágu gayára lan laríñagun ában güriña lun lúguchi o tun lúguchu. “Siñáti níderagunibu ladúga sun le númabei, aríñagaadina luágu lun lan níchuguni lun Búngiu”, ⁶luágu furúmieguarügü lan le aríñaguti ítara, mámaali lan lúnti líderaguniña lagúbürigu. Láu líra mebégigüda jumáali lagúmadijan Búngiu lun jafálaruni binádu jigáburi. ⁷¡Biángua tigíbu jugúya le! Linárün proféta Isaías laríñagunbei juágu ítara.

⁸Jayumárurügü güriña ja jíchiga inébesi nun, líña Búngiu, ánjein tídan janígi, mebéresentiña náu.

⁹Málati jájuduragun nun,

ladúga le rügúñein jagúmadijan wügúriña jarúfudaja.

¹⁰Ábati lagúarun joun güriña, ába laríñagun joun.

—Agáamba jumá, gunfaráanda jugúyame. ¹¹Máma eígini le leígubei güriña adúgübalin lun marúman lan ligíbugiñe Búngiu, dimúrei wuríbati le laríñagubei wügúri, ligía adúgübalin lun marúman lan.

¹²Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jiggu wuríba lan láburujan dimúrei le baríñagubei joun fariséogu?

¹³Ába laríñagun joun.

—Furúmieguarügü nádü to máma lábunun Núguchi Búngiu le siélubei, lájulúba láu sun lílagüle. ¹⁴Ígira jumáña, maríjintiña ja adúndejetiña maríjintiña jáledi jagía. Áni ánjein adúndeja ában maríjinti ában maríjinti líledi, jeíguaduba biángubei jagía lídoun ában júyu.

¹⁵Ábati laríñagun Pédro lun Jesúsu.

—Furáangugüdabeí jémpulu le woun.

¹⁶Ába laríñagun Jesúsu.

—¿Úati gíñe gunfaráanda jumá? ¹⁷¿Úati gunfaráanda jumá luágu sun lan le ebélurubei lídoun iyúmaü, ába lídin lídoun urágei, lárigiñe ába láfuridun lídaangiñe úgubu? ¹⁸Ánjein dimúrei le áfuridubei lídaangiñe iyúmaü, tídaangiñe anígi líábin, ligíati adúgübalin wügúri lun marúman lan ligíbugiñe Búngiu, ¹⁹ladúga tídaangiñe anígi láfurida samínaü wuríbati, áfarajani, adultériu, salúfuri, íweru, iyéeni, marásualugu. ²⁰Ligía buri cátei le adúgübalin wügúri lun marúman lan, ánjeinti leigíniwa machibúnga újabu según jagáburi juríu marúmadagüdüñ lumúti ligíbugiñe Búngiu.

Ában wúri teréncha to afiñeruboun luágu Jesúsu
(Mr 7.24-30)

²¹Ába láfuridun Jesúsu ñígiñe, ába lídin lídoun buri fulásu geyégua láu fulásu le Tíro lúma Sidón. ²²Ñíñoun ában wúri jádaangiñetu Cananítagu aganoúti lídan fulásu ligía, ába tiábin luágun Jesúsu agúarajaina.

—¡Nabúreme, ladúgawagun David, gudémená bun! Níjein ában espíritu wuríbati tuágu nisáani, weíríti tasúfurirun lurúma.

²³ Moúnabun lumútu Jesúsu. Ábati jayábin disípulugu, ába jayúmuragun lun, ába jaríñagun.

—Adúgabei le tamúriajabei búma, ladúga nuteíntia agúarajeina wárigi.

²⁴ Ába laríñagun Jesúsu.

—Jouñ rügúñein gürígia féridijaña ja Israelítagu louñajana Búngiu lun níderaguniña.

²⁵ Ába tiábin wúri tugúya, ába tájuduragun ligfbugiñe, ába taríñagun.

—¡Nabúreme, íderagua bána!

²⁶ Ába laríñagun Jesúsu tun.

—Lúnti níderaguniña numútuniña ja jurú furúmiñe, mabuídunti lun tagídarúniwa fein jawéi isáanigu lun tichugúniwa joun oúnli.

²⁷ Ába taríñagun.

—Ánja, Nabúreme, láu sun líra, gayáraati jeígini oúnli ífei le áburujati luegiñe jadábulan jabúriña.

²⁸ Ábati laríñagun Jesúsu tun.

—Wúri, ¡weíriri gíñe baffíñen! Susérelá le babúseerubei.

Lúmagiñe óra ligía, ába tareídagun tisáani.

Lareídaguagüdün Jesúsu sarágu sánditiña

²⁹ Ába láfuridun Jesúsu nígiñe, ába lachúlürün lárún dúna Galiléa, lárigiñe, ába laweín-run luágun ában wúbü, ába lañúurun ñi. ³⁰ Ába jayábin sarágu gürígia le ñíjin lubei barúina jagía meíbuguntiña, maríjintiña, maríñaguntiña, danímaati jarúna, jáma sarágu jawúyeri sánditiña. Ába jíchuguniña lubádu lugúdi Jesúsu, ába lareídaguagüdüniña.

³¹ Ába laweíridun janígi gürígia láu jaríjin adímurejaña jamá já meja maríñagadibaña, areídagua ja danímaabaña arúna, eíbuga ja meíbuguñajabaña, aríja ja maríñajabaña. Ába jagúmeserun adímureja weírigo luágu Jabúngiute Israelítagu.

Líchugun Jesúsu eígini joun gádürü mílu wügúriña

(Mr 8.1-10)

³² Ábati lagúarun Jesúsu joun láni disípulugu, ába laríñagun joun.

—Gudémetiña gürígia ja nun ladúga úruwaali wéyu jáu núma ya áni úaali ni cáta jáma lun jeígin. Mabúseeruntina nouñajaniña jábiñoun meíginga, dagá líñein falálaü jawágu úmada.

³³ Ábati jaríñagun láni disípulugu lun.

—¿Ída lubáti wadárirun eígini joun sarágu gürígia ya lídan fulásu le ñí lumuti úa jamá aganouútiña?

³⁴ Ába lálügüdüniña Jesúsu.

—¿Átiriñoun fein júma?

Ába jaríñagun.

—Sédü, jáma biánraü úduraü.

³⁵ Ába laríñagun joun gürígia lun jañúurun múarugu, ³⁶ ába lanúgünun sédü fein jáma úduraü jagía lújaburugu, ába leteíngiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun gürígia. ³⁷ Jouútiña sùngubei quimúle, buíngüda gíñe sédü faníñe táu to ígiraguboun. ³⁸ ¡Gádürüñanu mílu wügúriña eígitiña, mabájüdünga würiña jáma irájüñü! ³⁹ Lárigiñe, ába louñajaniña Jesúsu gürígia águyu, ába ladinun tídoun ugúnein, ába lídin loubawagun Mágdala.

¹ Ába jóudin fariséogu jáma saduséogu aríjei Jesúsu. Lun jáburugüdüni tídoun sádara, ába jaríñagun lun lun larúfudun ában seíni láuti miláguru le siélugiñeti joun, affíne jamámuga luágu lúmagiñe lan Búngiu liábin. ² Ába laríñagun joun.

—Rábounwéyu, ába jaríñagun. “Buídubei dan ladúga funáti siélu.” ³ Bináafin, ába jaríñagun. “Wurífabei dan ugúñe ladúga funáñu líña siélu áni jamúñounga.” ¡Biángua tigibu jugúya! Subúditi luáguti ligáburi dan jun, áni ibídiñeti jun luágu chülújali lan lidáani asálbaruni. ⁴ Gürígia wurífatiña, múaraantiña ja, amúriajatiña seíni láuti miláguru lun jafíñerun luágu áu lan anúgübei asálbaruni joun gürígia. Wel, marúfudunbei ámu seíni joun lueí liseíni Jonás.

Ába lígiruniña, ába lídin.

Ítara líña jarífudajan fariséogu quei ísi

(Mr 8.14-21)

⁵ Dan le jájiñuragunbei disípulugu lúma Jesúsu loubáfurugun dúna, bulíei jamúti janúgün fein. ⁶ Ábati laríñagun Jesúsu joun.

—Toúnigigua jumátia júngua lueí jísite fariséogu jáma saduséogu.

⁷ Ába jagúmeserun disípulugu aríñaga jámagua.

—Ladúgatia manúgün wamá fein laríñagunbei ítara.

⁸ Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma? ¡Louguati gíñe jafíñen! ⁹ ¿Uágili gunfaráanda jumá, marítangun jugúya tuágu seíngü fein to nafánreinjabout jádan seíngü mílu wügúriña lúma átiriñein lan faniñe táu ígiragutu? ¹⁰ ¿Bulleiguatün funásan tuágu sédü fein to nafánreinjabout jádan gádürü mílu wügúriña lúma átiriñein lan faniñe táu ígiragutu? ¹¹ ¿Ída liñági meféen jubei luágu máma lan tuágu fein nadímureja dan le naríñagunbei jun lun jóunigiragun júngua lueí jísite fariséogu jáma saduséogu?

¹² Ába gunfaráanda jamáni luágu máma lan luágu tísitena fein laríñaga joun, lueí lan arúfudajaní le jáni fariséogu jáma saduséogu lawéridiraña.

Laríñaguni Pédro luágu Jesúsu lan Crístubei

(Mr 8.27-30; Lc 9.18-21)

¹³ Dan le lachúlürün Jesúsu ubúruge Cesaréa le Filípo ába lálügüdüniña láni disípulugu.

—¿Cátanasan lídan jarítangun gürígia, áu le Wügúri Garaúwarügüti?

¹⁴ Ába jaríñagun.

—Añájein aríñagutiña luágu Juan lan lé meja abásteragüdañabei amúrü, jíbiri aríñaga luágu Elías ban, añájeingua aríñagutiña luágu Jeremías ban o ámu lan proféta.

¹⁵ Ábati laríñagun joun.

—Ánti jugúya, ¿cátanati lídan jarítangun?

¹⁶ Ába laríñagun Simón Pédro lun.

—Crístu le Liraú Búngiu le wíwanbei amúrü, le núbinbei asálbaraña gürígia ubouágu.

¹⁷ Ába laríñagun Jesúsu lun.

—Fuleiseiwatibu Simón, liraú Jonás, ladúga máma lasúbudirágüdüni ni ába gürígia cátei le bun, lasúbudirágüdüni Núguchi Búngiu le siélubei bun. ¹⁸ Naríñajare bun luágu Pédro lan amúrü, líla íri ligía, “dúbü”, luáguba ébuu le nágunaguoun nilgilisin, áni ni íbini ouweni mabáfubei tuágu. ¹⁹ Níchugubei ligélen arúejani le lánina siélu bun, le cátei le uáguti baríñaga luágu moun lan jadúgüni affíñetiña, ligía gíñe uágubei laríñaga Búngiu luágu siñá lan ladügúniwa, le cátei le uáguti baríñaga luágu gayára lan ladügúniwa, ligía gíñe le uágubei laríñaga Búngiu luágu gayára lan ladügúniwa.

²⁰ Ábati laríñagun Jesúsu joun láni disípulugu lun maríñagun jamá ni ca un luágu ligía lan Crístubei.

Ladímurejan Jesúsu luágu louñwen

(Mr 8.31–9.1; Lc 9.22–27)

²¹ Lúmagiñe dan ligía, ába lagúmeserun Jesúsu aríñaga joun láni disípulugu furáangu luágu lúnti lan lídin Jerusalén, luágu gíñe jasúfuriragüdübei lan wügúriña weirigutiña lídan jafíñen juríu, jáma jábutigu jafádirigun juríu, jáma arúfudajatiña lilúrudun Moisés. Aríñagati joun luágu láfarúba lan jilágubei, áni lásaaruba lan luágu lúruwan wéyu. ²² Ába ladíñurun Pédro láu Jesúsu ñígiñe murúsun, ába laríñagun lun táu sun lanígi.

—¡Mabúseeraleí Búngiu líra, Nabúreme! ¡Siñáti lasúseredun cátei le bun!

²³ Ába lagáragun Jesúsu, ába laríñagun lun Pédro.

—¡Dísebá nueí, Máfia! Babúseerúña beréderuni ladügúniwa lugúndan Búngiu. Masáminaruntibu quei Búngiu, basáminarun quei wügúri.

²⁴ Ábati laríñagun Jesúsu joun láni disípulugu.

—Le busénti lafálarunina, bulíeíleí cáteiñein lan, awándaleí sun luwúyeri asúfuriruni le lúnbei liábin lun nueígiñe queísí lanúgúni ában wügúri lugúruwan, falálana. ²⁵ Ladúga le abúseeruti leséfuragun lúngua ya ubouágu lefériDIRUBEI IBÁGARI le magúmuchaditi, ánjein le ánjabei lefériDIRUNI LIBÁGARI ya ubouágu nueígiñe, libíjubei IBÁGARI le magúmuchaditi siélu. ²⁶ ¿Cági ju lan lun güriGIA lagáñeiruni sun le lánina ubou le, lefériDIRIEME LUBÁRA siélu? Úati ni cáta lánina ubou le áuti gayára lan lagáñijan güriGIA ubáraü siélu. ²⁷ Nagríbuduba, áu le Wügúri Garaúwarügüti, úara jáma náni ánjeligu, niábinba láu uweiriguni le meme láni Núguchi. Ábameti nafáyeiruniña güriGIA quei ligáburi le adúga jamáalibeí. ²⁸ Ninárün jáu luágu añájein lan jádaangiñe ja yábaña guetó, mouñwenbaña daríme jarjini liábin narúeijan, áu le Wügúri Garaúwarügüti.

17

Lámuñedagun laríjín Jesúsu

(Mr 9.2–13; Lc 9.28–36)

¹ Sísí wéyu lárígiñe, ába lanúgúniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wúbü íñuti, jagía rügúñanu ñi. ² Ába lámuñedagun laríjín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga. ³ Sódini ába jarjini Moisés lúma Elías (já meja abágaridubaña lídan dan le sügújalibeí) ayánuja lúma Jesúsu. ⁴ Ába laríñagun Pédro lun Jesúsu.

—Nabúreme, ¡lídan dan awánja lan ya! Ánjabu busén, adúga wagíame úruwa dibásein ya, ában bun, ában lun Moisés, ában lun Elías.

⁵ Dan níján lan Pédro adímureja, ába liábin ában juánriñu miríti, ába louburaguniña, ába lagaambúniwa ában umálali lídaangiñe juánriñu ligía le aríñagubei.

—Níján niraú le jínsiñebei nun, le aúbei ouñwenbun lan nugúndan, adúga jumeí le lubeíbei.

⁶ Dan jagáambuni disípulugu, ába jabúluchagun láu jagíbu múarugu le luweírín janúfude. ⁷ Ába liábin Jesúsu jawágun, ába lagúrurun jawágu, ába laríñagun joun.

—Sarájuma, manúfudeda jumá.

⁸ Dan le jarjínbei, maríjinjaña ámu lueídügü Jesúsu.

⁹ Dan le aráireina jamáni wúbü, ába laríñagun Jesúsu joun.

—Mabájudagua jumeítia cátei le aríja jumáalibeí lun ni ában daríme saráadina, áu le Wügúri Garaúwarügüti, lídaangiñe ouweni lúnya nabágaridun.

¹⁰ Ábati jaríñagun disípulugu lun Jesúsu.

—Guetó subúdi wamáali luágu amúrú lan Crístubei. Quei ítara líña lubeí, ¿cáti uágu jaríñaga arúfudajatiña lilúrudun Moisés luágu lúnti lan liábin Elías lubáragiñe liábin Crístu?

¹¹ Ába laríñagun Jesúsu joun.

—Inárüni luágu liábinba lan Elías, ábame líchugun sun cátei lídoun lubúdubu, ¹² áni naríñajare jun luágu ñúbinjali lan Elías, masúbudirun jamúti gürígia, adúgarügü jamúti sun le jabúseerubei láu. Ítara lúba gríne jasúfuriragüdünina, áu le Wügúri Garaúwarügüti.

¹³ Ábati jasúbudiruni disípulugu luágu Juan lan lé meja abásteragüdjabei, ligía lan Elíasbei le uágubei ladímureja Jesúsu.

Lareidaguagüdüni Jesúsu ában irájü goúwejaditi

(Mr 9.14-29; Lc 9.37-43)

¹⁴ Dan le jachúlürünbei le ñíjin jabei gürígia, ába liábin ában wügúri lúmoun Jesúsu, ába lájuduragun ligíbugiñe, ába laríñagun lun.

¹⁵ —Nabúreme, gudémelá nisáani bun, goúwejaditi, weírítiti lasúfurirun, níjein dan jeíguati wáturugun, níjein dan dúnarugun. ¹⁶ Barú numuti ñájoun joun báni disípulugu, siñá jamuti areidaguagüda.

¹⁷ Ába loúnabun Jesúsu.

—¿Gürígia maffíneraditiña, gürígia wuríbatíña! ¿Átiribeísan dan lun neréderuni júma lubá gayára lan jaffínerun nuágu? ¿Ídame lagúmucha maffíneni le jídaanbei? Barújumei irájü ligía ñájoun.

¹⁸ Ábati ladeínjan Jesúsu lun espíritu wuríbatí ligía, ába láfuridagüdüni lídaangiñe lúmagiñe óra ligía, ába lareidagun irájü le.

¹⁹ Lárígiñe, ába jadímurejan disípulugu lúma Jesúsu jábugua, ába jálügüdüni.

—¿Cásan uágu siñá wabalin espíritu wuríbatí ligía aságara?

²⁰ Ába laríñagun Jesúsu joun.

—Ladúga liloúguan jaffínen. Ninárün jáu luágu ánjein lan íbja jubeí fe íbini ñúraúraü lan quei ában tágu mostása, jaríñaguba lun wúbü le. “Gidába yágiñe, beíba lídoun ámu fulásu”, ábame lagídarun wúbü ligía. Úabei ni cáta jásiñerun ánjein íbja jubeí fe le tímatimaati. ²¹ Ánjeinti jíbe espíritugu ja, láu rügüñein ayúmuraguni lun Búngiu lúma ayúnaruni gayára lan jaságarúniwa.

Ladímurejaanya Jesúsu luágu loúnwen

(Mr 9.30-32; Lc 9.43-45)

²² Dan le eíbugeina jamá úara loúbawagu Galiléa, ába laríñagun Jesúsu joun luágu ledégeruába lan, ligía le Wügúri Garaúwarügüti, jájaburugun wügúriña wuríbatíña, ²³ ábame jáfaruni jílagubei, áni lásaaruba lan lídaangiñe óuweni luágu lúruwan wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

²⁴ Dan lachúlürün Jesúsu jáma láni disípulugu Capernaúm, ába jóudin ja agúburajabalin tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

²⁵ Ába loúnabun Pédro, ába laríñagun lun.

—Afáyeijati.

Dánti lebélorun Pédro múnadoun, ába lálügüdüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúburajabaña urúeigu ja lánina ubou le, jásan lílana fulásu ódi ja teréncha?

²⁶ Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi moún lumuti lubeíti jafáyeijan, áu le Liraú Búngiu, moún lumuti nafáyeijan tiseínsuna lúban Núguchi. ²⁷ Lun magáñidagüdüni wamá ni ában, beíba, ábame bachúrurun bürúnjüre dúnarugun, ábame badígini furúmiñeti úduraü le eígti

bun. Badáriruba ában seínsu liyúmullugu úduráü ligía, buídurügübei lun bafáyeijan wawóúgua láu, ábame bafáyeiruni.

18

¿Cáteisán weírgutimaabei lídan larúeijan Búngiu?

(Mr 9.33-37; Lc 9.46-48)

¹Lídan dan ligía, ába jayábin disípulugu lúmoun Jesúsu, ába jálügüdüni.

—¿Cáteisán weírgutimaabei lídan larúeijan Búngiu?

²Ába lanúgün Jesúsu ában irájü, ába líchuguni jamídan jámagua, ³ába laríñagun.

—Nínárün jáu luágu ánjaün lan mayábin lun jítaradun quei irájüñü, mebélubadün lídoun larúeijan Búngiu. ⁴Ítara líña lubefti, le ñúraüti lanáangun lúngua, ñúbin ligía lun ítarabei lan quei ában irájü, ligía weírgutimaabei lídan arúeijani le lánina siélu. ⁵Gürígia gíñe le erésibiruti ában irájü lídan níri resíbi lumútina gíñe.

Luríban lafíngoungüdüniwa ában gürígia

(Mr 9.42-48; Lc 17.1-2)

⁶Furúmieguarügü le afíngoungüdüti ában jádaangiñe ja isérigíñabaña lídan jafñen nuágu, buítimaati jamúga lun lun lagurúniwa baránajóun láu ában óunwenbun dúbü le amúligüle güráñu luágu ligíina sügü láu ladügüni cátei líra. ⁷Wuríbati lun uboú, níjein lán buri cátei le afíngoungüdübaliña gürígia! Súnwandan ñíbei lan, áni ñfugiábu le wügúri le lébunabei!

⁸Ligía ánjein lubeí lafíngoungüdübadibu lubeí bújabu o bugúdi lan, dürúbei, fíbei díse buáriua, buítimaati lun bebélurun siélun májabuga o magúdigá, sügü láu badarún láu biángubei bújabu luma biángubei bugúdi máfiougatin le ñí lubei wátu le méneguchadibi. ⁹Ánjein bágu lubeí afíngoungüdübadibu, sagábei, fíbei díse buáriua, buítimaati lun bebélurun siélun máguga sügü láu badarún láu biángubei bágu máfiougatin.

Jémpulu tuáguti mudún to eféridiruboun

(Lc 15.3-7)

¹⁰Manúga jumá ni ában jádaangiñe ja únabugububaña ja quei ni cáta. Naríñajare jun luágu ligíbugíñeñanu lan Núguchi Búngiu le siélubei ánjelígu ja aríjubaña jáu afñetiña ja súnwandan. ¹¹Ladúga asálbareí le féridíjalibeí yebe niábin, áu le Wügúri Garaúwarügüti.

¹²¿Ída líña jaríjin lun? Ánjein añájein lubeí san mudún luma ában wügúri, teféridira ában jádaangiñe, ¿ma lígirubaña jíbiri luágu wúbü, ábame lídin áluajoun to ayúridaguboun? ¹³Ánjounti ladárra, chouíruí luágu gúndaabei lan táu sügü jáu ja mayúridagunbaña. ¹⁴Ítara líña gíñéti, mabúseerunti Júguchi Búngiu le siélubei lun leféridirun ni ában jádaangiñe únabugutiña ja.

Ligáburi ferúdnawa jamá idújeñu lueígiñe Jesucrístu

(Lc 17.3)

¹⁵Ánjein adúga bidúje ában wuríbani bun, badímureja luma jábuguarügü, ábame basúbudiragüdüni lídúnrun lun. Ánjein adúga gásu báu, gamádaguyáadün. ¹⁶Ánjein madügün gásu báu, ábame banügün ában o bián gürígia jánwoun lun sun lan le aríñawagúti, añájein jamámuga ámu geféentiña luágu. ¹⁷Ánjein madügün gásu jáu, ábame baríñaguni lun jadámurin afñetiña, ánjein madügün gásu láu adamurini, ábame banügüni quei ában mafñeti luágu Búngiu o quei lan ában agúburajati líseínsuna gumádi, gayára lámuga lasáansiruni luríban ligáburi.

¹⁸Nínárün jáu luágu le lan cátei le uáguti jaríñaga jugúya disípulugu luágu moun lan jadügüni afñetiña, ligía gíñe uágubei laríñaga Búngiu luágu siñá lan ladügüniwa, le cátei le uágubei jaríñaga luágu gayára lan ladügüniwa, ligía gíñe le uágubei laríñaga Búngiu luágu gayára lan ladügüniwa.

¹⁹ ‘Naríñajare gíñe jun luágu ánjaña lan úarada biáma jídaangiñe ya ubouágu lun jamúriajan ában cátei lúma Búngiu le siélubei, líchugubei jun, ²⁰ladúga le ñi jamuti biáma o úrúwa oundaragu lídan níri, anájein ñi jamídaangua.

²¹ Ába layárafadun Pédro lun Jesúsu, ába lariñagun lun.

—Nabúreme, ¿átiribefsan weíyaasu ladúgün nibíri ában wuríbani nun lun ferúduna méme náani? Darí sédú weíyaasu?

²² Ába lariñagun Jesúsu lun.

—Mariñaguntina bun luágu darí lan sédú weíyaasu lúnti ferúduna báani, darí úrúwa-wein-dísi weíyaasu sédú.

Jémpulu luáguti músu le májabei ferúduna lan

²³ ‘Ligía ítara líña lubei arúejani le lánina siélu quei ában urúei le ñúbinbei lun laráansejan luágu seínsu jáma lumúsuniña. ²⁴Lagúmesera adúgei, ába janúgün ában le adúweirubalin sarágu míñun fiádürü, ²⁵ quei maseínsun lan lun lafáyeijan, ába lariñagun urúei lun lalúgurúniwa idámunime táu sun lúmari, lirájüñü, lúma sun le lúmabei lun lafáyeiruni ladúweijan. ²⁶ Ába lájuduragun músu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.” ²⁷ Ába lagúdemedagun lun urúei, ába ferúduna láani ladúweiruni, ába lígragüdüni. ²⁸ Quei láfuridun músu ligía ñígiñe, ítara ladúnragun lúma ában músu líledi le adúweirubalin átiri fiádürü. Ába lárügüdüni lueígiñe ligíina, ába lagúmeserun achócurei, ába lariñagun lun. “Fáyeibei le badúweirubalina.” ²⁹ Ábati lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.” ³⁰ Májati le ában, ñúdünrügü ligía ába ládaruni furínsunrugun darí lafáyeiruni ladúweijan. ³¹ Dan le jaríjinbaalin ja jíbiri músu cátei le, ába lagáridun joun sarágu, ába jóudin, ába jabájüdaguni lun urúei. ³² Ába loúnajan urúei ougei, ába lariñagun lun. “¡Músu wuríbatí! Ferúduna numúti sun badúweijan ladúga bayúmuragun nun. ³³ Lúnti yebe gíñe gudéme lan bouba bun quei bagúdemedun nun.” ³⁴ Ába lagáñidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

³⁵ Ába lásurun Jesúsu aríñageina.

—Ítara lúba gíñe ladúga Núguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

19

Larúfudajan Jesúsu libúgürü ígiraguni

(Mr 10.1-12; Lc 16.18)

¹ Lárigiñe lariñaguni Jesúsu sun cátei le, ába lídin Galiléagiñe lun loúbawagun Judéa le lueígiñebei oubaü le ñígiñe lubei laboucha wéyu libíti Jordán. ² Sarágu jáña güri-gia afálaruti, ába lareidaguagüdüniña sánditiña ñi.

³ Ábati jayábin fiú fariséogu lúmoun Jesúsu áluga jáburugüdüni tídoun sádara, ába jálügüdüni.

—¿Según barítangun, gayáaratísan lígirunun güri-gia lúmari lueígiñe furúmiegurügü cátei?

⁴ Ába loúnabun Jesúsu.

—¿Malíjangidün tídan Lerérün Búngiu luágu lúmagiñe lan furúmiñeti dan, dan le ladúgünbaliña Búngiu güri-gia, adúga lumúti wügúri, adúga wúri? ⁵ Aríñagati gíñe. “Ligía lígirubei lubei wügúri lúguchi túma lúguchu lun laganouniwa túma lúmari, ábame jeréderun quei ábanrügü.” ⁶ Mámaaña lubeíti biáma, ábanrúgaaña. Ligía mouñ lubei lafánreinraguni wügúri le ladúnraguagüdübei Búngiu.

⁷ Ábati jálügüdüni.

—¿Cáti uágu laríñaga lílurudun Moisés lun lan tíchugúniwa gárada lánina ígiraguni tun wúri lun tigrún?

⁸ Ába laríñagun Jesúsu joun.

—Ladúga tidére janígi lánjarunbei Búngiu lun jígiragun jáma júmarigu, máma líña meja furúmiñe. ⁹ Naríñajare jun luágu furúmiēguarügü lan le ígirutu lúmari ába lagámaridun ámu, ladúgüña adultériu, mámarügaali ligía ladúga tagámaridun ligibuagun, le gíñe agámariduti wúri to ígiraguaaru, ladúgüña gíñe adultériu.

¹⁰ Ábati jaríñagun láni disípulugu lun.

—Ánjein ítara líña lubei luáguti wügúri túma lúmari, buítimaati lubei lun magámaridun jamá gürígia.

¹¹ Ába laríñagun Jesúsu joun.

—Másutiña gayára jabágaridun mámariga, ja rügüñanu únbaña rújali lan Búngiu ubáfu.

¹² Ámuñegueinarügüti lébuna magámaridun jamá wügúriña, añajein, ítargubeñanu lúmagiñe jagúriajóun, jíbiri, adügúwarügüti joun, jíbiri, reídeitiña magámaridunga lun jederegeragun jóungua le gumúti lun jesériwidun lun Búngiu. Le gabáfubei lun magámaridun lan, magámaridalá.

Labíniruniña Jesúsu irájüñü

(Mr 10.13-16; Lc 18.15-17)

¹³ Ába janügúniwa irájüñü lun Jesúsu lun líchuguni lújabu jawágu lúma lun layúmuragun lun Búngiu jawágu, ába jagúmeserun disípulugu adeínja joun ja anájabaliña. ¹⁴ Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladúga ja jarúmabaña affíñe quei irájüñü, jagía lílana arúejiani le lánina siélu.

¹⁵ Ába líchuguni lújabu jawágu irájüñü jagía, lárigiñe, ába lídin lídaangiñe fulásu ligía.

Ladímurejan ában wügúri ñúraügili lúma Jesúsu

(Mr 10.17-31; Lc 18.18-30)

¹⁶ Ába lídin ában wügúri ñúraügili aríjei Jesúsu, ába laríñagun lun.

—Maésturu buíti, ¿cásan cátei buíti lúnbei nadügüni lun nibjini ibágari le magúmucha-diti?

¹⁷ Ába laríñagun Jesúsu lun.

—¿Ca uágu bariñaga nun “buíti”? Ában rügüñein buíti, Búngiu. Ánjein busén bubei bibjini ibágari magúmuchaditi, gúnfulibá lúma gumádi.

¹⁸ Ába laríñagun wügúri ligía lun.

—¿Cáteigi buri?

Ába laríñagun Jesúsu lun.

—Máfarajabá, magámaridabá wúri gámaritu, míwerujabá, madímurejabá iyéeni luágu ni ában, ¹⁹ inébe jamá bagúbürigu bun, jínsiñe jagíame gürígia bíledigu bun quei bín-siñegua búngua.

²⁰ Ába laríñagun lun.

—Gúnfuli numúti sun le lúmagiñe ñúraügidina, ¿cági ámu nemégeirubei?

²¹ Ába laríñagun Jesúsu lun.

—Ánjein busén bubei buídu ban le gumúti, alúgurabeí sun le búmabei, ábame bíchuguni lebégi joun gudémetiña, ábame bibjini irisini siélu, ábamei biábin, ábame bafálarunina.

²² Dan lagáambunbalin wügúri ligía cátei le, májati, ladúga weíribalin Jesúsu cába lan ladúgti lirisin, ába lídin láu iruni.

²³ Ábati laríñagun Jesúsu joun láni disípulugu.

—Nínárün jáu luágu jénreengu lan lun lebélorun ában rísiti lídoun arúejiani le lánina siélu. ²⁴ Aríñagaya numúti jun luágu ménreenguntima lan lástügürün ában caméyu

lídaangiñe lujúyun ában agúsa, sügú láu lebélorun ában rísiti lídoun arúejiani le lánina siélu.

²⁵ Dan jagáambuni disípulugu cátei le, ába laweírdun jan-balin Jesúsu cába lan ladúgigi sarágu, ába jálügüdagun jámagua.

—¿Cáteiti gayáraabei lasálbarun?

²⁶ Ába laríñaguniña Jesúsu, ába laríñagun joun.

—Sináti jasálbaragun gürgia jóungua, ánjein Búngiu, gayára lumúti sun cátei adúga.

²⁷ Ábati laríñagun Pedro lun.

—Nabúreme, wagía, ígira wamáali sun lé meja wámabei lun wafálarunibu. ¿Cábasanti wabíja?

²⁸ Ába laríñagun Jesúsu joun.

—Ninárün jáu luágu lídan lánme dan ligía dánme iséri lan sun cátei, dánme le nañúurun, áu le Wügúri Garaúwarügüti luágu nála yágüta siélu lun narúejian láu sun nuweírigun, jugúya le afálarubalina jañúuruba giñe luágu dúusu jalaú lun jagúseragüdüniña dúusugubei láni Israél türfbu. ²⁹ Súnti ja ígiraañábaña jában, o jamúleno, o játunu, o jagúbürigu, o jasáanigu, o jamúan, nuágu, jerésibiruba san weýaasu lánwoun, resíbi jameíme ibágari magúmuchaditi. ³⁰ Áni sarágu jáña ja furúmiñetiñábaña guetó, jagíaba agúmujoúni, sarágu ja agúmujoúniña guetó, jagíaba furúmiñe.

20

Jémpulu jawáguti ñadágimeintiña

¹ Ába laríñagun Jesúsu.

—Ítara líña arúejiani le lánina siélu quei ában labúreme ichári le áfuridubei bináafingua áluaja ñadágimeintiña lun talúbajoún linádirigu. ² Ába ladúgün darádu jáma ñadágimeintiña lun líchugun fiádürü joun luágu wéyu, ába loúnajaniña ñadágimein lichárirugu.

³ Lárigiñe, ábaya láfuridun queí buri ladaúnrün néfu bináafin, ábaya ladárirun ámu wügúriña mafísiutetiña, mágídirugu. ⁴ Ába laríñagun joun. “Jeíba giñe ñadágimein nichárirugu, ábame nafáyeiruni lebégi juwádigimari jun.” Ába jóudin. ⁵ Ábaya láfuridun amídirugu, furí ligía ladaúnrün úrúwa rábounwéyu, ligía méme ladúga. ⁶ Queí buri ladaúnrün seíngü rábounwéyu, ábaya lídin mágídirugu, ábaya ladárirun wügúriña mafísiutetiña ñi, ába laríñagun joun. “¿Cásan uágu yá jubei sun wéyu mawádigimariga?” ⁷ Ába jaríñagun lun. “Úagili ni ában álugutiwa.” Ába laríñagun joun. “Jeíba giñe ñadágimein nichárirugu, ábame nafáyeiruni lebégi juwádigimari jun.” ⁸ Dan le lagúñedunbei, ába laríñagun labúreme ichári lun jábuti ñadágimeintiña. “Wába joun ñadágimeintiña, fáyei bámugaña, bagúmeserame jámagiñe ja atátirubaña agúmujoúni, bagúmuchame jáma ja atátirubaña furúmiñe.” ⁹ Ábati jayábin ja atátirubaña ñadágimein queí buri ladaúnrün seíngü rábounwéyu, ába jibíjin fiádürü cáda ában. ¹⁰ Lárigiñe, dan le lachúlürün jadáani ja atátirubaña furúmiñe, ába jarítagun luágu gíbetimaabei lan jabíjin. Ába giñe jabíjin fiádürü cáda ában. ¹¹ Dan le jerésibiruni jaseínsun, ába magúndan jamá lúma labúreme ichári, ¹² ába jaríñagun. “Ja ñúbinbaña agúmujoúni, ában rügúñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lístuga sun wéyu.”

¹³ Ába loúnabun labúreme ichári, ába laríñagun lun ában jádaangiñe. “Numáda, máma nadúgüña ni murúsun maríchau jun. ¿Ma funági luágu ában fiádürü jadúga darádu núma?

¹⁴ Barújumei jiseínsun, jeíba. Nafáyeirunánu ja atátirubaña agúmujoúni quei nafáyeirunün ladúga ítara líña lan nabúseerun. ¹⁵ ¿Maríchatina funági lun nadúgüni le nabúseerun láu niseínsun? ¿Ódi gimúgatün ladúga nubuídun?” ¹⁶ Ítara líña lubeíti, sarágu jáña ja agúmujoúniña guetó, jagíaba furúmiñetiña, sarágu jáña giñe ja furúmiñetiñábaña guetó, jagíaba agúmujoúni. Ladúga sarágu jáña agúarútiña áni míbetiña anúadirútiña.

Ladímurejaanya Jesúsu luágu louñwen
(Mr 10.32-34; Lc 18.31-34)

¹⁷ Dan le niján lan Jesúsu luágu úma lun Jerusaléoun, ába ladíñurun jáu láni dúusu disípulugu jawéi ja jíbiri gürígia ja luágubaña úma úara jáma, ába laríñagun joun.

¹⁸ —Quei lubéi jarjini, aweínreina wáña Jerusaléoun le ñíba lubéi nedéregerúa, áu le Wügúri Garaúwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasiádirunína lun nouñwen. ¹⁹ Ábame jedéregerunina joun ja mámabaña juríu lun jéjerajan náu, áfara jamáname, ábame jádaragunina luágu gurúwa, áni násaaruba lídaangiñe ouweni luágu lúruwan wéyu.

Le tamúriajabei jáguchu Jacóbo láu Juan lúma Jesúsu
(Mr 10.35-45)

²⁰ Ábati tiábin jáguchu Jacóbo láu Juan, ja lisáanigu Zebedéo, lúmoun Jesúsu jáu tisáanigu, ába tájuduragun lun tamúriajan ában fuleisei lúma. ²¹ Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában luegiñe bouñwenren, ában luegiñe bubaúna yágüta lídan barúeiian.

²² Ába laríñagun Jesúsu joun.

—Íbídíñeti jun ca lan jamúriajabei. ¿Gayáraati jawánduni luweírín igárigu le lúnbei nawánduni, gayára ligíame júaradun núma lídan nasúfurirun?

Ába jaríñagun.

—Gayára wabeí.

²³ Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, ánjeinti lun jañúurun luegiñe nouñwenren lúma luegiñe nubaúna, máma áu lúnbei níchuguni, líchugúaba joun ja ubáabaña laráanserei Búngiu.

²⁴ Dan le jagáambunbalin jíbiri dísi disípulugu cátei le, ába jagáñidun jáma bián amúlenugu jagía. ²⁵ Ába lagúarun Jesúsu joun, ába laríñagun joun.

—Queisi jasúbudiruni, ja agúmadijabaña jádan ja mámabaña juríu arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ²⁶ Anjein jídan, máma lúba, le abúseeruti lun weíri lan jídan, lúnti lesériwiduniña jíbiri. ²⁷ Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri ²⁸ ftara quei máma lan niábiña, áu le Wügúri Garaúwarügüti, lun nesériwidúniwa, niábiña lun nesériwidun lúma lun níchuguni nibágari lebégime jasálbarun sarágu.

Lareidaguagüdüñ Jesúsu bián marjintiña
(Mr 10.46-52; Lc 18.35-43)

²⁹ Dan le áfurideina jabeí Jesúsu jáma láni disípulugu Jericógiñe, sarágu jáña gürígia afálaruti Jesúsu. ³⁰ Ñíñanu bián marjintiña ñun láru úma, dan le jagáambun luágu Jesúsu lan le ásügürübei, ába jagúaragun.

—jWabúreme, ladúgawagun Davíd, gudéme wamá bun!

³¹ Ába jadeñjan gürígia joun lun jámanichun, ligiatima jagúaragun.

—jWabúreme, ladúgawagun Davíd, gudéme wamá bun!

³² Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadúgün jun?

³³ Ába jaríñagun lun.

—Wabúreme, buséntiwa warjín.

³⁴ Ába jagúdemedagun lun Jesúsu, ába lagúurun luágu jágu. Lúmagiñe óra ligía ába jarjín, ába jafálaruni.

21

Lebélorun Jesúsu Jerusaléoun
(Mr 11.1-11; Lc 19.28-40; Jn 12.12-19)

¹Dan le yaráfaaña lubei lun Jerusalén, ába jachúlürün ligíbugiñe fulásu le gíribei Betfajé, le únabubei libíti wúbü le Olívos, ²ába laríñagun Jesúsu joun biáma jádaangiñe láni disípulugu.

—Jeſba lídan liraúraü fulásu le wagíbugiñebei, jadáriruba ában burígü güiráñu ñi láu ában liraúraü burígü túma, ábame jafáragaduniña, ábame janúgüniña nun. ³Ánjein ñi adímurejati jun lueigiñe jadúgüni, ábame jaríñagun lun luágu busén lániña Jesúsu, luágu láguygüdübaña lan.

⁴Lasúseredunbei líra lun lagúnfulirun lé meja laríñagubei proféta dan le labúrjanbei ítara.

⁵Aríñaga jumá lun ubúrugun Sión.

“Niteín Burúeite bun láu únabuni, waríñu lanágawagu ában burígü,

waríñu luágu ában liraúraü burígü, anímaalu anáajati ílaü.”

⁶Ába jóúdin disípulugu, ába jadúgüni quei laríñaguni Jesúsu joun. ⁷Ába janúgünun burígü tugúya láu sun tiraú, ába jíchugunun janáangun jawágu, ába lawárirun Jesúsu.

⁸Sarágu jañáti güriñgía, ába jábudunun janáangun luágu úma, jíbiri, ába jáchujan tilímun wéwe, ába jíchaajani luágu úma. ⁹Dándu güriñgía ja ubáraübaña quei ja árigibaña, ába jagúmeserun agúaraja.

—¡Uweiriguni lun ladúgawagun urúei Davíd! ¡Biníwati wügúri le núbinbei lídan líri Wabúreme Búngiu! ¡Uweiriguni lun Búngiu!

¹⁰Dan lebélorun Jesúsu ubúrugun Jerusalén, ába jafúudun sun ja ñíbaña, ába jaríñagun sarágu.

—¿Cáteisan güriñgía le?

¹¹Ába jaríñagun güriñgía.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünnun Jesúsu témpulu
(Mr 11.15-19; Lc 19.45-48; Jn 2.13-22)

¹²Lárigiñe, ába lebélorun Jesúsu tídon láni Búngiu témpulu, ába labúgaguniña sun alúgurajatiña jáma agáñijatiña ja ñíbaña. Ába lagáragaguni dábula buri le jadábulan asáansijabaña seínsu ñi joun güriñgía, lúma jála ja alúgurajabaña únjun.

¹³Ába laríñagun joun.

—Laríñajare Búngiu tídan Lerérun. “Núban fulásu le ñí lubei gayára lan jayúmuragun güriñgía nun”, ánjein jugúya, barú jumaaru quei jában jíwerutiña.

¹⁴Ába jayábin fiú maríjintiña jáma danímaatiña lúmoun Jesúsu ñi témpulurugu, ába lareídaguagüdüniña. ¹⁵Dan le jaríjinbaalin jábutigu fádorigu jáma arúfudajatiña lilúrudun Moisés miláguru buri le ladáagubei, lúma dan le jagáambuni jagúarajan irájüñü témpulurugu. “¡Uweiriguni lun ladúgawagun urúei Davíd!”, ába jagáñidun. ¹⁶Ába jaríñagun lun Jesúsu.

—¿Agáamba bumútisan le jaríñagubei ja?

Ába laríñagun Jesúsu joun.

—Ánja, agáamba numúti. ¿Malíjan jumágili tídan Lerérun Búngiu le ñí lubei laríñawagúa lun Búngiu.

Adúgaadibu lun jerémujan núbüriñgía jáma irájüñü ja machúlaagiña, cátei buíti buágu?

¹⁷Ába lígiruniña, ába lídin ubúrugugiñe lun Betánioun, ába lásügürüni áriebu ñi.

Líñaragunun Jesúsu tídibu ígo to múnboun

(Mr 11.12-14, 20-26)

¹⁸ Larúgan bináafin, dan le lagíribudun Jesúsu ubúrugun, ába lalámachun. ¹⁹ Ába laríjin ában tídibu ígo láru úma, ába lídin tuágun, madáriti ni cáta tuágu lueídügüya ubánaü. Ába laríñagun tun tídibu ígo tugüya.

—¡Magíndadügüyabá!

Lídan óra ligía ába tásaürün. ²⁰ Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída liñásan tásaürübei tídibu ígo to ítara óufun?

²¹ Ába laríñagun Jesúsu joun.

—Nínárün jáu, ánjaün affíne le gumúti, mámarügübei líbe le nadügübei tun tídibu ígo to gayára jumá adúga, gayáraabei jaríñagun lun wúbü le. “Gídaba yágiñe, dabúba baránajoun”, ábame lasúseredun. ²² Súnme gíñe cátei le jamúriajan lúma Búngiu, ánjein affíne jubeí, jibíjubei.

Lubáfu Jesúsu

(Mr 11.27-33; Lc 20.1-8)

²³ Ábati lebélorun Jesúsu témpulurugun, dan niján lan arúfudaja ñi, ába jayábin jábutigu fádírigo jáma wügúriña ábutigu lídan jaffínen jurú, ába jaríñagun lun.

—¿Aríñagabei woun ca lan biríchabei lun badügüni cátei le? ¿Ca íchugubalin ubáfu le bun?

²⁴ Ába laríñagun Jesúsu joun.

—Nálügüdaadün gíñe ában cátei, ánjein jóunaba nun, ábame naríñaguni jun ca lan áu ubáfu nadúgei buri cátei le. ²⁵ ¿Ca óúnajabalin Juan abásteragüdaja? ¿Búngiu, ódi wügúriña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óúnajabalin, laríñaguba woun ca lan uágu maffínerun wabéi lun. ²⁶ Ánjawa aríñaga luágu jóúnajan lan wügúriña, jóuserubadiwa gürígia wuríba ladúga súngubei affíñetiña luágu proféta lán.

²⁷ Ábati jaríñagun lun Jesúsu.

—Íbídíñeti woun.

Ába giñeti laríñagun joun.

—Maríñagun nubéi giñéti jun ca lan áu ubáfu nadúgei buri cátei le.

Jémpulu jawáguti bián isáanigu

²⁸ Ába laríñagun Jesúsu joun.

—Nabájüdagua ában cátei jun, jaríñageime nun ída líña lan jaríjin lun. Níñein ában wügúri, bíamáñanu lisáanigu. Ába laríñagun lun ában jádaangiñe. “Niraú, beíba ñadágimein uguñe lídan talúbajoún ninádirigu.” ²⁹ Ába laríñagun lisáani lun. “Mabúseeruntina nídín.” Lárígiñe, ába lasáansiragun larítangun, ába lídin ñadágimein. ³⁰ Lárígiñe, ába lídin úguchili aríjei le ában, aríñageinalef le méme laríñagubei buga lun le furúmiñeti lun. Ába loúnabun le. “Ánja, nídiba.” Mídinti. ³¹ Aríñaga jumeí nun, ¿cági jádaangiñe biángubei adügübalin le labúseerubei úguchili?

Ába jaríñagun.

—Le furúmiñebei.

Ábati laríñagun Jesúsu joun.

—Nínárün jáu luágu choúrítima lan jebélurun agúburajatiña liseínsuna gumádi jáma jórugun lídoun larúeijan Búngiu sügú jáu, ³² ladúga ñúbinti Juan le abásteragüdajabei arúfudaja jun ída lúba lan ligáburi jabágaridun, maffíneruntün lun, ánjañati ja agúburajabaña liseínsuna gumádi jáma jórugun, affíñeratiña lun. Jugüya, láu sun aríja jumáni sun líra, masáansiragunti jigáburi lun jaffínerun lun.

Jémpulu jawáguti ñadágimeintiña ja wuríbabaña
(Mr 12.1-12; Lc 20.9-19)

³³ Agáamba jumeí ábaya jémpulu le. Luáguti ában wügúri labúreme ában ichári, ában lábunagun tídibu beíbeí lichárirugú, ába ladúgün baríferu láu, adúga ligía ában ágei lun laribichawagún tíra beíbeí lídoun lúma ában wáyelesi lun gayára lan loúnigiruni sun cátei.

Ába lájayajani ichári joun ñadágimeintiña, ába lídin adúga weíyaasu. ³⁴ Dan le lachúlürün dan lun alúbajani, ába loúnajan jádaangiñe lumúsuniña amúriajei lufánran jámagiñe ñadágimeintiña. ³⁵ Ábarüga járüügüdüniña ñadágimeintiña músu jagía, buleísei jameí ában, áfara jameí ában jilágubei, rúgua jagía dúbü luágu le ában. ³⁶ Ábaya loúnajan labúreme ichári gíbetimaajaña sügú jáu ja loúnajabaña furúmiñe, ligía méme jadúga ñadágimeintiña joun.

³⁷ Agúmujóuni, ába loúnajani liraú, ába laríñagun lúnguarügü. “Inébebei niraú joun.”

³⁸ Dan le jaríjinbaalin ñadágimeintiña liraú, ába jaríñagun jámagua. “Nijánba le erésibirei alágan, wáfaraali jilágubei, reídei wamámuga láu alágan.” ³⁹ Ábati járüügüdüni, ába jaságaruni lídaangiñe ichári, ába jáfaruni jilágubei.

⁴⁰ Ába lálügüdajan Jesúsu.

—Dánmeti líabín labúreme ichári, ¿cábagi ladúga jáu ñadágimeintiña ja?

⁴¹ Ába jaríñagun lun.

—Láfaragubaña wuríbatiña jagía jilágubei, magúdemedagúnbaña lun, ábame lájayajani ichári joun ámu ñadágimeintiña ja lúntiña jedéreguni lufánran lun lídaangiñe alúbajani lídan dan.

⁴² Ábati laríñagun Jesúsu joun.

—¿Malíjaña ja jumágiru Lerérun Búngiu? Taríñajare nuágu.

Le meja dúbü le mabúseerun jabeí ábunagutiña, ligíaali furúmiñeti.

Wabúreme Búngiu adúgübalin lun furúmiñebei lan, áni aríja wamúti quei ában cátei weíriguti.

⁴³ Ligía naríñagunbei jun luágu lagídarúaba lan larúeijan Búngiu jueí, jugúya le weírigubei lídan jaffínen juríu, ábame lichugúniwa joun güriquia ja edéreguruti alúbajani le lání larúeijan Búngiu. ⁴⁴ Ánjeinti áu, le dúbü ligía, furúmieguarügü le eíguaduti nuágun lañaúrudagúba, léti uáguti leíguada nigáni, lagúmuchaguagüdübei. Ligiaba asúsereda joun güriquia ja májabaña nun.

⁴⁵ Dan le jagáambunbalin jábutigu fádorigu jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja. ⁴⁶ Ábati jabúseerún yebe járüügüdüni, madúgün jamúti ladúga janúfude jaweí güriquia, ladúga affíne jamá güriquia luágu proféta lan.

22

Jémpulu luáguti maríei

¹ Ábaya lagúmeserun Jesúsu adímureja joun láu jémpulu, ába laríñagun joun.

² —Nijánya ában jémpulu luáguti arúeijani le lánina siélu. Níñein ában urúei adúgüti ában fédu lubá lamárieidun lisáani. ³ Ába loúnajaniña lumúsuniña ougaña amísurajoútiña, májatiña amísurajoútiña jayábin. ⁴ Ábaya loúnajan ámu músu, ába laríñagun joun. “Aríñaga jumá joun amísurajoútiña luágu aráanseeli lan eígini. Áfaragüda náaña bágasu jáma nilügüniña anímaalugu dibúnetiña, aráanseeli sun cátei, lun jayábin marfeirugu.”

⁵ Madúgüntiña amísurajoútiña gásu. Ába lídin ában jádaangiñe lichárigu, ñúdün ában adúga ámu wadágimanu, ⁶ ja jíbiri, ába járüügüdüniña lumúsuniña urúei, ába jóuseruniña wuríba, ába jáfaraguniña jilágubei. ⁷ Ábati lagáñidun urúei sarágu, ába loúnajaniña lisúdaaranigu áfaraguaña gáfarajatiña jagía jilágubei lúma águdei jageíra. ⁸ Ába laríñagun joun

lumúsuniña. “Aráanseeli sun cátei lun maríei, áni amísurajoútiña jagúra madúnamatiña lun jamísurajoúniwa. ⁹Jeſba lubeiti luágu buri larígei úma, ábame jamísurajaniña sun ja úmatiña jadúnragua.” ¹⁰Ába jóúdin músu luágu buri úma, ába jóúndaruniña sun ja úmabaña jadúnragua, buítiña jáma wuríbatíña, ába tabuíinchun múna jáu gürígia.

¹¹Ábati lebélorun urúei aríjaña amísurajoútiña, ába laríjin ában wügúri le madáuragunti quei lun ában maríei ñi. ¹²Ába laríñagun lun. “Numáda, ¿ída liñági bebélurunbei ñájoun madáuragunga quei lun ában maríei?” Maní ligía. ¹³Ába laríñagun urúei joun ja eténirubaña lún buri dábula. “Gürágua jumeí lugúdi lúma lújabu, ffjumei lídoun lubúriga le bougudíbei, le ñíba lubeí layájua, acúnrijame lári.” ¹⁴Ába laríñagun Jesúsu joun ja agáambubalin.

—Gíbetiña agúarútiña lun jebélurun lídoun larúeijan Búngiu, míbetiña anúadiruña.

Luáguti lafáyeirun liseínsuna gumádi
(Mr 12.13-17; Lc 20.20-26)

¹⁵Ába jóúdin fariséogu, ába júradun aríja cába lan gayára lan jadúgün lun jaríña-gagüdüni Jesúsu cátei le uáguti gayára lan jadárirun lidúnrun. ¹⁶Ábati jóúnajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan baríñagubei, luágu gíñe arúfuda báani lémeri Búngiu láu inárüni, manúfudeiga lueí ni ában, ladúga ni cáta lan luweírigun gürígia bun. ¹⁷Rúbei lubeiti baríttagun woun. ¿Buítisan lun lafáyeirúniwa seínsu lun urúei Rómána ódi mabuídunti?

¹⁸Ariágu líña Jesúsu lun luríba jayúmajan, ába laríñagun joun.

—¿Bíangua tigíbu jugúya le! ¿Ca uágu jíchaaja sádara nubá? ¹⁹Arúfuda jumeí seínsu le áubei lafáyeijoua liseínsuna gumádi nun.

Ába janúgün ában seínsu le denáriu lun. ²⁰Dan laríjini, ába lálügüdüniña.

—¿Ca iyáwa le luágubei seínsu le, lúma íri le búrüwañubei luágu?

²¹Ába jaríñagun lun.

—Láni urúei Rómána.

Ábati laríñagun Jesúsu joun.

—Rújumeiti láni urúei lun urúei, rújumeime láni Búngiu lun Búngiu.

²²Dan jagáambunbalin le, ába laweíridun janígi, ába jígiruni, ába jóúdin.

Álügüdjani libúgürü ásaaruni lídaangiñe ouweni
(Mr 12.18-27; Lc 20.27-40)

²³Wéyu méme ligía, ába jóúdin fiú saduséogu aríjei Jesúsu. Jaríñajare saduséogu luágu úa lan ásaaruni lídaangiñe ouweni. Ábati jaríñagun lun Jesúsu.

²⁴—Maésturu, aríñagatí meja Moisés luágu ánjein lan ouwe ában wügúri le marfeiti masáaniguga táu lúmari, lúnti lan lamárieidun lamúlen túma wúri to uefboun loúwe, lun gasáanigu lan táu lun líbugaña le ouwebei. ²⁵Wel, ñíñanu méjati sédü gamúlenuguátiña ya wádan, ába lamárieidun le furúmiñeti, ába louñwen. Quei masáanigu lubeí táu lúmari, ába lígirunun lun lamúlen. ²⁶Ligía méme suséreti lun jabáman, lárigiñe lun júriüwan darí lúmoun jasédün. ²⁷Lárigiñe, ába gíñe toúnwen wúri. ²⁸Dánmeti jásaarun lídaangiñe ouweni, ¿cábati úmari wúri tugúya jádaangiñe sédü gamúlenuguátiña ja, lárigiñe maríei jagía sun jagía túma?

²⁹Ába laríñagun Jesúsu joun.

—Bulfeiguatün ladúga libídiñe tuáguti Lerérun Búngiu jun, ni luáguti lubáfu Búngiu.

³⁰Dánme le jásaarun jiláaña lúnya jabágaridun, ámujalime jabágarí, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu.

³¹Ánjeinti luágu sará jamá jiláaña lúnya jabágaridun, ¿malíjan jumágili le laríñagubei Búngiu güanarü jun? Ítara líña laríñagun. ³²“Áu Lubúngiutebei Abrahám, Lubúngiute Isáac, Lubúngiute Jacób.” Ítara líña lubeiti, ánjein jamúga jiláañu jáña lubeí wügúriña jagía

lun sun dan, maríñagunti jamúgati Búngiu luágu Jabúngiute lan, ladúga máma Jabúngiute jiláguaaña Búngiu, Jabúngiute wímwangiña.

³³ Dan jagáambunbalin gürgia cátei le, ába laweíridun janígi láu le larúfudajabei.

Gumádi le weírgutimaabei

(Mr 12.28-34)

³⁴ Dan le jasúbudirunbalin fariséogu luágu manígüda láaña lan Jesúsu saduséogu, ába jóundaragun, ³⁵ níñein ában jádaangiñe le arúfudajati lilúrudun Moisés, abúseeruti laríjin lábun Jesúsu, ába laríñagun lun.

³⁶ —Maésturu, ¿cásan gumádi weírgutimaabei lídan lilúrudun Búngiu?

³⁷ Ába laríñagun Jesúsu lun.

—“Jínsiñelá Babúreme Búngiu bun táu sun banígi, táu sun buwáni, láu sun bisáminan.”

³⁸ Niján gumádi weírgutimaabei, furúmiñeti gñíe lídaangiñe sun lugúmadin Búngiu.

³⁹ Áni le libíaman lídan uweírguni lenége le, ítara líña. “Jínsiñe jamá bíbirigu bun quei bínsiñegua búngua.” ⁴⁰ Bián gumádi le, ligía ébuubei lun sun lilúrudun Moisés lúma jarúfudajan profétagu.

¿Ca adúgawagun Crístu?

(Mr 12.35-37; Lc 20.41-44)

⁴¹ Sun añája lan fariséogu oúndaragu, ⁴² ába laríñagun Jesúsu joun.

—¿Cásan jarítagebei libúgürü Crístu le lanúadirubei Búngiu lun lasálbaruniña gürgia? ¿Cásan adúgawagun?

Ába jaríñagun lun.

—Ladúgawagun Davíd.

⁴³ Ábati laríñagun Jesúsu joun.

—¿Ída líñáti lagúarunbalin Davíd quei Abúremein, láu lubáfu Sífiri Sándu? Aríñagatiga Davíd.

⁴⁴ Laríñajare Búngiu lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

⁴⁵ ¿Ída lubáti ladúgawagun lan Davíd Crístu ánjein wá lubali Davíd guánarü Crístu Nabúreme?

⁴⁶ Úati ni ában gayáraati lounabun ni ában dimúrei, lúmagiñeti wéyu ligía, manígiti ni ában lun liábin álügüdaguei.

23

Líchugun Jesúsu jadúnrun fariséogu jáma arúfudajatiña lilúrudun Moisés

(Mr 12.38-40; Lc 11.37-54, 20.45-47)

¹ Ábati laríñagun Jesúsu joun láni disípulugu jáma jíbiri gürgia ja ñíbaña.

² —Gabáfutiña arúfudajatiña lilúrudun Moisés jáma fariséogu lun jafúnraanguagüdüni líla lilúrudun Moisés. ³ Agáamba jumáña lubeíti, adúga jumeíme sun le jaríñagunbei jun, le jadúgübei, mafálara jumeí ladúga aríñagatiña ában cátei, jadúga ámu. ⁴ Rújamuti gumádi joun gürgia queísi anúgüni júrüti le siñábei lanügüniwa, ánjein jagía, madúgüntiña ni cáta lun jíderaguniña gürgia luágu buri anúgüni lánina lúrudu le jíchugubei jawágu. ⁵ Jadúgüni sun cátei lun jaríjiña gürgia. Jínsiñeti joun lun jíchugun tirájüñü gáfu táu Lerérun Búngiu jeréberugu lúma luágu buri jarúna, lúma lun jadáüragun anáanguni to durúrutu. ⁶ Buséntiña járügüdüni lubuídun-ágei ubaráü lídan eígini lúma jalaú le jála weírgutiña tídan jalígílisin. ⁷ Buséntiña lun jabúsurun gürgia joun láu sarágu inébesei úmada, lun gñíe lagúarúniwa joun, “maésturugu”.

⁸ “Ánjein jugúya, mígira jumá lun laríñawagúniwa jun, “maésturugu”, ladúga sun jugúya ában jáu, áni ában rügüñein gñíe Jumaésturun, áu le Crístubei. ⁹ Maríñaga jumá

gñe “núguchi” lun ni ában wügúri ubouágu lídan ligáburu jagúaruni Búngiu le siélubei “Núguchi”. ¹⁰Mígirun jugúyame lun laríñawagúniwa jun “ábutigu” ladúga Crístu rügúñein Jábuti. ¹¹Le eseríwidubei joun jíbiri, ligía weírigitimaabei jídan, ¹²ladúga le anáanguti lúngua weíri, lúnabudagúdwaba, ánjein le anáanguti lúngua únabu, laweíridagúdwaba.

¹³¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbul, ladúga darú jumuti lubéneri arúejani le lánina siélu lueí jebélurun ámu, mebélu jugúyati, mígirun lun jebélurun ja busénbaña jebélurun.

¹⁴¡Fugiábugu jugúya, arúfudajatiña lilúrudun Moisés jáma fariséogu! ¡Biángua tigíbul! Gídá jumutu jában wúrñia ja jiláaña úmari jaweí, lúnti ibídiñewa lan, ába jadáagun ayúmuraguni lun Búngiu le migínaguti. Ligía weírítimaabei lubeí jasúfurirun lueígne.

¹⁵¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbul! Efbuga jumúti múa, áfayaja jumeí barána áluaja gürígia lun jánigume, dánti le ibíja jumáli le jabúseerubei, ába jadúgüniña gürígia jagía bián weíyaasu lúntima jóudin máfiougati stígú jáu.

¹⁶¡Fugiábugu jugúya, adúndejetiña maríjintiña! Aríñagatün luágu le lan gürígia íchuguti dimúrei, ánjein áfiñura tuágu témpulu mála lan líra, áni ánjein lan áfiñura luágu tigóluna témpulu, aná lan líra, lúnti lan lagúnfulirun. ¹⁷¡Ibidiougua líña jáu, maríjin! ¿Cági weírigitimaabei, gólu ódi témpulu to adúgúboun lun sagráubei lan gólu? ¹⁸Aríñagatün gñe luágu ánjein lan íchiga gürígia dimúrei lun láfiñurun luágu latárü, mála lan líra, áni ánjein lan áfiñura luágu cátei le adágaragúdwabei luágu latárü, aná lan líra, lúnti lan lagúnfulirun. ¹⁹¡Ibidiougua líña jáu, maríjin! ¿Cági weírigitimaabei, cátei le luágubei latárü ódi latárü le adúgúbalin cátei ligía lun sagráubei lan? ²⁰Le áfiñurubei luágu latárü, máma rügúñein luágu latárü láfiñurun, láfiñuruña gñe luágu sun le ligíbuagubei latárü. ²¹Le gñe áfiñurubei tuágu témpulu, máma rügúñein gñe tuágu témpulu láfiñura, láfiñuruña gñe luágu Búngiu le aganoúbei tídan. ²²Le gñe áfiñurubei luágu siélu, láfiñuruña gñe luágu lála Búngiu, lúma gñe luágu Búngiu le añúurubei luágu jalaú ligía.

²³¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbul! Adúgatün dísi fáreinti láu jíduru le ménta, anísi, lúma comíno lun jíchugun ában fáreinti lun Búngiu, áni mebéresentün láu arúfudajani le weírigitimaabei lídan lilúrudun Búngiu, queí buri lun jadúgüni sun cátei láu úaraguni, lúma lun jagúdemedun gürígia jun, lúma lun jagúnfulirun lúma Búngiu. Ligía buri cátei le lúnbei jadúgüni, mígirunga jumeíme jadúgüni le íbiri. ²⁴¡Jugúya, adúndejetiña maríjintiña jugúya le, áseija jumúti ában minímini áni julútün ában caméyu!

²⁵¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbul! Adúgatün lun jarítagn gürígia luágu buídu lan jigáburu. Ítara jíña queí wéru lúma asíedu le jachíbubei bougudigiñe libítí, ánjein múnadagiñe jibítí, buín jíña láu buri luweínamu-águu lúma íweruni. ²⁶Fariséogu maríjintiña. jarúmagüda jumeí wéru lúma asíedu lurágeirugugiñe furúmiñe, ábame gñe larúmadun bougudigiñe libítí.

²⁷¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbul! Ítara jíña queí umúajái le afeíndijóuti láu jarúti bougudigiñe libítí, buídumeráuti laríjin, ánjein lurágeirugugiñe, buín líña láu jábu jiláaña lúma sun luwúyeri iwíyei. ²⁸Ítara jíña, bougudigiñe jibítí, ma lubuídun jaríjiniwa jagíbugiñe gürígia, ánjein múnadagiñe, buín jíña láu iyéerejabuni lúma wuribani.

²⁹¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbul! Rújumuti dúbü arítaguagüleme luágu jamúaja profétagu, wéndegüda jumeí umúajái le jáni gürígia já meja buídubaña. ³⁰Ábati jaríñagun. “Lun jamúga meja awánjeinjadiwa lan le jadáani binádu wagúbürigu, míderagun wamútiña jamúga áfaraguaña profétagu.”

³¹Láu líra, subúdiguatün júngua luágu jádaangiñetün lan ja áfaragubaliña profétagu jagía.

³²¡Gumújumeiti jadúgüni lé meja jagúmeserubei binádu jagúbürigu adúga!

³³ ‘Jéwegu! ¡Jarásan jéwegu! ¿Ída lubásan jeséfurun lueí asúfuriruni le lánina má-fiougati? ³⁴ Ligía nouñajaba lubeí profétagu, jáma ja chúbaña áu, jáma arúfudajatiña, jun. Áni jugúya, jáfaragubaña jádaangiñe, dágua jumáñame jíbiri luágu gurúwa, bei jumáñame jíbiri tidan jalígilisin jurú, eibaaja jumáñame lídan sun fulásu. ³⁵ Ítara lúba láburujan dúru juágun luágu sun jítau le áwiyurubei jádaangiñe sun wügúriña buítiña ja jáfarawagúbaña, lúmagiñe meja Abél le richáguabei darí lúmoun Zacarías, liraú Berequías lé meja jáfarubei tabádinagua témpulu lúma latárú. ³⁶ Ninárün jáu luágu láburujaba lan dúru jawágun gürígia ja lánina dan le luágu buri sun cátei le.

Layájun Jesúsu jawágu lílana Jerusalén
(Lc 13.34-35)

³⁷ ‘¡O jugúya Jerusalénna! ¡Áfaragua jumáña profétagu, chúgua jugúya dúbü jawágun ja louñajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁸ Ígira láadün Búngiu, ³⁹ áni naríñajare jun luágu maríjindügúya jumáadina lan queísi jasálbaragúile daríme lachúlürün dan lun jaríñagun. “Biníwati le ñúbinbei lídan líri Wabúreme Búngiu.”

24

Laríñagun Jesúsu luágu tagúnrinchawagúba lan témpulu
(Mr 13.1-2; Lc 21.5-6)

¹ Dan le láfuridun Jesúsu témpulurugugiñe, leíbuga yebe, ligía jayábin láni disípulugu lúmoun, ába jarífudun tuágun témpulu lun. ² Ába laríñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dúbü ligíbuagu dúbü, tagúnrichawagúba sun to.

Seíni buri lubáragiñe lagúmuchun ubouí
(Mr 13.3-23; Lc 21.7-24, 17.22-24)

³ Ábati jóúdin luágu wúbü Olívos, dánti ñun lan Jesúsu ñi, ába jóúdin láni disípulugu agúlülüja lúma, ába jaríñagun lun.

—Buséntiwa lun bariñaguni woun ídaba lan tagúnrinchawagúba témpulu. ¿Cába liseíni bagíríbudun ubouágun, lúma lagúmuchagúile?

⁴ Ába laríñagun Jesúsu joun.

—Toúnigi jumá lun úa lan ayéedutün, ⁵ ladúga sarágujaba ñúbintiña aríñageina. “Áu Crístubei”, áni sarágujaba jayéedun. ⁶ Jugúya jagáambuba lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá. Lúnti itara lan, mámagilíme lagúmuchagúile ubouí líra. ⁷ Lageíndaguba ában ageirai lúma ában, lawúríbujaba ában fulásu lúma ában, ñíbei ilámaü, sándi, járabaganáli lídan sarágu fulásu. ⁸ Sun líra lagúmesejarügügli le lúnbei lasúfurirúniwa.

⁹ Jugúyati, jedéregerúba lun lúruđu lun jasúfurirawagúdún, lun gíñe jáfarawagúniwa jilágubei, jiyéeregedúba lun sun ubouí nueígiñe. ¹⁰ Lídaanme dan ligía, sarágujaba eféridiruti jafíñen nuágu, ábame jeyéeregedún jóúniwagua, ábame jalúguragun jóúniwagua. ¹¹ Jachúlaaguba sarágu yeetíña aríñaga luágu profétagu jamá áni sarágujaba gürígia jayéedun. ¹² Ñíbei sarágu wuríbani daríme lun jeféridiruni sarágu jádaangiñe lánigu Búngiu ínsíñejabuni jádaangua. ¹³ Le asígiruti derégüdagu darí lúmoun lagúmujóun, lasálbarúba. ¹⁴ Lapúrichijóuba ugánu buíti le luáguti larúeijan Búngiu lídan sun ubouí lun lasúbudirúniwa lídan sun fulásu, ligiaalímeti lagúmuchun ubouí.

¹⁵ ‘Abúrújatí meja proféta Daniél luágu cátei iyéereguti le gagúnrinchawagúdadíbei, dánme le jaríjin chúlújali lan cátei le lídoun fulásu le sánduti—le alíjabei, gunfaráandalá—, ¹⁶ jámeti Judéabaña, lúntime janúrajan luágun buri wúbü. ¹⁷ Léme tábulugubei lúban wéyu ligía, maráriralá aságara ni cáta múnadagiñe, ¹⁸ le áraabubei, magíríbudalá ni abúdoun lanáangun. ¹⁹ ¡Fugiábugume wúriña ja dageínatiña o ja lan gasáanigutiña ja gurágiña

lídounme wéyu ligía! ²⁰ Amúriaja jumá lúma Búngiu lun máma lan lídan lidíliga ni lídan luwéyuri eméraaguni janúraja. ²¹ Ladúga ñíbei sarágu sáfuri le úagili líbe lúmagiñe lagúmeserun uboú, úabei gñe lárigiñe. ²² Lun jamúga madúraagun lubeí lan Búngiu dan ligía, úati jamúga ni ában asálbaruti, ladúraagubei jawágurügü ja lanúadirubaña lun lánigu jamá.

²³ ‘Ánjein lubeíti aríñawagua jun. “Niján Crístu” o “Ningitán lan”, mafiñera jumá, ²⁴ ladúga jayábinba ayéejatiña lun jarúfudagun jóungua camá Crístu, camá buri profétagu, áni jadaáguba oúnwenbun buri seíni lúma miláguru lun jeyéedaguniña ja anúadira láañabaña Búngiu ánjaña gayára. ²⁵ Aríñaga náali le jun lubáragiñe lasúseredun, ²⁶ ligía lubeíti, ánjein aríñawagua jun. “Níjein Crístu yára lídan fulásu le mageírawati”, mídin jumá ñi, ánjaña aríñaga jun. “Niján ya rúmurugu”, mafiñera jumá. ²⁷ Quei laríjiniwa labírichagun luegiñe ában oúbaú libíti siélu lun luágun le ában, ítara lúba dánme le niábin, aú le Wügúri Garaúwarügüti. ²⁸ Ábame láburijan ligáñi Búngiu jawágun gaffgountiña quei wadúbi luágun úgubu jiláali.

Seíni buri lubáragiñe lagíribudun Crístu uboúagun

(Mr 13.24-37; Lc 21.25-33, 17.26-30, 34-36)

²⁹ Lárigiñerügüme lásügürün wéyu buri lánina sáfuri ligía, ábame labúrigadun wéyu, marúnijalime játi, ábame jeíguadúnga warúguma ja siélubaña, ábame ladádagarun sun siélu. ³⁰ Ábameti jaríjini niseíni siélu, súnme gürígia wuríbatíña uboúagu, jayájuajoba láu jaríjini niábinya, áu le Wügúri Garaúwarügüti, lídan juánriñu siélugiñe láu oúnwenbun ubáfu lúma uweírugini. ³¹ Dánme línwirúniwa fídu rein, ábame noúnajaniña náni ánjeligu ja siélubaña lun jóundaruniña nánigu ja anúadira náañabaña lídaangiñe gádürü larígei uboú.

³² Furéndeí jumeí jémpulu le tuáguti tídibu ígo. Dan le ñulúgili tilímun, ába laboúchun tubána, subúdi jumúti luágu yaráfaali lan lubáchouga. ³³ Ítara méme, dánme gñe jaríjini sún buri cátei le, subúdi jumeí luágu yaráfaali lan niábin. ³⁴ Ninárün jáu, luágu lagúnrinchawagúba lan sun ubúrugu le Jerusalén lubáragiñe jóuwegun gürígia ja lánina dan le. ³⁵ Lagúmuchaguba siélu lúma uboú, ánjein nerérun, merédebei magúnfulirúnga.

³⁶ ‘Ánjeinti luágu wéyu lúma óra le lúnbei nagíribudun uboúagun, íbidiñeti ni ca un, ni joun ánjeligu ja siélubaña, ni nun, áu le Liraú Búngiu, Búngiu rügüñein Úguchili asúbudirei.

³⁷ Ítara quei meja lasúseredun lídan meja lidáani Noé, ítara lúba gñe dánme le niábin, áu le Wügúri Garaúwarügüti. ³⁸ Lídan meja dan ligía, lubáragiñe ladíbirun uboú, jerédera meja gürígia eíga, áta, amárieidagua, íchaajaña jasaanigu lun maríei, darí wéyu le lebélorunbei Noé tídoun ugúnein. ³⁹ Meféentiña, darí ladíbirun uboú, ába jañáradagun súnigubei. Ítara lúba gñe dánme niábinya, áu le Wügúri Garaúwarügüti uboúagun. ⁴⁰ Lídaanme dan ligía, ñíbaña bián wügúriña áraabu, lanügúba ában, igirúame le ában según jaffñen nuágu.

⁴¹ Ñíbaña bián wúríña amúlíja, tanügúba ában, igirúame to ában.

⁴² Agágudúañu jumá, ladúga íbidiñeti jun cába lan óra niábin, áu le Jabúreme. ⁴³ Subúdi jumeí le, luágu ánjein lan jamúga lasúbudira tabúreme ában múna cába lan óra liábin jíweruti árieibu, leréderuña jamúga marúmugunga, mígirunti jamúga lun lebélorúniwa íweruja lúbiñe. ⁴⁴ Ligía aráanseñu jumá lubeí, ladúga léme óra magáradajan jumá, ligíame niábin, áu le Wügúri Garaúwarügüti.

Músu le úaraguabei, lúma le múaragúnbei

(Lc 12.41-48)

⁴⁵ Ítara jumá queísi músu úaraguati, gunfaráanda ligía, le lígirubei liyúbudiri lun laríjin jáu ja lúbiñebaña lun líchugun eígini joun lídan dan. ⁴⁶ Gúndaabei músu le dánme le liábin liyúbudiri ánjein ladárra agúnfulira lúma lifisiute. ⁴⁷ Ninárün jáu luágu líchugubei lan liyúbudiri lun laríjin láu sun lumégen. ⁴⁸ Ánjein ában lubeí wügúri wuríbatí músu ligía,

ábame larítangun luágu lúgili lan liábin liyúbudiri, ⁴⁹ábame lagúmeserun ouseraña jíbiri músu wuríba, reidei ligíame eíga lúma áta jáma bacháruatiña, ⁵⁰ábameti liábin liyúbudiri lídan wéyu le magúraban láani, lídan óra le ibídiñeti lun. ⁵¹Ábame líchuguni luweírin-ágei abeichúni luágu, lasíadireime lun máfiougatin úara jáma biángua tigíbu, ábame layájun, acúnrijame lári.

25

Jémpulu jawáguti díisi wúríña irájüñü

¹Ába laríñagun Jesúsu.

—Ítara lubáti arúejiani le lánina siélu quei díisi wúríña irájüñü ja anúgübaña jalámpun le gálati gási, ába jáfuridun lun jadúnragun lúma adári, núdün jamámuga úara lúma maríeurgun. ²Seíngü jádaangiñe, maráanseruntiña, seíngü aráansetiña. ³Ja maráanserunbaña, dan le janúgünbalin jalámpun, manúgüntiña ámu gási luef le lídaanbei jalámpun, ⁴ánjañati ja aráansebaña, barútiña jabúdein láu gási bougudin luef le lídaanbei jalámpun. ⁵Queisiti ladárasarun adári, ába ladábudunga jágu súngebuei, ába jarúmugun. ⁶Queí buri luágu amídi árieibu, ligía lagaambúniwa agúaraguni. “Niteín adári, furfjuma adúnraguei.” ⁷Sun wúríña irájüñü jagía, ába jásaarunga, ába jagúmeserun aráansejei jalámpun. ⁸Ába jaríñagun ja maráanserunbaña joun ja aráansebaña. “Rújuma murúsun lídaangiñe jigásin woun, ladúga léneguchuña walámpun.” ⁹Ába jaríñagun ja aráansebaña joun. “Siñáti, ladúga louguabei woun, louguame jun. Jesbagubei le ní lubei lalúgurajoúa agáñija jumámuga júngua.” ¹⁰Léti añángüra lan ja maráanserunbaña agáñija gási, ligía liábin adári. Játi aráansebaña, ába jebélurun lúma maríeurgun, ába ladaurúniwa béna. ¹¹Lárigiñe, ligía jachúlürün jíbiri wúríña irájüñü jagía, ába jaríñagun. “¡Wabúreme, wabúreme, darábei béna wabá! ¹²Ába laríñagun joun. “Ninárün jáu, ibídiñetün nun.”

¹³Ábati laríñagun Jesúsu joun.

—Agágudúañu jumá, ladúga ibídiñeti jun cába lan wéyu, ni cába lan óra nagríbudun, áu le Wügúri Garaúwarügüti, ubouagun.

Jémpulu luáguti seínsu

¹⁴Ítara líña arúejiani le lánina siélu quei ában wügúri le dan lébei laráansejan lun ladúgün weíyaasu lídoun ámu fulásu, ába lagúarun joun lumúsuniña, ába líchuguni liseínsun lábugiñoun jaríaajan.

¹⁵Lun ában jádaangiñe, rúti queí buri seíngü-mílu fiádürü, queí buri bián-mílu lun ában, queí buri mílu lun ában. Lafánreinjani joun quei jabáfu lun jawádigimariduni. Ábati lídin luágu luweíyasun. ¹⁶Le músu le erésibirubei seíngü-mílu fiádürü, ába luwádigimariduni, ába lagáñeirun seíngü-mílu fiádürü ligíbuagun. ¹⁷Ítara méme le erésibirubei bián-mílu, gáñeiti bián-mílu lánwoun. ¹⁸Ánjeinti le erésibirubei mílu, ába lídin, ába lachígin ában júyu, ába larámuduni liseínsun liyúbudiri ní.

¹⁹Sarágu dan lárigiñe, ába lagríbudun iyúbudiri, ába lagúmeserun aráanseja jáma luágu seínsu. ²⁰Furúmiñe, ába liábin le erésibirubei seíngü-mílu fiádürü, ába ledéregeruni lun liyúbudiri láu seíngü-mílu le lagáñeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagáñeirun ligíbuagun.” ²¹Ába laríñagun iyúbudiri lun. “Buíti, ában músu buíti amúrú, úaragua, quei úaragua bubeí lídan le murúsunrügüti, níchiga gíbetimaati lábugiñe baríaajan. Queímoun, gúnda amúrúme úara núma.” ²²Lárigiñe, ába liábin le erésibirubei bián-mílu fiádürü, ába laríñagun. “Niyúbudiri, biámañein-mílu fiádürü bíchugun nun, niján bián-mílu nagáñeirun ligíbuagun.” ²³Ába laríñagun liyúbudiri lun. “Buíti, ában músu buíti amúrú, úaragua, quei úaragua bubeí lídan le murúsunrügüti, níchiga gíbetei lábugiñe baríaajan. Queímoun, gúnda amúrúme úara núma.” ²⁴Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügúri ban jéreguti, alúbaja ban

le ñí lumuti mábunagun ban, abúdaja amúrú le ñí lumuti machágarun ban ni cáta. ²⁵ Ligía nanúfudedunbei, ába nídin arámudei biseínsun lábugiñe múa. Niján le báni.” ²⁶ Ába laríñagun iyúbudiri lun. “Músu wuríbati, moúnti. Subúdigubei bíñein luágu alúbaja nan le ñí lubei mábunagun nan, abúdaja áu le ñí lubei machágajan nan ni cáta. ²⁷ Ligía lúnti lubei jamúga bíchuguni niseínsun báncürugun lun dan lan jamúga nagíribudun, nerésibiruni le náni láu agáñeiruni.” ²⁸ Ába laríñagun joun ja ñíbaña. “Gidájumei seínsu le lúmabei lueí, rújumei lun le láubei dísi-mílu, ²⁹ ladúga le adúgubei buíti láu le lúmabei, líchugúba lánwoun lun, ábanme lígiragun lun, ánjein le madúgubei buíti láu murúsun le lúmabei, lagídarúaba lueí. ³⁰ Músuti moúnti le, fñjumei lídoun lubúriga le bougudibeí, le ñíba lubeí layájuaja, acúnrijame lári.”

Jagúseragüdúniwa sun gürígia

³¹ “Dánme nagíribudun, áu le Wügúri Garaúwarügüti, ubouágun, niábinba quei urúei geyégu ánjeligu náu, ábame nañúurun luágu nála láu uweíriguni lun nagúseragüdúniña sun gürígia. ³² Ábame joundaragun gürígia ja lílana sun fulásu nigíbugiñe, ábame nafán-reinraguniña jawáriuagua quei lafánreinraguniña jouniri mudún, mudún jádaangiñe gábara. ³³ Ja richáguabaña ligíbugiñe Búngiu, ábame níchuguniña lueígiñe nouñwenren, ja wuríbabaña ligíbugiñe Búngiu, lueígiñebaña nubaúna. ³⁴ Naríñagame joun ja lueígiñebaña nouñwenren. “Jigougu, jugúya le biní laalfbei Núguchi, resíbi jumeí arúejani le aráanserúbei jubá lúmagiñe ladúgüni Búngiu ubou. ³⁵ Ladúga dan le nalámachunbei, rúttün eíginí nun, dan le namágürabudunbei, rúttün dúna nun, dan le eíbugañaja nubeí quei chülúdügüti, rúttün múna nun. ³⁶ Dagáti manáanguni nuágu, rúttün anáanguni nun, dan le nasándirunbei, ñúdüntün aríjana, dan le nadaürünbei, ñúdüntün aríjana.” ³⁷ Ábameti jaríñagun richáguatiña jagía nun. “Wabúreme, ¿ída bugagí waríjabu láu ilamáu, ába wíchugun eíginí bun? ¿ída bugagí waríjabu láu mágürabu, ába wíchugun dúna bun? ³⁸ ¿Ída bugagí waríjabu quei chülúdügüti, ába wíchugun múna bun? ¿o manáangunga, ába wíchugun anáanguni bun? ³⁹ ¿Ída bugagí waríjabu láu sándi o furísunrugu, ába wóúdin aríjabu?” ⁴⁰ Ábame naríñagun joun. “Ninárün jáu, furúmieguarügü cátei le jadúgubei lun ában jádaangiñe namúlenu, ca lan lúnabunbei, nun méme jadúgei.”

⁴¹ “Naríñagameti joun ja lueígiñebaña nubaúna. “Díse jumá nueí, jugúya le lúnbei jasúfurirun lun sun dan, jeíba lídoun wátu geméti le meñeguchadibeí, le aráanserúbei lubá Máfia jáu lánigu. ⁴² Ladúga dan le nalámachunbei, míchutün eíginí nun, dan le namágürabudunbei, míchutün dúna nun. ⁴³ Eíbugatina quei chülúdügüti, míchutün múna nun, mégeitina anáanguni, míchutün nun, sánditina, daúwa áu, mídintün aríjana.” ⁴⁴ Ábame jaríñagun wuríbatiña jagía nun. “Wabúreme, ¿ída bugagí waríjabu láu ilamáu o mágürabu, o quei chülúdügüti, o manáangunga, o láu sándi, o furísunrugu, míderagun wamútibu?” ⁴⁵ Naríñagame joun. “Ninárün jáu, luágu furúmieguarügü lan cátei le madúgün jubeí joun gürígia, ca lan lúnabunbei, madúgün jumúti gñe nun.” ⁴⁶ Ábameti joudín ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame joudín siélun lun jagúndaarun ñi lun sun dan.

26

Aráansejani lun lárügüdúniwa Jesúsu (Mr 14.1-2; Lc 22.1-2; Jn 11.45-53)

¹ Dan aríñaga láali Jesúsu sun cátei le, ába laríñagun joun láni dispulugu.

² —Quei jasúbudiruni, bían wéyu lárigiñe le, ligíame fédu le páscoa, áni nedéregérúaba, áu le Wügúri Garaúwarügüti, lun nádarawagún luágu gurúwa.

³ Ába jóundaragun jábutigu fádirigu, arúfudajatiña lilúrudun Moisés, jáma wügúriña wefrigutiña lídan jafíñen juríu tigíbugiñe lúban Gáifasi, fádiri le íñutimaabei. ⁴ Ñi jaráanseja luágu Jesúsu lun járügüdüni láu yéguau, lun jáfaruni jilágubei. ⁵ Jaríñagati.

—Máma látia fédurugu lueí jachágaragun gürígia.

Tájuduraguni ában wúri lábulugu Jesúsu

(Mr 14.3-9; Jn 12.1-8)

⁶ Betániañein Jesúsu, lúbiñe Simón lé meja gawágubei gumeín luágu sun lúra, ⁷ ába tiábin ában wúri luágun, gámeina tugúya ában lágei ibíñe le weíriti lisérun. Dan luáguñein lan dábula Jesúsu, ába téseruni ibíñe ligía lábulugun. ⁸ Dan jaríjinbaalin disípulugu cátei le, ába jamágundarun, ába jaríñagun.

—¿Cámesan leféridirúa le itara? ⁹ Gayáraati jamúgagu lalúgurúniwa le luágu sarágu seínsu lun jíderawagún gudémetiña.

¹⁰ Ába lagáambuni Jesúsu le jaríñagubei, ába laríñagun joun.

—¿Ca uágu jañáwurija tun wúri to? Cátei buíti le tadúgübei. ¹¹ Súnwandan yábaña lan gudémetiña júma, ánjein áu, mámaba súnwandan júma nan. ¹² Le tadúgübei wúri to láu téseruni ibíñe le nuágun, taráanseruñádina lubá nábonúniwa. ¹³ Ninárün jáu luágu le lan ní lumuti lapúrichijouá ugánu luáguti asálbaruni lídan sun ubou, labájüdawagúaba gíñe le tadúgübei wúri to, lun larítawagún tuágu.

Lalúguruni Júdas Jesúsu

(Mr 14.10-11; Lc 22.3-6)

¹⁴ Ába lídin ában jádaangiñe dúusu disípulugu, le gírubei Júdas Iscarióte, adímureja jáma jábutigu fádirigu. ¹⁵ Ába laríñagun joun.

—¿Atiribeí jíchugun nun ánjein nedéregera Jesúsu jun?

Ába jíchugun darándi murúsun pláta lun. ¹⁶ Lúmagiñeti óra ligía, ába lálujan Júdas ída lúba lan luwúyeri ledéregeroni Jesúsu joun.

Lagúmujoún leígin Jesúsu jáma lánigu

(Mr 14.12-25; Lc 22.7-23; Jn 13.21-30, 1 Co 11.23-26)

¹⁷ Le furúmiñeti wéyu lídan fédu le ní lubei teigúa fein magánatu ísi, ába jayábin disípulugu lúmoun Jesúsu, ába jaríñagun lun.

—¿Jalía babúseera waráanserun lun níba lan wadúgei eígin le lánina páscua?

¹⁸ Ába laríñagun joun.

—Jeíba ubúrugú, lúbiñe ítaga wügúri, ábame jaríñagun lun. “Ítara líña laríñagun Maésturu. Yaráfaali nórate, búbiñeba nefédujei páscua jáma náni disípulugu.”

¹⁹ Ába jadúgüni disípulugu quei laríñaguni Jesúsu joun, ába jaráanseruni eígin le lánina páscua.

²⁰ Dan le lagúñedunbei, ába lañúurun Jesúsu luágu dábula jáma láni dúusu disípulugu, ²¹ suntu añája lan eíga, ába laríñagun joun.

—Ninárün jáu luágu lalúgurubadina lan ában jídaangiñe.

²² Ábati jajírudagun, ába jagúmeserun álügüdei ában ában.

—Nabúreme, ¿nugúya funásan?

²³ Ába laríñagun joun.

—Le éderutu leígan fein núma lídan asíedu, ligiába alúgurana. ²⁴ Nídiña, áu le Wügúri Garaúwarügüti, luágu úma le uágubei taríñaga Lerérun Búngiu, áni ¿fugíabutia wügúri le alúgurutina! Buítimaati jamúga lun magúriajóugubei lan.

²⁵ Ábati ladímurejan Júdas, ába lálügüdajan.

—Maésturu, ¿nugúya funásan?

Ába laríñagun Jesúsu lun.

—Ánja, bugúya.

²⁶ Dan añája lan eíga, ába lanúgünun Jesúsu fein lújaburugu, ába leteíngiruni Búngiu tuágu, lásun lagúbachagunun, ába líchugunun joun láni disípulugu, aríñageina.

—Joujúma, núgubu le.

²⁷ Lárígiñe, ába lárügüdüin ában wéru buin táu diweín lújaburugu, ába leteíngiruni Búngiu tuágu, ába lásügüragüdüini joun, aríñageina.

—Gurájuma lídaangiñe le, sun jugúya. ²⁸ Níta le, le añúuragüdübalin iséri darádu, le giñe áwiyurubei joun sarágu güriña lun ferúdunawa lan jaffgoun. ²⁹ Naríñajare jun luágu mátundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Nóguchi Búngiu yágüta siélu.

Laríñaguni Jesúsu luágu leyéedaguba lan Pédro láu
(Mr 14.26-31; Lc 22.31-34; Jn 13.36-38)

³⁰ Lárígiñe jerémujani urému luágu Búngiu, ába joudin luágu wúbü Olívos. ³¹ Ába laríñagun Jesúsu joun láni disípulugu.

—Sun jugúya, jasándiraguba júngua láu magúraasuni nuágu áriebu le, ladúga laríñajare tídan Lerérun Búngiu. “Náfarubei jouniri mudún jilágubei, ábame jeréderun mudún chagágu.” ³² Lárígiñeme násaarun lídaangiñe ouweni lúnya nabágaridun, nádiba Galiléa jubáragiñe.

³³ Ába laríñagun Pédro lun.

—Gayáraati járügüdüin súnugubei magúraasuni buágu, nugúya no.

³⁴ Ábati laríñagun Jesúsu lun.

—Nínarün báu luágu áriebu méme lan le, lubáragiñe layúgurujan gáyu, beyéedaguba náu úrüwa weíyaasu.

³⁵ Ába laríñagun Pédro lun.

—Gayáraati nouñwen búma, meyéedagunbadina báu.

Ligía méme giñe jaríñaga sun disípulugu.

Layúmuragun Jesúsu lun Búngiu, Getsemaní
(Mr 14.32-42; Lc 22.39-46)

³⁶ Ábati lachúlürün Jesúsu jáu láni disípulugu lídoun ában fulásu gíriti Getsemaní, ába laríñagun joun.

—ñurújuma ya, neíbuga ayúmuragua lun Búngiu yára.

³⁷ Ába lanúgüini Pédro jáma bián lirájüñü Zebedéo lúmagua, ába jagúmeserun asándira íruni lúma tigári angi. ³⁸ Ábati laríñagun joun.

—Sandítina ában íruni le lánina ouweni tídan nuwáni. Reidei jumá ya, agágudúañu jugúyame núma.

³⁹ Ábati lídin Jesúsu lubáruaguoun mémeraü, ába lájuduragun láu ligíbu múarugun, ába layúmuragun lun Búngiu ítara.

—Nóguchi, ánjein gayára lubeí, adúgabá lun masúfurirun náani cátei le lúnbei nasúfuriruni, mámalá quei nabúseerun, queflá babúseerun.

⁴⁰ Ábati lagíribudun le ñjijn jabeí láni disípulugu, ába ladáriruniña arúmuga, ába laríñagun lun Pédro.

—¿Siñátísan buga jeréderun agágudúañu núma ni ában óra? ⁴¹ Agágudúañu jumá, ayúmuragua jugúyame, máburujan jumámuga lídoun íñchajóuni lun jeféridiruni jaffínen nuágu. Inárüni luágu ánja tan juwáni lun cátei le buídubei, ánjeinti júgubu, débiliti.

⁴² Ábaya lídin luágu libíaman weíyaasu, ába layúmuragun ítara.

—Nóguchi, ánjein siñá lubei masúfurirun náani le lúnbei nasúfuriruni, adúgüwalá bugúndan.

⁴³ Ábaya lagíribudun, ábaya ladáriruniña láni disípulugu arúmuga ladúga weírjiali lidábu jágu. ⁴⁴ Ába lígiruniña, ábaya lídin ayúmuragua luágu lúrüwan weíyaasu, aríñageina méme dimúrei ligía. ⁴⁵ Ábati lídin le ñjijn jabeí láni disípulugu, ába laríñagun joun.

—¿Jarúmuguña mémesan, eméraagua jugúya? Chülújali óra lun nedéregeruníwa, áu le Wügúri Garaúwarügüti, jájaburugun gafígountiña. ⁴⁶ Sarájuma, quefmoun lubároun le lúnbei lalúgurunina, níteeli.

Janúgüni Jesúsu adáüra

(Mr 14.43-50; Lc 22.47-53; Jn 18.2-11)

⁴⁷ Nígüli Jesúsu adímureja, ligía liábin Júdas, le ábanbei jádaangiñe dúusu disípulugu, jáu sarágu güriña táu efeín lúma wéwe. Jayábin lueígiñe jóubadina jábutigu fádirigu jáma wügúriña weírigutiña lídan jafíñen juríu. ⁴⁸ Aríñagaaliti buga Júdas joun.

—Le nachúurun, ligía, járügüdeime.

⁴⁹ Ábati layárafadun lun Jesúsu, ába laríñagun.

—¡Buítí güñoun, maésturu!

Ába lachúuruni. ⁵⁰ Ába laríñagun Jesúsu lun.

—Numáda, ¿ca bálugubei?

Ábati jayábin, ába járügüdüni Jesúsu, ába janúgüni adáüra.

⁵¹ Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñutimaabei. ⁵² Ába laríñagun Jesúsu lun.

—Areídabouñ befeínte, ladúga sun ja áfarajatiña táu efeín, táuba gíñe efeín jáfarúa.

⁵³ ¿Ibídiñeti bun luágu ánjana lan jamúga busén, gayára lan namúriajan úruwa-wein-dísi-mílu jádaangiñe láni Núguchi ánjeligu, áni louñajañanu lan jamúga? ⁵⁴ Lun jamúga nadúgüni ítara, ¿ída lubági lagúnfulirun le tídaanbei Lerérun Búngiu to aríñaguboun luágu lúnti lan lasúseredun le ítara?

⁵⁵ Ábati laríñagun Jesúsu joun mútu jagía.

—¿Jiábin táu efeín lúma wéwe lun járügüdüniña camá jamuga jíwerutina? Ságuñaja wéyu nañúurun témpulurugu jagánagua arúfudaja, madaú jumútina. ⁵⁶ Wel, lasúseredun-bei sun le lun lagúnfulirun le jaríñagubei profétagu tídan Lerérun Búngiu.

Ábati jígiruni sun disípulugu Jesúsu lábugua, ába janúrajan.

Jesúsu ligíbugiñe líñun-ágei lúruđu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ja adáürübalin Jesúsu, ába janúgüni ligíbugiñoun Gáifasi, fádiri le íñutimaabei, le níf lubei adámurigu jáma arúfudajatiña lilúrudun Moisés jáma wügúriña weírigutiña lídan jafíñen juríu. ⁵⁸ Ánjeinti Pédro, falá lumuti dísegiñe darí tübürrürürugun lúban fádiri le íñutimaabei le níjin lubei lebelúra, ába leréderun ñun jáma oúnigirutiña témpulu lun laríjin jalába lan lébeda cátei le.

⁵⁹ Jáluajati jábutigu fádirigu, jáma sun jíbiri líñun-ágei lúruđu lidúnrun Jesúsu láu iyéeni lun gayáraabei lan jasiádiruni lun louñwen, ⁶⁰ madáritiña, láu sun sarágu jáña lan güriña núdúntiña aríñaga iyéeni luágu. Agúmujoúni, ligía jayábin bíama yéetiña íchiga fe luágu, ⁶¹ ába jaríñagun.

—Aríñagati wügúri le luágu gayára lan lagúnrichagun láni Búngiu témpulu, ábaya lánme laráramagüdünnun lídan úruwa wéyu.

⁶² Ábati laráramun fádiri le íñutimaabei, ába laríñagun lun Jesúsu.

—¿Moúnabuntíbusan ni cáta? ¿Cáteigi le, le aríñawagúbei buágu?

⁶³ Reídeiti Jesúsu maníñu. Ábati laríñagun fádiri le íñutimaabei lun.

—Luágu líri Búngiu le wínwanbei báfiñura lun bariñaguni inárüni. Aríñagabef woun ánjein amúrü lubei Crístubei le Liraú Búngiu, le lanúadirubei Búngiu lun lasálbaruniña güriña ubouágu.

⁶⁴ Ába laríñagun Jesúsu lun.

—Ánja, áu, quei baríñaguni. Aríñagatina gíñe jun luágu jaríjbadina lan, áu le Wügúri Garaúwarügüti, ñun luegiñe loúnwenren Búngiu le Súnti Gabáfu, jaríjubei gíñe niábin lídan juánriñu siéluñe.

⁶⁵ Ábati lajeíridagunun fádiri le íñutimaabei lanáangun, le ligáñi, ába laríñagun.

—¡Anába láali wügúri le Búngiu láu lerérun! Mabúseerunjadiwa ámu lun líchugun fe luágu, agáamba jumáali anábuni le laríñagubei, ⁶⁶ ¿Ída líña jaríjin lun?

Ába jaríñagun.

—Gadúnrunti, lúnti loúnwen.

⁶⁷ Ábati jásuereguni ligíbu, buleisei jameí, jíbiri, ába jagáyuajuan ligíbuagun, ⁶⁸ ába jaríñagun lun.

—Quei amúrú lan Crístubei, jaríñaga beígia ca lan agáyuajabei buágu!

Jaríñagunbei lun ítara ladúga gürágu líña lan lágu.

Laríñagun Pédro luágu ibidiñe lan Jesúsu lun

(Mr 14.66-72; Lc 22.56-62; Jn 18.15-18, 25-27)

⁶⁹ Súnti lasúseredun sun cáte le, ñun líña Pédro boúgudi tubúrürurugu lúban fádiri le íñutimaabei, ába tiábin ában esériwijatu luágun, ába taríñagun lun.

—Bugúya, lúmañadibútia giñéñaja Jesúsu le Galiléana.

⁷⁰ Ába leyéedagun Pédro jagíbugiñe súngebei, ába laríñagun.

—Ibidiñeti nun ca lan uágu badímureja.

⁷¹ Leibuga yebe Pédro luágun béna, ligía taríjini ábanya, ába taríñagun joun ja ñíbaña.

—Eyéri le, lúmañajañein gíñe Jesúsu le Nazarétna.

⁷² Ábaya leyéedagun Pédro láu fiñún, ába laríñagun.

—Ibidiñeti wügúri ligía nun.

⁷³ Murúsun luegiñe, ába jayábin ja ñíbaña lúmoun Pédro, ába jaríñagun lun.

—Inárüni luágu ában lan jádaangiñe amúrú, arijúati luágu ligáburi badímurejan.

⁷⁴ Ába lagúmeserun íñaragua lúngua aríñaga láu fiñún.

—¡Ibidiñeti gürígia ligía nun!

Lídan méme óra ligía, ába layúgurujan ában gáyu. ⁷⁵ Ábati larítagun Pédro luágu le laríñagubei Jesúsu lun. “Beyéedaguba náu úrúwa weíyaasu lubáragiñe layúgurujan gáyu.” Ába láfuridun Pédro nígiñe, ába layájuajuan láu igárigu.

27

Ledéregerúniwa Jesúsu lun Piláto

(Mr 15.1; Lc 23.1-2; Jn 18.28-32)

¹ Dan larúgadunbei, ába jadámuridagun sun jábutigu fádorigu jáma wügúriña weírigutiña lídan jafínen juríu aríja cába lan jadúga lun lasíadirúniwa Jesúsu. ² Ába janúgüni gürágu, ába jedéregeruni lun Póncio Piláto le gumádimati.

Loúnwen Júdas

³ Dan le laríjinbei Júdas, le alúgurubalin Jesúsu, luágu siádi jamáali lan Jesúsu lun loúnwen, ába laságüríjan, ába lágyuyüdüni darándi murúsun pláta ligía joun jábutigu fádorigu lúma joun wügúriña weírigutiña, ⁴ ába laríñagun joun.

—Afígounjaadina láu nedéregerun ában wügúri madúnrunti lun loúnwen.

Ába jaríñagun lun.

—¿Cámeji le warúma? ¡Bugúya lun baríjini líra!

⁵ Ába lachágaruni Júdas seínsu ñi témpulurugu, ába lídin átigiragua lúngua.

⁶ Ába jabúduni jábutigu fádorigu seínsu ligía, ába jaríñagun.

—Siñáti wíchuguni seínsu le tídoun gáfu to lágei liseínsuna Búngiu ladúga lebégi óuweni.

⁷ Ába júaradun lun lagáñijóun lufúlasun ában wügúri le adáagubei barámbi láu seínsu ligía lun jábunajoún teréncha ñi. ⁸ Ligía Lufúlasun Jítaü lubei líribei fulásu ligía chüülü lúmoun dan le. ⁹ Ítara líña lagúnfulirun lé meja laríñagubei proféta Jeremías. “Barú jamuti darándi murúsun pláta ligía, ebégi le jíchugubei Israelítagu luágu wügúri ligía, ¹⁰ ába jagáñijani lufúlasun ában wügúri le adáagubei barámbi láu, quei laríñaguni Nabúreme nun.”

Jesúsu ligíbugiñe Piláto

(Mr 15.2-5; Lc 23.3-5; Jn 18.33-38)

¹¹ Barúwati Jesúsu ligíbugiñoun gumádimati, le gríbeibe Piláto, le álügüdúbalin.

—¿Amúrüsán Jarúeitebeibe Jurú?

Ába laríñagun Jesúsu lun.

—Ánja, áu quei baríñaguni.

¹² Dán buriti jíchugun jábutigu fádirigu jáma wügúriña weírigitíña lidúnrun, moúnabuntija Jesúsu ni cáta. ¹³ Ábati laríñagun Piláto lun.

—¿Magáambun bumútisan le jaríñagubeibe buágu?

¹⁴ Moúnabunti Jesúsu ni cáta, ábati laweíridun lanígi gumádimati.

Lasiádirún Jesúsu lun loúnwen

(Mr 15.6-20; Lc 23.13-25; Jn 18.38-19.16)

¹⁵ Gagáburí lumúti mejáti gumádimati lígiragüdún ában adaúrúti joun gürígia lídan fédu, furúmieguaáriügü adaúrúti le jamúriajan lúma. ¹⁶ Níñeinti ában adaúrúti, díseti lebaajan líri, gíríti Barabási, ¹⁷ dánti le adámuriñujaña lan sun gürígia, ába lálügüdúniña Piláto.

—¿Ca jabúseerubeibe nígiragüdún jun, Barabási, ódi Jesúsu le únbeibe laríñawagua Crístu?

¹⁸ Líridubalin gíñe Jesúsu ladúga subúdi láali lan luágu ladúga lan jagímugan lun jedéregerei.

¹⁹ Sun ñun lan Piláto luágu lála le lánina agúseruni, ába toúnajan lúmari aríñaga lun. “Madúgabá ni cáta láu gürígia úraguati le, ladúga gewéñeditina buga ában uwéñedi wuríbatibe áriebe buga ladúga gürígia le.”

²⁰ Ába jádaruni jábutigu fádirigu jáma wügúriña weírigitíña jádoun gürígia lun jamúriajan lun láfuridun Barabási, lun lafarún Jesúsu. ²¹ Ábaya ladímurejan gumádimati joun sun gürígia jagía, ába laríñagun joun.

—¿Ca jádaangiñe bíangubeibe jabúseerubeibe lun nígiragüdúni jun?

Ába jaríñagun.

—Barabási.

²² Ába laríñagun Piláto joun.

—¿Cábatibe nadúga láu Jesúsu le únbeibe laríñawagua Crístu?

Ába jóunabun súnubeibe.

—¡Dáguabeibe luágu gurúwa!

²³ Ába laríñagun Piláto joun.

—¿Cáti wuríbatibe ladúgubeibe?

Ábatima jagúaragun.

—¡Dáguabeibe luágu gurúwa!

²⁴ Dan le laríñabalin Piláto luágu siñá lan ladúgün ni cáta lueídügüya chagáguau, ába lamúriajan dúna, ába lachíbuni lújabu jagíbugiñe gürígia, aríñageina.

—Máma áu lúnbeibe naríñin láu loúnwen wügúri madúnrunte le, jugúya lun jaríjini ñi.

²⁵ Ába jaríñagun sun gürígia.

—¡Wagía jáma warájüñü, wanúgüba furúmieguaáriügü dúru wawóuguoun luágu loúnwen!

²⁶ Ábati lígiragüdúni Piláto Barabási, ába loúnajan abeícheibe Jesúsu, ába ledéregereuni lun ládarawagún luágu gurúwa.

²⁷ Lárigiñe, ába janúgüni lisúdaaranigu gumádimati Jesúsu tídoun lúban Piláto, ába joúndaraguagüdüniña sun súdeara geyégua láu. ²⁸ Ába jarágachunun lanáangun, ába jíchugun ában anáangun funátu luágu, ²⁹ ába jíchugun ában rídi láuti jíyu lábulugu, lúma ában mabúru lújaburugu le loúnwenren. Ábati jájuduragun ligíbugiñe, ába jéjerajan láu, ába jaríñagun lun.

—¡Gabágarilá Jarúeite Juríu!

³⁰ Ába gñe jásueregani, janúgeija mabúru ligía, jíchaaguei lábulugu. ³¹ Lárigiñe jéjerajan láu ítara, ába jagídarunun anáangun funátu lueí, ába jadáürünun lanáangun luágu. Ába janúgüni lun ládarawagún luágu gurúwa.

Ládarawagún Jesúsu luágu gurúwa

(Mr 15.21-32; Lc 23.26-43; Jn 19.17-27)

³² Dan le áfurideina jáña lan, ába jadúnragun lúma ában wügúri Ciréneña, gíríti Simón, ába jafósuruní lun lanúgüni lugúruwan Jesúsu.

³³ Ítara líña jachúlürün lídoun ában fulásu gíríti Gólgota, líla líra, Lufúlasun Lábu Ichúgü.

³⁴ Ñi jíchiga diweín láu árani tídan lun Jesúsu lun látunun, jóucharügü lumútu, mátun lumútu.

³⁵ Dan le dágua jamáali luágu gurúwa, ába jájurerun súdeara ubúnuruni lun jafánreinanun lanáangun Jesúsu jádaangua. Ítara líña lagúnfulirun lé meja labúrújabei proféta. “Ájureratiña ubúnuruni lun jarjín cába lan jádaangiñe erédera táu nanáangun.” ³⁶ Ába jañúurun ñi lun joúnigiruni. ³⁷ Ába jíchugun ában abúrújoúni loúgiñe lichúgü le ñí lubei larinaga ca lan lidúnrunbei. Abúrújoúni ligía ítara líña. “Jesúsu le, le jarúeitebei juríu.”

³⁸ Dáwaguatiña gñe bián jíwerutiña luágu gurúwa lúma, ában lueígiñe loúnwenren, ában lueígiñe lubaúña. ³⁹ Já buriti ásügürübaña ñígiñe, ába janábuni, ába jánjingichuni jachúgü, ⁴⁰ aríñageina.

—Bugúya le gayáraabei bágurunun témpulu ábaya baráramagüdünun lídan úruwa wéyu, sálbaguabá búngua. Ánjein Liraú bubei Búngiu, raríba lueígiñe gurúwa.

⁴¹ Ítara líña gñe jéjerajan jábutigu fádirigu jáma arúfudajatiña lilúrudun Moisés, fariséogu, jáma wügúriña weírigutiña, láu, ábaja jaríñagun jámagua.

—Sálbati ámu, ánjein lúngua, siñáti lasálbaragun. Ánjein ligía lubei Jarúeitebei Israéltagu, raríla lueígiñe gurúwa, afíñe wamámuga luágu. ⁴² Rúlaali laffíne luágu Búngiu, sálbaleíti Búngiu guetó ánjein inárüni lubei luágu jínsiñe lan lun, quei aríñagaali lan woun luágu Liraú lan Búngiu.

⁴⁴ Anába jamúti gñe jíwerutiña ja dáwaguñubaña luágu jagúruwan úara lúma.

Louñwen Jesúsu

(Mr 15.33-41; Lc 23.44-49; Jn 19.28-30)

⁴⁵ Ábati labúrigadun sun fulásu lúmagiñe amídirugu dari ladaúnrun úruwa rábounwéyu.

⁴⁶ Queí buri óra méme ligía, ába lagúaragun Jesúsu jére.

—Elí, Elí, ¿láma sabáctani? —líla líra. Nubúngiute, Nubúngiute, ¿cásan uágu bígirana?

⁴⁷ Níñanu agáambuti jádaangiñe ja ñíbaña, ába jaríñagun.

—Lagúajaña wügúri le lun proféta Elías.

⁴⁸ Ába lídin ában jádaangiñe eíbaagueina anúga ában mudúsi, lárigiñe ladúdüragüdüni táu diweín garújútu ába líchuguni luágu ában wéwe, ába línchunun lun lun lachúrunun. Ába lachúrunun. ⁴⁹ Ába jaríñagun ja jíbiri.

—Ígirabei, waríja ánjein ñúbin Elías asálbarei.

⁵⁰ Ábaya ladúgün Jesúsu ában agúaraguni jéreti, ábati loúnwen. ⁵¹ Lídan óra ligía, ába tajeíridagun tubélun témpulu lídan bián murúsun, íñugiñe lun únabun. Ába ladágarun ában jarabaganáli, ába láwarajan dúbü. ⁵² Ába lánjunrenchúnga umúajaü, águyuguatiña sarágu jádaangiñe afíñetiña luágu Búngiu já meja jílaguaañabaña. ⁵³ Ába jáfuridunga

lídaangiñe jamúaja lárigiñe lásaarun Jesúsu lídaangiñe ouweni. Ába jebélurun lídoun ubúruyu Jerusalén le biníwabei, le ñí lubei jaríjaña sarágu gürígia.

⁵⁴Léti jábuti súdeara jáma súdeara ja ouñigirubalin Jesúsu, dan jasándirunbalin jarabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárüni, Liraú Búngiu wügüri le.

⁵⁵Ñíñanu sarágu würíña aríagua dísegiñe, ja afálarubalin Jesúsu lúmagiñe Galiléagiñe íderagua jameí. ⁵⁶Ñíñoun María Magdaléna jádan, María to lúguchu Jacóbo lúma José, túma jáguchu lirájüñü Zebedéo.

Labunúniwa Jesúsu

(Mr 15.42-47; Lc 23.50-56; Jn 19.38-42)

⁵⁷Dan le agüñedeina líña lubeí, ába liábin ában wügüri rísiti gíríti José, lídaangiñeti fulásu le gíríbei Arimatéa, jádaangiñeti giñe ja afálarubalin Jesúsu. ⁵⁸Ábati lídin aríjei Piláto, ába lamúriajani lúgubu Jesúsu lúma. Ábati laríñagun Piláto lun líchugúniwa lun, ⁵⁹ába lanúgüni José, ába loúburaguni tídan ában gamísa jarúmatu. ⁶⁰Ába líchuguni lídoun lumúaja iséri lé yebe lachígagüdübei lubárua luágu dübü. Lárigiñe ladáuruni umúajaü láu ában dübü weíríti luágu lubéneri, ába lídin. ⁶¹Ñíñounti María Magdaléna túma to ában María ñun ligíbugiñe umúajaü.

Oúñigirutiña ligíbugiñe lumúaja Jesúsu

⁶²Larúgan, lárigiñe aráansejani lubá luwéyuri eméeraaguni, ába jóúdin jábutigu fádirigu jáma fariséogu aríjei Piláto, ⁶³ába jaríñagun lun.

—Wábuti, jarítagua wamúti luágu aríñaga lán meja yeéti ligíra dán meja mouñwengili luágu lásaaruba lan luágu lúruwan wéyu lárigiñe louñwen. ⁶⁴Oúnajagubeibá achoúrurei umúajaü daríme lúruwan wéyu, mayábin jamámuga láni dispulugu áriebu íwerujei lúgubu, ábame jaríñagun joun gürígia luágu saráli lan. Weírítimaajalímeti lagümüjóun iyéeni le sügú láu le furúmiñeti.

⁶⁵Ába laríñagun Piláto joun.

—Barújuma fiú súdeara, jeíba choúru jumeí umúajaü le lubúfdun-ágei juáraati.

⁶⁶Ábati jóúdin, ába jachóururuni dübü le luágubei umúajaü, ába jígiruniña súdeara lun jóúñigiruni.

28

Lásaarun Jesúsu lídaangiñe ouweni

(Mr 16.1-8; Lc 24.1-12; Jn 20.1-10)

¹Dan le lásügürünbei luwéyuri eméeraaguni áni arúgadeina líña dimáasu, ába jóúdin María Magdaléna túma to ában María aríjei umúajaü. ²Sódini, ába ladágarun ában jarabaganáli jéreti óra ligía láu larárirun ában láni Wabúreme ánjeli siéluigiñe, ába liábin luágun umúajaü, ába lagídaruni dübü le áubei ladaurúa, ába lañúurun luágu. ³Miríti ánjeli ligía quei ában labíríjanouga, tiábin lanáangun, jarú jarú. ⁴Dan le jaríjinbalin súdeara, ába jadádagarun láu anúfudei, ába jeréderun camá jiláguaaña. ⁵Ábati laríñagun ánjeli ligía joun würíña jagía.

—Manúfude jumá. Subúsiti nun luágu jáluajañein lan Jesúsu le ádarawagúbei luágu gurúwa. ⁶Úati ya, saráli quei laríñaguni. Jigóugu jaríjei fulásu le ñíjin lubei líchugúa, ⁷ábame jídin furése, ábame jaríñagun joun láni dispulugu luágu saráli lan, luágu nñingiran lan jubá jubá Galiléoun, ñíba jaríjei. Niján ugánu lé buga lúnbei naríñaguni jun.

⁸Ába jóúdin würíña jagía oufudagueina, láu anúfudei lúma sarágu ugúndani, ába jóúdin eíbaagueina aríñagei joun dispulugu. ⁹Súnti añája lan luágu úma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába jóúburuni lugúdi. ¹⁰Ába laríñagun joun.

—Manúfude jumá. Jeíba awísaraña nánigu lun jóúdin Galiléoun, luágu ñíba lan jaríjana.

Cátei le jabájüdagubei súaara

¹¹ Dan le jóúdiña lubeí würiña, ligía jóúdin jádaangiñe súaara ja óunigirubaña, ába jóúdin ubúrugú, ába jabájüdaguni le asúseredubei joun jábutigu fádirigu. ¹² Ába jóúdin ábutigu ja adímureja jáma wügúriña wefrigutiña lídan jaffñen juríu lun jebélurun jáma lídoun ában úarani, ába jíchugun sarágu seínsu joun súaara, ¹³ ába jaríñagun joun.

—Jaríñagame luágu dan lan le anjúnja lan arúmuga áriebe, ába lan jayábin láni Jesúsu disípulugu, ába jíwerujani lúgubu. ¹⁴ Anjein lasúbudira gumádimati cátei le, wadímurejaba luágu jáni fuleisei lúma lun madügún lan ni cáta jáu.

¹⁵ Ábati jerésibiruni súaara jagía seínsu, ába jóúdin adúgei le uágubei laríñawagúa joun. Ítara liñáti jaríñaguni juríu chülú lúmoun dan le.

Líchugun Jesúsu jadásin disípulugu

(Mr 16.14-18; Lc 24.36-49; Jn 20.19-23)

¹⁶ Ába lubeíti jóúdin únsu disípulugu Galiléoun luágu wúbü lé meja uágubei laríñaga Jesúsu joun lun jóúdin. ¹⁷ Dánti le jaríjinbalin Jesúsu, ába jájuduragun lun, láu sun añájein lan jádaangiñe, loúguati jaffñen luágu ligía lan. ¹⁸ Ába liábin Jesúsu jawágun, ába laríñagun joun.

—Rúaali sun ubáfu nun siélu lúma ubouágu. ¹⁹ Jeíbati jabúgürü gürgía ja lílana sun fulásu, adúga jumáña nánime disípulugu, badíseigüda jumáña lídan líri Búngiu Úguchili, Búngiu Irájü, lúma líri Sffiri Sándu. ²⁰ Arúfudaja jugúyame joun lun gagáambadi jamá lun sun le uágubei naríñaga jun. Subúdi jumeí luágu anájein lan júma ságü wéyu daríme lagúmuchun ubou. Ítaralá.

UGÁNU BUÍTI LE LABÚRÜJABEI MÁRCOS LUÁGU JESÚSU

Lapúrichijan Juan

(Mt 3.1-12; Lc 3.1-9, 15-17; Jn 1.19-28)

¹ Niján ugánu buíti luágu Jesucrístu, le Liraú Búngiu, ² latátira láu lagúnfulirúniwa dimúrei lé meja labúrjabei proféta Isaías, larínaga.

Niján noúnagüle, líña Búngiu, noúnajañein bubáragiñe, amúru le Niraú, lun laráansejanun janígi gúrígia lubá biábin.

³ Lagúarajaba lídan fulásu mageírawati.

“Aráanse jumoún janígi lubá liábin Wabúreme, queísi ladárarúniwa úma surúti.”

⁴ Lun lagúnfulirúniwa dimúrei ligía liábinbei Juan lídoun fulásu mageírawati, ábaja larínagun joun gúrígia ja ñúbinbaña lun luágu lúnti lan jásáansiruni ligáburi jóuserun lun ferúdunawa lan jafígoun, badísei jagíame. ⁵ Ábatija jayábin lídaangiñe sun Judéa lúma sun Jerusalén agáambe lapúrichijan. Dántija le jagúfesteruni jafígoun, ábajei labásteragüdüniña Juan lídan dúna le gíríbei Jordán.

⁶ Mebégitu lanáangun Juan, láutu lúra caméyu, lagúruga lamídan, guéru, chigángaru leígibaña lúma síruudu le áraabuna. ⁷ Larínagaja joun gúrígia lídan lapúrichijan.

—Liábinba ában le gabáfutimaati nárigiñe, weíriti lubáfu nueí darí lun madúna nan ni lun nélemuchun afáragadei tagúruga ligeídin. ⁸ Áu, láu dúna nabásteragüdaün, ánjein ligía, labuínchagüdübadün láu lubáfu Sífiri Sándu.

Labásterun Jesúsu

(Mt 3.13-17; Lc 3.21-22)

⁹ Lídoun buga dan ligía, ába lídin Jesúsu Nazarétgiñe, fulásu le lídaanbei lumúan Galiléa, ába labásteragüdüni Juan lídan dúna le Jordán. ¹⁰ Dan le láfuridunbei dúnarugugiñe, ába lánjunrenchagun siélu lun, ába laríjini Juan larárirun Sífiri Sándu luágu Jesúsu quei jamúga ában únjun. ¹¹ Ában lagaambúniwa ában umálali siéluigiñe arínaguti.

—Amúru niraú le jínsiñebei nun, gúndaatina báu.

Loucháguni Máfia Jesúsu

(Mt 4.1-11; Lc 4.1-13)

¹² Lárigiñe, ába lanúgüni Sífiri Sándu Jesúsu lídoun fulásu mageírawati, ¹³ ába leréderun Jesúsu bián-wein wéyu ñi jagánagua anímaalugu janárimetiña. Sun dan le láubei ñi, ába loucháguni Máfia, lárigiñe, ába jayábin ánjeligu lun jeténirun lun.

Lagúmeseruni Jesúsu luwádigimari lídan fulásu le gíríbei Galiléa

(Mt 4.12-17; Lc 4.14-15)

¹⁴ Lárigiñe ladaürúniwa Juan, ába lídin Jesúsu Galiléa apúrichijeí ugánu buíti lúmagiñeti Búngiu. ¹⁵ Ába larínagun.

—Chülújali dan lun lagúmeserun larúeijan Búngiu, sáansi jumeí ligáburi jóuserun, afíñe jumá luágu ugánu le lánina asálbaruni lídaangiñe figoú.

Lagúarun Jesúsu joun gádürü esénijatiña lun jafálaruni

(Mt 4.18-22; Lc 5.1-11)

¹⁶ Luágu ában wéyu, eibugeina líña Jesúsu láru láru dúna le gíríbei Galiléa, ába laríjini Simón lúma Andrés le lamúlen. Esénijani lubeígia jawádigimaríbei, jáguruñati óra ligía.

¹⁷ Ába larínagun joun.

—Jigoúgu nárigi, falá jumana, madíajanjadünme úduraü, gúrígiajañame jadíaja nun.

¹⁸ Ába jígirunun jasénin furése furése, ába jóúdin lúma.

¹⁹ Ábati leíbugun Jesúsu murúsunraüya, ába laríjini Jacóbo le liraú Zebedéo, láu sun Juan le lamúlen, tídaañanu ában ugúnein arámadañoun jasénin. ²⁰ Ába lagúarun joun, ába jígiruni jáguchi tídan ugúnein jáma ja íderagubaliña, ába jóúdin lúma Jesúsu.

Ában gürígia gawáguti ában espíritu wuríbati
(Lc 4.31-37)

²¹ Ába jachúllürün lídoun fulásu le gíribei Capernaúm lídan wéyu le eméraaguagülei, ába lebélorun Jesúsu tídoun jalígílisin jurú, ába lagúmeserun arúfudaja joun. ²² Weírítí janígi gürígia láu sun le laríñagubei Jesúsu joun ladúga larúfudajan joun láu ubáfu, máma quei arúfudajatiña lilúrudun Moisés. ²³ Níñein ában wügúri tídan liglísi tugúya láu ában espíritu wuríbati, ába lagúaragun.

²⁴ —¿Cámesan bemétera wámoun, Jesúsu Nazarétna? ¿Biábiñasan lun bagúnricha-guniwa? Subúdi numúti cátabu lan, láu amúrú lan Búngiu Irájú le sándubei.

²⁵ Ába ladeñjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

²⁶ Ába louwejagüdüni espíritu wuríbati gürígia ligía, ába láfuridun lídaangiñe, wágueina.

²⁷ Sun ja níbaña, ába laweírídun janígi, ába jalígüdagun jámagua.

—¿Cáteisan le? ¿Cáteisan iséri arúfudajani le? ¡Gürígia le, gabáfuti lun gíñe lagúmadiruniña espíritu wuríbatiña áni agáamba jamúti!

²⁸ Ába lagaambúniwa luágu Jesúsu lídan sun Galiléa furése.

Lareidaguagüdünnun Jesúsu límenidi Simón Pédro
(Mt 8.14-15; Lc 4.38-39)

²⁹ Dan le jáfuridunbei tídaangiñe liglísi tugúya, ába lídin Jesúsu lúma Jacóbo láu Juan jábiñe Simón lúma Andrés. ³⁰ Roun tíñáti límenidi Simón, tabíruajaña, ába jaríñagun lun Jesúsu luágu sándiñoun lan. ³¹ Ábati lídin tuágun, ába lárügüdüni tújabu, ába liñúragunun, lídan meme óra ligía ába tareídagun, ába tásaarun, ába teténirun joun.

Lareidaguagüdünnun Jesúsu sarágu sánditiña
(Mt 8.16-17; Lc 4.40-41)

³² Dan le lálüdünnun wéyu, gúñeeli, ába janügúniwa sun sánditiña jáma sun ja gawágubaña espíritugu wuríbatiña lun Jesúsu, ³³ ába jóúndaragun sun lílana fulásu lubádu béna.

³⁴ Areidaguagüdati Jesúsu sarágu sánditiña ja láutiña ámuñegueinarügü luwúyeri sándi, sagá ligía sarágu espíritugu wuríbatiña jaweí gürígia. Mígiruntijati lun jadímurejan espíritugu jagía, ladúga subúdi jamáni cáteñein lan.

Lapúrichijan Jesúsu Galiléa
(Lc 4.42-44)

³⁵ Lubá larúgan, dan le búrigagili, ába lásaarun Jesúsu, ába láfuridun bougudin luef ubúругu lídoun ában fulásu le mageírawati lun layúmragun lun Búngiu ní. ³⁶ Ába lídin Simón jáma líbirigu áluajei. ³⁷ Dan le jadáriruni, ába jaríñagun lun.

—Añájeintia sarágu gürígia áluajabu.

³⁸ Ába laríñagun joun.

—Queímoun lídoun buri líbiri fulásu le yaráfabei, apúrichija námuga gíñe ní, ladúga lun napúrichijan lídan sun fulásu niábin ubouágun.

³⁹ Ítara líña lubeíti eíbuga lumúti Jesúsu sun Galiléa apúrichijeina tídan buri jalígílisin jurú lídan sun fulásu, aságajeina ligía espíritugu wuríbatiña jaweí gürígia.

Lareidaguagüdünnun Jesúsu ában gawáguti gumeín luágu sun lúra
(Mt 8.1-4; Lc 5.12-16)

⁴⁰ Ába liábin ában gürígia sánditi láu gumeín luágu sun lúra, ába lájjuduragun ligíbugiñe Jesúsu, ába layúmragun lun, laríñaga.

—Gayáraati bareidaguagüdünnina ánjabu busúen.

⁴¹ Ába lagúmededagun lun Jesúsu, ába lagúuruni láu lújabu, ába laríñagun.

—Láu sun nugúndan, areídaguabá.

⁴² Quei laríñagun ítara, ába lareídagun sánditi ligía. ⁴³ Ábati loúnajani Jesúsu ñígiñe láu ában furése, aríñageina lun.

⁴⁴ —Mabájüdaguabeítia lun ni ában, ñúdünrügüóbá arúfudagua búngua lun jafádirin jurú, ábame bíchuguni badágaragüdüñ luágu barúmadun queísi laríñaguni lilúrudun Moisés. Ítara lúba jaríjini gürgía luágu areídaguaadibu lan.

⁴⁵ Ábarüga lídin, ába labájüdaguni sun le asúseredubei lun joun sun gürgía, ligía lébubei siñá lan leréderun Jesúsu furáangu lídan ni ában fulásu, ába leréderun le ñí lumuti úa jamá gürgía. Láu sun líra, ñúbin mémetiña lídaangiñe sun fulásu aríjei.

2

Lareídaguagüdüni Jesúsu ában wügüri le derégüdaali lúgubu

(Mt 9.1-8; Lc 5.17-26)

¹ Átiri wéyu lárigiñe, ába lagribudun Jesúsu Capernaúm, ába jagáambun gürgía luágu giribujali lan. ² Ába jóundaragun sarágu gürgía darí lun mabáaraña lan ni bénabu, ába lapúrichijani ugánu buíti lúmagiñeti Búngiu luágu jasálbarun joun. ³ Ñíñein apúrichija, ligía jayábin gádürü wügüriña barúña jagía ában wügüri le derégüdaali lúgubu. ⁴ Queísiti siñá lubei jachúlürün le ñí lubei Jesúsu ladúga jíbe gürgía, ába jagídarun murúsun lueígiñe tábulugu múna loúgiñe le ñí lubei Jesúsu, ába jarárigüdüni sánditi ñígiñe tídan lubárari. ⁵ Dan le laríjínbalin Jesúsu jafíñen, ába laríñagun lun le sándibeí.

—Niraú, ferúduñawaali bífigoun.

⁶ Ñíñanu jádaangiñe arúfudajatiña lilúrudun Moisés ja ñúnbaña ñi, ába jasáminarun. ⁷ “¿Cásan uágu ladímureja gürgía le ítara? Lanábaguñeiga le Búngiu, ladúga úati ni ában gayáraati ferúduna lan figou lueídügüya Búngiu.” ⁸ Subúdi lumúti Jesúsu le jasáminarubei, ába laríñagun joun.

—¿Cásan uágu jasáminara ítara? ⁹ ¿Cáteitimasan ménreengunbei laríñawagún lun sánditi le. “Ferúduñawaali bífigoun”, o laríñawagún lun. “Sarába, budáboun bubárari, beíba”? ¹⁰ Narúfudaaliti jun luágu gabáfu nan, áu le Wügüri Garaúwarügüti lun ferúduna nan figou.

Ába laríñagun lun sánditi.

¹¹ —Sarába, budáboun bubárari, beíba águyu.

¹² Ába lásaarun sánditi lídan óra ligía, ába labúduñun lubárari, ába láfuridun ñígiñe, aríagu sun ja ñíbaña lun. Weíriti janígi ja ñíbaña luágu cátei le, ába jíchugun uweíríguni lun Búngiu, aríñageina.

—¡Maríjínajágidiwa cátei ítara buriti!

Lagúarun Jesúsu lun Leví lun lánigume

(Mt 9.9-13; Lc 5.27-32)

¹³ Ñígiñe, ábaya lídin Jesúsu láru dúna, dan le jayárafadun sarágu gürgía lubáduñ, ába larúfudajan joun. ¹⁴ Lásun larúfudajan joun, ába lasígiruni leíbugun, ába laríjini Leví, le liraú Álfeo, ñun líña le ñí lubei lagúburajoua liseínsuna gumádi. Ába laríñagun lun.

—Falábana, queímoun núma queísi náni disípulu.

Ába lásaarun Leví, ába lafálaruni.

¹⁵ Murúsun óra lárigiñe, ñíñein Jesúsu eíga lúbiñe Leví, ñíñanu gíñeti sarágu agúburajatiña liseínsuna gumádi, jáma ámu gáfígountiña ñun luágu dábula úara lúma, jáma láni disípulugu, ladúga sarágu jána afálaruti. ¹⁶ Ja arúfudajatiña lilúrudun Moisés, jáma fariseógu, dan le jaríjínbalin eíga jáma sun wuríbatiña jagía (según jagía), ába jaríñagun joun láni disípulugu.

—¿Ída liñásan leíginbei jumáesturun áni gurá ligía jáma agúburajatiña liseínsuna gumádi lúma jáma ámu gáfígountiña?

¹⁷ Dan le lagáambunbalin Jesúsu cátei le, ába laríñagun.

—Ja magádiebaña mabúseerúntiña surúsia, ja sándibaña, jagía busénbaña surúsia. Máma lubefti niábiña áluaja güriña buftiña ligfbugiñe Búngiu, niábiña áluajaña ja gafígounbaña lun lasáansirún jouserun.

Jálügüdüni Jesúsu luágu ayúnaruni

(Mt 9.14-17; Lc 5.33-39)

¹⁸ Luágu ában wéyu, dan le jayúnarun lánigu Juan jáma jánigu fariséogu lun jagúnfulirun lúma Búngiu, ába jayábin fiú güriña álügüdei Jesúsu.

—¿Cásan uágu jayúnara lánigu Juan jáma jánigu fariséogu lun jagúnfulirun lúma Búngiu, ánjaña báni disípulugu mayúnaruntiña?

¹⁹ Ába louñabun Jesúsu láu jémpulu luágu iséri larúfudajan lúma binádu, laríñaga.

—¿Gayáraati funági jayúnarun amísurajóutiña lídan ában mariei dan le njein lan adári ñi jáma? Ánjein njein lubeí adári ñi, siñáti jayúnarun, lúnti jeígin. ²⁰ Lachúlürtüba dan lun lanügúniwa adári jámagiñe, ligíameti jadáani lun jayúnarun.

²¹ ‘Máfadajóuntu anáanguni binádujaru táu gamísa to macháwaragungiru, ladúga le méme tife gamísa to macháwaragungiru tajeíridaguboun to binádujaruboun dánme le tacháwaragun, laweíridatimaabati jeíriti. ²² Meserúnwati gíñe bínu le isérigili lídoun ában ágei guéru le binádujali ladúga labouchagubei bínu iséri guéru binádu dánme le liñúrún. Féridimeti bínu, féridi guéru. Bínu iséri lúnti leserúniwa lídoun guéru iséri.

Játüjan disípulugu türígu lídan wéyu le eméraaguagülei

(Mt 12.1-8; Lc 6.1-5)

²³ Ában wéyu le eméraaguagülei, efbugeina líña Jesúsu jáu láni disípulugu labádinagua bunáguai, ába játüjan láni disípulugu türígu dan le jásiügürún. ²⁴ Ába jaríñagun fariséogu lun Jesúsu.

—¡Aríjabá joun bánígu! ¿Cásan uágu jadúga wadágimanu le moún lumuti ladügúniwa lídan wéyu le eméraaguagülei?

²⁵ Ába laríñagun joun.

—¿Malíjangidün luágu le ladügübei Davíd luágu ában dan, dan le lálámachunbei, ligía jáu sun líbirigu? ²⁶ Ába lebélorun liglísirugun dan le Abiatár lan fádiri le íñutimaabei, ába leíginun fein to sagráuboun, to majouáboun jeíginun ámu güriña jaweídügüya fádirigu según lilúrúdu Moisés, áni ru ligía joun güriña ja lúmabaña. Mámami figóu le ladügübei Davíd ligfbugiñe Búngiu.

²⁷ Ába gíñe laríñagun Jesúsu joun.

—Lun wügúri ladügúwa wéyu le eméraaguagülei, máma wügúri adügúwabei lun wéyu ligía. ²⁸ Ligía gabáfutina gíñe, áu le Wügúri Garaúwarügüti, lun naríñagun cába lan gayára ladügúniwa lídan wéyu le eméraaguagülei.

3

Ában wügúri jiláali ában lújabu

(Mt 12.9-14; Lc 6.6-11)

¹ Ábaya lebélorun Jesúsu tídoun ában jalígílisin juríu, ñíñeinti ában wügúri jiláali ában lújabu. ² Jarjati ja ñíbaña ánjein lagáranijaba lubeí Jesúsu lun lídan wéyu le eméraaguagülei, lun jadárirun lidúnrun. ³ Ába laríñagun Jesúsu lun le jilálalíbei újabu.

—Sarába, ráramabá ya jagfbugiñe sùngubei.

⁴ Ába lálügüdüniña ja jíbiri.

—¿Cátei lúnbei ladügúniwa lídan wéyu le eméraaguagülei, lun jíderawagúniwa güriña ódi lun ladügúniwa wurfbati joun, lun leséfurúniwa jabágari ódi lun jígrúniwa lun jóunwen?

Sun jagía, ába jámanichun. ⁵ Ábati laríguniña Jesúsu láu igáni lúma fruni ladúga tidére janígi. Ába laríñagun lun wügúri ligía.

—Tulébei bújabu.

Ába látuleruni, ába lareídagun. ⁶ Ába jáfuridun fariséogu, ába jagúmeserun adímureja jámagua jáma giñe lánigu Heródes ída lúba lan jáfaruni Jesúsu jilágubei.

Sarágu gürígia lárú dúna

⁷ Ába lídin Jesúsu jáu láni disípulugu lárú dúna, ába jafálaruni sarágu gürígia Galiléana.

⁸ Dan le lagaambúnbei luágu oúnwenbun buri cátei le ladúgübei, ába jayábingua gürígia Judéagiñe, Jerusaléngiñe, Iduméagiñe, loubáfurugugiñe dúna le Jordán, Tírogiñe, lúma Sidóngiñe lun jaríjini. ⁹ Ligía laríñagunbei Jesúsu joun láni disípulugu lun aráanseñu jamá ában ugúnein lubá lueí jámuruduni sarágu gürígia jagía, ¹⁰ ladúga queí gíbeeña lan lareidaguagüdün, sun sánditiña, ába jáguragun jóingua luágun lúnriigü jagúuruni lun lareidaguagüdüniña. ¹¹ Dántija le jaríjini ja gawágubaña espíritugu wuribatiña, ábaja jájuduragun ligíbugiñe, ába jagúaragun espíritugu jádaangiñe.

—Liraú Búngiu amúru.

¹² Ába lewéridiruniña Jesúsu lun maríñagun jamá cáteiñein lan.

Lanúadiruniña Jesúsu dúusu apóstolugu

(Mt 10.1-4; Lc 6.12-16)

¹³ Lárigiñe, ába lamúdeirun Jesúsu luágun ában wúbü ní lubei lagúara joun ja labúseerubaña queisi loínagülegu, ába jayábin lun. ¹⁴ Ába lanúadirun dúusu jádaangiñe lun lúmabaña lan súnwandan lúma lun japúrichijani ugánu buiti lánina asálbaruni. ¹⁵ Ába líchugun ubáfu joun lun jareídaguagüdün sánditiña lúma lun jaságajan espíritugu wuribatiña. ¹⁶ Niján jíri dúusu wügúriña jagía. Simón, le únbei lagúaja Jesúsu Pedro, ¹⁷ Jacobo láu Juan le lamúlen, ja lirájüñü Zebedéo, ja únbaña lagúaja Jesúsu Boanérge — míni lan líra, Lirájüñü Wayújururu, ¹⁸ Andrés, Felipe, Bartolomé, Matéo, Tomás, Jacobo le liraú Álfeo, Tadéo, Simón—ában meja wügúri le áfaaguti lun jawáanserun juríu, ¹⁹ lúma Júdas Iscarióte le alúgurubalin Jesúsu.

Aríñagatiña luágu lubáfu lan Máfia lúmabei Jesúsu

(Mt 12.22-32; Lc 11.14-23, 12.10)

Lárigiñe, ába jagíríbudun jarígoún, ába jebélurun tídoun ában múna, ²⁰ ábaya jóundara-gun sarágu gürígia ní darí lun madáani jamá ni lun jeígin. ²¹ Dan le jasúbudirunbalin lidújeñu Jesúsu ca lan ásügürübei, ába jayábin lún yebe janúgüni, ladúga jaríñagun gürígia luágu wuríbaali lan lichúgü.

²² Níñanu arúfudajatiña lilúrudun Moisés ja achúlürübaña Jerusaléngiñe, ába jaríñagun.

—Wügúri le, níjein Beelzebú, le Máfia, le jábuti espíritugu wuribatiña, lúma, láu lubáfu Máfia laságaja espíritugu wuribatiña.

²³ Ábati lagúarun Jesúsu joun lun jayárafadun lubádu, ába líchugun ában jémpulu joun, ába laríñagun.

—¿Ída lúba gayára lan laságaruni Máfia Máfia guánariigü? ²⁴ Furúmieguarügi arúejiani le afánreinraguti lun jageíndagun jámagua, lagúnrinchaguba, ²⁵ áni ánjein fánreingujaña lubei idújeñu ladúga wuríbu jádaangua, siñábei jadúraran idújeñu jagía queí idújeñu. ²⁶ Ánjein lubei jamúgati afáreinragua Máfia, lageíndaguame lúmagua, siñábei ladúraran, lagúmuchagülerügiñe le.

²⁷ ‘Úati ni ában lun lebélorun lúbiñoun ában wügúri le jéreti lun lanúgüni lílagu ánjein magúrágun lan wügúri jéreti ligía furúmiñe. Ítara rügüñein gayára lan lanúgüni lílagu.

²⁸ ‘Láu sun ninárün naríñagun jun luágu gayára lan ferúduñawa lan sun figoú lúma sun wuríbani le laríñagubei gürígia, ²⁹ lueídügya lun jadímurejan wuríbati luágu Sífiri Sándu, siñábei ferúduñawa lan figoú líra, leréderuba lidúnrun lun sun dan.

³⁰ Laríñagunbalin Jesúsu líra, ladúga jaríñagun luágu lubáfu lan Máfia lubáfu Sífiri Sándu le luágubei.

Lúguchu Jesúsu jáma lamúlenu

(Mt 12.46-50; Lc 8.19-21)

³¹ Lárígiñe, ába tachúllürün lúguchu Jesúsu jáu lamúlenu tubádun múna to ní lubei Jesúsu, ába jeréderun bouógudi, ába jouúnagüdün luágu. ³² Játi núnbaña geyégu láu Jesúsu, ába jaríñagun lun.

—Nurántia búguchu jáu bamúlenu bouógudi, jáluajañádibu.

³³ Ába laríñagun joun.

—¿Cági nóguchuboun jáu namúlenu?

³⁴ Ába laríagun jawágun ja núnbaña geyégu láu, ába laríñagun.

³⁵ —Añája nóguchu jáu namúlenu, ladúga furúmieguaugü ja adúgüti lugúndan Búngiu, jagía namúlenubaña, nitunu, nóguchu.

4

Jémpulu luáguti ábunaguti

(Mt 13.1-9; Lc 8.4-8)

¹ Ábaya lagúmeserun Jesúsu arúfudaja láru dúna, ába jouúndaragun sarágu güirgía le ní lubei. Quei gibeyaaña lan güirgía ní, ába ládinun Jesúsu tídoun ában ugúnein to níboun dúnarugu. Ába lañúurun ní, ába jeréderun sun güirgía láru béya. ² Ábati larúfudajan sarágu cátei joun láu jémpulu, laríñaga joun.

³ —Agáamba jumána. Níñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láburiyan murúsun lídaangiñe luágun úma, ába jayábin dunúru, ába jeigini. ⁵ Líbiri, ába láburiyan labádinaguóun dúbü le ní lumuti úa lan sarágu múa, ába labouóchun furése ladúga majúllin lan múa. ⁶ Dan le lásüdüwéyu, ába lásaurün, queíti málagüle lan, ába louñwen. ⁷ Líbiri ílaü, ába láburiyan labádinaguóun jíyu, ába laweñnamudun jíyu úara lúma, ába lañáradaguagüdüni, magínduntiti nádü ligía. ⁸ Níjeinti lídaangiñe, áburujati lídoun múa buíti, ába labouóchun, ába laweñnamudun, jma lubuídun alúbajóuti lídaangiñe! Níjein lídaangiñe, íchuguti darándi águu luágu cáda ában águu, líbiri rúti úrúwa-wein, líbiri, san.

⁹ Ábati laríñagun joun.

—Ja garígeirugubaña lun jagáambun, agáamba jamá.

Le lébubei larúfudajan Jesúsu joun güirgía láu jémpulu

(Mt 13.10-17; Lc 8.9-10)

¹⁰ Lárígiñe, dan le leréderunbei Jesúsu lábugua, ába jayábin láni dúusu disípulugu jama jíbiri lánigu, ába jálügüdüni ca lan lílabei jémpulu le. ¹¹ Ába laríñagun joun.

—Jugúya, subúdigüda láali Búngiu cátei arámudaguati le lánina larúeijan jun, ánjaña ja mebésenbaña láu lerérun, láu jémpulu laríñawagúa cátei luáguti larúeijan joun, ¹² lun dánme lan jaríjin, ibídiñe lámuga joun ca lan laníchigubei cátei le jaríjubei, dánme jagáambun, úa lámuga gunfaráanda jamá, lun lásíñerun jagíribudun lun Búngiu lun ferúdnawa lan jafígoun.

Lafúnraanguagüdüni Jesúsu jémpulu luáguti ábunaguti

(Mt 13.18-23; Lc 8.11-15)

¹³ Ába laríñagun joun.

—¿Útisan gunfaráanda jumáni le? ¿Ída lubági gunfaráanda jumáni líbiri jémpulu?

¹⁴ Le ábunagubalin líla nádü, ítara líña quei le apúrichijabalin Lerérun Búngiu. ¹⁵ Añájein güirgía, ítara jáña quei úma le uágunbei láburiya lídaangiñe líla nádü, ába jagáambuni Lerérun Búngiu, lárígiñe jagáambuni, ába líábin Máfia, ába lagídaruni dímuerei le abunúbei tídan janígi. ¹⁶ Jíbiri güirgía, ítara jáña quei dúbü le abádinaguóunbei láburiya lídaangiñe líla nádü, ába jagáambuni Lerérun Búngiu, ába jerésibiruni láu ugúndani. ¹⁷ Quei márügüdüni lubei Lerérun Búngiu tídan janígi buídu, madúrati jádan, dánti le laríjiniwa jábun, o jeíbaajóuniwa lan luegiñe Lerérun Búngiu, magúraasuntíña. ¹⁸ Jayábin jíbiri,

ítara jáña quei jýyu le abádinaguounbei láburuja lídaangiñe líla nádü, ába jagáambuni Lerérun Búngiu, ¹⁹ weíritimaati jafúudun luágu cátei le lánina ibágari le, ába leyéeduniña irisini. Sun le, ába láfaruni Lerérun Búngiu tídaangiñe janígi, mígiruntiti lun lalúbajoun jádan güirgía jagía. ²⁰ Añájein gíñe güirgía, ítara jáña quei múa buíti le ídounbei láburuja lídaangiñe líla nádü, ába jagáambuni Lerérun Búngiu, ába jerésibiruni, alúbajouáti cátei buíti jádaangiñe. Buíti jagáburi quei líla nádü le íchugubei darándi águu luágu ában, o úrtiwa-wein, o san.

Jémpulu luáguti lámpu
(Lc 8.16-18)

²¹ Ába laríñagun joun.

—¿Béwati funági ában lámpu lun líchugúniwa tábugiñe ában gáfu o tábugiñe lan gabána? ¡Uá! Luágu dábula líchugúa lun larúgoungadágüdün múnada. ²² Úati lubefiti ni cáta le arámudaguati lun mafúnraangudúnbei lan, úa ligía ni cáta le ibídiñewati lun masúbudirúnwabei lan. ²³ Agáamba jumána, jugúya le garígeirugubei lun jagáambun.

²⁴ Aríñagati gíñe joun.

—Toúnigi jumátia lun jagúnfulirun lúma inárüni le jagáambunbei. Láuba jagúnfuliruni, gunfaráandatima jumáni le naríñagubei jun. ²⁵ Ítara líña, güirgía le aténirubei buídu lun nerérun, gunfaráandatima lumúti, ánjeinti le meténibei lun, labúlieidubei sun le agáamba láalibe.

Jémpulu luáguti nádü le aweíridubei

²⁶ Aríñagati gíñe Jesúsú.

—Ítara líña larúeijan Búngiu quei le asúseredubei lun ában wügúri le ábunubei líla nádü lábugiñe múa, ²⁷ áriebu buri lúma wéyuagu lídan le larúmugun ábunaguti ligía, sará ligía quei léchun, chülü dan ába labouchun nádü, ába laweíridun, ibídiñeti lun ábunaguti ída líña lan lasúseredun. ²⁸ Múa guánarügü aráandarati, furúmiñe ába láfuridun ídibu, ñígiñe ába legélewejan, ñígiñe ába labuínchun ílewei láu ílaü. ²⁹ Dánti le funáli líla nádü, ába látijóuniwa ladúga chülújali lan dan lun lalúbajoun.

Jémpulu luáguti tíla mostása

(Mt 13.31-32; Lc 13.18-19)

³⁰ Aríñagati gíñe Jesúsú.

—¿Cásan lenégebei larúeijan Búngiu, o ca jamúga jémpulu gayáraabei wíchuguni lúmoun? ³¹ Ítara líña quei ában tíla mostása le abunúti lábugiñe múa. Tíla mostása, ligía ában lídaangiñe ílaü le ñúraütimaabei ubouágu, ³² dan le labunún, ába laweíridun, ligía weíritimaabei tídaangiñe sun nádü, weínamuti lílímun darí lun gayára lan jeméraagun dunúru lábugiñe lamúnounga le líchugubei.

Layúsuruni Jesúsú jémpulu

(Mt 13.34-35)

³³ Ítara líñájei larúfudajan Jesúsú luágu larúeijan Búngiu joun láu sarágu jémpulu líbe le darí le ñí lumuti gayára lan gunfaráanda jamá. ³⁴ Marúfudajaanti ni cáta joun luágu lareíjagan Búngiu mayúsurunga jémpulu. Ába lafúnraanguagüdüni sun jémpulu joun láni disípulugun dan le jagíarügü lan lúma.

Lagálumaruni Jesúsú garábali lúma lugúdi barána

(Mt 8.23-27; Lc 8.22-25)

³⁵ Wéyu méme ligía, dan le lagúñedunbei, ába laríñagun Jesúsú joun láni disípulugu.

—Queímoun loubáfurugun dúna.

³⁶ Ábati jígiruniña bürúbünü güirgía jagía, ába janúgüni Jesúsú tídan ugúnein to gádaanbaliña. Níñoun buri gíñe ámu ugúnein úara jáma. ³⁷ Ába láfuragun ában garábali jéreti, ába lebelujan lugúdi barána tídoun ugúnein darí lún yebe tabuínchun láu dúna.

³⁸Larúmuguñati Jesúsu tiyúna ugúnein baláñu tuágu ában ichúgübarari. Ába jagágudajani, ába jaríñagun lun.

—¡Maésturu! ¿Mebéreseguntibusan láu wadíbiragua lan?

³⁹Ába lásaarun Jesúsu, ába ladeínjan lun garábali, ába laríñagun lun barána.

—¡Maníba! ¡Derégüdagubá!

Ába lagálumadun garábali, ába darángila lan sun cátei. ⁴⁰Ábati laríñagun joun láni dispulugu.

—¿Cásan uágu luweírínbei janúfude? ¿Cásan uágu mafiñen jubei?

⁴¹Ába jeréderun láu luweírín janígi, ába jálügüdagun jámagua.

—¿Cátei funásan le, garábali lúma barána núdúntiña láu le lubeíbei?

5

Ában wügüri Gadárana le gawágubei máfianu

(Mt 8.28-34; Lc 8.26-39)

¹Ába jachúlürün loubáfurugun dúna lídoun fulásu le gíríbei Gadára. ²Lárigiñerügü láfuridun Jesúsu tídaangiñe ugúnein, ába liábin ában gürígia lídaangiñe ában umúajaü achigíti luágu dúbü luágun, wügüri ligía gawáguti ában espírítu wuríbati. ³Lídan jabára jiláaña lagánoua áni úati ni ában gayáraati lagúraguni, ni láu güriñgüri. ⁴Güráguañája jamáali láu güriñgüri luágu lugúdi lúma luágu lújabu, súnwandan látumuraguni, úati ni ában gayáraati lámuruduni. ⁵Súnwandanja leíbugun áriebu wéyuagu agúarajeina luágu buri wúbü lúma buri lídan jabára jiláaña íbiagua lúngua láu dúbü. ⁶Dan le laríñbalin gürígia ligía Jesúsu dísegiñein, ába leíbaagun lubároun, ába lájuduragun ligíbugiñe, ⁷ába lagúragun lun.

—¿Cásan uágu bemétera númoun, Jesúsu Liraú Búngiu le Íñutimaabei? Ayú-muraguatina bun luágu líri Búngiu lun masúfuriragüdüün bánina.

⁸Laríñagunbei ítara ladúga guméseeli lan Jesúsu aríñaga lun.

—¡Espírítu wuríbati, ígirabei gürígia le!

⁹Ába lálügüdüni Jesúsu.

—¿Ca bíri?

Ába loúnabun.

—Lejión níña ladúga gíbetiwa.

¹⁰Ába jayúmuragun espírítugu jagía lun Jesúsu lun moúnajan lániña bougudin luef fulásu ligía. ¹¹Queíti níñanu lan sarágu búiruju eíga ñi luágu wúbü, ¹²ába jayúmuragun espírítugu wuríbatiña jagía lun.

—Oúnaja báwa jádoun búiruju jára, rúba úma woun lun webélurun jádoun.

¹³Ábati líchugun Jesúsu úma joun, ába jáfuridun luef gürígia ligía, ába jebélurun jádoun búiruju. Níñanu jawára bián-mílu búiruju. Ába jáguragun búiruju jagía jóungua lueígiñe ában gudúungu, ába jáburujan baránajoun, ába jañáradagun.

¹⁴Ábati janúfudedagun ja oúnigirubaliña búiruju jagía, ába jeíbaagun abájüdaguei le asúseredubei ubúru luágu áraabu. Ába jayábingua gürígia aríjei ca lan asúseredubei.

¹⁵Dan le jachúlürünbei le ní lubei Jesúsu, ába jaríjini gürígia lé meja gawágubei espírítugu wuríbatiña ñun líña, táuñein gíñe lanáangun, areídaguaali, ába janúfudedagun. ¹⁶Játi aríjubalin, ába jabájüdaguni le asúseredubei lun gürígia lé buga gawágubei espírítugu wuríbatiña lúma jawáguti búiruju, joun. ¹⁷Ábati jayúmuragun lun Jesúsu lun láfuridun lídaangiñe jageíra.

¹⁸Dan le ládinun Jesúsu tídoun ugúnein, ába layúmuragun wügüri lé buga gawágubei espírítugu wuríbatiña lun lun lídin lúma, ¹⁹májati Jesúsu, aríñagarügüti lun.

—Beíba júbiñoun jámoun bidújeñu, ábame babájüdaguni sun le ladúgübei Babúreme Búngiu báu, ída líña lan bagúdemedun lun.

²⁰ Ába lídin, ába lagúmeserun abájüdaguei sun le ladúgübei Jesúsu láu lídan sun fulásu Decápolis, ába laweíridun janígi súnqubei.

*Liraú Jáiro, túma wúri to agúurubarun lanáangun Jesúsu
(Mt 9.18-26; Lc 8.40-56)*

²¹ Dan le lagíribudunbei Jesúsu tídan ugúnein loubáfurugun dúna, ába jayábingua búrúbünu gürígia le ñjín lubei, ába leréderun ñi láru dúna. ²² Ábati liábin ában jádaangiñe tábuti jalígílisin juríu, gírítí Jáiro. Dan le laríjinbalin wügúri le Jesúsu, ába lájuduragun lubádu lugúdi, ²³ ába layúmuragun lun ítara.

—Nújein niraú touwe, queímoun bíchigei bújabu tuágu, areídagua támuga, mouñwen támuga.

²⁴ Ába lídin Jesúsu lúma, sarágu jáña gürígia afálarutiña, ába buriti jámurudaguni Jesúsu.

²⁵ Jádaanti sarágu gürígia ja, ñíñoun ában wúri sánditu, dúusu irúmu táu láu lésejan jítaü tídaangiñe. ²⁶ Súfuríjaru sarágu jámagiñe surúsiagu áni gásta táali sun le túmati, mareídaguntu, gáwoun gueínarügü. ²⁷ Ligía tagáambun ladímurejóun luágu Jesúsu, ába tiábin lanáangiñe jádan sarágu gürígia, ába tagúurunun lanáangun, ²⁸ ladúga tariñagun túnguarügü. “Láurügüme nagúurunun lanáangun nareídaguba.” ²⁹ Lídan óra ligía, ába leréderun lésejan jítaü tueí, ába tasándiragun túngua luágu areídaguuaru lan. ³⁰ Ábati lasándiruni Jesúsu luágu areídaguagüdaali lan gürígia láu lubáfu, ába lagáragun jawágun gürígia ja lanáangiñébaña, ába lálügüdajan.

—¿Ca agúurubei tuágu nanáangun?

³¹ Ába jariñagun láni disípulugu lun.

—Aríagu biñátia lun jíbe gürígia ya luágu murúgu jáña lan, ¿álügüdajágidibu ca lan agúurubei buágu?

³² Ába laríajaan Jesúsu áluaja ca lan agúurubei luágu. ³³ Ába tiábin wúri tugúya adádagareina láu anúfudei, subúdiñuteí le asúseredubei tun, ába tájuduragun ligíbugiñe, ába tariñaguni sun inárúni lun. ³⁴ Ába laríñagun Jesúsu tun.

—Niraú, areídaguadibu ladúga bafíñen. Beíba láu darángiláü, areídaguañu lídaangiñe bisándi.

³⁵ Nígili Jesúsu adímureja, ligía jayábin lúbiñegiñe wügúri lé buga ñúdünbei ougei luágu tisándi liraú, ába jariñagun lun túguchi irájü tugúya.

—Jilátia biraú, ¿ca uágu bebéreseja lun maésturu guetó?

³⁶ Agáamba lumúti Jesúsu le jariñagubei, ába laríñagun lun wügúri ligía.

—Manúfudedabá, afíñerügübá.

³⁷ Májatiti jóudin ámu lúma lueídügüya Pédro, Jacóbo lúma Juan le lamúlen Jacóbo. ³⁸ Dan le lachúlürünbei lúbiñoun wügúri ligía, ába laríjini chagáguau jáma gürígia ja ayájubaña, agúaraja. ³⁹ Ába lebéllurun, ába laríñagun joun.

—¿Cásan uágu jareíncha, ayájua buri jugúya ítara? Mouñwentutia irájü to, tarúmugüña.

⁴⁰ Ába jéjerajan láu. Ábati láfuridagüdúniña Jesúsu súnqubei ñígiñe, ába lanúgüni túguchi irájü túma túguchu jáma ja ñúdünbaña lúma, ába lebéllurun le ñjín tubei irájü.

⁴¹ Ába lárügüdüni tújabu, ába laríñagun tun.

—Talíta, cúmi—líla líra. Niraú, sarába.

⁴² Lídan óra ligía, ába tásaarun irájü tugúya, ába teíbugun. Weíyarajújaru, dúusu irúmu táu. Ába laweíridun janígi gürígia ja ñíbaña. ⁴³ Ába líchugun Jesúsu dimúrei derégüdati joun lun mabájüdagun jamáni ni ca un, ába laríñagun joun lun jíchugun égini tun.

6

*Jesúsu lídan fulásu le Nazarét
(Mt 13.53-58; Lc 4.16-30)*

¹ Ába lídin Jesúsu ñígiñe, ába lagríbudun lageíroun, ába jóudin láni disípulugu lúma.

² Dan lachúlürün wéyu le eméraaguagülei, ába larúfudajan tídan jalígílisin juríu, sarágu jáña güriquia agáambeí, ába laweíridun janígi láu larúfudajan, ába jaríñagun.

—¿Jalía funásan lafunrendeirei güriquia le sun le? ¿Cáteisan lichú áu le luágubei? ¿Ída liñásan gayára lubei ladáagun miláguru? ³ Saráfangeiga le tiraú María le, líbugaña Jacóbo, José, Júdas, lúma Simón, ñáñanu gíñe lítunu wáma.

Ába jíchugun mabájüdüni luágu. ⁴ Ába laríñagun Jesúsu joun.

—Sun güriquia, gúndaatiña láu ában proféta jaweídügüya ja lupáfanun jáma lidújeñu, jáma ja tflana lúban, jagía rügúñanu íchiga mabájüdüni luágu.

⁵ Ligía lásiñerunbei ladúgün ámu miláguru ñi lueídügüya líchugun lújabu jawágu biñáráü sánditiña, ába lareídaguagüdüniña. ⁶ Weírititi lanígi láu maffínen jamá. Lárigiñe, ába leíbuguni lirájüñü fulásu, arúfudajeina.

Louñajaniña Jesúsu láni disípulugu apúrichija

(Mt 10.5-15; Lc 9.1-6)

⁷ Ába louñajan jawágu láni dúusu disípulugu lun lagúmeserun oúnajaña bián bián, ába líchugun ubáfu joun lun gayára lan jaságarun espíritugu wuríbatíña. ⁸ Rúti dimúrei joun lun manúgün jamá ni cáta luágu jeíbugun lueídügüya bádun, moún lumuti janúgün ni feín, ni ságü, ni seínsu, ⁹ lun geídi tan jasábadun, lun mabíaman tan jasímisin. ¹⁰ Ába gíñe laríñagun joun.

—Dánme le jebélurun lídoun ában fulásu apúsaraja, reídei jumá ñi tídan ában méme múna darí jáfuridun lídaangiñe fulásu ligía. ¹¹ Ánjaúnti merésibirúniwa lídan ában fulásu, mája jagía jagáambunün, furíjuma ñígiñe, ábame jáfuruduni calíqui lueígiñe jugúdi, liseínime magúndani jáu lílana fulásu ligía, ígira jumáña quei jadáriragun jóungua. Le ninárün jáu luágu dánme lan lachúlürün luwéyuri Búngiu lun lagúseragüdüniña sun güriquia, maweíribei jabeichúniwa Sodómana jáma Gomórrana quei lílana fulásu le merésibirunbalün.

¹² Ábati jáfuridun, ába japúrichijan joun güriquia luágu lúnti lan jasáansiruni ligáburi jóuserun. ¹³ Sagátiña gíñe sarágu espíritugu wuríbatíña jaweí güriquia, jurúgua jagía aflí jawágu sarágu sánditiña, ába jareídaguagüdüniña.

Louñwen Juan le abásteragüdjabeí

(Mt 14.1-12; Lc 9.7-9)

¹⁴ Queíti eíbaajali lubei luáguti Jesúsu lídan sun fulásu, ába gíñe lachúlürün lábun lagáambun urúei Heródes. Sarágu jáña aríñagutiña.

—Saráya Juan le abásteragüdjabeí lídaangiñe oúweni, ligía luweírinbei lubáfu.

¹⁵ Jaríñaga jíbiri.

—Elías lé meja proféta le.

Jíbiri aríñaga.

—Ában proféta quei ja binádu.

¹⁶ Dan le lagáambunbalin Heródes sun le, ába laríñagun.

—Juan le, le nadúruragüdübei ichúgü, saráaya lídaangiñe oúweni.

¹⁷ Lé meja asúseredubei, oúnajali meja Heródes adáurei Juan, ába lagúraguni láu güriñgüri furísunrugu tadúga Heródias. Wúri tugúya, lúmari meja Felipe, le lamúlen Heródes, ába lanúgünun Heródes lúmarime. ¹⁸ Ába meja laríñagun Juan lun Heródes.

—Moún lumuti bagámaridunun lúmari bamúlen.

¹⁹ Ába liyéeregudun Juan tun Heródias, ába tabúseerun táfaruni jílagubei, ²⁰ siñá tumuti ladúga subúdi lan lun Heródes luágu ában lan wügúri le eíbuguti buídu lúma Búngiu Juan, áni ában lan wügúri esériwiduti lun Búngiu, janúfudetiti lueí. Ligía mája lubei lun tadúgün ni cáta láu. Láu sun úa lan gunfaráanda láani Heródes le laríñagubei Juan lun buídu, agáamba lumúti láu ugúndani. ²¹ Ába tadáriruni Heródias ticháansin dan le lagúnfulirun

Heródes irímu, ába ladúgün fédu joun gumádimatiña jáma jábutigu súaara jáma ámu buri güriáia weirigutiña ja Galiléabaña. ²² Ába tebélorun tiraú Heródias ní lubei fédu le, ába tabínajan, gúndaatiti Heródes jáma sun ja níbaña eíga lúma láu tabínajan irájü to, ába laríñagun tun.

—Amúriajabeí le babúseerun núma, níchugubei bun.

²³ Rúlumuti lerérun tun luágu líchugubei lan furúmieguarügü cátei le tamúriajan lúma tun, gayára lan lamídan lan fulásu le ní lubei larúeijan tamúriaja. ²⁴ Ába táfuridun, ába taríñagun tun tóguchu.

—¿Cábasan namúriaja lúma?

Ába taríñagun tun.

—Amúriajabeí lábulugu Juan le abásteragüdajabei lúma.

²⁵ Ába tebélorun irájü to furése le níjin lubei urúei, ába taríñagun lun.

—Buséntina lun bíchuguni lábulugu Juan le abásteragüdajabei nun lídan ában asíedu guelé guelé.

²⁶ Ába lajírudagun urúei sarágu, quei rúlaali lan lerérun áni agáambagu jáña amísura-jóutiña lun, májati lun míchu lubeí lan le tamúriajabei lúma tun. ²⁷ Furése furése, ába loúnajan urúei ában súaara láu dimúrei lun lanúgüni lábulugu Juan lun. ²⁸ Ába lídin súaara ligía furísunrugu, ába ladúrürüni lábulugu Juan, ába lanúgüni lídan ában asíedu. Ába líchuguni tun irájü tugúya, ába tíchuguni tun tóguchu.

²⁹ Dan le jagáambunbalin lánigu Juan, ába jayábin lun janúgüni lúgubu, ába jábununi.

Leíagüdüin Jesúsu seíngü mílu wügúriña

(Mt 14.13-21; Lc 9.10-17; Jn 6.1-14)

³⁰ Lárigiñe jagíríbudun láni Jesúsu apóstolugu, ába jóúndaragun lúma, ába jabájüdaguni sun le jadúgübei lúma le jarífudajabei, lun. ³¹ Ába laríñagun Jesúsu joun.

—Jigoúgu, quefmoun weméraagua lídan ában fulásu le mageirawati.

Laríñagubaaalin líra ladúga níñanu sarágu güriáia, jíbiri níüdün, jíbiri níubin, darí lun madáani lan Jesúsu jáma láni disípulugu ni lun jeígin. ³² Ába jóúdin tídan ába ugúnein lídoun ában fulásu mageirawati. ³³ Sarágu jáña aríjiti jóúdin, dan le jasúbudiruni luágu níjein lan Jesúsu jádan, ába jeíbaagun geyégua láu lagúnu lídaangiñe sun lirájüñü fulásu, ába jachúlürün lubáragiñe lachúlürün Jesúsu jáu láni disípulugu. ³⁴ Dan le larárirunbei Jesúsu tídaangiñe ugúnein, ába laríjin sarágu güriáia jagúrabajañe, ába jagúdemedagun lun ladúga itara jáña lan quei mudún ja móuniritiña. Ába lagúmeserun arífudaja sarágu cátei joun. ³⁵ Dan le dárüjiali, ába jayábin láni disípulugu, ába jaríñagun lun.

—Dárüjalitia áni úatiña aganóutiña lídan fulásu le. ³⁶ Oúnaja baña güriáia ja lun jóúdin lídoun buri lirájüñü fulásu le yaráfabei lun jagáñijan fein, ladúga úati ni cáta ya lun jeígin.

³⁷ Ába laríñagun Jesúsu.

—Rújuma eígini joun.

Ába jaríñagun lun.

—¿Gayáraati funági woúdin agáñija fein joun? Busénwati jamúga lebégi bián-san wéyu wadágimanu lun wabíjini seínsu lun wíchugun fein joun súnugubei.

³⁸ Laríñaga Jesúsu joun.

—¿Átiríñoungi fein júma? Jefba aríjoun.

Dan le jaríjinun, ába jaríñagun lun.

—Seíngü fein jáma bián úduraü.

³⁹ Ába lañúuragüdüniña güriáia sagádirugu. ⁴⁰ Ába jañúurun san san lúma dimí dimí san, queísi laríñagun joun. ⁴¹ Ába lanúgünun Jesúsu seíngü fein to lújaburugu jáma bián úduraü ja, ába laríjin siélun, ába leteíngiruni Búngiu tuágu, ába lagúbachagúnun, lárigiñe, ába lamúrusujanun lun líchugunun joun láni disípulugu lun jafánreinjanun jádan güriáia jagía, fánrein jamáña gíne bián úduraü jagía jádan súnugubei. ⁴² Jóútiña sun jagía

químule. ⁴³Lárigiñe, ába jabuínchagüdüün dúusu faníñe láu tífe fein lúma úduraü ígiragúti. ⁴⁴Seíngüñanu mílu wügúriña eígitíña, mabájüdünga wúriña jáma irájüñü.

Leíbugun Jesúsu ligíbuagu dúna
(Mt 14.22-27; Jn 6.16-21)

⁴⁵Ába ládinagüdüniña Jesúsu láni disípulugu tídoun ugúnein lun jánjiñuragun lubá lun jachúlürün Betsáida, sun niján lan ayoúragua joun güriña. ⁴⁶Dan le ñúdüñjaña, ába lídin luágu wúbü ayúmuragua lun Búngiu. ⁴⁷Dan le lagúñedunbei, lamídaanjaru dúna ugúnein jáu disípulugu, Jesúsu rugáali lábugua múarugu. ⁴⁸Ába laríjin luágu jénreenguja lan joun lun jénjunjan ladúga jabárouñein lan garábali. Lubá larúgan, ába lídin Jesúsu jawágun eíbugeina ligíbuagu dúna, lásügürá yebe jáu. ⁴⁹Dan le jaríjini eíbuga ligíbuagu dúna, ába jarítagan luágu úfiaü lan, ába jagúaragun, ⁵⁰ladúga sun jagía aríja jamúti, ába janúfudedagun. Ába ladímurejan joun, ába laríñagun.

—¡Ganígi jumá! ¡Manúfude jumá, áu le!

⁵¹Ába ládinun tídoun ugúnein jámoun, ába lagálumadun garábali. Ába laweíridun janígi láu, ⁵²ladúga úgali lan gunfaráanda jamáni miláguru le ladúgübei táu fein, luágu gabáfu lan lun sun cátei, derégili jachúgü.

Lareídaguagüdüniña Jesúsu sánditiña Genésaret
(Mt 14.34-36)

⁵³Ába jánjiñuraguni dúna, ába jachúlürün Genésaret, ába jagúrunun ugúnein láru dúna. ⁵⁴Quei jaráriragun tídaangiñe ugúnein, ítara jasúbudiruni lílana fulásu luágu Jesúsu lan. ⁵⁵Ába jeíbaagun lídoun sun fulásu aríñaga luágu chúlújali lan, ába jagúmeserun güriña anájaja sánditiña tídan jabárari le ñíjin lubei jagáamba luágu níjein lan Jesúsu ñi. ⁵⁶Súnti fulásu ñíjin lumúti lebélera, ubúrugu yebe, lirájüñü yebe fulásu, áraabu yebe, ába jíchaajouün sánditiña úmada, ába jamúriajan lúma lun lígiruniña lúnrügü jagúurun sánditiña jagía luágu táru lanáangun. Súnti ja agúurubaña luágu, areídaguatiña.

7

Cátei le adúgübalin güriña lun marúman lan ligíbugiñe Búngiu
(Mt 15.1-20)

¹Ába jayábin fariséogu jáma jádaangiñe arúfudajatiña lilúrudun Moisés ja ñúbinbaña Jerusaléngiñe, luágun Jesúsu. ²Ába jaríjin luágu añajein lan jádaangiñe disípulugu machíbun jamúti jájabu lubá jeígin según jagáburi juríu. ³(Falá jamuti fariséogu jáma jíbiri juríu binádu jagáburi binádu jagúbürigu lun meígin jamá, machíbunga jameí jájabu sarágu weíyaasu. ⁴Dan le jayábin mágidirugugiñe, meíginbaña magúñfulirunga jagía láu jachíbuni jájabu. Níjein buri gíñe sarágu luwúyerigu igáburi jafálarun, queí buri lachibúniwa wéru, soúdiéru, boulu, asíedu.) ⁵Ábati jálügüdüni fariséogu jáma arúfudajatiña lilúrudun Moisés jagía, Jesúsu.

—¿Cásan uágu mafála jabálin báni disípulugu binádu jagáburi binádu wagúbürigu, jeíginbei láu liwíye jájabu?

⁶Ába louñabuniña Jesúsu.

—Linárün proféta Isaías, dan le laríñagunbei juágu luágu ámu lan jigáburi luef le áubei jarúfudagua júngua. Aríñagati.

Güriña ja, jayumárurügü jíchiga inébesi nun, líña Búngiu, ánjein tídan janígi, mebéresentiña náu.

⁷Málati jájuduragun nun,

ladúga lé rügúñein jagúmadijan wügúriña jarúfudaja.

⁸Ába laríñagun Jesúsu.

—Ígira jumáli lagúmadijan Búngiu lun jafálaruni binádu jagáburi binádu güriña. lachibúniwa soúdiéru, wéru, lúma cátei líbeina líra. ⁹¡Maésturugu gíñe buítiña jugúya,

fgira jumúti lagúmadijan Búngiu lun jafálaruni binádu jigáburí! ¹⁰ Aríñagatí meja Moisés. “Inébe jamá bagúbürígu bun, le anábagubaliña lagúbürígu, jilála.” ¹¹ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu. “Siñáti níderagunibu ladúga sun le númabei, aríñagaadina luágu lun lan níchuguni lun Búngiu”, ¹² luágu furúmieguarügü lan le aríñaguti ítara, mámaali lan lúnti líderaguniña lagúbürígu. ¹³ Láu líra, mebégígüda jumáli lagúmadijan Búngiu lun jafálaruni binádu jigáburí, adúga jugúya sarágu cátei líbeina líra.

¹⁴ Ábaya lagúarun Jesúsu joun gürígia ja ñíbaña, ába laríñagun joun.

—Agáamba jumána, sun jugúya, gunfaráanda jumáname. ¹⁵ Úati ni cáta ebéluruti lídoun gürígia lun laríbadagüdüni ligíbugiñe Búngiu, le áfurídubei tídaangiñe lanígi gürígia, ligia aríbadagüdübalin ligíbugiñe Búngiu. ¹⁶ Jugúya le garígeirugubei lun jagáambun, agáamba jumána.

¹⁷ Dan le lígiruniña Jesúsu gürígia jagía, ába lebélorun múnadoun, ába jálügüdüni láni disípulugu luágu jémpulu le. ¹⁸ Ába laríñagun joun.

—¿Úati lubei gíñe gunfaráanda jumá? ¿Úati gunfaráanda jumáni luágu sun lan le ebélurubei bougudigiñe lídoun gürígia siñá lan laríbadagüdüni ¹⁹ ladúga mebéluti tídoun lanígi, lurágeirugun lebélura, ñígiñe ábaya láfurídun lídaangiñe?

Láu líra laríñaguña luágu sun lan eíginí, jarúmati. ²⁰ Aríñagati gíñe.

—Le áfurídubei lídaangiñe gürígia, anáti líra, wuríbagüda lumúti, ²¹ ladúga lídaangiñe gürígia o tídaangiñe lanígi láfurida lagúbüri samínaü, adultériu, salúfuri, áfarajani, ²² íwerujani, wámajabúni, iyéeejabúni, iyéeni, marícharagun lan íbágarí, gimúgäu, marásualugú, anáanguni únguauü, medéraguaguduni. ²³ Sún buri cátei wuríbati le, tídaangiñe lanígi gürígia líabin, ligiati mabuídundagüdübalin ligíbugiñe Búngiu.

*Ában wúri teréncha to afíñeruboun luágu Jesúsu
(Mt 15.21-28)*

²⁴ Ába lídin Jesúsu ñígiñe loubawagun Tíro lúma Sidón. Ába lebélorun tídoun ában múna áni mabúseerunti yebe lun lasúbudiruni ni ában. Siñáti larámudagun, ²⁵ furése, ába tagáambun ában wúri luágu, túguchu ában irájü gawágotu ában espíritu wuríbati. Ába tiábin, ába tájuduragun ligíbugiñe Jesúsu. ²⁶ Wúri tugúya, máma juríu, Síro-Feniciana. Ába tamúriajan lúma Jesúsu lun laságaruni espíritu wuríbati le tueí tiraü. ²⁷ Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tichugúniwa joun oúnli.

²⁸ Ába touñabuni.

—Ánja Nabúreme, oúnli ja lábugiñebaña dábula gayáraati gíñe jeígin tídaangiñe tífe fein to jágujaboun isáanigu.

²⁹ Ábati laríñagun Jesúsu tun.

—Adímurejadíbu buídu, gayáraajali bídin, furíja espíritu wuríbati tídaangiñe biraü.

³⁰ Dan le tachúlürün múnada, ába tadárirunun irájü tídan gabána, furíjali espíritu wuríbati tídaangiñe.

Lareídaguagüdüni Jesúsu ában magáambaditi, maríñagadi

³¹ Ába láfurídun Jesúsu loubawagugiñe Tíro, ába lásügürün Sidóngiñe lúma lídaangiñé buri fulásu lánina Decápolis, ába lachúlürün luágun barána Galiléa. ³² Ñi janúga ában wügürí magáambaditi, dagádagá lerérün lun, ába jamúriajan lúma lun líchuguni lújabu luágu lun lareídaguagüdüni. ³³ Ába ladíñurun Jesúsu ñígiñe láu jaweí gürígia, ába ládaruni bián lirájüñü lújabu larígeirugun, ába lásuerun, ába lájurudunun líñéñe láu arúrei. ³⁴ Ába laríjin siélun, ába lawáragun, ába laríñagun.

—¡Efata! —míni lan líra. ¡Junrénba!

³⁵ Ába lánjunrenchun larígeirugu magáambaditi ligía, ába tánjingichun liñéne lun ladímurejan buídu. ³⁶ Ába laríñagun Jesúsu joun lun mabájüdagun jamáni ni ca un, létima laríñagun joun lun mabájüdagun jamáni, ligíatima jabájüdaguni. ³⁷ Ábatí buri laweíridun janígi sarágu, ába jariñagun.

—Adúga lumúti sun cátei buídu, darí lun lagáambagüdüniña magáambaditiña, adímuregüda láña maríñagaditiña.

8

Leígaqüdüñ Jesúsu gádürü mílu güirgía

(Mt 15.32-39)

¹ Lídan dan ligía, ábaya jóundaragun sarágu güirgía áni úati ni cáta jáma lun jeígin. Ába lagúarun Jesúsu joun láni disípulugu, ába laríñagun joun.

² —Gudémetiña güirgía ja nun ladúga úrúwa wéyu jáu núma ya áni úaali ni cáta jáma lun jeígin. ³ Ánjaña nouñaja águyu meíginga, ladágaruba falálau jawágu úmada, ladúga añájein jádaangiñe, díseti ñígiñe lumúti jayábin.

⁴ Ába jóunabuni láni disípulugu.

—¿Ída lubáti jeígaqüdüniwa ya lídan fulásu le mageírawaguti?

⁵ Ába lálügüdüniña Jesúsu.

—¿Átiriñoun fein júma?

Ába jariñagun lun.

—Sédü.

⁶ Ába lañúragüdüniña güirgía múarugu, ába lanúgünun sédü fein tugúya lújaburugu, ába líchugun eteíngiruni lun Búngiu. Ába lagúbachagunun, ába lamúrusujanun, ába líchugunun joun láni disípulugu, ába jafánreinjanun jádan güirgía jagía. ⁷ Níñanu gíñe átiri jarájüñü údurau jáma, ába líchugun eteíngiruni jawágu, ába lafánreinragüdüniña. ⁸ Jóutiña sun jagía químule, buíngüdagíña sédü faníñe táu tife to ígiraguboun. ⁹ Yaráfañanu joun gádürü mílu wügüriña. Ába louñajaniña Jesúsu águyu, ¹⁰ ába ládínun tídoun ugúnein jáma láni disípulugu, ába jóudin Dalmanutoín.

Jamúriajan fariséogu miláguru lúma Jesúsu

(Mt 16.1-4; Lc 12.54-56)

¹¹ Ába jayábin fariséogu, ába jagúmeserun asígeneja lúma Jesúsu. Lúnti jaríjin lábun, ába jamúriajan lun larúfudun ában miláguru joun, siélugiñe. ¹² Ába lawáragun Jesúsu weíri, ába laríñagun.

—¿Cásan uágu jamúriaja güirgía ja lánina dan le ában miláguru? Ninárün jáu luágu marúfudúnbei lan miláguru jun.

¹³ Ába lígiruniña Jesúsu, ábaya ládínun tídoun ugúnein, ába lídin loubáfurugun dúna.

Jarúfudajan fariséogu quei ísi

(Mt 16.5-12)

¹⁴ Bulíei jamúti disípulugu janúgün eígin, ában rügüñoun fein jáma tídan ugúnein. ¹⁵ Ába lewéridiruniña Jesúsu, laríñaga joun.

—Toúnigi jumátia lueí jísite fariséogu lúma lísite Heródes.

¹⁶ Ába jariñagun disípulugu jádaangua.

—Ladúgatia meígan wamá fein laríñagubei ítara.

¹⁷ Ába lasúbudiruni Jesúsu jarítagun, ába laríñagun joun.

—¿Ca uágu jariñaga luágu meígan jumá fein? ¿Úagili gunfaráanda jumá, meféen jugúya? ¿Ítara lidére jichúgü? ¹⁸ ¿Maríjintün láu jágu, magáambun jugúya láu jarígeirugu? ¿Marítagun jumáali? ¹⁹ Dan le nafánreinjanbarun seíngü fein jádan seíngü mílu wügüriña, ¿átiriñoun faníñe táu tife jabúduñ?

Ába jariñagun.

—Dúusu.

²⁰—Ángi dan le nafánreinjanun sédü fein jádan gádürü mílu, ¿átiriñeingi faníñe buin jabúdun?

Ába jaríñagun.

—Sédü.

²¹Ába laríñagun joun.

—¿Úagili gunfaráanda jumá luágu máma lan tuágu fein nadímureja?

Lareidaguaqüdün Jesúsu ában maríjinti Betsáida

²²Lárigiñe, ába jachúlürün Betsáidoun, ába lanügüniwa ában maríjinti lun Jesúsu, ába jayúmuragun lun lun lagúurun luágu. ²³Ítara líña lárügüdüni Jesúsu maríjinti ligía, ába lanügüni bougdún luef fulásu ligía. Ába lájurudagun arúrei luágu lágu, ába líchuguni lújabu luágu, ába lálügüdüni ánjein gayáaraarü lubeí laríjin. ²⁴Ába laríjin, ába laríñagun.

—Aríja numútiña wügüriña, naríjiniña quei tídibu wéwe, efbugeina.

²⁵Ábaya líchuguni Jesúsu lújabu luágu lágu, ába laríjin güriñgía ligía láu goúnigi, ába lareidagun, ába laríjini sun cátei furáangu. ²⁶Ába loúnajani Jesúsu águyu, aríñageina lun.

—Mebélurabátia ubúrugin, maríñagunbeime lun ni ában ñi.

Laríñaguni Pédro luágu Jesúsu lan Crístubei

(Mt 16.13-20; Lc 9.18-21)

²⁷Lárigiñe, ába lídin Jesúsu jáu láni disípulugu lídoun buri lirájüñü fulásu le geyéguabei láu ubúrugu Cesaréa le Filípo. Úmada, ába lálügüdüniña láni disípulugu, laríñaga joun.

—¿Cátanasan jaríñagun güriñgía?

²⁸Ába jóunabun.

—Añájein aríñagutiña luágu Juan lan le abásteragüdajabei lan amúrü, jíbiri aríñaga proféta Elías ban, añájeingua aríñagutiña luágu ámu lan proféta amúrü.

²⁹Ába laríñagun.

—Ánti jugúya, ¿cátanati lídan jarítangun?

Ába laríñagun Pédro lun.

—Amúrü Crístubei, le loúnajabei Búngiu lun lasálbaruniña güriñgía lídaangiñe jafígoun.

³⁰Ába laríñagun Jesúsu joun lun maríñagun jamáni lun ni ában.

Ladímurejan Jesúsu luágu loúnwen

(Mt 16.21-28; Lc 9.22-27)

³¹Ába lagúmeserun Jesúsu, le Wügüri Garaúwarügüti, arúfudaja joun luágu lúnti lan lasúfurirun sarágu, luágu weíribei lan jíchugun wügüriña weírigutiña lídan jafínen juríu mebéreseni láu, ítara lúba giñe jóuseruni jábutigu fádirigu jáma arúfudajatiña lilúruden Moisés. Aríñagati joun luágu láfarúaba lan jilágubei, áni lásaaruba lan lídaangiñe óuweni lúnya labágaridun luágu lírüwan wéyu. ³²Furáanguti laríñaguni le joun. Ábati lanügüni Pédro Jesúsu ñigiñe, ába lagúmeserun adeínja lun. ³³Ába lagáraragun Jesúsu, ába laríjin jawágun láni disípulugu, ába lébechuni Pédro, ába laríñagun lun.

—¡Díseba nueí, Máfia! Bugúya, masáminaruntibu quei Búngiu, basáminarun quei wügüriña.

³⁴Ábati lagúarun Jesúsu joun láni disípulugu jáma jíbiri güriñgía lun jayárafadun lun, ába laríñagun joun.

—Le busénti lafálarunina, bulíeilef cáteiñein lan, awándalef sun luwúyeri asúfuriruni le lúnbei liábin lun nueígiñe queísi lanügüni ában wügüri lugúruwan, falálana. ³⁵Ladúga le abúseeruti leséfuragun lúngua ya ubouágu lefériðirubei ibágari le magúmchaditi, ánjeinti le ánjabei lefériðiruni libágaru ya ubouágu nueígiñe, libíjubei ibágari le magúmchaditi siélu. ³⁶¿Cági ju lan lun güriñgía lagáñeiruni sun le lánina ubou, lefériðireime lubára siélu? ³⁷Úati ni cáta lánina ubou le áuti gayára lan lagáñijan güriñgía lubára siélu.

³⁸ Le anúgüti busíganu nuágu lúma luágu nerérun jagíbugiñe güirgía múaraantiña áni gaffígountiña ja, nanúgüba gñe busíganu láu, áu le Wügúri Garaúwarügüti, dánme le niábin siéluigiñe láu luweirigun Núguchi, geyégu jáu ánjeligu ja sándubaña.

9

¹ Aríñagati gñe Jesúsu joun.

—Nínarün jáu, luágu añájein lan jádaangiñe ja yábaña guetó, mouñwenbaña darí jarjini lachúlürün larúejan Búngiu láu ubáfu.

Lámuñedagun larijín Jesúsu
(Mt 17.1-13; Lc 9.28-36)

² Sisi wéyu lárigiñe, ába lanúgüni Jesúsu Pédro, Jacóbo, lúma Juan, ába lídin jáu luágu ában wúbü íñuti le ní lumuti gayára lan jábugua jamá, ába lámuñedagun larijín ní jagíbugiñe. ³ Ába támiridun lanáangun jarú quei jeméreedu, weíríti tjárun chülú lúmoun úa jamá ni güirgía ubouágu gayáraati jachíibun gamísa lun tájarudun ítara. ⁴ Ába jarjini Elías lúma Moisés ayánuja lúma Jesúsu, ⁵ ába laríñagun Pédro lun Jesúsu.

—Maésturu, ¡lídán dan awánja lan ya! Adúga wamá úrtüwa dibásein, ában bun, ában lun Moisés, ában lun Elías.

⁶ Laríñagubaalin líra ladúga janúfude disípulugu, áni ibídiñeti lun Pédro ca lan laríñagubei. ⁷ Ába larárirun ában juánriñu le ñjín jabeí, ába ladáuragun jáu, ába lagaambúniwa ában umálali lídaangiñe juánriñu ligía le aríñagubei.

—Niján Niraú le jínsiñebei nun, jeíba láu le lubeíbei.

⁸ Lídan óra ligía, dan le jarjín geyégu ní, marjínjaña ámu ní lueídügüya Jesúsu.

⁹ Dan le aráireina jamá lueígiñe wúbü, ába léredun Jesúsu jawágu lun mabájüdagun jamáni le jarjibeí lun ni ában daríme saráali lídaangiñe ouweni lúnya labágaridun, ligía le Wügúri Garaúwarügüti. ¹⁰ Ligía jareídunbalin jádaangua, álügüdajárügütiña jámagua cátei lán funa ásaarunibeí lídaangiñe ouweni. ¹¹ Ábati jálügüdüni Jesúsu.

—¿Cásan uágu jaríñaga arúfudajatiña lilúrudun Moisés luágu lúnti lan liábin Elías furúmiñe lubáragiñe liábin le Crístubei?

¹² Ába loúnabuniña.

—Inárüni le jaríñagubei luágu Elíasba lan ñúbin furúmiñe áni laráanserubei lan sun cátei. ¿Cági taríñagubei Lerérun Búngiu nuágu, áu le Wügúri Garaúwarügüti? Aríñagatu luágu nasúfuriruba lan sarágu áni mabájüdüñbadina lan. ¹³ Naríñajare jun luágu ñúbinjali lan Elías, ába jadúgüni güirgía sun le jabúseerunbei láu, quei taríñaguni Lerérun Búngiu luágu ítara lúba lan lasúseredun lun.

Lareidaguaqüdüñ Jesúsu ában irájü gawáguti espíritu wuríbati
(Mt 17.14-21; Lc 9.37-43)

¹⁴ Lárigiñe, ába jagíribudun le ñjín jabeí jíbiri disípulugu, ába jarjín sarágu güirgía geyégu jáu. Níñanu gñe arúfudajatiña lilúrudun Moisés asígeneja jáma. ¹⁵ Dan le jarjínbalin Jesúsu, ába lawefridun janígi láu jarjini ní, ába jeíbaagun abúsura lun. ¹⁶ Ábati lálügüdüniña, laríñaga joun.

—¿Ca uágu jasígeneja jáma?

¹⁷ Ába loúnabun ában jádaangiñe ja ñibaña, ába laríñagun.

—Maésturu, niján niraú nanúgün bun, níjein ában espíritu wuríbati luágu, merérunjali ladúga. ¹⁸ Ní lumuti lárügüdeí espíritu wuríbati ligía, lájuchuruni múarugun, ába láfurijan jacútaü liyúmulugugiñe, ába lacúnrinjan lári. Ledébilidunáti ítara. Amúrijaadina jáma báni disípulugu lun jaságaruni espíritu wuríbati le lueí, siñá jamuti.

¹⁹ Ába loúnabun Jesúsu, ába laríñagun.

—¡Güirgía maffíneraditiña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha maffíñeni le jídaanbei? Barújumei irájü ligía ñájoun.

²⁰ Ába janúgüni lun. Dan le laríjinbalin espíritu wuríbati ligía Jesúsu, ába louwejagüdüni irájü ligía, ába leíguadun múarugun, ába lagárabajan, ába láfurijan jacútaü liyúmu-lugugiñe. ²¹ Ába lálügüdüni Jesúsu lúguchi, ába laríñagun lun.

—¿Átiri dan lueígiñe ítara lan?

Ába laríñagun lúguchi.

—Lúmagiñe nûraügili. ²² Gíbeeli weíyaasu lájuchuruni espíritu wuríbati ligía wáturugun o dúnarugun lan lún yebe láfaruni jilágubei. Ánjein lubefti njein lubeí gayára bumúti adúga, gudéme wamá bun, íderagua báwa.

²³ Ába laríñagun Jesúsu lun.

—¿Ca uágu baríñaga ítara? Inárüni luágu gayára lan nadúgüni. Sun cátei gayáraati lun le afínebei.

²⁴ Ába lagúaragun lúguchi irájü ligía.

—¡Afíñetina, íderagua bána lúntima nafíñerun!

²⁵ Dan le laríjinbei Jesúsu luágu furésetimájali lan jagíbedun gürgía, ába ladeínjan lun espíritu wuríbati ligía, ába laríñagun.

—Espíritu magáambaditi, maríñagadi, aríñagatina bun lun báfuridun, ígirabei irájü le áni mebéluradügüyabá lídoun.

²⁶ Ába lagúaragun espíritu, ábaya louwejagüdüni irájü ligía, ába láfuridun, ába leréderun irájü ligía camá jiláali. Sarágu jáña aríñagutiña luágu jilá lan. ²⁷ Ába lárügüdüni Jesúsu lueígiñe lújabu, ába liñúraguni, ába laráramun.

²⁸ Ábati lebélorun Jesúsu múnadoun, ába jálügüdüni láni disípulugu dan le jábuguarü-gaña lúma, ába jaríñagun lun.

—¿Cásan uágu siñá wabalin espíritu wuríbati ligía aságara?

²⁹ Ába laríñagun joun.

—Ladúga líbe espíritu le, láu rügüñein ayúmuraguni lun Búngiu lúma ayúnaruni gayára lan láfuridun.

Ladímurejaanya Jesúsu luágu louñwen

(Mt 17.22-23; Lc 9.43-45)

³⁰ Dan le jóüdin nígiñe, ába jásügürün Galiléagiñe, ³¹ mabúseeruntiti Jesúsu lun lasúbudirúniwa jalíñañein lan ladúga larífudajaña lan joun láni disípulugu, aríñageina ligía luágu ledéregurába lan, ligía le Wügüri Garaúwarügüti, jájaburugun wügüriña wuríbatiña áni jáfarubei lan jilágubei, ábame lásaarun lídaangiñe ouweni luágu lúruwan wéyu lúnya labágaridun. ³² Úati gunfaráanda jamáni le laríñagubei joun, áni janúfudetiña lun jálügüdüni.

¿Cátima weírigubei?

(Mt 18.1-5; Lc 9.46-48)

³³ Ába jachúlürün ubúruyu Capernaúm, múnada, ába lálügüdüniña Jesúsu.

—¿Cásan buga uágu jadímureja le efbugeina jumá?

³⁴ Ába jeréderun maníñu ladúga úmada adímurejeina jañá buga luágu ca lan jádaangiñe weírgutimaabei. ³⁵ Ábati lañúurun Jesúsu, ába lagúarun joun dúusugubei disípulugu lubádun, ába laríñagun joun.

—Le abúsueruti ligía lan furúmiñeti, lúnti agúmujóuni lan jádan súngebui, lun gíñe lesériwidun joun súngebui.

³⁶ Ába lanúgün ában irájü, ába líchuguni jamídaangua, ába lanúgüni lújaburugu, ába laríñagun joun.

³⁷ —Gürgía le erésibiruti ában irájü quei le lídan níri, resíbi lumútina, áni máma rügüñein áu lerésibira, resíbi lumúti gíñe Núguchi le ouñajabalina.

Le mámabei wágani, wamágiñeñein

(Lc 9.49-50; Mt 10.42)

³⁸ Ába laríñagun Juan lun.

—Maésturu, aríjatiwa ában wügúri aságajati espíritugu wurfatiña lídan bíri, quei máma lan wámañein, ába wawéridiruni lun madúgündügüya láani.

³⁹ Ába laríñagun Jesúsu.

—Mawéridira jumeí, ladúga úati ni ában le adúgüti milágoru lídan níri lun ladímurejan wuríba nuágu. ⁴⁰ Le mámabei wágani, wámagiñeñein. ⁴¹ Ninárün jáu luágu furúmieguariügü lan le íchuguti ában wéru dúna jun lídan níri ladúga láni jumá Crístu, libíjuba afáyeirujajú buíti.

Góunigi lueí leíquadúniwa lídoun figóu
(Mt 18.6-9; Lc 17.1-2)

⁴² Furúmieguarügü le afíngungüdüti ában jádaangiñe ja isérigiñabaña lídan jafiñen nuágu, buítimaati jamúga lun lágurúniwa baránajóun láu ában oúnwenbun dúbü le amúligülei güráñu luágu ligíina sügú láu ladúgüni cátei líra. ⁴³ Ánjabu laffíngungüda bújaba guánarü, buítimaati jamúga lun báchuguni, ladúga buítimaati jamúga bídin siélun láurügü ában újaba sügú láu jamúga badarún láu biángubei bújaba máfiougatin, ⁴⁴ ní lubei moúnwen jamá jéweraü ja eigibalin jágubu jiláaña, méñeguchadi wátu. ⁴⁵ Ánjabu gíñe laffíngungüda bugúdi guánarü, buítimaati jamúga gíñe lun báchuguni, ladúga buítimaati jamúga bebélurun siélun láu ában ugúdi sügú láu badarún máfiougatin láu biángubei bugúdi, ⁴⁶ le ní lubei moúnwen jamá jéweraü, méñeguchadi ligía wátu. ⁴⁷ Ánjabu gíñe laffíngungüda bágu, buítimaati lun baságaruni, ladúga buítimaati jamúga bebélurun lídoun larúeijan Búngiu láu ában águu sügú láu jamúga badarún máfiougatin láu biángubei bágu, ⁴⁸ le ní lubei moúnwen jamá jéweraü, méñeguchadi ligía wátu.

⁴⁹ “Sun gürígia ja lánigubaña Búngiu, jouchúaba quei lau wátu geméti jawágu lun jarúmadagüdúniwa, queisigubeirügü líchugúniwa sálu luágu cátei adágaragüdúwati lun Búngiu, arúfuda lámuga luágu jarúma lan, buídu ligía lun lareidúniwa. ⁵⁰ Buíti sálu, ánjein lefériðira lubásuan, ¿cábaga un ju lan? Ítara líña lubeíti, awánda jumeí sun ouchúni lubá jarúmadun ligíbugiñe Búngiu, lídan jumá úaraguni júmagua.

10

Larúfudajan Jesúsu luágu ígiraguni
(Mt 19.1-12; Lc 16.18)

¹ Ába láfuridun Jesúsu Capernaúngiñe, ába lídin loúbawagun Judéa lúma luágun oúbaü le nígiñe lubeí láfuacha wéyu libíti dúna le Jordán. Ábaya jóundaragun gürígia le ní lubei, ábaya larúfudajan joun queíñaja ligáburi. ² Ábati jayábin jádaangiñe fariséogu luágun Jesúsu áluga jártügüdüni tídan jasáðaran láu jálügüdüni ánjein maríban lubeí lun lafánreinragun wügúri túma lúmari. ³ Ába laríñagun Jesúsu joun.

—¿Cá mejagi laríñagubei Moisés jun?

⁴ Ába jaríñagun lun.

—Aríñagati Moisés luágu gayára lan tíchugúniwa gárada lánina ígiraguni tun úmari.

⁵ Ába laríñagun Jesúsu joun.

—Líchugunbaalin Moisés gumádi líra jun ladúga tidére janígi. ⁶ Ánjein méja, dan le ladúgünbalin Búngiu sun cátei, “adúga lumútiña wügúri túma wúri”. ⁷ “Ligía lígirubei lubeí wügúri lúguchi túma lúguchu lun laganóuniwa túma lúmari, ⁸ ábame jeréðerun quei ábanrügü.” Mámaña lubeíti biáma, ábanrúgaaña. ⁹ Ligía moún lubei lafánreinraguni wügúri le ladúnraguagüdübei Búngiu.

¹⁰ Dan le múnada jamá, ábaya jálügüdüni dispulugun luágu cátei le, ¹¹ ába laríñagun Jesúsu joun.

—Le ígirutu lúmari, ába lagámaridun ámu, ladúgüña adultériu. ¹² Ánjein gríne tígira wúri túmari, ába tagámaridun ámu, tadúgüña gríne adultériu.

Labíniruniña Jesúsu irájüñü
(Mt 19.13-15; Lc 18.15-17)

¹³ Ába janáajan gürígia irájüñü lun Jesúsu lun lagúurun jawágu, ába jagúmeserun disípulugu adeñja joun ja anáajabaliña. ¹⁴ Dan le laríjini Jesúsu, magúndaati láu, ába laríñagun joun.

—Ígira jumá lun jayábin irájüñü númoun, mamájara jumá, ladúga ja jarúmabaña affíne quei irájüñü, jagía lílanabaña larúeijan Búngiu. ¹⁵ Ninárün jáu luágu le lan marúfudunti ában igáburi únabugubuti queísi ában irájü, siñábei lebélorun lídoun larúeijan Búngiu.

¹⁶ Ába lanúgüniña lújaburugu, ába labíniruniña láu lújabu jawágu.

Ladímurejan ában rísiti lúma Jesúsu
(Mt 19.16-30; Lc 18.18-30)

¹⁷ Dan le lasígirunbalin Jesúsu luweíyasun, ába liábin ában wügúri eíbaagueina lubároun, ába lájuduragun ligíbugiñe, ába lálügüdüni ftara.

—Maésturu buíti, ¿cásan cátei buíti lúnbei nadúgüni lun nibíjini ibágari le magúmucha-diti?

¹⁸ Ába laríñagun Jesúsu lun.

—¿Ca uágu baríñaga nun “buíti”? Ában rügúñein buíti, Búngiu. ¹⁹ Subúditi gumádi bun. “Maganouábá túma ában gámaritu ámu, máfarajabá, míwerujabá, madímurejabá iyéeni luágu ni ában, mayéeda báña gürígia, inébe jamá bagúbürigu bun.”

²⁰ Ába laríñagun wügúri ligía.

—Maésturu, gúnfulitina láu sun le lúmagiñe núraügidina.

²¹ Ába laríaguni Jesúsu láu ínsiñeni, ába laríñagun lun.

—Ában cátei mégeíbei lun badúgüni. beíba, alúgurabeí sun le búmabei, ábame bíchuguni lebégi joun gudémetiña, ábame bíbíjin írisini siélu. Ábame bagíribudun, ábame bafálarunina.

²² Dan le lagáambunbalin gürígia le cátei le, ába lírudagun, ába lídin láu íruni ladúga rísiti buídu. ²³ Ába laríjin Jesúsu geyégu jawágun sùngubei, ába laríñagun joun láni disípulugu.

—jénreenguti lun jebélurun rísitiña lídoun larúeijan Búngiu!

²⁴ Ába laweíridun janígi disípulugu láu le laríñagubei, ábaya laríñagun joun.

—Nirájüñü, jénreenguti lun jebélurun ja íchubalin jaffíne luágu jarísin lídoun larúeijan Búngiu! ²⁵ Méreenguntimaati lun ában caméyu lun lásügürün lídaangiñe lujúyun ában agúsa sügú láu lebélorun ában rísiti lídoun larúeijan Búngiu.

²⁶ Dan jagáambunbalin cátei le, ába laweíridun janígi, ába jálügüdagun jámagua.

—¿Cáteiti gayáraabei lasálbarun?

²⁷ Ába laríaguniña Jesúsu, ába laríñagun joun.

—Siñáti jasálbaragun gürígia jóungua, árjein Búngiu, gayáraati, ladúga úati ni cáta siñáti lun Búngiu.

²⁸ Ábati laríñagun Pédro.

—Wabúreme, wagía, ígira wamáalitia sún meja le wámabei lun wafálarunibu.

²⁹ Ába laríñagun Jesúsu.

—Ninárün jáu luágu furúmiegurügü lan le ígirutu lúban, o lamúlenu, o líbugañanu, o lítunu, o lúguchi, o lúguchu, o lirájüñü, o lufúlasun nueígiñe o lueígiñe lan ugánu le lánina asálbaruni, ³⁰ lerésibiruba san weíyaasu sügú láu guetó lídan ubou le. muna, amúlenu, íbugañanu, ítunu, úguchurunu, isáanigu, lúma fulásu, láu sun leíbaajóuniwa, resíbi ligíame íbágari magúmuchaditi siélu. ³¹ Sarágu jáña ja furúmiñetiñáña guetó, jagiaba agúmujóuni yágüta siélu, áni sarágu ja agúmujóuniña, jagiaba furúmiñetiña.

Ladímurejaanya Jesúsu luágu louñwen
(Mt 20.17-19; Lc 18.31-34)

³² Luáguñanu úma lun Jerusaléoun, Jesúsu jabá jabá láni disípulugu, láuñanu luweírín anígi, áni jíbiri güriégia ja afálarubaliña, láuñanu anúfudei. Ábayati ladíñurun Jesúsu jáu láni dúusu disípulugu jawéi jíbiri güriégia, ába lagúmeserun aríñagei le lúnbei lasúseredun lun joun. ³³ Ába laríñagun joun.

—Quei lubei jaríjini, luáguñadiwa úma lun Jerusaléoun, le ñíba lubei nedéregerúa, áu le Wügúri Garaúwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasiadirunina lun nouñwen. ³⁴ Ábame jedéregerunina joun ja mámabaña juríu lun jéjerajan náu, jabeíchubadina, jásuerahubadina, ábame jáfarunina jilágubei, luágume lúrtüwan wéyu, ábame násaarun lídaangiñe ouweni lúnya nabágaridun.

Jamúriajan Jacóbo lúma Juan ában fuleísei
(Mt 20.20-28)

³⁵ Ábati jayábin Jacóbo lúma Juan, ja lirájüñü Zebedéo, ába jaríñagun lun Jesúsu.

—Maésturu, buséntiwa lun badúgün ában fuleísei woun.

³⁶ Ábati laríñagun joun.

—¿Cági jabúseerubei lun nadúgün jun?

³⁷ Ába jaríñagun lun.

—Lun dánme lan barúeijan láu sun buweirigun, lun bañúuragüdüniwa, ában luegiñe bouñwenren, ában luegiñe bubaiña.

³⁸ Ába laríñagun Jesúsu joun.

—Ibidiñeti jun ca lan jamúriajabei. ¿Gayáraabei jawánduni luweírín igárigu le lúnbei nawánduni, gayára ligíame júaradun núma lídan nasúfurirun?

³⁹ Ába jóunabun.

—Gayára wabeí.

Ába laríñagun joun.

—Lúnti jawánduni igárigu le lúnbei nawánduni, úara jugúyame núma lídan nasúfurirun, ⁴⁰ ánjein lun janúurun ában luegiñe nouñwenren, ában luegiñe nubaúna, máma áu lúnbei níchuguni, líchugúba joun ja ubáabaña laráanserei Búngiu.

⁴¹ Dan le jagáambunbalin ja jíbiri dísi disípulugu, ába jagáñidun lúma Jacóbo láu Juan.

⁴² Ába lagúarun Jesúsu joun súngebui lubádun, ába laríñagun joun.

—Quei jasúbudirun, ja agúmadijabaña jádan ja mámabaña juríu, arúfudaguatiña jóun-gua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ⁴³ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ⁴⁴ Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri, ⁴⁵ ftara quei máma lan niábiña, áu le Wügúri Garaúwarügüti, lun nesériwidúniwa, niábiña lun nesériwidun lúma lun níchuguni nibágarí lebégime jasálbarun sarágu güriégia.

Lareídaguagüdüni Jesúsu Bartiméo, le maríjinbei
(Mt 20.29-34; Lc 18.35-43)

⁴⁶ Ábati jachúlürün Jericó. Dan le áfurideina lan Jesúsu lídaangiñe fulásu ligía jáu láni disípulugu jáma sarágu güriégia, ñíñein ában maríjinti gíríti Bartiméo, liraú Timéo, ñun láru úma amúriaja seínsu. ⁴⁷ Dan le lagáambunbei luágu yaráfaali lan Jesúsu le Nazaréta, ába lagúmeserun maríjinti ligía agúaraja.

—¡Jesúsu, ladúgawagun Davíd, gudémená bun!

⁴⁸ Sarágu jáña adeínjatiña lun lun lámánichun, ligíatima lagúaragun.

—¡Ladúgawagun Davíd, gudémená bun!

⁴⁹ Ába leréderagun Jesúsu, ába laríñagun.

—Wájuma lun lun liábin nun.

Ába jagúarun lun marjinti ligía, ába jaríñagun lun.

—Ragúba gurásu, sarába, lagúajaña bun.

⁵⁰ Ába lachúürunun labíte, ába ladúgün ában chubaú, ába layárafadun lun Jesúsu. ⁵¹ Ába lálügüdüni Jesúsu.

—¿Ca babúseerubei nadúgün bun?

Ába loúnabun marjinti ligía.

—Maésturu, buséntina narjín.

⁵² Ába laríñagun Jesúsu lun.

—Gayáraati bídin, areídaguaadibu ladúga affíneedibu nuágu.

Lídan óra ligía, ába gayára lan larjín marjinti ligía, ába lídin lárigi Jesúsu.

11

Lebélorun Jesúsu Jerusaléoun

(Mt 21.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachúlürün ligíbugiñe fulásu buri le Betfajé lúma Betánia, le únabubei libíti wúbü le Olívos, ába laríñagun Jesúsu joun bíama jádaangiñe láni disípulugu.

² —Jeíba lídan liraúrai fulásu le wagíbugiñebei, dánme le jachúlürün ñi, jadáriruba ában burígü güaráñu le maweinjóungili ni ában weíyaasu. Jafáragadeíme, ábame janúgüni ñájoun. ³ Anjaün álügüdüwa ca lan uágu jadúgei le, jaríñagame lun luágu busén láni Jesúsu, luágu láguuyügüdübei lan furése.

⁴ Ába jóúdin, ába jadáriruni burígü ligía güaráñu lubádu ában béna, bougudi lídan úma, ába jafáragaduni. ⁵ Ába jaríñagun jádaangiñe ja ñibaña úmadarugu joun.

—¿Ca jadúgübei? ¿Cáme jafáragadei burígü le?

⁶ Ába jóúnabuniña quei laríñaguni Jesúsu joun, ába jígiruniña lun jóúdin láu. ⁷ Ába janúgüni burígü lun Jesúsu, ába jíchugunun jabíte luágu burígü ligía, ába laweínruni Jesúsu. ⁸ Sarágu jáña átulerutu jabíte luágu úma, jíbiri, ába jánchujan tilímun wéwe, ába jachágajani luágu úma lubá lásügürün Jesúsu ligíbuagugiñe.

⁹ Ja ubáraübaña jáma ja árigibaña, ába jagúmeserun agúaraja.

¡Glória! ¡Biníwati wügüri le ñúbinbei lídan líri Wabúreme Búngiu!

¹⁰ Biníwati arúejiani le ñúbinbei, le lúnbei ítara lan queísi meja larúejian wáguchi Davíd.

¡Uweíriguni lun Búngiu lídan líñun-ágei siélu!

¹¹ Lárigiñe, ába lebélorun Jesúsu Jerusaléoun, belú ligía témpulurugun, lárigiñe larjini sun cátei, ába lídin Betánia jáu dúusu disípulugu ladúga dáríjali lan.

Líñaraguni Jesúsu tídibu ígo to múnboun

(Mt 21.18-19)

¹² Larúgan, dan le jáfuridunbei Betániagiñe, ába lalámachun Jesúsu. ¹³ Dísegiñe, ába larjín ában tídibu ígo gabánatu. Ába lídin arja ánjein gin tubeí, ubánaü rügüñein ladárrira tuágu ladúga mámagili lan tidáani ígo. ¹⁴ Ábati laríñagun Jesúsu lun tídibu ígo ligía.

—Magíndadügüyabá.

Ába jagáambuni láni disípulugu.

Larúmadagüdüinun Jesúsu témpulu

(Mt 21.12-17; Lc 19.45-48; Jn 2.13-22)

¹⁵ Lárigiñe, ába jachúlürün Jerusaléoun, ába lebélorun Jesúsu témpulurugun, ába laságajaniña ja alúgurajabaña jáma ja agáñijabaña ñi. Ába lagárabajani jadábulan ja asáansijabaña seínsu joun gürgia lúma jála ja alúgurajabaña únjun. ¹⁶ Mígirun lumútu témpulu lun úmame. ¹⁷ Ába laríñagun lídan larúfudajan joun.

—Lariñajare Búngiu tídan líburu to Lerérun. “Núban, fulásu le ñí lubei gayára lan jayúmuragun sun gürígia nun, ánjein jugúya, barú jumaaru quei jában jíwerutiña.”

¹⁸ Ába jagáambun jábutigu fádirigu jáma arúfudajatiña lilúrudun Moisés luágu le lariñagubei, ába jagúmeserun áluaja ída lúba lan jáfaruni jilágubei, ladúga janúfudetiña luei, quei sun lan gürígia weíríti janígi luágu le larúfudajabei. ¹⁹ Dan le lagúñedunbei, ába láfuridun Jesúsu fulásurugugiñe.

Tídibu ígo to ásaurúboun

(Mt 21.20-22)

²⁰ Larúgan bináafin, sügúti Jesúsu jáma láni dúusu disípulugu lueígiñe méme úma ligía, ába jarjirinun tídibu ígo saúja lúmagiñe tflagúle. ²¹ Ába larítagni Pédro, ába lariñagun lun Jesúsu.

—Maésturu, jarjábá tun tídibu ígo to bíñaraguboun gúñaarú, saúja!

²² Ába lariñagun Jesúsu joun súnigubei.

—Afíñe jumá luágu Búngiu. ²³ Ninárün jáu luágu furúmieguarügü lan le aríñaguti lun wúbü le. “Gidába yágiñe, dabúba baránajoun”, ánjein úa lubei liloúguan affíeni tídan lanígi áni affíne ligía luágu lagúnfuliruba lan le lariñagubei, ítara lúba. ²⁴ Ligía naríñagunbei jun luágu sun lan le jamúriajan lúma Búngiu, ánjein affíne jubei luágu resíbi jumáali lan, ítara lúba. ²⁵ Dan le jayúmuraguña lan lun Búngiu, ánjein níjein lubei ladúga ában gürígia jun le mísiñeti jun, ferúduna jumei lun gíñe ferúduna lánün Júguchi Búngiu le siélubei. ²⁶ Ánjein úa ferúduna jumá, úabei gíñe ferúduna láani Júguchi Búngiu le siélubei jíffigoun.

Lugúmadin Jesúsu

(Mt 21.23-27; Lc 20.1-8)

²⁷ Ába jagríbudun Jerusaléoun. Dan le eíbugeina lubei Jesúsu témpulurugu, ába jayábin jábutigu fádirigu, arúfudajatiña lilúrudun Moisés, jáma ámu wügúriña ja weírígutiña lídan jafíñen jurú, ²⁸ ába jálügüdüni.

—¿Cáteisan biríchabei lun bádaragun búngua lídoun cátei le tánina témpulu? ¿Ca íchugubalin ubáfu le bun?

²⁹ Ába loúnabuniña Jesúsu, aríñageina ligía joun.

—Nálügüdaadün gíñe ában cátei, ánjana jóunaba, naríñagubei jun ca lan áu gumádi nadúgei buri cátei le. ³⁰ ¿Ca óunajabalin Juan abásteragüdaja? ¿Búngiu, ódi wügúriña?

³¹ Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óunajabalin, lariñaguba woun ca lan uágu maffínerun wabei lun Juan. ³² ¿Ódi waríñaguba funági luágu jóunajan lan wügúriña?

Lun jamúga jóunabun ítara, janúfudetiña jawei gürígia, ladúga subúdi jamáni sun gürígia luágu proféta lán Juan. ³³ Ábati jaríñagun lun Jesúsu.

—Íbidiñeti woun.

Ábati gíñe lariñagun Jesúsu.

—Maríñagun nubei gíñe jun ca lan áu gumádi nadúgei cátei le.

12

Jémpulu jawáguti ñadágimeintiña wuríbatíña

(Mt 21.33-46; Lc 20.9-19)

¹ Ábati lagúmeserun Jesúsu adímureja joun gürígia ja ñíbaña láu jémpulu, ába lariñagun joun.

—Ñíñein meja ában wügúri, ábunaguti tídibu beíbei lufúlasunrugu. Ába ladúgün baríeru láu, adúga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

Ába lájayajani lichári joun ñadágimeintiña, ába lídin adúga weíyaasu. ² Dan le lachúlürünbei dan lun alúbajani, ába loúnajan ában lumúsun amúriajei lufánran jámagiñe

ñadágimeintiña. ³ Ábarüga járugüdüni músu ligía, ába jabúleiseiruni, ába jóunajani lárigoún, míchutiña ni cáta lun. ⁴ Ábaya loúnajan labúreme ichári ábanya músu, ába jíchaagun dúbü luágu, bougua jameí lábulugu, anába. ⁵ Ábaya loúnajan labúreme ichári ábanya, ába jáfaruni jilágubei. Lárigiñe, ába loúnajan sarágu, ában lárigi ában, buleisei jamáña jíbiri, áfaragua jíbiri jilágubei.

⁶ Níjeinguati ában lun loúnajani, ában liraú jínsiñeti lun buídu, lagúmujoún óra ába loúnajani, ába larítagnun luágu inébebei lan joun ladúga liraú lan. ⁷ Ába jaríñagnun ñadágimeintiña jámagua. “Niján le lúnbei libjini alágan, wáfaraali jilágubei, wagía lámuga labúriña sun cátei.” ⁸ Ábati járugüdüni, ába jáfaruni jilágubei, ába jaságaruni lúgubu lídaangiñe fulásu ligía.

⁹ Ábati lálügüdajan Jesúsu.

—¿Cábatí ladúga labúreme ichári? Liábinme, ábame láfaraguniña ñadágimeintiña jilágubei, ábame líchuguni ichári joun ámu.

¹⁰ ¿Malíjan jumágilisan le taríñagubei Lerérun Búngiu nuágu? Taríñajare.

Lé meja dúbü le mabúseerun jabeí ábunagutiña, ligíaali furúmiñeti.

¹¹ Wabúreme Búngiu adúgübalin lun furúmiñetibeí lan, áni aríja wamúti quei ában cátei weiriguti.

¹² Ába jabúseerún yebe jadáürüni Jesúsu ladúga jasúbudiruni luágu jawágu lan layúsuri jémpulu le. Quei janáfudebei jawei güriá, ába jígiruni lúngua, ába jóúdin.

Luáguti lafáyeijoún seínsu lun gumádi

(Mt 22.15-22; Lc 20.20-26)

¹³ Lárigiñe, ába jóunajóuniwa jádaangiñe fariséogu jáma jádaangiñe lánigu Heródes lámoun Jesúsu lun jaríñagnüdüni som cátei le lúnti gayára lan jíchuguni lidúnrunme.

¹⁴ Ába joyábin, ába jaríñagnun lun.

—Maésturu, subúdi woun luágu aríñaga báani inárüni, manáfudeiga luéí ni ában ladúga ni cáta lan luweirigun güriá bun, áni barúfudajani lémeri Búngiu láu inárüni. Áríñagabá ában cátei woun. ¿Buitisan lun lafáyeijoún seínsu lun warúeite le Rómána ódi mabuíduntí?

¹⁵ Subúdi lumúti Jesúsu luágu biánguañein lan jagíbu, ába laríñagnun joun.

—¿Cámesan jíchaajan sádara nubá? Barújuma ában lídaangiñe seínsu ligía nun, aríja námugei.

¹⁶ Ába janúgüni lun. Dan le laríjini, ába lálügüdüniña.

—¿Cági iyáwa lúma íri le luágubei?

Ába jaríñagnun lun.

—Láni urúei Rómána.

¹⁷ Ába laríñagnun joun.

—Rújumeiti láni urúei lun urúei, rújumeime láni Búngiu lun Búngiu.

Ába laweíridun janígi láu ligáburi loúnabuniña.

Álügüdajani libúgürü ásaaruni lídaangiñe óuweni

(Mt 22.23-33; Lc 20.27-40)

¹⁸ Ába jóúdin fiú saduséogu aríjei Jesúsu. Afíñetiña saduséogu luágu úa lan ásaaruni lídaangiñe óuweni. Ába lubeíti jaríñagnun lun.

¹⁹ —Maésturu, aríñagatí meja Moisés luágu ánjein lan óuwe ában wügürí le maréiti masáaniguga táu lúmari, lúnti lan lamárieidun lamúlen túma wúri to uefboun loúwe, lun gasáanigu lan táu lun líbugaña le óuwebei. ²⁰ Níñanu mejati sédü gamúlenuguatiña, le furúmiñeti, ába lamárieidun, ába loúnwen marájüñüga. ²¹ Le jabíaman, ába lamárieidun túma wúri tó buga lúmari líbugaña, ába gíñe loúnwen marájüñütiña, ligía méme asúsereda lúma le júriwan. ²² Maréitiña sédügubei jagía túma, úati ni ában garaúti táu. Lagúmujoún

óra, ába gíñe tóunwen wúri tugúya. ²³ Niján le uágubei wálügüdaja. Dánme le jásaarun jiláaña lídaangiñe ouweni lúnya gabágari jamá, ¿cábagi úmari wúri tugúya jádaangiñe sédú gamúlenuguátiña ja, lárigiñe maríei jamá sun jagía túma?

²⁴ Ába laríñagun Jesúsu joun.

—Bulfeiguatün ladúga libídiñe tuáguti Lerérun Búngiu jun, ni luáguti lubáfu Búngiu.

²⁵ Dánme le jásaarun jiláaña lúnya jabágaridun, ámujalime jabágari, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu.

²⁶ Ánjeinti luágu sará jamá jiláaña lúnya jabágaridun, ¿malíjan jumágiru lilíburun Moisés luágu ladímurejan Búngiu lun lídaangiñe ában búbugati durúngu umúti? Laríñajare lun. “Áu Lubúngiutebei Abrahám, Lubúngiute Isáac, Lubúngiute Jacób.” ²⁷ Ítara líña lubefti, ánjein jamúgati jiláañu jáña wügúriña jagía lun sun dan, maríñagunti jamúga Búngiu luágu Jabúngiute lan, ladúga máma Jabúngiute jiláguaaña Búngiu, Jabúngiute wínwangiña. Ítara líña lubefti, jugúya weíríti jabúlieidágun.

Gumádi le weírigutimaabei

(Mt 22.34-40)

²⁸ Níñein ában jádaangiñe arúfudajatiña lilúrudun Moisés le agáambubalin jadímurejan, quefti subúdi láani luágu oúnaba lániña Jesúsu buídu, ába liábin lubároun, ába lálügüdüni.

—¿Cáteisán lídaangiñe lilúrudun Búngiu weírigutimaabei?

²⁹ Ába laríñagun Jesúsu lun.

—Niján le weírigutimaabei. “Agáamba jumána, jugúya Israelítagu, Wabúreme Búngiu, ligía rügúñein Abúremein. ³⁰ Jínsiñelá lubefti Babúreme Búngiu bun táu sun banígi, táu sun buwáni, láu sun bisáminan, láu sun bére.” Ligía gumádi le weírigutimaabei, ³¹ áni le libíaman lídan uweíriguni lenége le furúmiñeti. “Jínsiñe jamá bíbirigu bun quei bínsiñegua búngua.” Úati ámu gumádi weíriguti lueí bíama le.

³² Ába laríñagun arúfudajati ligía lun.

—Bufti baríñaguni, maésturu. Binárün luágu ában rügúñein lan Búngiu, luágu úa lan ámu, ³³ áni lúnti jínsiñe lan Búngiu woun táu sun wanígi, láu sun wasáminan, táu sun wawáni, láu sun wére, lun gíñe jínsiñe jamá wíbirigu woun queísi wínsiñegua woungua. Gebégiti sun líra ligíbugiñe sügú láu sun wadágaragüdüni lun lúma sun cátei le agudúbei luágu latárü.

³⁴ Dánti le lagáambun Jesúsu loúnabun láu lichú áu, ába laríñagun lun.

—Madíseedibu lueí lílana ban larúeijan Búngiu.

Manígijaña lun jálügüdajan.

¿Ca adúgawagun Crístu?

(Mt 22.41-46; Lc 20.41-44)

³⁵ Larúfudajaña Jesúsu témpulurugu, laríñaga.

—¿Ída liñásan jaríñagunbei arúfudajatiña lilúrudun Moisés luágu ladúgawagun lan Davíd Crístu? ³⁶ Davíd guánarügü láu lubáfu Sífiri Sándu aríñagati ítara.

Laríñajare Abúremein lun Nabúreme.

“Nurúba núma lueígiñe nóunwenren daríme níchuguniña báganiñu bújaburugun.”

³⁷ ¿Ída lubáti ladúgawagun lan Davíd Crístu ánjein wa lubálin Davíd guánarü Crístu, “Nabúreme”?

Ába jagáambuni búribünu gürígia jagía láu ugúndani.

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Lc 11.37-54, 20.45-47)

³⁸ Ábaja laríñagun Jesúsu joun lídan larúfudajan.

—Tóunigi jumátia jawéi arúfudajatiña lilúrudun Moisés, jínsiñeti joun lun jeíbugun táu anáanguni durúrutu lúma lun labúsúrúniwa joun úmada láu sarágu inébesei. ³⁹ Áluaja

jamúti jalaú le jála wefrigutiña tídan jalgílisin juríu, lúma lubuídun-ágei ubáraü lídan efgini. ⁴⁰ Gídá jamutu jában würiña ja jiláaña úmari jawef, lúnti jadáuragun láu sun líra, ába jadúgün afúrieiduni le migínaguti. Wefríbei jasúfurirun luágu sun le jadúgübei.

Tedéweejan fugiábu würi to jiláali túmari, lun Búngiu
(Lc 21.1-4)

⁴¹ Luágu ában wéyu, ñun líña Jesúsu témpulurugu tigfbugiñe gáfu to lágei seínsu, aríaguei jíchaajan gürígia seínsu tídown. Gíbetiña rísitiña íchugutiña sarágu seínsu. ⁴² Ligía tiábin ában fugiábu würi to jiláali túmari, ába tíchugun bián gáwanün tídown gáfu tugúya. ⁴³ Ába lagúarun Jesúsu joun láni disípulugu lubádun, ába laríñagun joun.

—Ninárün jáu luágu gíbetima lan tíchugun würi to sügú jáu sun ja íchugubaña seínsu tídown gáfu to, ⁴⁴ ladúga sun jagía, lídaangiñe le ígiragubei jáma jíchiga, ánjoun tugúya, láu tugúdemegun rütumuti sun lé túmabei lun tawínwandun.

13

Laríñagun Jesúsu luágu tagúnrinchawagúba lan témpulu
(Mt 24.1-2; Lc 21.5-6)

¹ Dan le láfuriduña lan Jesúsu témpulurugugiñe, ába laríñagun ában jádaangiñe láni disípulugu lun.

—jMaésturu, aríjabá tun tubuídun watémpulun lúma buri dúbü le áubei tadügúwal jMáma tanárime buri!

² Ába loúnabuni Jesúsu.

—jAriágu jíña tun tanárime témpulu to? Merédebeítia ni ában dúbü ligíbuagu ában, lagúnrinchaguba sun le.

Seíni buri lubáragiñe lagúmuchun ubouí
(Mt 24.3-28; Lc 21.7-24, 17.22-24)

³ Ábati jóudin luágu wúbü le giríbei Olívos le tigfbugiñebei témpulu. Dánti le ñun líña lan Jesúsu ñi, ába jayábin Pédro, Jacóbo, Juan lúma Andrés, ába jaríñagun lun, jagíaguarügüi.

⁴ —Buséntiwa lun bariñaguni woun ídame lan lasúsereda sun le tun témpulu to. jCábasan seíni luágu chülújali lan dan lun lagúnfulirun sún buri cáte le?

⁵ Ába laríñagun Jesúsu joun.

—Toúnigi jumá, mayéedagualaún ni ában, ⁶ ladúga sarágujaba ñúbintiña, jaríñagame. “Áu Crístubei”, áni sarágujaba jayéedun.

⁷ ‘Jugúya, dánme le jagáambuni lamúri wuríbu yaráfa jun lúma ugánu luágtí buri wuríbu díseti jueí, manúfudedagua jumá, ladúga ñíbei wuríbu súnwandan, mámagili lagúmuchun ubouí líra. ⁸ Lageíndaguba ában fulásu lúma ában, awúrībuja ligíame ában ageíraü lúma ámu. Ñíbei jarabaganáli lídan sarágu fulásu, ilámaü, chagáguauí, áni súnme buri cáte le, lagúmesejarügügilime le lúnbei lasúfurirúniwa.

⁹ ‘Toúnigigua jumá júngua ladúga jedéregerúaba lun lúrudu, ábame jabúleiseirunün tídan buri jalgílisin juríu, janügúba lun jagúseragüdúniwa jagíbugiñe gumádimatiña lúma jagíbugiñe urúeigu, nueígiñe, ítara lúba gayára lan jadímurejan nuágu, jagíbugiñe. ¹⁰ Lubáragiñe lagúmuchun ubouí, lapúrichijouba ugánu luágti asálbaruni lídan sun fulásu. ¹¹ Dánmeti le janügúniwa lun jedéregerúniwa joun lúrudugu, magíbedalá jarítagnun luágu cába lan jaríñaga, masáminaragubei jumeí. Aríñaga jumeí le laríñagun Búngiu jun lídan óra ligía, ladúga mámaba jugúya adímureja, Sífiri Sándu, ligíaba adímureja. ¹² Jedéregerubaña wügúriña jamúlenu jáma jábugaña lun jáfarúniwa jilágubei, deréga jamáñame agúbürigu jasáanigu, jagáraabaguba isáanigu jawágun jagúbürigu lun jedéregerúniwa lun jáfaruniwa jilágubei. ¹³ Jiyéreeguduba lun sun ubouí nueígiñe, le asígiruti úragu darí lúmoun lagúmujouñ, lasálbaruba.

¹⁴ ‘Abúrrijati proféta Daniél luágu cátei iyéereguti le gagúnrinchaguagüdadabei, dánme le jarjini cátei ligía le ñí lubei moun lan lun ñi lan —le alíjabei, gunfaráandalá —jámetia Judéabaña, lúntimétia janúrajan luágun wúbü. ¹⁵ Le güriǵia le bougudíbei, mebelúra látia múnadoun aságara ni cáta, ¹⁶ le áraabubei, magríbuda alá águyu ni anúgoun lanáangun. ¹⁷ Fugíábugume wúrriña ja dageinátiña lídoun wéyu ligía jáma ja garájüñütiña ja guráǵiña. ¹⁸ Amúriaja jumá luma Búngiu lun máma lan lídan lidáani lidíliga jeíbaagua, ¹⁹ ladúga lidáanibeí asúfuriruni quei le masúseredungili lúmagiñe ladúǵüni Búngiu ubou, masúseredundüǵüyaalime giñe lárigiñe. ²⁰ Ánjein jamúga madúraagun lánme Jabúreme Búngiu dan ligía, úabei jamúga ni ában eséfuruti, ladúraagubei luágu jínsiñe lánigu lun, ja anúadaja láañabaña.

²¹ ‘Ánjeinti aríñawagua jun. “Aríja jumá, niján Crístubei”, o “Nirán”, mafiñera jumá, ²² ladúga jayábiba eyéejatiña aríñaga jawouguá luágu Crístu lan jagía, jíbiri, aríñaga jagíame luágu profétagu jamá, áni jayéeni. Jadúǵüba seíni luma miláguru lun jayéedaguniña ásta ja anúadaja láañabaña Búngiu ánjein gayára. ²³ Aráanseñu jumá, rúnaadün luágun jugúdi.

Ída lúba lan ligáburí lagríbudun Crístu ubouágun

(Mt 24.29-35, 42-44; Lc 21.25-36)

²⁴ ‘Lídounme wéyu ligía, lárigiñeme dan ligía le lánina asúfuriruni, ábame labúrigadun wéyu, marúnidunjalime játi. ²⁵ Jeíguaduba warúguma siélugiñe, ábame ladádagarun sun siélu. ²⁶ Ábame naríjiniwa, áu le Wügúri Garaúwaríǵüti, niábin lídan juánriñu láu ouñwenbun ubáfu luma uweíriguni, ²⁷ ábame nouñajaniña ánjeligu ouñdaraña sun ja nanúadajabaña lídaangiñe gádürü larígei ubou, lúmagiñe lidíse-ágei ubou darí lúmoun lidíse-ágei siélu.

²⁸ ‘Gunfaráanda jumeí jémpulu le tuáguti tídi bu ígo. Dan le ñulúgüli tilímun, ába labouçhun tubána, subúdi jumúti luágu níteeli lan lidáani lubáchouga. ²⁹ Ítara meme, dánme giñe jarjini sún buri cátei le, subúdi jumeí luágu yaráfaali lan niábin. ³⁰ Ninárün jáu, luágu lagúnrinchaguába lan sun ubúrugu le Jerusalén lubáragiñe jóuwegun güriǵia ja lánina dan le. ³¹ Lagúmuchaguba siélu luma ubou, ánjein nerérun, merédebei magúnfulirunga.

³² ‘Ánjeinti wéyu luma óra le lúnbei lasúseredun sun cátei le, ibídiñeti ni ca un, ni joun láni Búngiu ánjeligu ja siélubaña, ni lun Liraú, Búngiu rügüñein le Úguchili asúbudirei.

³³ Lúnti lubeíti agágudúañu jumá, aríaja, ayúmuragua lun Búngiu, ladúga ibídiñeti jun ídame lan lachúlúra óra ligía. ³⁴ Ítara lúba quei ában wügúri le ñúñünbei luágu ában weíyaasu díse, lubáragiñe láfuridun lúbiniñegiñe, ába líchuguni sun cátei jájaburugun lumúsuníña áni ru ligía jawádigimari, aríñaga ligía lun le luágubei béna lun loúnigirun.

³⁵ Áu queísi tabúreme muna tugúya, furésebei nagríbudun. Agágudúañu jumá lubeíti, ladúga ibídiñeti jun cába lan óra nachúlúra, ánjein gúnñunba lubeí lúmoun áriebuba lan, o lubá lan larúgan o bináfin lan, ³⁶ ñúñüñüñü ñíñein sódini, ábame nadárirunün arúmuga. ³⁷ Le naríñagubei jun aríñaga numúti joun súnagubei. Agágudúañu jumá.

14

Lalédawagúniwa lubá Jesúsü

(Mt 26.1-5; Lc 22.1-2; Jn 11.45-53)

¹ Bián rügáli wéyu lubá fédu le arítaguǵülei luágu meja dan le lásüǵürünbei láni Búngiu ánjeli áfaraguáña jarájüñü Ejiptona, máfarawaguntiña jarájüñü Israelítagu, lidáani giñe fédu le ñí lubei teigúa fein to magánatu ísi. Ábanti jáluajan jábutigu fádirigu jáma arúfudajatiña lilúrudun Moisés ída lúba lan jarügüdüni Jesúsü láu eyéerawaguni lun jáfaruni jilágubei. ² Ába jaríñagun.

—Márügüda wameí fédurugu lueí jafúudun güriǵia.

Tájurudaguni ában wúri Jesúsu
(Mt 26.6-13; Jn 12.1-8)

³ Betániaifein Jesúsu lúbiñe Simón lé meja gawágubei gumeín luágu lúra, dánti le ñun líña lan luágu dábula, ába tiábin ában wúri láu ában budeín buin láu ibíñei le jémeti, le séruti. Ába tájalachuni ligína budeín, ába téseruni ibíñei lábulugun Jesúsu. ⁴ Ába jagáñidun jádaangiñe ja ñibaña, ába jaríñagun jámagua.

—¿Cámesan leferidirúa ibíñei jémeti le? ⁵ Gayáraati jamúgagu lalúgurun luágu sügú láu lebégi ában irúmu wadágimanu, lun jíderawagún gudémetiña.

Ába jébechunun, ⁶ ába laríñagun Jesúsu.

—Ígira jumouñ. ¿Ca uágu jañawurija tun? Ában cátei buíti le tadúgübei nun. ⁷ Súnwandan ñibaña lan gudémetiña júma lun jíderaguniña dan le jabúseerun, ánjein áu, mámaba súnwandan júma nan. ⁸ Adúga táali wúri to le tiáraabei, jurúguaarú ibíñei luágu núgubu lubá nábulanajouñ, ⁹ áni ninárün jáu luágu lídan lan furúmieguarügü fulásu lídan sun ubou le ñí lumuti lapúrichijouá ugánu le lánina asálbaruni labájüdawagúba gíñe le tadúgübei wúri to lun jarítangun tuágu.

Lalúguruni Júdas Jesúsu
(Mt 26.14-16; Lc 22.3-6)

¹⁰ Ábati lídin Júdas Iscarióte, le ában jádaangiñe dúusu láni Jesúsu disípulugu, adímureja jáma jábutigu fádirigu lun ladúgün darádu jáma lun ledéregeruni Jesúsu joun. ¹¹ Dan le jagáambubalin, ába jagúndaaragun, ába jaríñagun lun luágu jíchuguba lan seínsu lun. Ába lagúmeserun Júdas áluaja ida lúba lan ledéregeruni Jesúsu joun.

Lagúmujouñ leigin Jesúsu jáma lánigu
(Mt 26.17-29; Lc 22.7-23; Jn 13.21-30, 1 Co 11.23-26)

¹² Le furúmiñeti wéyu lídan fédu le ñí lubei teigúa fein to magánatu ísi, luwéyuri lafarún mudún le lánina fédu le páscua, ába jalügüdüni disípulugu Jesúsu.

—¿Jalíagi babúseera lun wouñin aráansera wabárua lun weígini eígini le lánina fédu?

¹³ Ába louñajan bíama jádaangiñe láni disípulugu, ába laríñagun joun lubáragiñe jouñin.

—Jeíba ubúrugu, jadúnraguba lúma ában wügúri ñi táu ában dináa láu dúna, ¹⁴ jídinme lárigi le ñijin lumúti lebélura, ábame jaríñagun lun tabúreme múna. “Ítara líña maésturu, ¿jagoún nege rúmu to lúnboun ñi lan leígei eígini le lánina fédu jáu láni disípulugu?”

¹⁵ Ábame larúfudun ában rúmu weíritu jun, tougiñegua múna, to aráanseñu tíña, ábameti jaráanseruni eígini woun ñi.

¹⁶ Ába jáfuridun disípulugu, ába jachúlürün ubúrugu, ába jadáriruni sùngubei quei laríñaguni Jesúsu joun, ába jaráanseruni eígini lánina fédu ñi.

¹⁷ Dan le lagúñedunbei, ába lachúlürün Jesúsu jáu dúusu disípulugu. ¹⁸ Dánti le luágu jamá dábula eíga, ába laríñagun joun.

—Ninárün jáu luágu lalúgurubadina lan ában jídaangiñe le eígibeí núma.

¹⁹ Ábati jajírudagun, ába jagúmeserun álügüdaguei ában ában.

—¿Áu funásan?

²⁰ Ába laríñagun Jesúsu joun.

—Ában jídaangiñe jugúya dúusu le éderutu leígan fein lídan asíedu. ²¹ Anángüraadina lubeiti, áu le Wügúri Garaúwarügüti, luágu úma le uágubei taríñaga Lerérun Búngiu, áni ¿fugiábutia wügúri le alúgurutina! Buítimaati jamúga lun wügúri ligía lun magúria-jouñiwa lan.

²² Dan le añája lubeí eíga, ába lanúgünun Jesúsu jeígan fein lújaburugu, ába leteíngiruni Búngiu tuágu, lárigiñe lagúbachagunun ába líchugunun joun, ába laríñagun joun.

—Jouñuma, núgubu le.

²³ Lárigiñe, ába lanúgün ában wéru táu diweín lújaburugu, lárigiñe leteíngiruni Búngiu tuágu, ába líchugunun joun, ába játun sun jagía tídaangiñe diweín tugúya. ²⁴ Ába laríñagun joun.

—Níta le, le añúuragüdübalin iséri darádu, le gñe áwiyurúabei joun sarágu gürígia lun ferúdunawa lan jafígoun. ²⁵ Ninárün jáu luágu mátundügüyaadina lan diweín daríme wéyu le lúnbei nátunun iséri tuwúyeri diweín lídan larúeijan Búngiu siélu.

Laríñaguni Jesúsu luágu leyéedaguba lan Pédro láu
(Mt 26.30-35; Lc 22.31-34; Jn 13.36-38)

²⁶ Lásun jerémujani urému luágu Búngiu, ába jóudin luágun wúbü le gíríbei Olfivos. ²⁷ Ábati laríñagun Jesúsu joun.

—Sun jugúya janúrajaba, ígira jumáname áriebu le, ladúga taríñajare Lerérun Búngiu. “Náfarubei jóuniri mudún jilágubei, ábame jeréderun mudún chagágu.” ²⁸ Lárigiñeme násaarun lídaangiñe ouweni lúnnya nabágaridun, nídiba Galiléa jubáragiñe.

²⁹ Ábati laríñagun Pédro lun.

—Gayáraati jígirunibu sun ja, nugúya, mígirun nubádibu.

³⁰ Ába laríñagun Jesúsu lun.

—Ninárün báu, áriebu meme le, lubáragiñe layúgurujan gáyu bián weíyaasu, úrüwaal-ime weíyaasu baríñagun luágu ibídiñe nan bun.

³¹ Ába laríñagun.

—Ni ánjein lun lubéi nouñwen búma, maríñagubadina luágu ibídiñe ban nun.

Ligía méme gñe jaríñaga súngebei.

Layúmuragun Jesúsu lun Búngiu, Getsemaní
(Mt 26.36-46; Lc 22.39-46)

³² Ábati jachúlürün lídoun ában fulásu gíríti Getsemaní, ába laríñagun Jesúsu joun lání dispulugu,

—Ñurújuma ya, neibuga ayúmuragua lun Búngiu.

³³ Ába lanúgüniña Pédro, Jacóbo, lúma Juan lúmagua. Ába ladíjeridun larítagun buídu, sandí ligía ában igárigu weíríti tídan lanígi. ³⁴ Ába laríñagun.

—Sandítina ában íruni weíríti le lánina ouweni tídan nuwáni. Reídei jumá ya, áni agágudúañu jumá.

³⁵ Ábati lídin Jesúsu lubáruaguouñ mémeraü, ába labúluchagun múarugun, ába lamúri-ajan lúma Búngiu ánjein gayára lubéi masúfurirun láani le lúnbei lasúseredun lun lídan óra ligía. ³⁶ Ába laríñagun lídan layúmuragun.

—Núguchi, gayára bumúti sun cátei, séfu bána luei nasúfuriruni cátei le, máma quei nabúseerun, quei babúseerun.

³⁷ Ába lídin, ába ladáriruniña dispulugu arúmuga, ába laríñagun lun Pédro.

—Simón, ¿barúmuguñañan? ¿Siñátísan buga beréderun ni ában óra agágudúañu?

³⁸ Agágudúañu jumá, ayúmuragua jugúyame luei jeíguadun lídoun ínchajoúni lun je-féridiruni jafíñen nuágu. Inárüni luágu benéfa lan jáni espíritu lun le buídubei, ánjein júgubu, débiliti.

³⁹ Ábaya lídin ayúmuragua lun Búngiu, aríñageinaléi méme dimúrei le laríñagubei furúmiñe. ⁴⁰ Dánya lagíribudun, ábaya ladáriruniña arúmuga ladúga luweírin lídábu jágu. Ibídiñetiti joun cába lan jóunabagüle lun. ⁴¹ Ábaya lídin lúruwan weíyaasu, ába laríñagun joun.

—¿Jarúmuguña mémesan, eméraagua jugúya? Buídürügaali, chülúja óra lun nedéregerúniwa, áu le Wügúri Garaúwarúgüti, jájaburugun gafígountiña. ⁴² Sarájuma, queímoun, níteeli le lúnbei ledéregerunina.

Janúgüni Jesúsu adáüra
(Mt 26.47-56; Lc 22.47-53; Jn 18.2-11)

⁴³ Nígili Jesúsu adímureja, ligía lachúlürün Júdas, le ában jádaangiñe dúusu disípulugu, liábin jáu sarágu mútu táu efeín lúma wéwe. Jounajan jábutigu fádorigu, arúfudajatiña lilúrudun Moisés, jáma ámu wügúriña weírigutiña lídan jaffñen juríu. ⁴⁴ Aríñagalíti buga Júdas joun ítara.

—Le wügúri le nachúurun, ligía, ábame járügüdüni, ábame janúgüni, jounigireime buídu.

⁴⁵ Ítara líña lubefti, dan le lachúlürünbei, ába layárafadun Júdas lun Jesúsu, ába laríñagun lun.

—Maésturu.

Ába lachúurun. ⁴⁶ Ábati járügüdüni Jesúsu, ába janúgüni adaüríwa.

⁴⁷ Níñein ában jádaangiñe ja ñibaña, ába láluguchunun lefeínte, ába líbuguni ában larígei lumusun fádori le ínutimaabei. ⁴⁸ Ábati laríñagun Jesúsu joun mútu jagía.

—¿Jiábin táu efeín lúma wéwe lun janúgünina adáúra, camá jamuga jíwerutina?

⁴⁹ Ságüñaja wéyu júma nan témpulurugu arúfudaja jun, madaú jumúti. Wel, lasúsere-dunbei le lun lagúnfulirun Lerérun Búngiu.

⁵⁰ Ábati jígiruni sun disípulugu Jesúsu lábugua, ába janúrajan.

Wügúri núraigili le anúrajabei

⁵¹ Níñein ában wügúri núraigili afálaruti Jesúsu, darúgu lougua táurügü ában sídi, ában járügüdüni. ⁵² Ába lasáfarun jaweí, ába leibáagun surúsu, ígira sídi.

Jesúsu ligibugiñe líñun-ágei lúru

(Mt 26.57-68; Lc 22.54-55, 63-71; Jn 18.12-14, 19-24)

⁵³ Ábati janúgüni Jesúsu ligibugiñoun fádori le ínutimaabei, ába joundaragun sun jábutigu fádorigu jáma arúfudajatiña lilúrudun Moisés, jáma ámu wügúriña ja weírigutiña lídan jaffñen juríu. ⁵⁴ Ábati lafálaruni Pédro Jesúsu dísegiñe chülú túbúrürurugun lúban fádori le ínutimaabei, ába leréderun ñun jáma oúngirutiña témpulu abácharagua larügürügü wátu.

⁵⁵ Jáluajati jábutigu fádorigu lúma sun líñun-ágei lúru lidúnrun Jesúsu lun gayáraabei lan jasiadiruni lun láfarúniwa jilágubei, madáritiña lidúnrun. ⁵⁶ Sarágu jáña yebe adímure-jatiña iyéeni luágu, múaradúntiña láu le jaríñagubei. ⁵⁷ Níñanu yéetiña ásaarutiña aríñaga.

⁵⁸ —Agáambatiwa laríñagun. “Nagúnrinchaguboun témpulu to, to jadúguboun wügúriña, ábame naráramagüdün ában témpulu lídan úruwa wéyu to máma jadúga wügúriña.”

⁵⁹ Ni ítara, múaradúntiña láu le jaríñagubei.

⁶⁰ Ábati lásaarun fádori le ínutimaabei jádaangiñe sun jagía, ába laríñagun lun Jesúsu.

—¿Mounabuntibusan ni cáta? ¿Cáteisan le, le jaríñagubei buágu?

⁶¹ Ába leréderun Jesúsu maníñu, mounabunga ni cáta. Ábaya lálügüdüni fádori ínuti-maati.

—¿Amúrusan Crístubei le Liraú Búngiu, le lúnbei lasálbaruniña gürígia lídaangiñe jaffgoun?

⁶² Ába laríñagun Jesúsu lun.

—Ánja, áu. Áni jugúya, jaríjabadina, áu le Wügúri Garaúwartügüti, ñun lueígiñe lounwenren Súnti Gabáfu, aríja jumeíme níabin lídan juánriñu siélugiñe.

⁶³ Ábati lajeíridagunun fádori ínuti-maati lanáangun, le ligáni, ába laríñagun.

—¿Ca ámu wabúseerubei lun lichugun fe luágu guetó? ⁶⁴ Agáamba jumúti lanábaguni Búngiu láu lerérun. ¿Ída líña jaríjin lun líra?

Ába jabúdujan súnigubei lun láfarúniwa jilágubei.

⁶⁵ Ábati buri jagúmeserun jíbiri ásueraquei, adáuragua láu ligíbu, abúleiseirei, jaríñagati.

—¿Aríñaga beígia cátei lan áfarubalibu!

Ába buri jagáyuajan súdaara luágu.

Laríñagun Pédro luágu ibídiñe lan Jesúsu lun
(Mt 26.69-75; Lc 22.56-62; Jn 18.15-18, 25-27)

⁶⁶ Níñein Pédro bürúrurugu, ligía tiábin ában lumúsun fádiri le íñutimaabei. ⁶⁷ Dan le taríjini abácharagua larúgürügü wátu, ába taríaguni, ába taríñagun lun.

—¿Ma gíñe buga lumañadibu Jesúsu le Nazarétna?

⁶⁸ Ába leyéedagun Pédro, laríñaga.

—Ibídiñeti gürígia ligía nun, ibídiñegubeñti nun ca lan uágu badímureja.

Ába lígiruni fulásu le ní lubei labácharagua lun yaráfa lan lun lebéneri baríeru, ábati layúgurujan ában gáyu. ⁶⁹ Ábaya taríjini mísu tugúya, ába taríñagun joun ja ñíbaña.

—Ába giñétia jádaangiñe lánigu Jesúsu le.

⁷⁰ Ábaya leyéedagun. Murúsun óra lueígiñe, ábaya jaríñagun ja ñíbaña lun Pédro.

—Inárüni, amúrü ában jádaangiñe, ladúga Galiléana amúrü, ítara líña badímurejan quei jagía.

⁷¹ Ába líñaragun Pédro lúngua ánjein máma lubei inárüni le laríñagubei. Ábaya laríñagun.

—Ibídiñeti gürígia le uágubei jadímureja nun.

⁷² Lídan óra ligía, ába layúgurujan gáyu libíaman weíyaasu. Ábati larítagun Pédro luágu le laríñagubei buga Jesúsu lun. “Lubáragiñe layúgurujan gáyu bián weíyaasu, beyéedaguba náu úruwa weíyaasu.” Dánti le larítagun luágu, ába layájun.

15

Jesúsu ligíbugiñe Piláto

(Mt 27.1-2, 11-14; Lc 23.1-5; Jn 18.28-38)

¹ Larúgan bináafin, ába jóundaragun jábutigu fádirigu jáma arúfudajatiña lilúruden Moisés, jáma ámu wügüríña ja weírigitíña lídan jafñen juríu lúma sun líbiri líñun-ágei lúrudu, aríja cába lan jadúga lun lasíadirúniwa Jesúsu. Ába janúgüni gürágu, ába jedéregeruni lun Piláto. ² Ába lálügüdüni Piláto Jesúsu.

—¿Amúrü Jarúeitebei Juríu?

Ába loúnabun Jesúsu.

—Ánja, ítara líña quei baríñaguni.

³ Ába burítí jíchugun jábutigu fádirigu sarágu lidúnrun. ⁴ Ábayati lálügüdüni Piláto, ába laríñagun lun.

—¿Moúnabuntíbusan ni cáta? ¿Arijabá átiriñein lan bidúnrun íchuguti?

⁵ Moúnabun mémeti Jesúsu ni cáta, ába laweíridun lanígi Piláto láu líra.

Lasíadirúniwa Jesúsu lun ouweni

(Mt 27.15-31; Lc 23.13-25; Jn 18.38-19.16)

⁶ Jéchutiti Piláto ígiragüda ában adaürúti ságü fédu le lánina páscua, le jamúriajan gürígia jádaangiñe adaürútiña. ⁷ Níñeinti ában adaürúti gíríti Barabási úara jáma ámu ja áfarajabaña gürígia jilágubei lídan inúraguni luágu gumádi. ⁸ Ábati jayábin gürígia, ába jaríñagun lun Piláto lun ladúgüni queñíaja ladúga. ⁹ Ába lálügüdüniña.

—¿Buséntün lun nígiragüdüni Jarúeite Juríu?

¹⁰ Laríñagubaalin Piláto líra ladúga busén lán yebe lígiragüdüni Jesúsu, subúdi lumúti luágu ladúga lan gimúgaü jedéregerei jábutigu fádirigu. ¹¹ Fúgüda jamáña jábutigu fádirigu gürígia, jaríñaga joun lun jamúriajan lun lígiragüdüni Barabási, máma Jesúsu. ¹² Ábati laríñagun Piláto.

—¿Cáti jabúseerubei nadúgün láu le uágubei jaríñaga Jarúeite Juríu?

¹³ Ába jagúaragun.

—¡Dáguabeí luágu gurúwa!

¹⁴ Ába laríñagun Piláto joun.

—¿Cáti wurfbati ladúgubei?

Ábaya jagúaragun.

—¡Dáguabeí luágu gurúwa!

¹⁵ Queíti busúen lan Piláto leréderun buídu jáma gürgia, ába lígiragüdüni Barabási, lárigiñeti loúnajan abeichei Jesúsu, ába ledéregeruni lun ládarawagún luágu gurúwa.

¹⁶ Ábati janúgüni súdeara lídoun tübüürü lúban urúei, ába jóundarúniwa sun súdeara.

¹⁷ Ába jadáüraguagüdüni táu ában anáanguni funátu, ába jadúgün ában ridi láuti jíyü, ába jíchuguni leréberugu. ¹⁸ Ába jagúmeserun agúaraja lun.

—¡Gabágarilá Jarúeite Jurú!

¹⁹ Ába jagáyuajan lábulugun láu ában wéwe, ába jásueraguni, ába jájuduragun abúsura lun. ²⁰ Lárigiñe jéjerajan láu itara, ába jarágachunun anáanguni to jadáürüboun luágu lueí, ába jadáürünun lanáangun luágu. Ába jaságaruni lun jádaraguni luágu gurúwa.

Ládarawagún Jesúsu luágu gurúwa

(Mt 27.32-44; Lc 23.26-43; Jn 19.17-27)

²¹ Níñein ában wügüri Cirénena, gíriti Simón, lúguchi Alejandro lúma Rúfo, liábiña áraabugiñe, dan le lásügürün ñigiñe, ába jafósuruni lun lanúgüni lugúruwan Jesúsu.

²² Ába janúgüni Jesúsu lídoun ában fulásu gíriti Gólgota, míni lan líra, Lufúlasun Lábu Ichúgü. ²³ Ába jíchugun diweín láu ában luwúyeri árani gíriti mírra tídoun lun, mátun lumútu. ²⁴ Ábati jádaraguni luágu gurúwa, ába jájurerun súdeara ubúnuruni lun jaríjin cába lan jádaangiñe erédera táu lanáangun.

²⁵ Ladaúnrún nefu bináafin, ligía jádaraguni luágu gurúwa. ²⁶ Ába labúrüdúniwa lidúnrun ñi. “Jarúeite Jurú.” ²⁷ Dáguatiña giñe bián jíwerutiña luágu gurúwa úara lúma, ában lueígiñe loúnwenren, ában lueígiñe lubaúna. ²⁸ Láu líra lagúnfulira le taríñagubei Lerérun Búngiu. “Abájúdúwati jáma wurfatiña.”

²⁹ Dan le buriti jásügürün gürgia, ába jájinjani jachúgü láu, ába janábuni, jaríñaga.

—¡Bugúya le aríñagubei luágu fibounme lan témpulu, ábaya lánme baráramagüdünun lídan úrúwa wéyu, ³⁰ séfuguabá búngua, raríba lueígiñe gurúwa!

³¹ Ába giñe jéjerajan jábutigu fádirigu jáma arúfudajatiña lilúrudun Moisés láu, ába jaríñagun jámagua.

—¡Séfuti ámu, ánjein ligía, siñáti leséfuragun lúngua! ³² ¡Raríla Crístu, Jarúeite Israelf-tagu, lueígiñe gurúwa guetó wagíbugiñe, affíne wamámuga luágu!

Ja dáwaguñubaña luágu gurúwa úara lúma, anába jamúti giñe.

Loúnwen Jesúsu

(Mt 27.45-56; Lc 23.44-49; Jn 19.28-30)

³³ Amídirugu, ába labúrigadun sun ubou darí ladaúnrún úrúwa rábounwéyu. ³⁴ Ligía lagúaragun Jesúsu.

—Eloí, Eloí, ¿láma sabáctani? —míni lan líra. Nubúngiute, Nubúngiute, ¿cásan uágu bígirana?

³⁵ Níñanu jádaangiñe ja ñíbaña agáambuti, ába jaríñagun.

—Agáamba jumá, lagúajaña lun proféta Elías.

³⁶ Ába leíbaagun ában jádaangiñe, ába ladúdüragüdün ában mudúsi táu diweín garújütü, ába líchuguni luágu ában wéwe, ába líñchuni lun Jesúsu lun lachúurunun, ába laríñagun.

—Ígira wameí guetó, waríja ánjein núbín Elías aráriragüdei.

³⁷ Ábati ladúgün Jesúsu ában agúaraguni jéreti, ába loúnwen. ³⁸ Ába tajeiridagun tubélun témpulu lídan bián murúsun íñugiñe lun únabun. ³⁹ Dan lagáambuni jábuti súdeara Rómara le rárabei ligíbugiñe Jesúsu lagúaragun, aríjaleí ída líña lan loúnwen, aba laríñagun.

—Inárüni luágu Liraú lan Búngiu wügüri le.

⁴⁰Níñanu gíne würiña, aríagutiña dísegiñe, níñoun María Magdaléna, María to lúguchu Jacóbo le níuraütimagilíbe, lúguchu gíne José, níñoun gíne Salomé. ⁴¹Würiña ja, falá jamuti Jesúsu áni íderagua jamúti dán meja le Galiléaínein lan. Níñanu gíne sarágu ámu würiña ja níubinbaña Jerusaléoun úara lúma Jesúsu.

Lábunajóun Jesúsu

(Mt 27.57-61; Lc 23.50-56; Jn 19.38-42)

⁴²⁻⁴³Lubáragiñe lálüdün wéyu, ába liábin José, ában wügüri inébewati jádaangiñe líñun-ágei lúruđu, le agúrabajabaalin lagúmeserun larúeijan Búngiu táu sun lanígi, lílana fulásu le gíríbeí Arimatéa. Queíti luwéyuri lubeí lan aráansejani, le ában wéyu lubá wéyu le eméraaguagúlei, ába lebélorun le níjin lubeí Piláto amúriaíe lúgubu Jesúsu, úouga ní murásun anúfudei lídan. ⁴⁴Ába laweíridun lanígi Piláto dan le lagáambun luágu jilá lan Jesúsu, ába loúnajan luágu ában jábuti súdaara lun lálügüdüni ánjein inárüni lubeí luágu jilá lan. ⁴⁵Dan le laríñagunbei lun luágu inárüni lan, ába líchuguni Piláto lúgubu Jesúsu lun José. ⁴⁶Ábati lagáñijan José ában gamísa fínutu, ába larárigüdüni lúgubu Jesúsu luegiñe gurúwa, ába loúburaguni táu. Ába líchuguni lídoun ában umúajau achigíti luágu dübü, ába ladáuruni láu ában dübü. ⁴⁷Ába tídin María Magdaléna túma María to lúguchu José aríjei fulásu le ní lubei labunúa Jesúsu.

16

Lásaarun Jesúsu lídaangiñe ouweni

(Mt 28.1-10; Lc 24.1-12; Jn 20.1-10)

¹Dan le lásügürünbei wéyu le eméraaguagúlei, ába jagáñijan María Magdaléna, María to lúguchu Jacóbo, túma Salomé íbínei lun jóúdin ájurudei luágu lúgubu Jesúsu. ²Dimáasu, láfunaduña larúgan, ába jóúdin luágu lumúaja, ³ábati jaríñagun jámagua.

—¿Cábasan agídareí dübü luegiñe lubéneri umúajau?

⁴Dan le jaríjinbei, úaali oúnwenbun dübü lígía lídan lílúgaarun. ⁵Ába jebélorun lídoun umúajau, ába jaríjin ában wügüri níuraügili ñun ní luegiñe loúnwenren táu ában goúnu jarútu. Ába janúfudedagun, ⁶ába laríñagun joun.

—Manúfudedagaja jumá, jáluajaínein Jesúsu le Nazarétna le ádarawagúbei luágu gurúwa, úati ya, sará lídaangiñe ouweni. Aríja jumeísan fulásu le ní lubei líchugúa. ⁷Jeíba, jaríñagame joun láni díspulugu, lúntima Pédro, luágu níngiran lan luágu úma lun Galiléoun jubáragiñe. Jaríjibeí ní quei laríñaguni jun.

⁸Ába jóúdin würiña jagía anúraíeina nígiñe ladúga lebélorun ában luweírin anúfudei joun. Maríñaguntiñati ní cáta ní ca un ladúga janúfude.

Larúfudagun Jesúsu lúngua tun María Magdaléna

(Jn 20.11-18)

⁹Lárigiñe lásaarun Jesúsu lídaangiñe ouweni, dimáasu bináafin, ába larúfudagun lúngua furúmiñe tun María Magdaléna, to méja ueíoun laságara sédü espíritugu wuríbatíña.

¹⁰Ába tídin, ába tawísaruniña ja eíbugubaña meja lúma. Dan le tadárirunbáliña, jayájua-jaña ladúga lanáime íruni jádan luágu loúnwen. ¹¹Dan le jagáambun luágu wínwanya lan, luágu aríja táani, maffínetiña.

Larúfudagun Jesúsu lúngua joun bíama jádaangiñe díspulugu

(Lc 24.13-35)

¹²Lárigiñe, ába larúfudagun Jesúsu lúngua joun bíama jádaangiñe já meja eíbugubaña lúma, jóúdiña áraabun. Ibídiñetí yebe joun luágu Jesúsu lan. ¹³Ába jóúdin, ába jawísaruniña ja jíbiri, ní jagía, maffínetiña.

Líchugun Jesúsu jadásin díspulugu

(Mt 28.16-20; Lc 24.36-49; Jn 20.19-23)

¹⁴Lárigiñe, ligía larúfudagun Jesúsu lúngua joun únsu dispúlugu jagía dan le ñun jamá luágu dábula, ába celadeínjan joun luágu liloúguan jaffñen lúma lidére jachúgü, ladúga maffñen jamá joun ja arjübalin lárigiñe lásaarun. ¹⁵Ába laríñagun joun.

—Jesba lídan sun fulásu apúrichija jumei ugánu le luáguti asálbaruni joun sun güriña. ¹⁶Ja affñerutiña luágu, badísei jagíame, jasálbaruba, ja maffñetiña, jeféridiruba lídaanme luwéyuri agúseragüdüni. ¹⁷Niján cátei le lúnbei jarúfuduni ja affñebaña nuágu, lun lasúbudirúniwa luágu Búngiu lan oúnajabaliña. Jaságaruba espíritugu wuríbatíña jawei güriña lídan níri, jadímurejaba ámu dimúrei luei jerérun, ¹⁸ánjaña árügüda jéwe jájaburugu o ánjaña lan áta cátei le gáfarajati, madúgünbei wuríbani joun, lánwoun sun líra, jíchugubei jájabu jawágu sánditiña, ábame jareídagun.

Lamúdeirun Jesúsu siélun

(Lc 24.50-53)

¹⁹Lárigiñe ladímurejan joun, ába líñurúniwa Jesúsu siélun, ába lañúurun lueígiñe loúnwenren Búngiu. ²⁰Ába jáfuridun dispúlugu, ába japúrichijani ugánu le lánina asálbaruni lídan sun fulásu. Jesúsu méme íderagua lumútiña, áni choúrügüdalei ugánu le japúrichijabei láu miláguru lé buri jadúgübei.

UGÁNU BUÍTI LE LABÚRÛJABEI LÚCAS LUÁGU JESÚSU

LabúrÛjani Lúcas lé meja asúseredubei

¹ Lun Teófilo le weírigubei. Gíbeeña gürígia óuchutiña jabúrÛjani cátei lé buri luáguti wasálbarun lé meja asúseredubei wagánagua lídan lúaragun, ² áfaaguatiña jabúrÛjani ítara quei jarífudajani ja arjúbalin buri cátei ligía lúmagiñe lagúmeserun, apúrichija jagía luágu, woun. ³ Áu gíñe, álügüdajaadina gíñe buídu buídu libúgürü sun cátei le asúseredubei lúmagiñe lagúmeserun, áni afíñetina luágu maríban lan lun nabúrÛjanun gárada to bun quei lubúdubu, ⁴ subúdi bámugei linárün cátei le arúfudúaalibei bun buídu buídu. Niján le asúseredubei.

Lasúbudiragüdüni ában ánjeli luáguti lagúriajóun Juan le abásteragüdjabei

⁵ Dán meja le Heródes lan urúeibei Judéa, ñíñein meja ában fádiri lánina jaffñen jurú, gíriti Zacarías, jádaangiñeti fádirigu ja lánigu Abías. Elisabét tíribe lúmari, jádaangiñetu giñe ladúgawagun Aarón. ⁶ Biángubei jagía, richáguatiña ligíbugiñe Búngiu, gúnfulitiña lúma, adúga jameí sun le lubeíbei darí lun siñá lan laríñawagún ni cáta wuríbati jawágu. ⁷ Masáanigutiña ladúga siñá lan tagáragüdüni Elisabét, áni derébugugaña gíñe jagía biángubei.

⁸ Luágu ában wéyu, lídan lidáni jesériwidun lánigu Zacarías quei fádirigu ligíbugiñe Búngiu, ⁹ ába jabúdujan según jagáburí fádirigu jurú, lun jasúbudiruni cába lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába lábujan luágun Zacarías. ¹⁰ Sun niján lan cupáli águdajóua, añája gürígia boúgudi ayúmuragua lun Búngiu. ¹¹ Ábati lasálriragun ában láni Wabúreme ánjeli lun Zacarías, rára lueígiñe loúnwenren latárü le ñí lubei cupáli. ¹² Dan le larjini Zacarías ánjeli ligía, ába laweíridun lanígi, ába lebéllurun anúfudei lídoun. ¹³ Ába laríñagun ánjeli ligía lun.

—Manúfudebá, Zacarías, ladúga agáamba láali Búngiu bayúmuragun, tagáraíduba búmari ában irájü, ábame bíchuguni líri Juan. ¹⁴ Tabuíñchuba banígi láu ugúndani luágu, áni sarágujaba gíñe agúndaarutiña láu lagúriajóun, ¹⁵ ladúga weírigubei biraú ligíbugiñe Búngiu. Mátunbei diweín ni bínu, áni ñíbeí Sífiri Sándu lúma lúmagiñe lubáragiñe lagúriajóun lun ladúndejani lídan sun cátei. ¹⁶ Ladúgüba lun jagíribudun sarágu jádaangiñe Israelítagu lun jagáambuni Jabúngiute, ¹⁷ lesériwiduba lun Búngiu láu sarágu ubáfu quei meja ladúgüni Elías. Laráansejaba lubá Jesúsu láu laráandaragüdüniña agúbürigu jáma isáanigu, láu gíñe larúfudajan joun ja magáambadibaña lun Búngiu lun júaradun lúma queís gürígia richáguatiña. Ítara lúba laráanseruniña lubá jerésibiruni Jabúreme Jesúsu.

¹⁸ Ába laríñagun Zacarías lun ánjeli ligía.

—¿Ída lubági nachóuruni cátei le? Áu táu sun númari, derébugugaadiwa.

¹⁹ Ába laríñagun ánjeli ligía lun.

—Gabriel áu, áni nesériwiduña lun Búngiu, ligía óunajabalina adímureja bun lun níchuguni ugánu buíti le bun. ²⁰ Guetó, quei maffñerun bubeí luágu le naríñagubei bun, berédera merérunga, siñábei badímurejan daríme lagúriajóun biraú. Lagúnfuliruba cátei le lídan lidáni.

²¹ Sun dan le, añájati buga gürígia boúgudi agúrabajei Zacarías, weírititi janígi luágu lílü témpulurugu. ²² Dan le láfuridunbei, siñá ladímurejan joun, ábati jasúbudiruni luágu salfgua lan som cátei lun, témpulurugu. Ladímurejati joun láu seíni, meréngadijaali.

²³ Dan le lagúmuchun dan le lúnbei lesériwidun Zacarías témpulurugu, ába lídin lúbiñoun. ²⁴ Lárigiñe cátei le, ába tadágeinadun Elisabét, to lúmari, ába máfuridun tan jábiñegiñe luágu seíngü játi, teréngati túnguarügü. ²⁵ “Ladúgüñein Búngiu lubuídun cátei le nun guelé lun lagídaruni nibúsigari jagíbugiñe gürígia.”

Lasúbudiragúdüni ában ánjeli luáguti lagúriajóun Jesúsú

²⁶ Sísi játi lárigiñe, ába loúnajani Búngiu ánjeli Gabriél lídoun ában ubúru gu lání Galiléa, gíríti Nazarét, ²⁷ lun lídin bisídoun ában wúri irájügiru, gírítu María. Wúri tugúya, gadáraduñoun lúma ában wügúri gíríti José lun tamárieidun lúma, wügúri ligía, linébaanfan urúei Davíd. ²⁸ Ába lebélorun ánjeli ligía le ñjin tubeí, ába laríñagun tun.

—¡Báfaguagüile, María! Níjein Búngiu búma, binílaadibu sügú jáu sun wúriña.

²⁹ Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara. ³⁰ Ábati laríñagun ánjeli ligía tun.

—Manúfudebá María, fuleísei láadibu Búngiu, ³¹ badágeinada, ábame bagúriajan ában irájü, ábame bíchuguni líri Jesúsú. ³² Weírigubei, Liraú Búngiu le íñubei lúba lagúarúniwa, áni larúeigüdübei Wabúreme Búngiu quei larúeigüdüni Davíd, le binádu lidúje. ³³ Lagúmadirubei linásiñun Israél lun sun dan, áni magúmuchadibeí lagúmadijan.

³⁴ Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

³⁵ Ába laríñagun ánjeli tun.

—Liábinba Sífiri Sándu buágun, ábame louburagunibu lubáfu Búngiu. Ligía sándubei lubefí irájü le lúnbei bagúriajani, Liraú Búngiu lúba lagúarún. ³⁶ Tiábin bidúje to Elisabét, dageínaaru gíñe lau sun weýaarun lan, tagáraüdüba ában wügúri irájü, ítara líña lubefí, tó meja uáguboun jaríñaga luágu siñá lan tagáraüdü, níjein sísi játi dageínaú tuágu. ³⁷ Úati ni cáta siñáti lun Búngiu.

³⁸ Ábati taríñagun María.

—Lidámun Nabúreme Búngiu nugúya, adúgaleí le baríñagubei náu.

Lárigiñe, ába lídin ánjeli.

Tídin María bisídoun Elisabét

³⁹ Lídoun dan ligía, ába tídin María furése lídoun ában ubúru gu le labádinaguabeí buri wúbü Judéa, ⁴⁰ ába tebélorun lúbiñoun Zacarías, ába tabúsurun tun Elisabét. ⁴¹ Dan le tagáambuni Elisabét tabúsurun, ába lánjingichagun tiraú turágeirugu, ába liábin Sífiri Sándu tuágun. ⁴² Ábati taríñagun láu umálali le jéreti.

—Binílaadibu Búngiu sügú jáu sun jináriñu, binílaali gíñe biraú. ⁴³ ¿Cátanañadina lun tiábin lúguchu Nabúreme bisídana? ⁴⁴ Láu nagáambuni babúsurun, ába lánjingichagun niraú nurágeirugu láu ugúndani. ⁴⁵ Gúndaatibu bugúya le afíñerubei, luágu lagúnfuliruba lan cátei le laríñagubei Wabúreme bun.

⁴⁶ Ábati taríñagun María.

Rítu nuwáni uweíriguni lun Nabúreme,

⁴⁷ gúndaagua tugúya nanígi luágu Búngiu le Nasálbaragüile,

⁴⁸ lugúndun gudémejabujaali nun, nugúya le lidámun.

Lúmagiñe guelé, jaríñaguba sun güirigia luágu fuleíseiwaadina lan,

⁴⁹ ladúga adúgaali Búngiu, le Súnti Gabáfu, cátei weínamuti nun, sánduti líri.

⁵⁰ Súnwandan gudémebaña lan ja inébejabúbaña lun, lun.

⁵¹ Adúgaali oúnwenbun buri cátei,

adúgaali lun ni cáta jamá ja barúguabaña jóungua.

⁵² Gidálaaña ja gabáfubaña lídaangiñe jaweírigun,

ja únabubaña, ába ladúgüniña lun weírigu jamá.

⁵³ Já buga lamábaña, quimúlegüda lumútiña,

ánjeinti ja rísibaña, míchugunti ni cáta joun.

⁵⁴ Íderagua lumútiña linásiñun Israél, ja esériwidubaña lun,

mabúlieidun lumúti lun gudémejabu lan,

⁵⁵ queí meja lidáradun jáma binádu wagúbürigu—

Abrahám jáma ladúgawagun—lun gudémejabu lan joun lun sun dan.

⁵⁶ Ába teréderun María úruwa játi ñi, lárigiñe, ába tagríbudun jábiñoun.

Lagúriajoun Juan le abásteragúdajabei

⁵⁷ Ába lagúnfulirun dan lun tagúriajan Elisabét, ába tagúriajan ában wügúri irájü. ⁵⁸ Dan le jagáambun tubésinanigu jáma tidújeñu luágu lubuídun cátei le ladúgübei Búngiu tun, ába jagúndaarun úara túma. ⁵⁹ Luágu liwídün wéyu, ába lerésibiruni circuncisión, le liseíni luágu láni lan Búngiu irájü ligía. Buséntiña yebéti jíchuguni líri lúguchi luágu, le Zacarías, ⁶⁰ ába taríñagun lúguchu.

—Uá, Juánba líri.

⁶¹ Ába jaríñagun tun.

—¿Cági uágu? Úati ni ában jádaangiñe binébaanfaangu gíríti Juan.

⁶² Ába jálügüdüni lúguchi irájü láu seíni ca lan íri labúseerubei líchugun luágu. ⁶³ Ába lamúriajan ában murúsun fuláansu, ába labúrüdün luágun. “Juan líribei.” Ába laweíridun janígi sùngubei láu cátei le. ⁶⁴ Lídan méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu. ⁶⁵ Ába laweíridun janígi besínagu láu cátei le, ába labájüdawagún cátei le lídan sun fulásu geyégua jáu. ⁶⁶ Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cátei bei funasan irájü le?

Ladúga biní lumútija Búngiu le tímatimaati.

Lerémujan Zacarías

⁶⁷ Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagun.

⁶⁸ Buídulá ladímurejoun luágu Wabúreme le Jabúngiutebei gürígia ja Israelítagu, ladúga ñúbinjali woun, wagía le lánigu, áni sálba láadiwa.

⁶⁹ Rújali ában Asálbaragülei le gabáfuti woun jádaangiñe linébaanfaangu Davíd, lé meja esériwidubei lun.

⁷⁰ Ítara líña meja laríñaguni Búngiu jádaangiñe láni profétagu ja edéregeragubaña jóungua lun, lúmugiñe meja binádu dan,

⁷¹ luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

⁷² Ítara líña gudémejabu lan Búngiu joun binádu wagúbürigu, arúfudaleí luágu mabúlieidagun lan lueí lidáradun le sándubei jáma.

⁷³ Niján lé meja laríñagubei lun wáguchi Abrahám.

⁷⁴ Luágu leséfurubádiwa lan jaweí wáganiñu, lun gayáraabei lan wesériwidun lun manúfudeiga,

⁷⁵ láu úarani, derégeguñu wagía woúngua lun, sun dan le wabágaridubei.

⁷⁶ Áni bugúya nisáaniraü, láni Búngiu le íñubei proféta lúba bagúarúniwa, ladúga baráansejaba lubá Wabúreme,

⁷⁷ subúdi lámuga úma lánina asálbaruni joun lánigu, le áubei ferúdnawa lan jaffgoun.

⁷⁸ Wabúngiute, láu lísiñejabu lúma lugúdemejabu, loúnajabei Crístu wámoun siélugiñe

⁷⁹ lun larúgoungadágüdüni jáu ja lídaanbaña lubúriga lúma jáu ja luágubaña úma le óúwenibeí lébeja,

lúma lun ladúndejani wapásun lídoun úma le anúgüwaliwa lídoun darángiläü.

⁸⁰ Aweírideina ligfati irájü ligía, afáragadagueina giñe lídan láni espírítu. Ába laganóun lídan fulásu mageírawati darí lúmoun wéyu le lagúmeserun luwádigimari lun Búngiu jagánagua lumútuniña Búngiu ja Israelítagu.

Lagúriajouniwa Jesúsu
(Mt 1.18-25)

¹ Lídoun buga dan ligía, ába laríñagun urúei Augústo lun jabájüdüün sun gürígia ja Rómabaña. ² Furúmiñe meja jadúgüni cátei le, dán meja le Cirénio lan agúmadijabei Síria. ³ Súnti gürígia mósu jóudin jageira lun ñi lan jabájüdüwa. ⁴ Ligía láfuridunbei José Nazarétgiñe, louúbawagugiñe Galiléa, ába lídin louúbawagun Judéa lídoun fulásu le gríbelei Belén, le ñí lubei lagúriajoua Davíd, quei linébaanfan lubei Davíd José. ⁵ Ába lídin Belén lun labájüdüün úara túma María to gadáradunboun lúma lun jamárieidun, áni dageinañoun. ⁶ Dánti le añája lan ñi Belén, ába lachúlürün dan lun tagúriajan María. ⁷ Ába tagúriajani furúmiñeti tiraú ñi, ába touburaguni tídan lágei, ába taróunragüdüni ñi tídan jában anímaalu ladúga úati ubáraü joun tídan jában chülúdügütiña.

Ánjeligu jáma oúnigirutiña mudún

⁸ Lídan áraabu bougudi luei Belén, ññnanu jóuniri mudún, bou larúgan jáu oúnigiraña jalúgüniña mudún. ⁹ Sódini, ába lasálriragun ában lání Wabúreme Búngiu ánjeli siéluigiñe joun, ába jaríjin ában oúnwenbun larúgounga le lánina Búngiu geyégua jáu, ába janúfudedagun. ¹⁰ Ába laríñagun ánjeli ligía joun.

—Manúfueda jumá, ladúga níjein ugánu buíti nanúgün jun, lébunabei sarágu ugúndani joun sun gürígia. ¹¹ Luágu agúriajouaali lan ában asálbaragülei jun ugúñe, lageira Davíd, Crístu le Jabúreme. ¹² Jadárirubei irájü ligía jóuburagu tídan lágei, roun tídan jában anímaalu.

¹³ Lídan óra ligía, ába jasálriragun sarágu ánjeligu lubádu furúmiñeti ánjeli, ába jíchugun uweíríguni lun Búngiu, jaríñaga.

¹⁴ Uweíríguni lun Búngiu lídan líñutima siélu,

darángilau múarugu jádan gürígia ja íbjubalin lufúleisein!

¹⁵ Dánti le jagíríbudun ánjeligu jarigoún siélun, ába jaríñagun jóuniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába jóudin furéseguena, ába jadárirunun María lúma José, lúma irájü roun tídan jában anímaalu. ¹⁷ Dan le jaríjnbalin, ába jabájüdaguni le laríñagubei ánjeli joun libúgürü le. ¹⁸ Súnti ja agáambuliña, weíríti janígi láu le jaríñagubei. ¹⁹ Áni María, areídañu tíñein sun cátei le tídan tanígi, arítagua luágu. ²⁰ Ábati jagíríbudun jóuniri mudún, adímurejeina weíri luágu Búngiu, luágu sun le jagáambubei lúma le jaríjibe, ladúga suséreti ítara quei laríñawagúniwa joun.

Larúfudúniwa Jesúsu témpulurugu

²¹ Luágu liwídün wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²² Dan le lagúnfulirunbei lidáani jarúmadun lagúbürigu Jesúsu según igáburi lídan lilúrudun Moisés, ába janúgüni irájü ligía ubúrugin Jerusalén lun jederegeruni lun Búngiu. ²³ Jadúgünbalin líra ladúga laríñajare tídan lilúrudun Búngiu. “Sun furúmiñeti wügüri irájü agúriajóuti lúnbei Búngiu.” ²⁴ Ába lubeiti jóudin adágaragüda le uágubei laríñaga lilúrudun Búngiu. bían wabúgua o bían lan únjun.

²⁵ Lídan meja dan ligía, ñññein meja ában wügüri Jerusalén giríti Simeón. Wügüri ligía ában wügüri buíti, weíríti lederegeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Níñein Sífiri Sándu lúma Simeón, ²⁶ áni arúfuda láali lun luágu mouñwenbei lan maríjingalei Crístu le lúnbei loúnajani Wabúreme Búngiu.

²⁷ Ába lídin wügüri ligía témpulurugun, ladúndejan Sífiri Sándu. Dánti le janúgünbalin

lagúbürigu Jesúsu Jesúsu témpulurugun lun jadúgiini le laríñagubei lúruđu láu, ²⁸ ába loúyuajani Simeón, ába líchugun eteíngiruni lun Búngiu, aríñageina ligía.

²⁹ Nabúreme, gayáraajali bígirunina lun núnwen láu darángiláú, nugúya le esériwidubei bun,

ladúga gúnfuli báali le baríñagubei nun.

³⁰ Aríja náali Wasálbaragüle láu nágu,

³¹ Asálbaragülei le boúnajabei joun sun güirgía.

³² Ítara lúba queísi ában lámpu lun larífuduni inárüni joun ja mámabaña juríu, ru ligíame uweiriguni joun Israelítagu, ja bánigu.

³³ Ába laweíridun lanígi José táu sun María láu le laríñagubei Simeón luágu irájü le.

³⁴ Ábati labíniruniña Simeón, ába laríñagun tun María, to lúguchu Jesúsu.

—Irájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatiña jerésibiruni. ³⁵ Ítara lúba lasúbudirúniwa le larítageubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágu buwáni.

³⁶ Níñoun gíñe ában wúri proféta, gírítu Ána, wúri tugúya liraú Fanuél, jádaangiñe ladúgawagun Áser. Weíríyaaru wúri tugúya, núraügiuru meja tamárieidunbei, sédúñein irúmu táu lúma túmari, ába loúnwen, ³⁷ guetó, gádürü-weín-gádürü irúmu táu. Máfu-riduntuti témpulurugugiñe, terédera ñi esériwida lun Búngiu áriebe wéyuagu, ayúnara lúma ayúmuragua lun Búngiu. ³⁸ Ába tíabin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

³⁹ Lárígiñeti jagúnfulirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét. ⁴⁰ Aweírdeina ligíati irájü le, éredeina ligía, afáragadagueina lídan líchú áu, biní lumújtjati Búngiu sarágu.

Jesúsu témpulurugu

⁴¹ Ságüja irúmu jóudin lagúbürigu Jesúsu ubúruđu Jerusalén lubá fédu le páscua, ⁴² áni dan le lagúnfulirunbei Jesúsu dúusu irúmu, ába jóudin súnugubei Jerusalén quei le jagáburi lídan fédu ligía. ⁴³ Dánti le jagíribudun lárígiñe lagúmuchagun fédu, ába leréderun irájü ligía Jerusalén, ibídiñoun tun lúguchu ni lun José, ⁴⁴ jarítagún yebe luágu nítan lan jádan güirgía ja jámarigubaña luágu úma. Ítara líña jadúgiün ában wéyu eíbuguni, dan le jáluajani jádan jadújeñu lúma jádan jasúbudiraagun, ⁴⁵ madári jamúti. Ábati jagíribudun ubúrugun Jerusalén áluajei ñi.

⁴⁶ Úrúwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña. ⁴⁷ Súnti ja agáambubalin, weírítu janígi luágu líchú láu lúma luágu buri loúnabagüle. ⁴⁸ Dan le jaríjinbalin lagúbürigu, ába laweíridun janígi, ába taríñagun lúguchu lun.

—¿Cáme badúgei cátei le woun, niraú? Nugúya lúma búguchi, wáluajañadibutia láu idjjeri.

⁴⁹ Ábati laríñagun Jesúsu joun.

—¿Cági uágu jáluajana? ¿Ibídíñeti jun luágu lúnti lan neténirun lun cátei le lání Núguchi?

⁵⁰ Úati gunfaráanda jamáni le laríñagubei joun.

⁵¹ Ábati lagíribudun jáma, Nazarétün, ába lasígirun láu meme lagáambadi joun. Ábati buri tareíduni lúguchu sun cátei le tarítangunrugun. ⁵² Niján méméti Jesúsu aweírdeina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe güirgía.

3

Lapúrichijan Juan le abásteragüdjabei, lídan fulásu mageírawati

(Mt 3.1-12; Mr 1.1-8; Jn 1.19-28)

¹ Lídan liqueínsin lirúmdudiri lagúmadijan Tibério César, Póncio Piláto ligía meja gumáندانbei Judéa, Heródes gumáندان Galiléa, Felípe, le lamúlen, ligía gumáندان Itúrea lúma Traconíte, Lisanías gumáندان Abilínia, ² Anás lúma Gáifasi, jagía fádorigu íñutimáabaña lídan jafíñen juríu. Ábati líchugun Búngiu ában ugánu lun Juan, le liraú Zacarías, lídan fulásu mageírawati, ³ ába lebuguni Juan sun fulásu buri le lubádubei dúna le Jordán, aríñagueina joun güriquia luágu lúnti lan jaságüríjan luágu jafígoun, sáansi jameíme jagáburi lun ferúdunawa lan jafígoun, badísei jagíame. ⁴ Suséreti cátei le ítara queí meja labúrüdüni proféta Isaías, laríñaga.

Agaambúati lumálali ában agúarajati lídan fulásu mageírawati ítara.

“Aráanseja jumoún janígi lubá liábin Wabúreme,

queísi ladárarúniwa úma surúti.

⁵ Labuínchagüdüwaba sun gudúngu,

sun wúbü, lagurúaba,

úma buri le segéti, lásururuba,

úma buri le múaragunti, lúwaradaguba.

⁶ Laríjúbei sun uboú Wasálbaragüle, le loúnajabei Búngiu woun.”

⁷ Núbintiña sarágu güriquia lun Juan lun labásteragüdüniña, ába laríñaga joun.

—Jarásan jéwe jugúya le! ¿Ca awísarubalün lun jeíbaagun luef lanátime lafáyeiragüle figoú le yaráfaalibei? ⁸ Ígira jumeí binádu jigáburi, abágarida jumá lun gayára lan larijín buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladúga quei naríñaguni jun, gayáraati ladúgün Búngiu linébaanfaangu Abrahám lídaangiñe buri dúbü le. ⁹ Yaráfaali dan lun jafáyeijan luágu jifígoun queísi taráanserún jaráwa lun tánychuguni tídibu wéwe. Sun ídibu le mabuídunti lin lánchugúba, ábame lagudún.

¹⁰ Ábati jaríñagun güriquia jagía lun.

—¿Cáteiti lúnbei wadúgüni?

¹¹ Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinraguni lúma le meíginbei.

¹² Núbintiña gíñe agúburajatiña liseínsuna gumádi lun jabásterun, ába jaríñagun lun.

—Maésturu, ¿ca cátei lúnbei wadúgüni?

¹³ Laríñaga Juan joun.

—Magúburaja jumá lougiñe le uágubei laríñaga lúrudu.

¹⁴ Aríñagatiña gíñe fiú súdaara lun.

—Ángi wagía, ¿cági lúnbei wadúgüni?

Laríñaga joun.

—Magídara jumá ni cáta ni ca uef, ni láu siádi, ni láu jíchugun lidúnrun mútu le madúgün lumúti, gufúruma jumá láu jafáyeiruaja.

¹⁵ Anájati güriquia madéraguagüdünja arítaqua luágu fágua lan Juan Crístubei, ¹⁶ ába laríñagun Juan joun súnugubei.

—Áu, láu dúna nabásteragüdaün, nítenebei ában le lúnbei labásteragüdüniñun láu Sífiri Sándu lúma láu queísi wátu geméti, ligía Crístubei. Gabáfutimaati nuef darí lun madúna nan ni lun nafáragaduni tagúruga ligeídin. ¹⁷ Dánme liábin, jafánreinrúaba güriquia ja lánigubaña jádaangiñe ja wuríbabaña queísigubeirügü lagídarúniwa ífei lídaangiñe túriugu buíti, ába loúndarún túriugu buíti tídoun lágei, ába lagudún ífei lídan wátu geméti le meíneguchati.

¹⁸ Láu igáburi le lúma láu buri ámu ewéridijani líchigei Juan ugánu buíti joun güriégia luágu wasálbaragüle. ¹⁹ Erérati gíne lun gumándan Heródes luágu laganóun túma Heródias, to lúmari Felípe, le lamúlen, lúma luágu ámu buri cátei wuríbatí le ladúgübei. ²⁰ Lubáragiñe ladúgün Heródes gásu láu, adúgarügü ligía ában cátei wuríbatímaati. ladáruni Juan furísunrugun.

Labásterun Jesúsu
(Mt 3.13-17; Mr 1.9-11)

²¹ Lubáragiñe ladaürúniwa Juan, dan le labásteragüdúniña güriégia, badíseiti gíne Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu, ²² ába larijiniwa larárirun Sífiri Sándu luágun camá jamuga ában únjun, ába lagaambúniwa lariñagun ában umálati siéluigiñe.

—Amúru Niraú le jínsiñebei nun, gúndaatina báu.

Linébaanfaangu Jesúsu
(Mt 1.1-17)

²³ Queí burí darándi irúmu láu Jesúsu dan le lagúmeserunbalin luwádigimari le uágubei loúnajei Búngiu. Jarítawagúati luágu liraú lan José, José, liraú Elí, ²⁴ Elí, liraú Matát, Matát, liraú Leví, Leví, liraú Melquí, Melquí, liraú Jána, Jána, liraú José, ²⁵ José, liraú Matatías, Matatías, liraú Amós, Amós, liraú Nahúm, Nahúm, liraú Eslí, Eslí, liraú Nagaí, ²⁶ Nagaí, liraú Maat, Maat, liraú Matatías, Matatías, liraú Semeí, Semeí, liraú José, José, liraú Judá, ²⁷ Judá, liraú Joána, Joána, liraú Résa, Résa, liraú Zorobabél, Zorobabél, liraú Salatiél, Salatiél, liraú Néri, ²⁸ Néri, liraú Melquí, Melquí, liraú Adí, Adí, liraú Cosám, Cosám, liraú Elmodám, Elmodám, liraú Er, ²⁹ Er, liraú Josué, Josué, liraú Eliézer, Eliézer, liraú Jorím, Jorím, liraú Matát, ³⁰ Matát, liraú Leví, Leví, liraú Simeón, Simeón, liraú Judá, Judá, liraú José, José, liraú Jonán, Jonán, liraú Eliaquím, ³¹ Eliaquím, liraú Meléa, Meléa, liraú Mainán, Mainán, liraú Matáta, Matáta, liraú Natán, ³² Natán, liraú Davíd, Davíd, liraú Isaí, Isaí, liraú Obéd, Obéd, liraú Booz, Booz, liraú Salmón, Salmón, liraú Naasón, ³³ Naasón, liraú Aminadáb, Aminadáb, liraú Arám, Arám, liraú Esróm, Esróm, liraú Fáres, Fáres, liraú Judá, ³⁴ Judá, liraú Jacób, Jacób, liraú Isáac, Isáac, liraú Abrahám, Abrahám, liraú Taré, Taré, liraú Nacór, ³⁵ Nacór, liraú Serúg, Serúg, liraú Ragáu, Ragáu, liraú Pelég, Pelég, liraú Héber, Héber, liraú Sála, ³⁶ Sála, liraú Cainán, Cainán, liraú Arfaxád, Arfaxád, liraú Sem, Sem, liraú Noé, Noé, liraú Laméc, ³⁷ Laméc, liraú Matusalén, Matusalén, liraú Enóc, Enóc, liraú Jaréd, Jaréd, liraú Mahalaléel, Mahalaléel, liraú Cainán, ³⁸ Cainán, liraú Enós, Enós, liraú Set, Set, liraú Adán, Adán, liraú Búngiu.

4

Louchawagúniwa Jesúsu
(Mt 4.1-11; Mr 1.12-13)

¹ Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanúgüni Sífiri Sándu lídoun fulásu mageírawati. ² Reídeiti Jesúsu bián-wein wéyu ní láu Máfia ouchagüei ánjein áburuja lídoun wuríbaní. Meíginti ní cáta lídan sun bián-wein wéyu ligía, ába lasándirun ában ounwenbun ilámaü. ³ Ábati lariñagun Máfia lun.

—Ánjein Liraú bubei Búngiu, salíguagüidabeí dúbü le feínme.

⁴ Lariñaga Jesúsu lun.

—Tariñajare Lerérun Búngiu. “Mámarügüba táu feín jabágarida güriégia, jabágaridüba gíne láu jagúnfulirun láu sun dimúrei le lariñagübei Búngiu.”

⁵ Lariñe, ába lanúgüni Máfia Jesúsu luágun ában wúbü íñuti, ába larúfuduni sun fulásu le ubouágubei lun lídan ában. ⁶ Ába lariñagun Máfia lun.

—Níchugubei sun ubáfu lúma sun uweíríguni le bun ⁷ ánjabu ájuduragua nun lun banúgünina quei bubúngiute, báníbei súngubei, ladúga íbíja náali sun le, áni gayáraati níchuguni lun le únti nabúseera.

⁸ Ába laríñagun Jesúsu lun.

—Dísebá nuéi, Máfia, ladúga tariñajare Lerérun Búngiu. “Judúguabá lun Búngiu le Babúreme, lúnrtígulá besériwida.”

⁹ Lárígíñe, ába lanúgüni Máfia ubúrugun Jerusalén, ába laweínragüdüni tábulugu témpulu, ába laríñagun lun.

—Ánjein Liraú bubei Búngiu, chúguabá búngua yágiñe lun únabun, ¹⁰ ladúga tariñajare Lerérun Búngiu.

Loúnajabaña Búngiu láni ánjeligu lun jóunigiruníbu,

¹¹ janúgübadibu jájaburugu lueí labúleiseirun bugúdi luágu dúbü.

¹² Ába laríñagun Jesúsu lun.

—Tariñajare gíñe Lerérun Búngiu. “Moúchaguabéi Búngiu le Babúreme.”

¹³ Dánti le madárijali Máfia cába lan luwúyeri óuchawagüni ladúga lun Jesúsu, ába lígiruni lúngua luágu átiri dan.

Lagúmeseruni Jesúsu luwádigimari Galiléa

(Mt 4.12-17; Mr 1.14-15)

¹⁴ Ába lagíribudun Jesúsu Galiléoun buin láu lubáfu Sífiri Sándu, ába buríti ladímurejóun luágu lídan sun fulásu geyégua. ¹⁵ Arúfudajatija tídan jalígílisin juríu lídan sun fulásu, buíti jadímurejan sun gürígia luágu.

Jesúsu lídan ubúruğu Nazarét

(Mt 13.53-58; Mr 6.1-6)

¹⁶ Ábati lídin Jesúsu Nazarétün, le fulásu le ní lubei lagúriajuóa, ába lebélorun tídoun jalígílisin juríu lídan wéyu le eméraaguagülei quei ligáburí yebu, ába laráramun lun lalíjan tídan Lerérun Búngiu. ¹⁷ Ába jíchugunun lílíburun proféta Isaías lun, dan le ladáranun, ába ladáriruni le ní lubei laríñaga ítara.

¹⁸ Níjein láni Búngiu Sífiri Sándu nuágu,

ladúga anúadaja láadina lun níchuguni ugánu buíti joun gudémetiña,

oúnaja láadina lun námaliñaniña ja nidíjeribaña tídan janígi,

lun náfuridagüdüniña adaürútiña,

lun níchugun arjíni joun maríjintiña,

lun neséfuruniña ja ouserúbaña wuríba,

¹⁹ lun nadímurejan luágu dan le fuleiseijabu lan Búngiu joun gürígia.

²⁰ Ába ladárunun Jesúsu líburu, ába líchugunun lun ídejati tánina liglísi, ába lañúurun. Queíti jasígirun sun ja níbaña aríaguei, ²¹ ába lagúmeserun adímureja, laríñaga.

—Ugúñe guánarü gúnfulíjali cátei le jigíbugiñe.

²² Adímurejatiña sun jagía buíti luágu Jesúsu, weírititi janígi luágu lubuídun buri dimúrei le laríñagubei. Jálügüdagua buríti jámagua.

—¿Mámasan le liraú José le?

²³ Ába laríñagun Jesúsu joun.

—Subúsiti nun luágu jaríñagubei lan cátei le nun. “Surúsia, agáraniguabá búngua”, jaríñaguba giñe nun. “Agáambaadiwa luágu buri cátei le adúga báalibei Capernaúm, adúgabei giñe ya bageíra.”

²⁴ Ába lasígirun adímureja, laríñaga.

—Ninárün jáu luágu úa lan ni ában proféta eresibirúati buídu lageíra. ²⁵ Choúru numúti luágu añájein lán meja sarágu würíña ja jiláguañábaña jámarigu jádan Israelítagu lídan meja lidáani proféta Elías, dan le májuyun lubei júya luágu úrúwa írúmu dimí, ába ní lan sarágu ílamaü fulásurugu, ²⁶ áni moúnajan lumúti Búngiu Elías túmoun ni

ában jádaangiñe würiña jiláguaaña jámarigu jagía ja aganoúbaña Israél, loúnajei túmoun ában to aganoúboun Sarépta, yaráfa lun ubúru Sidón. ²⁷ Níñanu meja gíñe sarágu gawágutiña gumein luágu jára ñi Israél lídan lidáani proféta Eliséo, úati ni ában jádaangiñe areídawaguagüdüti lueidügüya Naamán le Sírriana.

²⁸ Dan le jagáambunbalin sun ja ñiñaña liglisirugu cátei le, ába jagáñidun sarágu. ²⁹ Ába jásaarun, ába jaságaruni Jesúsu bougudín lueí fulásu, ába janúgüni lálbulugun wúbü le gagíbuagubalin fulásu lun jájuchuruni ñígiñe. ³⁰ Ába lásügürün Jesúsu jamídaanguágiñe jámagua, ába lídin.

Ában wügüri gawáguti espíritu wuríbati
(Mr 1.21-28)

³¹ Ábati lídin Jesúsu Capernaúm, ában fulásu le lídaanbei Galiléa, ába larúfudajan joun güriña ñi lídan wéyu le eméraaguagülei. ³² Weirititi janígi láu ligáburí larúfudajan, ladúga láu ubáfu ladímureja.

³³ Níñeinti ában wügüri liglisirugu, gawáguti espíritu wuríbati, ába lagúaragun ítara.

³⁴ —Ígira báwa, ¿ca uágu bemétera wámoun, Jesúsu le Nazarétna? ¿Bíabiña agúnrinchaguawa? Subúdi numúti, áni subúdi numúti luágu amúrú lan Liraú Búngiu le sándubei.

³⁵ Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe güriña le!

Ábati lájuchuruni espíritu wuríbati wügüri ligía múarugun jagíbugiñe súngebui, ába láfuridun lídaangiñe, mabúleiseirunga. ³⁶ Ába laweíridun janígi súngebui, ába jaríñagun jámagua.

—¿Cáteisán buri dimúrei le? ¡Adímurejati wügüri le láu gumádi lúma ubáfu joun espíritu wuríbatiña, ába jáfuridun!

³⁷ Adímurejóatiti buri luágu Jesúsu lídan sun fulásu geyégua.

Lareídaguagüdünnun Jesúsu límenidi Pédro
(Mt 8.14-15; Mr 1.29-31)

³⁸ Ábati láfuridun Jesúsu tídaangiñe jalígilisin juríu, ába lídan líbiñoun Simón. Sándiñounti límenidi Simón, tabíruajaña, ába jayúmragun lun Jesúsu lun lareídaguagüdünnun. ³⁹ Ába lélemuchun Jesúsu tuágun, ába ladeínjan lun abíruai, ába lagídarun abíruai tufeí. Lídan méme óra ligía ába tásaarun, ába tagúmeserun eténira joun.

Lareídaguagüdünnun Jesúsu sarágu sánditiña
(Mt 8.16-17; Mr 1.32-34)

⁴⁰ Sun ja añájeinbaña sánditiña jábiñe, dan le láfuachun wéyu ába janúgüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmiegurügü sándi le jawáguti. ⁴¹ Sarágu jaña gíñe ja gawágutiña espíritu wuríbatiña, ába jagídarúniwa jaweí, ába buri jagúaragun ítara.

—Amúrú le Liraúbei Búngiu.

Ába ladeínjan Jesúsu joun espíritu wuríbatiña, mígirun lumútiña lun jadímurejan, ladúga subúdi jamúti luágu ligía lan Crístubei.

Lapúrichijan Jesúsu Galiléa
(Mr 1.35-39)

⁴² Dan le larúgadunbei, ába láfuridun Jesúsu bougudín lueí ubúru lídoun ában fulásu mageírawati. Ába jáluajani güriña, ába jachúlürün le ñíjin lubeí, buséntiña yebe jeréderuni lueí lídin, ⁴³ ába laríñagun joun.

—Gásu gíñe níchuguni ugánu le luáguti larúejan Búngiu joun lílana líbiri fulásu, ladúga lun líra nóunajóua.

⁴⁴ Ítara líña lídin apúrichijaina tídan buri jalígilisin juríu, Galiléa.

5

*Esénijani le láubei miláguru**(Mt 4.18-22; Mr 1.16-20)*

¹ Luágu ában dan, ñíñein Jesúsu láru dúna le Genesarét, ábati jayábingua sarágu güriquia darí lun jámurudaguni, ladúga busén jamá jagáambuni lerérun Búngiu. ² Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin. ³ Ábati ládinun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladísedun murúsun luef láru béya. Ábati lañúurun Jesúsu tídan ugúnein, ába lagúmeserun arúfudaja joun güriquia ñígiñe. ⁴ Dan le lásurunbei ladímurejan, ába laríñagun lun Simón.

—Jefba méme anágün, ábame jágurun ñi.

⁵ Laríñaga Simón lun.

—Maésturu, ñadímeinjadiwa sun áriebu, mañúguntiwa ni cáta, quei amúrú lubei aríñagubalin, wágura.

⁶ Ába jágurun, dan le jiñúruginbárun séni, ñíñanu sarágu úduraü tídan darí yebe lun tajeíridagun. ⁷ Ábati jadúgün seíni joun jibirigu ja tídaanbaña to ában ugúnein lun jayábin íderaguaña. Ába jayábin, ába jabañchagüdünnun biángubei ugúnein darí yebe lun tadíbiragun. ⁸ Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladúga ában wügúri gafígounti nugúya.

⁹ Laríñagubalín Simón líra ladúga laweíridun lanígi, jáu sun ja úarabaña lúma, luágu añúguni le jadúgubei. ¹⁰ Weíríti gíne janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.

—Manúfudebá, lúmagiñe guetó buwádigimarida adíaja güriquia nun.

¹¹ Lárígiñeti játürün, ába jígiruni sun cátei, ába jóúdin lúma Jesúsu lun láni jamá disípulugu.

*Lareidaguagüdünnun Jesúsu ában gawáguti gumeínluágu sun lúra**(Mt 8.1-4; Mr 1.40-45)*

¹² Luágu ában dan, lídaañein ában fulásu Jesúsu, le ñí lubei ában wügúri gawáguti gumeín luágu sun lúra. Dan le laríjínbalin wügúri ligía Jesúsu, ába lájuduragun dagá ligíbu múarugun, ába layúmuragun lun ítara.

—Nabúreme, áñjabu busén, gayáraati bareídaguagüdünnina.

¹³ Ábati lagúruruni Jesúsu láu lújabu, ába laríñagun.

—Buséntina, areídaguabá.

Quei laríñagun ítara, ába lagídarun gumeín luef wügúri ligía, ¹⁴ ábati laríñagun Jesúsu lun lun mabájüdagun láani cátei le ni ca un. Laríñaga lun.

—Ñúdünrügübá, arúfudagua búngua lun fádiri, rúbeíme edéweejani le uágubei laríñaga lilúrudun Moisés luágu barúmadun, aríja jamámugei güriquia luágu areídaguaadib lan.

¹⁵ Eíbu dan, eíbu labúruchaguntima luágu Jesúsu, sarágu jañátija güriquia oúndaragutiña lun jagáambuni lúma lun lareídaguagüdünni jasáñdi. ¹⁶ Ábaja lídin Jesúsu le ñíjin lumúti úa jamá güriquia lun layúmuragun lun Búngiu.

*Lareidaguagüdünnun Jesúsu ában fadáguaali**(Mt 9.1-8; Mr 2.1-12)*

¹⁷ Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñúbintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdünniña sánditiña.

¹⁸ Ábati jayábin fiú wügúriña barúina ában wügúri fadáguaali tídan ában ubárari, jálugati jebélaagüdünni le ñíjin lubei Jesúsu lun laríjini. ¹⁹ Madáritiña jalágiñeba lan jebélura ladúga jíbe güriquia, ábati jaweírun tabulugun múna, ába jagídarun murúsun luegiñe lougiñe le

ñí lubei Jesúsu, ába jarárigüdüni sánditi tídan lubárari ligíbugiñoun. ²⁰ Dan le laríjnbalin Jesúsu affñeni le jawágubei, ába laríñagun lun sánditi ligía.

—Wügúri, ferúdunawaali biffgoun.

²¹ Ábati jariñagun arúfudajatiña lilúrudun Moisés jáma fariséogu jóunguarügü.

—¿Cáteisan güriñgia le, le minébenejabubei lun Búngiu láu ligáburi ladímurejan? Úati ámu gayáraati ferúduna lan figou luefidügüya Búngiu.

²² Subúdi lumúti Jesúsu ca lan jasáminabei, ába laríñagun joun.

—¿Ca uágu jasáminara ítara? ²³ ¿Cátima méreengünbei laríñawagun. “Ferúdunawaali biffgoun”, ódi “Sarába, beíbuga”? ²⁴ Narúfudaaliti jun luágu gayára lan ferúduna nan figou, áu le Wügúri Garaúwarügüti.

Ábati laríñagun lun le sándibei.

—Sarába, barúboun bubárari, beíba búbiñoun.

²⁵ Lídan óra ligía, ába lásaarun sánditi ligía jagíbugiñe, ába labúdunun lubárari tó buga ídaanboun larounra, ába lídin lúbiñoun adímurejeina luágu luweírigun Búngiu. ²⁶ Ába laweíridun janígi súngubei, ába jadímurejan luágu luweírigun Búngiu, ába jariñagun láu luweírín janígi.

—Aríjaadiwa cátei weíriguti ugúñe.

Lagúarun Jesúsu lun Leví lun lánime disípulu

(Mt 9.9-13; Mr 2.13-17)

²⁷ Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíríti Leví, ñun líña lídan fulásu le ñí lubei lagúburaja, ába laríñagun Jesúsu lun.

—Falábana, queímoun núma queísi náni disípulu.

²⁸ Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi láni disípulu lúmagiñe óra ligía.

²⁹ Lárigiñe, ába ladúgün Leví ában ouñwenbun fédu lun Jesúsu, lúbiñe, ññanuti sarágu agúburajatiña liseínsuna gumádi jámaya ámu güriñgia ñun luágu dábula jáma. ³⁰ Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma láni disípulugu, ába jariñagun joun.

—¿Cásan uágu jeígnbei jáma agúburajatiña liseínsuna gumádi lúma jáma ámu gáfí-gountiña?

³¹ Laríñaga Jesúsu joun.

—Ja magádiebaña, memégeirúntiña surúsia, aná ja sándibaña. ³² Máma niábiña áluaja magádiñe ligíbugiñe Búngiu, niábiña áluaja gáfí-gountiña lun lasáansirún jóuserun.

Jálügüdüni Jesúsu luágu ayúnaruni

(Mt 9.14-17; Mr 2.18-22)

³³ Ábati jariñagun lun Jesúsu.

—¿Ída liñásan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, jóutiña, gurá jagía súnwandan?

³⁴ Ába laríñagun Jesúsu joun.

—¿Gayáraati funági jayúnaragüdüniña güriñgia ja jamísurajan lídoun ában maríei sun niján lan adári jáma ñí? ³⁵ Lachúlürüba dan lun lídin adári, ligíameti jayúnarun.

³⁶ Rúti giñe Jesúsu ában jémpulu joun luágu iséri larúfudajan lúma binádu, laríñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladúga ítara, lagádeiruboun to isérigiruboun, áni merédebei giñe murúsun gamísa iséri ligía buídu tuágu anáanguni ñulújaru tugúya. ³⁷ Michuguntu giñe diweín iséri lídoun guéru ñulújali, ánjein adügüwa ítara, tajeíridagubei diweín iséri guéru ñulújali, féridiméti diweín, féridi guéru. ³⁸ Ligía lúnti lubeí tíchugún diweín iséri lídoun guéru iséri, ítara lúba lesériwidun guéru, seríwi diweín. ³⁹ Úati giñe átuti diweín to binádu lun labúseerunun to iséri lárigiñe, laríñaguba. “Buítimaatu to binádu.”

6

Jabúdajan disípulugu türígu lídan wéyu le eméraaguagülei

(Mt 12.1-8; Mr 2.23-28)

¹ Luágu ában wéyu le eméraaguagülei, efbugeina líña Jesúsu labádinagua nádü jáma láni disípulugu, átüjeina jagiati disípulugu lin türígu, ába jéferejani láu jájabu, ába jeigini líla. ² Ábati laríñagun jádaangiñe fariséogu joun.

—¿Cásan uágu jadúga wadágimanu le moún lumuti ladügún lídan wéyu le eméraaguagülei?

³ Laríñaga Jesúsu joun.

—¿Malíjangidün luágu le ladügübei David luágu ában dan, dan le lálamachunbei jáu sun ja úarabaña lúma? ⁴ Ába lebélorun tídoun lúban Búngiu, ába lanúgün tídaangiñe fein to sagraúboun, jou ligía tídaangiñe, ru ligía joun ja úarabaña lúma, láu sun fádírigo rügüñanu lán yebe lúnbaña jeigin tídaangiñe fein tugúya, según lilúrudun Moisés, áni máma figou le ladügübei David ligíbugiñe Búngiu.

⁵ Aríñagati gíñe joun.

—Gabáfutina, áu le Wügúri Garaúwarügüti, lun naríñagun cába lan gayára ladügüniwa wéyu le eméraaguagülei.

Wügúri le jilálabei újabu

(Mt 12.9-14; Mr 3.1-6)

⁶ Lídaanya ában wéyu le eméraaguagülei, ába lebélorun Jesúsu tídoun jalígílin juríu, ába lagúmeserun arúfudaja. Níñein ában wügúri jiláali lújabu le loúnwenren, ⁷ añájati arúfudajatiña lilúrudun Moisés jáma fariséogu aríaa jei Jesúsu ánjein lagáranijaba lubei lun lídan wéyu le eméraaguagülei, lun jadárirun lidúnrun. ⁸ Subúdi lumúti ca lan jarítagebei, ába laríñagun lun wügúri le jilálabei újabu.

—Sarába, ráramabá wagíbugiñe.

Ába lásaarun, ába laráramun ñi. ⁹ Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügún lídan wéyu le eméraaguagülei, buídu ódi wuríbani, lasálbarun ibágari ódi lagídarún?

¹⁰ Ábati laríñaguniña Jesúsu sun ja geyégubaña láu, ába laríñagun lun wügúri ligía.

—Tulébei bújabu.

Ába látuleruni, ába lareídagun. ¹¹ Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmuchun láu Jesúsu.

Lanúadajaniña Jesúsu dúusu apóstolugu

(Mt 10.1-4; Mr 3.13-19)

¹² Lídoun dan ligía, ába lídin Jesúsu luágun ában wúbü ayúmuragua lun Búngiu. ¹³ Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu. ¹⁴ Niján jíríbei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé, ¹⁵ Matéo lúma Tomás, Jacóbo, le liraú Alféo, Simón, le áfaaguti lun jawáanserun juríu, ¹⁶ Júdas, le lamúlen Jacóbo, lúma Júdas Iscarióte, le alúgurubalin Jesúsu.

Larúfudajan Jesúsu joun sarágu güriña

(Mt 4.23-25)

¹⁷ Ába larárirun Jesúsu jáu luegiñe wúbü, ába leréderagun jáu láni disípulugu lídan ában fulásu le ñí lumuti sagádi wásati, ñíñanu gíñe sarágu güriña núbintiña loúbawagüñe Judéa, Jerusalén, lúma lárurugüñe Tíro lúma Sidón. Sun güriña ja, jayábiña lun jagáambuni lapúrichijan Jesúsu lúma lun lareídaguagüdüni jasándi. ¹⁸ Já buri asúfurirubaña jáu espíritugu wuríbatíña, areídaguatiña gíñe. ¹⁹ Álugatiña sun güriña jagúrurun luágu Jesúsu, ladúga areídaguagüda lumútiña súngubei láu lubáfu.

Fuleiseiwatiña jáma fugiábugu

(Mt 5.1-12)

²⁰ Ábati laríjin Jesúsu jawágun láni disípulugu, ába laríñagun joun.

—Fuleiseiwatün, jugúya le mégeibe, ladúga ménreengúnbei jun lun jebélurun lídoun larínejan Búngiu.

²¹ ‘Fuleiseiwatün, jugúya le áfaagubei ilámaü guetó, ladúga jaquímuleduba.

‘Fuleiseiwatün, jugúya le ayájubei guetó, jéjerajaba larígiñe.

²² ‘Fuleiseiwatün dan le iyéreegu jumá joun güri-gia nueígiñe, dan le jabúgagunün jawáriu, dan le janábagunün, dan le janúgüni jíri queé ni cáta, quei cátei wuríbati, nueígiñe, áu le Wügüri Garaúwarügüti. ²³ Gúnda jumá sarágu, buin jumá láu ugúndani lídan wéyu ligía, ladúga jibíjuba ában óunwenbun afáyeirujau siélu, ítara méme líña meja jadúga binádu jagúbürigu güri-gia ja joun profétagu.

²⁴ ‘Fugiábugu jugúya, jugúya le rísibe, ladúga ibíja jumáali sun ugúndani le lúnbei jibíjini.

²⁵ ‘Fugiábugu jugúya, jugúya le químulebei, ladúga jalámachuba.

‘Fugiábugu jugúya le éjerajabei guetó, ladúga jayájujajaba láu íruni.

²⁶ ‘Fugiábugu jugúya dan le sun jamá güri-gia adímureja buíti juágu, ítara líña meja jadímurejan binádu jagúbürigu buíti jawágu profétagu yéetiña.

Jínsiñe jamá jáganiñu jun

(Mt 5.38-48, 7.12)

²⁷ ‘Niján nerérun jun, Jugúya le agáambubalina. Jínsiñe jamá jáganiñu jun, adúga jumá buíti joun ja iyéeejabúbaña jun, ²⁸ biní jumaña ja ínragutün, ayúmuragua jumá jawágu ja anábagutün. ²⁹ Ánjabu láfara ában güri-gia luágu ában louba bigíbu, rúbei gíñe le ában louba lun, le anúgüti babíte bueí, rúboun gíñe bisímisin lun. ³⁰ Furúmiegurügü le amúriajati búma, rúba lun, le anúgüti bumégen, máluajabei lúma. ³¹ Le cátei le babúseerubei ladúgün bun, ligíalá badúga joun ámu.

³² ‘Ánjin já rügúnanu lubeí jínsiñejabúbaña jun jínsiñe jun, ¿ca buíti jadúgübei láu líra? Ásta gáfígountiña, ítara líña jadúga. ³³ O ánjaün lan adúga buíti jounrügü ja adúgübaña buíti jun, ¿ca buíti jadúgübei láu líra? Ítara líña gíñe jadúgün gáfígountiña. ³⁴ Ánjaün afúredeija jounrügü ja úmagiñebaña jaritagua jibíjin som cátei, ¿ca buíti jadúgübei láu líra? Afúredeijatiña gíñe ja wuríbabaña joun wuribatiña jáledi, agúrabañu jagía gíñe jabíjin som cátei jámagiñe. ³⁵ Ánjin jugúya, lúnti jínsiñe jamá jáganiñu jun, adúga jugúyame buíti, afúredeija jugúyame, magúrabajaanga ni cáta lewéñegua. Ítara lúba weiri lan jafáyeirujaja lúmagiñe Búngiu le ínugubei, áni lirájüñübadün gíñe le tímatimaati, ladúga ligía, fuleiseijabúti gíñe joun ja meteíngiradibaña lúma joun ja wuríbabaña. ³⁶ Gudémejabu jumá, quei gudémejabu lan júguchi Búngiu.

Madímureja jumá wuríba jawágu ámu

(Mt 7.1-5)

³⁷ ‘Madímureja jumá wuríba jawágu ámu, ábame gíñe maríñagun lan Búngiu luágu wuríba lan jigáburí. Míchiga jumá jadúnrun ámu, míchun lámuga gíñe Búngiu jidúnrun. Ferúduna jumá, ferúduna lámugaün gíñe Búngiu. ³⁸ Rújuma joun ámu, ru lámuga gíñe Búngiu jun. Líchuguba Búngiu sarágu jun, ladúgüba jun queígubeirügü jadúga joun ámu.

³⁹ Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme júyu? ⁴⁰ Úati ni ában disípulu wefriguti lueí lumáesturun, íbini ánjin lagúmucha latúriajan, chülúrügübei quei lumáesturun.

⁴¹ ‘¿Ída líña gayára bubálin liraúraü ífee le lídaanbei lágu bíbugaña aríja, áni masándi bumúti durúsu le lídaanbei bágu? ⁴² ¿Ída líña gayára lubeí baríñagun lun bíbugaña.

“Sagánei liraúraü ífei le bágurugubei”, áni masándi bumúti durúsu le bágurugubei? ;Biánguañein bigíbu! Sagábei durúsu le bágurugubei furúmiñe, gayára lámuga baríjini liraúraü ífei le lágurugubei bíbugaña buídu lun baságaruni.

Luágu lin tídibu wéwe tasúbudirúa

(Mt 7.17-20, 12.34-35)

⁴³ ‘Úati tídibu wéwe buíti lun wuríba lan lin, úati gíñe tídibu wéwe wuríbati lun buídu lan lin. ⁴⁴ Sun tídibu wéwe subúdiwati luágu lin, mátüjountu ígo lueígiñe jíyu, ni berbei lueígiñe guríbiyuwa. ⁴⁵ Gürígia le buídubei, cátei buíti laríñagubei ladúga cátei lan buíti tídaanbei lanígi, gürígia le wuríbati, cátei wuríbati laríñagubei ladúga cátei lan wuríbati tídaanbei lanígi. Luágu le laríñagubei gürígia lasúbudirúa ca lan tídaanbei lanígi.

Bián ébuu

(Mt 7.24-27)

⁴⁶ ‘¿Ca uágu jaríñaga luágu áu lan Jabúremebei áni madúgün jumúti le nubefbei? ⁴⁷ Naríñagaali jun ida líña lan le núbini nun áni adúgaleí le nubefbei. ⁴⁸ Ítara líña quei ában wügúri le ábunagubei ában múna, achíajati julíli furúmiñe, ába lábununi wagábu labádinagua dúbü derébuguti. Dan le liñúrubei dúna, ába liábin fulúdu láu érei tuágun múna tugúya, siñá lumutu ánjingicha ladúga luáguñoun lan ébuu derébuguti. ⁴⁹ Anjeinti le agáambubalina áni madúgün lumúti le nubefbei, ítara líña quei ában wügúri le ábunagubei lúban ligíbuagu ságoun, mawágaburiga, dánti le liñúrubei dúna, ába liábin fulúdu láu érei tuágun, ába teíguadun, ába tagúnrinchagun le gumúti.

7

Lareídaguagüdüni Jesúsu lumúsun ában gumándan Rómana

(Mt 8.5-13)

¹ Dan le lásurunbei ladímurejan Jesúsu joun gürígia, ába lídin Capernaúm. ² Níñein ában gumándan Rómana ñi, láu ában lumúsun jinsiñeti lun sarágu, sándiñein músu ligía, yaráfa lun loúnwen. ³ Dan le lagáambunbei gumándan ligía luágu Jesúsu, ába loúnajan fiú jádaangiñe wügúriña weírigutiña lídan jafíñen juríu lun jayúmuragun lun Jesúsu lun lídin areídaguagüdei lumúsun. ⁴ Ába jóúdin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le, ⁵ ladúga jinsiñetiwa wagía juríu lun, ligía guánarügü ábunaguagüdübarun walígilisin.

⁶ Ábati lídin Jesúsu jáma, dan le yaráfaaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manúgün ban bubéresegun núdün lúbiñe, luágu nege madúna lan lun bebélurun lúbiñoun, ⁷ ligía nege mídin lubei lúngua álugabu. Rúrügübeí dimúrei, ábame lareídagun lumúsun. ⁸ Ladúga ligía nege gíñe lábugiñeñein gumádi ínutimaati, áni añájein gíñe súaara lábugiñe lagúmadijan. Dan lé nege laríñagun lun ában jádaangiñe lun lídin, núdünti, dan le laríñagun lun le ában lun liábin, núbinti, áni dan le loúnajani lumúsun adúga som cátei, adúga lumúti. Ítara lúba nege, luágu berérun mósu lídin sándi lueí lumúsun.

⁹ Dan le lagáambunbalin Jesúsu cátei le, weíríti lanígi láu wügúri ligía, ába laríjin jawágun gürígia ja afálarubalin, aba laríñagun joun.

—Ninárün jáu, ni íbini jádan Israelítagu madárigidina afíñeni weíríti quei lafíñen wügúri le.

¹⁰ Dánti le jachúlürünbei wügúriña ja núdünbaña álupei Jesúsu járigoún lúbiñoun gumándan, areídaguaaali lumúsun.

Láguyuagüdüni Jesúsu tiraú ában jiláali túmari

¹¹ Lárigiñe cátei le, lídiña Jesúsu lídoun ában ubúru gu gíriti Naín, úareina jáña láni disípulugu lúma, jáma sarágu güri gía. ¹² Dan le lachúlürünbei yaráfa lun lubéneri ubúru gu ligía, ába laríjin jóudin ábunaja ában jiláali le ligíarügüti tiraú lúguchu to jiláali túmari. Sarágu jáña lílana fulásu ñúdüñ ábunaja túma. ¹³ Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

¹⁴ Ába layárafadun, ába lagúrurunun gánjoun, ába jaráramagun ja anúgübaña. Ába laríñagun lun jiláali.

—Írájü, ñaríñaguña bun lun básaarun!

¹⁵ Ábati lásaarun lé buga jiláalibe, ába lagúmeserun adímureja. Ába ledéregeruni Jesúsu tun lúguchu. ¹⁶ Dan le jaríjinbalin güri gía cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chülúgua ában proféta weíriguti wádoun.

Aríñagatiña gíñe.

—Ñúbinja Búngiu íderaguawa, wagía le lumútuniña.

¹⁷ Ába lagaambúniwa cátei le ladúgübei Jesúsu lídan sun Judéa lúma geyégua láu.

Louñagülegu Juan le abásteragüdjabei

(Mt 11.2-19)

¹⁸ Agáambati Juan luágu sun cátei le, abájüdagua jamúti lánigu lun. Ábati lagúarun joun bíama jádaangiñe, ¹⁹ ába louñajaniña álügüdei Wabúreme Jesúsu ánjein ligía lubeí Crístubei le lúnbei liábin, o ánjein jagúrabajaba lubeí ámu. ²⁰ Dan le jachúlürünbei le ñí lubei Jesúsu, ába jayárafadun, ába jaríñagun lun.

—Louñajañadiwa Juan le abásteragüdjabei álügüdüba ánjein amürü lubeí Crístubei le lúnbei liábin, o ánjein lun lubeí wagúraben ámu.

²¹ Lídan méme óra ligía, areídaguagüdati Jesúsu sarágu güri gía lídaangiñe jasándi lúma jasúfurirun, lúma jádaangiñe espirítugu wuríbatíña, aríjagüda ligía gíñe sarágu maríjintiña. ²² Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdagua me lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jáguuyugun jiláaña, lúma luágu líchugún ugánu luáguti asálbaruni joun gudémetiña. ²³ Gúndaati gíñe güri gía le meféridirun lumúti lafíñen nuágu.

²⁴ Lárigiñe jóudin já buga louñajabaña Juan, ába lagúmeserun Jesúsu adímureja luágu Juan joun güri gía, laríñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali?

²⁵ Ánjein máma lubeí ítara líña, ¿cáti jídinbei aríja? ¿Ában wügüri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu. ²⁶ Lídan linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügü láu proféta. ²⁷ Juan, ligía ouñagülei le uágubei taríñaga Lerérun Búngiu.

Nouñajañein nouñagüle bubáragiñe

lun laráansejani úma bubá.

²⁸ Quei naríñaguni jun, jádan sun güri gía, úagili proféta weíriguti lueí Juan, áni láu sun líra, weíriguti le únabutimaabei lídan larúeijan Búngiu sügü láu le anúgarügübalin ugánu luágu arúejani ligía.

²⁹ Dan le jagáambunbalin sun güri gía, ásta ja agúburajabaña liseínsuna gumádi, cátei le, ába jaríñagun luágu richá lan Búngiu láu laríñagun liyúmulugugiñe Juan luágu lúnti lan jasaansiraguni jagáburi. Güri gía jagía, resíbi jamáali meja labásteragüdjagan Juan,

³⁰ ánjañati jibe-ágei fariseógu jáma arúfudajatiña lilúrudun Moisés, májatiña meja lun

jadúgüni le luberbei Juan, merésibirun jamúti lé yebe labúseerubei Búngiu ladúgün luágu jafúleisein. ³¹ Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei? ³² Ítara jáña quei irájüñü ja añúurubaña mágídirugu ájurera, ába jagúaragun joun jibegu. “Íñaajatiwa fídu jun, mabínajantün, erémujatiwa urému jíruti jun, mayájuntün.” ³³ Ladúga nübinti Juan le abásteragüdajabei, lé meja meíginbei fein, mátun ligía diweín, aríñagatün luágu gawágu lan espíritu wuríbati. ³⁴ Lárigiñe, ába niábin, áu le Wügúri Garaúwarügüti, jótina áni gurá áu. Jaríñaga luágu geígadina, gátadi, jamáda áu nege gafígountiña jáma agúburajatiña liseínsuna gumádi. ³⁵ Wel, ja chúbaña áu, subúdi jamúti luágu buídu lan le ladúgübei Búngiu láu lichú láu.

Jesúsu lúbiñe Simón le fariséo

³⁶ Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan. ³⁷ Níñounti ában wúri wuríbati témeri lídan ubúruigu ligía, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti. ³⁸ Ába taráramun lanágangiñe Jesúsu, lubádu lugúdi, ába tadúdüragüdüni lugúdi láu táguira. Nuján ayájuaaja, nuján arágajei láu tídiburi, nuján achújei lugúdi, ába téseruni ibíñei luágun. ³⁹ Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügúri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.” ⁴⁰ Ábati laríñagun Jesúsu lun fariséo ligía.

—Simón, níjein ában cátei lun naríñaguni bun.

Laríñaga fariséo.

—Aríñagabei nun, maésturu.

⁴¹ Laríñaga Jesúsu lun.

—Níñanu bián wügúriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san. ⁴² Queíti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi jádaangiñe jínsiñejabutima lun afúredeijati ligía?

⁴³ Laríñaga Simón lun.

—Lídan narítangun, le gíbetimaabei adúweijan.

Laríñaga Jesúsu lun.

—Richátibu.

⁴⁴ Ába laríjin Jesúsu tuágun wúri tugúya, ába laríñagun lun Simón.

—¿Ariagu bíña tun wúri to? Belútina búbiñoun, míchutibu dúna nun lun nachíbuni nugúdi, ánjounti wúri to, ágawagüda tumúti nugúdi láu táguira, ába tamábeidagüdüni láu tídiburi. ⁴⁵ Machú bumútina, ánjoun tugúya, lúmagiñe nebélorun, merédegili tachújani nugúdi. ⁴⁶ Míchutibu aili nábulugu, ánjoun tugúya, túguatu ibíñei jémeti luágu nugúdi.

⁴⁷ Ligía naríñagunbei bun luágu arúfuda láani luweírín tínsiñejabu luágu ferúdunawa lan líbe tifígoun, ánjeinti gürígia le míbeti ferúdunawa lan, míbeti ínsiñeni larúfudun.

⁴⁸ Ábati laríñagun Jesúsu tun wúri tugúya.

—Ferúdunawaali bifígoun.

⁴⁹ Ábati jagúmeserun amísurajóutiña ja ñúnbaña lúma ñi aríñaga jámagua.

—¿Cáteisán wügúri le, ferúduna lubeí gíñe figoú?

⁵⁰ Ába laríñagun Jesúsu tun wúri tugúya.

—Sálbawádibu lídaangiñe bifígoun ladúga baffñerun nuágu, beíba darángilañu.

¹ Lárigiñe cátei le, ñúdünti Jesúsu lídoun sarágu ubúruгу lúma buri lirájüñü fulásu íchigei ugánu buíti luágu larúeijan Búngiu. ² Ñúdütiña dúusu apóstolugu lúma jáma würiña ja lareídaguagüdübaña jádaangiñe espíritugu wuríbatíña lúma sándi. Níñoun María to gíriboun Magdaléna jádan, to ídaangiñeboun jáfurida sedü espíritugu wuríbatíña, ³ ñíñoun gíñe Juána, to lúmari Chúza, le oúnigirubarun lúban Heródes, ñíñoun Susána, jámaya sarágu ámu ja íderagubálin láu le jámati.

Jémpulu luáguti ábunaguti

(Mt 13.1-9; Mr 4.1-9)

⁴ Sarágu jáña güri-gia ñúbinburitiña lídaangiñe sarágu fulásu lun jarjini Jesúsu, dánti le oúndaraguaaña, ába ladímurejan Jesúsu joun láu jémpulu. Laríñaga joun.

⁵ —Furíti ában ábunaguti ábunagua líla nádü, dan le afúrujeina láani, ába láburujan lídaangiñe luágun úma, ába jadügüraguni ásügürütiña, ába jegini dunúru. ⁶ Líbiri, ába láburujan labádinaguóun dúbü, dánti le labóuchun, ába lásaurün ladúga lumábei fulásu. ⁷ Ába láburujan líbiri labádinaguóun jíyu, ába láfaruni jíyu le ájüchübei úara lúma. ⁸ Níñein gíñe lídaangiñe, áburujati lídoun múa buíti, dan le laweínamudun, gin ligía, buíti lalúbajóun, cáda ílaü rüti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu

(Mt 13.10-17; Mr 4.10-12)

⁹ Ábati jálügüdüni láni disípulugu ca lan lílabei jémpulu le. ¹⁰ Laríñaga joun.

—Jugúya, subúdigüda láali Búngiu cátei arámudaguati le luágutibeí larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun lun íbídiñebeí lan líla cátei le jarjibeí joun, lun gíñe úa lan gunfaráanda jamáni cátei le jagáambubei.

Lafúnraanguagüdüni Jesúsu jémpulu luáguti ábunaguti

(Mt 13.18-23; Mr 4.13-20)

¹¹ Ába laríñagun Jesúsu joun.

—Níjan líla jémpulu ligía. Líla nádü, ligía lerérun Búngiu, ¹² úma le ñíjin lubeí láburuja lídaangiñe líla nádü, jagía güri-gia ja agáambubalin lerérun Búngiu, ába líabín Máfia, ába lagídaroni tídaangiñe janígi lun maffínerun jamá, masálbarun jagíame. ¹³ Dúbü le ñíjin lubeí láburuja líbiri líla nádü, jagía güri-gia ja agáambubalin lerérun Búngiu, ába jerésibiruni láu ugúndani, áni márügüdünti jádan buídu, affíñetiña luágu murúsun dan, áni dan le jóuchawagún, mawándun jamúti, ába jeféridiruni jaffíñen luágu Búngiu. ¹⁴ Jíyu le ñíjin lubeí láburuja líbiri líla nádü, jagía güri-gia ja agáambubalin lerérun Búngiu, ába jasígiruni binádu jagáburi, ába jasígirun arítagua luágu irisini lúma ugúndani le lánina ubóu le, úati fulásu jarítagurugun lun lerérun Búngiu, siñátiti laságarún cátei buíti jádaangiñe. ¹⁵ Ánjeinti múa buíti le ñíjin lubeí láburuja líbiri líla nádü, jagía güri-gia ja agáambubalin lerérun Búngiu táu anígi buítu, adúga jagía gásu láu lerérun, eíbuga jagía quei lubúdubu, sagáwati cátei buíti jádaangiñe.

Jémpulu luáguti lámpu

(Mr 4.21-25)

¹⁶ Ába laríñagun Jesúsu.

—Úati güri-gia ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdün múnada, lun gayára lan jarjijn ja ebélurubaña jabárua. ¹⁷ Úati lubeíti ni cáta arámudaguati lun mafúnraangudun lan, úa ni cáta le íbídiñewati lun machúlürün lan dan lun lasúbudirúniwa lúma lun lafúnraangudun.

¹⁸ ‘Gagáambadi jumá lubefti buídu lun lerérun Búngiu, le gámati lerérun Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tídan lanígi, íbini le uágubei laritagua luágu níjein lan lúma, lagídarúaba lueí.

Lúguchu Jesúsu jáma lamúlenu

(Mt 12.46-50; Mr 3.31-35)

¹⁹ Ábati tachúlürün lúguchu Jesúsu jáma lamúlenu le ñíjin lubeí Jesúsu, siñáti jayárafadun lun ladúga jíbe gürígia. ²⁰ Ába laríñawagún lun.

—Nujántia búguchu jáma bamúlenu bougudi áni buséntiña jaríjinibu.

²¹ Ába laríñagun joun.

—Ja agáambubalin lerérun Búngiu, úara jagía lúma, jagía nóguchubaña jáma namúlenu.

Lagálumaduni Jesúsu léroura

(Mt 8.23-27; Mr 4.35-41)

²² Luágu ában wéyu, ába ladinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóudin. ²³ Dan le anája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun. ²⁴ Ábati jóudin agágudajei Jesúsu, ába jaríñagun lun.

—¡Maésturul ¡Maésturul ¡Wadíbiragua!

Ábati lásaarun Jesúsu, ába ladeíñjan lun garábali lúma lugúdi barána, ába lagálumougadun, ába darángila lan sun cátei. ²⁵ Ábati laríñagun joun disípulugu.

—¿Ca susébebe lun jafíñen?

Ába jálügüdagun jámagua láu anúfudei lúma luweírín anígi, jaríñaga.

—¿Cátei funásan wügúri le, gumádi lubáli garábali lúma lugúdi barána áni agáamba jameí?

Wügúri Gadárana le gawágubei espíritugu wuríbatíña

(Mt 8.28-34; Mr 5.1-20)

²⁶ Ába jachúlürün louábawagun Gadára, le loubáfurugubei lagúnu, ligíbugiñe Galiléa.

²⁷ Dan le larárirunbei Jesúsu, ába liábin ában wügúri lílana fulásu ligía lubádun. Lújali wügúri ligía gawágu espíritugu wuríbatíña. Madáüti anaanguni, maganoún ligía tídan múna, lídan buri jabára jiláaña le achigíti luágu dúbü lagánawa. ²⁸ Dan le laríñbalin wügúri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera númoun, Jesúsu Liraú Búngiu le íñugutimaabei? Ayúmuraguatina bun lun masúfuriragüdün bánína.

²⁹ Laríñagunbei itara ladúga lagúmadiruñein lan Jesúsu espíritu ligía lun láfuridun lídaangiñe. Saráguja weíyaasu lartügüdüni espíritu wuríbatí ligía, ábaja jagúraguni gürígia lújabu lúma lugúdi láu güríngüri lun ledéraguagüdün, ábaja látumuraguni, ába lanúragüdüni espíritu lídoun fulásu le magefrawati. ³⁰ Ába laríñagun Jesúsu lun.

—¿Ca bíri?

Ába laríñagun.

—Lejión níribei.

Laríñagunbei luágu ligía lan líribei ladúga gíbeeña espíritugu wuríbatíña ja ebélu-rubaña lídoun. ³¹ Ába jamúriajan espíritugu jagía lúma Jesúsu lun móunajan lániña máfiougatin. ³² Quefti níñanu jamá sarágu búruju eíga luágu ában wúbü yaráfa, ába jayúmuragun espíritugu jagía lun lun loúnajaniña jádoun búruju jagía, ába lánjarun Jesúsu. ³³ Ábati jáfuridun espíritugu wuríbatíña jagía lueí wügúri ligía, ába jebélurun jádoun búruju, ábati jáguragun búruju jagía jóungua lueígiñe ában gudúungu, ába jáburujan lídoun lagúnu, ába jañáradagun.

³⁴ Dan le jarfjinbalin ja óunigirubaliña búruju cátei le asúseredubei, ába janúfudedagun, ába jeíbaagun abájüdaguei ubúruгу lúma áraabu. ³⁵ Ábati jóúdingua gürgía aríjei cátei le asúseredubei. Dan le jachúlürünbei le ñí lubei Jesúsu, ába jadáriruni wügúri le ídaangiñebei jáfurida espíritugu wuríbatíña ñun lubádu lugúdi Jesúsu, táu lanáangun, areidaguaali, ába janúfudedagun. ³⁶ Játi buga aríjubalin, ába jabájüdaguni luáguti la Reidagun wügúri lé buga gawágubei espíritugu wuríbatíña joun, ³⁷ ába jayúmuragun lílana fulásu ligía lun Jesúsu lun lídin ñígiñe, ladúga janúfude. Ábati ládinun Jesúsu tídoun ugúnein lun lídin, ³⁸ ába layúmuragun wügúri le ídaangiñebei jáfurida espíritugu lun lun lídin lúma, ába lariñagun Jesúsu lun lun leréderun, lariñaga lun.

³⁹ —Girífbubá búbiñoun, ábame babájüdaguni sun le ladúgübei Búngiu bun.

Ába lídin, ába labájüdaguni le ladúgübei Jesúsu lun lídan sun fulásu ligía.

Liraú Jáiro túma wúri to agúrurubarun lanáangun Jesúsu

(Mt 9.18-26; Mr 5.21-43)

⁴⁰ Dan le lagríbudunbei Jesúsu loubáfurugun lagúnu, ába jerésibiruni gürgía láu ugúndani ladúga sun jagía agúrabañu jáñein. ⁴¹ Ábati liábin ában wügúri gíriti Jáiro, le ábanbei jádaangiñe tábutigu jalgílisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe, ⁴² ladúga ában rügúñoun liraú, quef buri dúusu irúmu táu, touwe. Dan le lídinbei Jesúsu, ába jafálaruni sarágu gürgía darí lun jámurudaguni.

⁴³ Ñíñounti ában wúri jádan, dúusu irúmu táu láu lésejan jítau tídaangiñe. Gásta táali sun tiseínsun jawágu surúsiagu, siñá jamutu areidaguagüda. ⁴⁴ Ába tayárafadun lun Jesúsu lanáangüñe, ába tagúruruni táru lanáangun, lídan méme óra ligía ába tareidagun.

⁴⁵ Ábati lariñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába lariñagun Pédro jáma líbirigu.

—Maésturu, murúgu wañátia ya lurúma jíbe gürgía, ¿álügüdagidibu ca lan agúrurubei buágu?

⁴⁶ Ába lariñagun Jesúsu.

—Gurúwaali nuágu, ladúga sandí numuti luágu areidaguagüdaadina lan gürgía láu nubáfu.

⁴⁷ Dan le tasúbudiruni wúri tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúfesserun lun jagíbugiñe sun gürgía ca lan lébubei tagúrurun luágu áni ába lan tareidagun lídan méme óra ligía. ⁴⁸ Ábati lariñagun Jesúsu tun.

—Niraú, areidaguaadibu ladúga baffínerun nuágu. Beíba darángilañu.

⁴⁹ Ñígili Jesúsu adímureja, ligía lachúlürün ában lúbiñegiñe Jáiro, ába lariñagun lun Jáiro.

—Jilá biraú, mebérésejadügüyabá lun Maésturu.

⁵⁰ Dan le lagáambunbalin Jesúsu le, ába lariñagun lun.

—Manúfudedabá, affínerügüba, ábame tareidagun biraú.

⁵¹ Dan le lachúlürünbei Jesúsu lúbiñoun Jáiro, mígirunti lun jebélurun ámu lúma luefdügiya Pédro, Jacóbo lúma Juan jáma tagúbürigu irájü tugúya. ⁵² Jayájua sun ja ñibaña tárigi, ába lariñagun Jesúsu joun.

—Mayájua jumá, mouñwentu, tarúmugarügüña.

⁵³ Ába jéjerajan láu ladúga subúdi jamáni luágu jilá tan. ⁵⁴ Ábati lárügüdüni Jesúsu tújabu, ába lariñagun láu umálali jéreti.

—Irájú, sarába.

⁵⁵ Ába táguuyugun, ába tásaarun lídan méme óra ligía, ába lariñagun Jesúsu lun jíchugun eíginí tun. ⁵⁶ Weírítí janígi tagúbürigu, ába lariñagun Jesúsu joun lun mabájüdagun jamáni le asúseredubei ní ca un.

9

*Loúnajaniña Jesúsu dúusu apóstolugu apúrichija**(Mt 10.5-15; Mr 6.7-13)*

¹ Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatiña lúma lun jareídaguagüdün sánditiña. ² Ába loúnajaniña apúrichijei ugánu luáguti larúeijan Búngiu lúma areídaguagüdaña sánditiña. ³ Laríñaga joun.

—Manúga jumá ni cáta júmagua luágu juwefyasun—ni bádun, ni ságü, ni fein, ni seínsu. Ábanrügütá símisi janúgün. ⁴ Furúmieguarügü múna to ñijn lumúti jachúlúra, reidei jumá ñi daríjidin lídaangiñe fulásu ligía. ⁵ Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun jóungua.

⁶ Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídaguagüdeina jagía sánditiña lídan sun fulásu le ñí lumuti jóúdin.

*Loúnwen Juan le abásteragüdjabei**(Mt 14.1-12; Mr 6.14-29)*

⁷ Ába lagáambun gumádimati Heródes luágu sun cátei le ladúgübei Jesúsu, ibídiñetiti lun cába lan larítagua, ladúga ññnanu aríñagutiña luágu saráali lan Juan lídaangiñe ouweni, ⁸ jíbiri aríñaga luágu proféta Elías lan achúlaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe ouweni. ⁹ Ába laríñagun Heródes.

—Áu guánarügü oúnajabei adúrúrei lichúgü Juan. ¿Cátei funáti le, le uágubei nagáamba labájüdawagún sarágu cátei?

Ábati loúchun Heródes larjini Jesúsu.

*Leíagüdüñ Jesúsu seíngü mílu wügúriña**(Mt 14.13-21; Mr 6.30-44; Jn 6.1-14)*

¹⁰ Dan le jagíribudun apóstolugu, ába jabájüdagun lun Jesúsu luágu sun le jadúgübei. Ábati lanúgüniña lídoun fulásu mageírawati yaráfa lun Betsáida. ¹¹ Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Oúnaja baña gürígia ja, ñúdüñ jamámuga áluga jabára lun jeméraagun, áluaja jagíame eíginí lídan buri lirájüñü aúdü lúma lídan buri fulásu yaráfati, ladúga úati ni cáta ya.

¹³ Laríñaga Jesúsu joun.

—Rújuma eíginí joun.

Jaríñaga lun.

—Seíngü rügüñoun fein wáma jáma bián úduraü, ánjawa gubeírügü ñúdüñ agáñija eíginí joun sun gürígia ja.

¹⁴ Yaráfañanu jóun seíngü mílu wügúriña ñi, mabájüdünga wúrriña jáma irájüñü. Ába laríñagun Jesúsu joun láni disípulugu.

—Ñurügüda jumáña dimí dimí-san.

¹⁵ Ába jadúgüni itara, ába jañúurun súngubei. ¹⁶ Ábati lanúgünun Jesúsu seíngü fein lújaburugu jáma bián úduraü, ába larjijn siélun, ába líchuguni eteíngiruni lun Búngiu. Lá-rigíñe lagúbachagunun fein lúma úwi, ába líchuguni joun láni disípulugu lun jafánreinjani jádan gürígia. ¹⁷ Jóútiña súngubei quimúle, dan le jabúdajanun ígiragutu, buíngüdatiña dúusu faníñe láu.

Laríñaguni Pédro luágu Jesúsu lan Crístubei
(Mt 16.13-19; Mr 8.27-29)

¹⁸ Luágu ában wéyu dan le layúmuraguaña lan Jesúsu lábugua, ñiñanu láni disípulugu díseraü lueí, ába laríñagun joun.

—¿Ída liñásan jarítagun güriña nuágu? ¿Cátanasan, según jagía?

¹⁹ Ába jaríñagun lun.

—Añájein, aríñagutiña luágu Juan lan le abásteragüdajabei amúri, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe ouweni amúri.

²⁰ Ábati laríñagun joun.

—Ángi jugúya, ¿cátanagi lídan jarítagun?

Laríñaga Pédro lun.

—Crístu, le louñajabei Búngiu lun lasálbaruniña güriña, amúri.

Ladímurejan Jesúsu luágu louñwen
(Mt 16.20-28; Mr 8.30-9.1)

²¹ Ába laríñagun Jesúsu joun láu éregu lun maríñagun jamáni cátei le ni ca un. ²² Ába laríñagun joun.

—Nasúfuriruba sarágu, áu le Wügúri Garaúwarügüti. Janügübadina wügúriña weirigutiña lídan jafñen juríu, jábutigu fádorigu, jáma arúfudajatiña lilúrudun Moisés, quei ni cáta. Nafarúaba jilágubei, ábame násaarun lídaangiñe ouweni luágu lúrwíwan wéyu lúnya nabágaridun.

²³ Lárigiñe, ába laríñagun joun súngebui.

—Le busénti nánigu lan, bulfeileí cáteiñein lan, awándaleí sun luwúyeri asúfuriruni le lúnbei liábin lun, nueígiñe, queísi lanügüni ában wügúri lugúruwan, falálana. ²⁴ Ladúga le abúseeruti leséfuragun lúngua ya ubouágu lefériðirubei ibágari le magúmuchaditi, ánjein le ánjabei lefériðiruni libágarí ya ubouágu nueígiñe, libíjubei ibágari le magúmuchaditi siélu. ²⁵ ¿Cági ju lan lun güriña lagáñeiruni sun le lánina ubou, lefériðireime lubára siélu o lagúnrinchaguba lan lúngua? ²⁶ Le anügüti busíganu nuágu lúma luágu nerérun, áu le Wügúri Garaúwarügüti, nibúsigaribadina giñe láu dánme le niábin quei urúei láu luweirigun Núguchi jáma ánjeligu ja sándubaña. ²⁷ Ninárün naríñaguni jun luágu añájein lan jádaangiñe ja yábaña guetó, mouñwenbaña maríjinga jameí larúeijan Búngiu.

Lámuñedagun laríjin Jesúsu
(Mt 17.1-8; Mr 9.2-8)

²⁸ Queíburi wídü wéyu lárigiñe laríñaguni Jesúsu cátei le, ába laweínrun luágun ában wúbü ayúmuragua lun Búngiu, barú lumútiña Pédro, Jacóbo, lúma Juan lúmagua. ²⁹ Dan le niján lan Jesúsu ayúmuragua, ába lámuñedagun ligibu, ába tájarudun lanáangun, ába támiridun. ³⁰ Ábati jasáliragun Moisés lúma Elías ayánuja lúma, ³¹ geyégu líña ában larúgounga weíriti jáu, jayánujaña libügürü ouweni le lúnbei lasúfuriruni Jesúsu, Jerusalén. ³² Láu sun luweírín lidábu lágu Pédro jáma líbirigu, marúmuguntiña, aríja jamúti luweirigun Jesúsu jáma bián wügúriña ja lúmabaña. ³³ Dan le adísedeinaña bián wügúriña jagía lueí Jesúsu, ába laríñagun Pédro lun.

—Maésturu, ¡lídan dan awánja lan ya! Adúga wamá úrwíwa dibásein ya—ában bun, ában lun Moisés, túma ában lun Elías.

Ibidiñeti lun Pédro ca lan laríñagubei. ³⁴ Súnti niján lan adímureja, ába liábin ában juánriñu ouburaguaña, ába janúfudedagun ladúga jadáriragun jóungua lurágeirugu juánriñu ligía. ³⁵ Ábati jagáambun ában umálali aríñaguti lídaangiñe juánriñu ligía.

—Niraú le jínsiñebei nun le, agáamba jumeí le lubeíbei.

³⁶ Lárigiñe ladímurejan umálali ligía, ába jaríjin disípulugu luágu lábugua rügáli lan Jesúsu. Reídeitiña maníñu, maríñagun jamúti cátei le jaríjubei lun ni ában lídan dan ligía.

Lareidaguagüdüñ Jesúsú ában irájü gawáguti espíritu wuríbatí
(Mt 17.14-21; Mr 9.14-29)

³⁷ Larúgan, dan le jarárirunbei lueígiñe wúbü, sarágu jáña gürígia núdüntiña lubárouñ Jesúsú. ³⁸ Ábati lagúaragun ában wügüri jádaangiñe láu umálali jéreti, laríñaga.

—Maésturu, fuleiseijabubá nun, aríjabeí niraú le ligía rügúñeibeí, ³⁹ níjein ában espíritu wuríbatí luágu, dan le lárügüdüni, ába lagúaraguagüdüni, ába louwejan, ába láfurijan jacútaü liyúmulugugiñe. Añáwuriya lumúti, májati lígiruni. ⁴⁰ Ayúmuraguadina joun bání disípulugu lun jaságaruni espíritu wuríbatí le lueí, siñá jamuti.

⁴¹ Ába louñabun Jesúsú, laríñaga.

—Jugúya gürígia mafíñeradiñiña, wuríbatíña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barúbei biraú ñájoun.

⁴² Dán yebe le lídin irájü ligía lun, ába lájuchuruni espíritu wuríbatí múaragún, ába louwejagüdüni, ába ladeínjan Jesúsú lun espíritu wuríbatí ligía, ába lareidaguagüdüni irájü, ába ledéregeruni lun lúguchi. ⁴³ Ába laweíridun janígi súnqubei láu luweírgun Búngiu.

Ladímurejaanya Jesúsú luágu louñwen
(Mt 17.22-23; Mr 9.30-32)

Sun añája lan láu luweírin janígi láu le ladúgübei Jesúsú, ába laríñagun joun láni disípulugu.

⁴⁴ —Agáamba jumeí cateí le buídu. nedéregerúaba, áu le Wügüri Garaúwarügüti, jájaburugun náganiñu.

⁴⁵ Úati gunfaráanda jamáni disípulugu le laríñagubei, ladúga darúñu líña jasáminan lun cateí le, áni janúfudetiñati lun jaríñagun lun lun lafúnraanguagüdüni le laríñagubei, joun.

¿Ca weírgutimaabei?
(Mt 18.1-5; Mr 9.33-37)

⁴⁶ Ábati jagúmeserun disípulugu asígeneja jámagua luágu ca lan weírgutimaabei jádan, ⁴⁷ queí lasúbudiruni Jesúsú jasáminan, ába lanúgün ában irájü lubáduagun, ⁴⁸ ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le ouñajabalina. Le lubefti únabugutimaabei jídan, ligía weírgutimaabei.

Le mámabei wágani, wámagiñeñein
(Mr 9.38-40)

⁴⁹ Ábati laríñagun Juan lun Jesúsú.

—Maésturu, aríjatiwa ában wügüri aságajati espíritu wuríbatíña lídan bíri, ába wewéridiruni ladúga máma lan ában wádaangiñe.

⁵⁰ Laríñaga Jesúsú lun.

—Mewéridira jumeí, ladúga le mámabei wágani, wámagiñeñein.

Ladeínjan Jesúsú lun Jacóbo lúma Juan

⁵¹ Dan le layárafadun dan lun lanúgüniwa Jesúsú siélun, ába ladúgüni luweíyasun Jerusaléoun láu anígi. ⁵² Ába louñajan louñagülegu lubá, ába jóúdin lídoun ában liraúraü fulásu láni Samária lun jáluajan múna lubá, ⁵³ májatiña Samariána jerésibiruni ladúga jaríjin luágu leíbuga lan Jerusaléoun. ⁵⁴ Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siélugiñe lun lagúmuchun jáu queí meja ladúgüni proféta Elías?

⁵⁵ Ábati ladígiragun Jesúsú jawágun, ába ladeínjan joun, laríñaga.

—Ibidiñeti jun luágu wurfba lan cátei le jayúmajabei. ⁵⁶ Mára niábiña, áu le Wügúri Garaúwarügüti, agúnrinchaguei jabágari gürígia, niábiña asálbarei.

Ábati jóudin lídoun ámu liraúraü fulásu.

Já yebe busénbaña jafálaruni Jesúsu

(Mt 8.19-22)

⁵⁷ Dan le luágu jamá úma, ába laríñagun ában wügúri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Laríñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügúri Garaúwarügüti, úati ni jalíaba lan nabálachagüdei nichügü.

⁵⁹ Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen núguchi, buná neíme, ábame nefbugun búma.

⁶⁰ Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburu, ánjein bugúya, befba apúrichijeí ugánu luáguti larúeijan Búngiu.

⁶¹ Ábayati laríñagun ában lun.

—Nabúreme, buséntina nafálarunibu, nefba yebe ayoúragua joun ja wábiñebaña.

⁶² Laríñaga Jesúsu lun.

—Le íchuguti lújabu luágu awoujagülei, lárigiñe ába laríjin lárigoún, mabuídunti lun lílaname larúeijan Búngiu.

10

Loúnajaniña Jesúsu úrúwa-wein-díisi disípulugu apúrichija

¹ Lárigiñe cátei le, ába lanúadajan Jesúsu úrúwa-wein-díisi jádaangiñe lánigu, ába loúnajaniña lubá, bián bián, lídoun sun ageíraü luma fulásu le lúnbei lídin ñi. ² Laríñaga joun.

—Inárüni, gíbetiña gürígia ja aráanseñabaña lun jagáambuni ugánu luáguti asálbaruni, jagía, ítara jáña quefísi nádü le lúnbei lalúbajoúniwa, áni louguatiña ñadágimeintiña. Ligía lúnti lubeí jamúriajan luma Búngiu lun loúnajan ñadágimeintiña jagánaguóun. ³ Jeíba, noúnajañadün quei mudún jádoun anímaalu gáñitiña. ⁴ Manúga jumá ságü júmagua, ni seínsu, ni geídí, meréderagun jugúyame ayánuja ni ca úma luágu úma. ⁵ Dánme le jebélurun tídoun ában muna, busújuma furúmiñe, jaríñagame. “Darángiläü joun tílana muna to.” ⁶ Ánjein añájein lubeí gürígia jínsiñejabutiña lun darángiläü tídan muna tugúya, jerésibirubadün láu ugúndani, jóunbei abúsuruni lánina darángiläü. Ánjein úa jabeí gürígia jínsiñejabutiña lun darángiläü tídan muna tugúya, giríbugüda jumeí abúsuruni. ⁷ Reídei jumá tídan muna tugúya to ní lubei jerésibirúá, jou jumeíme, gurá le íchugúti jun úouga busíganu, ladúga garíchati ñadágimeinti lun lafáyeiruaja. Masáansija jumá muna. ⁸ Dánme le jachúlürün lídoun ában ageíraü le ní lumuti jerésibirúá, jóújumei le íchugúti jun, ⁹ areídaguagüda jumáña sánditiña ja ñítiña, jaríñagame joun lílana fulásu ligía. “Subúdigüdáwaali luáguti larúeijan Búngiu jun.” ¹⁰ Ánjaün achülúra lídoun ában ageíraü le ní lumuti merésibirúniwa jumá, furújuma lídoun buru úma, jaríñagame. ¹¹ “Ásta licáliquin jageíra le luágubei wagúdi furú wamuti lun warúfuduni jun luágu magúndan wamá láu jigáburu, áni subúdi jumeí luágu subúdigüdáwaali lan luáguti larúeijan Búngiu jun.” ¹² Naríñajare jun luágu lídan lánme luwéyuri lagúseragüdüniña Búngiu gáfígountiña, janárimetimaabei jabeichúniwa lílana fulásu le merésibirunbadün sügü láu jabeichún lílana ubúruge le Sodóma.

Lílana ageíraü buri magáambaditiña
(Mt 11.20-24)

¹³ ¡Fugiábu jugúya lílana Corazín! ¡Fugiábu jugúya lílana Betsáida! Ladúga lun jamúga ubúrugu lan Tíro o Sidón ladügúwa buri miláguru le adügúbei lídan jubúrugute, binárü jamúga lasáansiragua jagáburi lílana, ába jamúga jarúfuduni láu jadáüragun lúdu lúma balígi. ¹⁴ Ánjein jugúya, lídaanme luwéyuri agúseruni, weíritimaabei jabeichúniwa sügú jáu gürgía Tírona jáma Sidónna. ¹⁵ Amúrüti, ubúrugu le Capernaúm, ¿jarítaguatibu luágu liñurúaba lan bíri queísi líñun siélu? Larárirawagüdúwaba bíri únabun queísi lúnabun máfiougati.

¹⁶ Ába laríñagun Jesúsu joun úrúwa-wein-dísi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati gíñe lagáambunina, áni le májati lagáambunina, májati gíñe lagáambuni Nóguchi le oúnajabalina.

Jagíríbudun úrúwa-wein-dísi disípulugu

¹⁷ Ába jagíríbudun úrúwa-wein-dísi disípulugu jagía lídaangiñe jawéiyasun láu ugúndani, aríñageina jagía.

—Wabúreme, ásta espíritugu wuríbatíña agáamba jamútiwa dan le waságaruniña lídan bíri.

¹⁸ Laríñaga Jesúsu joun.

—Ánja, aríja numúti ligáburi leíguadun Máfia siéluñe quei ában labírijanouga.

¹⁹ Rújadina ubáfu jun lun jadügúragun jéwe jáma águru, masúfurirunga ni cáta, lúma lun jére lan jubáfu lueí lubáfu Máfia. ²⁰ Láu sun líra, magúndaara jumá luágu jagáambunün espíritugu, gúnda jumá luágu níjein lan jíri bürúwañu tídan lilíburun Búngiu siélu.

Lagúndaarun Jesúsu
(Mt 11.25-27, 13.16-17)

²¹ Lídan óra ligía, ába labuínchagüdüni Sífiri Sándu Jesúsu láu ugúndani, ába laríñagun.

—Nóguchi, le Labúremebei siélu lúma múa, iñúragüda numúti bíri, ladúga arámuda báali cátei luáguti barúeijan jawéi chútiña áu jáma furéndeitiña, ába bafúraanguagüdüni joun ja loúgubaña ufúrendeí queísi irájüñü. Ánja, Nóguchi, ladúga ítara líña babúseeruni.

²² Derége láali Nóguchi sun cátei nun. Úati ni ában subúdíjabuti cáтана lan lueídügüya Nóguchi, úati gíñe ni ában subúdíjabuti cáteiñein lan Nóguchi nueídügüya jáma ja úntiña nabúseera nasúbudiragüdüni.

²³ Ábati ladígiragun adímureja jóunrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya, ²⁴ ladúga naríñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguti Samariána le buídubei

²⁵ Lídan ában guríriguau, ñíñein ában arúfudajati lilúrudun Moisés, abúseeruti loúchaguni Jesúsu, ába lásaarun, ába laríñagun lun.

—Maésturu, ¿cábasan nadúga lun gayára lan nibíjini ibágari magúmuchaditi?

²⁶ Laríñaga Jesúsu lun.

—¿Cáteigi bürúwañubei lídan lilúrudun Moisés? ¿Ída liñágia balíjan ñi?

²⁷ Ába loúnabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

²⁸ Ábati laríñagun Jesúsu lun.

—Oúnabaadibu buídu, ánjein badúga ítara, bibíjubei ibágari magúmuchaditi.

²⁹ Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Catañagi nibirigubaña?

³⁰ Ábati loúnabuni Jesúsu, laríñaga lun.

—Ñínein ában wügúri arágachuti Jerusaléngiñe lun ubúrugun Jericó, luágu luweíyasun ába járügüdüni jíwerutiña, ába jíwerujani sun le lúmabei ásta lanáangun, buleísei jameí, ába jígiruni jíla mémeeli. ³¹ Ába lásügürün ában jafádirin jurú lídaangiñe méme úma ligía, dan le laríjinbalin wügúri ligía, mebéresenti láu, ába lasígiruni leíbugun loubáfurugugiñe úma. ³² Sügú ligía ában jádaangiñe ladúgawagun Leví ñígiñe, dan gíñe le laríjini wügúri buleíseiwaali ligía, ába gíñe lasígiruni leíbugun loubáfurugugiñe úma, mebéresenga gíñe láu. ³³ Ábati lásügürün ában wügúri Samariána aweíyasujati lídaangiñe úma ligía, dan le laríjinbalin, ába lagúdemedagun lun. ³⁴ Ába liábin, ába lagáranijan lun bíti buri le luágubei láu aili túma diweín, ába lagúraguni. Ába laweínragüdüni luágu lilúgün burígü, ába lanúgüni tídon jában chülúdügütiña, ába ladúgüni le liyáraati lun. ³⁵ Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Tóunigibeí wügúri le, anjaba agástara ámu lueí le níchugubei bun luágu, nafáyeirubei bun dánme le nagíribudun.”

³⁶ Ábati lálügüdüni Jesúsu arúfudajati ligía.

—¿Cáteiti jádaangiñe úruwa wügúriña ja líbiribeí le ueíbeí líwerujóua, lídan barítagun?

³⁷ Laríñaga lun.

—Le gudémejabubei lun.

Laríñagati Jesúsu lun.

—Ítaralá gíñe badúga.

Jesúsu jábiñe Márta túma María

³⁸ Ába lasígirun Jesúsu luágu luweíyasun jáma lánigu, ába lachúlürün lídoun ában liraúraü fulásu le ní lubei teresíbirei ában wúri gírítu Márta, túbiñe. ³⁹ Ñínoun ában tamúlelua Márta gírítu María, ába tañúurun lubádu lugúdi Jesúsu lun tagáambuni le laríñagubei, ⁴⁰ ánjounti Márta, weírítu teténirun lun tubéresegun. Ába tariñagun Márta lun Jesúsu.

—Nabúreme, ¿mebéresentibusan láu tígirunina namúlelua adúgei sun berésegu nabugua? Aríñagabá tun lun tíderagunina.

⁴¹ Ába loúnabunun Jesúsu, laríñaga tun.

—Márta, bafúuduña luágu sarágu cátei, ⁴² buídurügüti murúsun lun weígin. Anúdajaja táali María lubuídun—agei cátei le lúnbei ladügúniwa, áni úabei ni ában lun lagídaruni tueí.

11

Larúfudajani Jesúsu ayúmuraguni lun Búngiu

(Mt 6.9-15, 7.7-11)

¹ Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába laríñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

² Laríñaga Jesúsu lun.

—Dánme le jayúmuragun lun Búngiu, jaríñagame ítara.

Wáguchi Búngiu le siélubei, inébewalá bíri.

Ñúbinlá bidáni lun barúeijan ya uboúagu,

adügúwalá bugúndan uboúagu quei ladügún bugúndan siélu.

³Rúboun fein buǵdurügütu woun lun wéyu le ugúñebei.

⁴Ferúdunabei wuríbati le adúga wamáalibei quei ferúduna wamániña ja adúgübaña wuríbati woun.

Mígira báwa lun wáburujan lídoun wuríbani, dísegüdarügü báwa lueí.

⁵Aríñagati gíñe Jesúsu joun.

—Niján ában jémpulu jun. lídin jamúga ában jídaangiñe lúbiñe ában lumáda amídí áriebe, ába laríñagun lun. “Numáda, furédeibá úrúwa fein nun, ⁶ladúga sun líña lachúlürün ában numáda núbiñoun áni úati ni cáta núma lun níchugun lun.” ⁷Ába jamúgati loúnabun le ában múnadagiñe, laríñaga jamúga. “Mebéreseja bána, darúnaali nubéneri, áni rouñjadina jáu sun nisáanigu, siñáti násaarun íchiga ni cáta bun.”

⁸Naríñaguña jun luágu fbini lan jamúga másaarun lan íchigoun lun ladúga lumáda lan, lásaaruña jamúga íchigoun lun lueí lasígirun ebéreseja lun. ⁹Aríñagatina lubeíti jun. Jamúriaja, ábame líchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun. ¹⁰Ladúga sun le amúriajati, íbjati, le álujati, daríti, le adaúnjati luágu béna, junrénwati lun.

¹¹“¿Gayáraabei funági líchugun ában úguchili jídaangiñe dúbü lun liraú dan le lamúriajan fein lúma? ¿o líchugun lan ában jéwe lun dan le lamúriajan údurai? ¹²¿o líchugun lan ában águru lun dan le lamúriajan gañein? ¹³Gíchigadijadün ligía cátei buíti joun jirájüñü láu sun juríban, ¡gúbumeti líchigei Júguchi Búngiu le siélubei Sífiri Sándu joun ja amúriajati!

Laríñawagún luágu níjein lan lubáfu Máfia lúma Jesúsu
(Mt 12.22-30; Mr 3.19-27)

¹⁴Ñíñein Jesúsu aságara ában espírítu wuríbati lueí ában wügúri le madímuregüdün láalibei yebe espírítu ligía, dánti le láfuridunbei espírítu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le. ¹⁵Ñíñanu gíñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügúri le espíritugu wuríbatiña.

¹⁶Jíbiri, lun jóuchaguni, ába jamúriajan miláguru lúma lun larífuduni luágu lúmagiñe lan Búngiu liábin lubáfu. ¹⁷Queíti subúdi láani le jarítagubei, ába laríñagun joun.

—Furúmieguarügü arúejani le afánreinraguti lun jageíndagun jámagua, lagúnrinchaguba, ában gíñe família fánreinguatiña ladúga wuríbu, jagúnrinchaguba gíñe. ¹⁸Ánjein gíñe níjein lubeí fánreinguaú jádan Máfia jáma lánigu, ¿ida lubági ladúrarun lubáfu? Naríñagunbalin le, ladúga jaríñagun luágu láu lan lubáfu Máfia naságaja espíritugu wuríbatiña ja ebélagüdübaña Máfia guánarügü jádoun gürígia, ¹⁹áni ánjein itara líña lubeí, ¿cági íchugubei ubáfu joun ja jánigu jugúya lun jaságajan espíritugu wuríbatiña, Máfia ódi Búngiu? Láu líra, jagía guánarügü arúfuda jamúti luágu bulieigua jumá. ²⁰Le inárünibei, láu lubáfu Búngiu naságaja espíritugu wuríbatiña, áni arúfuda lumúti líra luágu chülújali lan larúejan Búngiu lídoun fulásu le.

²¹“Ába wügúri jéreti, dan le aráanseñu lan, toúnigi lúban buídu, sun le lúbiñebei choúruti. ²²Ánjein núbin ában jéretimaati lueí ába lásiiraguni, lagídaboun sun lárumate to uáguboun leménigida lueí, ábame lanúgüni le labúseerun, ába lafánreinraguni jáma lumádagu.

²³“Le mámabei númagiñe, náганиñein, le míderagun lumúti, güríngua lumúti le nadúgübei.

Espírítu wuríbati le agíríbudúbei
(Mt 12.43-45)

²⁴Ába laríñagun Jesúsu.

—Dan le láfuridun ában espírítu wuríbati lídaangiñe ában güirgía, eíbugañajádügü líña lídan buri fulásu mábeiti áluaja leméraagun, dánti le madári láani, ába larinagun lún-guarügü. “Nagíríbudayá tídoun núbán to ñígiñe lubei náfurida.”²⁵ Dánti le lagíríbudun, ába ladáriruni güirgía buga ligía quei ában múna to buídawaru, aráanserúa.²⁶ Ábati lídin, ába láabin jáu sédú espíritugu wuríbatimaatiña lueí, ába jebélurun agánawa lídan güirgía ligía, wuríbatimaajaliti le gádaanbalin wügúri ligía lueí buga furúmiñe.

Ugúndani le tímatimaati

²⁷ Dan le niján lubei Jesúsu aríñagei cátei le, ába tagúaragun ában wúri jádaangiñe güirgía, taríñaga.

—¡Fuleiseiwatu jiñáru to agúriajabalibu, fuleiseiwatu to átagüdübalibu!

²⁸ Ába larinagun Jesúsu.

—¡Fuleiseiwatimaatiña ja agáambubalin le lubeíbei Búngiu áni abájüda jameí!

Amúriajatiña güirgía wuríbatiña miláguru lúma Jesúsu

(Mt 12.38-42; Mr 8.12)

²⁹ Añaja méme güirgía oúndaragua geyégu láu Jesúsu, ába lagúmeserun adímureja, larinaga.

—Wuríbatiña güirgía ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta Jonás.³⁰ Ítara quei meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügúri Garaúwarügüti, ligíaba ában seíni joun güirgía ja lánina dan le luágu Búngiu lan oúnajabalina.³¹ Dánme le lidáni agúseruni, dánme le lagúseragüdüniña Búngiu güirgía ja lánina dan le, ábame tásaarun lurúeite Súru lun tasiadiruniña, ladúga tugúya, ñúbintu lídaangiñe lidíse-ágei uboú lun tagáambuni lichú láu Salomón, áu, weirigutimaatina sügú láu Salomón áni májatün jagáambunina.³² Lídan mémeme agúseruni ligía, ábame gíñe jásaarun já meja aganoúbaña ubúru Nínive, ábame jasadiruniña ja lánina dan le, ladúga sáansiguati jagáburi Nínivena lárígiñe lapúrichijani Jonás ugánu le láni Búngiu joun, áni áu ában le weiriguti sügú láu Jonás, áni májatün lun jagáambunina.

Lilámpun úgubu

(Mt 5.15, 6.22-23)

Ába lasígirun Jesúsu aríñaga.

³³ —Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoundun joun ja ebélurutiña.³⁴ Ítara líña águu quei ában lámpu lun úgubu, ánjein buídu lubeí bágu, aríja ligía luágun cátei lánina Búngiu, camá jamuga jarúgongabei gíñe láu sun búgubu, áni buídubei gíñe sun bigáburi. Anjein sándi lubeí bágu, aríja ligía luágun cátei lánina uboú, camá jamuga lídaanbei lubúriga sun búgubu, wuríbabei gíñe bigáburi.³⁵ Touñigibá lun mabúrigadun lan bilámpun.³⁶ Anjein jarúgounga lubeí láu sun búgubu, úaga ni murúsun lubúriga, barijubei sun cátei furáangu quei dan le durúngu líña lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés

(Mt 23.1-36; Mr 12.38-40; Lc 20.45-47)

³⁷ Dan le lagúmunchunbei ladímurejan Jesúsu, ába lamísurajani ában fariséo eíga lúbiñe. Ába lebéfurun Jesúsu, ába lañúurun luágu dábula.³⁸ Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eígni.³⁹ Ába larinagun Wabúreme Jesúsu lun.

—Jugúya fariséogu ragá jumuti wéru lúma asédu bougudigiñe libíti, múnadagiñe jibíti, wíyetün, buin jíña láu luweínamu águu lúma sarágu luwúyeri wuríbani.⁴⁰ ¡Deré tagáambun jugúya le! ¿Ibídñeti jun luágu le lan adúgübalin le bougudigiñebei, ligía lan

gñe adúgübalin le múnadagiñebei? ⁴¹Jarúma jumá múnadagiñe jibíti láu jíchugun joun gudémetiña, ítara lúba jarúma jumá gñe bougudigiñe jibíti.

⁴²‘¡Fugiábugu jugúya fariséogu! Adúgatün dísi fánreinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madúgüntün gásu láu ísuruni lúma lñsiñejabu Búngiu. Ligía lúnbei jadúgüni, mígirunga jumeíme jadúgüni le ában.

⁴³‘¡Fugiábugu jugúya fariséogu! Buséntün járiügüdüni ubáraü le jabára ja weíriguti-maabaña tídan jilgílisin, busén jugúya lun labúsurún jun láu sarágu inébesei úmada.

⁴⁴‘¡Fugiábugu jugúya fariséogu, biángua tigíbul, ladúga ítara jíña quei umúajäü le marijinti, sügü jagía güirgía ligíbuagugiñe ibídiñoun joun.

⁴⁵Ábati loúnabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa gñetia dan le baríñaguni le.

⁴⁶Ába laríñagun Jesúsu.

—¡Fugiábugu gñe jugúya, arúfudajatiña lilúrudun Moisés! Jíchigei lilúrudun Búngiu queísi ában anúgüni jírúti joun ámu, áni jugúya, májatün janúgün ni murúsun lídaangiñe.

⁴⁷‘¡Fugiábugu jugúya!, ladúga rújumuti dúbü arítaguagüleme luágu jamúaja profétagu já meja jáfaragubaña binádu jagúbürigu. ⁴⁸Láu líra, arúfuda jumúti luágu gúnda jumá láu le jadúgübei binádu jagúbürigu, jagía áfaragubaliña, jugúya wéndegüda jumúti jamúaja.

⁴⁹Ligía laríñagunbei meja Búngiu láu lichú láu. “Nóunajaba profétagu jáma apóstolugu joun, ábame jáfaraguniña jíbiri jilágubei, eíbaaja jamáñame jíbiri.” ⁵⁰Ligía lagúser-agüdúbaña lubeí Búngiu güirgía ja lánina dan le luágu játa profétagu ja áfarawagúbaña lúmagiñe ladúgün ubou, ⁵¹lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdúbaña lan Búngiu güirgía ja lánina dan le luágu jóüwegun profétagu.

⁵²‘Fugiábugu jugúya arúfudajatiña lilúrudun Moisés!, ladúga ragú jumaali ligélen lubéneri subúdi, mebélurun jíña, mígirun jugúya lun jebélurun ja busénbaña jebélurun.

⁵³Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagánidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani ⁵⁴lun jaríjin ánjaña adárrira lidúnrun.

12

Larúfudajan Jesúsu luágu mabuídun lan biángua lan igíbu

¹Ába jóúndaragun sarágu mílu güirgía, gíbetiña dari lun jachúinragun jóungua. Ába lagúmeserun Jesúsu aríñaga jóúntima láni disípulugu.

—Tóunigi jumátia jawéi fariséogu, ítara líña jagáburi quei ísi—biánguañein jagíbu. ²Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan. ³Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanáangiñe béna, lagúarajoúba tábulugugiñe múna.

Ca lan ueí lúnbei janúfudewa lan

(Mt 10.28-31)

⁴Naríñajare jun, numádagu, mouñ lumuti janúfudedun jawéi güirgía ja gabáfubaña lun jáfarunün jilágubei, lárigiñe líra siña jadúgün ámu cátei jun. ⁵Naríñagaali jun ca lan ueí lúnbei janúfudedun. Janúfude jumá ueí Búngiu le gabáfugilibeí lun loúnajanun juwáni máfiogatin lárigiñe lagídaruni jibágari. Lueílá janúfudeda.

⁶‘¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúlieidunti Búngiu ni ában jádaangiñe. ⁷Ánjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégütün sügü jáu sarágu dunúru ligíbugiñe Búngiu, áni loúnigirunáñdün.

*Ja meyéedagunbaña luágu Jesúsu jagíbugiñe güirigia
(Mt 10.32-33, 12.32, 10.19-20)*

⁸ ‘Nariñajare jun luágu sun lan ja aríñagubaña jagíbugiñe güirigia luágu nánigu jamá, nariñaguba gíñe luágu nánigu jamá jagíbugiñe láni Búngiu ánjeligu. ⁹ Ánjaña ja aríñagubaña jagíbugiñe güirigia luágu máma jamá nánigu, nariñaguba gíñe jagíbugiñe láni Búngiu ánjeligu luágu máma jamá nánigu.

¹⁰ ‘Furúmieguarügü le aríñaguti cátei wurfbati nuágu, áu le Wügúri Garaúwarügüti, gayáraati ferúdunawa lan, ánjein le anábaguti Sífiri Sándu, siñáti ferúdunawa lan.

¹¹ ‘Dánme le janügün ligíbugiñoun lúru lu jagúserun, o jagíbugiñoun lan tábutigu jalgílisin juríu, madíjerida jumá luágu cába lan jounaba o cába lan jariñaga, ¹² dánme le lachúlürün óra lun jadímurejan, larúfudubei Sífiri Sándu le lúnbei jariñaguni jun.

Ewéridijani luef leténirún sarágu lun irisini

¹³ Ába lariñagun ában jádaangiñe güirigia jagía lun Jesúsu.

—Maésturu, aríñagabá lun nibugaña lun líchuguni nufánran nun lídaangiñe alágan.

¹⁴ Lariñaga Jesúsu lun.

—¿Cági íchubalina quei agúseragüdüti o quei afánreinjati jídan?

¹⁵ Aríñagati gíñe ítara.

—Tóunigigua jumá júngua luef luweínamu águu, ladúga máma luegíñe líbe lúmati güirigia labágarida sarágu dan.

¹⁶ Ábati líchuguni jémpulu le joun, lariñaga.

—Níñein méja ában wügúri risiti, ába líchugun lichári alúbajoúni buíti. ¹⁷ Ábati lariñagun risiti le lúnguarügü. “¿Cábasán funa nadúga? Ibídíñeti nun jalíaba lan nareídei sun le nalúbajabei.” ¹⁸ Ába lasáminarun, ába lariñagun. “Subúdi náali cába lan nadúga, nagúnrinchaguaru sun nání lágei líla nádü, ábame nadügün ámu weínamutimaatu, ábame nareíduni nalúbajan lúma sun le núbabei tídan. ¹⁹ Ábamei nariñagun núniwagua. Buíti dan bun, níjein sarágu cátei areídañu búma lun sarágu dan, eméraguabá, jóba, gurába, gúndaabá.” ²⁰ Lariñaga Búngiu lun. “Wügúri deré tagáambun, bouwe áriebe le, sun le búmabei areídañu, ¿cábasan un lerédera?” ²¹ Ítara líña lasúseredun lun güirigia le adámuridaguagüdüti irisini lánina ubou le lúngua, ába leréderun gudémeñu lídan cátei le luáguti Búngiu, líña Jesúsu.

Tóunigi lumútiña Búngiu lirájüñü

(Mt 6.25-34)

²² Ába lariñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnboun jadáürünun. ²³ Gebégitimaati ibágarí sügú láu eígini, gebégi úgubu sügú táu anáanguni. ²⁴ Aríja jumá joun dunúru. mábunaguntiña, malúbajan, mágei ligía jeígin, láu sun líra, jóugüda lumútiña Búngiu. ¿Gebégitimaatün sügú jáu dunúru! ²⁵ Úati ni ában jádaangiñe gayáraati líchugun lánwoun libágarí láu sun luweírin lidíjeri luágu. ²⁶ Ánjein lubeíti siñá lubei jadúgüni le míbebei, ¿ca uágu jadíjerida luágu buri líbiri cátei?

²⁷ ‘Aríja jumá ída líña lan labouchun buri fulúri. mawádigimariti, májúchagun ligía lanáangun, áni láu sun líra, quei nariñaguni jun, ni urúei Salomón láu sun luwéndegun, mawéndeduntí quei ában fulúri. ²⁸ Ánjeinti ítara líña lubei ladáüraguagüdüni Búngiu jídu, le níjeinbei ugúñe, jarúga lagudúña, ¡ladáüraguagüdatimabadün, loúgua tafíñen jugúya le! ²⁹ Madíjerida jumá lubeíti luágu ni cáta, ni luágu cába lan jeíga, ni luágu cába lan játa. ³⁰ Ladúga lirájüñü ubou le, larígíñanu buri cátei le, ánjein jugúya, níjein ában Júguchi le subúdíjabúbei lun sun jemégeirun. ³¹ Áluaja jumá lun jesériwidun lun furúmiñe, ábame líchuguni sun le jemégeirubei jun.

Irisini siélu
(Mt 6.19-21)

³²Manúfude jumá, nirájüñü, láu sun mibe jumá, gúndaati Búngiu lun líchugun ában ubáraü jun lídan larúeijan. ³³Alúgura jumeí le júmati, jíchigeime lebégi joun gudemetiña, láu líra, jadúgüñoun lágei seínsu ton mawefyadaditu, irisini siélu le magúmuchaditi, le ní lubei siña lan jebélurun jíwerutiña anúgei jirisin, úa jagía jamútiri ñi lun jeígini. ³⁴Nariñagubalin le jun ladúga le ní lumuti jirisin, ñiñoun gíñe janígi.

Aráanseñu jumá, agúrabaja

³⁵Aráanseñu jumá lubá nagíribudun siéluñe, durúngu jilámpun. ³⁶Ítara jumá quei músu ja agúrabañubaña liábin jayúbudiri lídaangiñe ában marfei lun jadáraruni béna lubá, óra lagúarun. ³⁷Buídubei dan joun músu ja ladárirubaña jayúbudiri agágudúañu dan le lachúlürün, ninárün jáu, iyúbudiri meme ligía laráanseruba, ábame lañúuragüdüniña luágu dábula, ábame lesériwiduni jeígin joun. ³⁸Íbini amídi árieibu lan lachúlüra o lubá lan larúgan, ánjaña ladárra agágudúañu, buídubei dan joun músu jagía. ³⁹Subúdi jumeí luágu lun lan jamúga subúdi láni tabúreme múna cába lan óra lachúlüra jíweruti íweruja, leréderuña jamúga agágudúañu, migirunti jamúga lun tadárarún lúban lun líwerujoún lumégegún. ⁴⁰Jugúya, aráanseñu jumá gíñe, ladúga lídaanme magáradajan jumá ligíame nagíribudun, áu le Wügúri Garaúwarügüti, ubouágun.

Músu le úarabei, lúma le múaraanbei
(Mt 24.45-51)

⁴¹Ábati lálügüdüni Pédro Jesúsú, laríñaga lun.

—Nabúreme, ¿wouñrügü bíchigei jémpulu le ódi joun súngubei?

⁴²Laríñaga Wabúreme Jesúsú lun.

—Lun furúmieguarügü ouñgiruti úarati, gunfaráanda ligía, le lígirubei liyúbudiri lun larjín jáu tflana lúban, lun leígagüdüniña lídan dan. ⁴³Buídubei dan lun músu le ladárirubei liyúbudiri agúnfulira láu luwádigimari dan le lachúlürün. ⁴⁴Ninárün jáu, luágu líchugubei lan liyúbudiri lun ligía lan arjía láu sun le libíjubei. ⁴⁵Ánjein arítagua músu ligía luágu lúgüli lan liábin liyúbudiri, ábame lagúmeserun ouseraña jíbiri músu ja lábugiñe-baña laríajaan wuríba, leréderame eíga, áta, abácharuada, ⁴⁶ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírin-ágei abeíchuni luágu, lasíadireime lun lasúfuriruni le jasúfurirubei ja múaraanbaña, máfiougati.

⁴⁷Músu le subúdijabúbei lun ca lan labúseerubei liyúbudiri áni maráanserunti, mabájüdüñleí, labeichúba sarágu. ⁴⁸Ánjeinti músu le ibídiñeti lun, ába ladúgün cátei lé buri lúnti labeichún luegiñe, mawefíbe labeichún. Le únti líchugúa gíbeti, gíbebei amúriajóuti lúmagiñe, le gíbeti ígirúti lábugiñe laríajaan, gíbetimaabei amúriajóuti lúmagiñe.

Jesúsú lébunabei fánreinguaü
(Mt 10.34-36)

⁴⁹Láu niábin ubouágun, ñibeí fánreinguaü ubouágu queísi wátu geméti. ¡Busénjadina jamúga durúnguuali lan wátu ligía! ⁵⁰Lúnti nasúfurirun le gumúti, ¡meméñija nanígi lagúmuchun! ⁵¹¿Jarítaguaatúnsan luágu barú nán meja darángilaü númagua dan le niábinbei ubouágun? Manúgütina darángilaü, fánreinguaü nanügübei. Jafánreinraguba ja mafíñebaña nuágu jáma ja afíñebaña nuágu, ⁵²lúmagiñe guetó, seíngügua tídan ában múna, jafánreinraguba úruwa jaweí bíama, bíama jaweí úruwa, nuegiñe. ⁵³Lagárabaguba úguchili luágun lirái, isáani luágun úguchili, úguchuru tuágun tiraú, isáani tuágun túguchu, ímenidi tuágun ágürü, ágürü tuágun ímenidi.

Liseini buri dan
(Mt 16.1-4; Mr 8.11-13)

⁵⁴Aríñagati gíñe Jesúsú joun gürígia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda. ⁵⁵ Dánti le láfurun garábali luefiñe suédi, ába jaríñagun luágu lárougada lan, áni ligía asúsereda. ⁵⁶ ¡Biángua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubei luáguti ligáburi dan le gádaanbalün jun?

Jóucha jumá lun lídan jumá dan jáma jáganiñu

(Mt 5.25-26)

⁵⁷ ¿Ca uágu siñá lubei jasúbudiruni cátei le úaraguabei júngua? ⁵⁸ Ánjein agúaragüda ában güriquia buágu, ába bídin lúma ligíbugiñe lúru, jóuchabá baráanseragun búngua lúma luágu úma lubáragiñe jachúlürün, manúgün lámugabu ligíbugiñoun agúseragüdüti, lueí ledéregerunibu agúseragüdüti lun polisía, ábame ládarunibu furisunrugun. ⁵⁹ Naríñajare bun luágu máfuridunbadibu lan ñigiñe darí bafáyeiruni lagúmujoün bigáwanün.

13

Ca lan uágu lúnti lubei lasáansirün igáburi

¹ Lídoun méja dan ligía, ába jayábin güriquia abájüdagua lun Jesúsu jawágu wügúriña Galiléana ja láfara gubaña Piláto úara jáma anímaalu ja áfarawagúbaña lun adágaragüdüni lun Búngiu. ² Ába laríñagun Jesúsu joun.

—¿Jarítaguatúnsan luágu ladúga lan luweírin jafígoun Galiléana jagía sügú jáu ja jíbiri lílana jageíra lasúseredunbei le joun? ³ Máma luefiñe líra, láu sun líra, naríñajare jun luágu ánjein lan masáansirun jumá jigáburi, jóüweguba giñe sun jugúya. ⁴ Ángi díisi-wídü jagúra ja ouwegubaña dan le láburujanbei wáyelesi le Siloébei jawágoun— ¿jarítaguatün luágu weíritima lan jadúnrun sügú jáu ja jíbiri ja aganoubaña Jerusalén? ⁵ Máma líña giñe, láu sun líra, naríñajare jun luágu ánjein lan masáansirun jumá jigáburi, jóüweguba giñe sun jugúya.

Jémpulu tuáguti tídi bu ígo to múnboun

⁶ Ábati labájüdaguni Jesúsu jémpulu le joun, laríñaga.

—Ñíñein ában wügúri, ganádiriti ában tídi bu wéto ígo, ába lídin aríja ánjein gín tubei, madáriti ni cáta tuágu. ⁷ Ábati laríñagun lun le ouñigirubalin ichári. “Arijabásan, úriwaaali irúmu gabúgürügua niábin áluaja ígo tuágu ídibu to, madáritina. Chaúnboun, ¿cába uágu terédera ñi luágu ni cáta?” ⁸ Ába louñabuni le ouñigirubalin ichári, ába laríñagun. “Niyúbudiri, ígirayabouñ irúmu le, nañúldagüídali múa táu, awolúja áume táu. ⁹ Fágua tagíndun ítara, ánjoun magíndun, ábame táñchugün.”

Lareidaguagüdünnun Jesúsu ában wúri sebúti tanágan lídan wéyu le eméraguagülei

¹⁰ Luágu ában wéyu le eméraguagülei, ñíñein Jesúsu arúfudaja tídan jalígilisin jurú, ¹¹ ñíñouni ában wúri, díisi-wídü irúmu táu láu ában espíritu wuríbati tuágu, ígira láaru espíritu ligía lemúñ, siñá tásururun ni murúsun. ¹² Dan le laríjinbarun Jesúsu, ába lagúarun tun, ába laríñaga tun.

—Wúri, areidaguadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun admureja buíti luágu Búngiu. ¹⁴ Ábati lagáñidun tábuti ligílisi ladúga lareidaguagüdünnun Jesúsu lídan wéyu le eméraguagülei, ába laríñagun joun güriquia ja ñibaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jíabin lun lagáranijoün jun, máma lídan wéyu le eméraguagülei.

¹⁵ Ába laríñagun Wabúreme Jesúsu lun.

—¡Biángua tigíbu jugúya le!, ¿ma farára jumúti sun jugúya jílügün bágasu o jílügün lan burígü lun janúgün áta dúna lídan wéyu le eméraguagülei? ¹⁶ Wúri to, linébaanfan

Abrahám, ragúlaaru Máfia láu sándi, díisi-wídü irúmu táu láu, ζmoún lumuti funági yebe lun tareidawaguagüdún lídan wéyu le eméraaguagülei?

¹⁷Dan le laríñagunbalin Jesúsu cátei le, ába nibúsigarigua jamá sun láganiñu, ánjaña sun jíbiri güriǵia, gúndaatiña láu cátei lé buri weíriguti le ladúgübei Jesúsu.

Jémpulu luáguti tía mostása

(Mt 13.31-32; Mr 4.30-32)

¹⁸Ábati laríñagun Jesúsu.

—ζÍda líña ligáburí larúeijan Búngiu? ζca cátei úmounbei gayára lan níchuguni? ¹⁹Ítara líña quei ában liraúraü tía mostása le lábunubei ában wügúri lichárirugu, ába labouchun, ába laweíridun darí lun liábin lun ábanme lan tídibu wéwe weírítí, darí lun jadúgün dunúru jádibu luágu tuburébu.

Jémpulu luáguti ísi

(Mt 13.33)

²⁰Ábaya laríñagun Jesúsu.

—ζCa cátei úmounbei gayára lan níchuguni larúeijan Búngiu? ²¹Ítara líña quei ísi le tíchugubei ában wúri tídoun úríwa líburu fulúaarú, ába terésirun súnqubei.

Béna le bürúraübei

(Mt 7.13-14, 21-23)

²²Ába lasígiruni Jesúsu luweíyasun Jerusaléoun, arúfudajeina ligía lídan buri sun aúdü lúma lirájüñü fulúsa le ídaangiñebei lásügúra. ²³Ába laríñagun ában wügúri lun Jesúsu.

—Nabúreme, míbetiñásan ja lúnbaña jasálbarun?

Ába loúnabun Jesúsu, ába laríñagun.

²⁴—Bürúraüti lubéneri siélu, jóücha jumá lun gayáraabei lan jebélurun lídaangiñe, ladúga quei naríñaguni jun, sarágujaba busúentiña jebélurun, siñabei. ²⁵Lárigiñe ladáuruni tabúreme múna lubéneri, jugúya le bougudibeí jadaúnjaba luágu béna, jaríñagame. “Wabúreme, darába béna wabá.” Ábame loúnabunün, laríñagame jun. “Íbídiñetün nun, íbídiñe giñe nun jalána jumá.” ²⁶Ábamei jagúmeserun aríñaga. “Joujadiwa, gurá wagía búma, arúfudaja amúrü woun úmadarugu.” ²⁷Ábamei loúnabunün, laríñagame. “Aríñaga náali jun luágu íbídiñe jumá nun, íbídiñe nun jalána jumá. Díse jumá nueí, sun jugúya le adúgübei wuríbaní.” ²⁸Ligíaba jayájuajan, acúnrijame jári dánme jarjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa bougudin. ²⁹Jayábiba güriǵia lueígiñe oubaü le ñígiñe lubeí láfuara wéyu lúma lueígiñe le ñígiñe lubeí lálüda, lueígiñe núru lúma lueígiñe suédi lun jañúurun eíga lídan larúeijan Búngiu. ³⁰Ñíbañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

Layájun Jesúsu jawágu lílana Jerusalén

(Mt 23.37-39)

³¹Lídan méme wéyu ligía, ába jayábin fariséogu, ába jaríñagun lun Jesúsu.

—Beíba yágiñe, ladúga busénti Heródes láfarunibu jilágubei.

³²Ába laríñagun joun.

—Jeíba, jaríñagame lun wügúri bíbuti ligía. “Ugúñe lúma jarúga naságajan espíritugu wuríbatiña jádaangiñe güriǵia, areídaguagüda áu sánditiña, lárigiñe jarúga, lásurun nuwádigimari. ³³Lúnti nasígiruni nuweíyasun ugúñe, jarúga, lúma lárigiñe jarúga, ladúga máma lúnti lafarúniwa ában proféta jilágubei bougudi lueí Jerusalén.

³⁴Ába layájun Jesúsu jawágu lílana Jerusalén ítara.

—¡O jugúya Jerusaléna! Áfaragua jumáaña profétagu, chúgua jugúya dúbü jawágun ja loúnajabaña Búngiu láu ugánu bufti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁵Ígira láadün Búngiu, áni

naríñajare jun luágu maríjindügüya jumáadina lan daríme lachúlürün dan lun jaríñagun. “Biníwati le nûbinbei lídan líri Wabúreme.”

14

Lareidaguagüdün Jesúsu ában wügúri lújali larúna luma liyáda

¹Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja nîbaña, jaríaguñein Jesúsu. ²Nîñein gñe ában wügúri láu sándi le ílu, ³ábati lálügüdúniña Jesúsu arúfudajatiña lilúrudun Moisés jáma fariséogu, laríñaga joun.

—¿Gayáraati lareidawaguagüdün ában wügúri lídan wéyu le eméraaguagülei ódi siñáti?

⁴Ába jeréderun maníñu. Ábati lanúgüni Jesúsu sánditi ligía, ába lareidaguagüdüni, ába laríñagun lun lun lídin. ⁵Ába laríñagun joun fariséogu.

—Furúmieguarügü jídaangiñe, ánjein eíguada lilúgün bágasu o lilúgün lan burígü lídoun ában wélu lídan wéyu le eméraaguagülei, laságarubei nîgiñe furése.

⁶Maríñagun jáña ni cáta.

Ja amísurajoubaña lídoun maríei

⁷Dan le laríjini Jesúsu janúadajani amísurajouítiña ubáraü buri le jounbei ja weírigubaña, ába laríñagun joun.

⁸—Dánme le bamísurajouün lídoun ában fédu lánina maríei, máluajabéi lubúfidun-ágei ubáraü, nûbin líñein ábanya amísurajouíti weírigutimaati bueí, ⁹ábame liábin le amísurajabalün, laríñagame bun. “Rúbei bubára lun wügúri le.” Ábamei bídin láu busíganu añúura lídan lúnabun-ágei ubáraü. ¹⁰Dánme le bamísurajouün lídoun ában fédu, nûrúba lídan lúnabun-ágei ubáraü, lun dánme lan le liábin le amísurajabalibu, laríñagame bun. “Numáda, sügúba lídoun ában ubáraü weírigutimaati.” Ítara lúba berésibirun inébesei jagíbugiñe sun ja nûnbaña luágu dábulu. ¹¹Le anáanguti lúngua weíri, lúnabudúba, le únabuti lanáangun lúngua, weírubei lanúgün.

¹²Aríñagati gñe lun wügúri le amísurajabalin.

—Dánme le bíchugun ában adíneruni o fédu, mamísuraja báña bumádagu, ni bamúlenu, ni bíbugañanu, ni jíbiri bidújeñu, ni bubésinanigu ja rísitiña, ladúga jamísurajabadibu gñe, bibíjubati bafáyeyruaja. ¹³Dánme le badúgün fédu, amísuraja báña gudemetiña, siñáguatiña úngua, danímaatiña, maríjintiña. ¹⁴Ábame gúnda ban, ladúga siñáti jafáyeyrunibu, bibíjubeiti bafáyeyruaja lídaanme le jásaarun ja richáguabaña ligíbugiñe Búngiu lídaangiñe oúweni.

Jémpulu luágu oúnwenbun adíneruni

¹⁵Dan le lagáambunbalin ában jádaangiñe ja nûnbaña luágu dábulu cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

¹⁶Ábati laríñagun Jesúsu lun.

—Nîñein ában wügúri, íchuguti ában oúnwenbun adíneruni, ába loúnajan amísuraja sarágu gürígia. ¹⁷Óra lun adíneruni, aba loúnajani lumúsun aríñaga joun amísurajouítiña. “Queímoun, aráanseeli sun cátei.” ¹⁸Súngubei, ába jaríñagun luágu siñá lan jouúdin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.” ¹⁹Laríñaga ában. “Agáñijaadina seíngü féru bágasu lánina wadágimanu, neíbuga oúchaña, adúgabá fuleísei nun, ferúduna bána, siñáti nídin.” ²⁰Laríñagaya ában. “Sun líña namárieidun, ligía siñá lubei nídin.” ²¹Dan le lagríbudun músu, ába labájüdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun úma le ubúrugubei, banúgañame gudemetiña, siñáguatiña úngua, danímaatiña, jáma maríjintiña.” ²²Lárigiñe ladúgüni, ába laríñagun músu lun liyúbudiri. “Nabúreme, adúga náali le bubeíbei nun, níjein mémegua ubáraü.” ²³Ábati

laríñagun iyúbudiri lun músu ligía. “Beíba lídan sun úma bougudin lueí ubúruugu, lúma sun fulásu geyégua láu, ábame bafósuruníña sun ja badárirun lun jayábin lídoun nufédun, buin támuga núban. ²⁴ Ladúga naríñajare jun luágu úabei lan ni ában jádaangiñe ja namísurajabaña eígití lídan nadíneragüdün.”

Lúnti lígirúniwa sun cátei lun lánibei lan Crístu

²⁵ Sarágu jáña gürígia afálaruti Jesúsu, ába lagáragun, ába laríñagun joun.

²⁶ —Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúleno, o lítunu, o libágari guánarügü, sügü náu. ²⁷ Le gíñe májabei lasúfurirun nueígiñe queísigubeirügü jamúga ában wügúri le anúgüti lugúruwan, siñáti náni lan disípulu. ²⁸ Ánjein arítagua ában jádaangiñe ladúgün ában wáyelesi, ¿ma funági lañúuruba furúmiñe asáminara átiribei lan lagástarun lun laríjimi ánjein gabáfu lubei lun lagúmchuni? ²⁹ Ladúga ánjein líchiga ébuu, lárigiñeme lásíñerei wadágimanu agúmucha, jéjerajaba ja aríjubalin láu, ³⁰ jaríñagame. “Guméseti wügúri le ában wadágimanu, siñá lumuti agúmucha.” ³¹ Ánjein lawúribuja lubei ában urúei lúma ámu urúei, ¿ma funági ñurúti furúmiñe lun lasáminarun ánjein gayáraabei lubei lageíndagun jáu díisi mílu súdaara lúma le jáubei wein mílu? ³² Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idíli. ³³ Ítara líña lubeíti, furúmieguarügü jádaangiñe le mígirunti sun le lúmabei lun lafálarunina, siñáti nánibei lan disípulu.

Dan le leféridiruni sálu lubásuan

(Mt 5.13; Mr 9.50)

³⁴ “Buíti sálu, ánjein leféridira lubásuan, ¿cábagi un ju lan? ³⁵ Mabuídunjali ni lun lábunawagún nádü lídan, ni lun lidérebugu múa, fíwarúgaalime. Agáamba jumána, jugúya le garígeirugubei lun jagáambun.

15

Jémpulu tuáguti mudún to eféridiruboun

(Mt 18.10-14)

¹ Luágu ában wéyu, ába jayárafadun sarágu agúburajatiña liseínsuna gumádi jáma gaffigountiña lun Jesúsu lun jagáambuni. ² Ába jadímurejan fariséogu jáma arúfudajatiña lílúrudun Moisés luágu Jesúsu lueígiñe cátei le, jaríñaga.

—Wügúri le, resíbi lumútiña gaffigountiña, jou ligía jáma.

³ Ábati líchuguni Jesúsu jémpulu le joun, laríñaga.

⁴ —¿Ca jádaangiñe, lun jamúga galúgüniña lan san mudún, leféridira ában jádaangiñe, mígirun lubáña gádürü-wein-díisi-néfu ñi, lubárua, lun lídin álujoun mudún to eféridiruboun? ⁵ Dan le ladárirunun, ába lanúgünun légewagu láu ugúndani. ⁶ Dan le lachúlürün lúbiñoun, ába loúndaruniña lumádagu jáma lubésinanigu, laríñaga joun. “Gúnda jumá úara núma, ladúga darína nilúgün mudún tó yebe eféridiruboun nueí.” ⁷ Naríñajare jun luágu ítara méme líña weíritima lan ugúndani siélu luágu ában gaffigounti le asáansiruti luríban ligáburí lun lafálaruni Búngiu, sügü láu jawágu gádürü-wein-díisi-néfu gürígia richáguatiña ligíbugiñe Búngiu ja memégeirunbaña jasáansiruni jagáburí.

Jémpulu luáguti seínsu le eféridirubei

⁸ “Ca wúri to níjeinti jamúga díisi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna álujajei buídu darí lun tadáriruni? ⁹ Dan le tadáriruni, ába touúdaruniña tumádagu jáma tubésinanigu, taríñaga joun. “Gúnda jumá núma, ladúga darína seínsu lé yebe neféridirubei.” ¹⁰ Naríñajare jun luágu ítara líña lan gíñe ugúndani jádan láni Búngiu ánjeligu luágu ában gaffigounti le asáansiraguti luríban ligáburí lun lafálaruni Búngiu.

Jémpulu luáguti irájü le acháragadubei

¹¹Rúlumuti giñe Jesúsu jémpulu le joun, laríñaga.

—Ñíñein méja ában wügúri jáu bián lirájüñü. ¹²Ába laríñagun le amúleñein lun lóguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei. ¹³Málüti luegiñe, ába loúndaruni amúleñein sun lumégeggun, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti. ¹⁴Dan le gumújali sun liseínsun, ába ladágarun ában lemégeirun eíginí lídan fulásu ligía, ába ladáragun lúngua lídan ában oúnwenbun mégei. ¹⁵Ábati lídin áluaja wadágimanu lúma ában lílana fulásu ligía, ába loúnajani wügúri ligía oúnigiraña lilügüniña búíruju. ¹⁶Weíriti líláma darí lun lawámadun lun lun leígini jeígin búíruju, míchugúnwati lun. ¹⁷Ábati lasáminarun, laríñaga lúnguarügü. “¡Sarágu ñadágimeintiña lúbiñe núguchi ígiraguati eíginí joun, áu ya, ouwe niláma! ¹⁸Nagíríbuda le ñíjin lubei núguchi, naríñagame lun. Núguchi, afígounjaadina ligíbugiñe Búngiu lúma bigíbugiñe. ¹⁹Madúnaali lun nanáangun núngua quei biraú, barúbana quei ában jádaangiñe ñadágimeintiña búma.” ²⁰Ába lárügüdün úma lun lagíríbudun lúbiñoun lóguchi.

“Dísegi líña, ába laríjini úguchili irájü le, ába lagúdemedun lun. Ába leíbaagun lubároun, ába loúburuni, ába lachúuruni. ²¹Ábati laríñagun isáani lun. “Núguchi, afígounjaadina ligíbugiñe Búngiu lúma bigíbugiñe, madúnaali lun nanáangun núngua quei biraú.” ²²Ába laríñagun úguchili joun lumúsuniña. “Sagájumoun tubúidun-ágei anáanguni furése, daúguagüda jumeí. Daújuma giñe ában bágü luágu lújabu túma geídi luágu lugúdi. ²³Áfara jumeí liraúraü bágasu le dibúnetimaabei. ¡Weíga, eféduja wagíame!, ²⁴ladúga niraú le, rúnaali yebe quei jiláali áni chülúguaya, féridijalí yebe áni daríwama.” Ába jagúmeserun eféduja.

²⁵Súnti buga dan le, níjeinti buga íbugañaü áraabu. Dánti le lagíríbudun, dan le lachúlürün tubádun múna, ába lagáambuni áfaruni lúma abínajani. ²⁶Ábati lagúarun lun ában jádaangiñe músu, ába lálügüduni ca lan susébebei. ²⁷Ába laríñagun lun. “Chülújali bamúlen, áfaragüdalá búguchi liraúraü bágasu le dibúnetimaabei, ladúga lachúlürün láu magádiei.” ²⁸Ába lagañidun íbugañaü, májaali lebéllun. Ába láfuridun lóguchi, ába layúmurgun lun lun lebéllun. ²⁹Ába laríñagun lun lóguchi. “Subúdi bumúti luágu seríwíjadina lan bun sarágu dan, madúraagunganeí le bubeíbei ni ában weíyaasu, míchugídibu ni ában liraúraü gábara nun lun nefédujan jáma numádagu. ³⁰Guetóti, láu liábin biraú le, le achágarubalin biseínsun jáma wúriña wuríbatíña, jáfaragüdadá bágasu le dibúnetimaabei!” ³¹Ábati laríñagun úguchili lun. “Niraú, amúrü númañadibu súnwandan, sun le nání, bání. ³²Ánjein guetó, lúnti wadúgün fédu lúma lun wagúndaarun ladúga bamúlen lé yebe rúwamaalíbei quei jiláali, chülúguaya, féridijalí yebe, áni daríwama.”

16

Jémpulu luáguti oúnigiruti le múaraanbei

¹Aríñagati giñe Jesúsu joun láni díspulugu.

—Ñíñein méja ában iyúbudiri rísiti, ñíñein giñe ában loúniri lumégeggun, ába jayábin aríñaga lun luágu lachágaruñein lan oúnigiruti ligía lirisin. ²Ábati lagúarun iyúbudiri lun, ába laríñagun lun. “Ída líñásan cátei le, le aríñawagúbei nun buágu? Rúba fe nun luágu buwádigimari, ladúga masígíjadibu oúnigirei nílagu.” ³Ábati leréderun oúnigiruti ligía asáminara, laríñaga lúnguarügü. “¿Cábati nadúga guetó lárigiñe gidála lan niyúbudiri wadágimanu nueí? Méretina lun nadúgün wadágimanu júrüti, áni nibúsigaritina lun namúriajan. ⁴Subúdi náali cába lan nadúga lun ní jama erésibirutina jábiñe dánme mawádigimarijadina.” ⁵Ába loúnajan jawágu ja adúweirubalin liyúbudiri lun jayábin lun ában ában. Ába lálügüdüni le furúmiñeti, laríñaga lun. “¿Átiri badúweiruni niyúbudiri?”

⁶Ába laríñagun lun. “Dúwei numúti san barín agúlei.” Ábati laríñagun oúnigiruti ligía lun. “Nuján bigáradan, ñurúba furése, badúgame ában luágurügü dimí-san.” ⁷Lárigiñe, ábaya lálügüdün ában, laríñaga lun. “Ángi amúrú, ¿átiri badúweijan?” Laríñaga lun. “San ságü türígu.” Laríñagati lun. “Nuján bigáradan, adúgabá ában luágurügü gádürü-wein.” ⁸Ába lasúbudiruni iyúbudiri luágu chu lan láu oúnigiruti ligía lídan ligáburí ladúgüni cátei.

Ligía laríñagun Jesúsu.

—Gürígia wuríbatíña ja lánina ubou le, chúti jáu lídan jáni jáma ámu sügü jáu ja lánina larúgounga, ja lirájüñü Búngiu. ⁹Siñáti leménigidún luágu irísini lánina ubou le, aríñagatina lubeíti jun lun jayúsuruní jirísín lun jadúgün buíti, lun dánme lan le lagúmuchun jibágari, jerésibirúba tídan múna to magúmuchaditu, yágüta siélu.

¹⁰Le adúgüti buíti láu le murúsunrügüti, ladúgüba gíñe buíti láu le gíbeti, le madúgüti buíti láu le murúsunrügüti, madúgünbei gíñe buíti láu le gíbeti. ¹¹Ánjaün lubeíti madúgün buíti láu buri irísini le lání ubou le, le uágubei siñá lan leménigidún, ¿cábagi afíñera juágu lun ledéregerun irísini inárúniti lábugiñe jaríaaan? ¹²Ánjaünti madúgün buíti láu jemégen ámu, ¿cábagi ichigei le jáni guánarügü jun?

¹³Siñáti lesériwidun ában gürígia joun bián iyúbudirigu, ladúga liyéeregeduba ában lun, línsiñedame le ában lun, o úarabei lan lun ában, lanúgeime le ában quei ni cáta. Siñáti lesériwidúniwa lun Búngiu lúma lun seínsu.

¹⁴Agáambagu jáña fariséogu lun sun cátei le, ába jéjerajan láu Jesúsu, ladúga jínsiñe lan seínsu joun. ¹⁵Ábati laríñagun Jesúsu joun.

—Jugúya gürígia ja arúfudagubaña jóungua quei buítiña jagíbugiñe gürígia, ánjeinti Búngiu, subúdi lumútu janígi luágu wuríba tan. Le cátei le janúgübei gürígia quei weíríti cátei, iyéereeguti lun Búngiu.

Lúrudu lúma larúeijan Búngiu

¹⁶‘Níjein meja lilúruden Moisés lúma jarúfudajan profétagu darí lúmoun lidáani Juan. Lúmagiñe dan ligía, lapuríchijoún ugánu buíti le luáguti larúeijan Búngiu, sun gürígia jóuchatiña lun jebélurun lídoun.

¹⁷‘Méreenguntimaati lun lagúmuchagun siélu lúma ubou, máma lun magúnfulirun lan liñúraü-ágei dimúrei lídaangiñe lilúruden Búngiu.

Larúfudajan Jesúsu luágu ígiraguni

(Mt 19.1-12; Mr 10.1-12)

¹⁸‘Ánjoun lígira ában wügúri lúmari, lagámarida ámu, ladúgüñeín figou le gíríbei adultériu, le gíñe agámariduti ában wúri to ígiraguaaru, ladúgüña gíñe adultériu.

Wügúri le rísíbei, lúma Lázaro

¹⁹Aríñagati gíñe Jesúsu.

—Níñeín meja ában wügúri rísiti, anáanguni fnutu to wéndegutu ladáuraguboun, ságüja wéyu ladáagan fédu láu sarágu wéndegu. ²⁰Níñeín gíñe ában gudémeti gíríti Lázaro, sun lúra láu gumeín, ²¹lañúurati buri múarugu tubéneri lúban rísiti ligía áluga leígini lífe eígini le efguaduti lueígiñe lidábulan rísiti. Weíríti lasúfurirun darí lun lawánduni jayábin oúnli éjelujei lugúmeín. ²²Luágu ában wéyu, ába louñwen fugiábu ligía, ába janúgüni ánjeligu lúmoun Abrahám, le ñíjin jabeí jiláaña buítiña, ába gíñe louñwen rísiti, ába labunajoún. ²³Dan le lasúfuriruña lan rísiti ligía lídan fulásu le ñíjin jabeí jiláaña wuríbatíña, ába liñúruni laríjin, ában laríjini Abrahám disegiñe, láu Lázaro lúma. ²⁴Ábati lagúaragun, laríñaga. “¡Núguchi Abrahám, gudémená bun! Oúnajabeí Lázaro lun ladúduragüdüni ligíbu lújabu láu dúna, ñúbin lámuga éderei tuágu niñéñe, ladúga nasúfuriruña sarágu lídan wátu geméti le.” ²⁵Ába laríñagun Abrahám lun. “Niraú, jarítaguabá luágu buídu lán meja dan bun lídan bibágari, ánjein lun Lázaro, wuríbatí meja dan. Guetó, buíti dan lun ya, bugúya asúfurira. ²⁶Bougdigiñe luei sun le, níjein

ában baráangu afánreinraguáwa júma, ja jamúga buséntiña jóudin yágiñe lun ñíjin, siñáti, ni ja ñíbaña, siñáti jayábin ñájoun.”²⁷ Ábati laríñagun rísiti. “Amúriajatina búma, Núguchi Abrahám, lun bouñajani Lázaro lúbiñe núguchi,²⁸ añájein sefngü namúlenu ñi, lun ladímurejan joun, mayábin jamámuga giñe lídoun fulásu lánina asúfuriruni le.”²⁹ Ába laríñagun Abrahám lun. “Níjein le labúrújabei Moisés jáma profétagu jáma ñi, jadúga jamá gásu láu!”³⁰ Ába loúnabun rísiti, ába laríñagun. “Binárün, núguchi Abrahám, láu sun líra, ánjein ñúdün ában jádaangiñe jiláaña adímureja joun, lasáansiraguba jagáburí.”³¹ Laríñaga Abrahám lun. “Ánjein mája jabei jadúgün gásu láu le laríñagubei Moisés jáma profétagu, mafiñebañá giñe láu sun lásaarun ában jádaangiñe jiláaña lun lídin adímureja joun.”

17

Luríban lafigoungüdüniwa ában güirgia

(Mt 18.6-7, 21-22; Mr 9.42)

¹ Ába laríñagun Jesúsu joun láni disípulugu.

—Súnwandan níjeinbei lán buri cátei afigoungüdüti güirgia, jáni fugiábu güirgia le affgoungüdüti ámu! ² Buítimaati jamúga lun lun lagurún baránajoun láu ában dúbü le lamúlíja awási güiráñu luágu ligíina sügú láu lafigoungüdüñ ában jádaangiñe ja ñúbürigiñabaña lídan jafiñen nuágu. ³ Ítara líña lubeiti touñigi jumá.

‘Ánjein adúga bamúlen o bíbugaña wuríbani bun, wéridibeí, ánjein asáansiragua ligáburí, ferúdnabeí, ⁴ ánjein adúga wuríbani bun sédü weíyaasu lídan ában wéyu, sédü weíyaasu liábin aríñaga bun luágu madúgündügüya láali lan, lúnti ferúduna báni.

Lubáfu afíñeni

⁵ Ába jaríñagun apóstologu lun Jesúsu.

—Wabúreme, rúba lánwoun wafiñen.

⁶ Ábati laríñagun Wabúreme Jesúsu joun.

—Lun jamúga níjein lan murúsuraü affíñeni jídan—gayáraati jamúga ñúraüraü lan queísi ában tíla mostása—gayáraati jamúga jaríñagun tun tídi bu wéwe to. “Gidába yágiñe láu sun bílagüle, beíba ájúcha baránaja”, áni lasúsereduña jamúga.

Weseríwidun lun Búngiu máma ában cátei lun lateíngiruniwa luágu

⁷ Ánjein níjein lubeí lumúsun ában jídaangiñe, dan le lagríbudun áraabugiñe lárigiñe lawóujan o loúnigirun lan anímaalu, ¿laríñaguba funági lun músu ligía. “Belúba, ñurúba eíga”? ⁸ Uá, aríñagarügübeí lun. “Aráansebeí neígin, aráanseñu amúrime lun beténirun nun sun anája lan eíga lúma áta, lárigiñeme, gayáraajalíme beígin lúma bátun.” ⁹ ¿Tefínqui lumúti funági iyúbudiri músu luágu ladúgüni le lubeíbei lun? Uá. ¹⁰ Jugúya giñéti, dánme lásurun jadúgüni le uágubei laríñaga Búngiu jun lun jadúgüni, lúnti jaríñagun. “Músu mouñtiña wagía, ladúga lé rügüñein lúnbei wadúgüni wadúga.”

Lareídaguagüdüñ Jesúsu dísi gawágutiña gumeín

¹¹ Lídan lasígiruni Jesúsu luweíyasun Jerusaléoun, ába lásügürün labádinaguagiñe Samária lúma Galiléa. ¹² Dan le lachúlürünbei lídan ában liraüraü fulásu, ába jayábin dísi wügüríña gawágutiña gumeín, lubároun. Ába jeréderun díse lueí, ¹³ ába jagúaragun lun ítara.

—¡Jesúsu, Maésturu, gudéme wamá bun!

¹⁴ Dan le laríñabaliña Jesúsu, ába laríñagun joun.

—Jeíba arúfudagua júngua joun fádriugu.

Dánti le ídirina jamá, ába jareídagun. ¹⁵ Ñíñeinti ában jádaangiñe, dan le laríñabei luágu areídaguuali lan, ába lagríbudun le ñíjin lubeí Jesúsu, adímurejeina buíti luágu Búngiu láu umálali jéreti. ¹⁶ Ába lájuduragun dagá ligíbu múarugu lun líchuguni eteíngiruni lun. Áni Samariána wügürí ligía. ¹⁷ Ábati laríñagun Jesúsu.

—¿Ma díisiñanu areídagutiña? ¿Jagáñagi ja jíbiri néfu? ¹⁸¿Niján gubeírügü teréncha le agíríbuda eteíngirei Búngiu?

¹⁹Ábati laríñagun lun wügúri ligía.

—Sarába, beíba, areídaguaadibu ladúga baffñen.

Ída lúba lan ligáburi liábin larúeijan Búngiu

(Mt 24.23-28, 36-41)

²⁰Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, maríjñbei, ²¹maríñawagúnbei. “Niján”, o “Níngitan”, ladúga lídan linárün cátei, níjeinjali larúeijan Búngiu jagánagua.

²²Ábati laríñagun joun láni dispulugü.

—Lachúlürüba dan lun meménija lánme janígi lun júmabadina lan, íbini luágurügü ában wéyu, masúseredunbei lídan dan ligía. ²³Laríñawagúba jun. “Niján Crístu ya”, o “Níngitan yágüta.” Iyéenibei, mídin jumá járigi, mafálarun jumáñame. ²⁴Ladúga ítara quei laríjñ ában labírrijaníga lueígiñe ában louba siélu lun luágun le ában, ítara lúba dánme le nagíríbudun ubouágun, áu le Wügúri Garaúwarügüti. ²⁵Lúnti nasúfurirun sarágu furúmiñe, mebéresen jagíame güriági ja lánina dan le náu. ²⁶Queí meja lasúseredun lídan lidáani Noé, ítara lúba gíñe lasúseredun lídan búrime wéyu le niábingüle, áu le Wügúri Garaúwarügüti. ²⁷Dán meja ligía, jerédera meja güriági eíga, áta, agámarida, íchaajaña jarájüñü lun jamárieidun darí wéyu le lebélurun Noé tídoun ugúnein to árca. Ába liábin gúnran, ába jañáradagun súnubei. ²⁸Ítara lúba gíñe quei lasúseredun lídan lidáani Lot. jerédera güriági eíga, áta, agánija, alúguraja, ábunagua, adaágu muna. ²⁹Dan le láfuridunbei Lot ubúrugiñe Sodóma, ába láburujan wátu geméti luma sáfuru siélugiñe, ába láfaraguniña súnubei. ³⁰Ítara lúba dánme le niábin, áu le Wügúri Garaúwarügüti.

³¹Lídaanme wéyu ligía, le güriági le bougudibei tuéi lúban, ánjein níjein lubeí lumégun múnada, mebéluralá aságarei. Le güriági le áraabubei lídan óra ligía, magíríbudalá lúbiñoun. ³²Jarítagua jumá luágu le asúseredubei tun lúmarí Lot. ³³Le áluguti leséfuruni libágarí ya ubouágu, luféridirubei íbágarí magúmchaditi, le ánjabei leféridiruni libágarí ya ubouágu, nueigiñe, libíjuba íbágarí magúmchaditi.

³⁴Naríñajare jun luágu árieibu lánme ligía, ñibaña biáma güriági arúmuga tídan ában meme gabána, lanügüba ában jádaangiñe, ígirúame le ában según jaffñen nuágu. ³⁵Ñibaña biáma wúrriña amúlíja lídan ában, tanügüba ában jádaangiñe, ígirúame to ában. ³⁶Ñibaña biáma wügúriña áraabu, lanügüba ában jádaangiñe, ígirúame le ában.

³⁷Dan le jagáambunbalin cátei le, ába jálügüdüni, jaríñaga lun.

—¿Jalábasan lasúsereda buri cátei le, Wabúreme?

Laríñaga joun.

—Le ñí lumuti lúgubu jiláali, ñíba joúndaragua wadúbi.

18

Jémpulu tuáguti wúri to jiláali túmari, luma agúseragüdüti

¹Ába labájüdagun Jesúsu ában jémpulu joun, lun larúfudajan joun luágu lúnti lan jayúmragun lun Búngiu súnwandan, láu gurásu. ²Laríñaga joun.

—Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában güriági. ³Ñíñoun gíñe ában wúri lídan fulásu ligía, jilá meja túmari, ságü wéyu tídin lúmoun agúseragüdüti le lun líchuguni tírícha tun luágu ában tuwúribun luma tágani. ⁴Luágu sarágu dan, májati yebe leténirun tun, larígiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában, ⁵quei nuján méme lan wúri to ásüdagüda nichúgü, neséfuraaru, jebé lámuga tiábin, gumú líñein nugúraasun.”

⁶ Ába laríñagun Jesúsu.

—Niján laríñagubei agúseragüdüiti le wurífbabei, ⁷ gúbumeti leséfuraña Búngiu lánigu ja ayúmuragutiña lun wéyuagu, áriebu. ¿Lúbei lubá líderaguniña? ⁸ Uá, madárasanbei. Láu sun le, dánme le nagíribudun, áu le Wügúri Garaúwarügüti, ubouágun, ¿nadáriruba funásan affíneni jádan gürgia ja yábaña, nuágu?

Jémpulu luáguti fariséo lúma agúburajati liseínsuna gumádi

⁹ Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janúgaña ámu gürgia quei ni cáta. Laríñaga.

¹⁰ —Núdútiña bián wügúriña témpulurugu ayúmuragua lun Búngiu, ában fariséo, ában agúburajati liseínsuna gumádi. ¹¹ Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri gürgia—jíwerutiña, wuríbatíña, salúfuritiña, mítaraantina gíne quei agúburajati liseínsuna gumádi le. ¹² Ayúnaratina bián weíyaasu lídan dimáasu lun nagúnfulirun búma, rúnumuti gíne dísi gáwanün lídaangiñe ságü fiádürü le ebélurubei nun, bun.” ¹³ Ánjeinti agúburajati liseínsuna gumádi, ába leréderun díse, mabúseerunti ni lun liñuruni laríjin siélun, le luweírín lúnabun lanáangun lúngua. Aboujarügülei laníguagu láu igárigu, laríñaga. “¿Búngiu, gudémená bun, nugúya le gafíounti!” ¹⁴ Naríñajare jun luágu giríbu lan agúburajati ligía lúbiñoun, resfíñulef Búngiu, máma fariséo ligía. Ladúga le anáanguti lúngua weíri, ñúraübei lanügún, ánjein le ñúraübei lanáangun lúngua, weíríbei lanügún.

Labíniruniña Jesúsu irájüñü

(Mt 19.13-15; Mr 10.13-16)

¹⁵ Anaajouátiña gíne irájüñü lun Jesúsu lun lagúrurun jawágu, dan le jaríjínbalin disípulugu cátei le, ába jadeñjan joun ja anáajabaliña irájüñü. ¹⁶ Ába laríñagun Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá luef, ladúga ja ítarabaña quei jagía, jagía lílanabaña larúeijan Búngiu. ¹⁷ Ninárün jáu luágu le lan merésibirun lumúti larúeijan Búngiu láu affíneni jarúmati líbe jafíñen irájüñü, mebelubei lídoun.

Layánujan ában wügúri rísiti lúma Jesúsu

(Mt 19.16-30; Mr 10.17-31)

¹⁸ Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadúgüni lun gayára lan nibíjini ibágari le magúmuchaditi?

¹⁹ Laríñaga Jesúsu lun.

—¿Ca uágu bariñaga nun “buíti”? Ában rügúñeín buíti, Búngiu. ²⁰ Subúdi bumúti gumádi. Maganouábá túma wúri gámaritu, máfarajabá, míwerujabá, mayéejabá luágu ni ában, inébe jamá bagúbüriгу bun.

²¹ Laríñaga wügúri ligía lun.

—Gúnfulitina láu sun le lúmagiñe ñúraügidina.

²² Lídan le lagáambunbalin Jesúsu cátei le, ába laríñagun lun.

—Mégeigili ában cátei lun badúgüni. alúgurabeí sun le búmabei, ábame bíchuguni lebégi joun gudémetiña, ábame garísin ban siélu. Ábame bagíribudun, ábame bafálarunina.

²³ Dan le lagáambunbalin wügúri ligía cátei le, ába lírudagun, ladúga rísiti buídu. ²⁴ Dan le laríjini Jesúsu lírudagun, ába laríñagun.

—¿Jénreenguti lun jebélurun rísitiña lídoun larúeijan Búngiu! ²⁵ Méreenguntimaati lun lásügürün ában caméyu lídaangiñe lujúyun ában agúsa sügú láu lebelurun ában rísiti lídoun larúeijan Búngiu.

²⁶ Ába jaríñagun ja agáambubalin.

—¿Cáteiti gayáraabei lasálbarun?

²⁷ Laríñaga Jesúsu joun.

—Le jásiñerubei gürígia adúga, gayára lumúti Búngiu, ladúga úati ni cáta siñáti lun Búngiu.

²⁸ Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

²⁹ Ába laríñagun Jesúsu joun.

—Nínárün jáu luágu furúmieguaáriüü lan le ígiruti lúban, o lagúbürigu, o líbugañanu, o lamúlenu, o lúmari, o lirájüñü luágu larúeijan Búngiu, ³⁰ libíjubatíma sarágu weíyaasu loúgiñe lídan ubou le, ibíjaleíme ibágari magúmchaditi yágüta siélu.

Ladímurejaanya Jesúsu luágu louñwen

(Mt 20.17-19; Mr 10.32-34)

³¹ Ába lagúarun Jesúsu joun láni dúusu apóstolugu jábugua, ába laríñagun joun.

—Webuga Jerusalén guetó, le ñíba lubeí lagúnfulira sun le jabúrújabei profétagu nuágu, áu le Wügúri Garaúwarügüti. ³² Jedéregubadina joun ja mámabaña juríu, jéjerajaba náu, anába jamáname, suégu. ³³ Jabeíchubadina, lárigiñeme, ábame jáfarunina jilágubei, áni násaaruba lídaangiñe ouweni luágu lúruwan wéyu lúnya nabágaridun.

³⁴ Úati gunfaráanda jamá ni cáta lídaangiñe cátei le, ibídiñegubeiti joun ca lan uágu ladímureja joun, darúguati laníchigu cátei le laríñagubei, joun.

Lareidaguaüdüin Jesúsu ában Jericóna maríjinti

(Mt 20.29-34; Mr 10.46-52)

³⁵ Dan le achúlúreinaali Jesúsu ubúrugun Jericó, ñíñein ában maríjinti ñun laru úma amúriaja. ³⁶ Dan le lagáambunbei maríjinti ligía jásiüüjan sarágu gürígia, ába lálügüdajan ca lan susébebei. ³⁷ Ába jaríñagun lun luágu niján lan Jesúsu Nazarétna ásiügüra ñígiñe.

³⁸ Ábati lagúaragun, laríñaga.

—¡Jesúsu, le ladúgawagun Davíd, gudémená bun!

³⁹ Ja lubá lubáabaña, ába jadeñjan lun lun lámánichun, ligíatima lagúaragun.

—¡Ladúgawagun Davíd, gudémená bun!

⁴⁰ Ábati laráramagun Jesúsu, ába louñajan anúgei. Dan le yaráfaali lun, ába laríñagun lun.

⁴¹ —¿Ca babúseerubei nadúgün bun?

Ába laríñagun lun.

—Nabúreme, buséntina naríjin.

⁴² Laríñaga Jesúsu lun.

—¡libíjabeí baríjin! Areidaguaadibu ladúga bafiñen.

⁴³ Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürígia ja aríjubalin cátei le, ába gíñe jadímurejan buíti luágu Búngiu.

19

Jesúsu lúma Zaqueó

¹ Ábati lebélorun Jesúsu fulásurugun Jericó, ába lásügürün ubúrugugiñe. ² Ñíñein ában wügüri rísiti, gíríti Zaqueó, jábuti agúburajatiña liseínsuna gumádi. ³ Buséntiti Zaqueó laríjini Jesúsu lun lasúbudiruni, siñáti laríjini ladúga ñúraúraüti lúgubu, áni gíbetiña gürígia. ⁴ Lúnti gayára lan laríjini, ába leíbaagun ubáraü, ába laweínrun tuágun ában tídiibu wéwe sicómoro yaráfa lun le ñígiñeba lubeí lásügüra Jesúsu. ⁵ Dan le lásügürün Jesúsu ñígiñe, ába laríjin íñun, ába laríñagun lun Zaqueó.

—Zaqueó, raríba furése, ladúga lúnti neréderun búbiñe ugüñe.

⁶ Ábati larárirun Zaqueó furése, ába lerésibiruni Jesúsu lúbiñe láu ugúndani. ⁷ Dánti le jaríjini jíbiri gürígia cátei le, ába jagúmeserun adímureja luágu lídin Jesúsu erédera lúbiñe ában gafígounti. ⁸ Ábati laráramun Zaqueó, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubei luei ában gürrígia láu eyéeraguni, náguuyugüdüba gádürü weíyaasu sügü láu lun.

⁹ Laríñaga Jesúsu lun.

—Sálbañu jáña tílana múna to ugúñe, ladúgawagun gíñe Abrahám amúrú. ¹⁰ Ligía niábínbei ubóagu, áu le Wügüri Garaúwarügüti, lun náluajaniña lúma asálbaraña já yebe féridijaña.

Jémpulu luáguti díisi murúsun seínsu

¹¹ Dan le añája lubei gürrígia agáambajei laríñaguni buri Jesúsu cátei le, ába labájüdagun ában jémpulu joun, ladúga ayárafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía. ¹² Ábati laríñagun joun.

—Ñíñein ában wügüri íñugutiña lidújeñu, leíbugati wügüri ligía lídoun ámu fulásu díseti lun líchugúniwa lurúeiteme lageíra, ábayame lagíribudun. ¹³ Lubáragiñe láfuridun, ába loúnajan jawágu díisi jádaangiñe lumúsuníña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumei seínsu le darí nagíribudun.”

¹⁴ Queíti liyéeregunbei wügüri ligía joun lílana fulásu, ába jóúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme. ¹⁵ Láu sun líra, resíbiwati lun urúeime, ába lagíribudun lageíroun. Dan le lachúlürün, ába loúnajan jawágu lumúsuníña já buga únbaña líchigei seínsu lun lasúbudiruni átiriñein lan lagáñirun cáda ában. ¹⁶ Ába liábin le furúmiñeti, ába laríñagun. “Nabúreme, gáñeitina díisi weíyaasu ligíbuagun biseínsun.” ¹⁷ Laríñaga urúei lun. “Buíti, ában músu buíti bugúya. Quei úara bubei lídan le murúsunrügüti, níchigaadibu agúmadija lídan díisi fulásu.” ¹⁸ Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.” ¹⁹ Ába gíñe laríñagun lun. “Bagúmadija lídan seíngü fulásu.”

²⁰ Ábati liábin ában, ába laríñagun. “Nabúreme, niján biseínsun, areída numúti tídan ában músue ladúga nanúfude buei, ²¹ ladúga ában ban wügüri derégüdati, reídeitibu láu cátei le mawádígimaritibu luágu, alúbaja amúrú le ní lumuti mábunagun ban.” ²² Ábati laríñagun urúei lun. “Músu wurfbati, luágu guánarügü berérun nagúseragüdüba. Quei subúdi bubálin luágu ában nan wügüri derégüdati, luágu reídei nan láu cátei le mawádígimaritina luágu, alúbaja áu le ní lumuti mábunagun nan, ²³ ¿cáti uágu míchububalin niseínsun báncürugun lun jamúga lagánwoundun dan le nagíribudun?” ²⁴ Ába laríñagun joun ja ñibaña. “Gidájumei seínsu luei, rújumei lun le díisibeí lúma.” ²⁵ Ába jaríñagun lun. “Wabúreme, níjeinga díisi seínsu lúma.” ²⁶ Ába laríñagun urúei. “Naríñajare jun luágu sun lan le adúgati buíti láu le lúmabei, libíjuba lánwoun, ánjein le madúgünti ni cáta buíti láu murúsun le lúmabei, lagídarúaba murúsun ligía luei. ²⁷ Játi náganiñu, já yebe mabúseerúnbaña lun urúei nan, barújumaña ñájoun, áfaragua jumáña jilágubei nigíbugiñe.”

Lebélorun Jesúsu Jerusaléoun

(Mt 21.1-11; Mr 11.1-11; Jn 12.12-19)

²⁸ Lárigiñe laríñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá. ²⁹ Dan le chilú mémeeli lídoun buri fulásu le Betfajé lúma Betánia, yaráfa lun wúbü le gíríbei Olívos, ³⁰ ába laríñagun joun biáma jádaangiñe láni díspulugu.

—Jeíba lídan liraúraü fulásu le wagíbugiñebei, dánme le jachúlürün ñi, jadáriruba ában burígü gürráñu le maweínrúngili. Jafáragadeíme, ábame janúgüni ñájoun. ³¹ Ánjaün álügüdüwa ca lan uágu jafáragadei, jaríñagame luágu busén láani Jabúreme.

³² Ába jóúdin, ába jadáriruni ítara quei laríñaguni Jesúsu joun. ³³ Dánti le añája lubei afáragadei burígü, ába jálügüdüniña labúriña, jaríñaga joun.

—¿Ca uágu jafáragadei burígü le?

³⁴ Ába jóúnabuniña.

—Ladúga busén láani Wabúreme.

³⁵ Ábati janúgüni lun Jesúsu, ába jíchugunun janáangun lanágawagun burígu, ába jawefnragüdüni Jesúsu luágun. ³⁶ Quei awáansereina lan Jesúsu, átulejeina jamoún janáangun luágu úma lubá. ³⁷ Dan le jayárafadun lun larárirún wúbü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigun Búngiu, luágu buri miláguru le jaríjibe. ³⁸ Jaríñaga.

—¡Biníwati urúei le ñúbinbei lídan líri Wabúreme Búngiu! ¡Níjein ñurúguaü siélu, lúma uweírigu lun Búngiu!

³⁹ Ábati jaríñagun fariséogu ja ñíbaña jádan güirígia lun.

—Maésturu, aríñagabá joun bánigu lun jámanichun.

⁴⁰ Laríñaga Jesúsu joun.

—Ninárün jáu luágu ánjaña lan ámanichaja ja, lagúarajaba lán buri dúbü nuágu.

⁴¹ Dan le layárafadun lun Jerusalén, dan le laríjini ubúrgu ligía, ába layájuaian jawágu lílana fulásu ligía, laríñaga.

⁴² —¡Lun jamúga gunfaráanda jumáni ugúñe luágu áu lan úmabei lun ñurúguaü jun, buíti jamúga! Májatün. ⁴³ Ligía lachúlürüba lubei wéyu buri wuríbatí jun, jadúgame jáganiñu ában baríer geyégua láu jubúrgute lun siña lan jáfuridun ñígiñe, ábame jageíndagun júma lídaangiñe sun oúbaü. ⁴⁴ Jagúnrinchagubei jufúlasun le gumúti, mígirunbaña ni ában dúbü ligíbuagu dúbü, jáfarúaba sun jugúya, ladúga mebéresen jumá láu óra le liábinbei Búngiu asálbaraün.

Larúmadagüdüniun Jesúsu témpulu

(Mt 21.12-17; Mr 11.15-19; Jn 2.13-22)

⁴⁵ Ábati lebélorun Jesúsu témpulurugun, ába laságaruniña ja alúgurajabaña jáma ja agáñijabaña ñi. ⁴⁶ Laríñaga joun.

—Laríñajare tídan Lerérun Búngiu. “Núban, fulásu le ñí lubei gayára lan jayúmuragun güirígia nun”, ánjein jugúya, barújumaaru quei jában jíwerutiña.

⁴⁷ Ságü buri wéyu larúfudajan Jesúsu témpulurugu, añájeti jábutigu jafádirigun juríu jáma arúfudajatiña lilúrudun Moisés, jáma giñe lábutigu fulásu áluaja ída lúba lan jáfaruni jilágubei, ⁴⁸ madáritiña ída lúba lan jadúgüni ladúga weíri lan jórabajóuniwa sun güirígia lun jagáambuni lerérun.

20

Lirícha Jesúsu témpulurugu

(Mt 21.23-27; Mr 11.27-33)

¹ Luágu ában wéyu, dan le témpuluruguñein lubei Jesúsu arúfudaja joun güirígia, apúrichijeí ugánu luáguti asálbaruni, ligía jayábin jábutigu jafádirigun juríu, jáma arúfudajatiña lilúrudun Moisés, jáma wügúriña weírigutiña lídan jaffínen juríu, ² ába jaríñagun lun.

—Aríñagabei woun ca lan biríchabei lun badúgüni cátei le. ¿Ca íchugubalin ubáfu le bun?

³ Ábati laríñagun Jesúsu joun.

—Nálügüdáadün giñe ában cátei, oúnaba jumána. ⁴ ¿Ca oúnajabalin Juan abásteragü-daja? ¿Lóunajan Búngiu ódi jóunajan wügúriña?

⁵ Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu maffínerun wabei lun. ⁶ Ánjawa aríñaga luágu jóunajan lan wügúriña, jachámuraguba güirígia dúbü wawágun, ladúga choóru jamúti luágu proféta lán meja Juan.

⁷ Ábati jaríñagun luágu ibídiñe lan joun ca lán meja oúnajabalin Juan abásteragü-daja.

⁸ Ábati laríñagun Jesúsu joun.

—Maríñagun nubeí gíñe jun ca lan áu ubáfu nadúgei buri cátei le.

Jémpulu jawáguti ñadágimeintiña wuríbatíña

(Mt 21.33-44; Mr 12.1-11)

⁹Ába lagúmeserun Jesúsu admureja joun gürígia, ába labájüdagun ában úraga le gíbebei laníchigu, joun. Niján úraga ligía.

—Níñein meja ában wügúri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan. ¹⁰Dan le lachúlürün lidáani alúbajani, ába loúnajan ában lumúsun anúgei lufánran, ába jabúleiseiruni ñadágimeintiña músu ligía, ába jóúnajani lárigoún, míchugunga ni cáta lun. ¹¹Ábayati loúnajan ábanya músu, ába gíñe janábuni, buleísei jameí, oúnaja jameí, míchugunga ni cáta lun. ¹²Ábaya loúnajan ábanya, ábaya gíñe jabúleiseiruni, ába jabúguni nígiñe.

¹³‘Ába laríñagun labúreme ichári lúnguarügü. “¿Cábasán funa nadúga? Nounajaali niraú le jínsiñebei nun, dánme le jaríjini, fágua inébebei joun.” Ába loúnajani. ¹⁴Dan le jaríjinalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.” ¹⁵Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, laríñaga.

—¿Cábatí ladúga labúreme ichári? ¹⁶Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

¹⁷Ába laríaguniña Jesúsu, ába laríñagun joun.

—¿Cáti lílabei le bürüñubei tídan Lerérun Búngiu le ní lubei laríñaga.

Lé meja dúbü le mabúseerun jabeí ábunagutiña, ligíaali furúmiñeti?

¹⁸Furúmieguarügü le achúgeraguti luágu dúbü ligía lagúnrinchaguba, léti uágunti laburuja, labúrechagúbei. Áu dúbü ligía.

Luáguti liseínsuna gumádi

(Mt 21.45-46, 22.15-22; Mr 12.12-17)

¹⁹Lídan meme óra ligía, ába jálugun jábutigu jafádirigun juríu jáma arúfudajatiña lílürudun Moisés járügüdüni Jesúsu, ladúga jasúbudiruni luágu jawáguti lan jémpulu le laríñagubei, madúgiün jamúti ladúga janúfude jawéi gürígia. Ábati jagúrabajan ámu dan. ²⁰Ábati jóúnajan gürígia ja ásügürütiña jóungua camá jamuga jarúmatiña lun jaríaajani Jesúsu, lun jaríñagagüdüni cátei le gawáguti gayára lan jíchugun lídúnrun lun jedéregeruni lun gumádimati. ²¹Ligía jálügüdünbalin, jaríñaga lun.

—Maésturu, subúdi wamúti luágu richá lan le baríñagubei lúma gíñe le barúfudajabei, manúfudetibu gíñe luef ni ában, ladúga ni cáta lan luweírgun gürígia bun, áni láu inárüni barúfudajei lémeri Búngiu. ²²Aríñagabá ában cátei woun. ¿búfti lun lafáyeijóun seínsu lun warúeite César ódi mabuídunti?

²³Ába lasúbudiruni Jesúsu luríban jarítangun, ába laríñagun joun.

—¿Ca uágu jabúseera jíchugun sádara nubá? ²⁴Arúfuda jumá ában lídaangiñe seínsu ligía nun. ¿Cá iyáwa lúma íri le bürüñubei luágu?

Jaríñaga lun.

—Láni César.

²⁵Ábati laríñagun joun.

—Le láni César rújumei lun César, le láni Búngiu rújumei lun Búngiu.

²⁶Siñá jamútiti áburügüda tídoun jasáðaran láu lé buri laríñagubei jagíbugiñe gürígia, weírügüti janígi láu loúnabagüle joun. Ába jámanichun.

Álügüdjani lübügürü ásaaruni lídaangiñe óuweni

(Mt 22.23-33; Mr 12.18-27)

²⁷ Láriñiñe, ába jóúdin saduséogu aríjei Jesúsu. Jaríñajare saduséogu luágu másaarun-baña lan jiláaña lídaangiñe óuweni lúnya jabágaridun. Ábati jaríñagun lun Jesúsu.

²⁸ —Maésturu, laríñajare Moisés woun tídan lilíburun, luágu ánjein lan óuwe ában wügúri, ába lígirunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadúgawagun lámuga líbugaña le óuwebei. ²⁹ Wel, ñíñanu mejáti sédü wügúriña gamúlenuguátiña, ába lamárieidun le furúmiñeti, ába lóunwen marájüñüga.

³⁰ Ába lamárieidun le jabíaman túma buga lúmari íbugañaü, ába gíñe lóunwen marájüñüga.

³¹ Ábati lamárieidun le júriwan túma, chülú lúmoun le jasédün, jilágua meme jagía, marájüñüga táu. ³² Ába gíñe toúnwen wúri tugúya. ³³ Aríñagabá ában cátei woun. dánmeti le jásaarun lídaangiñe óuweni lúnya jabágaridun, ¿cábatu úmari wúri to jádaangiñe, quei maríei tubeí jáma sédügubei?

³⁴ Ába laríñagun Jesúsu joun.

—Lídan ubóu le, maríeiñiña wügúriña jáma würiña, ³⁵ ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe óuweni lúma lun jebélurun siéluñ agánawa ñi lun sun dan. Magámaridubaña ñi, míchaajan jamáñame jarájüñü lun maríei, ³⁶ ladúga móunwendügüyaaña güriñia siélu, ítaraañame quei ánjeligu, lirájüñü jañáme Búngiu ja saráaña lídaangiñe óuweni. ³⁷ Moisés guánarügü arúfuda lumúti luágu níjein lan ásaaruni lídaangiñe óuweni lídan le labúrújanbei luágu búbugati geméti. Laríñajare ñi luágu Búngiu lan Lubúngiutebei Abrahám, Isác lúma Jacób. ³⁸ Láu dimúrei ligía, arúfuda lumúti Moisés luágu wínwangiña lan Abrahám, Isác lúma Jacób, láu sun jilá lan jágubu, ladúga máma Jabúngiute jiláaña Búngiu, Jabúngiute ja wínwangiñabaña. Wínwangiña lanúgüniña Búngiu sun güriñia.

³⁹ Ábati jaríñagun arúfudajatiña lilúrudun Moisés.

—Buíti baríñaguni, Maésturu.

⁴⁰ Ába málügüdagun jamáali lan.

¿Ladúgawagunsan David Crístu?

(Mt 22.41-46; Mr 12.35-37)

⁴¹ Ába laríñagun Jesúsu joun.

—¿Ída liñásan jaríñagunbei luágu ladúgawagun lan David Crístu? ⁴² Laríñajare David guánarügü tídan líburu to giríboun Sálmos.

Aríñagati Búngiu lun Nabúreme. “Ñurúba lueígiñe nóunwenren,

⁴³ daríme níchuguniña báganiñu bújaburugun.”

⁴⁴ ¿Ída lubáti ladúgawagun lan David Crístu, áni aríñagati David guánarügü lun Crístu “Nabúreme”?

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Mr 12.38-40; Lc 11.37-54)

⁴⁵ Níñanu sarágu güriñia agáambajei Jesúsu, ába jagáambun laríñagun joun láni dispú-lugu.

⁴⁶ —Tóunigüa jumá júngua jawéi arúfudajatiña lilúrudun Moisés, ganígitiña jebbugun táu anáanguni durúrutu, busén jagía lun labúsúrún joun láu inébesei úmadarugu, áluaa jamei ubáraü le jabára weírigutiña tídan liglisi, lúma lubuidun-ágei ubáraü lídan eígini.

⁴⁷ Gidá jamutu gíñe jában würiña ja jiláaña úmari jawéi, lúnti jadáuragun láu, ába jadúgün furíeigi migímaguti. Weíríbei jasúfurirun luágu sun le jadúgübei.

21

Seínsu le tíchugubei ában fugiábu wúri témpulurugu

(Mr 12.41-44)

¹ Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu, ² aríja lumúti gíne tíchugun ában wúri jiláli túmari, gudémetu, bián gáwanün tídoun gáfu. ³ Ába laríñagun Jesúsu.

—Ninárün jáu luágu gíbetima lan tíchugun fugiábu wúri to sügú jáu súngebui, ladúga sun jagía, lídaangiñe le ígiragubei jáma jíchiga, ⁴ ánjoun tugúya, láu tugúdemegun tíchigei sun le túmabei lún yebe tawínwandun.

Laríñagun Jesúsu luágu tagúnrinchawagúba lan témpulu

(Mt 24.1-2; Mr 13.1-2)

⁵ Jadímurejaña fiú gürríga tuágu témpulu, luágu tubuídunmeräi láu lubuídun buri tídübüri lúma buri cátei le jíchugubei gürríga lun tawéndedun. Ábati laríñagun Jesúsu.

⁶ —Lachúlürüba wéyu lun lagúnrinchawagún sun le jaríagubei tuágu témpulu to guetó, merédebei ni ában dübü ligíbuagu dübü.

Seíni buri lubá lagúmuchun ubouú

(Mt 24.3-28; Mr 13.3-23)

⁷ Ábati jálügüdüni, jaríñaga lun.

—Maésturu, ¿ídame san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Níján dan ligía.” Mafñera jumá joun, mafálara jumáña. ⁹ Dánme le jagáambun ladímurejóun luágu awúribujani lúma jawágu gürríga agáragua luágun jarúeite, manúfudedagua jumá, lasúsereduba le furúmiñe, mámagilíme lagúmuchun ubouú líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu.

¹¹ Níbei oúnwenbun buri jarábaganáli, ilámaü, sándi, lídan ámuñegueinarügü fulásu, laríjüba buri cátei janúfunati siélu lúma oúnwenbun buri seíni.

¹² Lubarágiñe lasúseredun sun le, jaríjüba, eíbaajouá jugúyame. Janügüba agúsera tídan jalígilisin juríu, jádarawagúba furisunrugun, barúwa jugúyame jagíbugiñóun urúeigu jáma gumádimatiña, nueígiñe, lun jagúseragüdünün, ¹³ ligíame jídaani lun jadímurejan luágu nufúleisein. ¹⁴ Aráanse jumei jarítagun lun madíjeri jumá cába lan jaríñaga jueígiñegua, ¹⁵ níchuguba dimúrei lúma lichú áu jun le lásíñerun ni ában jádaangiñe jáganiñu asígenera ni oúnaba. ¹⁶ Jalúgurubadün jagúbürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe, ¹⁷ jiyéreeguduba joun sun gürríga, nueígiñe. ¹⁸ Lídaanme sun líra, latoúnigirubadün Búngiu le gumúti, ¹⁹ áni ánjaün meme derégüdagua lídan jafíñen nuágu, jibíjibeí íbágarí magúmuchaditi.

²⁰ Dánme jaríjin geyégua jamá lan súdeara ubúruagu Jerusalén, subúdi jumei luágu yaráfaali lan lagúnrinchagun ubúruagu ligía. ²¹ Jámeti gürríga ja Judéabaña, lúnti janúrajan luágun buri wúbü, ja ubúrugubaña Jerusalén, lúnti jáfuridun nígiñe, ja áraabubaña, magríbuda jamá ubúruagu. ²² Luwéyuri buríbeí jafáyeirun gürríga luágu wuríbati le jadúgubei, dánme le lagúnfulirún sun le búrúwañubei tídan Lerérun Búngiu. ²³ ¡Fugiábugume wúrriña ja dageinátiña lídan dan ligía, o ja lan garájüñütiña ja gurágiñal! Ladúga níbei sarágu igárigu ubouágu, larúfudubei Búngiu luweírin ligáñi luágu jafígoun gürríga ja juríu. ²⁴ Níbaña oúwegutiña wuríburugu, jibiri janáawaguba adáürawagua lídoun ámu ageíraü, ábame jagúnrinchaguni ja mámabaña juríu ubúruagu Jerusalén daríme lagúmuchun dan le íchugubei joun lun jadúgüni.

Ligáburi ída lúba lan líabin Crístu

(Mt 24.29-35, 42-44; Mr 13.24-37)

²⁵ ‘Lasáliragubáti buri sefni luágu wéyu, luágu játi lúma jawágu warúguma, ábame lawefridun janígi néchaanigu ubouágu, ábame janúfudedagun luágu lanárime lajúujan lúma labouñjan lugúdi barána. ²⁶ Ladágaruba falálaü jawágu güriquia láu anúfudei, láu jasáminarun luágu cátei le lúnbei lasúseredun, ladúga járügüdüba lan warúguma ámu úma. ²⁷ Ábamenti laríjin niábin, áu le Wügüri Garaúwarügüti, lídan juánriñu láu sun nubáfu lúma ouñwenbun nuweírigin. ²⁸ Dánme le lagúmeserún buri cátei le asúsereda, ragújuma dügüdaguaü, iñúra jumeíme jichúgü, ladúga madíseelime jasálbarun.

²⁹ Rúlumuti gíñe jémpulu le joun.

—Arija jumoún tídibu ígo, o furúmieguarügü tídibu wéwe. ³⁰ Dan le jaríjin labouñchun tubána, subúdi jumúti luágu yaráfaali lan lidáani lubáchouga. ³¹ Dánme gíñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

³² ‘Ninárün jáu luágu lagúnrinchawagúba lan sun ubúruugu le Jerusalén lubáragiñe jowwegun güriquia ja lánina dan le. ³³ Lagúmuchaguba siélu lúma ubou, ánjein nerérun, ladúraruba lun sun dan.

³⁴ ‘Toúngi jumá, migira jumá lun tabuñchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina ibágari le, márügüdün lámugaün wéyu nagríribudagüle ubouágun lídan magáradajan jumá, ³⁵ quei ában sádera to adárurutu. Ladúga itara lúba liábin wéyu ligía jawágun sun ja aganoúbaña lídan sun fulásu ya ubouágu. ³⁶ Aráanseñu jumá lubeíti, ayúmuragua jumá lun Búngiu sun dan, gayára lámuga jibíjin ubáfu lun jawánduni sún buri cátei le lúnbei lasúseredun, lun gíñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, árieibu, ábaja lídin erédera luágu wúbü le Olfvos. ³⁸ Ábaja chülúgiñe jamá güriquia témpulurugun ságü bináafin lun jagáambuni.

22

Jelédegun áganiñu lubá Jesúsu

(Mt 26.1-5, 14-16; Mr 14.1-2, 10-11; Jn 11.45-53)

¹ Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjeli áfaraguaña jígirama Ejíiptona, máfaragun lumútiña jígirama Israélitagu. ² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, ibídiñounga joun güriquia, ladúga janúfude jaweí.

³ Ábati lagáñeiruni Máfia larítangun Júdas Iscarióte, le ában jádaangiñe láni Jesúsu dúusu apóstolugu, ⁴ ába lídin adúga darádu jáma jábutigu jafádiriñegu juríu jáma jábutigu tisúdaarana témpulu lun ledéregeruni Jesúsu joun. ⁵ Ába jagúndaaragun, ába jaríñagun lun Júdas luágu jíchuguba lan seínsu lun, ⁶ ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá güriquia.

Lagúmujoún leígin Jesúsu jáma lánigu

(Mt 26.17-29; Mr 14.12-25; Jn 13.21-30, 1 Co 11.23-26)

⁷ Ába lachúlürün fédu le ídaanbei teigúa fein magánatu ísi, ní lubei gíñe ladágarawagüdüwa mudún le lánina fédu. ⁸ Ába laríñagun Jesúsu lun Pédro lúma Juan.

—Jeiba aráanserei eíginí le lánina fédu.

⁹ Ába jálügüdüni.

—¿Jalíagi babúseera waráanseruni?

¹⁰ Laríñaga joun.

—Dánme le jebélurun ubúrugun, jadúnraguba lúma ában wügüri táu ában dináa láu dúna, jafálareime chülú tídoun múna to ñjín lumúti lebelura. ¹¹ Jaríñagame lun tabúreme múna. “Laríñajare Maésturu. ¿Jigún rúmu to ní lubei gayára lan neígini eíginí le lánina

fédu jáu náni disípulugu?" ¹² Ábame larúfudun ában rúmu weírítu jun tougíñegua múna, aráanseñu tíña, jaráansereime eíginí ñi.

¹³ Ába jóúdin, ába jadáriruni sun cátei quei laríñaguni Jesúsu joun, ába jaráanseruni eíginí lánina fédu ñi.

¹⁴ Dan le lachúlürünbei óra, ába lañúurun Jesúsu jáu lání disípulugu luágu dábula, ¹⁵ ábati laríñagun joun.

—¡Oúnwenbun nabúseerun neígini eíginí lánina fédu le júma lubáragiñe noúnwen!

¹⁶ Ladúga naríñajare jun luágu meígindügüya náali lan eíginí lánina fédu le daríme lagúnfulirún laníchigu lídan larúeijan Búngiu.

¹⁷ Ábati lanúgün ában wéru táu diweín lújaburugu, ába leteíngiruni Búngiu, laríñaga.

—Barújumei le, fánreingua jumei jídaangua, ¹⁸ naríñajare jun luágu mátundügüyaadina lan diweín daríme liábin larúeijan Búngiu.

¹⁹ Lárígíñe, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adúga jumei le, jarítaguagüleme nuágu.

²⁰ Ítara meme gíñe, lárígíñe jeígín, ába lanúgüni wéru táu diweín, ába laríñagun.

—Niján níta le lúnbei láwiyurun lídaangiñe núgubu juágu, lun lañúurun iséri darádu.

²¹ ‘Niján wügúri le lúnbei ledéregerunina wáma ya luágu dábula, ²² luáguñadina úma le lúnbei nanúgüni, áu le Wügúri Garaúwarügüti, áni ¡fugiábutia wügúri le lúnbei lalúgurunina!

²³ Ábati jagúmeserun álügüdagua jádaangua cába lánfuna alúgurei.

Ladímurejóun luágu cába lan weírigitima

²⁴ Ába jasígenejan lánigu luágu cába lan jádaangiñe weírigitimá. ²⁵ Ába laríñagun Jesúsu joun.

—Lídan arúeijani lánina ubou le, agúmadijatiña já buri lurúeítana fulásu, camá jamuga labúreme jagía, já buri lábutigu fulásu, aríñawagúati jawágu luágu wügúriña jamá ja gadúgatiña fuleisei joun güriá. ²⁶ Ánjein lídan narúeijan, mítaraanti, lubáragiñe líra, le weírigitimaabei le tímatimaati jídan lúnti lanáangun lúngua quei le únabutimaabei, le agúmadijabei, lúnti ítara lan quei le esériwijabei. ²⁷ ¿Cági weírigitimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

²⁸ ‘Jugúya úarabañája núma lídan nouchawagun, ²⁹ ligía níchugunbadün lun jarúeijan quei líchugunina Núguchi lun narúeijan. ³⁰ Jeígiba, gurá jugúyame luágu nidábulan yágüta siélu lídan narúeijan, ñurú jugúyame luágu buri lála urúei lun jagúseragüdüniña jadúgawagun dúusu lirájüñü Israél.

Laríñaguni Jesúsu luágu leyéedaguba lan Pédro láu

(Mt 26.31-35; Mr 14.27-31; Jn 13.36-38)

³¹ Aríñagati gíñe Wabúreme Jesúsu.

—Simón, Simón, amúriajaali Máfia úma lúma Búngiu lun gayáraabei lan loúchagunün quei lawánijoún türígu, ³² íbija lumúti, áni ayúmuraguaadina buágu lun Búngiu lun meféridirun báani baffínen nuágu lídaanme óra ligía. Áni dánme le bagíríbudun nun, rúba dúgüdaguaü joun bíbirigu.

³³ Laríñaga Simón lun.

—Nabúreme, aráansetina lun nídin búma furísunrugun, o lun lan noúnwen búma.

³⁴ Laríñaga Jesúsu lun.

—Pédro, ugúñe méme, beyéedaguba náu úrúwa weíyaasu lubáragiñe layúgurujan gáyu, baríñaguba luágu íbídiñe nan bun.

Layárafadun lórate ouchawaguni

³⁵ Ábati laríñagun Jesúsu joun.

—Dan le nouñajanbalün maságüteiga, ni láu lágei seínsu, ni geídi, ¿níñein funági jemégeirun?

Ába jaríñagun.

—Uá Maésturu, memégeiruntiwa ni cáta.

³⁶ Ábati laríñagun joun.

—Ánjeinti guetó, le gaságüteti, barúloun, barú ligíame lágei seínsu, le mefeínteti, alúguraloún labíte lun lagáñijan lefeínte, ladúga wuríbati dan le. ³⁷ Naríñajare jun luágu lagúnfuliruba lan le taríñagubei Lerérun Búngiu nuágu. “Ába jabájüdüni jádan wuríbatiña.” Sun le bürüwañubei nuágu lagúnfuliruña guetó.

³⁸ Ábati jaríñagun.

—Wabúreme, nuján bián efeín ya.

Ába laríñagun joun.

—Buíti.

Layúmuragun Jesúsu Getsemaní

(Mt 26.36-46; Mr 14.32-42)

³⁹ Ábati láfuridun Jesúsu, ába lídin luágun wúbü le Olívos quei ligáburiñaja, ába jóúdin láni disípulugu lúma. ⁴⁰ Dan le jachúlürün lídan fulásu ligía, ába laríñagun joun.

—Jayúmuragua, meferídirun jumámugei jafíñen nuágu.

⁴¹ Ába ladísedun Jesúsu jaweí murúsunraü, ába lájuduragun ayúmuragua lun Búngiu, ⁴² laríñaga.

—Núguchi, ánjabu busén, séfu bána lueí oúnwenbun asúfuriruni le lúnbei nasúfurirun, madügüwalá le nabúseerubei, le la babúseerubei adügüwa.

⁴³ Ábati líábin ában ánjeli siélugiñe lun líchugun érei lun. ⁴⁴ Dan létima laweíridun ligárigu, ligíatima layúmuragun láu érei, lédedejati lísüga lueí camá jamuga oúnwenbun lédedejan jítaü, múarugun.

⁴⁵ Dan le lásaarun lídaangiñe layúmuragun, ába ladáriruniña disípulugu arúmuga, larúmagüdüin íruni. ⁴⁶ Ábati laríñagun joun.

—¿Ca uágu jarúmuga? Sarájuma, jayúmuragua, meferídirun jumámugei jafíñen nuágu.

Janúgüni Jesúsu adáüra

(Mt 26.47-56; Mr 14.43-50; Jn 18.2-11)

⁴⁷ Nígili Jesúsu adímureja, ligía jayábin sarágu güriá, Júdas, le ában jádaangiñe dúusu disípulugu, jabá jabá. Aba layárafadun lun Jesúsu lun lachúuruni. ⁴⁸ Ábati laríñagun Jesúsu lun.

—Júdas, ¿láu ában chúuti balúgurana, áu le Wügüri Garaúwarügüti?

⁴⁹ Játi lúmabaña Jesúsu, dan le jaríñinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

⁵⁰ Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren. ⁵¹ Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun. ⁵² Ába laríñagun joun jábutigu fádirigu, joun wügüriña weírigutiña lídan jafíñen juríu, lúma joun jábutigu tisúdaarana témpulu, ja núbínbaña anúgei.

—¿Jiábin nuágu táu efeín lúma wéwe camá jamuga jíwerutina? ⁵³ Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadügüni jugúndan náu, óraali lun lagúmadíjan le labúremebei lubúriga.

Laríñagun Pédro luágu ibídiñe lan Jesúsu lun

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Ábati járiügüdüni Jesúsu, ába janúgüni lúbiñoun fádiri le ñtutimaabei, ábati lafálaruni Pédro dísegiñe. ⁵⁵ Ába jáfuragun wátu ñi lamídaangua baríeru, ába jañúurun geyégu láu, ába gíñe lañúurun Pédro jádan. ⁵⁶ Queíti tarjini ában músu ñun larúgürügü wátu, ába teréderun aríaguei, ába taríñagun.

—Lúmañein buga gíñe Jesúsu güiría le.

⁵⁷ Ába leyéedagun Pédro, laríñaga.

—Ibídiñeti wügúri ligía nun.

⁵⁸ Murúsun lueígiñe, ábaya larjini ában, ába laríñagun.

—Jánigu gíñe amúru.

Ába laríñagun Pédro.

—Máma jánigu áu.

⁵⁹ Quef buri ában óra lárigiñe, ábaya laríñagun ában.

—Inárüni luágu lúmañajañein lan wügúri le ladúga Galiléana gíñe.

⁶⁰ Ábati laríñagun Pédro.

—Ibídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu.

⁶¹ Ába ladígiragun Wabúreme Jesúsu aríja luágun Pédro, ába laritagun Pédro luágu lé buga laríñagubei Jesúsu lun. “Lubáragiñe layúgurujan gáyu uguñe, beyéedaguba náu úrtiwa weíyaasu.” ⁶² Ábati láfuridun Pédro, ába layájun láu igárigu.

Jéjerajan láu Jesúsu

(Mt 26.67-68; Mr 14.65)

⁶³ Ja wügúriña ja oúnigirubalin Jesúsu, ába jéjerajan láu, bei jamef. ⁶⁴ Ába jagúraguni lágu, ába jagáyuajan ligíbuagun, aríñageina jagía.

—jBugúya le profétabei, aríñagabeígia ca lan agáyuajabei buágu!

⁶⁵ Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu

(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába jóundaragun wügúriña weirigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janúgüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabei woun, zamúrúsan Crístubei le lúnbei lasálbaruniña güirígia?

Ába laríñagun joun.

—Ánjana aríñaga jun luágu ánja lan, maffñebadün nun, ⁶⁸ ánjaün nálügüdagua, moúnabun jubádina, mígiragüdüñ jumáname. ⁶⁹ Naríñaga ában cátei jun. lúmagiñe guetó, nañúuruba, áu le Wügúri Garaúwarügüti, lueígiñe louñwenren Búngiu le Súnti Gabáfuti.

⁷⁰ Ábati jálügüdüni súngubei.

—¿Amúru lubeíti Liraúbei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

23

Jesúsu ligíbugiñe Piláto

(Mt 27.1-2, 11-14; Mr 15.1-5; Jn 18.28-38)

¹ Ábati jásaarun sun líñun-ágei lúrudu, ába janúgüni Jesúsu ligíbugiñoun Piláto, ² ába jagúmeserun íchiga lidúnrun, jaríñaga.

—Darí wamaali wügúri le achágaraguágüdaña güriña, laríñajare luágu moun lan lun wafáyeijan seínsu lun urúei Rómána, aríñagati gíñe luágu ligía lan Crístubei le lanúadirubei Búngiu lun lasálbaruniña güriña, aríñaga ligía luágu urúei lan ligía.

³ Ábati laríñagun Piláto lun.

—¿Amúrúsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábati laríñagun Piláto joun jábutigu fádirigu lúma joun jíbiri güriña.

—Madáritina dúru luágu wügúri le.

⁵ Ábatima jaríñagun jére.

—Lachágaraguágüdüñanu sun güriña Judéana láu ligáburi larúfudajan, lagúmesera Galiléagiñe, niján mémegua adúgei chülú ñajoun.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügüdagun ánjein Galiléana lubei wügúri ligía. ⁷ Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladúga ñíñein Heródes Jerusalén lídan dan ligía. ⁸ Ába lagúndaaragun Heródes dan le laríjini Jesúsu, ladúga agáambañajaali lan luágu áni lúja labúseerun laríjini, agúrabititi laríjin ladúgün ában miláguru. ⁹ Ába lálügüdaguni luágu sarágu cátei, moúnabunti Jesúsu ni cáta. ¹⁰ Ñíñanu jábutigu fádirigu jáma arúfudajatiña lilúruden Moisés, magúmuti jíchugun lidúnrun. ¹¹ Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáüraguagüdüni táu anaánguni wéndegutu quei lanáangun urúei, ábaya loúnajani Heródes lun Piláto. ¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasíadirúniwa Jesúsu lun loúnwen

(Mt 27.15-26; Mr 15.6-15; Jn 18.39-19.16)

¹³ Ábati loúndaruniña Piláto jábutigu fádirigu jáma lúrudugu, jáma buri ámu güriña, ¹⁴ ába laríñagun joun.

—Jugúya anügübalin wügúri le nun, jaríñaga luágu chagáguagüda lániña güriña, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jaríñagubei luágu. ¹⁵ Madáriti gíñe Heródes lidúnrun, giríbugüdalá woun. Aríja jumáali luágu madúgün lan ni cáta le lúnti lafarún jilágubei luegiñe, ¹⁶ nabeíchagüdali lubefti, lárigiñeme, ábame nígiragüdüni.

¹⁷ Gagáburititi Piláto lúnja lígiragüdüni ában adaürúti fédurugu, ¹⁸ ába jagúarajan sún-gubei lídan ában.

—¡Áfarabeí le! ¡Ígiragüdabeí Barabási!

¹⁹ Barabási ligía, ladaürúña luegiñe ligía lan ában jádaangiñe ja iñúragubaña jóungua luágu gumádi, lúma luegiñe láfarajan. ²⁰ Busénti yebe Piláto lígiragüdüni Jesúsu, ábaya ladímurejan joun, ²¹ ligíatima jagúaragun.

—¡Dáguabeí luágu gurúwa! ¡Dáguabeí luágu gurúwa!

²² Ába laríñagun Piláto joun luágu lúrwun weíyaasu.

—¿Cáti wuríbati ladúgübei? Madáritina ni cáta le lúnti lafarún jilágubei luegiñe. Nabeíchagüdali, ábame nígiragüdüni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei. ²⁴ Ábagubefti ladúgüni Piláto le jabúseerubei, ²⁵ ábati lígiragüdüni wügúri le jabúseerubei, le adaürúbei luegiñe iñúraguni lúma áfarajani, ábati ledégeruni Jesúsu joun lun jadúgüni jagúndan láu.

Ládarawagún Jesúsu luágu gurúwa

(Mt 27.32-44; Mr 15.21-32; Jn 19.17-27)

²⁶ Dan le jóúdiña lan láu Jesúsu lun ládarawagún luágu gurúwa, ába jártügüdün ában wügúri Ciréna gíríti Simón, liábiña áraabugiñe, ába janúgagüdüni gurúwa lun, ába lídin láu lárígi lárígi Jesúsu.

²⁷ Sarágu jána gürígia afálaruti jáma sarágu würiña jádan ayájuajaina, agúarajaina láu írúni luágu. ²⁸ Ába ladígiragun Jesúsu jawágun, ába laríñagun joun.

—Würiña Jerusalénna, mayájua jumá nuágu, jayájua juoúgua lúma jawágu jirájüñü, ²⁹ ladúga liábinba buri wéyu dánme le laríñawagún. “Fuleiseiwatiña ja siñábei jagáraüdüni jáma giñe ja marájüñüijañábaña, jáma ja mátagüdjabanbaña.” ³⁰ Ábamei jaríñagun gürígia lun wúbü fñuti. “Áburujabá wawágun”, aríñaga jagíame lun wúbü únabuti. “Darúguabá wáu.” ³¹ Ladúga ánjein adúgajabalin sun le láu tídibu wéwe le dúdügili, ¿cábagi madúgün jamá láu le mábejjali? (Ítara líña ladímurejan luóúgua, le madúnrunbei, lúma jawágu ja gadúnrunbaña.)

³² Barútiña giñe bíama gadúnruntiña lun jafarún úara lúma Jesúsu. ³³ Dan le jachúlürünbei lídoun fulásu le gíríbei Lufúlasun Lábu Ichúgü, ába jádaraguni Jesúsu luágu gurúwa jáma giñe bíama wuríbatíña jagía, ában luegiñe loúnwenren, ában luegiñe lubáúna. ³⁴ Dánti le añája lan ádaraguei Jesúsu luágu gurúwa, ába laríñagun.

—Núguchi, ferúduna báña ladúga ibídiñeti joun ca lan jadúgübei.

Ába jájurerun súdeara ubúnuruni lun jarjín cába lan un jádaangiñe terédera lanáangun Jesúsu. ³⁵ Níñanu gürígia aríagua, níñanu giñe lúrudugu jéjerajaña láu, jaríñaga.

—Sálbati ámu, sálbagonalá giñeti lúngua, ánjein inárüni lubeí luágu ligía lan Crístubei le lanúadirubei Búngiu lun lasálbaruniña gürígia.

³⁶ Éjerajatiña giñe súdeara láu, láu jayárafadun íchiga tagúbüri diweín lun lun látunun, ³⁷ jaríñaga buri lun.

—Ánjein Jarúeite bubeí jurú, sálbaguabá búngua.

³⁸ Níñeinti ában abúrújóuni loúgiñe lichúgü, laríñajare ñi. “Niján Jarúeite Jurú.”

³⁹ Ába lanábuni ában jádaangiñe wuríbatíña ja dáwagubaña luágu gurúwa ñi Jesúsu, laríñaga.

—Ánjein bugúya lubeí Crístubei, sálbaguabá búngua, sálba báwame.

⁴⁰ Ába ladeínjan le ában lun loúba, laríñaga lun.

—¿Manúfudetibusan lueí Búngiu, bugúya le lábugiñebei ában meme sáfuri lúma?

⁴¹ Wagía, garíchatíwa lun wasúfurirun ladúga wafáyeijaña luágu wadúga, ánjeinti wügúri le, madúgünti ni cáta wuríbatí.

⁴² Ábati laríñagun.

—Jesúsu, barítaguame nuágu dánme le lagúmeserun barúeijan.

⁴³ Laríñaga Jesúsu lun.

—Ninárün báu luágu númabadibu lan siélu, ugúñe méme.

Louñwen Jesúsu

(Mt 27.45-56; Mr 15.33-41; Jn 19.28-30)

⁴⁴ Amídirugu, ába labúrigadun sun fulásu darí ladaúnrún úruwa rábounwéyu. ⁴⁵ Ába labúrigadun wéyu, ába tajeíridagun tubélun témpulu tamídan túmagua. ⁴⁶ Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

⁴⁷ Dan le larjínbalin jábuti súdeara Rómána le asúseredubei, ába ladímurejan weírígu luágu Búngiu, laríñaga.

—Inárüni, madúnrunti buga wügúri le.

⁴⁸ Sun gürígia ja ñibaña, ja arjúbalin le asúseredubei, ába jóúdin nígiñe, áfarajaina jamef janíguagu, le jagárigu. ⁴⁹ Ánjaña sun lumádagu Jesúsu jáma giñe würiña ja ñúbinbaña úara lúma Galiléagiñe, ába jeréderun díse arjéi buri cátei le.

*Labunún Jesúsu**(Mt 27.57-61; Mr 15.42-47; Jn 19.38-42)*

⁵⁰ Níñein ában wügúri gíríti José, lídaangiñeti fulásu le gíríbei Arimatéa, le jafúlasun juríu. Buíti ligáburi wügúri ligía, richáguati ligíbugiñe Búngiu, lídaañein líñun-ágei lúruđu le jáni juríu. ⁵¹ Agúrabañu líñein larúeijan Búngiu, magúndaanti lubeíti láu cátei le ladúgúbei líñun-ágei lúruđu láu Jesúsu. ⁵² Ábati lídin lúmoun Piláto, ába lamúriajani lúgubu Jesúsu lúma. ⁵³ Lárígiñe laráriragúdúni lueígiñe gurúwa, ába lóuburaguni táu ában gamísa, ába lácharuni lídoun ában umúajaü achigíti luágu ában dúbü le ní lubei úagili lan ní ában abunúti. ⁵⁴ Wáandaradi wéyu ligía, luwéyuri aráansejani lubá luwéyuri eméraguni joun juríu, áni agúñeeli gumése.

⁵⁵ Ába jafálaruni wúrínna já meja núbinbaña lúma Jesúsu Galiléagiñe José, aríja jameí umúajaü, aríja jameí buídu ída líña lan líchugún lúgubu Jesúsu lídoun umúajaü. ⁵⁶ Dan le jagíríbudunbei jábíñoun, ába jaráanseruni ibíñei buri le íchugúbei jawágu jiláaña, ábati jeméraagun lídan wéyu le eméraagugúlei quei laríñaguni lílúrudun Moisés.

24

*Lásaarun Jesúsu lídaangiñe óuweni**(Mt 28.1-10; Mr 16.1-8; Jn 20.1-10)*

¹ Wéyu dimáasu, ába jagíríbudun wúrínna luágun umúajaü, bináafingua, barúina jameí ibíñei le jaráanserubei jámagua. ² Dan le jachúlürünbei, mámaali lídan lubára dúbü le lídaü umúajaü. ³ Ába jebélurun lídoun umúajaü ligía, madári jamúti lúgubu Wabúreme Jesúsu ní. ⁴ Súnti añája lan ní aritagua jageí lánfuna, ligía jaríjin bían wügúriña rára jarúgabu táu anáanguni mirítu. ⁵ Queñti jélemuchun láu jagíbu únabun, buin láu anúfudei, ába jaríñagun wügúriña jagía joun.

—¿Ca uágu jáluajei le wínwanbei jádan jiláaña? ⁶ Úati ya, saráali lídaangiñe óuweni. Jaritagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügúri Garaúwarügüti, ⁷ luágu ledéregérüba lan jájaburugun gafígountiña, ábame jádaraguni luágu gurúwa, ábame lásaarun lídaangiñe óuweni luágu lírúwan wéyu.

⁸ Ábati jarítangun luágu dimúrei le laríñagubei Jesúsu. ⁹ Lárígiñeti jagíríbudun umúajaürügúgiñe, ába jabájúdaguni sun cátei le asúseredubei joun únsu apóstolugu lúma joun jíbiri lánigu Jesúsu. ¹⁰ Ja anúgúbalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri wúrínna. ¹¹ Dan le jaríñagunbalin buri cátei le joun apóstolugu, ába janúgüni quei lílülün áu, mafíñetiña joun.

¹² Ába láfuridun Pédro, ába lídin eíbaagueina luágun umúajaü, dan le laríjinbei lurágeirugun, gamísa rügúñoun ní, úaali úgubu. Ába lídin lúbíñoun láu luweírin anígí láu cátei le laríjubei.

*Luágu úma lun Emaúsun**(Mr 16.12-13)*

¹³ Luágu méme wéyu ligía, jóúdiña bíama jádaangiñe lánigu Jesúsu lídoun ában liraúraü fulásu gíríti Emaús, úrúwa óra eíbuguni Jerusaléngiñe, ¹⁴ adímurejeina jáña luágu sun cátei lé buri asúseredubei. ¹⁵ Súnti adímurejeina jamá, ába layárafadun Jesúsu joun, ába lagúmeserun eíbuga úara jáma. ¹⁶ Láu sun aríja jamáni, siñáti jasúbudiruni luágu Jesúsu lan. ¹⁷ Ábati laríñagun joun.

—¿Cásan le uágubei jadímureja, sun eíbugeina jumá?

¹⁸ Ába jaráramagun láu fruni jagíbuagu, ába lóunabun ában jádaangiñe, gíríti Cleofás, ába laríñagun.

—Sun gürgia subúdi jamúti le asúseredubei Jerusalén lídoun buri wéyu le. ¿Amúrti rügúñein jádaangiñe ja ñíbaña ibídiñejabu lun?

¹⁹ Ábati laríñagun joun.

—¿Cági asúseredubei?

Jaríñaga lun.

—Luáguti Jesúsu le Nazarétna, ában meja proféta láu ubáfu luágu le ladúgübei lúma luágu lerérun ligíbugiñe Búngiu lúma jagíbugiñe sun gürgia. ²⁰ Ábati jedéregeroni jábutigu wafádiriñegu jáma walúrudungu lun siádiwa lan lun ouweni lúma lun ládarawagún luágu gurúwa. ²¹ Rúwamutí yebe wafíñen luágu ligífabá lan eséfurei linásiñun Israél. Úrúwa wéyu guetó luegiñe lasúseredun cátei le. ²² Láu sun líra, weirigüda jamáali jádaangiñe wúríña ja wámabaña wanígi láu jóudin luágun umúajaü lubá buga larúgan, ²³ queítí madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun luágu wíwan lan Jesúsu. ²⁴ Ába jóudin jádaangiñe wíbirigu aríjei umúajaü, ába jadáriruni ítara quei jaríñaguni wúríña jagía, maríjin jamúti Jesúsu.

²⁵ Ábati laríñagun Jesúsu joun.

—¡Louguati gíñe gunfaráanda jumá, lúti gíñe lubá jafíñerun luágu lé meja jaríñagubei profétagu! ²⁶ ¿Ma funági lúnti meja lasúfuriruni Crístu sun cátei le lubáragiñe lerésibiruni luweirigun?

²⁷ Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera túmangiñe buri lilíburun Moisés túmoun sun jalíburun profétagu.

²⁸ Dan le jachúlürün lídoun fulásu le ñíjinbaña lubei, ába ladúgün Jesúsu camá jamuga lasígiraali lefbugun. ²⁹ Ába jéredun luágu lun leréderun jáma, jaríñaga lun.

—Reídeibá wáma, ladúga ladáruduña áni güñemémeeli.

Ábati lebélerun Jesúsu lun leréderun jáma. ³⁰ Dánti le ñurújali jáma luágu dábula, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun. ³¹ Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe. ³² Ábati jaríñagun jámagua.

—¿Ma sandítíwa tásüdüñen wanígi le wagúndan dan le adímurejeina lubei woun luágu úma, aríñagalei tíla Lerérun Búngiu woun?

³³ Ábati magúrabajaanjaña lan, ába jártügüdüñen úma lun jagíribudun ubúrugun Jerusalén le ñí lubei jadáriraña únsu apóstolugu oundaragu jáma gíñe jíbiri lánigu. ³⁴ Ába jaríñagun ja oundaraguñubaña ñi joun.

—Inárüni luágu saráali lan Wabúreme Jesúsu lídaangiñe ouweni lúnya labágaridun, aríja láali Simón.

³⁵ Ábati jabájüdaguni bián wügúriña jagía le asúseredubei joun luágu úma, lúma luágu jasúbudiruni luágu Jesúsu lan dan le lagúbachagúnbarun fein.

Larúfudagun Jesúsu lúngua joun disípulugu

(Mt 28.16-20; Mr 16.14-18; Jn 20.19-23)

³⁶ Nígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jaríttagun luágu pántu lan jaríjubei. ³⁸ Ába laríñagun Jesúsu joun.

—¿Ca uágu tájüchúra janígi? ¿Ca uágu níjein lubei liloúguan afíñeni le tidan janígi? ³⁹ Aríja jumei nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰ Dan laríñaguni líra, ába larúfuduni lújabu lúma lugúdi joun. ⁴¹ Queítí maffíñen mémegiña lan ladúga ugúndani lúma luweírin anígi le jawágubei, ába laríñagun Jesúsu joun.

—¿Níjeinsan eíginí júma ya?

⁴² Ába jíchugun murúsun úduraü súti lun lúma síruudu, ⁴³ ába lanúgüni, ába leígini jagfbugiñe sun jagía. ⁴⁴ Lárigiñe, ába laríñagun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le bürúwañubei nuágu tídan lilfburun Moisés, tídan jalfburun profétagu, lúma tídan líburu to gíriboun Sálmos.

⁴⁵ Ábati gunfaráandagüda lánun Lerérun Búngiu joun, ⁴⁶ ába laríñagun joun.

—Bürúwañu líña luágu lúnti lan loúnwen Crístu, ába lánme lásaarun lídaangiñe ouweni lúnya labágaridun luágu lúruwan wéyu, ⁴⁷ lúnti lan gíñe lapúrichijóun lídan líri joun sun gürígia ubouágu lun jasáansiruni jóuserun lun ferúdunawa lan jafígoun, lagúmeseruña apúrichijani ligía ubúrugugiñe Jerusalén. ⁴⁸ Jugúya geféentün luágu buri cátei le. ⁴⁹ Nouñajabei Sífiri Sándu, le uágubei laríñaga Núguchi Búngiu jun, ítara líña lubéiti, reídei jumá ya ubúругu Jerusalén daríme jerésibiruni ubáfu lúmagiñe Búngiu le siélubei.

Lamúdeirun Jesúsu siélun
(Mr 16.19-20)

⁵⁰ Ábati lanúgüniña Jesúsu bougudin lueí ubúругu chülú Betánia, ába liñúrui lújabu, ába ln ferúdunawa laabíniruniña. ⁵¹ Dánti labíniruniña, ába lamúdeirun jaweí, ába lanügüniwa siélun. ⁵² Lárigiñe jájuduragun lun, ába jagíribudun járigouñ ubúrugun Jerusalén, ¡ma jagúndan! ⁵³ Súnwandánti témpulurugúñanu lan íchiga uweíriguni lun Búngiu.

UGÁNU BUÍTI LE LABÚRÛJABEI JUAN LUÁGU JESÚSU

Liábigüle Búngiu Irájü ubouágun queísi Wügúri Garaúwarügüti

¹ Dan le lagúmeserunbei sun cátei, njeinjali meja Dimúrei (le ámu íri lun Búngiu Irájü), lúmañein Búngiu le Dimúreibe, áni Búngiu méme ligía. ² Lídan lubefti lagúmeserunbei sun cátei, lúmañein Búngiu Úguchili Búngiu Irájü. ³ Lídaangiñe ladúgei Búngiu sun cátei, úati ni cáta adügüti le máma ladúga. ⁴ Ligía íchugubei íbágari lun sun cátei, áni ligía arúgoundagadügübei jáu gürígia. ⁵ Rúti larúgounga queísi lámpu lídan lubúriga, áni lásiñerubei lubúriga lámpu ligía éñegucha.

⁶ Níñein meja ában wügúri loúnajan Búngiu, gíríti Juan, le núbínbei lun líchugun fe luágu Búngiu Irájü le lúnbei liábin ubouágun lun larúgoundagadügüdün jáu gürígia. ⁷ Juan, lúnti líchugun fe luágu, lun gayáraabei lan jafíñerun sun gürígia luágu cátei le lúnbei laríñaguni dánme le liábin. ⁸ Máma Juan le lúnbei larúgoundagadügüdün jáu gürígia, ában wügúri ligía le oúnajoubei lun ladímurejaba lan luágu. ⁹ Búngiu Irájü, le queísigubeirügübei ában lámpu le tímatimaati lun larúgoundagadügüdün jáu sun gürígia, lachúlürüña meja ubouágun lídan dan ligía.

¹⁰ Núbinti ubouágun, áni láu sun lídaangiñe lan ladúgei Búngiu ubou, manúgün jamúti lirájüñü ubou quei Búngiu Irájü. ¹¹ Lageíroun yebe liábin, merésibirun jamúti lílana lageíra. ¹² Láu sun líra, añájein erésibiruti, ába jafíñerun luágu, ába líchugun ubáfu joun lun lirájüñübaña lan Búngiu. ¹³ Mítaraantiñatia quei jasáanigu agúbürigu ja gürígiabaña, ja agúriajouñtia quei furúmierügü gürígia o láu lan lugúndan ában wügúri, lirájüñü Búngiu jagía.

¹⁴ Ligírati meja le Dimúreibe, le méme Búngiu Irájübei, núbinti lun ítara lúba lan quei furúmierügü gürígia, ába laganouñiwa wádan. Aríja wamúti luweírigin, uweírigin le ladúnabei Liraú Búngiu le ábanrügüti, le buínbei láu arefíni lúma inárüni. ¹⁵ Adímurejati Juan luágu, ába laríñagun.

—Niján léñaja uágubei nadímureja jun dan le naríñagunbei luágu le lan ubábei naráanseja úma, weírigitima lan sügú náu, ladúga njeinjali lán meja lubáragiñebei nagúriajouñ.

¹⁶ Sun wagía íbijaadiwa sarágu abíniruni lídaangiñe luweírín lirísín. ¹⁷ Lúmagiñe Moisés lerésibirúa lílúrúduñ Búngiu, ánjeinti ínsiñeni lúma inárüni, lídaangiñe Jesucristu liábin. ¹⁸ Úgali ni ában arjítiti Búngiu, Liraú le ábanrügübei le yaráfabei tun lanígi, ligía arúfudubalin woun ída líña lan Búngiu.

Ladímurejan Juan le abásteragüdjabei luágu lufúleisein Jesucristu

(Mt 3.11-12; Mr 1.7-8; Lc 3.15-17)

¹⁹ Ába jóúnajan jurú ja Jerusalénna fádirigu jáma wügúriña jádaangiñe ladúgawagun Leví állügüdei Juan cáteiñein lan. ²⁰ Ába laríñagun joun furáangu.

—Máma áu Crístu.

²¹ Ábayati jállügüdüni.

—¿Cátabuti? ¿Proféta Elías amúrü?

Laríñaga joun.

—Uá, máma áu.

Ábaya jaríñagun lun.

—¿Amúrü proféta ligíra le lúnbei liábin?

Ába laríñagun joun.

—Máma gíñe áu.

²² Ábati jaríñagun lun.

—¿Cátabuti? Mósutia wanúgüni bouñabagüile joun ja ouñajabaliwa. ¿Cági gayáraabei baríñagun woun buouúgua?

²³ Ába louñabuniña láu méme dimúrei lé meja laríñagubei proféta Isaías.

—Áu ában le agúarajabei lídan fulásu le mageírawati. “Aráanse jumoún janígi lubá liábin Wabúreme queísi ladárarúniwa úma surúti.”

²⁴ Ja núdünbaña adímureja lúma Juan, lánigu jadámurin fariséogu, ²⁵ ábati jaríñagun lun.

—Ánjeinti máma bubeí Crístu, ni Elías, ni proféta ligía, ¿cáti uágu babásteragüdaja?

²⁶ Ába laríñagun joun.

—Áu, láu dúna nabásteragüdaja, níjein ában ibídiñeti jun jagánagua, ²⁷ liábinba nárigiñe, wügúri ligía, madúnatina ni lun jamúga nafáragaduni tagúruga ligeídin.

²⁸ Sun cátei le, lídan fulásu le gírubei Betábara lasúsereda, luágu oubaü le nígiñe lubeí láfuara wéyu libíti dúna Jordán, le ní lubei labásteragüdaja Juan.

Wügúri le louñajabei Búngiu lun louñwen luágu jafígoun gürígia

²⁹ Larúgan, ába laríjin Juan liábin Jesúsu ayárafadeina lun, ába laríñagun joun lánigu.

—Níján le louñajabei Búngiu lun louñwen luágu jafígoun gürígia queísi meja lafarúniwa mudún lídan dan ligira luágu jafígoun gürígia. ³⁰ Luáguñaja nadímureja dan le naríñagunbei. “Liábinba ában wügúri nárigiñe le weíríguti sügú náu, ladúga níjeinjali lán meja lubáragiñe nagúriajoun.” ³¹ Ni áu, ibídiñetí meja wügúri ligía nun, abásteragüdajadina láu dúna lun jasúbudiruni Israelítagu.

³² Aríñagati gíñe Juan.

—Aríja numúti Sífiri Sándu camá ában únjun, larárirun siélugiñe, ába laráramagun lábulugu. ³³ Ibídiñetí yebe nun cátei lan wügúri ligía, aríñagarúgaali meja le ouñajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lábulugu ítaga wügúri, ligía wügúri ligía le abásteragüdajabei láu Sífiri Sándu.” ³⁴ Aríja náaliti, geféen áu luágu ligía lan Liraúbei Búngiu.

Furúmiñetiña láni Jesúsu disípulugu

³⁵ Larúgan, níñeinya Juan jáma biáma jádaangiñe lánigu. ³⁶ Dan le laríjinbei Juan lásügürün Jesúsu, ába laríñagun.

—Níján wügúri le lanúadirubei Búngiu lun lagídaruni jafígoun gürígia.

³⁷ Ába jagáambuni biáma lánigu Juan laríñagun ítara, ába jafálaruni Jesúsu. ³⁸ Ábati ladígiragun Jesúsu lárigoún, quei laríjin jafálaruni, ába laríñagun joun.

—¿Ca jabúseerubei núma?

Ába jaríñagun lun.

—Maésturu, ¿jalía bagánawa?

³⁹ Ába laríñagun Jesúsu joun.

—Jigoúgu jaríjei.

Ába jóúdin, ába jaríjini jalía lan lagánawa, ába jásügürüni líbiri wéyu ligía lúma, ladúga queíburijali lan gádürü rábounwéyu óra ligía.

⁴⁰ Andrés, le lamúlen Simón Pédro, ligía ában jádaangiñe biáma ja agáambubalin le laríñagubei Juan ába jafálaruni Jesúsu. ⁴¹ Lubáragiñe ámu cátei, ába lídin Andrés álugei Simón Pédro le líbugaña, ába laríñagun lun.

—Darí wamaali Mesías, le Crístu, le lanúadirubei Búngiu lun lasálbaruniña gürígia lídaangiñe jafígoun.

⁴² Ába lanúgüni Andrés Simón le níjin lubeí Jesúsu, ába lariaguni Jesúsu Simón ligíbuagun, ába laríñagun lun.

—Simón, amúrü le liraú Jonás, guetó Céfasha bíri, míni lan íri le. Pédro, o dúbü.

Lanúadiruniña Jesúsu Felípe lúma Natanaél lun lánime disípulugu

⁴³ Larúgan, ába larítagun Jesúsu lídin louñawagun Galiléa, ába ladúnragun lúma Felípe, ába laríñagun lun.

—Falábana.

⁴⁴Felípe ligía, Betsáidana le ñí lubei gíñe lagánawa Andrés láu sun Pédro. ⁴⁵Ábati lídin Felípe áluajei Natanaél, ába laríñagun lun.

—Aríja wamáali wügúri le uágubei labúrúja Moisés tídan líburu to lánina lilúrudun Búngiu, le gíñe uágubei jabúrúja profétagu—Jesúsu le liraú José le Nazarétna.

⁴⁶Ába laríñagun Natanaél.

—¿Níjein funági Nazarétna buítí?

Ába laríñagun Felípe lun.

—Jigábu baríja.

⁴⁷Dan le laríjin Jesúsu layárafadun Natanaél, ába laríñagun.

—Nítén ában ladúgawagun Israél le tímatimaati, úati yéguau lídan.

⁴⁸Ába laríñagun Natanaél lun.

—¿Ída liñági basúbudirunina?

Ába laríñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

⁴⁹Ábati laríñagun Natanaél lun.

—Maésturu, amúrú Liraúbei Búngiu, amúrú jarúeitebei Israelftagu.

⁵⁰Ába laríñagun Jesúsu lun.

—¿Baññerunbei nun ladúgarügü naríñagun bun luágu aríja nánibu tábugiñe tídibu ígo? Baríjubati cátei weínamutimáati lueí le.

⁵¹Aríñagati gíñe Jesúsu.

—Nínarün jáu, luágu jaríjubei lan siélu junréñu, añájame lání Búngiu ánjeligu aweíñja lúma arárija noúgiñe, áu le Wügúri Garaúwarügüti.

2

Ában maríei lídan fulásu le gíribei Caná, le lídaanbei Galiléa

¹Úrúwa wéyu lárigiñe, ñíñein ában maríei lídan ában fulásu gíríti Caná, le lídaanbei Galiléa. Ñíñounti lúguchu Jesúsu, ²amísurajóuati gíñeti Jesúsu jáu sun lání disípulugu lídoun maríei ligía. ³Ába tagúmuchun diweín, ába taríñagun lúguchu Jesúsu lun.

—Gumújatia diweín.

⁴Ába laríñagun Jesúsu tun.

—¿Cági uágu baríñagei le nun, nóguchu? Machúlügili dan lun nídejan lídan cátei le.

⁵Ába taríñagun joun ja éjeeragubaña.

—Adúga jumeí sun le laríñagunbei jun.

⁶Ñíñoun sísi dináa láutu dúbü tíbe to jayúsuruboun juríu lun jachíbagun jóungua según jagáburí. Ságü ában dináa tugúya, barútu wein o darándi gálun dúna. ⁷Ába laríñagun Jesúsu joun éjeeragutiña.

—Buíngüda jumoún sun dináa to láu dúna.

Ába jabuínchagiüdünun buídu buídu. ⁸Ábati laríñagun Jesúsu joun.

—Dabú jumati murúsun tídaangiñe, ábame janúgüni lun le aríjubei láu fédu.

Ába jadúgüni ítara. ⁹Ábati louchuni le aríjubei láu fédu dúna ligía salígua lun diweínme, ibídiñoun lun jalágiñeti lan, ja rügúñanu éjeeragubaña asúbudirei, ladúga jagía lan adáburubalin dúna. Ábati lagúarun le aríjubei láu fédu lun le amárieidubei, ¹⁰ába laríñagun lun.

—Sun gürígia seríwi jamútu tubuídun-ágei diweín furúmiñe, dánti le guráaña amísura-jóutiña gíbe, ligía jéjeeragun diweín to furúmieguarügü, ánjeinti amúrú, ába bareídunun tubuídun-ágei diweín darí guetó baságaroun.

¹¹Cátei le, le ladúgübei Jesúsu lídan fulásu le gíribei Caná le lídaanbei Galiléa, ligía furúmíñetibeí miláguru le áubei larúfudei luweírigun, ába jaññerun lání disípulugu luágu.

¹² Lárigiñe cátei le, ába lídin lídoun fulásu le gíribei Capernaúm, úara túma lúguchu, lamúlenu, jáma láni disípulugu, ába jeréderun átiri wéyu ñi.

Labúgaguniña Jesúsu alúgurajatiña témpulurugugiñe
(Mt 21.12-13; Mr 11.15-18; Lc 19.45-46)

¹³ Ábati lídin Jesúsu ubúругu Jerusalén ladúga yaráfaali lan jafédun juríu le lánina páscua. ¹⁴ Ñi ladárriraña ja alúgurajabaña bágasu, mudún, únjun, jáma buri ja ñúnbaña lídan jabára le ñí lubei jasáansija seínsu joun güirgía. Lídan tübürrü témpulu ladárriraña sun güirgía ja. ¹⁵ Dan le laríjinbalin Jesúsu cátei le, ába ladúgün ában labejagüle láu gúrudu, ába labúgaguniña sun jagía lídaangiñe tübürrü témpulu jáu sun jalúgüniña mudún jáma bágasu. Chagálei jaseínsun ja asáansijabaña seínsu, garábaguealeí jadábulan. ¹⁶ Ába laríñagun joun ja alúgurajabaña únjun.

—¡Sagájumei sun cátei le yágiñe! ¡Manúga jumoún lúban Núguchi lun jalúguraagüleme!

¹⁷ Ábati jarítangun láni disípulugu luágu laríñawagún tídan líburu to Lerérun Búngiu. “Jángitina táu búban táu sun nanígi.”

¹⁸ Ábati jaríñagun juríu lun.

—¿Ca miláguuru barúfudubei woun lun wasúbudiruni ánjein garícha bubei lun badúgüni cátei le?

¹⁹ Ába laríñagun Jesúsu joun.

—Güríngua jumoún témpulu to, naráramagüdayaboun lídan úrüwa wéyu.

²⁰ Ába jaríñagun juríu lun.

—Bián-wein-sísi irúmu janúgün adúgoun témpulu to, ¿lun biyáraaboun lan aráram-agüda lídan úrüwa wéyu?

²¹ Lúgubu guánarü Jesúsu témpulu to uáguboun ladímureja joun. ²² Ligía dan lubei le lásaarun lídaangiñe ouweni, ába jarítangun luágu dimúrei lé meja laríñagubei, ába jafíñerun luágu sun le tídaanbei líburu to Lerérun Búngiu lúma luágu dimúrei buri lé meja laríñagubei joun.

Subúsi le tídaanbei janígi güirgía lun Jesúsu

²³ Dan le Jerusalén lubei Jesúsu lídan fédu le lánina páscua, sarágu jáña afíñerutiña luágu dan jaríjinbaalin miláguru buri le ladáagubei lun larúfuduni luágu ligía lan Crístubei.

²⁴ Ánjeinti Jesúsu, míchaagunti lúngua jájaburugun ladúga subúdi láníña cátañañanu lan.

²⁵ Mabúseerunti laríñawagúniwa lun ída jáña lan güirgía, ligía lúngua subúdi lumúti cátei lan tídaanbei janígi.

3

Jesúsu lúma Nicodémo

¹ Ñíñein ában wügüri lánina jadámurin fariséogu, ába jádaangiñe jábutigu juríu, gíriti Nicodémo. ² Ába lídin Nicodémo ayánuja lúma Jesúsu güñoun, ába laríñagun lun.

—Maésturu, subúdi wamúti luágu Búngiu lan ouñajabalibu arúfudaja woun, ladúga úati ni ában lun gayára lan larúfuduni lubáfu láu miláguru quei badúgüni ánjein úa lubei Búngiu lúma.

³ Ába laríñagun Jesúsu lun.

—Ninárün báu luágu le lan magúriajóunwayati, siñáti lebéllun lídoun larúeijan Búngiu.

⁴ Ába laríñagun Nicodémo lun.

—¿Ída lubági lagúriajóunwaya ában wügüri weírriyaali? ¿Gayáraati funági lebéllurunya turágeirugun lúguchu lúnya tagúriajani?

⁵ Ába laríñagun Jesúsu lun.

—Ninárün báu luágu le lan magúriajóunti lídaangiñe dúna lánina abásteruni, lúma lídaangiñe Sífiri Sándu, siñáti lebélorun lídoun larúeijan Búngiu. ⁶ Le agúriajóubei jádaangiñe agúbürigu ja gürígiabaña, ítara líña ligáburi queísi jagáburi gürígia, le agúriajóubei lídaangiñe Sífiri Sándu, ítara líña ligáburi queísi ligáburi Sífiri Sándu. ⁷ Maweíridalá banígi luágu naríñagun bun luágu lúnti lánya jagúriajóuniwa sun gürígia. ⁸ Ítara quei láfurun garábali le nígiñe lumúti labúseera, agáambabei lamúri, ibídiñeti bun jaláigiñe lan liábun ni jalíñoun lan lídin, ítara jáña gíñe sun ja agúriajóubaña lídaangiñe Sífiri Sándu.

⁹ Ábayati lariñagun Nicodémo lun.

—¿Ída lubásan cátei le?

¹⁰ Ába lariñagun Jesúsu lun.

—Ába oúnwibun maésturu Israélna amúrti, ¿ibídiñeti cátei le bun? ¹¹ Ninárün báu luágu le lan wasúbudirubei, ligía lan wadímurejabei, geféen wagía luágu le aríja wamaálabei, jugúya fariséogu, mafiñetün luágu le waríñagubei jun. ¹² Ánjein mafiñen jubei nun dan le nadímurejan jun luágu buri cátei le lánina ubóu, ¿ída lubági jafiñera luágu le lánina siélu?

¹³ Úagili ni ában amúdeiruti siélu, lárigiñe ába larárirun nígiñe lun gayára lan geféen lan luágu nueídügüya, áu le Wügúri Garaúwarügüti, le gábanbei siélu. ¹⁴ Ítara quei meja liñúrurun Moisés tiyáwa jéwe luágu wéwe lídan fulásu mageírawati lun jasálbaruba lan sun ja aríjitiña tuágun, ítara liñá giñe niñurúaba lan luágu gurúwa ¹⁵ lun sun lan le afñeruti nuágu, mídin lámuga máfiougati, siélu lámuga lídin abágarida ában ibágari le magúmuchaditi.

Lísiñejabu Búngiu joun gürígia

¹⁶ Weíríti jínsiñe gürígia ja ubóuagubaña lun Búngiu darí lun loúnajanina, áu le Liraú le ábanrügüti, lun núnwun luágu jafígoun, lun sun lan ja afñerutiña nuágu, mídin jamámuga máfiougati, siélu lámuga jóudin, abágarida ában ibágari le magúmuchaditi.

¹⁷ Moúnajan lumútina Búngiu áu le Liraú ubóuagun lun níchugun jadúnrun gürígia, loúnajanina lun jasálbarun ja ubóuagubaña nuágu.

¹⁸ Le afñeti nuágu, áu le Liraú Búngiu, barú lumuti Búngiu queísi madúnrunti, ánjein le mafiñeti, gadúnrunjali ligíbugiñe Búngiu ladúga mafiñen lan nuágu, áu le Liraú Búngiu le ábanrügüti. ¹⁹ Ja mafiñebaña, gadúnrunjaña ligíbugiñe Búngiu ladúga dán buga le niábinbei ubóuagun lun narúougagüdün láu, gúndaatimaatiña lílana ubóu láu lubúriga sügú láu larúgouna, ladúga cátei lan wuríbati jadáagubei. ²⁰ Sun ja adúgübaña cátei wuríbati, iyéereguti larúgouna joun, ába jadisedun lueí larúgouna ligía, lueí lasúbudirúniwa cátei wuríbati le jadúgübei. ²¹ Ja adúgübalin lugúndan Búngiu, jínsiñeti joun lun lídan jamá larúgouna lun larijñiwa luágu jarúma lan le jadúgübei, láu lubáfu Búngiu.

Ladímurejaanya Juan luágu Jesúsu

²² Lárigiñe sun cátei le, ába lídin Jesúsu jáu lání disípulugu Judéoun, ába leréderun átiri dan ñi, abásteragúdaja. ²³ Níñein gíñe Juan abásteragúdaja lídan fulásu le gríbeí Enón, yaráfa lun Sálím, ladúga ñíñein lan sarágu dúna, ába buríti jayábingua gürígia, ába jabásterun. ²⁴ Lubáragiñe ladaúrún Juan lasúsereda sun cátei le.

²⁵ Ábati jagúmeserun jádaangiñe lánigu Juan asígeneja jáma juríu luágu igáburi le lánina arúmaduni. ²⁶ Ábati jóudin aríñaga lun Juan.

—Aríjabásan maésturu, wügúri lé buga búmabei luágu óubaü le nígiñe lubeí láfurida wéyu libítí dúna Jordán, le ligra lé meja uágubei badímureja woun, guetó labásteragúdaja gürígia áni jafálaruñeti sun gürígia.

²⁷ Ába lariñagun Juan joun.

—Siñáti níjein lan ni cáta lúma ni ában gürígia ánjein máma lubeí líchugun Búngiu lun. ²⁸ Agáamba jumúti lubeígia naríñagun jun furáangu luágu máma lan áu Crístubei,

luágu áu lan ában le óunajóubei lubá. ²⁹Lídan ában maríei, adári ligía táubei ladári. Léti lumáda adári, le ñíbei agáambe, óunwenbun lugúndan láu lagáambuni ladímurejan. Ítara ñíña gíñeti, óunwenbun nugúndan luágu Jesúsu, ³⁰ligía lúnti laweírigudúntima, áu lun núnbudúntima.

Le ñúbinbei siéluḡiñe

³¹Jesúsu, le ñúbinbei siéluḡiñe, jóúḡiñeñein sun gürígia. Áu, múaruguna áu, áni lérügüñein lánina uboú gunfaráanda nan. Ánjein le ñúbinbei siéluḡiñe, jóúḡiñeñein sun gürígia, ³²luágu gíñe le aríja lálalíbei lúma le agáamba lálalíbei ladímureja, mibetiña affíñerutiña luágu le laríñagubei. ³³Ánjeinti le affíñeruti, lachóururubei luágu inárüni lan le laríñagubei Búngiu, láu laffíñerun. ³⁴Le loúnajabei Búngiu, lerérün Búngiu ladímurejabei, ladúga mébejati líchuguni Búngiu láni Espírítu lun. ³⁵Jínsiñeti Liraú Búngiu lun, rúlaali gíñe sun cátei lújaburugun. ³⁶Le affíñebei luágu Liraú Búngiu, gabágariti le magúmuchaditi, ánjeinti le májabei laffíñerun luágu Liraú Búngiu, mabágaríbei líbe íbágarí ligía áni meblérunbei siélun, láburujarügüba ligáñi Búngiu luágu.

4

Jesúsu túma wúri to Samariána

¹Aba jagáambun fariséogu luágu gíbetima jamá lánigu Jesúsu sügú jáu lánigu Juan, áni gíbetima gürígia ñúbintiña lun, lun jabásterun, ²láu sun máma lan Jesúsu abásteragüdajabaliña, lánigu abásteragüdajabaña. ³Dan le lasúbudirunbalin Jesúsu cátei le, ába láfuridun Judéagiñe lun lagíribudun Galiléoun.

⁴Lídan weíyaasu ligía lásügürübati loúbawagugiñe Samaría. ⁵Ítara liñáti lachúlürün lídoun ában fulásu lídan Samaría gíriti Sícar, yaráfa lun múa lé meja lígirubei Jacób lun José le liraú, le ában jádaangiñe binádu wagúbürigu. ⁶Ñíñein wélu le únbei jagúara luwélun Jacób, quefíti buchá lan luágu Jesúsu eíbuga, ába lañúurun láru wélu ligía. Quefí buri amídirugu óra ligía. ⁷Tiábijati ában wúri Samariána adábura dúna lídaangiñe wélu le, ába laríñagun Jesúsu tun.

—Rúba dúna nun.

⁸Anángüratí buga láni disípulugu agáñija eígini ubúrugu. ⁹Ábati taríñagun wúri Samariána to lun Jesúsu.

—¿Ída liñáti bamúriajanbei dúna núma, lárigiñe juríu ban, nugúya Samariána?

(Mínsiñeguatíñati juríu jóungua jáma Samariána.) ¹⁰Aba laríñagun Jesúsu tun.

—Lun jamúga subúdi báni edéweejani le líchugubei Búngiu, subúdíbei jamúga cátei lan le amúriajabei dúna búma, bamúriajaña jamúga núma, ába jamúga níchugun ában luwúyeri dúna le gayáraati líchugun íbágarí bun, bun.

¹¹Ába taríñagun lun.

—Úagubeítí cába lan áu badábura dúna áni julílití wélu le, ¿ída lubáti bíchuguni luwúyeri dúna ligía nun? ¹²Jacób, lé meja binádu wadúgawagun, ígirubalin wélu le woun, gurátí meja dúna lídaangiñe jáu sun lirájüñü jáma lilúgüniña. ¿Weírigutíbu funági sügú láu Jacób?

¹³Ába laríñagun Jesúsu tun.

—Sun ja átubaña lídaangiñe dúna le, jamágürabudayaba, ¹⁴ánjein le átuti lídaangiñe dúna le níchugubei, mamágürabudundügüyaali, ladúga dúna le lúnbei níchuguni lun, géseséenbei lídan lun líchugun íbágarí magúmuchaditi lun.

¹⁵Ábati taríñagun lun.

—Rúbei dúna ligía nun, masándirundügüyaadina lámuga mágürabu, miábin nugúyame ya wélurugu adábura dúna.

¹⁶Ába laríñagun Jesúsu tun.

—Beísa óugei búmari le úmabei bamárieida, ábame bíabin.

¹⁷ Ába tariñagun lun.

—Mámaritina le marfeitina lúma.

Ábati lariñagun Jesúsu tun.

—Binárün láu bariñagun luágu mámari ban le marfeiti búma, ¹⁸ ladúga seíngüijáña wügüríña úmatiña bagánawa, áni mamárieiduntibu lúma wügürí le úmabei bagánawa guetó. Aríñagaadibu inárüni.

¹⁹ Dan tagáambubalin wúri to cátei le, ába tariñagun lun.

—Afíñetina luágu proféta ban. ²⁰ Binádu wagúbürigu ja Samariána, judúguatiña meja lun Búngiu ya luágu wúbü lígita, ánjein jugúya juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

²¹ Ába lariñagun Jesúsu tun.

—Afíñebá nun luágu nitebei lan dan lun jájuduragun lun Búngiu mídinga jugúya luágun wúbü lígita, ni jídin Jerusalén. ²² Jugúya Samariána, ibídiñeti jun ca lan un jájuduragua, ánjein wagía, subúdi wamúti ca lan un wájuduragua ladúga lídaangiñe warásan wagía juríu liábin asálbaruni. ²³ Lachúlürüba óra, áni niján óra ligía, lun mebéresenwa lan jalía lan jájuduragua güriña lun Búngiu. Le lúnbei lebéreserunwa láu, ída líña lan ligáburi jájuduragun lun. Lúnti jadúgüni táu sun janígi lídan ában luwúyeri le áuti lagúndaara Búngiu, según lerérün. Niján luwúyeri ájuduraguni le láluajabei Búngiu jámagiñe güriña.

²⁴ Espíritu Búngiu, ja ájuduragubaña lun, lúnti jadúgüni láu sun janárün, mebéresenga láu cátei le arijúati.

²⁵ Ába tariñagun lun.

—Subúditi nun luágu liábinba lan Mesías le giríbei Crístu, dánmeti liábin, lafúnraan-guagüdübei sun cátei woun.

²⁶ Ába lariñagun Jesúsu tun.

—Áu Mesías ligía.

²⁷ Ligíati jachúlürün láni disípulugu, ába laweíridun janígi láu jadáriruni Jesúsu admureja túma ában wúri, úati ni ában ganígiti lun lálügüdajan ca lan tabúseerubei o ca lan uágu layánuja túma. ²⁸ Ábati tígirunun wúri tugúya tidína, ába tidín ubúruugu oúgaña güriña, ába tariñagun joun.

²⁹ —Jigoúgu jaríja ában eyéri aríñaguti sun cátei le adúga náalíbei nun. ¿Mámadügü funásan ligía Crístubei?

³⁰ Ábati jódingua ubúrugugiñe lun le ñíjin lubei Jesúsu. ³¹ Añájati buga disípulugu ayúmuragua lun Jesúsu lun leígin. ³² Laríñaga joun.

—Níjein cátei lun neígini le ibídiñeti jun.

³³ Ábati jagúmeserun disípulugu álügüdagua jámagua, ába jaríñagun.

—¿Máfuna barújaña eígini lun?

³⁴ Ába lariñagun Jesúsu joun.

—Nadúgüni lugúndan le ouñajabalina, agúmucheí luwádígimari, ligía neíginbei.

³⁵ Jugúya aríñagatün. “Níjeingua gádürü játi lubá alúbajani.” Ánjein áu, nariñajare jun. Aríja jumeí nádü, dánjali lun lalúbajoún. ³⁶ Le ñadágimeinbei alúbaja, ibíja lumúti lafáyeruaja, áni cáteiti le lalúbajabei, güriña, lun jabíjini íbágari le magúmuchaditi siélu, lun lagúndaarun le ábunagubei úara lúma le alúbajabei. ³⁷ Quei le lubeíbei lariñawagún. “Ámu le ábunagubei, ámu le alúbajabei.” ³⁸ Oúnaja náadiñ alúbaja le ñí lubei mábunagun jumá, ámu ábunagubaña, jugúya alúbaja.

³⁹ Sarágu jáña lílana fulásu ligía le láni Samaría afíñerutiña luágu Jesúsu láu tariñagun wúri tugúya joun luágu aríñaga láni sun le adúga táalíbei tun. ⁴⁰ Dánti le jachúlürünbei Samariána le ñí lubei Jesúsu, ába jayúmuragun lun lun leréderun jáma. Ába leréderun bián wéyu ñi, ⁴¹ ábaya jafíñerun sarágu güriña dan le jagáambubalin le lariñagubei. ⁴² Ábati jaríñagun tun wúri tugúya.

—Mámarügaali luágu le baríñagubei woun waffínera, ladúga agáamba wamáali gíñe lúmagíñe, áni subúdi wamúti luágu ligía lan Crístubei le lasálbaja ubóu.

Lareidaguagüdüni Jesúsu liraú ában ñadágimeinti lúma urúei

⁴³ Bián wéyu lárigiñe, ába láfuridun Jesúsu Samáriagiñe, ába lasígiruni luweíyasun loúbawagun Galiléa, ⁴⁴ mídinti lageíra quei laríñaguni Jesúsu guánarü luágu madügüniwa lan gásu láu ában proféta lídan guánarü lageíra. ⁴⁵ Dan lachúlürünbei Galiléa, resíbi jamúti lílana fulásu buídu, ladúga ñúdüñ jamá gíñe lídan fédu le lánina páscua Jerusalén áni aríja jamúti sun le ladúgübei lídan fédu ligía.

⁴⁶ Ábayati lagríbudun Jesúsu lídoun fulásu le Caná le lídaanbei Galiléa, le ñí lubei lasáliraguagüda dúna lun diweínme. Ñíñeinti ában wügúri weírigruti, ñadágimeinti lúma urúei, níjein ában liraú sánditi lídan fulásu le gíribei Capernaúm. ⁴⁷ Dan lagáambunbei wügúri ligía luágu ñúbinjali lan Jesúsu Judéagiñe lun Galiléoun, ába lídin aríjei, ába layúmragun lun lun lídin lúbiñe lun lareidaguagüdüni liraú, ladúga madíseeli lan lun loúnwen. ⁴⁸ Ába laríñagun Jesúsu lun.

—Jugúya, ánjaün maríjin miláguru, maffíñetün.

⁴⁹ Laríñaga wügúri ligía lun.

—Queímoun furése lubáragiñe loúnwen niraú.

⁵⁰ Ábati laríñagun Jesúsu lun.

—Giríbubá búbiñoun, areidagua biraú.

Ába lafíñerun wügúri ligía luágu le laríñagubei Jesúsu lun, ába lídin. ⁵¹ Dan layárafadun tun lúban, ába jayábin lumúsuniña lubároun, ába jaríñagun lun.

—Magádieeli biraú.

⁵² Ába lálügüdüniña ca lan óra lagúmesera liraú areidagua, ába jaríñagun lun.

—Gúñaarü ladaúnrún ában rábounwéyu lagídara abírúauí lueí.

⁵³ Ába larítaguni luágu ligía lan óra laríñagun Jesúsu lun luágu areidaguuali lan liraú, ába lafíñerun luágu Jesúsu jáu sun lufámilian.

⁵⁴ Ligía libíaman miláguru le ladúgübei Jesúsu dan le lagríbudunbei Judéagiñe lun Galiléoun.

5

Lareidaguagüdüni Jesúsu wügúri adádagaraali le Betésdana

¹ Lárigiñe cátei le, jadúgüña juríu ában fédu, ába lagríbudun Jesúsu Jerusaléoun luágu fédu ligía. ² Ñi Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri. ³ Sarágu jáña sánditiña roun ñi múarugu, ñíñanu maríjintiña, meíbuguntiña, jáma derégüdaña, jagúrabajañein lánjingichagun dúna. ⁴ Ladúga níjeinja dan, liábin ában ánjeli siélugiñe, ába lánjingichaguni dúna ligía, léti furúmiñeti sánditi le adáburuti lídoun dúna ligía lárigi lánjingichagun, ába lareidagun furúmeuarügü sándi le luágubei. ⁵ Ñíñeinti ában wügúri, darándi-wídü irúmu láu láu sándi, ⁶ dan laríñbalin Jesúsu wügúri ligía roun, subúdíleí átiri lan dan láu ítara, ába laríñagun lun.

—¿Buséntibu bareidagun?

⁷ Ába loúnabun le sándiabei.

—Úati cába lan anúgana lídoun dúna dan le lánjingichagun. Ságu nálugun nadáburun, dabújali ámu nubáragiñe.

⁸ Ába laríñagun Jesúsu lun.

—Sarába, budáboun bubárari, beíba.

⁹ Lídan óra ligía, ába lareidagun, ába labúdunun lubárari, ába lagúmeserun eíbuga. Queéti lidáani lubeí eméraguni wéyu ligía, ¹⁰ ába jaríñagun juríu lun le areidagubei.

—Wéyu le eméraaguagülei ugúñe, moún lumuti banúgünun bubárari buoúgua.

¹³ Ába laríñagun joun.

—Le areídaguagüdübalina aríñagubei nun. “Budáboun bubárari, beíba.”

¹² Ába jaríñagun lun.

—¿Cáteigi le aríñagubei bun. “Budáboun bubárari, beíba”?

¹³ Ibídiñetiti lun ca lan areídaguagüdübalin, ladúga gíbetiña güriúa ñi áni ñúdünja bugáti Jesúsu. ¹⁴ Lárigiñe, ába ladúnragun Jesúsu lúma, témpulurugu, ába laríñagun lun.

—Guetó, quei areídaguagülei lubeí, mafígounjadügüiyabá lueí ladágarun ámu cátei janárimetimaati buágu.

¹⁵ Ábati lídin, ába lawísaruniña juríu luágu Jesúsu lan areídaguagüdübalin. ¹⁶ Ligía lébubei jeíbaajani juríu Jesúsu lun jáfaruni jilágubei ladúga buri ladáaguni cátei líbe le lídan wéyu le eméraaguagülei. ¹⁷ Ába laríñagun Jesúsu joun.

—Ñadágimeinti Núguchi chülú lúmoun dan le, áu ñadágimeintina gíñe.

¹⁸ Ligítimaati jabúseerunbei juríu jáfaruni jilágubei, mámarügü ladúga lájalachaguni lúruu le lánina wéyu le eméraaguagülei, ladúga gíñe líchaagun lúngua quei Búngiu láu laríñagun luágu Lúguchi lan.

Lugúmadin Liraú Búngiu

¹⁹ Ábati laríñagun Jesúsu joun.

—Ninárün jáu, luágu siñá lan nadúgün, áu le Liraú Búngiu, ni cáta láu náni nungua, le rügúñein naríjubei ladúgün Núguchi, nadúga. Sun le ladúgübei Búngiu Úguchili, adúga numúti gíñe, áu le Búngiu Irájü, ²⁰ ladúga jínsiñetina lun Búngiu, arúfuda lumúti sun le ladúgübei nun, áni larúfuduba cátei weínamutimaati nun, le lúnti laweíridun janígi láu. ²¹ Ítara quei lásaaragüdüniña Búngiu Úguchili jiláña lídaangiñe ouweni ába líchugun ibágari joun, ítara líña gíñe níchugun, áu le Búngiu Irájü, ibágari joun ja nabúseerun. ²² Magúseragüdünti Búngiu ni ában, rúrügü lumúti sun ubáfu nun, áu le Liraú, lun nadúgüni, ²³ lun sun lan güriúa íchigei ában méme inébesi le jíchugubei lun Búngiu Úguchili nun. Le míchuti inébesi nun, áu le Búngiu Irájü, míchuti gíñe inébesi lun Búngiu Úguchili le oúnajabalina.

²⁴ ‘Ninárün jáu, luágu le lan eténiruti lun le naríñagubei lun, afíñe ligía luágu le oúnajabalina, gabágariti le magúmuchaditi, masádirúnwabei gíñe, sügújali lídaangiñe féridi lídoun ibágari le magúmuchaditi. ²⁵ Ninárün jáu luágu nítebei lan dan, áni niján dan ligía, dánme le jagáambuni jiláña numálali, ja ñúdünbaña láu le nubéíbei, gabágaribaña. ²⁶ Ladúga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu Irájü, lun níchugun ibágari, ²⁷ rújali gíñe ubáfu nun lun nagúseragüdüniña güriúa ladúga Wügüri Garaúwarügüti áu. ²⁸ Maweíridalá janígi luágu le, ladúga lachúlürüba dan lun jagáambuni sun jiláguaña numálali, ²⁹ ábame jáfuridunga lídaangiñe jamúaja. Já meja arúfudubalin luágu nánigu jamá láu jadúgüni buíti uboúagu, jásaaruba lun jaganoún lúma Búngiu lun sun dan, ánjañati ja arúfudubalin luágu lánigu jamá Máfia láu jadúgüni wuríbani, jásaaruba lun jasádirúniwa lun máfiougati lun sun dan.

Larúfuduni Jesúsu lagúmadijan

³⁰ ‘Siñáti nadúgün ni cáta láu náni nungua. Quei laríñawagüniwa nun, ítara líña nagúseragüdün, áni buíti ligáburu nagúseragüdün ladúga móuchun nan lun nadúgüni le nabúseerubei, lueídügiya le labúseerubei Núguchi le oúnajabalina. ³¹ Ánjein ába lubeí geféen nuoúgua, mouñti le naríñagubei. ³² Níjein ámu le geféenbei luágu náni fuleísei, áni subúditi nun luágu le lan laríñagubei nuágu, gebégiti. ³³ Jugúya oúnajatün álügüdei Juan nuágu, áni le loúnabagülebei jun, inárüni. ³⁴ Áu magúrabuntina ladímurejan ni ában wügüri luágu nufúleisein, narítaguagüda rügúñaadün luágu le laríñagubei Juan nuágu

lun gayáraabei lan jaffínerun nuágu lun jasálbaruba lan. ³⁵ Ítara liñá meja Juan quei ában lámpu le durúnguati, ru ligía larúgounga, áni jugúya aráanseñu jíña méjati lun jerésibiruni larúgounga ligía luágu murúsun dan. ³⁶ Níjein ában cátei luágu nufúleisein buítimaati sügú láu le laríñagubei Juan. Lé buri cátei le nadúgübei, le méme buri uágubei lariñaga Nóguchi nun lun nadúgüni, arúfuda lumúti luágu Nóguchi lan óunajabalina le tímatimaati. ³⁷ Nóguchi le óunajabalina, arúfuda láali luágu áu lan Liraú le óunajóubei lun nasálbaruniña güriía ubouágu, láu sun magáambun jumágili lan lumálali Búngiu, maríjin jumeí. ³⁸ Mebélugili lerérun jídoun, ladúga maffñetün nuágu, áu le loúnajabei. ³⁹ Atúriaja jumútu Lerérun Búngiu láu sarágu goúnigi, ladúga agúraba jumá jadáriruni ibágarí le magúmchaditi tídan, láu sun líra, líburu tugúya adímurejaboun nuágu, ⁴⁰ áni májatün jíabin númoun lun jibíjini ibágarí ligía.

⁴¹ ‘Máluajantina lun janúgünina güriía weírigu. ⁴² Gáma lúmoun, subúdi numútün, áni subúdi numúti luágu mísiñen lan Búngiu jun. ⁴³ Áu, lueígiñe loúbadina Nóguchi niábin, áni jugúya, merésibirun jumútina, ánjein nñúbin ámu láu láni lúngua, ligiaba jerésibira. ⁴⁴ ¿Ída lubásan jaffínerun nuágu, resíbitünga uweíriguni júmagiñegua, máluajan jumúti uweíriguni le lúmagiñeti Búngiu le ábanrügüti? ⁴⁵ Marítaqua jumátia luágu níchuguba lan jídúnrun ligíbugiñe Nóguchi, Moisés guánarügüba íchiga jídúnrun, le guánarügü uágubei jíchigei jeménigin. ⁴⁶ Ladúga, lun jamúga afñe jumá luágu le lariñagubei Moisés, jaffíneruña jamúga gíñe nun, ladúga abúrjati Moisés nibúgürü. ⁴⁷ Ánjein maffínen jubéi luágu le labúrrijabei, ¿ída lubáti jaffínerun luágu le nariñagubei jun?

6

Leígaqüdün Jesúsu seíngü mílu wügüríña
(Mt 14.13-21; Mr 6.30-44; Lc 9.10-17)

¹ Láriigiñe, ába lídin Jesúsu loubáfurugun dúna le Galiléa, le méme gíñe dúna le gírubei Tibérias. ² Sarágu jáña güriía afálarei ladúga jaríjini buri miláguru le ladáagubei, láu lareídaguagüdüníña sánditiña. ³ Ábati laweínrun Jesúsu luágún ában wúbü, ába lañúurun ní jáma láni disípulugu. ⁴ Yaráfaaliti páscoa, le jafédun jurí. ⁵ Dan lariñbei Jesúsu luágu sarágu jáña lan güriía afálaruti, ába lariñagun lun Felípe.

—¿Jalábasan wagáñija eígini joun sun güriía ja?

⁶ Lariñagunbalin líra lúnrügi lagáambun cába lan lariñaga Felípe, Jesúsu, subúdi láali cába lan ladúga. ⁷ Ábati lariñagun Felípe lun.

—Ni bián-san fiádürü fein loúguaboun lun tafánreinjóuniwa murúsun murúsun jádan sun güriía ja.

⁸ Ábati lariñagun Andrés, ában gíñe jádaangiñe disípulugu, le lamúlen Simón Pédro, lun.

⁹ —Niján ában irájü ya, nújein seíngü fein lúma, jáma bián úduratü, loúguabei líra joun sarágu güriía.

¹⁰ Ábati lariñagun Jesúsu.

—Ariñaga jumá joun súnigubei lun jañúurun.

Níñanuti jawára seíngü mílu wügüríña bougudin jawéi würiña jáma irájüñü. Queíti níñein lan sarágu sagádi lídan fulásu ligía, ába jañúurun. ¹¹ Ábati lanúgünun Jesúsu fein lújaburugu, láriigiñe líchugun eteíngiruni lun Búngiu, ába líchugunun joun láni disípulugu, ába jafánreinjanun disípulugu jádan sun ja nünbaña. Ligía méme ladúga jáu úduratü, ruínalei sun le jabúseerubei joun. ¹² Dan le quimúleña, ába lariñagun Jesúsu joun láni disípulugu.

—Abúdaja jumeí sun le ígiragubei, mabúlegu lámuga ni cáta.

¹³ Ába jabúdajani, ába jabuínchagüdün dúusu faníñe láu tífe fein le ígiragubei tídaangiñe seíngü fein. ¹⁴ Dánti le jaríjinalin güriía miláguru le, le ladúgübei Jesúsu, ába jaríñagun.

—Inárüni luágu niján lan proféta lé meja lúnbei lábin ubouágun.

¹⁵ Quefti lasúbudiruni Jesúsu luágu busén jamá janúgüni láu érei lun jadúgüni urúeime, ába lídin lábugua luágun wúbü.

Leibugun Jesúsu ligíbuagu dúna
(Mt 14.22-27; Mr 6.45-52)

¹⁶ Dan le lagúñedunbei, ába jarágachun láni Jesúsu disípulugu lárún dúna, ¹⁷ ába jádinagun tídoun ában ugúnein, ába jagúmeserun ánjiñuragua lun jachúlürün Capernaúm. Búrigaaliti, machúlüti Jesúsu jámoun. ¹⁸ Ába lagúmeserun garábali áfuragua jére, ába lérougadun. ¹⁹ Dan le awáanseña luára seíngü o sísi quilómetros, ligía jaríjin liábin Jesúsu tuágún ugúnein, eíbugeina ligíbuagu dúna, ába janúfudedagun. ²⁰ Ába laríñagun joun.

—Manúfudeda jumá, áu le.

²¹ Ábati jerésibiruni láu ugúndani tídan ugúnein, ába jachúlürün lídoun fulásu le ñíjin lubeí jóúdin lídan murúsun óra.

Jáluajani gürígia Jesúsu

²² Larúgan, ába jaríjin gürígia ja eréderubaña loubáfurugu luágu ñúdünja jamá buga disípulugu tídan ugúnein to ñífboun áni tugúya rügüñoun ñi, áni mídin lan Jesúsu jáma. ²³ Súnti dan ligía, ába tiábingua ugúnein ubúrugugiñe Tibérias lun lídoun ában fulásu yaráfa lun le ñi lubei jeígoun fein lárígi leteíngirun Jesúsu tuágu. ²⁴ Dánti jaríjini gürígia luágu úa lan Jesúsu ñi, ni láni disípulugu, ába jádinagun tídoun ugúnein buri tugúya, ába jóúdin Capernaúm áluajei.

Jesúsu, fein to lánina ibágari

²⁵ Dan le jachúlürünbei loubáfurugu dúna, ába jadáriruni Jesúsu, ába jaríñagun lun.

—Maésturu, ¿ída búgasan biábin?

²⁶ Ába laríñagun Jesúsu joun.

—Ninárün jáu luágu ladúga lan jeígin darí lun jaquímuledun jáluajana, máma ladúga gunfaráanda jumáni laníchígu buri miláguru. ²⁷ Madíjerida jumá luágu eígini le gagúmuchaditi le lúntibeí júgubu, áluaja jumeí eígini tun juwáni, le íchugubei ibágari magúmuchaditi. Ligía eígini le lúnbei níchuguni jun, áu Wügúri Garaúwarügüti, ladúga rúlaali Búngiu Úguchili ubáfu nun lun níchuguni ibágari ligía.

²⁸ Ábati jaríñagun lun.

—¿Ída lubásan wadúga lun wóúdin láu le lubeíbei Búngiu?

²⁹ Ába laríñagun Jesúsu joun.

—Le labúseerubei Búngiu, lun jaffínerun nuágu, áu le loúnajabei.

³⁰ Jaríñagati lun.

—¿Cábaga seíni gayára barúfudun woun lun waffínerun buágu? ¿Cági cátei badúgübei?

³¹ Binádu wagúbürigu jóútiña meja fein to gíriboun maná lídan fulásu mageírawati, quei taríñaguni Lerérun Búngiu. “Jóúgüda lumútiña Búngiu fein to siélugiñetu.”

³² Ába laríñagun Jesúsu joun.

—Ninárün jáu luágu máma lan Moisés íchugubarun fein siélugiñetu tugúya joun, Núguchi íchugubei fein joun áni ligía giñe íchugubarun fein siélugiñetu jun to tímati-maatu. ³³ Ladúga fein to líchuguboun Búngiu, tugúya to aráriruboun siélugiñe áni rúti giñe ibágari joun lílana uboú.

³⁴ Ábati jaríñagun lun.

—Rúboun fein tugúya woun súnwandan.

³⁵ Ába laríñagun Jesúsu joun.

—Áu fein to íchuguboun ibágari. Le ñúbinti númoun, malámadügüyaarume luwáni, le affíneruti nuágu, mamágürabudügüyaaru giñe luwáni. ³⁶ Quei le nubeíbei jun, jugúya maffínetün láu sun aríja jumáadina lan. ³⁷ Sun gürígia ja íchugubaña Núguchi nun, ñúbintiña nun, játi ñúbintiña númoun mabúgun nubáña. ³⁸ Máma niábiña siélugiñe lun

nadúgüni nugúndan, le náni núngua, niábiña lun nadúgüni lugúndan le óunajabalina. ³⁹ Léti labúseerubei Núguchi le óunajabalina, lun meféridirun nan ni ában jádaangiñe ja lichugubaña nun, lun sarágúdarügü nániña lídaangiñe óuweni lídaanme lagúmujóun wéyu. ⁴⁰ Le labúseerubei le óunajabalina, lun sun lan ja anúgütina queisi Liraú Búngiu, afiñe jagía nuágu, lun gabágarí jamá le magúmuchaditi, áni násaaragüdübaña lídaangiñe óuweni lídan lagúmujóun wéyu.

⁴¹ Ába jagúmeserun juríu adímureja wuríba luágu Jesúsu ladúga laríñagun luágu ligía lan fein to aráriruboun siéluigiñe. ⁴² Ába jaríñagun.

—¿Ma funági Jesúsu le liraú José le? Subúdi wamúti lúguchi túma lúguchu. ¿Ída liñáti laríñagunbei luágu siéluigiñe lan larárira?

⁴³ Ábati laríñagun Jesúsu joun.

—Madímureja jumá nuágu. ⁴⁴ Siñáti liábin ni ában númoun ánjein máma lubeí lanúgün Búngiu Úguchili le óunajabalina, áni násaaragüdübei lídaangiñe óuweni lídan lagúmujóun wéyu. ⁴⁵ Laríñajare tídan líburu to jerérun profétagu. “Larúfudajaba Búngiu joun súngebui.” Sun lubeíti ja agáambubalin Búngiu Úguchili, furéndeí jagía lúmagiñe, ñúbintiña númoun.

⁴⁶ Máma jamúgati luágu níjein lan aríjiti Búngiu Úguchili. Áu le ñúbinbei lúmagiñe Búngiu, áu rügúñein aríjei. ⁴⁷ Ninárün jáu luágu le lan afñeti nuágu, gabágariti le magúmuchaditi. ⁴⁸ Áu fein to íchuguboun ibágarí. ⁴⁹ Joutiña binádu jagúbürigu fein to maná lídan fulásu mageírawati áni láu sun luwúyeri jiláguatiña. ⁵⁰ Áu, tuágu fein to aráriruboun siéluigiñe nadímureja, lun ja lan eígitu, lúmounbaña Búngiu. ⁵¹ Áu méme fein wíwwantu tugúya to aráriruboun siéluigiñe, le eígiti tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, núgubu guánarü, níchugubei lun gayáraabei lan jabágaridun gürígia lun sun dan lúma Búngiu.

⁵² Ábati jeréderun juríu adímureja jámagua, ába jaríñagun.

—¿Ída lubásan leígagüdüni le lúgubu guánarü woun?

⁵³ Laríñaga Jesúsu joun.

—Ninárün jáu luágu ánjaün lan meígin lídaangiñe núgubu, áu Wügúri Garaúwarügüti, mátun jumeíme níta, mabágaribadün. ⁵⁴ Le eígiti núgubu, gurálei níta, gabágariti tímatimaati le magúmuchaditi, áni násaaragüdübei lídaangiñe óuweni lídan lagúmujóun wéyu.

⁵⁵ Ladúga eígini le tímatimaati núgubu, uníñein le tímatimaati níta. ⁵⁶ Le eígiti núgubu, gurálei níta, lídaañein ában núma, áu lúma. ⁵⁷ Úguchili le óunajabalina, gabágariti, áni áu, gabágaritina gíñe lídaangiñe, ítara méme líña, le awíwwanduti nídaangiñe, gabágaribei nídaangiñe. ⁵⁸ Tuágu fein to aráriruboun siéluigiñe nadímureja. Mítaraantu fein to quei maná le jeígubei binádu jagúbürigu, láu lan sun luwúyeri jiláguatiña, le eígiti tídaangiñe fein to, labágariduba tímatimaati lun sun dan lúma Búngiu.

⁵⁹ Lídan adámuridaguni tídan jalígilisín juríu to Capernaúmboun, ñi larúfudajei Jesúsu cátei le.

Dimúrei lánina ibágarí magúmuchaditi

⁶⁰ Sarágu jáña jádaangiñe ja afálarubalin Jesúsu, dan le jagáambunbalin arúfudajani le, ába jaríñagun.

—Cátei le laríñagubei, jénreenguti lerésibirúniwa, ¿cábasan adúga gásu láu?

⁶¹ Ába lasúbudiruni Jesúsu luágu jadímurejaña lan luágu cátei ligía, ába laríñagun joun.

—¿Wuríbati lábुरुjan líra jun? ⁶² ¿Cába jamúga funáti asúsereda ánjana jamúga jaríja, áu Wügúri Garaúwarügüti, awárra nárigoún siélun lé meja ñí nubei furúmiñe? ⁶³ Náni Espírítu, ligía íchugubei ibágarí tímatimaati, núguburügü, siñáti líderagunün. Áni sún buri cátei le naríñagubei jun, máma luáguti eígini le lúnti jurágeirugu, luáguti eígini le túnti juwáni, le íchugubei ibágarí magúmuchaditi. ⁶⁴ Áni añájeingua jádaangiñe, maffñetiña.

Ladúga lúmagiñe furúmiñeti dan, subúdi láña Jesúsu cátaña lan maffñebaña, lúma cátei lan le lúnbei lalúguruni. ⁶⁵ Ába laríñagun.

—Ligía naríñagunbei jun luágu siñá lan liábin ni ában númoun ánjein máma lubei Núguchi Búngiu agúarubei lun.

⁶⁶ Lúmagiñe dan ligía, sarágu jáña jádaangiñe ja afálarubalin Jesúsu, ába jígiruni, ába meíbugunjaña lan lúma. ⁶⁷ Ábati laríñagun Jesúsu joun dúusu disípulugu.

—Ángi jugúya, ¿buséntün gíñe jídin nueí?

⁶⁸ Ába loúnabun Simón.

—¿Cábagi úmoun woúdin? Dimúrei buri le baríñagubei, lánina ibágari tímatimaati le magúmuchaditi. ⁶⁹ Wagía affñeediwa, áni subúdi wamúti luágu amúrú lan Crístubei le Liraú Búngiu wínwanti.

⁷⁰ Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, níjein ában jídaangiñe láni Máfia.

⁷¹ Dan laríñagunbalin Jesúsu líra, luáguñein Júdas, le liraú Simón Iscarióte, ladúga ligíaba lan alúgurei, láu sun ában lan jádaangiñe dúusu disípulugu ligía.

7

Maffñeruntiña lamúlenu Jesúsu luágu

¹ Lárigiñe sun cátei le, ába ebugañaña lan Jesúsu loúbawagu Galiléa, mabúseerunti leréderun Judéa ladúga ñi buséntiña jurú jáfaruni jílagubei. ² Queíti yaráfaali lan ában lídaangiñe jafédun jurú le gíríbei tufédun dibásein, ³ ába jaríñagun lamúlenu lun.

—Meréderabá ya, beíba Judéoun aríja jamámugei gíñe bánigu ja ñibaña cátei lé buri badúgübei. ⁴ Dan le busén lan ában gürígia lasúbudirúniwa, madúgün lumúti buri cátei arámudaguarügü. Queíti adúga ban cátei líbeina le, adúgabef ligíbugiñe sun ubou.

⁵ Ni íbini lamúlenu maffñetiña luágu. ⁶ Ábati laríñagun Jesúsu joun.

—Machúlügili dan lun nídin Jerusalén luágu fédu ligía, ánjein jun, buíti furúmierügü óra. ⁷ Siñáti jíyereegudún joun ja lánina ubou le, anáti áu, iyereegutina joun, ladúga geféentina luágu wuríba lán buri cátei le jadúgübei. ⁸ Jeíba lídan fédu, áu mídinbadina guetó, machúlügili nidáani lun nídin.

⁹ Lárigiñe laríñaguni sun le joun, ába leréderun Galiléa.

Jesúsu lídan fédu le tánina dibásein

¹⁰ Lárigiñe jóudin lamúlenu, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijóuniwa. ¹¹ Ítara líña jáluajani jurú lídan fédu ligía, ába jaríñagun.

—¿Jageí funásan wügúri le?

¹² Sarágu jañáti adímurejatiña luágu jádan gürígia. Ñíñanu aríñagutiña luágu ában lan wügúri buíti ligía, jíbiri aríñaga. “Mabuídunti, yéegua lumútiña gürígia.”

¹³ Úati ni ában adímurejati furáangu luágu, ladúga janúfude jaweí jurú.

¹⁴ Lamídownjali fédu lúmagua, ligía lebélurun Jesúsu témpulurugun, ába lagúmeserun arúfudaja. ¹⁵ Ába laweíridun janígi jurú, ába jaríñagun.

—¿Ída liñásan lasúbudirunbei le sarágu cátei, matúrijaanga ligía?

¹⁶ Ába laríñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina. ¹⁷ Ánjein níjein lubeí ában le aráanseti lun ladúgüni le labúseerubei Búngiu, lasúbudirubei ánjein lúmagiñeti lubeí Búngiu le narúfudajabei lúmoun luágu lan náni núngua nadímureja. ¹⁸ Le adímurejabei luágu láni lúngua, ladúgüni lun janúgüni gürígia weíri, le oíchubei lun lanúgüniwa le oúnajabalin weíri, ligía aríñagubalin inárüni, áni máma ligía biángua tigíbu.

¹⁹ ‘¿Ma inárüni luágu rúlaani Moisés lúruđu jun? Láu sun líra, úati ni ában jídaangiñe úaraduti lúma lúruđu ligía. ¿Ca uágu jabúseera jáfarunina jilágubei?

²⁰ Ába jariñagun lun.

—Níjein espíritu wurfbati bídan, ¿ca busénbei láfarunibu jilágubei?

²¹ Ába lariñagun Jesúsu joun.

—Luágurügü ában cátei le nadúgübei lídan wéyu le eméraguagülei laweírída janígí sun jugúya. ²² Arúfudaja lumúti Moisés luáguti jagáburi juríu le circuncisión, (láu sun máma lan ligía agúmeserubalin igáburi ligía, jagúmeserun bináđu lagúbürigu lubáragiñe), ligía lébubei lerésibirun ában irájü circuncisión íbini lídan lan wéyu le eméraguagülei.

²³ Ánjein adúga jubálin líra íbini lídan lan wéyu le eméraguagülei lueírügü jadúraaguni lilúrudun Moisés, ¿cáti uágu jagáñida núma lueígiñe nareídaguagüdüni lúgubu ában wügürí dayárugubei lídan wéyu le eméraguagülei? ²⁴ Masáminara jumá luágu cátei quéisi larijñiwa, samína jumá luágu quéisi lubeí.

Ladímurejan Jesúsu luágu ladúgawagún

²⁵ Ábati jagúmeserun jádaangiñe ja aganoúbaña Jerusalén álügüđaja.

—¿Másan niján le jáluajabei lun jáfaruni jilágubei? ²⁶ Nijánga adímureja ligíbugiñe guririguau, áni úati ni ában aríñaguti ni cáta lun. ¿Léfunasan afíñe jamá gumádimatiña luágu wügürí lan le Crístubei? ²⁷ Subúđiti woun jalágiñe lan liábin le, ánjeinti dánme le liábin Crístu, ibíđiñebei ni ca un jalágiñe lan liábin.

²⁸ Dan lagáambubalin Jesúsu cátei le, dan larúfudajaña lubeí témpulurugu, ába lariñagun rein.

—¡Subúđi jumútina lubeíti, subúđi jumeí jalágiñe lan niábin! Máma láu nání nungua niábin, ában le inárünibeí luágu níjein lan, ligía oúnajabalina, áni ibíđiñeti jun. ²⁹ Áu, subúđi numúti ladúga lúmagiñe lan niábin, áni ligía oúnajabalina.

³⁰ Ába yebéti jabúseerun jadáürüni, úati ni ában agúuruti luágu ladúga machúlügili lan dan lun louñwen. ³¹ Sarágu jáña afíñerutiña luágu, ába jariñagun.

—Dánme le liábin Crístu, ¿ladúgüba funági ámu miláguru sügü láu wügürí le?

Jounajan fariséogu polisía adáürei Jesúsu

³² Ába jagáambuni fariséogu le jariñagubei gürgia luágu Jesúsu, jagía jáma jábutigu fádirigu, ába jounajan polisía témpulurugugiñe lun jadáürüni. ³³ Ábati lariñagun Jesúsu.

—Murúsunrügübei dan neréđerun júma ya, ábame nagíribudun lúmoun le oúnajabalina. ³⁴ Jáluajabadina, madári jubáđina, ladúga siñábei lan jíđin le ñijnbadina lubeí.

³⁵ Ábati jagúmeserun juríu álügüđagua jámagua.

—¿Jalíñounba funásan líđin le siñábei lubeí nege wadáriruni? ¿Leíbuga funa jámoun juríu ja jagánaguabaña gürgia ja güriégu, lun larúfudajan joun güriégu? ³⁶ ¿Ca míni lan láu lariñagun woun. “Jáluajabadina, madári jubáđina ladúga siñábei lan jíđin le ñibadina lubeí”?

Líseesen dúna wínwanti

³⁷ Le lagúmujóun wéyu lídan féđu ligía, ligíatima weírigubei. Lídaanti wéyu ligía, ába laráramun Jesúsu, ába lariñagun láu umálali reínti.

—Le mágürabutu luwáni, ñübinlá númoun, gurála. ³⁸ Le afíñeti nuágu, láwiyujaba dúna wínwanti tídaangiñe lanígi, quei taríñaguni Lerérun Búngiu.

³⁹ Laríñaguña Jesúsu láu líra luágu ja lan afíñerutiña luágu, jerésibirubei lan Sífiri Sándu, dan ligía, miábingili Sífiri Sándu ladúga magríbudungili lan Jesúsu larigoún siélun líđoun luweírigun.

Fánreinguau jádan gürgia

⁴⁰ Níñanu jádaangiñe gürgia, dan le jagáambunbalin cátei le, ába jariñagun.

—Inárüni luágu niján lan proféta lé meja lúnbei liábin.

⁴¹Jaríñaga jíbiri.

—Niján Crístubei.

Jaríñaga jíbiri.

—¿Ída lubásan Galiléanabei lan Crístu? ⁴²Taríñajare Lerérun Búngiu luágu ladúgawagunbei lan urúei David Crístu, áni Beléngiñetibe lan, fulásu meme le ñíngiñeti lubeí David.

⁴³Ába lubeíti jafánreinragun gürígia lueígiñe Jesúsu. ⁴⁴Ñíñanu yebe abúseerutiña jadáürüni, úati ni ában adúgüti.

Mafíñetiña gumádimatiña luágu Jesúsu

⁴⁵Ába jagíribudun polisía ja tánina témpulu jarigoún jamoun fariséogu jáma jábutigu fádirigu. Ába jaríñagun joun polisía.

—¿Ca uágu manúgün jubálin?

⁴⁶Ába jaríñagun polisía.

—¡Úagili ni ában adímurejati quei ladímurejan wügúri le!

⁴⁷Ábati jaríñagun fariséogu joun.

—¿Ígíraguagüdaadün gñe júngua lun leyéedunün? ⁴⁸¿Níjein funági ában jádaangiñe wábutigu o jádaangiñe lan fariséogu afíñeruti luágu? ⁴⁹Ánjaña gürígia ja, ja afálarubalin wügúri ligía, ja ibídiñejabubaña lun lúruđu, ñnarawagúaaña.

⁵⁰Nicodémo, le ñúđünbei adímureja lúma Jesúsu gúñoun, ligía ában jádaangiñe fariséogu, ába laríñagun joun.

⁵¹—Según walúrudun, siñáti wasíadiruni ában wügúri magáambunga wameí furúmiñe lun wasúbudiruni ca lan lidúnrunbei.

⁵²Ábati jaríñagun lun.

—¿Galiléana gñe amúrü, badímurejaanbei luágu lufúleisein? Atúriajaboún Lerérun Búngiu, basúbudirubei luágu úagili lan ni ában proféta Galiléana.

⁵³Ába jóudin cáda ában jábiñoun.

8

Wúri maríeitu to aganouíboun luma ámu wügúri

¹Ánjeinti Jesúsu, ába lídin luágun wúbü le gíríbei Olívos. ²Larúgan bináafin, ába lagíribudun témpulurugun, ába jayábin sun gürígia lubádu, ába lañúurun, ába lagúmeserun arúfudaja joun. ³Ábati janúgün arúfudajatiña lilúrudun Moisés jáma fariséogu ában wúri jadáriragun lúma ámu wügúri lueí túmari. Ába jíchugunun jamádaangua ja ñíbaña jámagua, ⁴ába jaríñagun lun Jesúsu.

—Maésturu, nuján wúri to, wadáriragun lúma ámu wügúri lueí túmari. ⁵Laríñajare lilúrudun Moisés jawágu jibe würiña ja, lun jáfarawagún jilágubei láu dúbü. ¿Cági baríñagubei?

⁶Jaríñagunbalin líra lun jarjín lábun, lun gébuna lan jíchugun lidúnrun. Ábati lélemuchun Jesúsu, ába labúrújan múarugu láu lújabu. ⁷Quefti jasígirun álúgüdaguei, ába laráramun, ába laríñagun joun.

—Furúmiñegarügü jídaangiñe le mafígun, chüleí furúmiñeti dúbü tuágu.

⁸Ábaya lélemuchun, ába lasígirun abúrúja múarugu. ⁹Jagía, le jagáambubalin le laríñagubei, ába jasándiragun jóungua luágu gafígoun jamá, ába jáfuridunga ában ában, jagúmesera jámagiñe ja weínamutimáajañabaña. Dánti le furijaña súngebei, ába ladáriragun Jesúsu lúngua lábugua túma wúri tugúya quei teréderunbei ñi. ¹⁰Ábati liñúraguni Jesúsu lichúgü, ába laríñagun tun.

—¿Jagáñasán buga ja íchugubaña bidúnrun? ¿Úati ni ában asíadirutibu lun bouñwen?

¹¹Ába taríñagun lun.

—Uá, úati ni ában.

—Ábati laríñagun Jesúsu tun.

—Ni áu, masíadirun nubádibu, beíba, madúgadügüyabá figouú.

Jesúsu lilámpun ubouú

¹² Ábaya ladímurejan Jesúsu joun gürígia, ába laríñagun.

—Áu lilámpunbei ubouú, le afálarutina, libíjubei larúgounga le anúgübei gürígia lídoun ibágari magúmuchaditi, áni meíbugunbei lídan lubúriga.

¹³ Ábati jaríñagun fariséogu lun.

—Amúrü, badímurejaña buíti buouúgua, mebégiti líra.

¹⁴ Ába laríñagun Jesúsu joun.

—Le nariñagubei gebégiti, láu sun áu lan adímurejabei buíti nuouúgua. Áu, subúdi numúti jalíagiñe lan niábin lúma jalíñounba lan nídin, ánjein jugúya, ibídiñeti jun jalíagiñe lan niábin ni jalíñounbadina lan. ¹⁵ Jugúya, jasáminarun nuágu queísi luwúyeri lasáminarun ubouú, áu, magúseragüdúntina ni ában. ¹⁶ Ánjana jamúga agúseragúda, nadúgüñein jamúga láu úarani, ladúga mámarügüba áu agúseragúda, Núguchi le ouñajabalina lagúseragúdüba giñe núma. ¹⁷ Bürúwati lídan jilúrudun luágu dan lan geféen jamá bián gürígia luágu ában méme cátei, lúnti lan lafíñerún joun. ¹⁸ Ítara liñáti áu ában le geféenbei luágu náni fuleísei, Núguchi le ouñajabalina, ligía giñe ában le geféenbei nuágu.

¹⁹ Ábati jaríñagun lun.

—¿Jageígi Búguchi?

Ába laríñagun joun.

—Jugúya, ibídiñetina jun, ni Núguchi, ibídiñeti giñe jun, lun jamúga subúdi jumánina, subúdi jamúga giñe Núguchi jun.

²⁰ Lídan laríñagubalin Jesúsu cátei le, larúfudajaña témpulurugu lídan fulásu le ní tubei buri gáfu to lágei seínsu. Madáürün lumúti ni ában ladúga machúlügüli lan lidáani lun louñwen.

Laríñajare Jesúsu joun luágu siñá lan jeídin ñíjinba lubeí lídin

²¹ Ábaya laríñagun Jesúsu joun.

—Áu, neíbuga, jugúya jalúajabadina, jouúweguba gafígounga, siñáti jídin le ñíjinba lubeí nídin.

²² Ábati jaríñagun jurú.

—¿Láfaragua funa lúngua, laríñagunbei luágu siñá lan wouúdin le ñíjinba lubeí lídin?

²³ Ábati laríñagun Jesúsu joun.

—Jugúya, únabuna jugúya, ánjein áu, yágütana íñu áu. Láni ubouú le jugúya, ánjein áu, máma láni ubouú le áu. ²⁴ Ligía nariñagunbei jun luágu jouúweguba lan gafígounga, ladúga ánjein maffíñen jubeí luágu áu lan áu, jouúweguba ítara.

²⁵ Ábati jaríñagun lun.

—¿Cátabuti?

Ába laríñagun joun.

—Aríñaga náali jun lúmagiñe bináru. ²⁶ Gayáraati jamúga nariñagun gíbeti jun luágu luríban jigáburu lun nadeínjan jun, le ouñajabalina aríñaga lumúti ináruñi, áni cáteirügübei le nagáambubei lúmagiñe le ouñajabalina nariñaga joun ja lílana ubouú.

²⁷ Ánjein jagía, úati gunfaráanda jamáni láu luágu lan Búngüi ladímureja Jesúsu joun.

²⁸ Ligía laríñagunbei joun.

—Dánme le jiñúrúnina, áu Wügüri Garaúwarügüti, ligíame jasúbudiruni luágu áu lan le uágubei nariñaga luágu áu lan, áni madúgün nan ni cáta luágu náni núngua, lueídügüya le larúfudajabei Núguchi nun. ²⁹ Ladúga númañein le ouñajabalina, mígirun lágidina Núguchi nábuga, ladúga adúga náni le áubei lagúndaara súnwandan.

³⁰ Dan le laríñagunbalin Jesúsu le, ába jaffíñerun sarágu luágu.

Lirájüñü Búngiu jáma lidámuniña figou

³¹ Ába laríñagun Jesúsu joun juríu ja áñarubaña lun lerérun.

—Ánjaün asígira lun jídin surúñu láu le nubeíbei jun, jíábinba lun náni jumá disípulugu le tímatimaati. ³² Ábame jasúbudiruni inárüni, ábame lafúnraanguagüdünün inárüni.

³³ Ába jaríñagun lun.

—Linébaanfaangu Abrahám wagía, áni merédegidiwa idámunime ni ca un. ¿Ída liñáti baríñagunbei luágu furáangujadiwa lánme?

³⁴ Ába laríñagun Jesúsu joun.

—Ninárün jáu, luágu sun lan ja adágubaña figou, lidámun figou jagía. ³⁵ Ában idámuni, máma jádaangiñeti famlíia, ánjeinti ában isáani, jádaangiñeti famlíia súnwandan.

³⁶ Ánjaün lubeíti nafúnraanguagüda, áu le Búngiu Irájü, lídaangiñe idámuni lun figou, furáangubadün le tímatimaati. ³⁷ Subúdi náali luágu linébaanfaangu jumá Abrahám, láu sun líra, buséntün jáfarunina, ladúga mája jumá lun le nubeíbei jun. ³⁸ Áu nadímurejan luágu le larúfudubei Núguchi nun, jugúya jadúgüni le jafúnrendeirubei lúmagiñe júguchi, le Máfia.

³⁹ Ába jaríñagun lun.

—Abrahám wáguchibeí.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadúgüñein jamúga le ladúgübei. ⁴⁰ Láu sun aríñaga náali lan inárüni le larúfudajabei Búngiu nun jun, buséntün jáfarunina. ¡Madúgünti meja Abrahám ni cáta líbe líra! ⁴¹ Le méme ladúgübei júguchi, ligía jadúgübei.

Ábati jaríñagun lun.

—Mámatia wagía bástadi, ában rügüñein wáguchi, Búngiu.

⁴² Ába laríñagun Jesúsu joun.

—Ánjein jamúga Búngiu lubeí júguchibeí, jínsiñetina jamúga jun ladúga lúmagiñe Búngiu niábin, áni anája ya. Máma láu náni núngua niábin, Búngiu oúnajabalina.

⁴³ ¿Ca uágu lásiñerunbei gunfaráanda jumáni le naríñagubeí? Ladúga mabúseerun jumá jagáambuni náni ugánu. ⁴⁴ Máfia júguchibeí, lánigu jugúya, áni buséntün jadúgüni lugúndan. Gáfarajadigubeiñein Máfia lúmagiñe furúmiñeti dan. Márügüdünti lueígiñe inárüni, maríñagunti gíñe inárüni. Lídan le laríñagun iyéeni, ladímurejaña quei ligáburi, ladúga yéeti áni ligía lúguchibeí iyéeni. ⁴⁵ Ánjeinti áu, quei inárüni lubeí naríñagubeí, mafíñetün nun. ⁴⁶ ¿Ca jídaangiñe gayáraabei larúfuduni luágu gafígoun nan? Ánjeinti inárüni lubeí naríñagubeí, ¿cáti uágu mafíñen jubeí nun? ⁴⁷ Le lánigu Búngiu, agáamba lumúti lerérun Búngiu, ánjeinti jugúya, quei máma jubeí lánigu Búngiu, ligía mája jubeí jagáambuni.

Níjeinjali meja Crístu lubáragiñe Abrahám

⁴⁸ Ábati jaríñagun juríu lun.

—Wanáriün láu waríñagun luágu máma ban ámu jaweí jagúburi Samariána, luágu gíñe níjein lan ában espíritu wuríbati bídan.

⁴⁹ Ába laríñagun Jesúsu joun.

—Úati espíritu wuríbati nídan. Le nadúgübei, níchuguña inébesi lun Núguchi, jugúya, íchiga minébeni nun. ⁵⁰ Máluaajantina inébesi núngua, láu sun níjein lan ában áluga lumúti ninébesi, áni ligía le agúseragüdübei. ⁵¹ Ninárün jáu luágu le lan adúgüti gásu láu le nubeíbei, moúnwenbei lan.

⁵² Ábati jaríñagun juríu lun.

—Anáti guetó, chouuru wamáali luágu níjein lan espíritu wuríbati bídan. Jiláti Abrahám, jilágu profétagu, áni aríñagagibu luágu le lan adúgüti gásu láu le bubeíbei, moúnwenbei

lan. ⁵³ ¿Cátabuñadibugi lúmoun wáguchi Abrahám? Jiláti Abrahám, jilágua profétagu. ¿Ída liñáti banáangun búngua?

⁵⁴ Ába laríñagun Jesúsu joun.

—Ánjana íchiga uweíriguni nuóguá, málabei, ánjeinti Núguchi, le méme uágubei jaríñaga luágu ligía lan Jubúngiutebei, ligía íchugubei uweíriguni nuágu. ⁵⁵ Jugúya, ibídiñeti Búngiu jun, anáti áu, subúdiiti nun, áni ánjana jamúga aríñaga luágu ibídiñe lan nun, yéetina jamúga gíñe quei jugúya. Subúdiiti Búngiu nun le tímatimaati, áni adúga numúti le lubeíbei. ⁵⁶ Abrahám lé meja binádu júguchi, gúndaati meja láu lasúbudiruni luágu lachúlürüba lan nuwéyuri lun niábin uboúagun queísi asálbaragülei, buin líña láu ugúndani dan laríjini wéyu ligía.

⁵⁷ Ábati jaríñagun juríu lun Jesúsu.

—Úgubeígili ni dimí-san irúmu báu, ¿aríñagatibu luágu aríja báni Abrahám?

⁵⁸ Ába laríñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

⁵⁹ Ába jabúdajan dúbü lun jachúrugini luágu, ába larámudagun, ába láfuridun témpulurugugiñe, ába lásügürün jamídaangiñe, ába lídin.

9

Lareidaguagüdüñ Jesúsu ában wügúri maríjinti

¹ Lídan le lásügürün Jesúsu lídaangiñe ában fulásu, ába laríjin ában wügúri maríjinti lúmagiñe lagúriajouñ. ² Ába jaríñagun láni disípulugu lun.

—Maésturu, ¿cásan uágu lagúriajouñbei wügúri le maríjinga? ¿Ladúgasan jafígoun lagúbürigu, o ladúga lifígoun guánarü?

³ Ába laríñagun Jesúsu joun.

—Máma ladúga lifígoun, máma gíñe ladúga jafígoun lagúbürigu, lasúseredunbei ítara lun larijouñiwa le luáraabei Búngiu adúga láu lareidagun wügúri ligía. ⁴ Lúnti nadúgüni luwádigimari Búngiu le oúnajabalina sun wínwangidina lan, jiláadina ligíame, siñáme nadúgüni. ⁵ Sun dan anája lan ligíbuagu uboú le, áu lilámpunbei uboú.

⁶ Lárigiñe laríñaguni Jesúsu cáte le, ába lásuerun múarugun, ába ladúgün murúsun gubégubeti láu laríre, ába lájuruduni luágu lágu le maríjinbei. ⁷ Ába laríñagun lun.

—Beíba achíbei bigíbu lídan dúna le gíribei Siloé —míni lan líra, Oúnajóuti.

Ába lídin maríjinti ligía, ába lachíbuni ligíbu ñi, dan le lagíríbudunbei, aríjaali. ⁸ Játi lubésinanigu jáma güriája já meja aríjubalin amúriaja, ába jaríñagun.

—¿Másan nijáñaja le añúurubei amúriaja seínsu?

⁹ Ñíñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába laríñagun wügúri ligía.

—Ánja, áu.

¹⁰ Ábati jaríñagun lun.

—¿Ída liñáti aríjaadibu lubeí?

¹¹ Ába laríñagun joun.

—Wügúri le gíribei Jesúsu, ligía adúgübei murúsun gubégubeti, ába lájuruduni luágu nágu, ába laríñagun nun. “Beíba lídan dúna le gíribei Siloé, ábame bachíbuni bigíbu ñi.” Ábati nídin, lásun nachíbuni nigíbu, ába naríjin.

¹² Ábati jaríñagun lun.

—¿Jageígi wügúri ligía?

Laríñaga joun.

—Ibídiñeti nun jageí lan.

Jálügüdaguni fariséogu marjinti le areídaguagüdüwalibi

¹³ Ábati janügüni wügüri lé meja marjínbei jagíbugiñoún fariséogu. ¹⁴ Queíti lídan lan wéyu le eméraaguagülei ladúgei Jesúsu gubégubeti le áubei lareídaguagüdei marjinti ligía, ¹⁵ ába gíñe jálügüdüni fariséogu wügüri ligía ída líña lan gayáraajali lubeí larjín. Ába laríñagun joun.

—Ába líchugun gubégubeti luágu nágu, ába nachíbuni nigibu, guetó aríjaadina.

¹⁶ Ábati jaríñagun jádaangiñe fariséogu.

—Le wügüri le adúgübalin cátei le, siñáti lounagüle lan Búngiu ladúga minébenti wéyu le eméraaguagülei lun.

Jaríñagati jíbiri.

—¿Ída liñáti ladaáguni buri miláguru le, ánjein gáfígoun lubeí?

Ába lubeíti ñi lan fánreinguaü jádan. ¹⁷ Ábaya jálügüdüni lé meja marjínbei.

—Ángi bugúya, ¿cági baríñagubei luágu wügüri le, queísi bugúya lubeí le laríjagüdübei? Ába laríñagun.

—Nugúya, naríñagun luágu ában lan proféta.

¹⁸ Májataña yebe fariséogu jafíñerun luágu marjín lán meja wügüri ligía áni aríjaali lan guetó, darí lun jagúarun joun lagúbürigu, ¹⁹ ába jaríñagun joun.

—¿Nijánsan jiraú le uágubei jaríñaga luágu marjín gubeíñein lan lúmagiñe lagúriajóun? ¿Ída liñáti aríjaali lubeí guetó?

²⁰ Ába jaríñagun lagúbürigu.

—Subúdi wamúti luágu waraú lan le, áni marjín lan dan le lagúriajóunbei, ²¹ ibídiñeti woun ída líña lan aríjaali lubeí, ni ca lan areídaguagüdübalin lágu. Álügüda jumeí, weíriyaali, gayáraati lounabun lueíñegua.

²² Anúfudeiti aríñagagüdübalin líra joun lagúbürigu wügüri ligía, ladúga aríñagaaña lan fariséogu luágu sun lan ja afíñerutiña luágu Jesúsu lan Crístubei, jabugüba lan tidaangiñe jalgílisin jurú. ²³ Ligía jaríñagunbei lagúbürigu. “Álügüda jumeí, weíriyaali.”

²⁴ Ábayati jagúarun jurú lun wügüri lé meja marjínbei, ába jaríñagun lun.

—Aríñagabeí inárüni woun ligíbugiñe Búngiu, wagía, subúdi woun luágu gáfígoun lan wügüri líra.

²⁵ Ábati laríñagun joun.

—Ibídiñeti nun ánjein gáfígoun lubeí lúmoun maffígoun lan. Le nasúbudirubei, luágu marjín nán meja, áni guetó aríjaadina.

²⁶ Ábaya jaríñagun lun.

—¿Cásan ladúgübei báu? ¿Ída liñásan ladúga lun laríjagüdüniibu?

²⁷ Ába laríñagun joun.

—Aríñaga náali jun, mebéreseguntün náu, ¿cáti uágu jabúseera naríñaguniya jun? ¿Ódi buséntün gíñe jafálaruni?

²⁸ Ábati janábuni, ába jaríñagun lun.

—Bugúya, falá bumuti larúfudajan wügüri ligía, ánjein wagía, larúfudajan Moisés wafálarubei. ²⁹ Subúdi woun luágu adímureja lán meja Búngiu lun Moisés, ánjein le, ibídiñegubeíti woun jalágiñeti lan.

³⁰ Ábati laríñagun wügüri ligía joun.

—¡Ámuti gíñe cátei le! ¡Ibídiñeti jun jalágiñeti lan, áni aríjagüda lána! ³¹ Subúdi woun luágu magáambun lániña Búngiu gáfígountiña, ja rügúñanu ájuduragubaña lun jáma ja adúgübalin lugúndan, lagáamba. ³² Magáambuñajagili luágu ni ában aríjagüdüti ában

gürǵia le agúrĩajouúti marǵinga. ³³Lun jamúga máma lan lúmagiñe Búngiu liábin wügúri le, siñáti jamúga ladúgün ni cáta.

³⁴Ábati jaríñagun lun.

—¿Bugúyasan le agúrĩajouúbei buin láu figoú, buséntibu barúfudajan woun?

Ába jabúguni tídaangiñe jalígilisin.

Ja marǵinbaña luágu cátei lánina Búngiu

³⁵Ába lagáambuni Jesúsu luágu bugá jamaani marǵinti meja ligía, dánti le ladúnragun lúma, ába laríñagun lun.

—¿Affñetibu luágu Liraú Búngiu?

³⁶Ába laríñagun wügúri ligía lun.

—Aríñagabei nun cátei lan, affñe námuga luágu.

³⁷Ába laríñagun Jesúsu lun.

—Aríja báali, áu le úmabei badímureja.

³⁸Ába lájuduragun ligíbugiñe Jesúsu, ába laríñagun.

—Affñetina, Nabúreme.

³⁹Ába laríñagun Jesúsu.

—Niábinbei ñájoun uboúagun lun néfegechagúdüni jágu ja ibídiñejabubaña lun cátei lánina Búngiu, lun gñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, marǵin jamá ni cáta.

⁴⁰Dan le jagáambunbalin jádaangiñe fariséogu ja ñíbaña cátei le, ába jaríñagun lun.

—¿Baríñaguñati luágu darúnu líña lan gñe wágu lun cátei le luáguti Búngiu?

⁴¹Laríñaga Jesúsu joun.

—Lun jamúga ibídiñe lan cátei lánina Búngiu jun, madúnruntün jamúga luágu jifǵgoun, quei jaríñagun luágu subúdi jumáni, gadúnruntün.

10

Jémpulu luáguti lóunigiruniña Jesúsu lánigu queísi ában oúnigiruti mudún

¹‘Ninárün jáu luágu le lan mebéluti lídaangiñe lubéneri jabárierun mudún, lun lebélurun lídaangiñe ámu oubaü, jíweruti. ²Ánjeinti le ebélurubei lídaangiñe béna, ligía le oúnigirubaliña mudún. ³Ába lánjunrenchuni le oúnigirubalin béna béna lun, lun lebélurun, subúdi jamúti gñe mudún lumálali. Ába lagúajan joun láu jíri, ába laságaraguniña baríerurugugiñe. ⁴Lárigiñe laságaraguniña súnqubei, ába lídin eibugeina jabá jabá, ába jafálaruni ladúga subúdi jamáni lumálali. ⁵Mídintiña lárigi ában le ibídiñeti joun, anúrajarügütiña luef ladúga ibídiñeti jamálali ámu mútu joun.

⁶Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu jóuniri mudún buíti

⁷Ábayati laríñagun Jesúsu joun.

—Ninárün jáu, áu béna le ñígiñe lubeí gayára lan jayábin gürǵia lun lánigu jamá Búngiu. ⁸Ja ñúbinbaña nubáragiñe, ítara jáña queísi jíwerutiña mudún ladúga iyéeni lan jarúfudajabei, madúgütiña lánigu Búngiu gásu jáu. ⁹Áu bënabei, le ebéluruti nuefígiñe, lasálbarúaba. Ítara lúba quei ában mudún le ebéluruti furí ligía baríerurugugiñe, darí ligía sagádi lun leǵin.

¹⁰Jíweruti, liábin rügúña lun líwerujan, lun láfarajan lúma lun lagúnrinchagun, ánjein áu, niábiña lun jibǵjin ibágari, áni lun jibǵjini gíbe. ¹¹Áu, ítara níña queísi ában jóuniri mudún le buíti, le gayáraati líchuguni libágari jawágu lilúgüniña mudún. ¹²Ánjein le ñadágimeinrügüti luágu fáyeiti, dan le larǵjin liábin anímaalu le jabísa mudún, ába lígiruniña mudún, ába leíbaagun, ladúga máma lan oúnigiruti buíti ligía, máma gñe

lilúgüniña mudún. Ábati liábin jabísa mudún, ába lawáraüdaguagüdüniña. ¹³ Wügüri ligía eibaaguati ladúga luwádigimariña lan luágurügü fáyeiti, mebéresegúnti jáu mudún.

¹⁴⁻¹⁵ ‘Áu oúnigirutibe buíti. Ítara quei nisúbudin lun Núguchi áni subúdi Núguchi nun, ítara líña gíñe jasúbudin nánigu nun, subúdi jamána gíñe queísi subúdi jamáni mudún jouniri. Rúnnumuti nibágari jawágu queísi líchuguni oúnigirutu mudún libágari jawágu lilúgüniña mudún. ¹⁶ Añájein gíñe ámu gürgia ja lúnbaña nánigu jamá ja mámabaña jurfu, lúnti gíñe nanúgüniña lun nánigu jamá. Jagáambubadina, ábame jeréderun sùngubei lídan ában lúma ában oúnigirutu.

¹⁷ Jínsiñetina lun Núguchi, ladúga níchugubei nibágari luágu ubou, ligía ábayame nibíjini. ¹⁸ Magída lubei ni ában gürgia nibágari, láuba nugúndan níchigei. Garíchatina lun níchuguni lúma lúnya nerésibiruni. Ligía cátei le laríñagubei Núguchi nun.

¹⁹ Dan le jagáambubalin jurfu dimúrei buri le, ábaya jafánreinragun. ²⁰ Sarágu jáña jádaangiñe aríñagutiña.

—¿Cásan uágu jadúga gásu láu, níjeingusan espíritu wurfbati lídan áni lúlújali láu?

²¹ Jaríñaga jíbiri.

—Úati ni ában le láuti espíritu wurfbati lun gayára lan ladímurejan ítara. ¿Gayáraati funági laríjagüdüñ espíritu wurfbati maríjintiña?

Merésibirun jamáni juríu Jesúsú

²² Dan ligía lidáani lurfbouga, ladúgüñati fédu le lánina tederegerún témpulu Jerusalén lun Búngiu. ²³ Níñeinti Jesúsú eíbugañaja témpulurugu luágu corredór le giríbei Láni Salomón corredór. ²⁴ Ába jagúriridagun juríu láu, ába jaríñagun lun.

—¿Darísan ídaba bígirawa láu machouruni? Ánjein amúru lubei Crístubei, aríñagabei furáangu.

²⁵ Ába laríñagun Jesúsú joun.

—Aríñaga náali, maffíñetün nun. Sún buri cátei le nadáagubei láu lugúmadin Núguchi, arúfuda lumúti furáangu. ²⁶ Jugúya, maffíñetün ladúga máma jumá jádaangiñe nilúgüniña mudún quei bugája naríñaguni jun. ²⁷ Subúdi jamúti nilúgüniña mudún numálali, subúdi numútiña gíñe, áni falá jamutina. ²⁸ Rútina íbágari magúmuchaditi joun áni meféridirubaña, úabei gíñe agídarutiña nújaburugugiñe. ²⁹ Núguchi le weíribei jawei sùngubei, ligía íchugubaliña nun, áni úati ni ában lun lagídaruniña lújaburugugiñe. ³⁰ Áu lúma Búngiu Úguchili ában méme wagía.

³¹ Ábayati jabúdajan juríu dúbü lun jachúraguni luágun. ³² Ába laríñagun Jesúsú joun.

—Gíbeeli cátei buíti nadúga jigíbugiñe láu lubáfu Búngiu, ¿cábaga lídaangiñe uágu jíchaagua dúbü nuágu?

³³ Ába jaríñagun juríu lun.

—Míchaagunbadiwa dúbü buágu luágu ni cáta buíti badúga, ladúga anába báali lan Búngiu láu berérun. Wügüri rügüñadibu, áni bíchaaguña búngua quei Búngiu.

³⁴ Ábati laríñagun Jesúsú joun.

—Bürúwati lídan jilúruden luágu aríñaga lan Búngiu. “búngiu buri jugúya”. ³⁵ Subúdi woun luágu siñá lan leyéedawagún láu le taríñagubei Lerérun Búngiu, áni aríñagatu líburu tugúya luágu wa láníña Búngiu gürgia ja erésibirubalin lerérun lun jíchuguni joun gürgia, quei búngiu. ³⁶ Ánjeinti anúadaja lubáalina Búngiu, ába louñajanina ubouágun, ¿ída líñáti jaríñagunbei luágu anába náni láu naríñagun luágu Liraú nan Búngiu? ³⁷ Ánjein madúgün nan cátei lé buri ladúgübei Núguchi, maffíñera jumá nun, ³⁸ ánjein nadúga, íbini maffíñerun jumá nun, afíñe jumá luágu buri cátei le nadúgübei, subúdi jumámugei luágu níjein lan Núguchi nídan, áni anájein lan gíñe lídan Núguchi.

³⁹ Ábaya jálugun jadáürüni, ába leséfurun jawei.

⁴⁰ Ábati lagíribudun Jesúsu loubáfurugun dúna Jordán, ába leréderun ñi lídan fulásu le ñí lubeí meja labásteragúdaja Juan. ⁴¹ Sarágu jáña gürígia ñúdüntiña aríjei, ába buri jaríñagun.

—Láu sun madúgün lan Juan ni ában miláguru, inárüni sun le laríñagubei luágu wügüri le.

⁴² Ába jafíñerun sarágu gürígia luágu Jesúsu lídan fulásu ligía.

11

Louñwen Lázaro

¹ Ñíñein ában wügüri sánditi, gíriti Lázaro, lílana fulásu le gíribei Betánia, le tageíra María túma Márta to tǔbugaña. ² María tugúya, to lítu Lázaro le sándibeí, tugúya to éseruboun íbínei luágun lugúdi Jesúsu, ába tarágajani láu tídiburi. ³ Ábati jounajan bián ítunu ja, aríñaga lun Jesúsu.

—Jesúsu, sándiñeintia bumáda.

⁴ Dan lagáambunbalin Jesúsu cátei le, ába laríñagun.

—Mámabei ouweni lébeja cátei lídaangiñe sándi le, lúntibeí laríjiniwa luweírigun Búngiu, lúma gíñe lun laríjiniwa luweírigun Liraú Búngiu lídaangiñe sándi ligía.

⁵ Láu sun weíri lan jínsiñe Márta, María, lúma Lázaro lun Jesúsu, ⁶ dan le jaríñawagúnbei lun luágu sándiñein lan Lázaro, reídeigili bián wéyu lídan fulásu le ñí lubeí. ⁷ Lárigiñe, ába laríñagun joun láni disípulugu.

—Queímounya Judéa.

⁸ Ábati jaríñagun lun.

—Maésturu, málligili lueígiñe jálugun juríu jáfarunibu láu dúbü ñi, ¿busényadibu bídin ñi?

⁹ Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti eǔbuga ában gürígia wéyuagu, machúgeragúnbei, ladúga laríjubei lan larúgounga le yábei ubouágu, ¹⁰ ánjein eǔbuga áriebe, lachúgeraguba ladúga lubúriga.

¹¹ Lárigiñe, ába laríñagun Jesúsu joun.

—Arúmuga wamáda Lázaro, neǔbuga agágudajei.

¹² Ábati jaríñagun disípulugu lun.

—Maésturu, ánjein arúmuga lubeí, lareídaguárügü líña.

¹³ Míni lánti Jesúsu luágu jilá lan Lázaro, jarítagunti disípulugu luágu luágu lan furúmieguarügü arúmuguni ladímureja. ¹⁴ Ábati laríñagun Jesúsu joun, furáangu.

—Jilá Lázaro. ¹⁵ Gúndaatina láu úa nan ñi, ladúga buitimaati ítara jun, afíñe jumámuga. Queímoun waríjei.

¹⁶ Ábati laríñagun Tomás, le únbei jaríñaga Mádou, joun jǔbiri disípulugu.

—Queímoun gíñe, jilá wamámuga úara lúma.

Jesúsu ásaaragúdubei lídaangiñe ouweni, ligía íchiga íbágari

¹⁷ Dan le lachúlürünbei Jesúsu, gádürüjali wéyu lueígiñe labunún Lázaro. ¹⁸ Lidíse Betánia lueí Jerusalén quei bián quilómetros dimí. ¹⁹ Sarágu jáñati jádaangiñe juríu ñúdüntiña Jerusaléngiñe bisídoun Márta túma María lun jíchugun ñurúguauí joun luágu louñwen jamúlen. ²⁰ Dan tagáambunbei Márta luágu níteeli lan Jesúsu achúlüreina, ába táfuridun lubároun, ánjoun María, ába teréderun múnada. ²¹ Ába taríñagun Márta lun Jesúsu.

—Lun jamúga ya ban, mouñwenti jamúga namúlen, ²² áni subúdití nun luágu líchugubei lan Búngiu sun le bamúriajan lúma bun.

²³ Laríñaga Jesúsu tun.

—Labágaridayaba bamúlen.

²⁴ Taríñaga Márta lun.

—Ánja, subúditi nun luágu labágaridayaba lan lídaanme jásaarun jiláguaaña lídan lagúmujuún wéyu.

²⁵ Ábati laríñagun Jesúsu tun.

—Áu le ásaaragüdübaliña jiláaña, rúneí jabágarí joun lárígouún. Le affíneti nuágu, gayáraati loúnwen, labágaridayaba, ²⁶ áni sun le wíngangilibei áni affíneti nuágu, labágariduba giñe lúma Búngiu súnwandan. ¿Affínetibu?

²⁷ Taríñaga lun.

—Ánja, Nabúreme, affínetiña luágu bugúya lan Crístubei le Liraú Búngiu, lé meja lúnbei liábin ubouágun.

Layájun Jesúsu lubádu lumúaja Lázaro

²⁸ Lárígiñe taríñaguni Márta le, ába tídin ougoun María, ába taríñagun tun jóunguarügü.

—Níjein Maésturu ya lún nege bídin lun.

²⁹ Quei tagáambuni María cátei le, ába tásaarun, ába tídin furése aríjei Jesúsu. ³⁰ Mebélugiliti Jesúsu ubúrugun, lídaañein fulásu le ní lubei tadárierei Márta. ³¹ Dan le jaríjinbei juríu ja níbaña múnada túma María ámalijoun tásaarun ába táfuridun furéseguena, ába jóúdin tárígi, jarítágun luágu tesbuga lán yebe luágu umúajaú ayájua.

³² Dánti le tachúlürünbei María le níjin lubeí Jesúsu, ába tájuduragun ligíbugiñe, ába taríñagun.

—Nabúreme, lun jamúga ya ban, mouñwenti jamúga namúlen.

³³ Dan le laríjin Jesúsu tayájun María jáma juríu ja níúbinbaña túma, ába lírudagun tídan lanígi, ³⁴ ába laríñagun joun.

—¿Jalíasan jábunei?

Ába jaríñagun lun.

—Jigábu baríjei.

³⁵ Ába layájun Jesúsu. ³⁶ Ábati jaríñagun juríu.

—¡Aríja jumá luweírin meja línsiñe lun!

³⁷ Níñanu jádaangiñe aríñagutiña.

—Níján le aríjagüdübalin wügúri le maríjinbei, ¿siniáti jamúga funásan ladúgün lun mouñwen lan Lázaro?

Lásaarun Lázaro lídaangiñe ouweni

³⁸ Ábaya tírudagun lanígi Jesúsu, ába layárafadun lun umúajaú. Umúajaú ligía ában júyu luágu dübü, níñein ában dübü lidaúme. ³⁹ Ába laríñagun Jesúsu.

—Gidájumei dübü.

Ába taríñagun Márta lun.

—Mósutia jíngiaali lan ladúga gádürü wéyu lueígiñe loúnwen.

⁴⁰ Ába laríñagun Jesúsu tun.

—¿Másan aríñagatina bun luágu ánjabu lan affíne nuágu, baríjubei lan luweírigun Búngiu?

⁴¹ Ábati jagídaruni dübü, ába laríjin Jesúsu siélun, ába laríñagun.

—Núguchi, teínqui numútibu luágu bagáambunina. ⁴² Subúdi numúti luágu agáamba bánina súnwandan, naríñaguñein líra jawágu gürígia ja, ja yábaña, lun jafínerun luágu amúrü lan ouñajabalina.

⁴³ Lárígiñe laríñaguni cátei le, ába lagúaragun.

—¡Lázaro, furíba nígiñe!

⁴⁴ Ába láfuridun jiláali láu lújabu lúma lugúdi gürágu táu gamísa, lúma ligíbu táu ában gamísa. Ába laríñagun Jesúsu joun.

—Farára jumeí, ígira jumeí lun lídin.

Elédeguni lun lárügüdüniwa Jesúsu

(Mt 26.1-5; Mr 14.1-2; Lc 22.1-2)

⁴⁵ Láu lasúseredun líra, sarágu jádaangiñe juríu ja n̄údünbaña túma María, aríja jameí le ladúgübei Jesúsu, ába jafíñerun luágu. ⁴⁶ Níñanu jádaangiñe, ába jóúdin jámoun fariséogu, ába jabájüdaguni le ladúgübei Jesúsu joun. ⁴⁷ Ábati jayábin fariséogu jáma jábutigu fádírigo, ába jóúndaragun jáma jíñun-ágei agúmadijatiña, ába jaríñagun.

—¿Cábasan wadúga? Ladáaguñatia wügüri le sarágu miláguru. ⁴⁸ Ánjeinti wígira ítara, jafíñeruba sun güri-gia luágu, ábamei jayábin gumádimatiña Rómata, ábame jagúmochaguagüdünnun walgílisin láu sun warásan.

⁴⁹ Níñein ában jádaangiñe, gíríti Gáifasi, ligía jábutibeí fádírigo lídan irúmu ligía, ába laríñagun joun.

—Íbídíñeti ni cáta jun, ⁵⁰ maríjin jumeí luágu buítima lan woun lun loúnwen ábanrügü wügüri jawágu jíbiri, máma lun lagúnrinchawagún sun warásan.

⁵¹ Máma láu lání Gáifasi lúngua laríñagei líra, ladúga quei ligía lan fádíri le níutimaabei lídan irúmu ligía, ába laríñagagüdüni Búngiu lun, luágu louúweba lan Jesúsu jawágu juríu, ⁵² áni mámarügü jawágu juríu, lun giñe loúndaruniña sun lirájüñü Búngiu ja díseguabaña jawáriuagua. ⁵³ Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jílgubei.

⁵⁴ Ligía ába lubeí meíbugunjaali lan Jesúsu furáangu jádan juríu, ába láfuridun Judéagiñe, ába lídin lídoun ában fulásu gíríti Efraín, yaráfa lun fulásu mageirawati. Ába leréderun ní jáma lání disípulugu.

⁵⁵ Yaráfaaliti jafédun juríu le gíríbeí páscua, sarágu jáña güri-gia n̄údün Jerusalén lun jadúgüni igáburi le lánina jarúmadun lubáragiñe fédu ligía. ⁵⁶ Jáluajañeinti Jesúsu, dánti le témpulurugüñanu lan, ába jálügüdján jámagua.

—¿Ca jaríñagubei? ¿Liábinba lídan fédu, ódi miábinbei?

⁵⁷ Rújañati fariséogu jáma jábutigu fádírigo dimúrei lun le lan asúbudíruti jalfañein lan Jesúsu, lun lan laríñaguni, barú jamámugei adáüra.

12

Tájurudaguni ában wúri lugúdi Jesúsu

(Mt 26.6-13; Mr 14.3-9)

¹ Sísi wéyu lubáragiñe páscua, ába lídin Jesúsu Betánia, le ní lubei lagánawa Lázaro le lásaaragüdübei jádaangiñe jílaaña lúnya labágaridun. ² Ába jadúgün ában adíneruni ní luágu lání fuleísei, Márta, tugúya éjeeraguboun, Lázaro ában jádaangiñe ja n̄ünbaña luágu dábula lúma Jesúsu. ³ Ábati tanúgün María ában paénti ibíñei le séruti, ába tájurudaguni lugúdi Jesúsu láu, ába tarágajani láu tídíburi, ába lejémougadun ibíñei ligía sun ní múnada. ⁴ Ába laríñagun Júdas Iscarióte, le liráu Simón, ában jádaangiñe lání Jesúsu disípulugu, le méme lúnbei lalúguruni.

⁵ —¿Ánsan malúgurún lubeí ibíñei le luágu úrúwa-san fiádürü lun jíderawagún gudémetiña?

⁶ Laríñagunbei Júdas ítara, máma luágu berése lan jáu gudémetiña, laríñagunbei ítara ladúga jíweru lan, áni queíti ligía lan gámabarun lágei seínsu, ábaja líwerujan lídaangiñe le íchugübei tídoun. ⁷ Ábati laríñagun Jesúsu lun.

—Ígírabouñ, taráanseruñadina lubá lachúlürün luwéyuri nábuñuniwa. ⁸ Súnwandan níbaña lan gudémetiña jídan, ánjeinti áu, mámba súnwandan júma nan.

Elédeguni lubá Lázaro

⁹ Ába jasúbudiruni sarágu jádaangiñe juríu luágu níjein lan Jesúsu Betánia, ába jóúdin ní, mámarügü lun jaríjini, lun giñe jaríjini Lázaro le lásaaragüdübei Jesúsu jádaangiñe jílaaña.

¹⁰ Ába giñéti juáradun jábutigu fádírigo lídan ában lun giñe jáfaruni Lázaro, ¹¹ ladúga sarágu jáña lan juríu adíseduntiña jawéi lun jafíñerun luágu Jesúsu, lídaangiñeti Lázaro.

*Lebélorun Jesúsu ubúrugun Jerusalén
(Mt 21.1-11; Mr 11.1-11; Lc 19.28-40)*

¹² Sarágu jáña gürígia ñúdüntiña Jerusalén lubá fédu le páscua, larúgan, ába jasúbudiruni luágu lachúlürüba lan Jesúsu ñíjin ubúrugun. ¹³ Ábati játújan tubána fáluma, ába jáfuridun lubároun Jesúsu agúarajeina.

—¡Uweiriguni lun Búngiu! ¡Biníwati le ñúbinbei lídan líri Wabúreme! ¡Biníwati lurúeite Israéi!

¹⁴ Ába ladárirun Jesúsu ában burígü, ába laweínruni quei laríñagun tídan Lerérun Búngiu.

¹⁵ Manúfudebá, ubúrgu le Sión, níten burúeite waríñu luágu ában burígü.

¹⁶ Úati yebe gunfaráanda jamáni láni disípulugu cátei le wéyu ligía, lárigiñe, dan le belújali Jesúsu lídoun luweirigun yágüta siélu, ába jarítangun luágu büürüwa lan sun cátei le luágu, áni ftara líña lan lasúseredun lun.

¹⁷ Ja gürígia ja ñíbaña dan le lagúarun Jesúsu lun Lázaro lídaangiñe lumúaja, ába lásaaragüdüni lídaangiñe ouweni, abájüdagua jamúti le jaríjubei. ¹⁸ Ligía lébubei jáfuridun gürígia erésibirei Jesúsu, ladúga jagáambun luágu miláguru le ladúgübei. ¹⁹ Ábati jaríñagun fariséogu jámagua.

—Arija jumáli luágu, siña lan ladügúniwa ni cáta, sun gürígia añágüran lúma.

Jáluajani güriégu Jesúsu

²⁰ Níñanu güriégu jádan gürígia ja ñúdünbaña Jerusalén lun jájuduragun lun Búngiu, ²¹ ába jayábin güriégu jagía lúmoun Felípe, le Betsáidana, ñi Galiléa, ába jaríñagun lun.

—Buséntiwa waríjini Jesúsu.

²² Ába lídin Felípe, ába laríñaguni lun Andrés, ába jóúdin biángubei jagía abájüdaguei lun Jesúsu. ²³ Ábati laríñagun Jesúsu joun.

—Chúlúja óra lun líchugúniwa uweiriguni nun, áu le Wügúri Garaúwarügüti. ²⁴ Ninártün jáu luágu ánjein lan máburujan ában lágu türígu múarugun lun loúnwen, ában mémebei águu, ánjein ouwe, lalúbajouba sarágu lídaangiñe. ²⁵ Le jínsiñejabuti lun libágari, lefériDIRUBEI, ánjein le meberesenti láu libágari lídan ubou le, lareídubei lubá ibágari le magúmuchaditi, siélu. ²⁶ Le busénti lesériwidunina, lúnti lafálarunina, áni le ñí numuti, ñíbei giñe le esériwidubalina. Le esériwidutina, líchuguba Núguchi uweiriguni lun.

Ladímurejan Jesúsu luágu loúnwen

²⁷ ‘Níjein ában ouúnwenbun líbe samínaü nuágu guetó. ¿Cábasan naríñaga? ¿Naríñaga funa. “Núguchi, sálba bána lídaangiñe le lúnbei lasúseredun nun guetó?” Uá, lun líra níábin. ²⁸ Núguchi, iñurúalá bíri nídaangiñe.

Ábati lagaambúniwa ában umálali siélugiñe le aríñagubei.

—Iñúra náali níri bídaangiñe, áni niñúrúyabei.

²⁹ Ábati jaríñagun gürígia ja ñíbaña agáambaja luágu wayújururu lan, jíbiri aríñaga.

—Ában ánjeli adímurejabei lun.

³⁰ Ábati laríñagun Jesúsu joun.

—Mámatia luágu nufúleisein lagaambúa umálali le, luágu jufúleisein. ³¹ Niján dan ligía lun lagúserawagüdüñ ubou, áni guetóba lefériDIRI Máfia, le agúmadijabei lídan ubou le, lubáfu. ³² Dánmeti le niñurúniwa múarugugiñe, nanúgübaña sùngubei númoun.

³³ Láu líra laríñaguñein luágu louweba lan luágu ában gurúwa. ³⁴ Ába jaríñagun gürígia lun.

—Agáambaadiwa lalijóun tídan walíburun to lánina lilúrudun Moisés luágu labágariduba lan Crístu lun sun dan. ¿Ída líñati baríñagunbei luágu liñurúaba lan Wügúri Garaúwarügüti? ¿Cáteigi Wügúri Garaúwarügüti ligía?

³⁵ Ábati laríñagun Jesúsu joun.

—Níchiga mémebei larúgounga jun luágurügü murúsun dan. Eǎbuga jumá lídan larúgounga ligía sun anájagua lan júma lun gayáraabei lan jachúlürün le ñijin lubei jabúseera jachúlürün, márügüdün lámugaün lubúriga, ladúga le eǎbuguti lídan lubúriga, ibídiñeti lun jalíñouñein lan. ³⁶ Afñi jumá lubeiti nuágu sun anájagua lan júma lun lirájüñü jumá larúgounga.

Lárigiñe laríñaguni Jesúsu sún buri cátei le, ába lídin, ába larámudagun jaweí.

Lébuna mafñen jamá juríu luágu Jesúsu

³⁷ Láu sun adúga lan Jesúsu sarágu miláguru jagíbugiñe, mafñetiña luágu. ³⁸ Láu líra jagúnfulirei le laríñagubei proféta Isafas.

¿Cásan afñerubei luágu wáni ugánu?

¿Ca un larúfudei Wabúreme Búngiu lubáfu?

³⁹ Quei mafñerun jabeí, ába lasúseredun le ámu dimúrei le laríñagubei Isaías tídan labúrjan, joun.

⁴⁰ Darú lumuti Búngiu jarjín, derégüda loun janígi,

lun marjín jamá láu jágu,

úame gunfaráanda jamá,

mayábin jagíame nun lun nareídaguagüdüniña.

⁴¹ Laríñagunbalin Isaías le luágu Jesúsu ladúga aríja láali lan luweírigin.

⁴² Láu sun líra, sarágu jáña jádaangiñe juríu afñerutiña luágu Jesúsu ásta jádaangiñe ábutigu, áni maríñagun jamúti bougudi, le janúfude jaweí fariséogu, lueí jabúguniña tídaangiñe jalígilisin. ⁴³ Ladúga gúndaatimaatiña láu inébesi le jíchugubei güriña sűgü láu le líchugubei Búngiu.

Lagúseragüdübaña dimúrei buri le laríñagubei Jesúsu güriña

⁴⁴ Ába laríñagun Jesúsu láu umálali jéreti.

—Le afñeti nuágu, máma rűgüñein nuágu lafñera, afñeti gíñe luágu Nűguchi le ouñajabalina. ⁴⁵ Le gíñe arjítina, larjijñein gíñe le ouñajabalina. ⁴⁶ Áu lámpubei, niábinbei ubouagun lun sun lan ja afñetiña nuágu, merédera jamámuga lídan lubúriga. ⁴⁷ Anjein le agáambuti nererun áni madűgüñti gásu láu, máma áu asiádirubalin, ladúga máma niábiña lun nasiádiruniña güriña ubouagu, niábiña asálbaraña. ⁴⁸ Le mebéresenti náu, madűgün ligía gásu láu nererun, njein lúnti lasiádiruni. dimúrei buri le aríñaga náalibe, ligíaba asiádirei lídaanme lagúmujoún wéyu. ⁴⁹ Ladúga madímurejaantina luágu náni nűngua, Nűguchi le ouñajabalina, ligía aríñagubalin le lúnbei naríñaguni nun lúma le lúnbei narúfudajani. ⁵⁰ Áni subúdi numúti luágu barú lan lugúmadin Nűguchi ibágari magúmuchaditi joun ja adűgübalin le lubeíbei. Le lubeíti naríñagubei, naríñaguni quei laríñaguni Nűguchi nun.

13

Lachíbuni Jesúsu jagúdi láni disípulugu

¹ Ábanrűgaali wéyu lubá fédu le páscua. Subúdi láali Jesúsu luágu chülúja lan óra lun lígiruni ubou le lun lídin lúmoun Lűguchi. Súnwandan meja jínsiñe jamá lánigu ja ubouagubaña lun, guetó larúfuduñeinti línsiñejabu lídan luweírín-ágei.

²⁻⁴ Dálaalíti Máfia larítagnun tídoun lanígi Júdas Isarióte lun ledéreggeruni Jesúsu joun láganiñu. Jesúsu, láu sun subúdi láni luágu lúmagiñe lan Búngiu liábin, luágu lúmounba lan gíñe Búngiu lagíríbuda, luágu gíñe rűlaali lan Úguchili sun cátei lűjaburugun, ába larúfuduni luweírín-ágei únabuni le luágubei. Dan lubeiti jadíneruña lan, ába lásaarun luegiñe dábula, ába larágachunun gamísa to tigíbuaguboun ladáuragun, ába lagúrín ában tuáya liránaagua. ⁵ Ába líchugun dúna lídoun ában dabárasa, ába lachíbuni jagúdi disípulugu, ába larágachuni táu tuáya to liránaaguaboun.

⁶ Dán yebe le lachíbaali lan lugúdi Simón Pédro, ába laríñagun lun.

—Nabúreme, ¿bachíbaalisán nugúdi?

⁷ Ába laríñagun Jesúsu lun.

—Guetó, úati gunfaráanda báni le nadúgübei, gunfaráanda bubeí larígiñe.

⁸ Ába laríñagun Pédro lun.

—¡Machíbun bubeí nugúdi!

Laríñaga Jesúsu lun.

—Ánjein machíbun nan bugúdi, siñábei gafánran ban núma.

⁹ Ába laríñagun Simón Pédro lun.

—Mámarügüla nugúdi bachíba, chibábei giñe nújabu lúma nigíbu.

¹⁰ Laríñaga Jesúsu lun.

—Le sun liñábei lágoun, lugúdi rügüñein abúseera lachibúniwa, ladúga jarúmati líbiri lúgubu. Jugúya, jarúmatün, mámarügü líña sun jugúya.

¹¹ Le laríñagunbei luágu máma lan sun jagía jarúmatiña, ladúga subúdi láni cába lan edéregerei.

¹² Lásun lachíbuni Jesúsu jagúdi, ábaya ladáürunun gamísa to larágachuboun, ábaya lañúurun luágu dábula, ába laríñagun joun.

—¿Gunfaráanda jumútisan le nadúgübei jun? ¹³ Jugúya agúajatün nun Maésturu, lúma Nabúreme, áni richátün ladúga áu ligía, ¹⁴ ánjeinti chibá nubálin jugúdi láu sun Jumáesturun nan áni Jabúreme, lúnti giñe jachíbuni jugúdi júmagua. ¹⁵ Rújadina ában jémpulu jun lun jadúgüni líbe méme le nadúgübei. ¹⁶ Ninárün jáu luágu míñugun lan ni ában músu lueí liyúbudiri, ni ában le óunajoúti lueí le óunajabalin. ¹⁷ Ánjein gunfaráanda jumá buri cátei le áni adúga jumeíme, gúndaabadün.

¹⁸ Mámátia nadímurejaña juágu sun jugúya, subúdi numútiña cátaña lan nanúadirubaña lun nánigume le tímatisaati. Áni lúnti lagúnfulirún le tídaanbei Lerérun Búngiu. “Garábagua le eígubei núma, nuágun.” ¹⁹ Naríñaguñein le jun lubáragiñe lasúseredun, lun dánme lan le lasúseredun, afñe jumámuga luágu áu lan Cristubei. ²⁰ Ninárün jáu luágu le lan erésibiruti le noúnajan, resíbi lumútiña giñe, áni le erésibirutina, resíbi lumúti giñe le óunajabalina.

Ladímurejani Jesúsu luágu ledéregereubei lan Júdas

(Mt 26.20-25; Mr 14.17-21; Lc 22.21-23)

²¹ Lásun laríñaguni Jesúsu sun cátei le, ába lasándirun sarágu íruni tídan lanígi, ába laríñagun furáangu.

—Ninárün jáu luágu ledéregereubadina lan ában jídaangiñe.

²² Ábati jagúmeserun disípulugu ariagua jawoúguoún, ibidíñounga joun ca lan jádaangiñe uágubei ladímureja Jesúsu. ²³ Áu Juan, le abúrújabarun gárada to, ában jádaangiñe disípulugu, le weírabei ínsiñe lun Jesúsu, loúbagiñeñadína lídan adíneruni, ²⁴ ába ladúgün Simón Pédro seíni nun lun nálügüdüni Jesúsu ca lan jádaangiñe uágubei ladímureja. ²⁵ Ábati nayárafaduntima lun Jesúsu, ába naríñagun lun.

—Nabúreme, ¿cáteisán lúnbei ledéregereunibu?

²⁶ Ába laríñagun Jesúsu nun.

—Nadúdüragüda murúsun fein, le únti níchigoun, ligíaba edéregereana.

Ábati ladúdüragüdün murúsun fein, ába líchugunun lun Júdas Iscarióte, le liraú Simón.

²⁷ Quei lárügüdünun Júdas fein tugúya, ítara lebélorun Máfia tídoun lanígi. Ábati laríñagun Jesúsu lun.

—Le lúnbei badúgüni, adúgabei furése.

²⁸ Úati gunfaráanda láni ni ában jádaangiñe ja eígibaña luágu dábula ca lan uágu laríñagei Jesúsu líra lun. ²⁹ Quei Júdas lubeí táubei lágei seínsu, sun jaríñagun yebéti laríñaguña Jesúsu lun lun lagáñijani le jabúseerubei lubá fédu, o lun lan líchugun seínsu joun gudémetiña. ³⁰ Larígiñe leíginun Júdas fein, ába láfuridun. Gúñeeli óra ligía.

Iséri gumádi

³¹ Lárigiñe láfuridun Júdas, ába laríñagun Jesúsu.

—Larijúa nuweírigun, áu le Wügúri Garaúwarüğüti, guetó, arijúame luweírigun Úguchili nuágu. ³² Ánjeinti arúfuda nubálin luweírigun Búngiu, larúfudubei gíñe Búngiu nuweírigun, áni ladúgübei madíse. ³³ Nirájüñü, úaadináme júma sarágu dan. Jáluajabadina, le méme naríñagubei joun jurfu naríñagayaali jun guetó. Siñábei jídin le ñjinja lubeí nídin. ³⁴ Níchigaali iséri gumádi le jun. lun jínsiñegua jumá júngua. Ítara quei jínsiñe nun, lúnti gíñe jínsiñegua jumá júngua. ³⁵ Ánjaün jínsiñegua júngua, jasúbudirubei sun güriquia luágu náni jumá disípulugu.

Ladímurejani Jesúsu luágu leyéedaguba lan Pédro luágu

(Mt 26.31-35; Mr 14.27-31; Lc 22.31-34)

³⁶ Ába laríñagun Simón Pédro lun Jesúsu.

—¿Jalíñounbadibusan, Nabúreme?

Ába laríñagun Jesúsu lun.

—Siñáti bafálarunina le ñjinja badina lubeí guetó, lachúlürüba wéyu lun bafálarubadina lan.

³⁷ Laríñaga Pédro lun.

—¿Ca uágu siñá lubei nafálarunibu guetó? Aráanseedina lun níchuguni nibágari buágu.

³⁸ Laríñaga Jesúsu lun.

—¿Binárün luágu aráanse ban lun bíchuguni bibágari nuágu? Ninárün báu luágu beyéedaguba lan náu úrüwa weíyaasu lubáragiñe layúgurujan gáyu.

14

Jesúsu, ligía úmabei lun lúmoun Úguchili

¹ Merédera jumá láu líbe samínaü, afíñe méme jumá luágu Búngiu, afíñe méme jugúyame nuágu. ² Níjein sarágu ubáraü tídan lúban Núguchi lun jaganouñ güriquia ñi, lun jamúga máma lan ítara líña, aríñaga náali jamúga jun. Neíbuga lubeíti aráanseja ában ubáraü jubá. ³ Lárigiñeme nídin, aráanse neíme ubáraü ligía, ábame nagríbudunya lun nanúgünün númagua, lun ñi jumá le méme ñí numuti. ⁴ Subúdi jumúti jalíñounbadina lan, subúdi jumúti gíñe úma.

⁵ Laríñaga Tomás lun.

—Nabúreme, ibídiñeti woun jalíñounbadibu lan, ¿ída lubáti wasúbudiruni úma?

⁶ Laríñaga Jesúsu lun.

—Lun lachúlürüniwa lúmoun Búngiu, áu úmabei, áu inárüni, áu ibágari. Nueígiñe rügúñein gayára lan lachúlürüniwa lúmoun Búngiu Úguchili. ⁷ Lun jamúga subúdi nan jun buídu, subúdi jumúti jamúga gíñe Núguchi, subúdi jumáaliti lúmagiñe guetó, ladúga aríñañaja jumáali láu jarfjinina.

⁸ Laríñagati Felípe lun.

—Arúfudabeí Úguchili woun, buídurügaalime woun.

⁹ Laríñaga Jesúsu lun.

—Felípe, lújadina júma, ¿ibídiñegidina bun? Le aríjítina, laríjinein gíñe Búngiu Úguchili, ¿cáti uágu baríñaga nun lun narúfuduni Búngiu Úguchili jun? ¹⁰ ¿Mafíñetibusan luágu anájein lan lídan Búngiu Úguchili, níjein lan gíñe Búngiu Úguchili nídan? Lé buri cátei le naríñagubei jun, máma lan láu náni núngua naríñagei, Búngiu Úguchili le aganoubei nídan, ligía adúgübalin luwádigimari guánarü. ¹¹ Afíñe jumá nun luágu anájein lan lídan Búngiu Úguchili, áni lan níjein gíñe Búngiu Úguchili nídan, íbini luágurügü cátei lé buri nadúgübei, afíñe jumá nun. ¹² Ninárün jáu, luágu le lan afíñeti nuágu, ladúgübei lan cátei lé buri nadúgübei, ladúgüba buri cátei weínamutimaati, ladúga áu, neíbuga le ñjinja lubei

Núguchi. ¹³ Sun le jamúriajan lídan níri, nadúgübei, arúfuda námugei luweírigun Núguchi.

¹⁴ Nadúgübei furúmieguarügü cátei le jamúriajan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵ ‘Ánjein jínsiñe nubei jun, gúnfuli jumá láu le nubei bei, ¹⁶ ábame nayúmuragun lun Núguchi lun loúnajan ámu jun newéñegua lun líderagunün, lun gñe líchugun gurásu jun. Ligíaba Sífiri Sándu le subúdíjabúbei lun sun inárüni, júmabei súnwandan. ¹⁷ Ja lánigu ubou le, siñáti jerésibiruni Sífiri Sándu ligía, ladúga siñá lan jarjini ni jasúbudiruni, ánjein jugúya, subúdi jumáali, ladúga njein júma áni leréderuba jídan. ¹⁸ Mígirun nubádün jábugua, nagríbudayaba lun júma nan. ¹⁹ Málüjadina ánjana marjín jamá güri gía, ánjein jugúya, jarjúbadina, áni gabágaribadün ladúga wínwañu níña lan. ²⁰ Lárigiñeme liábin Sífiri Sándu lun júma lan lun sun dan, jasúbudirubei luágu anájein lan lídan Núguchi, jugúya nídan, áu gñe jídan. ²¹ Le subúdíjabuti lun nugúmadin áni úaragu ligía lúma, arúfuda lumúti luágu jínsiñe nan lun le tímatimaati. Áni jínsiñejabúbei Núguchi lun le jínsiñejabuti nun, jínsiñebei gñe nun, arúfudagua áume núngua lun.

²² Ába laríñagun Júdas (mámatia le Iscaríote).

—¿Cásan uágu barúfudaguba lubei búngua woun, máma joun güri gía ja lánigu ubou le?

²³ Laríñaga Jesúsu lun.

—Le jínsiñejabuti nun, adúgati gásu láu le nubei bei, áni línsiñeduba lun Núguchi, ábame wayábin, áu lúma Núguchi, agánawa lúma. ²⁴ Le mínsiñejabuti nun, madúgünti gásu láu le nubei bei. Dimúrei le naríñagubei, máma náni, láni Núguchi le oúnajabalina.

²⁵ ‘Naríñaguñein sun le jun láu anájagua lan júma, ²⁶ Sífiri Sándu le lúnbei loúnajani Núguchi lídan níri lun líderagunün, larúfudajaba jun, larítaguagüdúbadün gñe luágu sun le aríñaga náalibe jun.

²⁷ ‘Neíbuga júmagiñe, nígraaali ñurúguau júma—ában luwúyeri ñurúguau le áurügübei gayára lan níchiguni. Mítaraanti queisi ñurúguau le líchugubei ubou. Magíbedalá jisáminan, manúfude jugúyame. ²⁸ Agáamba jumáali naríñagun luágu neíbuga lan, áni nagríbudayaba lan lun júma nan, lun jamúga jínsiñe nan jun láu jinárün, gúndaatün jamúga láu jasúbudiruni luágu neíbuga lan lúmoun Núguchi, ladúga ligía íñugutimaati nueí. ²⁹ Ligía aríñaga gñe nubálin le jun, lun dánme lan lasúseredun, affñe jumámuga.

³⁰ ‘Madímurejaanjadina sarágu júma, ladúga níteeli le agúmadijabei lídan ubou le. Láu sun mabáfu lan nuágu, ³¹ línti ítara lúba lan lun lasúbudiruni ubou luágu jínsiñe lan Núguchi nun, áni adúga náni le lubei bei nun. Sarájuma, queímoun yágiñe.

15

Tídibu bei bei lúma tilímun

¹ Laríñaga Jesúsu.

—Ítara níña quei ában tídibu bei bei le tímatimaati, Núguchi, ítara líña quei le oúnigirubarun nádü. ² Chaún lumuti furúmieguarügü lídaangiñe nilímun le míinti, atírimuja lumúti le gñinbei, jarúmagüdaleí lúntima lagíndun. ³ Jugúya, jarúmaadün lárigi narúfudajan jun. ⁴ Lídan méme jumá ában núma quei lídaañadina lan ában júma. Ában límu siñáti lagíndun ánjein mámañein lubei luágu ídibu, ítara jíña gñe, siñáti jagíndun ánjein máma lubei badúleñu jíña nuágu.

⁵ ‘Áu ídibubei, jugúya límu. Le badúleñuti nuágu, badúleñu áu luágu, lagínduba gíbe, siñáti jadúgün ni cáta úouga áu. ⁶ Le merédeti badúleñu nuágu, lágurúba bougudin, ábame lamábeidun quef buri límu le abúdañebei lun lagudúniwa.

⁷ ‘Ánjaün asígira badúleñu nuágu, mabúlieidun jumeíme le narúfudajabei, gayáraabei jamúriajani le jabúserun, áni jibíjubei. ⁸ Ibíjati Núguchi inébesi dan le gíbe lan jagíndun, áni arúfuda jumúti luágu náni jumá dispulugu ja tímatimaatiña láu líra. ⁹ Jínsiñetün nun ítara quei nínsiñe lun Núguchi, ítara méme jumá lubeiti lídan ínsiñeni le nánibe jun.

¹⁰ Ánjaün nǎdün láu le nubeíbei, lídan mémebadün ínsiñeni le nánibeí jun, ítara quei nǎdin láu le lubeíbei Núguchi, áni lídan mémeñadina ínsiñeni le lánibeí nun.

¹¹ ‘Nadímurejánbei jun ítara lun gayára lan jasúbusiruni úgundani le níchugubei, le gumúti. ¹² Niján nugúmadinbei. lun jínsiñegua jumá júngua quei jínsiñe nun. ¹³ Luweíríngei ínsiñeni le gayáraabei gáni láni gürígia, lun líchuguni libágari jawágu lumádagu. ¹⁴ Numádagu jugúya, ánjein jadúga le nubeíbei. ¹⁵ Manúgün náadün quei músu, ladúga ibídiñeti le ladúgubei liyúbudiri músu lun, nanúgünün quei numádagu ladúga subúdigüda náali sun le laríñagubei Núguchi nun jun. ¹⁶ Máma jugúya anúadajabalina, áu anúadajabalün, áni rújadina dimúrei jun lun jagíndun gíbe, lun gíñe ladúrurun jin. Ítara lúba líchuguni Núguchi sun le jamúriañan lúma lídan níri jun. ¹⁷ Ítara líña lubeíti nugúmadin jun lun jínsiñegua jumá júngua.

Iyéreeguti Jesúsu jáu sun lánigu lun ubou

¹⁸ ‘Ánjaün iyéreeguda lun ubou, subúdi jumeí luágu áu lan iyéreegudubei lun furúmiñe. ¹⁹ Lun jamúga lánigu jumá ubou, jínsiñetün jamúga joun gürígia ja lánigu ubou quei jínsiñe jánigu joun. Anúadaja numútün jádaangiñe ja lánigu ubou, ligía jiyéreegunbei lun ubou ladúga mámaadün lan láni ubou. ²⁰ Jarítagua jumá luágu le naríñagubei jun. ‘Úati músu íñuguti lueí liyúbudiri.’ Ánjein ebaaja jamáadina lubeí, jeíbaajabadün gíñe, ánjein giñéti madúgün jabeí gásu láu narúfudajan, madúgünbaña gíñe gásu jáu. ²¹ Jadúgubei sun le jun, nueígiñe, ladúga ibídiñe lan le oúnajabalina joun.

²² ‘Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queísiti niábin joun, gadúnruntiña lubeíti luágu figou ligía. ²³ Ja iyéreejabuña nun, iyéreeguti gíñe Núguchi joun. ²⁴ Madúnruntiña jamúga lun jamúga madúgün nan ni cáta le úagili adúgüti jagánagua, guetó aríja jamáali buri cátei ligía áni láu sun líra iyéreegulidina joun, iyéreegu gíñe Núguchi joun. ²⁵ Wel, lasúseredunbei le ladúga lúnti lan lagúnfulirun dimúrei le búruwañubei lídan jalúrurun. ‘Ába niyéreegudun joun, mébunouga.’

²⁶ ‘Dánme liábin Sífiri Sándu le lúnbei líderagunün, Espíritu le lánina inárüni le lúnbei noúnajani luágu loúbadina Núguchi, ligíaba adímureja luágu náni fuleísei. ²⁷ Jugúya, jadímurejaba gíñe luágu náni fuleísei, ladúga númañadün lan lúmagiñe furúmiñeti dan.

16

¹ ‘Naríñaguñein buri cátei le jun lun mouñwen lan jafíñen nuágu. ² Jabúgagubadün tídaangiñe jalígilisin, wuríbabei dan jun daríme lun ánjaün lan láfaragua furúmierügü gürígia jilágubei, larítaguba luágu lesériwiduñein lan Búngiu láu líra. ³ Jadúgubei líra ladúga masúbudirun jamágili lan Núguchi, masúbudirun jamána. ⁴ Naríñaguñein le jun, lun dánme lan le lachúlürün dan ligía, lun jarítapun luágu aríñaga náali lán meja jun.

Le ladúgubei Sífiri Sándu

‘Maríñagun numúti meja le jun lúmagiñe binárü ladúga meja júmañadina lan, ⁵ ánjein guetó, neíbuga lúmoun le oúnajabalina. Málügüdüñ lumútina ni ában jídaangiñe jalíñounbadina lan, ⁶ jírurügütün luágu naríñaguni cátei lé buri jun. ⁷ Inárüni naríñagubei jun. buítimaati jun lun nǎdin, ladúga ánjana mídin, miábinbei Sífiri Sándu júmoun lun líderagunün, áni ánjana nǎdün, noúnajabei. ⁸ Dánme liábin, ladáriraguagüdübaña gürígia ja ubouagubaña jóungua luágu gafígoun jamá, luágu gíñe níjein lan ában úma le lánina úaran, luágu gíñe lagúseragüdübaña lan Búngiu. ⁹ Larúfudubei joun luágu gafígoun jamá láu mafíñen jamá nuágu, ¹⁰ lasúbudiragüdübei joun luágu úaragua nan, láu larúfuduni joun luágu nídiba lan le ñíjin lubeí Núguchi dánme le nígrunün. ¹¹ Líchuguba fe joun luágu lagúseragüdün Búngiu, ladúga agúseragüda láali Máfia, le agúmadijabei lídan ubou le.

¹² ‘Gíbegili lúnti naríñaguni jun, jásiñerubei gunfaráanda guetó. ¹³ Dánme liábin Sífiri Sándu le lánina inárüni, larúfudajabei sun inárüni jun, ladúga madímurejanbei luágu

láni lúngua, le lagáambubei, ligíaba laríñaga. Lasúbudiragüdübei cátei lé buri lúnbei lasúseredun jun. ¹⁴ Líchuguba inébesi nun, ladúga lerésibiruba lídaangiñe ninárün, ábame lasúbudiragüdüni jun. ¹⁵ Sun le lúmabei Núguchi, náni gíñe, ligía naríñagunbei luágu lerésibiruba lan Sífri Sándu lídaangiñe ninárün, ábame lasúbudiragüdüni jun.

Lasáansiraguba íruni lun ugúndanime

¹⁶ ‘Málüjadina, ánjana maríjin jumá, múrusunmeya dan lárigiñe, ábayame jaríjinina, ladúga neíbuga le ñíjin lubéi Núguchi.

¹⁷ Ábati jálügüdagun jádaangiñe láni disípulugu jámagua, ába jaríñagun.

—¿Cásan míni lan le? Laríñaga woun luágu málüjali lan ánjein maríjin wamá, múrusunya lánme dan lárigiñe, ábayame lan waríjini, ladúga leíbuga lan le ñíjin lubéi Núguchi. ¹⁸ ¿Ca míni lan láu “múrusun dan lárigiñe le”? Úati gunfaráanda wamáni ca lan uágu ladímureja.

¹⁹ Ába lasúbudiruni Jesúsu luágu busén jama jálügüdaguni, ába laríñagun joun.

—Aríñagatina jun luágu málüjadina lan ánjana maríjin jumá, múrusun lánme dan lárigiñe, ábaya lánme jaríjinina. ¿Ligía le uágubei jálügüdagua júmagua? ²⁰ Ninárün jáu luágu jayájuba lan, jírugua jugúyame, ánjanati güriñia ja láni ubou le, jagúndaaruba. Láu sun líra, íbini jíru jumá, lasáansiraguba jírun lun ugúndanime. ²¹ Dan le tagúriajan lan ában wúri, súfuritu ladúga chülúja lan lórate igári, lásun agúriajouaali lan irájü, maritagunjaru luágu igári, ladúga ugúndani le tasándirubei luágu agúriajaaru lan ában irájü ubouágu. ²² Ítara líña gíñe, jugúya jírutün guetó, naríjayabadün, ábamei tabuínchun janígi láu ugúndani, ában ugúndani le úati gayáraati lagídaruni juef.

²³ Lídaanme wéyu ligía, málügüdüñ jumádiname luágu ni cáta. Ninárün jáu luágu líchugubei lan Núguchi sun le jamúriajabei lídan níri lúma, jun. ²⁴ Chülú lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucristu, le ásiiragúbalin ubou

²⁵ Aríñaga náali buri cátei le jun láu jémpulu, ínítebei dan lun madímurejaanjadina lánme jun láu jémpulu, ábame nadímurejan furáangu jun luágu Búngiu Úguchili.

²⁶ Lídaanme wéyu ligía, jamúriajaba lúma lídan níri, maríñaguntina luágu nayúmuraguba lan lun Núguchi juágu, ²⁷ ladúga ligía guánarü jínsiñetün lun. Jínsiñetün lun ladúga jínsiñe nan jun, afíñeedün gíñe luágu lúmangiñe lan Búngiu niábin. ²⁸ Lúmangiñe Búngiu Úguchili náfurida, ába niábin lídoun ubou le, guetó nígiraali ubou le, neíbugaya lúmoun Núguchi.

²⁹ Ába jaríñagun láni disípulugu.

—Anáti guetó, badímurejaña furáangu, mayúsurunga jémpulu. ³⁰ Aríja wamáali guetó luágu subúdi lan sun cátei bun, mouñ lumuti bálügüdüñ luágu ni cáta ladúga subúdi báni jarítangun güriñia. Luágu líra wafíñera luágu lúmangiñe lan Búngiu biábin.

³¹ Ába laríñagun Jesúsu joun.

—¿Afíñeedüti guetó? ³² Iníteeli óra, áni guetó guetó, dánme le jachágaragun sun jugúya, cáda ában luágu loubadina, ábame jígirunina nábugua, láu sun máma lan nábugañadina ladúga níjein Núguchi núma. ³³ Naríñagunbalin sun le jun, lun jadárirun ñurúguau lídan jafíñerun nuágu. Jasúfuriruba ubouágu, ganígi jumá, ¡siríguwa náali ubou!

17

Layúmuragun Jesúsu jawágu láni disípulugu

¹ Lárigiñe laríñaguni Jesúsu sun cátei le, ába laríjin siélun, ába laríñagun.

—Núguchi, chülúja nidáani, rúba inébesi luágu Biraú, ru lámuga gíñe Biraú inébesi bun. ² Rújadibu ubáfu lun Biraú jawágu sun güriñia lun líchugun ibágari magúmuchaditi joun ja bíchugubaña lun. ³ Níjan lébunabei ibágari le magúmuchaditi, lun jasúbudirunibu

gürigia amúrü le Búngiu ábanrügüti, le inárüti, lúma lun jasúbudirunina, áu Jesucrístu le boúnajabei.

⁴Rújadina uweíriguni bun ya ubouágu, gumú nan gíne le uágubei boúnajana. ⁵Guetóti Núguchi, rúbei uweíriguni le méme méja nánibei nun biñúwarü lubáragiñe meja ñi lan ubouú.

⁶Subúdigüda náali joun ja baságarubaña lídaangiñe ubouú lun bíchuguniña nun, cátabu lan. Bánigu meja, ába bíchuguniña nun, ñúdüntiña láu le bubefbei. ⁷Guetó, subúdi jamáli luágu sun lan le bíchugubei nun búmagiñe lan liábin, ⁸rúnaali ugánu le bíchugubei nun joun áni resíbi jamúti, subúdi jamáli luágu inárüni lan luágu búmagiñe lan niábin, afíñeña gíne luágu amúrü lan oúnajabalina.

⁹Ayúmuraguatina bun jawágu, mayúmuraguntina jawágu lánigu ubouú, nayúmuragun jawágu ja bíchugubaña nun, ladúga báni jamá. ¹⁰Sun le náni, báni, le báni, náni, arijuáti nuweírigun jawágu.

¹¹‘Áu, merédeedina ubouágu, ánjein jagía, jeréderuba. Áu, neíbuga búmoun. Núguchi sánduti, toúnigi báña ja bíchugubaña nun láu bubáfu lueí jeíguadun, lun lídan jamá ában le tímatimaati quei áu búma. ¹²Dán meja le jáma nan ubouágu, toúnigi numútiña meja ja bíchugubaña nun láu bubáfu, meferidiruntina ni ában jádaangiñe lueídügü Júdas, lun lagúnfulirun le búruwañubei tídan Berérun.

¹³‘Guetó, neíbuga le ñíjin bubeí, luágu anájagua lan ubouágu aríñaga numúti buri cátei le lun jabuínchun láu ugúndani méme le nuágubei. ¹⁴Rúnaali berérun joun, ába jeyéeregudún lun ubouú, ladúga máma jamá lánigu ubouú ítara queísi máma lan lánigu ubouú áu. ¹⁵Mamúriajaantina búma lun baságaruniña ubouágu, namúriajan búma lun batouúnigiruniña lueí Máfia. ¹⁶Ítara quei máma lan lání ubouú áu, máma gíne lání ubouú jagía. ¹⁷Derégeguagüda báña jóungua bun, láu lubáfu berérun le inárütibeí. ¹⁸Quei boúnajanina jádoun lánigu ubouú láu ugánu lánina asálbaruni, ítara gíne nouúnajaniña jádoun lánigu ubouú láu ugánu ligía. ¹⁹Áni derégeguatina núngua bun jawágu, lun gíne jedéregeragun jóungua bun le tímatimaati.

²⁰‘Máma rügúñein jawágu namúriaja búma, amúriajatina gíne jawágu ja lúnbaña jaffínerun nuágu dánme le jagáambuni ugánu lánina asálbaruni jámagiñe. ²¹Amúriajatina búma lun lídan jamá ában sun jagía, lun ában méme jamá cátei wáma quei áu búma, amúrü núma, lun lídan jamá ában buídu buídu, lun laffínerun ubouú luágu boúnajan nan. ²²Rúnaali uweíriguni le méme bíchugubei nun joun, lun ában méme jamá cátei quei ában méme wamá cátei áu búma, ²³áú jádan, amúrü nídan, lun jayábin lun ában mémebaña lan buídu buídu, subúdi lámugei ubouú luágu boúnajan lan áu, áni jínsiñe jamá bun sarágu quei nísiñe bun.

²⁴‘Núguchi, amúrü íchugubaliña nun, buséntina lun númabaña lan le ñí numuti, lun jarfjini uweíriguni le bíchugubei nun, ladúga jínsiñegubeiñadina bun lubáragiñe ladügúniwa ubouú. ²⁵Núguchi richáguati, ibídiñetibu lun ubouú, subúditibu nun, subúdi jamáli gíne wügúriña ja luágu boúnajan lan áu. ²⁶Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun gíne ñi nan já dan.

18

Janúgüni Jesúsu adáura

(Mt 26.47-56; Mr 14.43-50; Lc 22.47-53)

¹Lárigiñe laríñaguni Jesúsu cátei le, ába láfuridun jáu lání disípulugu lun jóúdin loubáfurugun dúna le cedrón. Níñein ában fulásu lé buri ñí lumuti tídibu olívos, ñíjin lubeí lebélura Jesúsu jáu lání disípulugu. ²Subúdi lumúti gíne Júdas le alúgurubalin Jesúsu, fulásu ligía, ladúga oúndaraguañajaali Jesúsu ñi jáma lání disípulugu. ³Ába lubeíti lachúlrün Júdas ñíjin jáu sarágu súdaara jáma polisía ja tánina témpulu, jóúnajan

jábutigu fádírígu jáma fariséogu. Gárumatetiña, barútiña gíñe lámpu lúma tóchi. ⁴Quei subúdi láali lan Jesúsu le lúnbei lasúseredun lun, ába láfuridun, ába laríñagun joun.

—¿Ca jáluajabei?

⁵Ába jaríñagun lun.

—Wáluajañein Jesúsu le Nazarétna.

Laríñaga Jesúsu joun.

—Áu Jesúsu ligía le jáluajabei.

Ñíñeinti Júdas le edéregerubalin jáma. ⁶Dan laríñagunbei Jesúsu joun luágu ligía lan le jáluajabei, ába jeíguadunga múarugún janagóun. ⁷Ábaya laríñagun Jesúsu joun.

—¿Ca jáluajabei?

Ába jaríñagun lun.

—Wáluajañein Jesúsu le Nazarétna.

⁸Ábati laríñagun Jesúsu joun.

—Aríñagaadinatia jun luágu áu lan. Ánjein áu lubei jáluajabei, ígira jumáña ja lun jóudin.

⁹Lasúseredunbei líra lun lagúnfulirun le laríñagubei Jesúsu guánarügü. “Mefédirirúnti ni ában jádaangiñe ja líchugubaña Nóguchi nun.” ¹⁰Ábati laságarunun Simón Pédro lefeínte, ába líbuguni larígei ában lumúsun fádíri le íñutimaabei gírítí Málco. ¹¹Ába laríñagun Jesúsu lun Pédro.

—Dáboun befeínte tárigoún. ¿Jarítaguatibu funági luágu moun lan nasúfuriruni óuchawagúni le líchugubei Nóguchi lun nasúfuriruni?

Jesúsu ligíbugiñe fádíri le íñutimaabei

(Mt 26.57-58; Mr 14.53-54; Lc 22.54)

¹²Ábati janúgüni súaara, lúma gumándan, jáma japolisían juríu, Jesúsu adáüra, ába jagúrugini. ¹³Lárigiñe, ába janúgüni líbiñoun Anás. Anás ligía limédamurubei Gáifasi, fádíri le íñutimaabei lídan irúmu ligía. ¹⁴Gáifasi ligía, le méme meja aríñagubei joun juríu luágu buítima lan joun lun louñwen ában wügúri jawágu sun mútu.

Leyéedagun Pédro luágu subúdi láni Jesúsu

(Mt 26.69-70; Mr 14.66-68; Lc 22.55-57)

¹⁵Ába wóudin, áu Juan lúma Simón Pédro, lárígi lárígi Jesúsu. Áu, subúditina lun fádíri le íñutimaabei, ábati nebelurun lúma Jesúsu lídoun tübúrürü líban fádíri, ¹⁶ánjeinti Pédro, ába leréderun bougudi luágu béna. Ligía náfuridunbei, ába nadímurejan túma to óunígirubalin béna, ába nebélaagüdüni Pédro. ¹⁷Ábati tálügüdüni óunígirutu béna Pédro.

—¿Ma bugúya ában jádaangiñe láni gürígia le díspulugu?

Laríñaga Pédro.

—Uá, máma áu.

¹⁸Queíti díliga lubei, fúguatiñati músu jáma polisia wátu, rára jañáti ñi abácharagua. Ñíñein gíñe Pédro jáma, abácharagua larígürügü wátu.

Lálügüdaguni fádíri le íñutimaabei Jesúsu

(Mt 26.59-66; Mr 14.55-64; Lc 22.66-71)

¹⁹Ába lagúmeserun fádíri le íñutimaabei álügüdaguei Jesúsu cátaña lan lánibaña díspulugu, cátei lan gíñe larífudajabei. ²⁰Laríñaga Jesúsu lun.

—Bougudi nadímureja ligíbugiñe sun ubóu, súnwandan narífudajan tídan liglísi lúma témpulurugu le ñí lubei jóundaragua sun juríu, madúgüngidina lubeíti ni cáta arámudaguati. ²¹¿Ca uágu bálügüdana? Álügüda báña ja agáambubalina, jagialá aríñagei le uágubei nadímureja joun. Subúdi jamúti le naríñagubei joun.

²²Dan laríñaguni Jesúsu cátei le, ába líabin ában jádaangiñe polisia ja tánina témpulu, ába lagáyuajan ligíbuagun, ába laríñagun lun.

—¿Ítara líba bouñabuni fádíri le íñutimaabei?

²³Laríñaga Jesúsu lun.

—Ánjein aríñaga nubei wuríbati, aríñagabef jalíañein lan luríban, ánjeinti buídu lubef le naríñagubei, ¿ca uágu bagáyuaja nuágu?

²⁴ Ábati louñajani Anás gürágu lun Gáifasi, fádiri le íñutimaabei lídan irúmu ligía.

Leyéedagunya Pédro luágu Jesúsu
(Mt 26.71-75; Mr 14.69-72; Lc 22.58-62)

²⁵ Sun dan le, nijágu Pédro abácharagua larúgürügü wátu, ába jaríñagun lun.

—¿Másan amúru ában jádaangiñe láni gürígia le dispulugu?

Ába leyéedagun Pédro, ába laríñagun.

—Uá, máma áu.

²⁶ Ábati lálügüdüni ában jádaangiñe lumúsuniña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ní lumuti tídibu olívos?

²⁷ Ábaya leyéedagun Pédro, lídan óra ligía, ába layúgurujan gáyu.

Jesúsu ligíbugiñe Piláto
(Mt 27.1-2, 11-14; Mr 15.1-5; Lc 23.1-5)

²⁸ Ábati janúgüni Jesúsu lúbiñegiñe Gáifasi lun lúbiñoun gumándan. Arúgadeina líñati, mebélutiñati juríu palásiurugún luef marúma jamá, siñáme gádan lániña adíneruni le lánina páscua. ²⁹ Ligía láfuridunbei Piláto lun ladímurejan jáma, ába laríñagun joun.

—¿Cásan lidúnrunbei gürígia le jurúma?

³⁰ Ába jaríñagun lun.

—Lun jamúga madúgün lan wuríbani, medéregerun wamúti jamúga bun.

³¹ Ábati laríñagun Piláto joun.

—Barújumei, agúseragüda jumei quei laríñaguni jílurudun guánaru.

Jaríñaga juríu lun.

—Wagía juríu, maríchatiwa lun wáfarun ni ában jilágubei.

³² Ítara líña lagúnfulirún le laríñagubei Jesúsu luágu ligáburi ída lúba lan louñwen.

³³ Ábaya lebélorun Piláto palásiurugun, ába lagúarun lun Jesúsu, ába laríñagun lun.

—¿Amúru Jarúeitebei Juríu?

³⁴ Ába laríñagun Jesúsu lun.

—¿Luágu báni búngua bálügüdaja luágu líra, ódi ladúga jaríñaguni ámu bun nuágu?

³⁵ Laríñaga Piláto lun.

—¿Juríu funági áu? Binásiñun jáma jábutigu fádorigu, jagía edéregerubalibu nun. ¿Cági bidúnrunbei?

³⁶ Ábati laríñagun Jesúsu lun.

—Narúeijan máma lánina ubou le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷ Ábati laríñagun Piláto lun.

—¿Urúei lubefi amúru?

Laríñaga Jesúsu lun.

—Urúei áu quei baríñaguni. Agúriajouatina, núbin áu lídoun ubou le lun naríñaguni le inárünibeí. Sun ja gagáambadibaña lun inárüni, agáamba jamúti le naríñagubei.

³⁸ Laríñaga Piláto lun.

—¿Cáteiti inárünibeí?

Lasíadirúniwa Jesúsu lun ouweni
(Mt 27.15-31; Mr 15.6-20; Lc 23.13-25)

Lárigiñe ladúgüni Piláto álügüdjani le, ábaya láfuridun adímureja jáma juríu, ába laríñagun joun.

—Madáritina ni murúsun dúru luágu wügúri le. ³⁹Quei jéchu jumá lun nígiragüdüni ában adaürúti jun lídan fédu le láni páscua, ¿buséntün lun náfuridagüdüni Jesúsu le jarúeitebei juríu?

⁴⁰Ábaya jagúaragun sun jagía.

—¡Mígiragüdebei le! ¡Barabáslá bígiragüda!

Barabási ligía, ában jíwer uti.

19

¹Ábati lanúgüni Piláto Jesúsu, ába loúnajan abeíchagüdei, ²ába jíchugun ában súdaara ába rídi láuti jíyu leréberugu Jesúsu, ába jadáüraguagüdüni táu ában anáanguni colóru gúchu. ³Ába jayárafadun lubádu dan méme aríñageina.

—¡Gabágarilá Jarúeite Juríu!

Ába jagáyuajan ligíbuagun.

⁴Ábayati láfuridun Piláto, ába laríñagun joun juríu.

—Naságaraali ñájoun lun jasúbudiruni luágu madári nan dúru luágu.

⁵Ába láfuridun Jesúsu láu rídi láuti jíyu lábulugu, táu lanáangun colóru gúchu. Ábati laríñagun Piláto joun.

—¡Niján wügúri ligía!

⁶Dan jaríjinbalin jábutigu fádirigu jáu sun polisía, ába jagúmeserun agúaraja.

—¡Dáguabeí luágu gurúwa! ¡Dáguabeí luágu gurúwa!

Laríñaga Piláto joun.

—Barújumeiti, dágua jumeí luágu gurúwa, ladúga áu, madáritina ni murúsun dúru luágu.

⁷Ába jaríñagun juríu lun.

—Wagía galúruduntiwa áni según walúrudun, lúnti loúnwen ladúga laríñagun luoúgua luágu Liraú lan Búngiu.

⁸Dan lagáambunbalin Piláto le, ábatima lanúfudedun. ⁹Ábaya lebéllurun palásiurugun, ába laríñagun lun Jesúsu.

—¿Jalíanasan amúrü?

Moúnabunti Jesúsu ni cáta.

¹⁰Ábati laríñagun Piláto lun.

—¿Moúnabun bumútina? ¿Ibídíñetisan bun luágu gabáfu nan lun nígiragüdüniibu, gabáfu áu lun nádaraguagüdüniibu luágu gurúwa?

¹¹Laríñaga Jesúsu lun.

—Úati jamúga ni murúsun ubáfu búma nuágu lun jamúga míchu láni Búngiu bun, ligía weírítima lubeí lidúnrun le edéregerubalina bun sügú báu.

¹²Lúmagiñe óra ligía, ába lálugun Piláto ída lúba lan lígiragüdüni Jesúsu. Ába jagúaragun juríu lun.

—¡Ánjein bígiragüda, máma amúrü lumáda urúei Rómana! ¡Furúmieguarügü le aríñaguti luoúgua luágu urúei lan, lágani urúei Rómana!

¹³Dan lagáambunbalin Piláto líra, ába loúnajan aságarei Jesúsu, ába lañúurun luágu jalaú le agúseragülei, ubáraü le únbei jaríñaga Dúbü, Gabáta lídan jerérun juríu. ¹⁴Quei buri amídirugujaali, le ában wéyu lubá páscua. Ábati laríñagun Piláto joun juríu.

—¡Niján jurúeite!

¹⁵Ába jagúaragun.

—¡Jilála! ¡Jilála! ¡Dáguabeí luágu gurúwa!

Laríñaga Piláto joun.

—¿Buséntün nádaraguni jurúeite luágu gurúwa?

Jaríñaga jábutigu fádirigu lun.

—Marúeitetiwa ámu lueí urúei Rómana.

¹⁶ Láu líra, aba ledéregeruni Piláto joun lun ládarawagún luágu gurúwa, ába janúgüni.

Ládarawagún Jesúsu luágu gurúwa
(Mt 27.32-44; Mr 15.21-32; Lc 23.26-43)

¹⁷ Ábati láfuridun Jesúsu barúinaaleí lugúruwan lun lídin lídoun fulásu le únbei jaríñaga Lufúlasun Lábu Ichúgü, Gólgota lídan jerérun juríu. ¹⁸ Ñi jádaraguei luágu gurúwa, dáguaga jagía bián wügúriña úara lúma, ában lueígiñe cáda louba. ¹⁹ Ába loúnajan Piláto íchigagüda ában abúrújóuni luágu gurúwa, laríñaga ñi. “Jesúsu Nazarétna, Jarúeite Juríu”. ²⁰ Sarágu jáña jádaangiñe juríu alíjati abúrújóuni ligía ladúga fulásu le ñi lubei jádaraguei Jesúsu luágu gurúwa, madíseti ubúrugugiñe, áni abúrújóuati abúrújóuni ligía lídan buri dimúrei hebreó, güriégu, lúma latín. ²¹ Ligía jaríñagunbei jábutigu jafádirin juríu lun Piláto.

—Mabúrüdabá ñi “Jarúeite Juríu”, búrúba “Le aríñagubei luágu Jarúeite lan Juríu.”

²² Ába laríñagun Piláto joun.

—Le búrúnaalfbei búrúnaalfbei, ítara lúba.

²³ Lárigiñe jádaraguni súdeara Jesúsu luágu gurúwa, ába janúgünun lanáangun, ába jadúgün gádürü fánreinti táu, ába fánreinti lun cáda súdeara. Ába gñe janúgünun lisímisin, quei májuchawagún tubeí, ában rügúñoun fiésu íñugiñe lun únabun, ²⁴ ába jaríñagun súdeara jámagua.

—Majeíridagua wamoun, ájurera wamá tuágu, aríja wamámuga cába lan agañiroun.

Ítara líña lagúnfulirun le taríñagubei Lerérun Búngiu. “Fánreingua jamútu nanáangun jádaangua, ájurera jagía tuágu nisímisin cába lan agañiroun.” Ítara líña lubeíti jadúgüni súdearagu.

²⁵ Nínoun lúguchu Jesúsu yaráfa lun gurúwa túma tamúlelua, María to lúmari Cléofas, túma María Magdaléna. ²⁶ Dan laríjinbarun Jesúsu lúguchu rára nubádu, áu le disípulu lé jínsiñebei lun sarágu, ába laríñagun tun lúguchu.

—Núguchu, nirán biraí.

²⁷ Ába laríñagun nun.

—Nurán búguchu.

Lúmagiñe óra ligía, ába nerésibirunun núbiñe.

Lounwen Jesúsu
(Mt 27.45-56; Mr 15.33-41; Lc 23.44-49)

²⁸ Lárigiñe sun cátei le, quei subúdi láni Jesúsu luágu gúnfulijali lan láu sun le lúnbei ladúgüni luágu wasálbarun, ába laríñagun, lun lagúnfulirún le taríñagubei Lerérun Búngiu.

—Mágürabujadina.

²⁹ Níñein ában fúdu táu diweín garújütu, ába jadúdüragüdün ában mudúsi tídan diweín tugúya, ába jíchuguni luágu ában wéwe, ába jíñüruni luágun liyúma. ³⁰ Ába látunun Jesúsu diweín garújütu tugúya, ába laríñagun.

—Gúnfulija sun cátei.

Ába larábachun ligíina, ába lounwen.

Límírni ában súdeara louba Jesúsu táu lefeínte

³¹ Wéyu ligía, ában wéyu lubá páscua, mabúseeruntiñati juríu lun leréderun jágubu güriquia luágu gurúwa lídan wéyu le eméraaguagülei, ladúga weíríti wéyu ligía. Ligía jamúriajaanbei lúma Piláto lun loúnajan ájalajei járuna ja dáwaguñubaña luágu gurúwa, lun gñe lagídarún jágubu ñígiñe. ³² Ábati jóúdin súdeara, ába jájalachuni lúruna furúmiñeti, jalá jameí lúruna le ában le dáwaguñubei luágu gurúwa úara lúma Jesúsu. ³³ Dan le jayárafadunbei lun Jesúsu, ába jaríjin luágu jíllali lan, ligía májalachun jamáali lubeí lúruna.

³⁴ Ába liábin ában súdeara, ába límírni Jesúsu loubawagun táu ában efeín, ába láfuridun jítaü lúma dúna ñígiñe. ³⁵ Áu Juan, le abúrújabalin le, ában le aríjubalin, áni aríñaga

numúti inárüni, subúdi numúti luágu aríñaga náni inárüni lun gíñe jaffínerun jugúya. ³⁶ Ladúga lasúseredunbei buri cátei le, lun lagúnfulirun le taríñagubei Lerérun Búngiu. “Májalachúnwabei ni ában ábuu luágu.” ³⁷ Aríñagati gíñe tídan Lerérun Búngiu. “Jaríjubei le jímragubei.”

Lábunajóun Jesúsu

(Mt 27.57-61; Mr 15.42-47; Lc 23.50-56)

³⁸ Lárigiñe sun cátei le, ñíñein ában wügúri Arimatéana, gíríti José, falá lumuti meja wügúri ligía Jesúsu, láu sun arámudaguarügü lan ladúga lanúfude jaweí juríu, ába lamúri-ajani lúgubu Jesúsu lúma Piláto. Ába líchuguni lun, ába lanúgüni José lúgubu Jesúsu. ³⁹ Ába gíñe liábin Nicodémo, lé meja ñúdüñbei ayánuja lúma Janúsú gúñoun, ába liábin láu sarágu ibíñei. ⁴⁰ Ábati janúgüni José lúma Nicodémo lúgubu Jesúsu, ába jóuburaguni táu gamísa to túaguatu láu ibíñei ligía segün jagáburu juríu lubá jábunajan. ⁴¹ Ñíñein ában fulúri-ágei lídan fulásu le ñí lubei jádaraguei Jesúsu luágu gurúwa, lídaanti fulásu ligía, ñíñein ában umúajaü iséri le mayúsurungili. ⁴² Ñíjin jíchigei lúgubu Jesúsu, ladúga yaráfa lan umúajaü ligía, ladúga gíñe agúñeeli lan, gumése wéyu le eméraguagülei.

20

Lásaarun Jesúsu lídaangiñe óuweni

(Mt 28.1-10; Mr 16.1-8; Lc 24.1-12)

¹ Wéyu dimáasu, lubá larúgan dan le búrigagili, ába tídin María Magdaléna aríjei umúajaü, dan tachúlürünbei ñi, úaali dúbú le lidaú umúajaü ñi. ² Ába tídin eíbaagueina le ñíjin wabéi áu lúma Simón Pédro, ába taríñagun woun.

—Baríjama Jesúsu lídaangiñe lumúaja, ibídiñeti woun jalía lan jíchigei.

³ Ábati wáfuridun, ába wóudin luágun umúajaü. ⁴ Úara wóudin biángubei wagía eíbaagueina, furésetina lueí Pédro, ába nachúlürün furúmiñe luágu umúajaü. ⁵ Ába nélemuchun aríja ñíjin, gamísa rügúñoun naríja ñi, mebélutina. ⁶ Lárigiñe, ába lachúlürün Simón Pédro, ába lebéllurun lídoun umúajaü. Gamísa to aúboun lagúrawagua Jesúsu, tugúya rügúñoun gíñe laríja ñi. ⁷ Gamísati to áboun loubarawagúa lichúgü Jesúsu, máma lídaañoun ában túma tó buri áboun lagúrawagúa, jóuburagu tíña, tábugua. ⁸ Ába gíñeti nebéllurun, ába naríjini le asúseredubei, ába nafínerun luágu saráli lan Jesúsu lídaangiñe óuweni. ⁹ Ligíaaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe óuweni. ¹⁰ Ábati wagíribudun wábiñoun.

Larífudagun Jesúsu lúngua tun María Magdaléna

(Mr 16.9-11)

¹¹ Ánjounti María, ába teréderun bougudi ayájuaja lubádu umúajaü. Sun nuján lan ayájua, ába télemuchun aríja lídoun umúajaü, ¹² ába taríjin bián ánjeligu, jarútu jadáuragun, ñun le ñí lubei buga lúgubu Jesúsu, ában lichúgügiñe, ában lugúdiñe. ¹³ Ába jaríñagun ánjeligu jagía tun.

—¿Ca uágu bayájua?

Taríñaga joun.

—Baríjama Nabúreme, ibídiñeti nun jalía lan jíchigei.

¹⁴ Quei taríñagun ítara, ába tadígiragun, ába taríjini Jesúsu, niján lan ñi, ibídiñeti tun luágu ligía lan. ¹⁵ Ábati laríñagun Jesúsu tun.

—¿Ca uágu bayájua? ¿Ca báluajabei?

Sun taríñaguti le oúnigirubalin fulúri-ágei adímurejabei tun, ába taríñagun lun.

—Ánjein banúgün lubeí, aríñagabei nun jalía lan bíchigei, barú námugei.

¹⁶ Ábati laríñagun Jesúsu tun.

—¡María!

Ába tagáraragun, ába taríñagun lun lídan jerérun juríu.

—¡Rabóni! —míni lan líra, Maésturu.

¹⁷ Laríñaga Jesúsu tun.

—Márügüdabá nuágu, ladúga maweínrungidina le ñíjin lubeí Núguchi. Beſba, baríñagame joun náni disípulugu luágu neſbuga lan le ñíjin lubeí Núguchi, le gíñe Júguchi, Nubúngiute le gíñe Jubúngiute.

¹⁸ Ábati tídin María Magdaléna awísaraña disípulugu luágu aríja táali lan Jesúsu, áni aríñaga láni buri cátele le tun lun taríñaguni joun.

Larúfudagun Jesúsu lúngua joun disípulugu

(Mt 28.16-20; Mr 16.14-18; Lc 24.36-49)

¹⁹ Wéyu méme ligía gúñoun, oúndaragu jáña disípulugu, darúgu béna jáu ladúga janúfude jaweí juríu. Ába lebelurun Jesúsu, ába laráramun jamídaangua, ába labúsurun joun ítara.

—Níjeinlá darángilau jídan.

²⁰ Lárigiñe laríñaguni líra, ába larúfuduni lújabu lúma louba joun. Ába jagúndaaragun disípulugu láu jaríjini Jesúsu. ²¹ Ábaya laríñagun Jesúsu joun.

—Níjeinlá darángilau jídan. Ítara quei loúnajanina Núguchi, ítara líña gíñe noúnajanün.

²² Ábati láfurun jawágun, ába laríñagun joun.

—Resibi jumeí Sífiri Sándu. ²³ Ánjein ferúduna jumá jafígoun ámu, ferúdnawaali, ánjein úa ferúduna jumáni, reídeijali, úouga ferúdnawa lan.

Laríjini Tomás Jesúsu lárigiñe lásaarun lídaangiñe ouwene

²⁴ Tomás, ában jádaangiñe dúusu disípulugu le únbei jaríñaga Mádou, úatiti jáma dan le líabinbei Jesúsu. ²⁵ Lárigiñe, ába jaríñagun ja jíbiri disípulugu lun.

—Aríja wamáali Wabúreme Jesúsu.

Ába laríñagun Tomás joun.

—Ánjein maríjin nan lárigi gürábu luágu lújabu, da neíme liraúraü nújabu lídoun júyu le lárigi gürábu, da nújabu lídoun louba, siñábei nafñerun.

²⁶ Wídü wéyu lárigiñe, oúndaragu jáñaya disípulugu tídan ában múna, ñíñeinti Tomás jáma dan ligía. Láu sun darúgu líña lan béna jáu, ába lebelurun Jesúsu, ába laráramun jamídaangua, ába labúsurun joun ítara.

—Níjeinlá darángilau jídan.

²⁷ Ába laríñagun lun Tomás.

—Dábei liraúraü bújabu ñájoun, aríja beíme nújabu, da beíme bújabu lídoun noúba. Masígirabá láu liloúguan affñeni, affñebá luágu áu lan.

²⁸ Ábati laríñagun Tomás.

—¡Nabúreme, Nubúngiute gíñe!

²⁹ Laríñaga Jesúsu lun.

—Tomás, affñeedibu guetó, ladúga aríja báadina lan, gúndaatiña ja affñerubaña, maríjinga jamána.

Ca lan lébubei tabúrijoún líburu to

³⁰ Adúgayati Jesúsu ámu sarágu miláguru jagíbugiñe láni disípulugu, le úabei búríñu tídan líburu to. ³¹ Labúrúrdúnbei buri le lun jaffñerun luágu Jesúsu lan Crístubei, le Liraú Búngiu, lun gíñe láu lan jaffñerun, gabágarí jumá queísi lánigu.

21

Larúfudagun Jesúsu lúngua joun sédü jádaangiñe láni disípulugu

¹ Lárigiñe, ábaya larúfudagun Jesúsu lúngua joun láni disípulugu láru dúna le gíríbe Tibérias. Niján ligáburi ladúgüni. ² Lídaañanu ában Simón Pédro, Tomás le únbei jaríñaga Mádou, Natanaél, le lílana Caná le láni Galiléa, lirájüñü Zebedéo, jámaya bián jádaangiñe láni Jesúsu disípulugu. ³ Ába laríñagun Simón Pédro joun.

—Neíbuga esénija.

Ába jaríñagun lun.

—Weíbuga gíñe búma.

Ába jádinun tídoun jagúne, ába jóúdin, mañúguntiña ni cáta áriebu ligía. ⁴ Dan le arúgadeina lan, ába jaríjini Jesúsu ñi láru dúna, ibídiñetí yebe joun disípulugu luágu Jesúsu lan. ⁵ Ábati laríñagun joun.

—Numádagu, ¿mañúgungidünsan?

Jaríñaga lun.

—Ni cáta.

⁶ Ábati laríñagun Jesúsu joun.

—Fíjuma luegiñe toúnwenren ibíti ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jíbe úduraü tídan.

⁷ Ábati naríñagun, aú Juan, lun Pédro.

—Jesúsutia le!

Quei lagáambun Simón Pédro luágu Jesúsu lan, ába ladáürunun lanáangun, ába lachúbarun dúnarugun. ⁸ Ja jíbiri disípulugu, ába jóúdin lárún béya táu ugúnein, adúrujeina jamóun séni buin jáu úduraü, quei ában rügúñein lan san bádun jadíse luefí béya. ⁹ Dan le jarárirun múarugun, ába jadárirun wátu gemetí láu eñéguraü, láu ában úduraü ligíbuagu túma fein. ¹⁰ Ába laríñagun Jesúsu joun.

—Baríjuma fíu jádaangiñe úduraü ja sun liñábei jañúguniña.

¹¹ Ába ládinun Simón Pédro tídoun ugúnein, ába ladúrujanun séni lárún béya buin jáu úduraü weínamutiña, san dimí-san úrwañanu, láu sun jíbe, majeíridaguntu séni. ¹² Ábati laríñagun Jesúsu joun.

—Jigóugu, játa bacháti.

Úati ni ában jádaangiñe disípulugu álügüdüti cátei lan, ladúga subúdi jamáni luágu Jesúsu lan. ¹³ Ába liábin, ába lanügünun fein lújaburugu, ába líchugunun joun, ligía méme ladúga láu úduraü.

¹⁴ Ligía lúrwun larúfudagun Jesúsu lúngua joun láni disípulugu lárigi lásaarun lí-daangiñe ouweni lúnya labágaridun.

Ladímurejan Jesúsu lúma Simón Pédro

¹⁵ Lárigiñe játun bacháti, ába laríñagun Jesúsu lun Simón Pédro.

—Simón, Liraü Jonás, ¿jínsiñetinasan bun sügú jáu ja?

Laríñaga Pédro lun.

—Ánja, Nabúreme, subúdi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queisi ában jóúniri mudún buíti.

¹⁶ Ábaya lálügüdüni luágu libíaman weíyaasu.

—Simón, liraü Jonás, ¿jínsiñetinasan bun le tímatimaati?

Laríñaga Pédro lun.

—Ánja, Nabúreme, subúdi bun luágu jínsiñe ban nun.

Laríñaga lun.

—Toúnigi báñati nánigu.

¹⁷ Ábaya lálügüdüni luágu lúrwun weíyaasu.

—Simón, liraü Jonás, ¿jínsiñetinasan bun?

Ába lírudagun Pédro ladúga lálügüdüni Jesúsu luágu lúrwun weíyaasu ánjein jínsiñe luefí lun, ába laríñagun lun.

—Nabúreme, subúsi bun cátei bun. Subúsi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jouniri mudún buíti. ¹⁸ Ninárün báu, luágu dan lán meja nńúraütimagidibu, ábaja badáüragun, ába bídin le nńjin lumúti babúseera, dánme le wefyaadibu, inńurarügübalime barúna, ábame ladáüraguagüdünibu ámu, ábame lanúgünibu le nńjin lumúti mabúseerun ban bídin.

¹⁹ Láu laríñaguni Jesúsu cátei le, lasúbudiragüdüñein ída lúba lan ligáburi louñwen Pédro, lun líchugun uweíriguni lun Búngiu láu. Lárigiñe, ába laríñagun lun.

—¡Falábana!

Disípulu le jínsiñegubei

²⁰ Dan ladígiragúnbei Pédro, ába laríjinina, áu Juan, anángüran lan járigi, áu le jínsiñebei sarágu lun Jesúsu, le méme añúurubei loubagiñe Jesúsu lídan adíneruni, le gíñe álügüdübalin Jesúsu cába lan wádaangiñe edéregerei. ²¹ Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²² Laríñaga Jesúsu lun.

—Ánjana busén labágaridun daríme nagíribudun, ¿cámegei burúma? Amúrü, falábana.

²³ Ábati leíbaagun dimúrei jádan jíbiri lánigu Jesúsu luágu mouñwenbadina lán nege, maríñagunti Jesúsu luágu mouñwenbadina lan, aríñagarügüiti. “Ánjana busén labágaridun darí lúmoun nagíribudun, ¿cámegei burúma?”

²⁴ Áu méme disípulu le, le achoururubalin buri cátei le, abúrüja náaru gíñe gárada to jalíjaboun guetó. Áni subúdiwati luágu inárüni lan le naríñagubei.

²⁵ Níjein gíñe sarágu cátei ladúga Jesúsu, ánjein jamúga abúrüjóua ában ában, afñetina luágu mábara tan jamúga buri líburu to abúrüjóutu láu lídan sun uboú.

CÁTEI LÉ BURI MEJA JADÚGÜBEI APÓSTOLUGU

Louñajani Búngiu Sífiri Sándu

¹Lun teófilo.

Abürüjatina bun tídan furúmiñetu nigáradan luágu sun le ladúgübei Jesúsu, lúma le larúfudajabei, lúmagiñe dan le lagúmeserunbalin luwádigimari ²darí lúmoun wéyu le lamúdeirúnbei siélun. Lubáragiñebei lídin siélun, láu lubáfu Sífiri Sándu aríñaga lumúti cátei lé buri labúseerubei lun jadúgüni apóstolugu já meja lanúadajabaña, lárigiñe lídin jámagiñe. ³Lídan bián-wein wéyu le láubei ubouágu lárigiñe lásaarun lídaangiñe ouweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴Dán meja le njeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúругu Jerusalén, lariñaga joun.

—Agúrafa jumá lagúnfulirun dimúrei le líchugubei Núguchi jun, le uágubei nariñaga jun. ⁵Subúdi jumúti luágu badíseigüda lan Juan láu dúna, nasúbudiragüdúñe jun luágu máljadün lan giñe ánjaün badísei láu Sífiri Sándu.

Lamúdeirun Jesúsu siélun

⁶Dan le oundaragujaña lubei lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷Lariñaga Jesúsu joun.

—Sináti jasúbudiruni ídame lan o cába lan dan ladúgei Núguchi cátei le buri, ligía rügúñein gayára lariñagun ídame lan ladúgei. ⁸Ánjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun loubawagu Judéa, Samária, chülú lúmoun lidíse-ágei fulásu ubouágu.

⁹Lárigiñe lariñaguni Jesúsu cátei le, sun añája lan aríaguei, ába liñurúniwa lun lanügúniwa siélun, ába liábin ában juánriñu, ába ladáuragun láu, ába maríjin jamáali lan. ¹⁰Níñanu aríagua siélun sun amúdeireina lan Jesúsu, ligía jasálriragun bián wügúriña, jarútu jadáuragun jarúgabu, ¹¹ába jaríñagun joun.

—Wügúriña Galiléana, ¿ca uágu jerédera aríagua siélun? Jesúsu méme le, le amúdeirubei siélun júmagiñe, liábiyaba ítara quei jaríjin lídin.

Lanuadirún Matías lewéñeguame Júdas

¹²Ábati jagíribudun disípulugu lueígiñe wúbü le gíribei Olívos lun ubúrugun Jerusalén, lidíse ában kilómetro. ¹³Dan le jachúlürünbei ubúrugun, ába jamúdeirun tídoun rúmu to ní lubei jagánawa. Níñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraú Álfeo, Simón le lídaanbei adámurini le gíribei Cananista, lúma Júdas le lamúlen Jacóbo. ¹⁴Oúndaraguatiñaja sun jagía súnwandan lun jayúmuragun lun Búngiu jáma lamúlenu Jesúsu, túma María to lúguchu, jáma ja jíbiri würíña.

¹⁵Luágu ában wéyu lídan dan ligía, ába laráramun Pédro jagíbugiñe sun afíñetiña ja ñibaña—jawára san-wein güriña—ába laríñagun joun.

¹⁶—Nidújeñu, lúnti buga lagúnfulirun le lariñagubei Sífiri Sándu liyúmulugugiñe Davíd tídan Lerérun Búngiu, lídan le ladímurejánbei luágu Júdas, le adúndejabáliña ja anügúbalin Jesúsu adáúra. ¹⁷Ában meja jádaangiñe wánigu, Júdas, áni seríwiti lun Jesúsu úra wáma. ¹⁸Ába lídin, ába lagáñijan ában fulásu láu seínsu le afáyeirúbei lun luágu wuríbani le ladúgübei. Ába lábúrujan láu lábúluгу únabun, ába lafáünchün, ába láfuridun sun litíripan. ¹⁹Dan le jagáambunbalin güriña ja aganoúbaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jítaü.

²⁰Ába lasígirun Pédro aríñaga.

—Bürúwañu líña dimúrei buri le luágu Júdas tídan líburu to gírīboun Sálmos. Laríñajare ñi.

Reídeitá lúban málouga,
úa jamá aganoútiña tídan.
Aríñagati gíñe ñi.

Rúalá lubára lun ámu.

²¹Ítara líña lubeíti, lúnti wanúadajan ában wügúri wádaangiñe lé meja wámati sun dan le wáma lubeí Jesúsu, ²²lúmagiñe dan le labásterágüdünbalin Juan Jesúsu darí lúmoun dan le lamúdeirúnbei siélun, lun lewéñegua lan Júdas. Wügúri ligía, líchuguba fe úara wáma luágu lásaarun Jesúsu lídaangiñe oúweni lúnya labágaridun.

²³Ábati jíridun bián jádaangiñe. José, le méme gírībei Barsabási, le méme gíñe gírībei Jústu, lúma Matías. ²⁴Ába jayúmurgun lun Búngiu ítara.

—Wabúreme, amúrū le subúdíjabúbei tun janígi sun gürígia, arífudabei woun ca lan jádaangiñe bián wügúriña ja anúadira báalībei ²⁵lun lesériwidunibu queisi apóstolu lewéñegua Júdas. Ladúga féridi láali Júdas lubára ladúga lafigounjan, áni núdünja lídoun fulásu le ladúnabei.

²⁶Ábati jíchaajan ubúnuruni, ába laburujan luágun Matías. Lúmagiñe óra ligía, ába ábanjali lan jádaangiñe apóstolugu.

2

Liábin Sífiri Sándu

¹Dan lachúlürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu. ²Sódini ába lagaambún ában ireíni núbinti siéluigiñe quei dan le láfurun ában garábali jéreti, ába lagaambún tídan sun múna to ñí jabei. ³Ábati lasáiragún buri cátei joun camá ligémeri wátu, afánreinjóañu lun ñi lan ában murúsun lougiñe lálbulugu cáda ában jádaangiñe. ⁴Ába jabuínchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei lueí jerérun quei ladímuregüdüniña Sífiri Sándu.

⁵Lídoun buri dan ligía, ñiburíñanu juríu Jerusalén ja gúnfulitiña lídan jafñen, núbintiña lídaangiñe sun fulásu ubouágu. ⁶Dan le jagáambunbalin ireíni ligía, ába jóúndaragunga gürígia, ibídiñeja joun cába lan jasáminara ladúga cáda ában jádaangiñe gürígia jagía, agáamba jamútiña lánigu Jesúsu adímureja lídan jerérun guánarū. ⁷Ába laweíridun janígi, ába jaríñagun jámagua.

—¿Ma funági Galiléana ja adímurejabaña? ⁸¿Ída liñáti wagáambubaliña adímureja lídan lerérun cáda ában wádaangiñe? ⁹Añájein gürígia Pártiana ya, Médiana, Elámna, Mesopotámiana, Judéana, Capadóciāna, Póntona jáma Ásiana, ¹⁰Fríjiana, Panfíliana, Ejíptona lúma lídaangiñe buri fulásu África le yagúroun mémebei lueí Ciréne. Añájein giñe Rómāna aganoútiña ya, añájein jádaangiñe, juríu ladúga juríu jamá jagúbürigu, jíbiri, barú jamaali ligáburī jafñen juríu. ¹¹Añájein gíñe gürígia Crétana jáma Arábiana, sun wagía agáamba wamútiña adímureja luágu luweírigin Búngiu lídan werérun guánarū.

¹²Weírīti janígi súngebēi, ibídiñeja joun cába lan jasáminara, ába buri jalügüdagun jámagua.

—¿Cásan míni lan sun le?

¹³Jíbiri, ába jéjerajan jáu lánigu Jesúsu, ába jaríñagun.

—Bacháruañanúrügü jáña.

Le laríñagubei Pédro joun gürígia ja ñíbaña

¹⁴Ábati laráramun Pédro jáma ja jíbiri únsu apóstolugu, ába laríñagun láu umálali jéreti.

—Wügúriña Judéana jáma sun ja aganoúbaña Jerusalén, agáamba jumeí le lúnbei naríñagunī jun buídu, subúdi jumámugei ca lan lílabei cátei le jaríjubei.

¹⁵ Mabácharuántiña wügúriña ja quei jarítangun, néfugubeigili bináafin guetó. ¹⁶ Cátei le, le jaríjubei, ligía lé meja uágubei ladímureja Joél, le proféta, dan le laríñangunbei.

¹⁷ Lídoun buríme lagúmujoun wéyu, líña laríñangun Búngiu, noúnajabei náni Espírítu jádoun sun gürígia, nadímurejaba jayúmulugugiñe jisáanigu. Nayáwadaguba joun irájúñü, lúma joun weíyaaña mútu.

¹⁸ Nouúnajabei gíñe náni Espírítu jádoun ja esériwidubaña nun lídoun buri wéyu ligía, wügúriña jáma würiña, ábame nadímurejan jayúmulugugiñe.

¹⁹ Narúfuduba buri cátei garíyawaseti siélu, narúfuduba seíni ubouágu.

láubei jítaü seíni buri ligía, láu wátu geméti, lúma láu juánriñu láuti gumúlali.

²⁰ Labúrigaduba wéyu, láfuarame játi funáti quei jítaü, lubáragiñe lachúlürün luwéyuri Wabúreme, le lúnbei ában lan wéyu weíríti, le maríjngilfbei lfbe.

²¹ Áni sun ja amúriajatiña asálbaruni lúmagiñe Búngiu, jasálbaruba.

²² ‘Agáamba jumeí lubeíti le lúnbei nariñaguni, jugúya wügúriña Israelítagu. Jesúsu le Nazarétna, ában meja wügúri le larúfudubei Búngiu jigíbugiñe quei wügúri úraguati láu buri cátei weínamuti, miláguru, lúma buri seíni le ladúgübei Búngiu jagánagua lídaangiñe, quei le jisúbudin. ²³ Láu sun líra, dan le ledéregerúnbei jun, quei ligáburi aráansejani le larítagubei Búngiu lúmagiñe furúmiñeti dan, ába jáfaruni jilágubei láu jedéregeruni joun wügúriña wuribatiña lun jádaraguni luágu gurúwa. ²⁴ Ába leséfuruni Búngiu lídaangiñe lubáfu ouweni, sarágüda lumúti lúnya labágaridun, ladúga siñá lan gabáfu lan ouweni luágu. ²⁵ Laríñajare urúei Davíd, dan le ladímurejan luágu Jesúsu.

Subúdi numúti luágu nómabei lan Nabúreme Búngiu súnwandan, noubagiñeñein lun úa lan ni cáta lun lebélaagüdün anúfudei nidoun.

²⁶ Ligía lébubei téjerajan nanígi, ába nadímurejan luágu ugúndani le nídaanbei.

Láu sun wügúri nan garaúwarügüti, jeménigitina buágu luágu nabágaridayaba lan,

²⁷ ladúga mígirun bubóun nuwáni lídan jabára jiláaña, mígirun amúríme lun lañáladun nógubu, áu le bánigu le jínsiñebei bun.

²⁸ Arúfuda bumúti úma le anúgübei gürígia lídoun ibágari magúmuchaditi nun, áni babuínchagüdúbadina láu ugúndani láu abúnja lan nubádu.

²⁹ ‘Nidújeñu, cátei furáanguti le, luágu jilá lan meja wadúje Davíd, bunáwa ligía, gayáraagili waríjini lumúaja chülü lúmoun wéyu le. ³⁰ Davíd, ában meja proféta ligía, áni subúdi lumúti meja luágu aríñaga láali lan Búngiu lun luágu jádaangiñeaba lan linébaanfan liábin Crístu, le lúnbei lañúurun luágu lála. ³¹ Adímurejati lubeíti Davíd luágu lásaarun Crístu lídaangiñe ouweni, luágu gíñe merédeboun lan luwáni lídan jabára jiláaña, mañáladun ligíame lúgubu. Ítara líña ladímurejan Davíd luágu Crístu camá jamuga aríagu líña lun, áni ítara líña lasúserehun. ³² Sarágüda lumúti Búngiu Jesúsu méme le lídaangiñe ouweni, sun wagía geféentiwa luágu líra. ³³ Núrúgüda lumúti Búngiu lueígiñe loúnwenren láu sarágu uweíríguni, ába lerésibiruni Sífiri Sándu lúmagiñe Búngiu queísi laríñaguni Búngiu lun, lun gayáraabei lan loúnajani méme Sífiri Sándu ligía joun sun lánigu ubouágu. Ligía cátei le aríja jumáalíbei lúma le agáamba jumáalíbei guetó. ³⁴ Máma Davíd amúdeirubei siélu, aríñagati Davíd guánarügü.

Laríñajare Búngiu lun Nabúreme.

“Nürúba lueígiñe nouúnwenren,

³⁵ daríme níchuguniña báganiñu lábugiñoun bubáfu.”

³⁶ “Lúnti jasúbudiruni sun jugúya linásiñun Israél luágu Jesúsu méme lan le, le jádaragubei luágu gurúwa, adúga láali lan Búngiu lun ligíaba lan Wasálbaragüle, ligíame giñe Wabúreme.

³⁷ Dan jagáambunbalin cátei le, ába lebélorun igárigu tídoun janígi, ába jaríñagun lun Pédro lúma joun jíbiri apóstolugu.

—Wadújeñu, ¿cábasan wadúga?

³⁸ Ába laríñagun Pédro joun.

—Sáansi jumeí jigáburí ligíbugiñe Búngiu, badísei jugúyame cáda ában lídan líri Jesucrístu, ferúdunawa lámuga jifígoun, ru lámugei Búngiu Sífiri Sándu jun. ³⁹ Ladúga aríñagaali Búngiu luágu líchugubei lan giñe Sífiri Sándu jun, lúma joun jadúgawagun, lúma joun ja aganoúbaña díse, lúma joun sun ja lagúarubaña Búngiu lun lánigu jamá.

⁴⁰ Láu buri dimúrei le lúma buri ámu, ladímureja Pédro joun, ába laríñagun joun.

—Séfu jumá lueí asúfuriruni le lúnbei liábin jawágun gürígia wuríbatiña ja.

⁴¹ Ítara liñáti ába jabásterun, ja adúgúbaña gásu láu lerérun, ába jayábin queí buri úruíwa mílu gürígia lun jafíñerun luágu Jesucrístu wéyu ligía. ⁴² Ába jedéregeragun jóungua lun jafúnrendeiruni le jarúfudajabei apóstolugu joun, aganoúa jagía lídan úarani jámagua, ayúmuragua jagía buri lun Búngiu, oúndaragua jagía lun jeíginun fein to arítaguagülei luágu loúnwen Jesúsu, queísi meja laríñaguni joun apóstolugu lun jadúgüni.

Jabágari furúmiñetiña lánigu Crístu

⁴³ Súngubei láuñanu luweírín anígi luágu buri seíni lúma buri milágoru le ladúgübei Búngiu jádaangiñe apóstolugu. ⁴⁴ Sun ja afíñerubaña, lídaañanu ában, ába buríti jafánreinjani le jámati jádaangua. ⁴⁵ Jalúgurajei buri jafúlasun lúma le jámati, ába jafánreinjani lebégi según lemégeirun cáda ában. ⁴⁶ Ságü wéyu jóúndaragun témpulurugu lun jájuduragun lun Búngiu. Lárigiñe, ába jóúndaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina ságü wéyu, lídan ában láu ugúndani lúma gudémegeu. ⁴⁷ Ábaja jadímurejan weírigu luágu Búngiu, ábati jínsiñe jamá joun gürígia, ábatija anáajeina láníña Búngiu ja asálbareinabaña jánwoun.

3

Lareídagun ában meíbugunti

¹ Luágu ában wéyu, ába lídin Pédro lúma Juan témpulurugu ladaúnrun úruíwa rábounwéyu, le lórate ayúmuraguni lun Búngiu. ² Ságü wéyu, ñíñein lan ában wügüri meíbugunti lúmagiñe lagúriajoún, barúwarügütíja añúura lubádu tubéneri témpulu le giríbei “Béna Buídumeraüti” lun lamúriajan seínsu jáma ebélurutiña témpulurugun. ³ Dan le larjínbalíña meíbugunti ligía Pédro lúma Juan jebélura lan témpulurúgun, ába lamúriajan seínsu jáma. ⁴ Ábati jarjín Pédro lúma Juan luágun, ába laríñagun Pédro lun.

—Aríjabá wawágun.

⁵ Ába larjín jawágun, agúrafa yebe jíchugun seínsu lun. ⁶ Ába laríñagun Pédro lun.

—Maseínsutina, níchigaali le númati bun. lídan líri Jesucrístu le Nazarétna, sarába, beíbuga.

⁷ Ábati lárügüdüni Pédro lueígiñe lújabu le loúnwenren, ába liñúraguni, óra ligía, ába ledérebugudun lugúdi lúma lumúrugute. ⁸ Ábati lachúbarun lun laráramun, ába leíbugun. Ába lebélorun jáma témpulurugun, eíbugeina, achúbajeina, adímurejeina luágu luweírigin Búngiu. ⁹ Ába jarjini sun gürígia eíbuga lúma adímureja luágu luweírigin Búngiu. ¹⁰ Weírititi janígi luágu le asúseredubei lun, queí subúdi jabálin wügüri ligía, subúdi jameí luágu ligía lan léñaja añúurubei amúriaja tubéneri témpulu le giríbei “Béna Buídumeraüti”.

Lapúrichjan Pédro témpulurugu

¹¹ Mígiragüdüün lumútiñati meḃbugunti le areídagubei Pédro lúma Juan, súnti güriǵia, ába jeḃbaagun láu luweírni janíǵi luágun tubárandá témpulu le giríbei Salomón, le ñí jabei.

¹² Dan le laríjini Pédro cátei le, ába laríñagun joun güriǵia.

–Jugúya Israelítaǵu, ¿ca uágu laweírída janíǵi? ¿Ca uágu jaríaguawa camá jamuga wagía areídaguagüdübalin wüǵürí le, eḃbugagüdei láu wabáfu o láu lan wagúnfulin lúma Búngiu? ¹³ Máma líña, Búngiu, le Jabúngiute binádu wagübüriǵu Abrahám, Isáac lúma Jacób, ligía areídaguagüdübalin wüǵürí le lun líchuguni líñun-áǵei uweíríguni lun Jesucristu le Liraú, ligíra lé meja jedéregereubei joun lúrudugu, áni dan lálugan Piláto lígiragüdüni, májatün. ¹⁴ Lubaráǵiñe jamúriajan lun lígirawagüdüñ Jesúsú le jarúmabei áni richáǵua, amúriajarügü jugúya lun lígirawagüdüñ ában gáfarajati. ¹⁵ Ítara líña jáfaruni le íchugubalin ibáǵari tímátimaati. Ába lásaaragüdüni Búngiu lídaangiñe óuweni, áni geféentiwa luágu líra. ¹⁶ Niján wüǵürí le jaríjubei áni subúdi jumeḃ, láu lubáfu méme Jesúsú ligía, lerésibira érei. Wafíñen luágu Jesúsú, ligía areídaguagüdübalin buídu buídu quei jaríjini.

¹⁷ Subúdi náali, nidújeñu, luágu ibídiñe lán meja jun ca lan jadúǵübei dan le jáfarunbálin Jesúsú, jugúya jáma jábutinu. ¹⁸ Láu sun líra, gúnfuli lumúti Búngiu lé meja laríñagubei jádaangiñe profétagu, luágu lúnti lan lasúfuriruba lan Crístu. ¹⁹ Ligía lubeḃti, ígira jumeḃ binádu jigáburí, giríbu jumá lun Búngiu, chibáwa lámuga jíffgoun. ²⁰ Ábameti gayára lan loúnajan Búngiu eméraaguni tun juwáni, óúnajaya leíme Jesúsú le Crístu, le aráanseelibeí lubaráǵiñe furúmiñeti dan woun. ²¹ Láu sun, lúnti lan leréderun Jesucristu siélu guetó daríme laráanseruni Búngiu sun cátei quei laríñaguni jádaangiñe profétagu ja derégeguaañabaña jóungua lun, lídan meja dan le binádu. ²² Ítara líña lubeḃti aríñagati meja Moisés joun binádu wagübüriǵu. “Loúnajaba Wabúreme Búngiu ában proféta jídaangiñe guánarügü quei loúnajanina. Ánja jumá lun sun le lúnbei laríñaguni jun, ²³ ladúga sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagúnrinchawagún.”

²⁴ Ítara líña lubeḃti, sun profétagu lúmagiñe Samuél darí lárigiñe, adímurejatiña libúǵürü buri cátei le lúnbei lasúseredun lídoun buri wéyu le. ²⁵ Jugúya lúnbei jerésibiruni sun le laríñagubei Búngiu jádaangiñe profétagu, luáguti gíñe jufúleisein darádu lé meja ladúǵübei Búngiu jáma binádu wagübüriǵu dan le laríñagunbei lun Abrahám. “Nabínirubaña sun güriǵia ja uboúagubaña láu ában jádaangiñe binébaanfaangu.” ²⁶ Ába lanúadajani Búngiu Liraú lun loúnajani jun furúmiñe, jugúya juríu, lun labínirunün cáda ában jídaangiñe, láu laságarunün lídaangiñe luríban jigáburí.

4

Pédro lúma Juan jagíbugiñe gumádimatiña

¹ Níǵiña Pedro lúma Juan adímureja joun güriǵia, ligía jayábin jafádirigun juríu, jáma jábutigu súdaara ja ónigirubárun témpulu, jáma ja lídaanbaña jadámurin saduséogu.

² Gáñitiña ladúga jarúfudajan Pédro lúma Juan joun güriǵia, aríñaga jagía luágu arúfudúa lan luágu jásaaruba lan güriǵia lídaangiñe óuweni lúnya jabágaridun ladúga sará lan Jesúsú. ³ Ábati janúgüniña adáúra, ába jádaruniña furísunrugun darí larúgan quei dárüjali lubeḃ. ⁴ Sarágu jáña jádaangiñe ja agáambubalin ugánu le jíchugubei apóstolugu afíñerutiña luágu. Ja afíñerubaña járüǵü wüǵüríña, queḃ buri seǵngü mílu.

⁵ Larúgan, ába jóundaragun jábutigu juríu, wüǵüríña weírígutiña lídan jaffíñen, jáma arúfudajatiña lílúrudun Moisés, Jerusalén. ⁶ Níñein gíñe Anás le fádiri le íñutimaabei, Gáifasi, Juan, Alejandro jáma sun ja jádaangiñebaña lufámilian Anás. ⁷ Ábati jóúnajan anúǵei Pédro lúma Juan, ába jíchuguniña lamídan jadámurin, ába jaríñagun joun.

–¿Ca áu ubáfu, o ca ídan fri jareídaguagüdei wüǵürí le?

⁸Buin líña Pédro láu Sífiri Sándu, ába larínagun joun.

—Jábutigu juríu jáma wügúriña weírigutiña lídan waffñen. ⁹quei jálügüdúniwa luágu buíti le adügúbei lun ában wügúri sánditi, ída líña lan lareídawaguágüdün, ¹⁰buséntiwa lun jasúbudiruni, jugúya jáma sun gürígia ja Israelítagu, luágu láu lan lubáfu Jesucrístu le Nazarétna niján lubei wügúri le ya jigíbugiñe areídaguañu. Láu lubáfu Jesucrístu, le meme jádaragubei luágu gurúwa, le lásaaragüdúbei Búngiu lídaangiñe ouweni, lareídagua. ¹¹Jesúsu le, ligía queísi dúbü le áubei jíchiga mebéreseni, jugúya le queibaña ábunagutiña múna, áni ñúbinjali Jesúsu lun ligíaba lan quei dúbü le mégeiwatimaabei lídan bunáguai. ¹²Úati ámu lun lasálbaruniwa lueídügüya Jesucrístu, ladúga míchuti Búngiu ámu íri ubouágu lun gayára lan wasálbarun lueígiñe.

¹³Dan jaríjini gumádimatiña luágu adímureja jamá Pédro lúma Juan manúfudeiga ni murúsun, áni subúdi jamei luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábati jasúbudiruni luágu jádaangiñetiña lan já meja efbugubaña lúma Jesúsu. ¹⁴Queíti ñíñein lubei wügúri le areídawaguágüdúbei jáma, rára ligía, siñáti jarínagun lúrudugu ni cáta. ¹⁵Ábati jóunajaniña lúrudugu Pédro lúma Juan lúma wügúri le areídaguaalibei bougudin luef jadámurin lun gayáraabei lan jáyanujan jámagua. ¹⁶Jarínagati.

—¿Cábasan wadúga jáu wügúriña ja? Sun ja aganoubaña Jerusalén subúdi jamúti luágu adúga jamáli lan miláguru le, áni siñáti wayéedagun láu. ¹⁷Lun mabúrchagun lan ugánu luágu cátei le lídan sun fulásu, wewerídiraña lun madífmurejandügüya jamá ni ca un lídan líri Jesúsu lúmagiñe uguñe.

¹⁸Ábati jagúarun joun lun jebélurun, ába jarínagun joun lun ni lan ca uágu lun madífmurejan jamá, marúfudajan jagíame lídan líri Jesúsu. ¹⁹Ába jarínagun Pédro lúma Juan joun.

—Samína jumá júngua ánjein buídu lubei ligíbugiñe Búngiu lun ladügún le jubeíbei, ígira le lubeíbei Búngiu. ²⁰Wagía, siñáti wámanichun láu cátei le aríja wamáalibei lúma le agáamba wamáalibei.

²¹Ábayati jeweridiruniña gumádimatiña, ába jigiragüdúniña. Madáritiña ída lúba lan jadúgün ni cáta jáu ladúga adífmurejatiña buri gürígia buíti luágu Búngiu luágu cátei le asúseredubei. ²²Wügúri le areídagubei láu miláguru ligía, sügú láu bián-wein irúmu láu.

Jamúriajan afñetiña manúfudei lúma Búngiu lídan jeseríwidun lun

²³Dan le jáfuridun Pédro lúma Juan furísunrugugiñe, ába jóúdin le ñí jabei jíbirigu, ába jabájüdaguni sun le jarínagubei jábutigu fádirigu jáma wügúriña weírigutiña joun. ²⁴Dan jagáambubalin, ába jayúmuragun sun jagía lun Búngiu, ába jarínagun.

—Wabúreme, amúrü Búngiubei le adügübalin siélu, ubou, barána lúma sun cátei.

²⁵Amúrü, arínagatibu láu lubáfu Sífiri Sándu liyúmulugugiñe David lé meja eseríwidubei bun.

¿Ca uágu jagáñida ja mámabaña juríu, samína jagía lun jadúgüni cátei le siñabei jadúgüni?

²⁶Íñúraguatiña lurúeitegu ubou jóungua, oundaraguatiña lábutigu fulásu

lun jadúgün wuríbani lun Wabúreme Búngiu lúma lun Crístu le lanúadajabei.

²⁷Áni suséreti ítara, oundaraguatiña Heródes luma Póncio Piláto lídan ubúrugú le, jáma ja mámabaña juríu, lúma jáma Israelítagu lun jadúgün wuríbani lun Biraú Jesúsu le sándubei, le banúadajabei. ²⁸Láu líra, adúga jamúti sun le baráansejabei lun lasúsereduba lan. ²⁹Guetóti, Wabúreme, aríjabeí jasiádiruniwa, rúba anígi woun, wagía le eseríwidubalibu, lun wadífmurejan buágu manúfudeiga, ³⁰gayára lámuga giñe wareídaguágüdün sánditiña, adúga wagíame miláguru lídan líri Biraú Jesúsu le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñí lubei jóundaragua, ába jabuñchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súnqua luágu

³² Sun ja affñerubaña, ában lábu jarítangun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súnqua luágu. ³³ Ába jasígirun apóstolugu adímureja luágu lásaarun Wabúreme Jesúsu lídaangiñe oúweni láu sarágu ubáfu, ábati labíniruniña Búngiu sun jagía sarágu. ³⁴ Úati ni ában jádaangiñe emégeirutí ni cáta ladúga sun ja gafúlasunbaña o gában, ába buri jalúgurunun, ába janúgüni tebégi, ³⁵ ába jadégeruni joun apóstolugu lun lafánreinjoún jádan ja emégeirutíña. ³⁶ Queíburi, ñíñein ában jádaangiñe ladúgawagun Leví jádan, gírítí José, agúriajóuti luágu ubóuju le gíríbei Chípree, ába jáchuni apóstolugu Bernabé, míni lan líra, “Le Íchigubei Gurásu”. ³⁷ Wügúri ligía, ába lalúguruni lufúlasun, ába lanúgüni seínsu edéregera joun apóstolugu.

5

Jafígoun Ananías túma Safíra

¹ Ñíñein gíñe ában wügúri gírítí Ananías, túma Safíra, to lúmari, ába gíñe jalúgurun ában fulásu. ² Wügúri le, ába lanúgün lídaangiñe seínsu, ába lídín láu líbiri joun apóstolugu, lafámura camá jamuga ligía rügúñein libjín luágu fulásu. Áni subúsítí sun cátei tun lúmari. ³ Ábati laríñangun Pédro lun.

—Ananías, ¿ca uágu bígira lun lagáñiruni Máfia barítangun lun layéejagüdúnibu lun Sífiri Sándu, lun beréderun láu líbiri seínsu le afáyeirúbei bun luágu fulásu? ⁴ ¿Ma funági bufúlasun meja fulásu? Lárígiñe balúguruni, ¿ma biseínsun lun badúgüni le babúseerunbei láu? ¿Ca uágu basáminara badúgüni cátei le? Búngiu bálugubei bayéedagun, máma wügúriña.

⁵ Dan lagáambuni Ananías cátei le, ába laburujan oúwe. Súnti ja asúbudirubalin cátei le, ába janúfudedagun. ⁶ Ábati jayábin wügúriña, ába jóuburaguni Ananías, ába janúgüni ábuna.

⁷ Queíburi úrtüwa óra lárígiñe, ába tebélorun lúmari Ananías, íbídínoun ni cáta tun luágu le asúseredubei. ⁸ Ába laríñangun Pédro tun.

—Aríñagabeí nun, ¿luágu ebégi le jaríñagubei jalúgurei fulásu?

Ába taríñangun.

—Ánja, luágu ebégi ligía.

⁹ Ábati laríñangun Pédro.

—¿Ca san uágu jebélura lídoun úraduni lun jóuchaguni láni Búngiu Espírítu ítara? Añatén ja anúgübalin búmari ábuna, janúgadibu gíñe.

¹⁰ Lídan méme óra ligía, ába táburujan oúwe lubádu lugúdi Pédro. Dan jebélorun wügúriña, jadáriroun jílaaru, ába jaságarunun, ába jábununun loúbagiñe túmari. ¹¹ Súnti gürígia ja affñebaña luágu Crístu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

¹² Adáaguatiña buri apóstolugu sarágu seíni lúma miláguru jádan gürígia, ábati buri jóundaragun sun affñetiña lídan fulásu témpulurugu le gíríbei “Barandá Salomón”. ¹³ Úati meja ni ában jádaangiñe ja mámbabaña affñetiña lun jóundaragun jáma affñetiña ladúga janúfude, láu sun jínsiñe jamá sun affñetiña joun gürígia, sarágu. ¹⁴ Eíbu wéyu, eíbu jayábin gürígia lun jafínerun luágu Jesucrístu, dándu wügúriña queísi wúriña. ¹⁵ Quei jadúgüña lan apóstolugu sarágu miláguru, ába jaságaraguniña gürígia sándítíña úmadoun tídan jabárari lun dan lan lásügürün Pédro, gayára lan jareídagun láurügü tadágarun liyáwa

jawágu. ¹⁶Ñúbintiña gñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawáguitiña espíritugu wuríbatíña, sun jagía areídaguatiña.

Jeíbaajóun Pédro lúma Juan

¹⁷Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü, ¹⁸ába janúgüniña apóstolugu, ába jadáürüniña. ¹⁹Ába ladáraruni ában láni Wabúreme Búngiu ánjeli tubéneri furisun áriebu ligía, ába láfuridagüdúniña, ába laríñagun joun.

²⁰—Jeíba, jaráramame témpulurugu, ábame jabájüdagun joun ja ñíbaña luágu iséri ibágari le líchugubei Jesucrístu joun gürígia.

²¹Dan jagáambuni cátei le, ába jóudin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóundaruniña líñun-ágei lúruđu, ja súnbaña Israelítagu weírígutiña, ába jóúnajan anúgaña apóstolugu furisunrugugiñe. ²²Dan jachúlürünbei polisía furisunrugu, madári jamútiña ñi. Ába jagáribudun, ²³ába jaríñagun.

—Darúñu líña wadárirunun furisun, ñíñanu súdaara bénabu óunigira, dan le webélu-runbei, madáritiwa ni ában jádaangiñe apóstolugu ñi múnada.

²⁴Dan le jagáambunbalin jábutigu fádorigu lúma jábuti súdaara ja óunigirubarun témpulu cátei le, ába jálügüdagun jóungua cába lánfuna ídan lébeda cátei le. ²⁵Lídan óra ligía, ligía líabín ában wügúri, ába laríñagun joun.

—Ja wügúriña ja jádarubaña furisunrugun, añájein témpulurugu arúfudaja joun gürígia.

²⁶Ábati lídin jábuti óunigirutiña jáu súdaara, ába janúgüniña láu buíđu, ladúga janúfude lueí jachámuragun gürígia dúbü jawágun. ²⁷Dan jachúlürün jáu, ába jíchuguniña ligíbugiñe líñun-ágei lúruđu, ába laríñagun fádiri íñutimaati joun.

²⁸—Wéridi wamáadün lun marúfudajandügüya jumá lídan líri Jesúsü, áni ¿ca jadúga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügúri ligía.

²⁹Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadúgüni le lubeíbei lubáragiñe le jabefbei wügúriña.

³⁰Le Jabúngiute bináđu wagúbüirigu, ligía ásaaragüdúbalin Jesúsü, le méme jáfarubei láu jádaraguni luágu ában gurúwa. ³¹Rúlaali Búngiu uweíríguni lun, ñurügüdaleí lueígiñe loúnwenren, adúga láali Ábutime lúma Asálbaragülei, gayára lámuga jígiruni Israelítagu bináđu jagáburi, lun gñe ferúduawa lan jafígoun. ³²Geféentiwa luágu líra, geféenti gñe Sífiri Sándu le líchugubei Búngiu joun ja ñúdünbaña láu le lubeíbei.

³³Dan jagáambunbalin líñun-ágei lúruđu cátei le, ába jagáñidun, ába yebe jabúseerun jáfaraguniña jílagubei. ³⁴Ñíñein ában fariséo jádan lúrudugu, gíríti Gamaliél, maésturu lánina lilúrudun Moisés, inébeti joun gürígia sarágu. Ába laráramun, ába laríñagun lun janúgüniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúruđu. ³⁵Ába laríñagun joun gumádimatiña.

—Wügúriña Israélna, toúnigi jumátia láu le lúnbei jadúgüni jáu wügúriña ja. ³⁶Jarítagua jumátia luágu inúragua lán meja Teudás lúngua aríñaga luágu ában lan wügúri weíríguti ligía, ába jafálaruni gádürü-san wügúriña, áni afarúati jílagubei, súnti ja afálarubalin, ába jawáragadagun, ába lagúmuchun sun cátei. ³⁷Lárigiñe, lídan lidáani jabájüdüniwa gürígia, ligía líñuragun Júdas le Galiléana lúngua, sarágu jáña afálaruti lídan labúseerun yebe lagáragun luágum gumádi. Áfarúati gñe, ába gñe jawáragadagun sun ja afálarubalin.

³⁸Igira jumáña lubeíti wügúriña ja, memétera jumá jámoun. Ladúga ánjein jáni lubeí

wügúriña cátei le jarúfudajabei lúma le jadúgübei, lagúmuchaguba, ³⁹ ánjein láni lubeí Búngiu, siñá jubei agúnrinchagua. Tounigi jumá, mageíndagua jumá lúma Búngiu.

⁴⁰ Ába jánjanrun súngubei láu le laríñagubei. Ábati jebélaagüdúniña apóstolugu, ába jabeichuniña, ába jaríñagun joun lun jebé lan jadímurejan lídan líri Jesúsu. Lá-rigiñe, ába jígragüdúniña, ⁴¹ Ába jáfuridun apóstolugu jámagiñe lúrudugu, gúndaañu láu laríjiniña Búngiu queísi gürígia gadúnamatiña lun jasúfuriruni busíganu luágu líri Jesúsu. ⁴² Merédetiti jarúfudajan témpulurugu lúma tídan buri múna ságú wéyu, aríñaga jagía luágu Jesúsu lan Crístubei le agúrabajóubei.

6

Jáluajóuniwa sédú ídejatiña

¹ Lídan dan ligía, quei agbedeina jamátima affíñetiña luágu Jesucrístu, ába jagúmeserun ja adímurejabaña güríegu adárira jadúnrun ja adímurejabalin jerérun juríu, ába jaríñagun luágu mibíjin jamá wúriña güríegu ja jílaañabaña úmari eginí dan le lafánreinjóuniwa, ságú wéyu. ² Ábati jóundaruniña dúusu apóstolugu affíñetiña, ába jaríñagun joun.

—Mabuíduntí lun wígiruni wapúrichijani lerérun Búngiu lun wagíaba lan afánreinjei eginí. ³ Ligía lubeíti nidújeñu, áluga jumá sédú wügúriña jídaangiñe ja gaffíñerúati jawágu, ja chúbaña áu, ja derégeguatiña jóungua lun Sífiri Sándu le gumúti, lun jadúgüni wadágimanu le. ⁴ Wagía, wedéregereubei wadáani lun ayúmurguni lun Búngiu luma lun warúfudajani lerérun.

⁵ Ába júaradun súngubei lídan cátei le, ába janúadiruní Estéban, le ában wügúri buín líña láu affíñeni luágu Jesucrístu áni derégeguañu líña lúngua lun Sífiri Sándu le gumúti, Felípe, Prócoro, Nicanór, Timón, Parménas lúma Nicolás le Antioquíana, lé meja afálarubalin ligáburí jafíñen juríu. ⁶ Ába janúgüniña le ñíjin jabeí apóstolugu, ába jayúmurgun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaajaña lan agáambuti lerérun Búngiu lídan sun fulásu, agánwoundeina jagía affíñetiña Jerusalén furése, ába giñe jaffíñerun sarágu fádírigu juríu luágu Jesucrístu.

Ladáürin Estéban

⁸ Adáaguatíja Estéban, le ábanbei wügúri le buínbei láu ubáfu lúma abíniruni lúmagiñeti Búngiu, miláguru lúma seíni jádan gürígia. ⁹ Ábati jagúmeserun gürígia asígeneja luágu, gürígia jagía, tídaangiñetiña jalígílisin juríu to gíriboun “Idámunigu Jóunguaaña”, jáma Cirénena, Alejandríana, Cilíciana jáma Ásiana. ¹⁰ Siñátí joun lúma Estéban, ladúga láu lichú áu le líchugubei Sífiri Sándu lun ladímureja. ¹¹ Ábati jafáyeirun wügúriña lun jaríñagun luágu agáamba jamáani adímureja wuríba luágu Moisés lúma luágu Búngiu. ¹² Ábati jafúdagüdúniña gürígia, jáma arúfudajatiña lilúrudun Moisés, jáma wügúriña weírigutiña lídan jafíñen juríu, ába jarúgüdúni Estéban, ába janúgüni ligíbugiñoun líñun-ágei lúrudu. ¹³ Ába giñe jálugun yéetiña lun jaríñagun luágu lerédera lan adímureja wuríba tuágu témpulu sándu lúma luágu lilúrudun Moisés. ¹⁴ Jaríñaga.

—Agáamba wamúti laríñagun luágu lagúnrinchaguboun lan Jesúsu Nazarétna témpulu, sáansi léime igáburí le lígirubei Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, ítara líña camá ligíbu ában ánjeli.

7

Ladímurejan Estéban luágu lufúleisein

¹ Ábati laríñagun fádírí le ínutimaabei lun Estéban.

—¿Inárúni sun cátei le?

² Ába louñabun.

—Nidújeñu, nagúbürigu, agáamba jumána. Weíriguti Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán. ³ Ába laríñagun lun. “Ígirabeí bageíra jáma bidújeñu, beíba lídoun fulásu le lúnbei narúfuduni bun.” ⁴ Ábati láfuridun Abrahám Caldéagiñe, ába lídin agánawa Harán. Lárigiñe, ába loúnwen lúguchi, ába lanúgüni Búngiu Abrahám lídoun fulásu le ñí lubei wagánawa guetó. ⁵ Míchuti ni murúsun múa lun lídan fulásu le, aríñagarügüti lun luágu lachúlürüba lan dan lun lánibeí lan ageíraü le jáu sun ladúgüwagun, láu sún meja marájüñügüli lan Abrahám lídan dan ligía. ⁶ Aríñagati Búngiu lun luágu jaganouba lan ladúgawagun quei teréncha lídan jageíra ámu, luágu idámunibaña lan ñí, amúdirúa jagíame luágu gádürü-san irúmu. ⁷ Aríñagati gíñe Búngiu lun. “Nagúseragüdübaña lílana fulásu le anúgübaliña idámunime, lárigiñeme lásügürün gádürü-san irúmu, ábame jáfuridun ñígíñe, ábame jeseríwidun nun lídan fulásu le.” ⁸ Adúgati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubeí lagúriajounbei liraú Abrahám le Isáac, ába lerésibiruni circuncisión luágu wídu wéyu láu, ítara gíñe ladúga Isáac lun Jacób le liraú, adúgaleí Jacób, le méme gíribeí Israél, joun dúusu lirájüñü, ja jagúbürigubaña dúusu túribu ja gíribaña Israelítagu guetó.

⁹ Lirájüñü Jacób ja, ja binádubaña wagúbürigu, ába jagímugajan lun José le jamúlen, ába jalúguruni lun lanúgün Ejíptoun quei idámuni. Ñíñein Búngiu lúma José, ¹⁰ ába leséfuruni lídaangiñe sun lidíjeri láu líchugun gunfarándaü lun. Ába lagáñeiragüdüni lufúleisein Faraón, le lurúeite Ejípto lun, ába líchuguni José ábutime ñí Ejípto lúma tídan lúban Faraón.

¹¹ Ábati ladágarun ában ilámaü lídan fulásu le Ejípto lúma Canaán, deréti meja dan ligía, madáritiñati binádu wagúbürigu cába lan jeíga. ¹² Ába lagáambun Jacób luágu níjein lan eígin Ejípto, ába loúnajaniña lirájüñü, ja binádu wagúbürigu, ñí. Ligía furúmiñetibeí jaweyasun. ¹³ Le libíaman jóudin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José. ¹⁴ Ábati loúnajan José anúgei Jacób le lúguchi jáu sun lufámilian, Ejíptoun, úruwañanu-wein-queínsi güriía jagía. ¹⁵ Ítara líña lídinbei Jacób agánawa Ejípto, le ñí lubei louwe, ñí lubei gíñe jówegua binádu wagúbürigu. ¹⁶ Átiri irúmu lárigiñe, ába lanúgüniwa jábu ñígíñe lídoun fulásu le gíribeí Síquem, ába jabunún lídan umúajau lé meja lagáñijabei Abrahám jámagiñe lirájüñü Hamor ñí Síquem.

¹⁷ Dan le layárafadúnbei dan lun lagúnfulirun dimúrei le líchugubei Búngiu lun Abrahám, gíbeeña ladúgawagun Israél Ejípto. ¹⁸ Ábati lagúmeserun ában urúei agúmadíja Ejípto le ibidíñejabubei lun José. ¹⁹ Ába layéeraguniña urúei ligía warásan juríu, amúdiragua láña binádu wagúbürigu, águragüdána jasáanigu ja figígíña joun lun jówegun, gumúgua lámuga warásan. ²⁰ Lídan dan ligía, ligía lagúriajoun Moisés, ában irájü buídumeraüti, ába jagúriajani lagúbürigu jábiñe luágu úruwa játi. ²¹ Dan lachúlürünbei dan lun jáguruni, ába jáguruni, ába tabúduni liraú urúei Ejíptona, ába tagúriajani quei tiraú. ²² Ligía lafúnrendeirubalin Moisés líchú jáu Ejíptona, áni gabáfutiti lídan le laríñagubei lúma le ladúgübei.

²³ Dan le bián-weínjali irúmu láu Moisés, ába lálugun lídin aríjaña lirásan ja ladúgawagun Israél, ja ñíbaña Ejípto. ²⁴ Ába laríjin ában Ejíptona amúdiragua ában jádaangiñe, ába lídin Moisés íderaguei lidúje, ába leséfuruni láu láfaruni Ejíptona ligía jilágubei. ²⁵ Moisés, jarítaguati luágu jasúbudirúbei lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti. ²⁶ Larúgan, ába ladúnragun Moisés jáma bíama Israelítagu ageíndagua jámagua, ába yebe labúseerun laráandaragüdüniña jámagua. Ítara líña laríñagunbei joun. “Ában mémetia mútu jugúya, ¿ca uágu jageíndagua jámagua?” ²⁷ Ábati ládaruni wügüri le áluajabei wurfbu lúma le ában,

ába laríñagun lun. “¿Ca íchubalibu ábutime lúma agúseragüdütime wádan? ²⁸ ¿Buséntibu gíne báfarunina quei báfaruni Ejiptona ligíra gúñaarü?” ²⁹ Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi quei teréncha, ába jáguchi lan bián irájüñü ñi.

³⁰ “Bián-wein irúmu lárigiñe, ába lasáriragun ában ánjeli lun lídan fulásu mageírawati, yaráfa lun wúbü le gírubei Sinaí, liábin lun quei wátu geméti lídan ában búbugati. ³¹ Ába laweíridun lanígi Moisés láu cátei le laríjubei, dánti layárafadun lúntima laríjini buídu, ába lagáambun laríñagun lumálali Wabúreme Búngiu. ³² “Áu Jabúngiute binádu bagúbürigu, Lubúngiute Abrahám, Lubúngiute Isáac lúma Jacób.” Ábati lagúmeserun Moisés adádagara láu anúfudei, májaali ni lun laríjin ñíjin. ³³ Ába laríñagun Búngiu lun. “Gidáboun bigeídin lueígiñe bugúdi, ladúga fulásu le ñi bubei rára, fulásu sánduti. ³⁴ Aríja náali jasúfurirun numútuniña Ejipto, agáamba náali jagúajan láu igárigu, neséfuraaña lubefti. Jigábu lubefti, nouñajadibu Ejipto.”

³⁵ “Láu sun mebéresen jamá láu Moisés, álügüda jameí ca lan íchubalin ábutime lúma agúseragüdütime, oúnaja lumúti Búngiu quei ábuti lúma quei eséfujati, adímurejeina Búngiu lídaangiñe ánjeli le asálragebei lun lídan búbugati. ³⁶ Moisés aságarubaliña binádu wagúbürigu Ejiptogiñe, adúga ligía miláguru buri lúma buri cátei weiriguti lídan fulásu ligía, lídan Barána Funáti, lúma lídan fulásu mageírawati, luágu bián-wein irúmu. ³⁷ Moisés meme le, ligía aríñagubei joun Israelítagu. “Louñajaba Búngiu ában proféta jun jádaangiñe guánarügü jibriña, quei louñajanina. Adúga jumá gásu láu.” ³⁸ Lídan le añája lubei Israelítagu adámurigu lídan fulásu mageírawati, Moisés méme le, ába ladímurejan lúma ánjeli luágu wúbü le Sinaí, ába lásügüragüdüni lererun ánjeli ligía joun binádu wagúbürigu. Ligía le erésibirubalin ugánu le adúrurubei lun sun dan lúmagiñe Búngiu lun lásügüragüdüni woun.

³⁹ “Májatiña meja binádu wagúbürigu jagáambuni Moisés, mebéreseruntiña láu, busén-rügü jagía jagíribudun Ejiptoun. ⁴⁰ Ábati jaríñagun lun Aarón. “Buséntiwa lun badúgün búngiugu woun lun jóúdin wabá wabá, ladúga ibídiñeti woun ca lan susérebei lun Moisés, le aságarubaliwa Ejiptogiñe.” ⁴¹ Ábati jadúgün ában tiyáwa bágasu lun jasándunme, ába jáfarun anímaalugu lun jadágaragüdüni tun jasándun, ába jadúgün fédu lun jagúndaarun láu cátei le jadúgübei láu jájabu. ⁴² Ábati ladíreirun Búngiu jaweí, ába lígíruniña lun jájuduragun joun warúguma ja siélubaña. Ítara líña labúrüdün tídan jalíburun profétagu. Jugúya Israelítagu, ¿áfaratün funági anímaalugu lun jadágaragüdüni nun lídan bián-wein irúmu le jáubei lídan fulásu mageírawati?

⁴³ Madúgün jumúti lira, lubáragiñe lira, barú jumuti jisándun Molóc tídan lágei to jadúgüboun lun,

túma tiyáwa warúguma to gíríboun Renfán, to gíne janúgüboun quei jisándun, iyáwaü buri ja jadágun guánarügü lun jájuduragun joun.

Ligía naságarubadün lubei jageíragiñe, nouñajaünme yagúroun méme lueí Babilónia.

⁴⁴ “Lídan fulásu mageírawati, níñoun méja lúban Búngiu to gadíñurúwadiboun jáma binádu wagúbürigu, ñi lubei lerédera Búngiu jáma. Adúga lumútu Moisés lúban Búngiu tugúya queisi larúfuduni Búngiu lun lun ladúgünun. ⁴⁵ Nújeingua méja múna tugúya jáma jadúgawagun binádu wagúbürigu, ába janúgünun jámawaga lídoun fulásu le ñi lubei waganawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoúbaña ya. Ítara líña, nújeingua lubei lúban Búngiu tugúya lídan fulásu le darí lidáani Davíd. ⁴⁶ Daríti urúei Davíd fuleísei ligíbugiñe Búngiu, ába labúseerún yebe ladúgün ában témpulu lun laganoún Lubúngiute Jacób ñi, ⁴⁷ Salomón adúgubarun témpulu tugúya, ⁴⁸ láu sun, maganoún lan Búngiu le weirigutimaabei tídan buri liglisi to jadúga gírígia, quei meja laríñaguni proféta.

⁴⁹ Siélu nálabeli le ñí lubei nañúura lun narúejan, uboú, le ñí lubei neméraaguagüdei nugúdi.

¿Cába tuwúyeri múna jadúga nun? líña laríñagun Búngiu.

¿Cátei fulásu le ñí lubei gayára lan neméraagun?

⁵⁰ ¿Ma funági nadúga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítara jíña quei ja ibídiñejabúbaña lun Búngiu. Súnwandan májatün lun Sífiri Sándu, ítara jíña quei binádu jagúbürigu. ⁵² ¿Ca jádaangiñe profétagu mouserun jabáña binádu jagúbürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti dan liábin, ába jalúguruni joun láganiñu, ába jáfaruni jilágubei. ⁵³ Jugúya le erésibirubálin lilúrudun Búngiu jámagiñe ánjeligu, mídintün láu.

Louñwen Estéban

⁵⁴ Dan jagáambunbalin cátei le, ába jagáñidun buídu, ába lacúnrinjan jári luágu Estéban, le jagáñi lun. ⁵⁵ Ánjein Estéban, buin líña láu lubáfu Sífiri Sándu, ába laríjin siélun, ába laríjini luweírigun Búngiu, lúma Jesúsu rára lueígiñe louñwenren Búngiu. ⁵⁶ Ába laríñagun joun.

—¡Aríja jumá! Aríagu níña lun siélu darágu, lúma Jesúsu le Wügúri Garaúwarügüti, lueígiñe louñwenren Búngiu.

⁵⁷ Ába jadáuruni jarígei láu jájabu lueí jagáambuni, ába jayábin sun jagía luágun, agúarajeina. ⁵⁸ Ába jaságaruni ubúruguñe, ába jígirunun gefeentiña janáangun lábugiñe lariaajan ában wügúri gíríti Sáulo, ába jachámuragun dúbü luágun Estéban. ⁵⁹ Súnti anája lan achámuragua dúbü luágun, ába layúmuragun Estéban lun Jesúsu, ába laríñagun.

—Nabúreme Jesúsu, resibiboún nuwáni.

⁶⁰ Lárigiñe, ába lájuduragun, ába lagúaragun.

—Nabúreme, míchigabá dúru jawágun lueígiñe figoú le.

Lárigiñe laríñaguni le, ába louñwen.

8

Leíbaajaniña Sáulo ja afíñebaña luágu Crístu

¹ Sáulo, gúndaatiti láu láfarún Estéban.

Wéyu méme ligía, ába lagúmeserun ában ouñwenbun eíbaajouñi jawágun ja afíñebaña luágu Jesucrístu, Jerusalén. Ába janúragun lídoun buri lirájüñü fulásu Judéa lúma Samária le míbetiña güriña ñi, apóstologu rügüñanu manúrajan. ² Ába jayábin wügúriña ja derégeguatiña jóungua lun Búngiu, ába jábununi Estéban láu sarágu íruni luágu louñwen. ³ Ábati lasígirun Sáulo eíbaajaña afíñetiña, ábaja lebélorun tidoun sun múna lun laságaruniña wügúriña jáma wúríña adúruujeina, ába louñajaniña furisunrugun.

Lapúrichijouñ ugánu buíti luáguati asálbaruni Samária

⁴ Apúrichija jamúti ja anúrajabaña Jerusaléngiñe ugánu buíti luágu chülú lan Jesucrístu lun lasálbaruniña sun güriña, sun le ñí lumuti jóúdin. ⁵ Ába lídin ában jádaangiñe, gíríti Felípe, lídoun ában ubúrugu Samária, ába lagúmeserun adímureja joun ja ñibaña luágu Crístu. ⁶ Ábaja jóundaragun güriña, ru jagía jarígei lun le ladímurejabei Felípe, aríja jameí buri gñe miláguru le ladáagubei. ⁷ Ladúga sarágu buri güriña ja gawágutiña espíritugu wuríbatíña, areídaguatiña, ába buri jáfuridun espíritugu wuríbatíña jagía agúarajeina jádaangiñe, areídagua jagía sarágu derégüdaaña jamá, meíbuguntiña. ⁸ Súnti güriña lídan fulásu ligía, gúndaatiña luágu cátei le.

⁹ Níñein ában wügúri lídan fulásu ligía, gíríti Simón, gabíñarajati meja, lúñajaali ayéejaña güriña Samariána láu laríñagun joun luágu máma lan furúmieguarügü güriña

ligía. ¹⁰ Agáambaja jamútítíja sun gürígia buídu, jámagiñe ja gudémegutiña dagá jámoun ja weírigutiña, ába jaríñagun.

—Ibíja lumúti gürígia le ouñwenbun lubáfu Búngiu.

¹¹ Adúgatiñatíja gásu láu, ladúga lúñajaali ayéejaña láu labíñarajan. ¹² Dan le jafíñerunbei luágu ugánu le líchugubei Felípe joun luágu larúeijan Búngiu lúma luágu Jesucrístu, dándu wügúriña quei würiña, ába jabásterún. ¹³ Simón meme ligía ába gíñe lafíñerun, ába gíñe labásterún, ába lagúmeserun afálarei Felípe, le luweírín lanígi láu buri ouñwenbun buri miláguru lúma seíni le ladaágubei Felípe.

¹⁴ Dan le jagáambunbalin apóstolugu ja Jerusalénbaña luágu resíbi jamáali lan Samariána lerérún Búngiu, ába jounajani Pédro lúma Juan ñi. ¹⁵ Dan le jachúlürünbei, ába jayúmuragun jawágu afíñetiña ja Samariána lun liábiba Sífiri Sándu jádoun, ¹⁶ ladúga miábíngili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesús. ¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu núbin lan Sífiri Sándu jádoun gürígia dan le jíchuguni apóstolugu jájabu jawágu, ába lálugun lagáñijani ubáfu ligía jámagiñe láu seínsu. ¹⁹ Ába lariñagun joun.

—Rújumei gíñe ubáfu le nun, lun dánme lan níchuguni nújabu luágu furúmiegúarügü, lun gíñe lerésibiruni Sífiri Sándu.

²⁰ Ábati lariñagun Pédro lun.

—Beíba máfiougatin láu sun biseínsun, ladúga jarítaguatibu luágu gayára lan lagáñijoun cátei le ledéweejan Búngiu. ²¹ Maríchatibu, mafánran bugúya lídan wesériwidun lun Búngiu, ladúga múaraantu banígi ligíbugiñe Búngiu. ²² Ígirabeí buríban le, ayúmuruagabá lun Búngiu, lun ferúduna lánibu luágu luríban barítagun. ²³ Ladúga aríja numúti luágu buin tíña lan banígi láu wuríbani, áni ragúñu liñálibu Máfia.

²⁴ Ábati lariñagun Simón.

—Ayúmuruagua jumá lun Búngiu nuágu lun masúseredun lan ni cáta nun lídaangiñe le jaríñagubei.

²⁵ Lárigiñe jíchugun fe luágu Jesucrístu lúma jadímurejani lerérún Búngiu lídan fulásu ligía, ába japúrichijani apóstolugu ugánu buíti luáguti lasálbaruniña Jesucrístu gürígia lídaangiñe jafígoun lídan sarágu lirájüñü fulásu Samária, luágu jaweíyasun járgouñ Jerusaléoun.

Felípe lúma wügúri le Etiopiana

²⁶ Lárigiñe cátei le, ába lariñagun lání Wabúreme Búngiu ánjeli lun Felípe.

—Aráansebá, beíba luágun sur lídaangiñe úma le arárirubei Jerusaléngiñe lun ubúrugin Gáza.

Ligía úma le ásügürübei lídaangiñe fulásu mageírawati. ²⁷ Ába laráanserun Felípe, ába lídin. Luágu leíbuguniwágu, ába ladárirun ában wügúri Etiopiana lubá lubá. Wügúri ligía siñáti garaú lan, ában wügúri weíriguti, ligía gíñe gamánijaribei láu sun tiseínsun Candáce to lurúeite Etiopía. Liábiñati wügúri ligía Jerusaléngiñe lárigi lídin ájuduragua lun Búngiu.

²⁸ Lagríbuduñáti lageíroun, ñun tídan ában cárü, alíjeinalouñ lilíburun proféta Isaías.

²⁹ Ábati lariñagun Sífiri Sándu lun Felípe.

—Yaráfabá tuágun cárü túra.

³⁰ Ába leíbaagun tuágun cárü, ába lagáambuni lalíjaña lan tídan lilíburun Isaías, ába lariñagun lun.

—¿Gunfaráanda bumútisan le balíjabei?

³¹ Ába lariñagun wügúri ligía lun.

—¿Ída lubági gunfaráanda náani, úaga cába lan afúnraanguágüdei nun?

Ába lariñagun lun Felípe lun ládinun lúmoun lun lañúurun loubagiñe.

³² Niján buri dimúrei le lalíjabei.

Quei mudún, lanüğüwa lun lafarún jilágubei,
ítara quei leréderun mudún maníñu jagíbugiñe ja ásarubalín líyu,
ítara líña gíñe maríñagun lan ni cáta.

³³ Únabuti lanüğüñ, áni michugúnwati lirícha lun,
siñábei ladímurejóun jawágu ladúgawagun,
ladúga gumúja lan labágaridun uboúagu.

³⁴ Ába laríñagun wüğüri ligía lun Felípe.

—Adúgabei fuleisei nun, aríñagabei nun, ¿cáteisan le uágubei laríñagei wüğüri le abúrújabei dimúrei le, luougua, ódi luágu ámu?

³⁵ Ábati lagúmeserun Felípe arúfudajei Lerérun Búngiu lun, lúmagiñe le ñígiñe lubei lagúmesera alíja, ába líchuguni ugánu luáguti Jesúsu lun. ³⁶ Dánti le jásügürinbei lídaangiñe ában fulásu le ñí lubei dúna, ába laríñagun wüğüri ligía.

—Nijántia dúna, ¿siñátisan nabásterun?

³⁷ Laríñaga Felípe lun.

—Ánjein affíñe bubei luágu Jesucrístu táu sun banígi, gayáraati babásterun.

Laríñaga wüğüri ligía lun.

—Affíñetina luágu Jesucrístu lan Liraúbei Búngiu.

³⁸ Ábati laráramagüdúnun cárü, ába jarárirun biángubei jagía dúnarugún, ába labásterágüdüni Felípe. ³⁹ Dan jamúdeirun dúnarugugiñe, ába lanüğüni láni Búngiu Espiritu Felípe ñígiñe, ába maríjin láali lan wüğüri ligía. Ába lasígiruni leíbugun, gúndaañu.

⁴⁰ Ába ladáriragun Felípe lúngua Azóto, ába lídin lídaangiñeina fulásu apúrichijeinalef ugánu luáguti Crístu darí lachúlürün Cesaréa.

9

Lerésibiruni Sáulo Crístu queisi lasálbaragüle

¹ Sun dan ligía, merédeti lasíadiruniña Sáulo affíñetiña luágu Jesucrístu. ² Ligía lídinbei lúmoun fádiri íñutimaati lídan jafíñen juríu amúriaja gárada láutu ubáfu lun lídin tídan buri jalígilisin jurfu to Damáscoboun áluajaña ja afálarubalin lémeri Crístu lun lanüğüniña adáuragua Jerusalén, dándu wüğüriña quei würiña. ³ Luágu leíbuguniwágu, dan yaráfaali lun Damáscó, sódini ába ladúnraagun ában larúgounga siélugiñe, geyégua láu. ⁴ Ábati láburujan Sáulo múarugún, ába lagáambun laríñagun ában umálali lun.

—Sáulo, Sáulo, ¿ca uágu beíbaajana?

⁵ Ábati laríñagun Sáulo.

—¿Cátabusan Nabúreme?

Ába laríñagun umálali ligía.

—Jesúsu áu, le méme beíbaajabei. ⁶ Sarába, belúba ubúrugun, laríñawagúba bun ñi cába lan badúga.

⁷ Wüğüriña ja úrabaña lúma Sáulo lídan luweíyasun, ába jaráramun láu luweírin janígi ladúga agáamba jamúti umálali, áni maríjin jamúti le adímurejabei. ⁸ Ába lásaarun Sáulo múarugugiñe, dan le léfegechúnbalin lágu, maríjinjali. Ábati járügüdüni lújabu, ába janüğüni ubúrugun Damáscó. ⁹ Ába leréderun úrúwa wéyu ñi maríjinga, meígin líña, mátun ni cáta.

¹⁰ Ñíñein ában affíñeti luágu Jesucrístu ñi Damáscó gíríti Ananías, le únbei layáwadagua Wabúreme Jesúsu, ába laríñagun lun.

—¡Ananías!

Ába loúnabun.

—Anája ya, Nabúreme.

¹¹ Ábati laríñagun Jesúsu lun.

—Beíba guetó guetó luágu úma le gíribei Surúti, danme le bachúlürün lúbiñe Júdas, bálügüdajame luágu ában wügúri Társona gíriti Sáulo. Badárirubei ñi ayúmuragua lun Búngiu, ¹²áni ayáwadaguaali ában wügúri gíriti Ananías lun, ába líchuguni lújabu luágu lun gayára lan laríjin.

¹³Dan lagáambunbalin Ananías cátei le, ába laríñagun.

—Nabúreme, gíbeeñátia abájüdagutiña nun luágu wügúri ligía lúma luágu sun wuríbani le ladáagubei joun ja afíñebaña buágu, Jerusalén. ¹⁴Guetó, liabiña ñájoun láu ubáfu jámagiñe jábutigu fádirigu lun ladáuraguniña sun ja bánigubaña.

¹⁵Ába laríñagun Jesúsu lun.

—Beíba, ladúga anúadira náali wügúri ligía lun ladímurejan nuágu joun gürígia ja mámabaña juríu lúma joun jarúeitegu, lúma gíñe joun Israelítagu. ¹⁶Narúfudubei sarágu cátei le lúnbei lasúfuriruni nuegiñe lun.

¹⁷Ábati lídin Ananías lídoun fulásu le ñí lubei Sáulo. Ába lebélorun múnadoun, ába líchuguni lújabu luágu, ába laríñagun lun.

—Nidúje Sáulo, loúnajañadina Wabúreme Jesúsu le arúfudagubei lúngua bun luágu úma le ñígiñe lubei bíabin, lun gayáraaya lan baríjin, lun gíñe berésibiruni Sífiri Sándu.

¹⁸Lídan óra ligía, ába leíguadun camá jamuga arúraü luegiñe lágu, ábaya laríjin. Lídan óra ligía, ába labásterún. ¹⁹Lárigiñe, ába leígin, ábaya lejéredun, ába leréderun átiri wéyu jáma afíñetiña ja aganoúbaña Damáscu.

Lapúrichijan Sáulo Damáscu

²⁰Ába lagúmeserun Sáulo apúrichija tídan buri jalgílisin juríu, laríñaga luágu Jesúsu lan Liraúbei Búngiu. ²¹Súnti ja agáambubalín, ába laweíridun janígi, jaríñagati.

—¿Másan niján wügúri léñaja eíbaajabáliña ja afálarubalin Jesúsu Jerusalén? ¿Ma ligía méme le ñúbinbei ya lun lanáanguniña adáüra, lun ledéregeruniña joun jábutigu fádirigu juríu?

²²Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña gürígia lídaangiñe jafígoun, darí lun labúlíeidaguágüdün jáu juríu buri ja aganoúbaña Damáscu.

Leséfurun Sáulo jaweí juríu

²³Lárigiñe sarágu wéyu, ába jelédegun juríu lun jáfaruni Sáulo jilágubei, ²⁴ába lasúbudirawagüdün le jabúseerubei jadúgün lun Sáulo. Wéyuagu, áriebe, jagúrabajanja juríu luágu béna le áfuridagülei le láni ubúruagu Damáscu lun jáfaruni jilágubei. ²⁵Ába jíchuguni afíñetiña lídoun ában faniñe weíriti, ába jarárigüdúni áriebe luegiñe baríeru le geyégubei láu ubúruagu, ába leséfurun.

Sáulo ubúruagu Jerusalén

²⁶Dan le lachúlürünbei Sáulo Jerusalén, ába yebe lálugun ladaragun lúngua jádoun afíñetiña, sun jagía, janúfudetiña luei, ladúga mafíñetiña yebe luágu afíñejali lan luágu Jesucrístu. ²⁷Ába lanúgüni Bernabé jagíbugiñoun apóstolugu. Ába labájüdagun joun luágu laríjini Sáulo Jesúsu luágu lefbuguniwágu, lúma luágu ladímurejan Jesúsu lun, lúma luágu lapúrichijan Sáulo furáangu luágu Jesúsu ubúruagu Damáscu. ²⁸Ábati jerésibiruni Sáulo queísi jánigu, ába lefbugun jáma Jerusalén, ²⁹apúrichijeina luágu Wabúreme Jesúsu furáangu. Lárigiñe ladímurejan luágu Jesúsu jáma juríu ja adímurejabaña güríegu, asígeneja ligía jáma, ába jabúseerun jáfaruni jilágubei. ³⁰Dan le jasúbudirúnbalin afíñetiña cátei le, ába janúgüni Sáulo ubúruagu Cesaréa, ñígiñe ába jounajani Társonun.

³¹Lídoun buri dan ligía, buíti jóuserúniwa afíñetiña luágu Jesucrístu ja aganoúbaña Judéa, Galiléa, lúma Samária. Ába jedérebugudún lídan jafíñen luágu Jesucrístu, falájamei le lubei, resíbi jagía gurásu lúmagiñe Sífiri Sándu. Ába agánwoundeina jamá afíñerutiña.

Lareidagun Enéas

³²Dan le lebélujaña lubef Pédro lídan buri fulásu lun líderaguniña ja affñeñaabaña luágu Jesucristu, ába gñe lídin aríjaña lánigu Búngiu ja ubúrugubaña Lída. ³³Ni ladárra ában wügúri gíriti Enéas, widú irúmu láu gabánarugu láu derégüdaü. ³⁴Ába laríñagun Pédro lun.

—Enéas, areidaguagüda lumútibu Jesucristu. Sarába, aráanseboún bigábana.

Ába lásaarun Enéas óra ligía. ³⁵Ába jarjini sun ja aganoúbaña fulásu buri Lída lúma Sarón, ába jígiruni binádu jaffñen, ába jaffñerun luágu Jesús.

Táguuyugun Dórcas

³⁶Lídan meja dan ligía, ññoun meja ában affñetu aganoútu Jópe, gíritu Tabíta, lídan jererun güriégu, gíritu Dórcas. Wúri tugúya, súnwandan táu adúga buíti, íderagua tugúya gudemetiña. ³⁷Lídoun dan ligía, ába tasándirun Dórcas, ába toúnwen, lárigiñe jágawagüdünun, ába jaríwachaguagüdünun. ³⁸Yaráfati Jópe lun Lída le ñí lubei Pédro, queíti jagáambuni affñetiña luágu níjein lan ñi, ába jóunajan bián wügúriña aríñaga lun.

—Queímoun Jópe, oúfuda.

³⁹Ábati lídin Pédro jáma. Dan le lachúlürünbei, ába janúgüni tídoun rúmu to ñí tubei jiláaru, ába jagúriridágun sun würiña ja jiláguaañabaña úmari láu, ayájuaja tárigi, arúfudajoún buri dínugu túma simísi tó buri tájüchaguboún Dórcas dán meja moúnwengiru, lun. ⁴⁰Ába láfuridagüdúniña Pédro sun ja ñíbaña, ába lájuduragun, ába layúmuragun lun Búngiu. Ábati laríjin tuágun jiláaru, ába laríñagun tun.

—Tabíta, sarába.

Ábati téfegechuni tágu, dan tarjini Pédro, ába tiñúragun túngua. ⁴¹Ába lárügüdüni tújabu, ába lásaaragüdünun. Lárigiñe, ába lagúarun joun würiña jagía jáma jíbiri affñetiña ja ñíbaña, ába larúfudunun joun, wínwañu. ⁴²Ába lagaambún cátei le lídan sun ubúru gu Jópe, ába sarágu jamá affñerutiña luágu Jesucristu. ⁴³Ába leréderun Pédro sarágu dan lídan ubúru gu ligía, lúbiñe Simón le aráansejabei úraü.

10

Lóunajan Cornélio ougei Pédro

¹Ñíñein ában wügúri ubúru gu Cesaréa gíriti Cornélio, gumándan joun súdeara ja Italiána. ²Wügúri ligía jáu sun lufámilian, derégeguatiña jóungua lun Búngiu, judúguatiña lun Búngiu láu sun máma jamá juríu. Rúti buri gñe sarágu seínsu lun jíderawagún juríu, áni súnwandan layúmuragun lun Búngiu. ³Luágu ában wéyu, queí buri ladaúnrün úrüwa rábounwéyu, ába lasáliragun ában láni Búngiu ánjeli lun, furáangu, ába laríñagun lun.

—¡Cornélio!

⁴Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjaleí buri cátei le badúgübei lun bíderaguniña gudemetiña. ⁵Oúnajabá lubeíti wügúriña ubúru gu Jópe lun jóuguni Simón, le gñe gíribei Pédro, lun liábin bun. ⁶Lúbiñe Simón le aráansejabei úraü, le gábanbei láru barána.

⁷Dan le ñúdüñjali ánjeli le adímurejabei lúma Cornélio, ába lagúarun joun biáma jádaangiñe lumúsuniña lúma ában lisúdaaran, súdeara ligía, ában wügúri derégeguati lún-gua lun Búngiu, leménigira Cornélio. ⁸Ába labájüdaguni sun cátei joun, ába lóunajaniña ubúru gu Jópe.

⁹Larúgan amídirugu, sun ayárafadeina jamá wügúriña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu. ¹⁰Weíríjaliti liláma óra ligía, busénjali leígin. Dan le añaja lan aráanserei leígin, ába lasáliragun ában cátei lun itara. ¹¹aríja lumúti lánjunrenchun siélu, ába tiábin ában cáton camá jamuga gamísa

weírítu gürágu luefígiñe gádürü tarígei, tíabin arárireina múarugun. ¹² Tídan gamísa tugúya, ññanu sun jawúyeri anímaalu, gádürügua tugúdi, jéwe, jáma dunúru. ¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beígin.

¹⁴ Ába louñabun Pédro.

—Uá, Nabúreme, meígiñajágidina ni cáta le wanígübei quei mabuídunti según lilúrudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdün Búngiu, maríñagabá luágu luágu mabuídun lan.

¹⁶ Úrúwañein weíyaasu lasúseredun cátei le, lárigiñe, ábaya tamúdeirun gamísa tugúya siélun. ¹⁷ Súnti niján lan Pédro láu luwefrin aríttaguni luágu, asáminara ca lan laníchigubei cátei le laríjubei, ligía jachúlürün luwúgüríñan Cornélio, álügüdajeína tuágu lúban Simón.

¹⁸ Dan jachúlürün tubéneri múna, ába jálügüdajan rein ánjein ní lubei lagánawa ában grítí Simón le gíñe únbei jaríñaga Pédro. ¹⁹ Queíti buga nijágu lan Pédro asáminara luágu cátei le asálaragubei lun, ába laríñagun Sífiri Sándu lun.

—Añája úruwa wügüríña álugabu, ²⁰ raríba, oúfudabá, beíba jáma láu afñeni ladúga áu lan ouñajabalíña.

²¹ Ábati larárirun Pédro le ññin jabei wügüríña ja louñajabaña Cornélio, ába laríñagun joun.

—Áu le jáluajabei. ¿Ca gabúgürübalün?

²² Ába jaríñagun.

—Louñajan gumándan le gríbeí Cornélio wagía, ában wügürí surúti, derégeguati lúngua lun Búngiu, jínsiñeti joun sun jurú. Núbinti ában ánjeli aríñaga lun lun louñajan ougabu lun bídin lúbiñe, lun lagáambuni le lúnbei baríñaguni lun.

²³ Ábati lebélaagüdúniña Pédro, ába jeréderun lúma ñi áriebu ligía. Larúgan, ába lídin Pédro jáma, núdüntiña gíñe jádaangiñe affñetiña ja aganoúbaña Jópe jáma.

²⁴ Larúgan, ligía jachúlürün Cesaréa, le ní lubei Cornélio agúrabaña jáu lidújeñu jáma jabuídun-ágei lumádagu ja lamísurajabaña. ²⁵ Dan lachúlürün Pédro, ába láfuridun Cornélio erésíbirei, ába jájuduragun ligíbugiñe láu sarágu inébesei. ²⁶ Ába liñúraguni Pédro, ába laríñagun lun.

—Ráramabá, wügürí giñe áu bíledi.

²⁷ Súnti niján lan adímureja lúma, ába lebélorun, ába ladárirun sarágu gürígia adámuriñu ñi. ²⁸ Ábati laríñagun Pédro joun.

—Subúsi jumúti luágu mája lan wafíñen wagía jurú lun jóundaragun jurú jáma ja mámabaña jurú quei jugúya, ni lun webélurun tídoun jában lueí wasárirun mabuídunga ligíbugiñe Búngiu. Wel, arífuda láali Búngiu nun luágu mabúseerun lan lun nouseruniña ja mámabaña jurú queísi gürígia mabuíduntiña. ²⁹ Ligía nánjanrunbei niábin dan le bouñajanbei nuágu. Buséntina jamúgati nasúbudiruni ca lan lébubei jóunajan nuágu.

³⁰ Ábati louñabun Cornélio.

—Úruwa wéyu guetó, queíhuri óra le, ññadina núbiñe ayúmuragua lun Búngiu ladaürün úruwa rábounwéyu, queísi wéchun, ligía lasálaragun ában wügürí nun táu ában dáüguau mirítu. ³¹ Ába laríñagun nun. “Cornélio, agáamba láali Búngiu bayúmuragun, jarítaguaaliti luágu buri cátei le badúgübei lun bíderaguniña gudémetiña. ³² Oúnajabá lubeíti wügüríña ubúru gué Jópe ougei Simón le gíñe gríbeí Pédro, lúbiñe ábanya Simón aráansejati úraü, le gábanbei laru barána, ñi lagánawa.” ³³ Ába lubeíti nouñajan ougabu furése, áni buítiti badúga biábin. Guetóti awánja sun wagía ya ligíbugiñe Búngiu, buséntiwati wagáambuni le laríñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába laríñagun.

—Subúdi náali guetó luágu ában lan lábu lanúgüniña Búngiu sun güriǵia. ³⁵ Resfbirügü lumútiña sun ja inébejabúbaña lun áni adúga jamef le buídubei, dándu juríu quei ja mámabaña juríu. ³⁶ Adímurejati Búngiu joun ladúgawagun Israél, adímurejeina ugánu luáguti gayára lan jaráandarun güriǵia luma Búngiu lídaangiñe Jesucrístu, le Jabúremebei sun güriǵia. ³⁷ Jugúya, subúdi jumúti cátei le asúseredubei jageíra juríu buídu, le agúmeserubei Galiléa lárigiñe lapúrichijan Juan, áni abásteragüdaja ligía. ³⁸ Subúdi jumúti luágu rúlaani Búngiu lubáfu Sífiri Sándu lun Jesúsu Nazarétna, luágu meja giñe ladaágun buíti, lúma lareídaguagüdüniña ja asúfurirubaña lábugiñe lubáfu Máfia. Ladúgünbalin buri meja cátei le, ladúga ñiñein lan Búngiu lúma. ³⁹ Wagía geféentiwa luágu sun cátei le ladúgübei Jesúsu Jerusalén lúma lídan sun líbiri jageíra juríu. Lárigiñe, ába jáfaruni jilágubei láu jádaraguní luágu ában gurúwa. ⁴⁰ Sarágüda lumúti Búngiu lídaangiñe ouweni luágu lúruwan wéyu, ába larúfudaguagüdüni lúngua wínwañu woun. ⁴¹ Marúfudagúnti lúngua joun sun güriǵia, luefidügüya woun, wagía le anúadaja láañabaña Búngiu lúmagiñe binárü quei geféentiña luágu lásaarun lídaangiñe ouweni. Joutiwa lúma, gurá wagía lúma lárigiñe lásaarun lídaangiñe ouweni lúnya labágaridun. ⁴² Ába louñajaniwa apúrichija joun güriǵia luágu, lun giñe waríñaguni luágu rúlaali lan Búngiu Jesúsu méme le lun lagúseragüdüniña ja wínwangiñabaña jáma ja jiláguañabaña dánme le lagríbudun ubouágun. ⁴³ Adímurejaña meja giñe sun profétagu luágu Jesúsu lúmagiñe binárü, luágu sun lan ja afñeabaña luágu, resfbi jamáni ferúdu luágu jafígoun.

Jerésibiruni ja mámabaña juríu Sífiri Sándu

⁴⁴ Nígili Pédro adímureja, ligía liábin Sífiri Sándu jádoun ja agáambajabalin ladímurejan. ⁴⁵ Játi juríu ja afñetiña luágu Jesucrístu ja ñúbinbaña úara lúma Pédro, ába laweíridun janígi láu liábin Sífiri Sándu jádoun ja mámabaña juríu. ⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigun Búngiu. ⁴⁷ Ábati laríñagun Pédro.

—¿Majouabei funági lun jabásterún güriǵia ja, quei resfbi jamáli lubeí Sífiri Sándu queígubeirügü wagía?

⁴⁸ Ába líchugun dimúrei lun jabásterun lídan líri Jesucrístu. Lárigiñe, ába jayúmuragun lun Pédro lun leréderun átiri wéyu jáma.

11

Labájüdagun Pédro joun tílana ligílisi to Jerusalénboun luágu le asúseredubei Jópe

¹ Ába jagáambuni apóstolugu jáma jíbiri afñetiña ja Judéabaña luágu ánjaaña lan giñe ja mámabaña juríu lun láni Búngiu ugánu luáguti Wasálbaragüle, Jesucrístu. ² Dánti le lagríbudun Pédro Jerusaléoun, ába jachúrajani juríu ja afñetiña, ³ jaríñaga.

—¿Cámesan bídin aríjaña ja mámabaña juríu, áni jou amúrü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába laríñagun.

⁵ —Ubúrugüñadina Jópe, ayúmuragua lun Búngiu, ligía naríjin ában cátei lasáliragun nun camá jamuga ában gamísa weírítu tarárirun siélugiñe, gürágu luegiñe gádürü tarígei, tiábin chülú le ñí nubei. ⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürügüa tugúdi ñi, anímaalugu gáñitiña, jéwe, jáma dunúru. ⁷ Ába nagáambun laríñagun ában umálali nun. “Sarába Pédro, áfarabá jádaangiñe, joubei.” ⁸ Ába naríñagun. “Uá, Nabúreme, ladúga meígiñajágidina ni cáta le wanúgübei quei mabuídunti según lilúrudun Moisés.” ⁹ Ábayati ladímurejan umálali siélugiñeti ligía nun, laríñaga nun. “Le cátei le labuíduragüdü Búngiu, maríñagabá luágu luágu mabuídun lan.” ¹⁰ Úruwañein wefyaasu lasúseredun cátei le, lárigiñe, ábaya tamúdeirun siélun. ¹¹ Lídan óra ligía, ligía jachúlürün úruwa wügüríña tídoun múna to ñí nubei, ouñajoutiña Cesaréagiñe álugana.

¹² Ába laríñagun Sífiri Sándu nun lun nídin jáma láu afñeni. Núdüntiñá giñe sísi afñetiña

ja núma. Dan wachúlürün Cesaréa, ába webélurun sun wagía lúbiñoun ában wügúri, ¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Oúnajabá wügúriña lun jóudin ubúrugu Jópe ougei Simón le gñe gríbeí Pédro, ¹⁴ laríñagubei bun ída lúba lan gayára lan basálbarun jáu sun bufámilian.” ¹⁵ Dan nagúmeserúnbei adímureja joun, ába liábin Sífiri Sándu jádoun queí meja liábin wádoun furúmiñe. ¹⁶ Ábati narítangun luágu lé meja laríñagunbei Wabúreme. “Ináriuni luágu badíseigüda lan Juan láu dúna, ánjein Búngiu, labásteragüdübáduñ láu Sífiri Sándu.” ¹⁷ Ánjeinti ru lubálin Búngiu líbe le líchubei woun, wagía le affíneelibeí luágu Jesucrístu, joun, ¿cátanañadináti lun neréderubei lan le labúseerubei Búngiu ladúga?

¹⁸ Dánti le jagáambuni affíñetiña ja Jerusalénbaña cátei le, ába jámanichun. Ába jadímurejan luágu luweírigan Búngiu, ába jariñagun.

—¡Rújali lubei giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin íbágari magúmuchaditi!

Ligílisi to Antioquiana

¹⁹ Dan le láfarúnbei Estéban, ába gñe jagúmeserun eibaajaña ja jíbiri affíñetiña, ába janúrajan jíbiri chúlú Fenícia, Chíppe, luma Antioquía. Ñi jíchigei ugánu luáguti lasálbaruniña Jesucrístu gürgía lídaangiñe jaffgoun jóunrügü juríu, máma joun ámu gürgía.

²⁰ Ánjeinti affíñetiña ja Chíprena jáma Cirénena, ába jachúlürün Antioquía, ába gñe jadímurejan joun ja mámabaña juríu, ába jíchuguni ugánu luáguti Wabúreme Jesucrístu joun lun jasálbarun. ²¹ Ñíñein lubáfu Búngiu jáma affíñetiña jagía, sarágu ja mámabaña juríu, ába jígiruni binádu jaffíñen, ába jaffíñerun luágu Jesucrístu.

²² Dan lachúlürünbei ugánu le lábun jagáambun affíñetiña ja Jerusalénbaña, ába jóunajani Bernabé Antioquíoun. ²³ Dan lachúlürünbei Bernabé, ába laríjini luágu binílaaña lan Búngiu gürgía ja mámabaña juríu, ába lagúndaarun sarágu. Ába labímejaniña súnqubei lun jafálaruni Wabúreme Búngiu táu sun janígi. ²⁴ Bernabé, ában meja wügúri buíti, derégeguati lúngua lun Sífiri Sándu le gumúti, buin líña gñe láu affíñeni luágu Jesucrístu, ítara líña lagáñeirun sarágu gürgía lun Jesucrístu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanúgüni Antioquíoun. ²⁶ Ába jeréderun ñi jáma tílana ligílisi ában irúmu, arúfudaja joun sarágu gürgía. Ní Antioquía lagúarúu joun affíñetiña “Cristiánugu” furúmiñe.

²⁷ Lídan dan ligía, ába jóúdingua já buri profétagu Jerusaléngiñe lun Antioquíoun. ²⁸ Ában jádaangiñe, gíríti Ágabo, ába laráramun jádan affíñetiña, ába laríñagun láu le lasúbudirágüdübei Sífiri Sándu lun luágu liábiba lan ában ouñwenbun ilámaü lídan sun ubou, áni suséreti lídan lidáani larúeijan Cláudio. ²⁹ Ábati jóundaragun affíñetiña ja Antioquiana lun jóunajan seínsu joun affíñetiña ja Judéabaña según le jayáraati íchiga.

³⁰ Ítara líña jadúgüni, ába jóunajani seínsu ligía lúma Sáulo joun tábutigu jalgílisin affíñetiña Judéana.

12

Louñwen Jacóbo lúma ladaürín Pédro

¹ Lídan dan ligía, ába lagúmeserun urúei Heródes eibaajaña jádaangiñe affíñetiña. ² Ába láfaragüdúni Jacóbo le lamúlen Juan táu efeín, ³ queíti laríjin láu gúnda jamá juríu láu cátei le, ába gñe lanúgüni Pédro adaúra. Lídan buri wéyu le fédu le ídaanbei teigúa fein magánatu ísi lasúsereda cátei le. ⁴ Lárigiñe lanúgüni Heródes Pédro adaúra, ába ládaruni furísunrugun jáu dísi-sísi súdaaragu ouñigira gádürü gádürü, larítangun lún yebe laságaruni jagíbugiñe lílana fulásu lárigiñe fédu lun lagúserun. ⁵ Ñíñein lubeíti Pédro furísunrugu toúniğiwañu buídu, merédeti jayúmuragun tílana ligílisi lun Búngiu luágu.

Leséfuruni Búngiu Pédro furísunrugúgiñe

⁶ Áriebe le lubáragiñe wéyu lé yebe lúnbei laságaruni Heródes Pédro jagíbugiñoun güriña, larúmuguña Pédro jamídaangua bián súdaara, gürágu ligía láu bián güriñgüri, jámaya bián súdaara luágu béna oúnigira. ⁷ Sódini, ligía lasálaragun ában láni Wabúreme ánjeli, ába larúougadún furísunrugu. Ába lagúuruni ánjeli ligía louúbawagu, ába lagáguduni, ába laráñagun lun.

—Sarába furése.

Ábati láburujan güriñgüri lueígiñe lújabu Pédro, ⁸ ába laráñagun ánjeli ligía lun.

—Murúbei bubélitin, daúbounme bigeídin.

Lárigiñe ladúgüni Pédro sun líra, ába laráñagun ánjeli ligía lun.

—Daúboun babíte, falábana.

⁹ Ába láfuridun Pédro lárigi ánjeli ligía, ibídiñoun lun ánjein inárüni lubei lúmoun máma lan inárüni cátei le ladúgübei ánjeli ligía. Genégetimáati lun camá gewenediñein. ¹⁰ Ába jástügürün jáu furúmiñetiña oúnigirutiña, sügú jamaña jabíaman, dánti le jachúlürün luágun béna le gürábu le úmadagiñebei, ába lánjunrenchun lúngua. Ába jáfuridun, lárigiñe jánjiñuragún ában úma, ába lígiri ánjeli ligía Pédro lábugua. ¹¹ Ligíaali lárügüdagun Pédro lúngua, ába laráñagun.

—Aná guetó, subúdi náali luágu oúnaja láali lan Búngiu ánjeli lun leséfurunina lueí Heródes lúma lueí sun lé yebe jabúseerubei jurfu jadúgün náu.

¹² Asáminareína ligía Pédro luágu cátei le, ába lídin túbiñoun María to lúguchu Juan Márcos, le ñí jabei sarágu güriña adámuriñu ayúmuragua lun Búngiu luágu. ¹³ Dan lacaújan luágu lubéneri büürü, ába táfuridun ában irájü músu, gírítu Róde, aríja ca lan agúajabei. ¹⁴ Dan tasúbudiruni luágu Pédro lan luágu lumálali, bulfei tumúti tánjunrenchuni béna, le luweírín tugúndan, ábarüga teíbaagun múnadoun awísaja luágu niján lan Pédro bénabu. ¹⁵ Ábati jaríñagun tun.

—¡Lúlijaali báu!

Ába taríñagun joun luágu choúru tan luágu ligía lan. Ába jaríñagun.

—Máma ligía, fágua láfurugu.

¹⁶ Niján mémeti Pédro acaúnja luágu béna. Dan jánjiñuranchuni, ába laweírídun janígi dan le jaríjini. ¹⁷ Ába líchugun seíni joun láu lújabu lun jámanichun, ába labájüdaguni joun ida líña lan laságaruni Búngiu furísunrugúgiñe, lárigiñe, ába laráñaga joun.

—Abájüdagua jumeí cátei le lun Jacóbo lúma joun jíbiri affíñetiña.

Ábati láfuridun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdaara, ladúga ibídiñeti joun ca lan susérebei lun Pédro. ¹⁹ Ába lounajan Heródes áluajei, quei madári jamáni, ába lálügüdaguniña súdaara já buga oúnigirubalin, lárigiñe, ába láfaraguágüdüniña jilágubei. Lárigiñe, ába láfuridun Heródes Judéagiñe, ába lídin agánawa Cesaréa.

Lounwen Heródes

²⁰ Weírítu ligáñi Heródes jáma güriña ja aganoubaña Tíro lúma Sidón, ánjein jagía, ába jebélurun lídoun ában arítaguni lun jounajan wügüriña lun jadímurejan lúma luágu jafúleisein. Dan le jachúlürün, ába jagáñeiruni Blásto, ában wügüri íñuguti láni Heródes, lun líderaguniña adlíjei sun cátei, ladúga lageíragiñe Heródes jabíja eígin. ²¹ Ába lagúaragüdüñ Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígiñe lubeí lagúmadíja, ába ladímurejan joun. ²² Ábati jagúmeserun güriña agúaraja.

—¡Máma wügüri adímurejabei, búngiu adímurejabei!

²³ Lídan óra ligía, ába lasándiragüdüni láni Búngiu ánjeli Heródes, ladúga lanáangun lúngua luágu jerérün güriña, míchu lumúti linébase Búngiu lun, ába jeígini jéweraü, ába lounwen.

²⁴ Abúruchagueínatimá ligíati ugánu le láni Búngiu, apúrichijóuati lídan sun fulásu.

²⁵ Dan jagúmuchuni Bernabé lúma Sáulo jawádigimari, ába jagíribudun Jerusaléngiñe barúina jameí Juan Márcos jámagua.

13

Jagúmeseruni Bernabé lúma Sáulo jawádigimari apúrichijei Lerérun Búngiu

¹ Tídan liglísi to Antioquíaboun, ñiñanu profétagu jáma maésturugu. Wügúriña jagía. Bernabé, Simón, le únbei jaríñaga Wuríti, Lúcio le Cirénena, Manaén le agúriarúbei úara lúma Heródes le gumádimati Galiléa, lúma Sáulo. ² Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumeí Bernabé lúma Sáulo nun lun wadágimanu le únbei nanúadiraña.

³ Lárigiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóunajaniña luágu jawádigimari.

Japúrichijan Bernabé lúma Sáulo lídan fulásu le Chípre

⁴ Ítara líña loúnajaniña Sífiri Sándu Bernabé lúma Sáulo, ába jóudin Seléucia, ñigiñe, jádina lun jóudin luágun ubóju le Chípre. ⁵ Dan jachúlürün lídan ubúru le gíribei Salamína, líbiri méme Chípre, ába jagúmeserun apúrichijei lerérun Búngiu tídan jalígilisin jurí. Núdúnti gíne Juan Márcos jáma, íderaguaaña. ⁶ Eíbuga jamúti sun ubóju ligía chülú lúmoun fulásu le gíribei Páfos. Ñi jadárra ában juríu gíriti Barjesús, garíyajati wügúri ligía, ye ligía, laríñaga luágu proféta lan. ⁷ Garíyajati ligía lúmañein gumádimati le Sérjio Páulo, ában wügúri janíchiguti. Ába loúnajan gumádimati ligía luágu Bernabé lúma Sáulo ladúga busén lan lagáambuni lerérun Búngiu. ⁸ Ánjein garíyajati ligía, le méme gíribei Elímas, sigéne lumútiña lueí yebe lafiñerun gumádimati luágu le jaríñagubei lun luágu Jesucristu. ⁹ Sáuloti, le méme gíribei Páblo, buin líña láu lubáfu Sífiri Sándu, ába laríaguni Elímas, ¹⁰ ába laríñagun lun.

—¡Yéetibu, buin bíña láu wuríbani, liraú Máfia amúrú, lágani sun le buídubei! ¿Ca uágu meréde lubei beyeejan luágu lémeri Búngiu le surúbei? ¹¹ Guetó lábura ja ligáñi Búngiu buágun, berédera maríjina luágu átiri dan.

Lídan óra ligía, ába labúrigadún láu, ába lálujan cába lan árújei lújabu, ladúga maríjinjali lan. ¹² Dan laríjini gumádimati cátei le, ába lafiñerun luágu Jesucristu, weíriti lanígi láu le jarúfudajabei luágu Wabúreme Jesucristu.

Páblo lúma Bernabé ubúru Antioquia

¹³ Ába láfayarun Páblo jáma líbirigu Páfosgiñe lun ubúrugun Péрге, le lídaanbei fulásu gíriti Panfília. Ánjein Juan Márcos, ába lígiriña, ába lagíribudun Jerusaléoun. ¹⁴ Lárigiñe, ába jásiügürün Péргеgiñe lun ubúrugun Antioquia, le lídaanbei Pisídia. Ába jebélurun lídan wéyu le eméraguagúlei tídoun jalígilisin juríu, ába jañúurun ñi. ¹⁵ Lárigiñeti taliijóuniwa líburu to lánina lílürudun Moisés túma buri líburu to jabúrújaboun profétagu, ába jóunajan ábutigu aríñaga joun.

—Wadújeñu, ánjein níjein lubeí dimúrei lun jaríñaguni joun gürígia ja, aríñaga jumeí guetó.

¹⁶ Ábati lásaarun Páblo, ába ladúgün seíni joun láu lújabu lun jámanichun, ába laríñagun.

—Agáamba jumá, wügúriña Israeltagu júma jugúya le ájuduragubei lun Wabúngiute.

¹⁷ Búngiu le Jabúngiute Israeltagu, anúadaja lumútiña meja binádu wagúbürigu lun lánigubaña lan, ába ladúgüniña ábanme oúnwenbun násiñun dán meja le añájagua lan agánawa quei teréncha Ejípto, lárigiñe, ába laságaruniña lídaangiñe fulásu ligía láu lubáfu. ¹⁸ Awánda lumúti Búngiu luríban jagáburi lídan fulásu magefrawati queí buri bián-wein irúmu. ¹⁹ Lárigiñe, ába lagúmchaguagüdüni sédü násiñun ja aganouítiña Canaán lun líchuguni jafúlasun joun binádu wagúbürigu luára gádürü-san-dimí irúmu.

²⁰ Lárigiñe, ába líchugun gürígia lun jagúseragüdüniña darí lúmoun lidáni proféta Samuél.

²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl

joun jarúeiteme luágu bián-wein irúmu, Saúl ligía, liraú Cis, ladúgawagun Benjamín.²² Lárighne, ába lagídaruni Búngiu arúejani lueí Saúl, ába líchuguni lun David, le uágubei larínaga. “Darína David, liraú Isaí, ában wügúri le áubei nagúndaara, áni ladúgübei sun le nabúseerubei.”²³ Jádaangiñe ladúgawagun David ligía liábin Jesúsu le loúnajabei Búngiu lun jasálbarun Israeltagu, queí meja larínaguni.²⁴ Lubáragiñebei liábin Jesúsu ubouágun, apúrichijati Juan joun sun Israeltagu, larínaga joun luágu lúnti lan jasáansiruni jagáburi, badísei jagíame.²⁵ Dan le layárafadúnbei dan lun loúnwen Juan, ába larínagun. “Mámatia áu le uágubei jarítauga luágu áu lan, liábiba ában nárigi, ni cáta áu loúbagiñe, madúnatina ni íbini lun nafáragadunun ligeídin.”

²⁶ Nidújeñu, jugúya le jarájünübei ladúgawagun Abrahám, júma jugúya le mámabei ladúgawagun Abrahám, inébejabutün lun Búngiu. wagía gürígia ja únbaña loúnajoúa ugánu le luáguti Wasálbaragüle.²⁷ Já meja gürígia ja aganoubaña Jerusalén jáu sun jábutigu, ibídiñetí yebe joun ca lan Jesúsubei, úa ligía gunfaráanda jamáni jerérun profétagu, láu sun alijojúa lan jerérun tídan jalígilisin ságü luwéyuri eméraguni, jagía guánarügüti gúnfuli jamúti le büürüwañubei láu jasádiruni Jesúsu lun loúnwen.²⁸ Láu sun madári jamá lidúnrun Jesúsu lun gayára lan jáfaruni jilágubei, amúriajatiña lúma Piláto lun láfaragüdüni jilágubei.²⁹ Dánti le adúga jamáli sun le tarínagubei Lerérun Búngiu luágu, ába jarárigüdüni luegiñe gurúwa, ába jíchuguni lídoun lumúja.³⁰ Ába lásaaragüdüni Búngiu lídaangiñe ouweni lúnya labágaridun.³¹ Arúfudaguati Jesúsu lúngua wínwañu luágu sarágu weíyaasu joun ja ñúbinbaña lúma luágu luweíyasun Galiléagiñe lun Jerusaléoun, jagíati geféenbaña luágu joun gürígia guetó.

³² Wíchiguñein lubeíti ugánu le jun, luágu darádu lé meja ladúgübei Búngiu jáma binádu wagúbürigu³³ gúnfuli láali woun, wagía le jadúgawagun, láu lásaaragüdüni Jesúsu, quei larínaguni tídan lilburun, lídan libíaman Sálmo. “Niraú amúrü, rúnaali ubáraü le bun ugúñe.”³⁴ Arínaga láali meja Búngiu luágu lásaaragüdüni Jesúsu lídaangiñe ouweni lun mañáladun lan lúgubu, dan larínagun tídan líburu to Lerérun. “Níchugubei abíniruni le uágubei narínaga lun David bun, gayáraati beménigidun luágu.”³⁵ Larínaga giñe David lídan ábanya Sálmo. “Mígirunbadibu lun lañáladun lúgubu Biraú le jínsiñebei bun.”³⁶ David, seríwiti méja joun ja lánina lidáani quei larínaguni Búngiu lun, lárighne, ába loúnwen, ába labunún le ñí lubei jabunúa lagúbürigu, ába lañáladun lúgubu.³⁷ Ánjeinti Jesúsu, sarágüda lumúti Búngiu lídaangiñe ouweni, mañáladunti lúgubu.³⁸ Nidújeñu, lúnti lubeíti jasúbudiruni luágu lídaangiñe lan Jesúsu ferúdunawa lan wafígoun. Ligía ugánu wanúgübei jun.³⁹ Lídaangiñeti giñe, chibáwaali lubeí sun wafígoun, sun wagía le afíñebei luágu, gidáwa ligía wadúnrun ligíbugiñe Búngiu, cátei lé meja siñá lubei lilúrudun Moisés adúga.⁴⁰ Toúnigi jumá lubeíti lueí láburujan ligáñi Búngiu juágun queísi jarínaguni profétagu dan le jarínagunbei.

⁴¹ Jugúya le éjerajabei náu, weírlá janígi, áni gumúgua jumá,

ladúga áu le Búngiubei, nadúgüba cátei weínamuburiti, daríme lun maffíen jumá, íbini jabájüdaguni ámu jun.

⁴² Dan le láfuridunbei Páblo jáma lánigu tídaangiñe liglísi, ába jamúriajan jáma lúnya jadímurejan joun luágu buri cátei le lewéñegua dimáasu.⁴³ Dan lagúmuchun jadámuridagun ligílisirugu, sarágu jádaangiñe jurú jáma buri ja ígirubalin binádu jafíñen lun jafálaruni jafíñen jurú, ába jafálaruni Páblo lúma Bernabé. Ába jadímurejan Páblo lúma Bernabé jáma, ába jarínagun joun lun jasígirun eménigira luágu lareídun Búngiu.

⁴⁴ Lewéñegua dimáasu, le luwéyuri eméraguni, ába jóundaragun jíbe-ágei lílana fulásu lun jagáambuni lerérun Búngiu.⁴⁵ Láu jaríjin jurú sarágu gürígia agáambajei lerérun Búngiu, ába jeméendüjan, ába jagúmeserun asígenerei Páblo, anába Jameí líri Jesúsu.

⁴⁶ Ábati jadímurejan Páblo lúma Bernabé manúfudeiga, ába jarínagun.

—Lúnti yebe wíchuguni ugánu lúmágiñeti Búngiu luágu Wasálbaragüle jun furúmiñe, jugúya le juríu, quei mabúseerun jumá jerésibiruni ugánu ligía, láu líra jarúfuduñein luágu madúna jumáni ibágari le magúmuchaditi, ítara líña weíbugagubefti apúrichija joun ja mámabaña juríu. ⁴⁷Ladúga ítara líña laríñaguni Wabúreme woun.

Níchuguñadibu lun bíchuguni larúgounga joun ja mámabaña juríu, lun gayáraabei lan jasálbarun ja aganoúbaña lídan lagúmujoún fulásu ubouágu.

⁴⁸Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan láni Búngiu ugánu, ába jafíñerun sun ja lúnbaña jafíñerun luágu Jesucrístu, ja lúntiñabaña ibágari le magúmuchaditi. ⁴⁹Ítara líña lapúrichijoún lerérun Búngiu lídan sun fulásu ligía. ⁵⁰Ába jadímurejan juríu jáma wúriña gúnfulitiña, inébewa jagía, lúma jáma wügúriña weírigutiña ñi ubúru, ába jínchajániña lun jeíbaajaniña Páblo lúma Bernabé darí lun jabúguniña lídaangiñe fulásu ligía. ⁵¹Ábati jáfuruduní calquí luegiñe jagúdi, arúfudei luágu mabuídun lan jóuserun lílana fulásu ligía, ába jóúdin ubúrugun Icónio. ⁵²Gúndaañu jáña afíñetiña Antioquía luágu jabágari lúma Crístu, weíriti jedéregaragun jóungua lun Sífiri Sándu.

14

Páblo lúma Bernabé ubúru Icónio

¹Ába jebélurun Páblo lúma Bernabé tídoun jalígilisin juríu ubúru Icónio, ába japúrichijan, buíti jadímurejan darí lun jafíñerun sarágu, dándu juríu quei máma juríu, luágu Jesucrístu. ²Juríu ja maffínebaña luágu Jesucrístu, ába jínchajaniña ja mámabaña juríu, amisiñedagúdaña afíñetiña joun. ³Ligía jeréderunbei Páblo lúma Bernabé sarágu dan ñi, ába jadímurejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárúni lan cátei le japúrichijabei luágu lareídun, láu líchuguni ubáfu joun lun jadáagun seíni lúma miláguru. ⁴Fánreinguañu jáña lílana ubúru ligía, jíbiri jámagiñeñanu juríu, jíbiri jámagiñe apóstolugu. ⁵Játi juríu jáma ja mámabaña juríu, ába jebélurun lídoun ában aríttaguni jáma gumádimatiña lun jeíbaajaniña apóstolugu lúma lun jachámuragun dúbü jawágun. ⁶Ánjein Páblo lúma Bernabé, ába jasándiruni, ába jóúdin lídoun buri fulásu le gíribei Lístra lúma Dérbe, biáma fulásu le láni méme fulásu le Licaónia, lúma geyéguá láu, ⁷apúrichija jamúti gíñe ugánu luáguti Wasálbaragüle Jesucrístu ñi.

Jachámuragun dúbü luágu Páblo lídan fulásu le Lístra

⁸Ñíñein ában wügúri meíbugunti, Lístra, ñun líña ladúga ítargubeíñein lan lúmágiñe lagúriajóun, meíbugungubefti. ⁹Lagáambajañein wügúri ligía le laríñagubei Páblo, láu laríjin Páblo luágun, ába lasúbudiruni luágu afíñe lan wügúri ligía luágu gayára lan lareídagun. ¹⁰Ábati laríñagun Páblo lun láu umálali jéreti.

—Ráramabá luágu bugúdi.

Ába lachúbarun wügúri ligía arárama, ába lagúmeserun eíbuga. ¹¹Dan jaríjini gúriña cátei le ladúgubei Páblo, ába jagúmeserun agúaraja lídan jerérun Licaóniana, jaríñaga.

—¡Raríjaña búngiugu quei jagáburi wügúriña wámoun!

¹²Jaríñaga luágu Bernabé búngiu Júpiter, luágu Páblo búngiu Mercúrio, ladúga ligía lan adímurejabei. Nújein lúban jabúngiute Júpiter bougudiñoun lueí ubúru, ¹³ába liábin lufádirin Júpiter ñígiñe barúina wügúriña bágasu lúma buri fulúri luágun lubéneri ubúru, busénti yebéti ligía jáma buri gúriña lun jáfaruniña bágasu jagía lun jadágaragudún joun Páblo lúma Bernabé. ¹⁴Dan jasúbudiruni Páblo lúma Bernabé cátei lan jabúseerunbei gúriña ja jadúgün, ába jajeíridagunun janáangun le luweírin lubéresen cátei le joun, ába jádaragun jóungua jádoun gúriña agúarajeina.

¹⁵—¡Wügúriña! ¿cámesan jabúseera jadúgüni cátei le? Wügúriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu

le wínwanbei, le adúgübalin siélu lúma ubou, barána lúma sun cátei le lídaanbei. ¹⁶Lídan meja dan le sügüjalibe, ígira lumútiña meja Búngiu gürgia lun jadúgüni le jabúseerubei, ¹⁷láu sun, arúfuda láani joun gürgia cáteiñein lan láuja buídu le ladúgübei joun. Rúti júya woun lúma alúbajani buíti, ru ligía efgini buídurügüti woun, belúgüda lumúti ugúndani tfdoun wanígi.

¹⁸Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña gürgia luei jáfaruniña bágasu jagía lun jadágaragüdún joun.

¹⁹Ábati jachúlürün juríu Antioquíagiñe lúma Icóniogiñe, ába jagáñeiruni jarítagun gürgia lun jachámuragun dúbü luágun Páblo. Lárigiñe, ába jadúruguduní bougudín luei fulásu, sun jaríñagun luágu jiláali lan. ²⁰Dan le jagúriridágun affíñetiña láu Páblo, ába lásaarun, ábaya lebéllurun fulásurugún. Larúgan, ligía lídin lúma Bernabé ubúrugun Dérbe.

²¹Lárigiñe lapúrichijaní ugánu luáguti Wasálbaragüle ñi Dérbe, le ñi jabei sarágu gürgia affíñerutiña luágu Jesucrístu, ába jagíríbudun, ába jóúdin Lístra, Icónio lúma Antioquia.

²²Rútiña gurásu joun affíñetiña ja lídaanbaña buri fulásu ligía, aríñaga jagía joun lun jasgírun derégüdagu lídan jafíñen, aríñageina jagía joun luágu lúnti lan wasúfurirun sarágu lun gayára lan webélurun lídoun larúeijan Búngiu. ²³Rútiña giñe ábutigu lídan cáda jadámurin affíñetiña. Lásunti jayúmuragun lúma jayúnarun, ába jedéreguruniña lábun laríaaian Búngiu le uágubei jafíñera.

Lagíríbudun Páblo lúma Bernabé Antioquíoun

²⁴Lárigiñe, ába jásügürün Pisídiagiñe, ába jachúlürün Panfília. ²⁵Ába japúrichijaní ugánu luáguti Jesucrístu ubúrugú Pérgé, líbiri méme Panfília, ábati jóúdin Atálioun.

²⁶Ñígiñe jádina, ában jóúdin Antioquíoun, le fulásu le ñjín lubei jóúnajoía lábugiñe laríaaian Búngiu adúgei wadágimanu le jagúmuchubei guetó. ²⁷Dan jachúlürün Antioquia, ába jóúndaraguniña tánigu jalígílisin affíñetiña, ába jabájüdaguní sun cátei le ladúgübei Búngiu jáu joun, lúma luágu lánjunrenchuní Búngiu béna joun ja mámabaña juríu lun giñe gayáraabei lan jafíñerun luágu Jesucrístu lun jasálbarun. ²⁸Ába jeréderun Páblo lúma Bernabé sarágu dan jáma affíñetiña ñi.

15

Adámuridagúni Jerusalén

¹Ligía jayábin wügúriña Judéagiñe lun Antioquíoun, ába jagúmeserun arúfudaja joun affíñetiña luágu lun lan jasálbarún, mósu lan jerésibiruni wügúriña circuncisión, quei laríñaguni lilírudun Moisés. ²Barúti Páblo lúma Bernabé ában sigénei weíríti jáma luágu cátei ligía, lagúmujoún óra, ába louñajoún Páblo, Bernabé, jámaya ámu wügúriña Jerusaléoun lun jóúdin aráanserei cátei le jáma apóstolugu jáma tábutigu ligílisi to ñiboun.

³Ja tánigu ligílisi to Antioquíaboun oúnajabaliña, lídaanti jaweíyasun, ába jásügürün loubawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jafíñen lun jafálaruni Crístu. Ába jagúndaaragun sun affíñetiña láu ugánu le.

⁴Dan jachúlürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájüdagun Páblo lúma Bernabé joun luágu sun le adúga láalibe Búngiu jádaangiñe. ⁵Ñíñanu jádaangiñe jadámurin fariséogu ja affíñetiña luágu Crístu, ába jaráramun, ába jaríñagun.

—Lúnti jerésibiruni wügúriña affíñetiña ja mámabaña juríu circuncisión, lúnti giñe jagúnfulirun lúma lilírudun Moisés.

⁶Ábati jóúndaragun apóstolugu jáma tábutigu ligílisi lun jatúriajaní cátei le. ⁷Lárigiñe sarágu dimúrei, ába lásaarun Pédro, ába laríñagun.

—Nidújeñu, subúdi jumúti luágu binárü lán meja lanúadirana Búngiu jádaangiñe lun níchuguni ugánu le lánina asálbaruni joun ja mámabaña juríu, lun giñe gayáraabei lan

jaffñerun luágu Jesucristu. ⁸ Búngiuti, le subúdijabúbei tun anígi, arúfuda lumúti luágu resibi lániña ja mámabaña juríu láu líchuguni Sífiri Sándu joun quei líchuguni woun. ⁹ Manúgün lumútiwa Búngiu ámu jawéi, jarúmagüda lumútu gñe janígi láu jaffñen luágu Jesucristu. ¹⁰ ¿Cáti uágu lalóguada jaffñen guetó luágu le adúga láalibe Búngiu, ru jugúya ában ijúrigu jawágun afñetiña ja, le wásiñerubei wagía guánarügü anúga—ni wagía ni binádu wagúbürigu? ¹¹ Afñetiwa luágu sálbaadiwa lan láurügü waffñerun luágu Jesucristu, madúgünga wagía ni ámu cátei lun wabíjini, sálbaadiwa láu lareíni Wabúreme Jesucristu. Ítara méme líña gñe jasálbarun ja mámabaña juríu.

¹² Ábati jámanichúnga, ába jagáambuni sun le jaríñagubei Bernabé lúma Páblo joun luágu buri seíni lúma miláguure le ladúgübei Búngiu jádaangiñe, jagánagua ja mámabaña juríu. ¹³ Dan le lásurun jadímurejan, ába laríñagun Jacóbo.

—Nidújeñu, agáamba jumána. ¹⁴ Abájúdaguaali Simón Pédro woun ída líña lan fuleíse lániña Búngiu ja mámabaña juríu, láu lanúadajan jádaangiñe lun lánigume. ¹⁵ Ítara líña cátei le quei lé meja jabúrrijabei profétagu tídan Lerérun Búngiu.

¹⁶ Gumúguaali jarúeijan ladúgawagun Davíd, queísigubeirügü tagúmuchagun ában múna eíguadutu.

Lachúlürüba wéyu nun, áu le Búngiu, lúnyame naríjin jawágun ladúgawagun Davíd, ábame níchuguni ubáfu lun ában jádaangiñe lun larúeijan jádan.

¹⁷ Nadúgübei líra lun gayáraabei lan jayábin sun jíbiri gürgía lun jáluajanina queísi Jabúreme,

lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña naríñagun, áu le Búngiu, le asúbudirágüdübalin cátei le lúmagiñe buga binádu dan.

¹⁹ Ligía naríñagunbei luágu moun láni wíchugun sarágu lúruudu jawágun ja mámabaña juríu, ja ígirubalín binádu jaffñen lun jafálaruni Búngiu, ²⁰ buídurügüti láu labúrjíoún joun lun jebé lan jeígin eígini le adágarawagüdúti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigíwarügütiña lugúndun máfuridunti játa jádaangiñe, meígin jagíame játa anímaalu. ²¹ Buíti lun jagúnfulirun lúma buri cátei le lun jíchugun inébesei joun juríu, ladúga lúmagiñe bugája binádu dan, añajein gürgía apúríchijati lilúrudun Moisés lídan ságü fulásu, alijóuati lúruudu luágu tídan buri jalígilisin juríu ságü luwéyuri eméraguni.

²² Ábati jarítangun apóstolugu jáma tábutigu liglísi jáma sun tflana liglísi janúadajan wügúriña jádaangiñe, lun jóunajaniña Antioquía úara lúma Páblo lúma Bernabé. Ába janúadiruni Júdas, le giribe Barsabási, lúma Sílas, bían wügúriña weirigutiña jádan afñetiña. ²³ Ába jóunajan ában gárada jáma, laríñajare tídan gárada tugúya.

“Wagía le apóstolugu, tábutigu liglísi, jáma sun jíbiri afñetiña, mábuwa wáña joun wadújeñu lueígiñe Jesucristu ja mámabaña juríu ja aganóubaña Antioquía, Síria, lúma Cilícia. ²⁴ Agáambaadiwa luágu añajein lan gürgía ñúdüntiña yágiñe ibídiñoun woun ebéreseja jun láu jadímurejan, áni dájaña ámu arítangun jídoun láu jaríñagun jun luágu mósu lan jerésibiruni wügúriña circuncisión, queísi laríñaguni lilúrudun Moisés. ²⁵ Ligía wúwaradúnbei lídan warítangun lun wanúadajan gürgía wadaangiñe lun jóudin aríjatin úara jáma wadújeñu Bernabé lúma Páblo ja jínsiñebaña woun sarágu, ²⁶ ja rújamaalibe jabágarí lídoun pelíguru lueígiñe Wabúreme Jesucristu. ²⁷ Wounajañanu lubeíti Júdas lúma Sílas jun, jadímurejaba júma lun jafúnraanguagüdúni sun cátei le tídaanbei gárada to wounajaboun jun, jun. ²⁸ Maríbaanti laríjin lun Sífiri Sándu lúma woun, míchugúniwa lan ámu ijúrigu jun lueídügüya murúsun cátei le, le lunbei jadúgüni. ²⁹ lun meígin jumá úwi le jáni anímaalu ja adágarawagüdútiña joun sándu, meígin jugúyame jítaü, ni úwi le jáni anímaalu ja tigíwarügütiña, madáagun jugúyame cátei buri jama gürgía ja

mamárieidúntiña júma. Ánjaün areídagua júngua lueí buri cátei le, buídubei jadúga. Buídu lámuga lídin jun.”

³⁰ Lárīgiñeti jóunajoún luágu jaweíyasun, ába jóúdin Antioquía. Dan le jachúlürünbei ñi, ába jóúndaraguniña afñetiña, ába jíchugunun gárada joun. ³¹ Dánti le jalíjanbarun afñetiña, ába jagúndaarun sarágu luágu gurásu le tíchugubei joun. ³² Quei gñiñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun afñetiña láu jadímurejan joun, ru jagía idérebugu lun jafñen. ³³ Lárīgiñe jásügürün átiri dan ñi, ába jayoúragun afñetiña joun lubá jagríbudun jámoun já meja oúnajabaliña Jerusalén. ³⁴ Ánjeinti Sílas, ába leréderun. ³⁵ Reídeitiña gñe Páblo lúma Bernabé Antioquía, ába jasígirun arúfudajei lúma apúrichijeí ugánu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárīgiñe, ába lariñagun Páblo lun Bernabé.

—Queímounya aríjaña afñetiña lídan sun ubúru gu buri le ñí lubei apúrichija wamáali lan ugánu luágu Crístu, aríja wamámuga ída jáña lan.

³⁷ Busénti yebe Bernabé janúgüni Juan Márcos jámagua, ³⁸ májati Páblo janúgüni ladúga meja ígira láaña lan Panfília, masígiti jáma lídan wadágimanu. ³⁹ Lárīgiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanúgüni Bernabé Márcos, ába jóúdin Chípre, ⁴⁰ ába lanúgüni Páblo Sílas. Lárīgiñe jedéregeruni afñetiña Páblo lúma Sílas lújaburugun Búngiu, ába jóúdin, ⁴¹ ába jásügürün Síriagiñe lúma Cilíciagiñe, íchaajeina gurásu joun afñetiña liglísirugu.

16

Lídin Timoteo úara jáma Páblo lúma Sílas

¹ Ába jachúlürün Páblo lúma Sílas lídoun buri fulásu le Dérbe lúma Lístra, le ñí lubei jadárira ában afñeti gíríti Timoteó, tiraú ában wúri juríu afñetu luágu Jesucrístu, güriégu lúguchi. ² Afñetiña ja aganoúbaña Lístra lúma Icónio, buíti jadímurejan luágu. ³ Busénti Páblo lun lídiba lan Timoteó jáma, íchigeina ugánu luáguti Crístu, ába lerésibiruni Timoteó circuncisión lueí wuríba lan joun juríu ja aganoúbaña lídan buri fulásu ligía, quei subúdi jamáni luágu merésibirun láani circuncisión ladúga güriégu lan lúguchi. ⁴ Súnti fulásu le ñígiñe lumúti jásügüra, jasúbudirágüdüni cátei le jaríñagubei apóstolugu jáma tábutigu ligílisi ja Jerusalénbaña joun afñetiña, ába jéredun jawágu lun jagúnfulirun lúma jagúmadin. ⁵ Ába lubeíti jedéraagüdün tflana liglísí lídan jafñen, ába jagánwoundun afñetiña ságü wéyu.

Lasáliragun ában wügüri Macedóniana lun Páblo

⁶ Májati Sífiri Sándu lun jíchugubei lan ugánu luágu Crístu Ásia. Ábati jásügürün labádinaguagiñe Fríjia luma Galácia, ⁷ ába jachúlürün luágu fadáguau le Mísia. Nígiñe yebe jarítagua lun jebélurun loúbawagun Bitínia, májati láni Jesúsu Espíritu le méme Sífiri Sándu lun jadúgüni. ⁸ Ábati jóúdin surúru gu Mísioun, ába jarárirun Tróas. ⁹ Ñi lasáliragua ában wügüri Macedóniana lun Páblo, áriebu, rára ayúmuragua lun, lariñaga lun. “Queímoun Macedónia íderagua bámugawa.” ¹⁰ Lárīgiñe lasáliragun wügüri ligía lun Páblo, ába waráansejan lun wóúdin Macedónia láu wafñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Páblo lúma Sílas ubúru gu Filípos

¹¹ Ábati wáfayarun Tróasgiñe, ába wóúdin sügúlügü luágun uboúju le Samotrácia, larúgan, ligía wachúlürün Neápolis. ¹² Nígiñe ába wóúdin Filípos, Filípos lábugiñeñein lagúmadíjan Róma, ligía gñe ubúru gu le weírgutimáabei luágu loúba Macedónia. Reídeitiwa átiri wéyu ñi. ¹³ Luágu ában wéyu le luwéyuri eméraguni, ába wáfuridun boúgudin lueí ubúru gu, lárún dúna, lídan ában fulásu le ñi lubeíja layúmurawagía

lun Búngiu. Ába wañúurun ñi, ába wíchuguni ugánu luáguti Crístu joun wúrîña ja oúndaragubáña ñi. ¹⁴ Níñoun ában jádaangiñe, gírítu Lídia, ubúruguna Tiatíra, tiffisiute alúguraja gamísa finutu to gúchu tágu. Judúguatu wúri tugúya lun Búngiu, tagámbajañaáwiwa, ába lánjunrenchunun Búngiu tanígi lun tadúgün gásu láu le laríñagubei Páblo.

¹⁵ Ába tabásterun jáu sun tílana túban, lárígiñe, ába tayúmurgun woun ítara.

—Ánjein afíñe jubei luágu afíñe nan le tímatimaati luágu Wabúreme Crístu, reídei jumá ya núbiñe.

Jéretu wawágu, ába weréderun.

¹⁶ Luágu ában dan, dan le wouđiña lan lídoun fulásu le ñi lubeñña layúmuraawagúa lun Búngiu, ába wadúnragun túma ában irájü gawágutu ában espíritu wuríbati le ichugubei ubáfu tun lun tasábiujan. Ában idámuni irájü tugúya, íbjatutíja sarágu seínsu joun tabúriña láu tasábiujan. ¹⁷ Ába tagúmeserun irájü to afálarawa, wagía lúma Páblo, agúarajeina tugúya ítara.

—Gürígia ja, jeseríwuduña lun Búngiu le íñubei, jadímurejaña luágu úma lánina asálbaruni lídaangiñe figóu jun.

¹⁸ Gíbeti wéyu táu adúgei cátei le darí lun tebéresedun lun Páblo, ába lagáragun, ába laríñagun lun espíritu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

¹⁹ Dan le jaríjin tabúriña luágu siñáali lan jagáñeirun seínsu tuefiñe, ába jarügüdüni Páblo lúma Sílas, ába janúgüniña jagíbugiñoún ábutigu lamídaangua ubúrugun. ²⁰ Ába jaráfuduniña jagíbugiñe gumádimatiña, ába jaríñagun.

—Wügúriña jurú ja, jacháraguñein wabúrugute, ²¹ jaráfudajaña igáburi le wásiñerubei erésibira ni adúga ladúga Rómána wagía.

²² Ábati jiñúragun gürígia jóungua jawágu, ába jarágachaguágüdüniña gumádimatiña, ába jíchugun dimúrei lun jabeichúniwa láu wéwe. ²³ Lárígiñe sarágu abeichúni, ába jádaruniña furísunrugún, ába jaríñagun lun oúnigiruti adaürútiña lun goúnigi lániña buídu. ²⁴ Dan libíjini oúnigiruti lúrudu le, ába ládaruniña lídoun lagúmujóun tarígeirugun furísun, ába legélenchuni jagúdi.

²⁵ Quef buri luágun amídi áriebu, ñíñanu Páblo lúma Sílas ayúmurgua lúma erémuja urému lun Búngiu, ja jíbiri, agáambaja. ²⁶ Sódini, ába liábin ában oúnwenbun jarabaganáli, ába lánjingichuni tuágaburi furísun. Lídan óra ligía, ába lánjunrenchun sun béna, safá ligía sun güringüri le jawágubei adaürútiña. ²⁷ Ába lagágudun oúnigiruti, dan laríjin luágu júnren líña lan sun tubéneri furísun, ába laságarunun lefeínte lún yebe láfaragun lúngua, sún yebe laríñagun luágu ñúdüngua jamá adaürútiña. ²⁸ Ába lagúaragun Páblo lun.

—Máfaraguabá búngua, awánja ya sun wagía.

²⁹ Ábati lamúriajan oúnigiruti lámpu, ába lebélorun eíbaagueina, adádagareina láu anúfudei, ába láguragun lúngua lubádu jagúdi Páblo lúma Sílas. ³⁰ Ába laságaruniña furísunrugugiñe, ába laríñagun joun.

—Wügúriña, ¿ca cátei lúnbei nadúgüni lun nasálbarun?

³¹ Ába jaríñagun lun.

—Afíñebá luágu Wabúreme Jesucrístu, ábame basálbarun jáu sun tílana búban.

³² Ába jíchuguni ugánu luáguti Crístu lun jáu sun ja lúbiñebaña. ³³ Lídan méme óra ligía, láu sun áriebujali lan buídu, ába lachíbuni bíti buri le jawágubei, ábati labásterun jáu sun lufámilian. ³⁴ Lárígiñe, ába lanúgüniña lúbiñoun, ába líchugun eígini joun, ¡máti lugúndan jáu sun lufámilian láu jafíñerun luágu Búngiu!

³⁵ Larúgan bináafin, ába jóunajan gumádimatiña polisía aríñaga lun oúnigiruti lun lígiragüdüniña Páblo lúma Sílas. ³⁶ Ábati laríñagun oúnigiruti lun Páblo.

—Oúnajaaña gumádimatiña aríñaga nun lun nígiragüdünün, gayáraajali lubeíti jáidin darángilañu.

³⁷ Ába laríñagun Páblo joun polisía.

—Láu sun Rómata wamá, bejjamutiwa jagíbugiñe gürígia, míchigunga dan woun lun wadímurejan waweíñegua, dágua jamáwa furísunrugun, ¿guetó buséntiña jígiragüdüniwa arámudaguárügü? ¡Máfuridunbadiwa! Núbin jamá aságarawa.

³⁸ Ába jabájüdaguni polisía cátei le joun gumádimatiña, ába janúfudedagún gumádimatiña dan le jasúbudiruni luágu Rómata jamá Páblo lúma Sílas. ³⁹ Ábati jóudin amúriaja ferúdin jáma, ába jaságaruniña, ába jayúmragun joun lun jáfuridun níñiñe ubúrugugiñe.

⁴⁰ Dan le jáfuridunbei furísunrugugiñe, ába jóudin túbiñe Lídia, lárigiñe jarfjiniña affñetiña lúma jíchugun idérebugu joun, ába jasígiruni jaweíyasun.

17

Chagáguau ubúruгу Tesalónica

¹ Lídan jaweíyasun Páblo lúma Sílas, sügütiña Anfípolisgiñe lúma Apolóniagiñe, níñiñe, ába jachúlürün ubúrugun Tesalónica le ní tubei ában jalígilisin juríu. ² Quei léchun Páblo, núdünti tídan liglísi tugúya, adímurejati jáma úrüwa dimáasu, ságü luwéyuri eméraaguni. ³ Arúfudajati joun quei taríñaguni Lerérun Búngiu luágu lúnti lán meja lasúfurirun Cristu, lárigiñeme lan louñwen, aba lánme lásaarun lídaangiñe ouweni lúnya labágaridun. Laríñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña gürígia.

⁴ Ábati jafñerun jádaangiñe juríu, ába júaradun lúma Páblo lúma Sílas. Affñetiña giñe sarágu ja mámbaña juríu ja judúguatiña lun Búngiu, jáma sarágu würríña weírigutiña.

⁵ Juríu ja mafñeña luágu Jesúsu lan Crístubei le lunbei liábin, magúndaantiña láu cátei le, ába jóundaragun wügüriña wuríbatíña ja eíbugañajádügübaña úmada, ába jachágaraguágdüniña gürígia ní ubúrugu. Ába jaságarajanun lúban Jasón, áluajaña Páblo lúma Sílas lun jaságaruniña lun jedéregeruniña jájaburugún gürígia. ⁶ Queiti madári jamániña ní, ába janúgüni Jasón jáma átiri jádaangiñe affñetiña jagíbugiñoñun gumádimatiña lídan ubúrugu ligía, ába jagúaragun aríñaga.

—Wügüriña ja, ja ebéresejabaña lídan sun fulásu, chúlújaña giñe nájoun, ⁷ resíbi láaña Jásón lúbiñe. Sun jagía dürrúgua jamúti lilúrudun Urúei César, ladúga aríñagatiña luágu níjein lan ámu urúei, ában nege gíríti Jesúsu.

⁸ Dan jagáambuni gumádimatiña jáma sun jíbiri gürígia cátei le, ába jachágaragun. ⁹ Jásón jáma ja jíbiri, ába jafáyeijan, ába jígirawagüdüniwa.

Páblo lúma Sílas ubúruгу Beréa

¹⁰ Furése furése, dan le labúrigadun, ába jóunajaniña affñetiña Páblo lúma Sílas ubúrugin Beréa. Quei jachúlürün ní, ába jóudin tídoun jalígilisin juríu. ¹¹ Juríu ja níbaña, buítimaati jagáburi jaweí ja Tesalónicabaña, resíbi jamúti ugánu luáguti Cristu láu ugúndani, ságüti wéyu jalíjanun Lerérun Búngiu lun jarfjini añjein ináriñi lubeí le aríñawagúbei joun. ¹² Sarágu jáña lubeíti affñerutiña jádaangiñe, affñe jagía giñe sarágu ja mámbaña juríu, dándu würiña weírigutiña quei wügüriña. ¹³ Dan le jasúbudirunbalin juríu ja Tesalónicabaña luágu lapúrichijañein lan giñe Páblo Lerérun Búngiu Beréa, ába jóudin achágaraguágdüdaña gürígia ní. ¹⁴ Ába jóunajani affñetiña Páblo furése lun lídin lacóstoun, leréderame Sílas lúma Timotéo Beréa. ¹⁵ Ja núdüñbaña láu Páblo, ába jáfayajan lúma chúlú ubúrugu Aténas. Lárigiñe, ába jagíribudun baríña jagía dimúrei lun Sílas lúma Timotéo lun jóudin lárigi Páblo lídan lufúresen.

Páblo ubúruгу Aténas

¹⁶ Sun niján lan Páblo Aténas agúrabei Sílas lúma Timotéo, medéraaguágüdünti larítagun láu laríjini ubúru gu ligía buin jáu búrübüun sándu. ¹⁷ Ligíaja ladímurejaanbei tídan jalígílisin juríu lúma jáma ja mámabaña juríu ja ájuduragubaña lun Búngiu, adímureja ligía buri ságü wéyu jáma gürgía ja úmadarugubaña, ní lubei jadámuridagua. ¹⁸ Níñanu jádaangiñe wügüríña ja atúriajabalin jarúfudajan epicúreogu, jáma ja atúriajabalin jarúfudajan estóicogu, ába jadímurejan lúma. Jaríñaga jíbiri.

—¿Cáfunasan laríñagubei wügüri le woun, líbebei ladímurejan?

Jaríñaga jíbiri.

—Camátia ladímurejaña jawágu ámu búngiugu.

Jaríñagunbeiti itara ladúga lapúrichijan Páblo joun luágu Jesúsu lúma luágu ásaaruni lídaangiñe ouweni. ¹⁹ Ábati janúgüni lídoun ában fulásu gírítu Areópago, le ní lubeija jóundaragua lun jagáambagun jóungua, ába jaríñagun lun.

—¿Gayáraati wasúbudiruni cátei lan iséri cátei le barúfudajabei? ²⁰ Cátei lé buri baríñagubei woun, terénchati woun, buséntiwati wasúbudiruni ca lan laníchigubei.

²¹ Sun Aténasna, jáma teréncha ja aganoúbaña ní, marítaguntiña luágu ámu cátei lueídügüya luágu jaríñagun lúma jagáambun cátei iséri.

²² Ábati laráramun Páblo jamídaangua ní Areópago, ába laríñagun.

—Wügüríña Aténasna, aríja numúti luágu affíne jumá jawágu jisándun, ²³ ladúga dan le aríaaejina nubálin fulásu buri le ní lubei jájuduragua joun jisándun, darítina ában latárü le ní lubei búrüwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebei jun, ligía Búngiu le uágubei nadímureja jun.

²⁴ ‘Ligía Búngiu le adúgübalin ubou lúma sun cátei le ubouágubei, ligía labúremebei siélu luma ubou. Maganounti tídan ligílisi to jadúga gürgía, ²⁵ memégeirun lumúti gíñe le gayáraabei jadúgüni gürgía luágu lufúleisein, ligía guánarügü íchugubei ibágari lúma garábali, lúma sun cátei woun, sun wagía.

²⁶ ‘Lídaangiñe ábanrügü wügüri ladúgaña sun néchaanigu lun jaganouñ lídan sun fulásu, aráanseleí dan le lúnbei jabágariduni lúma fulásu le lúnbei níba lan jagánawa. ²⁷ Adúga lumúti Búngiu sun líra lun gayáraabei lan jáluajani gürgía, gayára lámuga jadáriruni láu jáluajani, láu sun inárüni lan luágu madíse lan Búngiu lueí cáda ában wádaangiñe.

²⁸ Ladúga lídaangiñeti Búngiu awánjein lubeí, gabágari wagía, eíbuga wagía ligíbuagu ubou le, quei jaríñaguni poétagu jídaangiñe. “Lirájüñü Búngiu wagía.” ²⁹ Queíti lirájüñü wabei Búngiu, moún lumuti wanúgüni Búngiu quei ában sándu le gólu, o pláta o dúbü le jadúga wügüríña quei jarítagun luágu itara líña lan Búngiu. ³⁰ Mebéresegúnti méja Búngiu láu cátei le jadúgübei gürgía lábugiñe libídiñe joun, ánjein guetó, aríñagati joun sun gürgía lídan sun fulásu lun jasáansiruni jóuserun. ³¹ Ladúga anúadajaali Búngiu ában wéyu lun ligíaba lan wéyu lagúseragüdüniña gürgía ja ubouágubaña láu ísuruni láu ában wügüri le anúadaja láalibeí, wügüri ligía, ligía Jesucristubei, arúfuda lumúti woun láu lásaaragüdüni Jesúsu lídaangiñe ouweni lúnya labágaridun.

³² Dan le jagáambubei luágu ásaaruni lídaangiñe ouweni, níñanu jádaangiñe, ába jéjerajan láu, jíbiri ába jaríñagun.

—Lídaanbagúbei ámu dan wagáambeí badímurejan luágu buri cátei le.

³³ Ábati lígiruniña Páblo. ³⁴ Ába jafíñerun jádaangiñe luágu Jesucristu, ába jafálaruni. Níñein Dionísio jádan, lé meja ában jádaangiñe ábutigu lídan fulásu le gíríbeí Areópago, túma gíñe ában wúri gírítu Dámaris, jámaya ámu gürgía.

18

Páblo ubúru gu Corínto

¹ Lárígíñe cátei le, ába láfuridun Páblo Aténasgíñe, ába lídin ubúru gu Corínto. ² Ní ladárra ában juríu gírítu Aquíla, túma lúmarí to gíríboun Priscíla, Póntona jagía. Málügíli

lueŕgiñe jayábin Itáliagiñe, jayábinbei ñígiñe ladúga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña, ³ queíti ában lan lifísiute jáma—tadáawagun quiámpu—ába leréderun jáma lun jawádigimaridun lídan ában. ⁴ Ságüti wéyu le lidáni eméraaguni, lídin Páblo tídan jalígílisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucrístu.

⁵ Dan jachúlürün Sílas lúma Timotéo Macedóniagiñe, ába líchaagun Páblo lúngua le gumúti apúrichije Lerérin Búngiu. Aríñagati joun juríu furáangu luágu Jesúsú lan Crístubei le jagúrabajabei lun lasálbaruniña lídaangiñe jafígoun. ⁶ Ánjaña juríu, ába jasígeneruni le lubeŕbei, anábagua buri jameí. Ábati láfurudunun Páblo labíte jawágun, arúfudei joun luágu mínsiñe lan jagáburi lun, ába laríñagun joun.

—Ánjaünme eféridira jídaangiñe, mámaalime nídaangiñeti. Lúmagiñe guetó, nefbuga apúrichija joun ja mámabaña juríu.

⁷ Ába láfuridun tídaangiñe jalígílisin juríu, ába lídin lúbiñoun ában wügúri gíriti Jústo, wügúri ligía, judúguati lun Búngiu, ñi toubagiñe liglísi lagánawa. ⁸ Críspo, le tábuti jalígílisin juríu, ába lafíñerun luágu Wabúreme Jesucrístu, jáu sun tílana lúban. Sarágu gñe jídaangiñe Coríntona, dan jagáambunbalin ugánu luáguti Jesúsú, ába jafíñerun, ába jabásterún. ⁹ Ábati lasáliragun Wabúreme Jesúsú lun Páblo luágu ában áriebe, ába laríñagun lun.

—Manúfudebá, bapúrichija méme, mámanichabá, ¹⁰ ladúga anájein búma, úabei ni ában agúruruti buágu lun ladúgün wuríbani bun. Añájein sarágu güriña lídan ubúruge le ja lúnbaña nánigubaña lan.

¹¹ Reídeiti lubeíti Páblo ában irúmu dimí ñi Corínto arúfudajei Lerérin Búngiu joun lílana fulásu.

¹² Lídan dan le Galión lan gumándanbei Acáya, ába jóúndaragun juríu lun járügüdüni Páblo. Ába janügüni ligíbugiñoun lúruđu lun lagúserawagüdü. ¹³ Ába jaríñagun lun gumándan.

—Wügúri le, leréde arúfudaja joun güriña lun jájuduragun lun Búngiu láu ában igáburi le múaraanbei lúma lúruđu.

¹⁴ Dán yebe ladímureja lan Páblo, ligía laríñagun Galión joun juríu.

—Lun jamúga ában lan wuríbani o dúru júrtüti ladúgübei wügúri le, níchaaguña jamúga nungua lun nagáambunün, jugúya juríu, ¹⁵ quei luágu lan dimúrei buri, lúma íri, lúma jilúrudun, aráanse jumeí júngua, ladúga mabúseeruntina nagúseragüdüni luágu buri cátei le.

¹⁶ Ába labúgaguniña ñígiñe. ¹⁷ Ábati járügüdüni sun güriégugu Sóstenes le tábuti jalígílisin juríu, ába jabúleiseiruni ñi guánarügü ligíbugiñe gumándan. Mebéresegüti Galión láu líra.

Lagíribudun Páblo Antioquioun, lagúmeseruni lúruwan luweŕyasun apúrichija

¹⁸ Lárígiñe líra, ába leréderun Páblo átiri dan ñi Corínto. Lárígiñe, ába layóuragun joun affíñetiña, ába lídin Síria úara túma Priscíla lúma Aquíla. Ába lásaruni lídiburi lídan ubúruge Céncrea lubáragiñe ládinun, lun lagúnfulirun láu ában méja darádu le ladúgübei lúma Búngiu. ¹⁹ Dan le jachúlürün ubúruge Éfeso, ába lígíruniña Páblo Priscíla lúma Aquíla lun jeréderun ñi lídan ubúruge ligía. Lubáragiñe lígíruni Páblo Éfeso, ába lídin ligílisirugu adímureja jáma juríu. ²⁰ Ába jamúriajan lúma lun leréderun méme ñi jáma, májati. ²¹ Ábati layóuragun joun, laríñaga joun.

—Mósu ñi nan Jerusalén lubá fédu le lúnbei ladúgün, nagíribudayaba aríjaün ánjein busén Búngiu.

Ába ládinun, ába lídin Éfesogiñe. ²² Túrúti Cesaréa, nígiñe ába lídin Jerusalén abúsura joun tílana liglísi, lárígiñe, ába larágachun Antioquoun. ²³ Lárígiñe lásügürün átiri dan

ñi, ábaya láfuridun, ába leíbuguni sun fulásu Galácia lúma Frjia ában ában, íchaajaina dúgúdaguaü joun afñetiña.

Lapúrichijan Apólos ubúruğu Éfeso

²⁴Lídan dan ligía, ába lachúlürün ában jurú gíriti Apólos ubúrugun Éfeso, Alejandría jurú ligía. Gapúrichijati, áni subúdi lumúti gíne Lerérun Búngiu buídu buídu. ²⁵Subúdi luáguti Asálbaragülei le lúnbei liábin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsu, inárüni, láu sun lougua lan lasúbudirun luágu, le rügüñein larúfudajabei Juan le abásteragüdajabei luágu Jesúsu le lúnbei liábin lárígíne, lasúbudira. ²⁶Luágu ában wéyu, dan le ladímurejaña lan Apólos tídan jalgílisin jurú láu sarágu ichouruni, ába jagáambuni Priscíla lúma Aquíla. Dan lagúmuchun lapúrichijan, ába janúgüni Priscíla luma Aquíla jábiñoun lun jafúnraanguagüdünitima luáguti Jesúsu le Wasálbaragülei lun, luma luáguti cátei le larúfudajabei. ²⁷Dánti le labúseerunbei Apólos lídin loubawagun Acáya, lúmagiñeñanu afñetiña Éfeso lun lídin, ába jóunajan ában gárada joun afñetiña ja ñíbaña Acáya lun jerésibiruni buídu. Dan lachúlürünbei Apólos Acáya, íderagua lumútiña ja lafñeragüdúbaña Búngiu luágu Jesúsu, láu lareñi, ²⁸arúfuda lumúti joun gürgía láu richaú le siñá jamuti asígenera, luágu marícha lan le jarúfudajabei jurú, arúfudalei joun tídaangiñe Lerérun Búngiu luágu Jesúsu lan Crístu le jagúrabubei lun lasálbaruniña.

19

Páblo ubúruğu Éfeso

¹Sun niján lan Apólos ubúruğu Corínto, ligía lásügürün Páblo labádinaguagiñe buri fulásu, ába lachúlürün Éfesoun ñi lubei ladárira sarágu afñetiña. ²Ába larinagun joun.

—¿Resíbi jumútisan Sífiri Sándu dan le jafñerunbei luágu Jesucristu?

Jaríñaga lun.

—Uá, magáambungubeígidiwa yebe luágu njein lan Sífiri Sándu.

³Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásteragüdün Juan.

⁴Laríñaga Páblo joun.

—Labásteragüdüniña méja Juan gürgía, arúfudei luágu sáansi jamáali lan jóuserun, aríñagati gíne joun luágu lúnti lan jafñerun luágu le lúnbei liábin lárígíne—luágu Jesúsu le Crístubei, le Jasálbaragüle.

⁵Dan jagáambuni cátei le, ába jabásterun lídan líri Wabúreme Jesúsu. ⁶Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmulugugiñe. ⁷Jawáraañanu dúusu wügúriña jádan súngebui.

⁸Ürüwañein játi láu Páblo abásija tídoun jalgílisin jurú le ñi lubeíja lapúrichija, adímureja ligíaja furáangu luágu larúeijan Búngiu, afñegüda láña gürgía luágu. ⁹Ñíñanu gíne, edéreragüdüti janígi, májatiña jafñerun, adímurejarígü jagía wuríba luágu lémeri Crístu jagíbugiñe gürgía. Ábati ladíreirun Páblo jawef, ába lanúgüniña ja afñebaña luágu Jesucristu tídoun ában lescuéla to ní lubei larúfudaja ában wügúri gíriti Tiránno, ábaja ladímurejan ságü wéyu joun, ñi. ¹⁰Ítara líña lasígirun luágu bían irúmu, súnti ja aganoúbaña loubawagu Ásia, agáamba jamúti ugánu luáguti Wabúreme Jesúsu, dándu jurú quei ja mámabaña jurú. ¹¹Adúgati buríti Búngiu oúnwenbun buri miláguru lídaangiñe Páblo, ¹²darí lun tánügúniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatiña jádaangiñe.

¹³ Níñanu juríu eíbugañañadügüitiña, aságajatiña gíñe espíritugu wuríbatíña jaweí gürrí-gia, álugatiñá yebe jayúsuruni líri Wabúreme Jesúsu lun jaságajaniña, jariñaga buri joun espíritugu.

—Gumádi numútibu lídan líri Jesúsu, le uágubei lapúrichija Páblo, lun báfuridun.

¹⁴ Níñanu sedú lirájüñü ában juríu gíríti Escéva, jábuti méja fádírigo, jádan ja adúgübalin buri cátei le. ¹⁵ Níjein ában jadúgüini, ába louñabuniña espíritugu wuríbatí ligía.

—Subúdi numúti Jesúsu, subúdi gíñe nun cátei lan Páblobei, ánjein jugúya, ¿cátaün?

¹⁶ Ába lachúragun wügúri le láubei espíritugu wuríbatí lúngua jawágun, gabáfuti sügú jáu súngebei, ába labúleiseiruniña buídu, ába jefbaagun níngíñe surúsu lúma láu buri bíti jawágu. ¹⁷ Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weíríti linébedun líri Wabúreme Jesúsu joun.

¹⁸ Sarágu gíñe buri jádaangiñe ja afñerubaña, ába jayábin agúfeserei buri cátei wuríbatí lé meja jadúgübei, ¹⁹ sarágu gíñe buri jádaangiñe já meja gabíñarajadibaña, ába janúgünun jalíburun buri, ába jágudunun jagíbugiñe súngebei. Dan jabájüdübalin tebégi líburu buri tugúya, gebégitu queí buri dimí-san mílu murúsun seínsu le pláta. ²⁰ Ítara líña abúrchagueína lan ugánu luáguti Jesúsu, arúfudeinaleí lubáfu lun lasáansiragüdüni jagáburí gürrígia.

²¹ Lárígíñe sun cátei le, ába laráanserun Páblo lun lídin aríjaña afñetiña Macedónia luma Acáya, lubá lasígiruni luweíyasun Jerusaléoun. Aríñagati gíñe luágu lárígíñe lanme lídin Jerusalén, lídiba lan gíñe Róma. ²² Ábati louñajan biáma jádaangiñe ja nderagubalin lubá, Macedónia, wügúriña jagía, Timotéo luma Erásto, ligía, ába leréderun átíriraüya dan Ásia.

Chagáguauí ubúruğu Éfeso

²³ Lídan dan ligía, níñein ában oúnwenbun achágaraguní Éfeso jaweígíñeti ja afálarubalin lémeri Crístu, ²⁴ lídaangiñeti ában wügúri gíríti Demétrio, ladáawagun cátei láuti pláta lífisiutebei. Wügúri ligía, adáaguati tirájüñü ligíli lú pláta to tilgílisin sándu to giriboun Diána, belútiti sarágu seínsu joun ja ñadágimeinbaña lúma. ²⁵ Ábati louñdaruniña ja ñadágimeinbaña lúma úara jáma ámu ja ñadágimeintiña ámu físu le lenége jafísiute, ába laríñagun joun.

—Wügúriña, subúdi jumúti luágu ñulú lan wabágari lúu físu le, ²⁶ agáamba jumáli, aríja jumeí ída líña lan lídin Páblo aríñaga luágu máma jamá búngiugu sándu ja jadúgübaña wügúriña, áni gíbeeña gürrígia jafíñeragüdún, mámarügü ya Éfeso, lídan gíñe líbe-ágei Ásia. ²⁷ Noúnguati cátei le, ladúga gayáraabei weféridiruni wabísínisin, gayáraabei gíñe teféridiruni tilgílisin búngiu Diána tuweírigin, ábame tanügún búngiu Diána to únboun jájuduragua sun gürrígia Ásia lúma lídan sun ubou queí ní cáta.

²⁸ Dan le jagáambunbalin cátei le, ába jagáñidun buídu, ába jagúragun.

—¡Weírigitu Diána to jabúngiute Éfesona!

²⁹ Níñeinti ában oúnwenbun achágaraguní lídan sun ubúruğu ligía. Ába járugüdüni Gáyo lúma Aristárco, biáma wügúriña Macedóniana ja úarabaña lúma Páblo, ába jadúruguduniña chiúlú tuágun múna to ñi lubeja jóundaragua. ³⁰ Álugatí yebe Páblo lebéllurun lun ladímurejan joun gürrígia ñi lun ladílirun sun cátei, mígirun jamúti afñetiña lun lebéllurun. ³¹ Níñanu gíñe jádaangiñe ábutigu ñi Ásia lumádagu Páblo, oúnajatiña gíñe dimúrei lun lun mebéllurun lan ñíjin. ³² Níti lídan adámurini, jíbiri agúaragua ában cátei, jíbiri agúaragua ámu, ladúga chagágujaña gürrígia, jibe-ágei, ibídiñeti joun ca lan lébubei jadámuridagun. ³³ Níñanu jádaangiñe gürrígia, ába jafúnraanguágüdüni cátei le lun Alejándro, le jádajabei juríu ligíbugiñoún gurírguaü lun ladímurejan luágu jafúleisein. Ába ladúgün Alejándro sefni lúu lújabu lun jámanichun, lun ladímurejan luágu jafúleisein jagíbugiñe gürrígia. ³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weřrigutu Diána to jabúngiute Éfesona!

³⁵ Dánti le gálumagüda láaña abúrújati le láni ubúruġu ligía ġürġia, ába laríñagun.

—Ġürġia Éfesona, sun ġürġia subúdi jamúti luáġu Éfesona lan oúnigirubárun tilġgilisin búngiu Diána, túma tiyáwa to áburujaboun siéluġiñe. ³⁶ Quei úa lan ni ában lun lasġgeneruni cátei le, gáluma jumá, madúġa jumá ni cáta masáminarunga jumeí buřdu.

³⁷ Wüġúriña ja, ja janúġübaña ñájoun, míwerujan jamáġiru jilġgilisin, madímurejan ġaġía wurřbati tuáġu jubúngiute. ³⁸ Ánjein nįjein lubei cátei uáġuti labúseera Demétrio jáma ja ñadágimeinbaña lúma líchugun ġadúnrun, ligía nįjein lubei aġúseraġüdüti lúma aġúseraġülei, ġayáraati jidin ligíbugiñoun lúruđu lun ladímurejan cáda ában lueġiñegua.

³⁹ Ánjein ámu lubei cátei jamúriajabei, lúnti laráanserún lídan ában adámurini le richáti,

⁴⁰ ladúġa ġayáraabei laríñawagúniwa luáġu wagúbujaña lan wurřbani ladúġa cátei le asúseredubei uġüñe, ibídiñebei woun cába lan wounabagüle ánġawa álġüdüwa luáġu ġaġaġuaü le.

⁴¹ Láriġiñe laríñaguni cátei le, ába laġúmuchaguagüdüni adámuridaguni.

20

Luweřyasun Páblo Macedónioun lúma Grécioun

¹ Dan le laġúmuchunbei ġaġaġuaü Éfeso, ába loúnajan Páblo ġawáġu affñetiña lun ġayábin lun, ġayára lámuga líchugun ġurásu ġoun, ábati loúburuniña, ába layoúragun ġoun, ába lídin Macedónioun. ² Luáġu luweřyasun, ġhúlúġueina líña ġamagiñe affñetiña lídan buri fulásu le ídaangiñebei lásüġüra, ru ligía saráġu dúġüdaguaü ġoun láu lerérun. Ítara líña lachúlürün lídoun agefraü le Grécia. ³ Reídeiti úrüwa ġáti ñi Grécia, ládina yebe uġúnein lun lídin Síria, ligía laġáambun luáġu ġelédeġuña lan ġuríu lubá. Ábagubeiti laráanserun lun laġúribudun múarugugiñe, süġüina ligíaya Macedóniagiñe. ⁴ Ġibetiña wüġúriña ñúdüntiña úara lúma. Sópater, le liraú Pyrrhus, Beréagiñe, Aristárco lúma Segúndo, Tesalónicagiñe, Gáyo, Dérbeġiñe, Timotéo ġiñe, lúma ġiñe Tíquico lúma Trófimo, Ásiana. ⁵ Affñetiña ja, ába ġouđin wabá, ába ġaġúrabuníwa ubúruġu Tróas. ⁶ Wagía, láriġiñe féđu le teiġin fein to magánaboun ísi, ába wáfuridun Filíposġiñe tídan uġúnein, seíngü wéyu láriġiñe, ligía wátürün Tróas, le ñi lubei wúwarada jáma ja ñúđünbaña wabáragiñe, ába weréderun ñi séđu wéyu.

Bisída láni Páblo ubúruġu Tróas

⁷ Samúdi ġüñoun, ába ġouNDARAGUN affñetiña lun ġeġin fein le ġarítaguagüle luáġu loúnwen Crístu, Páblo arúřudajabei ġoun. Queiti ġaweřyasúnbei lan larúġan, ába lasġgirun adímureja ġoun darí lúmoun amídi áriebu. ⁸ Íñuñanu lídan lúrüwan túbanana múna to ñi lubei ġouNDARAGUA, ñiñe in saráġu lámpu durúngu. ⁹ Nįiñe in ában irájü aġáambaja, ñun líña luáġu funédere, Eútico líribei. Queiti lílúbei lapúrichijan Páblo áriebu ligía, ába ladábudun láġu irájü ligía, ába larúmugun ñi, ába leġuadun lídaangiñe lúrüwan túbanana múna, múarugun. Dan le ġarárirunbei lun ġiñúraguni, jilálali. ¹⁰ Ábati larárirun Páblo, ába laroúnrun ligíbuagu irájü ligía, ába loúburuni. Ába laríñagun ġoun affñetiña.

—Madįjeri jumá, ġabáġariyaali.

¹¹ Ábayati lawárirun Páblo, ába ġafánreinragunun fein, ába ġeġin. Ábati lasġgirun adímureja darí larúġadun, ligíaali lídin. ¹² Irájüti buga ligía, ába ġanúġüni áġuyu wínwañu, sun ġaġía láu uġúndani láu.

Weřyaasu lúmagiñe Tróasġiñe lun Milétoun

¹³ Ába ġiñe woúdin, ába wádinun tídoun uġúnein, ába woúdin ġhúlú Asón, le ñi lubei lúnti lan wabúđuni Páblo ġuei wadáradun, ladúġa busén lan lídin Asón múarugugiñe.

¹⁴ Dan le wadúnragun lúma ñi Asón, ába ládinun wáma, ába woúdin Mitiléne. ¹⁵ Larúġan, ába wáfuridun ñiġiñe, süġüina wagía ligíbugiñe uboúġu Quío, ában wéyu láriġiñe, ligía

wachúlürün uboúju Sámos. Ába weméraagun ubúruгу Trojíllo, larúgan, ligía wachúlürün ubúruгу Miléto. ¹⁶Mátürüntiwa ubúruгу Éfeso luágu waweyasun ladúga mabúseerun lan Páblo leréderun sarágu dan ageíraü Ásia, busénti lachúlürün Jerusalén furése lun ñi lan lubá fédu le Pentecostés ánjein gayára.

Lapurichijan Páblo joun tábutigu liglisi, Éfeso

¹⁷Dánti le Milétojadiwa, ába loúnajan Páblo jawágu tábutigu liglisi Éfeso lun jayábin Miléto aríjei, ¹⁸dan le jachúlürünbei, ába laríñagun joun.

—Subúdi jumúti ída líña lan nigáburu lúmagiñe furúmiñeti wéyu nachúlürün Ásioun.

¹⁹Sun dan le jagánaguañadina lubéi, seríwitina lun Búngiu láu únabuni, láu sarágu águiraiü, sífuri áu sarágu láu cátei lé buri jabúseerubei juríu jadúgün nun. ²⁰Merédeti napúrichijan jun luágu cátei le lúnbei buídubei lan jun, arúfudaja áu jun furáangu lídan guríriguaiü lúma júbiñe. ²¹Dánda joun juríu quei joun ja mámabaña juríu, aríñagaadina luágu lúnti lan jasaansiruni jóuserun ligíbugiñe Búngiu, lúma lun jafíñerun luágu Wabúreme Jesucrístu. ²²Guetó lubéiti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi, ²³lé rúgüñein nasúbudirubei, luágu sun lan ubúruгу le ñi lumuti nídin, aríñagati Sífiri Sándu nun luágu nadaürúba lan, nasúfuriruba sarágu, Jerusalén. ²⁴Úati ni cáta lídaangiñe áuti nebéresera, ni nibágari guánarügü, mebégiti ni cáta nun, adúgarügü náali ligía le uágubei loúnajana Búngiu láu ugúndani darí lúmoun lagúmujóun, lun nadímurejani ugánu buiti luágu línsiñejabu Búngiu.

²⁵Guetó, choúru numúti luágu maríjindügüya láadina lan ni ában jídaangiñe, jugúya lé meja únbei napúrichija luágu larúeijan Búngiu. ²⁶Ligía nariñagunbei jun ugúñe luágu masándiragun nan núngua láu dúru lueígiñe ni ában jídaangiñe, ²⁷ladúga subúdigüda náali sun laráansejan Búngiu jun, marámuduntina ni cáta juei. ²⁸Toúnigigua jumá lubéiti júngua, toúnigi jumáñame affíñetiña ja líchugubaña Sífiri Sándu lun jóunigiruniña, ja tánigu líligilisin Búngiu, ja lagáñijabaña láu líta Liraü guánarügü. ²⁹Subúdi numúti luágu dánme lan nídin, jayábinba lan ámu áluga jagúnrinchaguni jafíñen, quei lebelurun geígusi jádoun mudún áfaraguaña. ³⁰Ñíbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña affíñetiña. ³¹Toúnigi jumá lubéiti, jarítagua jumei luágu úrüwa lan irúmu náu ewerídijaün wéyuagu árieibu, ayájua buri áu.

³²Guetóti, nidújeñu, derége numútün lun Búngiu lúma lun ugánu le luáguti línsiñejabu, le gabáfubei lun léredagüdüni jafíñen lúma lun líchugun ubáraü jun siélu jádan ja derégeguáañabaña jóungua lun. ³³Mabúseerun nágili ni liseínsun ni ában, ni lanáangun, ³⁴lubáragiñe líra, subúdi jumúti luágu ñadágimein nan lun nibíjini le nemégeirubei lúma le jemegeirubei ja nómabaña. ³⁵Súnwandan narúfudajan jun luágu ítara líña lan luwádigi-mariniwa lun jíderawagún ja níjeinbei jemegeirun, luágu giñe lúnti lan larítawagún luágu dimúrei le laríñagubei Wabúreme Jesúsu dan le laríñagunbei. “Gúndaatimáati le íchugubei sügü láu le erésibirubei.”

³⁶Lárigiñe laríñaguni Páblo cátei le, ába lájuduragun, ába layúmuragun lun Búngiu jáma súngubei. ³⁷Ába jayájun súngubei láu igárigu, ába jóúburuni Páblo, ába jachúuruni. ³⁸Jírutiñati ladúga laríñagun joun luágu maríjindügüya jamáli lánme. Ába jóúdin íchaajei tuágu ugúnein.

21

Luweiyasun Páblo ubúruгу Jerusalén

¹Dan le wígiruniña affíñetiña, ába woúdin sügúlügü lídoun fulásu le gíribei Cos, larúgan, ában woúdin Ródas, ñígiñe Ródasgiñe woúdin lun Pátara. ²Ñi Pátara wadárira ában ugúnein teíbuga Fenícia, ába wádinun tídoun, ába woúdin. ³Dan wásügürün, ába waríjini uboúju le Chípree, ába wígiruni lueígiñe wabaúna, ába wasígirun darí wachúlürün

Síría. Queíti taráriguágüdüba lan ugúnein lídan ubúru gu le gíríbeí Tíro, ába warárirun ñi. ⁴ Áluaja wamútiña affñetiña ja ñíbaña, ába weréderun sédü wéyu jáma ñi. Ába lawísaruniña Sífiri Sándu luágu lasífuriruba lan Páblo Jerusalén, ába jaríñagun lun lun mídin lan. ⁵ Dan lásügürün sédü wéyu ligía, ába wouúdin. Sun affñetiña jáu jámarigu jáma jasáanigu, ñúdüntiña íchaajawa chúlú bougudi lueí ubúru gu, ñi béyabu ába wájuduragun ayúmuragua lun Búngiu. ⁶ Ábati wóburagun woungua jáma, ába wádinun tídoun ugúnein, jagía, ába jagíríbudun jábíñoun.

⁷ Ába wagúmuchi waweíyasun baránaja lúmagiñe ubúrugugiñe Tíro darí Tolemáida, le ñí lubei wabúsura joun affñetiña, ába weréderun ában wéyu jáma ñi. ⁸ Larúgan, ába láfuridun Páblo wáma, wagía le lúmabei, ába wachúlürün ubúru gu Cesaréa. Ñi wouúdin lúbiñe Felípe le apúrichijabalin ugánu luágu ti Jesucrístu, ába giñe jádaangiñe sédü wügüríña já meja anúadajoubaña Jerusalén lun jeténirun lun le jemegeirubei affñetiña, ába weréderun lúma. ⁹ Gasáaniguti Felípe gádürü wúríña irájüñü ja máfuridungiña, íbíja jamúti ubáfu lúmagiñe Búngiu lun ladímurejan jayúmulugugiñe. ¹⁰ Átiri wéyu wáu ñi, ligía lachúlürün ában proféta Judéagiñe, gíríti Ágabo, ¹¹ liábiña aríjawa. Ába lanúgüni lubélin Páblo, ába lagúrugini lugúdi guánarü lúma lújabu láu, ába laríñagun.

—Laríñajare Sífiri Sándu luágu ítara lúba lan jagúrugini juríu labúreme belíti le ubúru gu Jerusalén, ábame jedégereruní joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmuragun lun Páblo lun mídin lan Jerusalén. ¹³ Ába laríñagun Páblo.

—¿Ca uágu jayájua, írudagúdána? Araánsentina mámarügü lun nagúríawagün Jerusalén, araánsentina darí lun nouñwen luegiñe Nabúreme Jesúsü.

¹⁴ Quei siñá wamani larítagun agáñeira, ába wígiruni, ába waríñagun lun ladúgüniwa lugúndan Búngiu.

¹⁵ Dan le gumújali webélujan ñi, ába waráanserun, ába wouúdin Jerusalén. ¹⁶ Ñúdüntiña jádaangiñe affñetiña wáma Cesaréagiñe, ñíñein ában Chíprena jádan, gíríti Mnasón, lújali luegiñe lafíñerun luágu Jesucrístu, lúbiñeba wagánawa.

Bisída láani Páblo Jacóbo

¹⁷ Dan wachúlürün Jerusalén, ába jerésibiruniwa affñetiña láu ugúndani. ¹⁸ Larúgan, ába wouúdin lúma Páblo aríjei Jacóbo, ñíñanu giñe sun tábutigu liglísi Jerusalén. ¹⁹ Ába labúsurun Páblo joun, ába labájüdaguni sun cátei le ladúgübei Búngiu lídaangiñe joun, jádan ja mámabaña juríu. ²⁰ Dan le jagáambunbalin ugánu le, ába jadímurejan luágu luweírigun Búngiu. Ábati jaríñagun lun Páblo.

—Wadúje, aríjabásan, añájein sarágu mílu juríu affñerutiña luágu Jesucrístu, áni sun jagía, aríñagatiña luágu lúnti lan lasígirúniwa lilúrudun Moisés. ²¹ Aríñawagúaaali joun luágu arífudaja ban joun sun juríu ja aganoubaña lídan jageíra ja mámabaña juríu lun madúgün jamá gásu luágu lé meja laríñagubei Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu.

²² ¿Cábasan wadúga? Joundaragubátia juríu dánme le jasúbudiruni luágu chúlújadibu lan, lun jadúgün wuríbani bun. ²³ Niján cátei le lúnbei badúgüni. Añájein gádürü wügüríña ya wádan, gásu jagúnfulirun ában darádu lúma Búngiu. ²⁴ Barúbaña búmagua, ábame barúmadaguágüdüñ búngua jáma ligíbugiñe Búngiu segün wagáburi, wagía juríu, fáyeibeíme le jagástarubei lun jagúnfulirun lúma jadáradun, lárígiñeme gayáraajalime jásaragüdüni jádiburi. Ítara lúba jaríjini sun juríu luágu iyéeni lan le aríñawagúbei joun buágu, gúnfulirügütibu lan giñe lúma lilúrudun Moisés quei lubúdubu. ²⁵ Ánjeinti jawágu ja mámabaña juríu áni afíñejaña luágu Búngiu, abúrújaadiwa joun lun madíjeri jamá luágu buri cátei le, lúnrügü meígin jamá úwi le dagágüdawaali joun sándu, ni jítaü, ni anímaalu le tigiwártügi, lun giñe úa lan ni ában agámariduti wúri to mamárieiduntu lúma.

Járügüdüni Páblo adáura tídan témpulu

²⁶ Ábati lanúgüniña Páblo gádürü wügüriña jagía, larúgan, ába larúmadaguagüdüni lúngua jáma, ába lebélorun témpulurugun awísaja ídaba lan lagúmucha jawéyuri gádürü wügüriña jagía lun jarúmadun, léme lidáni jadágaragüdüni cáda ában jádaangiñe lun Búngiu.

²⁷ Dan lé yebe yaráfaali lun lagúmuchun sédü wéyu ligía lubá lagúmuchun jarúmadun ligbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguagüdüniña güriña. Ába járügüdüni Páblo, ²⁸ ába jagúaragun.

—¡Wügüriña Israelítagu, íderagua jumáwa! Niján wügüri le eíbugubalin sun fulásu arúfudaja joun sun güriña wuríba luágu wanásiñun, luágu lilúruden Moisés, lúma tuágu témpulu to, belúgüdaali giñe güriña ja mámabaña juríu témpulurugun awíyedei fulásu sándu le ligíbugiñe Búngiu.

²⁹ Jaríñagunbei ítara ladúga meja jaríjini Páblo ubúru luáma Trófimo le Éfesona, jarítaguatíñati luágu barúlaani témpulurúgun.

³⁰ Ába jachágaragun sun lílana fulásu, ába jayábin güriña eíbaagueina. Ábati járügüdüni Páblo, ába jadúrugin boúgudin tuef témpulu, ába jadáraguni béna furése. ³¹ Busénjaña yebe jáfaruni jilágubei, ligía lachúlürün ugánu lun gumándan luágu chagágujaña lan sun lílana ubúru Jerusalén. ³² Ábati loundaraguniña gumándan lisúdaaranigu jáma jábutigu, ába lachúlürün eíbaagueina le ñíjin jabeí güriña. Dan jaríjini gumándan jáma súdaaragu, ába lásurun jabeíchuni Páblo. ³³ Ábati layárafadun gumándan, ába lárügüdüni Páblo, ába lagúraguagüdüni láu bián güriñgüri, láriñe, ába lálügüdján cátei lan, lúma ca lan lidúnrunbei. ³⁴ Ámuñegueinarügüti cátei jaríñagun güriña, siñátiti gunfaráanda lan gumándan ni cáta ladúga ireíni le jadúgubei, ába lanúgagüdüni jábínoun súdaara. ³⁵ Dan le jachúlürünbei luágu testépute múna, ába janúgüni súdaara Páblo oýuajaina lueí jáfaruni güriña jilágubei, ³⁶ ladúga jayábiña súnugubei jarígi agúarajaina. —¡Jilála!

Ladímurejan Páblo lueígiñegua

³⁷ Dan lé yebe jádaraali lan Páblo múnadoun, ába laríñagun lun gumándan le jáubei súdaara.

—¿Gayáaati nadímurejan búma?

Ába laríñagun gumándan lun.

—¿Geréngaditibu güriégu? ³⁸ ¿Máma lubeí bugúya Ejíptona lé meja adúgubei ában mabúchajau luágu ában dan, ába lanúgün gádürü mílu wügüriña gáfarajatiña lídoun fulásu mageírawaguti?

³⁹ Laríñagati Páblo lun.

—Máma áu, juríu áu, Társona, ában fulásu weíriguti Cilícia. Adúgabá fuleísei nun lun bígirunina lun nadímurejan joun güriña.

⁴⁰ Ába líchugun gumándan úma lun, ába laráramun Páblo luágu estépu, ába líchugun seíni láu lújabu joun güriña lun jámanichun. Dan le manígaali, ába ladímurejan joun lídan hebréo, le jerérun juríu, ába laríñagun.

22

¹—Nidújeñu jáma jagúbürigu, agáamba juméi le lúnbei naríñaguni jun nueígiñegua.

² Dan jagáambun ladímurejan joun lídan jerérun, ábatima jámanichaguagüdüni. Ábati laríñagun joun.

³—Juríu áu, le gumúti, ubúru Társo loubawagu Cilícia nagúriajouá, ya Jerusalén naweírida. Lábugiñe larúfudajan Gamáliel natúriaja, úrati larúfudajan lúma jalúruden binádu wagúbürigu. Jouchatina súnwandan lun nesériwidun lun Búngiu táu sun nanígi, queígubeirügü ligáburi jadúgüni jugúya ugúñe wéyu. ⁴ Áu, eíbaaja numútiña meja

lánigu Crístu darí náfaraguniña jilágubei, barúgua áu wügúriña furisunrugun. ⁵ Geféenti fádiri ínútimaati jáu sun jábutigu juríu luágu rújama gárada nun joun wapaísanu ja Damáscobaña. Núdüntina ñi áluajaña affñetiña luágu Crístu lun nanúgüniña ñájoun lun nasúfuriragüdúniña.

Labájüdaguní Páblo luáguti lasáansiragun ligáburi

⁶ “Dan luáguñadina lubeí úma, yaráfaadina lun nachúlürün Damáscu, quefburi amídirugu, sódini ligía ladúnraagun ában oúnwenbun larúgounga siéluigiñe náu, ⁷ ába náburujan múarugun. Ába nagáambun laríñagun ában umálali nun. “Sáulo, Sáulo, ¿ca uágu beíbaajanina?” ⁸ Ábati naríñagun. “¿Cátabusan Nabúreme?” Laríñaga nun. “Jesúsu le Nazarétna áu, le méme beíbaajabei.” ⁹ Aríja jamúti ja úarabaña núma larúgounga ligía, ába janáfudedagun, magáambun jamúti lumálali le adímurejabei nun. ¹⁰ Ábati naríñagun. “¿Cábagi nadúga, Nabúreme?” Ába laríñagun nun. “Sarába, beíba luágu buweíyasun Damáscoun, ñíba laríñawagúa sun le lúnbei badúgüni bun.” ¹¹ Queíti marfjüngüda láadina lubeí buga larúgounga ligíra, ába járügüdüni ja númabaña nújabu darí wachúlürün Damáscu.

¹² “Ñiñein ában wügúri Damáscu gíríti Ananías, gúnfuliti buídu lúma lilürudun Moisés, sun juríu ja aganoúbaña Damáscu adímurejatiña buídu luágu wügúri ligía. ¹³ Ába liábin Ananías aríjana, dan lachúlürün, ába laráramun nubádu, ába laríñagun nun. “Nidúje Sáulo, ibíjayabeí baríjin lárigoún.” Lídan méme óra ligía, ába léfegechun nágu, ába naríjini. ¹⁴ Ábati laríñagun nun. “Anúadaja láadibu Jabúngiute binádu wagúbürigu lúmagiñe binárü lun basúbudiruni lugúndan, lúma lun baríjini Jesúsu le richáguabei, lun bagáambuni lumálali, ¹⁵ ladúga bíchuguba lan fe luágu Jesúsu joun sun güirgía, abájüdagubeime le aríja báalibei lúma le agáamba báalibei. ¹⁶ Guetóti, ¿ca uágu badárasaja? Sarába, badíseibá jeménigiñu luágu Wabúreme lun lachífun bifígoun.”

Labájüdagun Páblo luágu lóunajóun apúrichija joun ja mámabaña juríu

¹⁷ “Dan nagíribudun ubúrugu Jerusalén, luágu ában wéyu dan le nídin témpulurugu ayúmuragua, ába lasáliragun Nabúreme Jesúsu nun, ¹⁸ ába laríñagun nun. “Furíba yágiñe Jerusaléngiñe, oúfuda, ladúga madúgünbaña juríu gásu láu le baríñagunbei nuágu lídan fulásu le.” ¹⁹ Ábati naríñagun lun. “Nabúreme, subúdi jamúti luágu ñídü nán buri méja tídan sun jalgílisin affñetiña anáajaña ja affñebaña buágu furisunrugun, beí buri náña. ²⁰ Dan le láfarúnbei Estéban jilágubei, le bánigu lé meja adímurejabei buágu, ñíñadina, gúndaatina láu jáfaruni, áu oúnigirubarun janáangun ja áfarubalín.” ²¹ Ába laríñagun Nabúreme nun. “Beíba, ladúga nóunajadibu díse, apúrichija joun ja mámabaña juríu.”

Páblo lújaburugu gumándan

²² Agáamba jamúti chülú lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumeí jilágubei! ¡Maríchatí lun labágaridun!

²³ Queíti jasígirun agúaraja, achújoun buri janáangun, achúja calíqui ínun le jagáñi, ²⁴ ába laríñagun gumándan lun ladarúniwa Páblo jábiñoun súdeara, ába lóunajan abeichei lun ladímurejan, lun lasúbudirúniwa ca lan uágu jagúaraja güirgía luágu ítara. ²⁵ Dan le güirgüa jamáli lun jabeichuni, ába laríñagun Páblo lun jábuti súdeara le ñíbei.

—¿Garíchatúnsan lun jabeíchun ában wügúri Rómana, magúserunga ligía?

²⁶ Dan le lagáambuni jábuti súdeara cátei le, ába lídin aríñaga lun gumándan.

—Toúnigibátia láu le lúnbei badúgüni, Rómanatia wügúri le.

²⁷ Ábati lídin gumándan luágun Páblo, ába laríñagun lun.

—¿Inárüni luágu Rómana ban?

Laríñaga Páblo lun.

—Ánja.

²⁸ Ábati laríñagun gumándan.

—Fáyeitina sarágu seínsu lun Rómata nan.

Laríñaga Páblo.

—Ánjein áu, ñi nagúriajouá.

²⁹ Ába jígiruni já yebe lúnbei jabeíchuni furése, liábin gíñe gumándan, dan le lasúbudiruni luágu Rómata lan Páblo, ába lanúfudedagun lueígiñe lagúraguni.

Páblo jagíbugiñe lúrudugu juríu ja íñutimáabaña

³⁰ Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni gúringüri lueí, ába loundaraguágüdüniña jábutigu fádirtigu jáma lúrudugu juríu ja íñutimáabaña, ábati laságaruni Páblo, ába líchuguni jagíbugiñe.

23

¹ Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun nungua ligíbugiñe Búngiu chúlú lúmoun wéyu le.

² Ábati louñajan Ananías, fádiri le íñutimaabei, lun jagáyuajan ja yaráfabaña ñi luágun liyúma Páblo. ³ Ába laríñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúser-agüdüniña quei laríñaguni lúrudu, ¿cáti uágu bagáyuagüda nuágu, adúraaguei lúrudu?

⁴ Ába jaríñagun ja ñibaña lun.

—¿Ítara liñásan banábuni fádiri le íñutimaabei le láni Búngiu?

⁵ Ába laríñagun Páblo.

—Nidújeñu, ibídiñetí yebe nun luágu fádiri lan le íñutimaabei, ladúga taríñajare Lerérun Búngiu. “Madímurejaanbadibu wuríba luágu ában agúmadijati bageíra.”

⁶ Subúdi lumúti Páblo luágu jánigu lan saduséogu jíbiri ja ñibaña, jíbiri, jánigu fariséogu, ába laríñagun láu umálali jéreti.

—Nidújeñu, fariséo áu, jádaangiñetiña fariséogu nagúbürigu, áni jagúseragüdüñadina ladúga afíñe nan luágu jásaaruba lan jiláaña lídaangiñe ouweni lúnya jabágaridun.

⁷ Dan le laríñagunbálin cátei le, ába jagúmeserun fariséogu jáma saduséogu asígeneja jámagua, ába lafanreinragun adámurini. ⁸ Ladúga jaríñajare saduséogu luágu másaarunbaña lan jiláaña lídaangiñe ouweni, úatiña nege gíñe ánjeligu, ni espíritu, ánjañati fariséogu, afíñetiña luágu sun cátei le. ⁹ Jareínchati súngebei, ába jásaarun jádaangiñe arúfudajatiña lilúrudun Moisés ja ñibaña, áni fariséogu gíñe jagía, ába jaríñagun.

—Wügúri le, úati ni cáta wuríbati ladúga, áni ánjeindügü ában lubeí espíritu adímurejabei lun o ában lan ánjeli, toúnigi wamátia lueí wadárirún oucha weréderuni luwádigimari Búngiu.

¹⁰ Weírjiali sigénei darí lun lanúfudedun gumándan lueí jáfaruni Páblo jilágubei. Ábati louñajaniña lisúdaaranigu lun jaságaruni Páblo lídaangiñe adámurini lúnya janúgüni jábiñoun súdaara.

¹¹ Le ában árieibu, ába lasáriragun Wabúreme Jesúsú lun Páblo, ába laríñagun lun.

—Manúfudebá, Páblo, ladúga ítara quei rújadibu lan fe nuágu ya Jerusalén, bíchuguba gíñe fe nuágu, Róma.

Aráansejani lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta darí jáfaruni. ¹³ Jougiñe bián-wein wügúriña ja aríñagubalin cátei le. ¹⁴ Ábati jóudin jámoun jábutigu fádirtigu lúma jámoun wügúriña weírigitíña jádan juríu, ába jaríñagun.

—Aríñagaadiwa láu íñaraguni luágu meíginbadiwa lan ni cáta darí wáfaruni Páblo jilágubei. ¹⁵ Guetóti, jugúya jáma ja jíbiri lúrudugu íñutimaatiña amúriaja jumá lúma gumándan lun lanúgüni jun jarúga, jaríñagame lun luágu lun lántima jállügüdüni luágu

dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachúlürün.

¹⁶ Ába lachúlürün cátei le lábun lagáambun tiraú lítu Páblo, ába lídin jábiñoun súaara asúbudiragüdei lun Páblo. ¹⁷ Ábati lagúarun Páblo lun ában jádaangiñe jábutigu súaara, ába laríñagun lun.

—Barúbei irájü le lúmoun gumándan, níjein cátei lun laríñaguni lun.

¹⁸ Ába lanúgüni jábuti súaara lúmoun gumándan, ába laríñagun lun.

—Wáti adaürúti Páblo nun, ába lamúriajan núma lun nanúgüni irájü le bun ñájoun, níjein nege cátei lun laríñaguni bun.

¹⁹ Ába lárügüdüni gumándan lújabu irájü ligía, ába lanúgüni lun jábugua jamá, ába laríñagun lun.

—¿Ca babúseerubei baríñagun nun?

²⁰ Ábati laríñagun irájü ligía lun.

—Belújaña juríu lídoun úarani lun jamúriajan búma lun banúgüni Páblo jagíbugiñoun lúrudugu ínutimaatiña lún nege jálügüdünitima luágu lidúnrun. ²¹ Mafíñerabá joun, añájein jóugiñe bián-wein jawúgüriña arámudagu jabá úmada agúrabajei lun jáfaruni jilágubei. Aríñagaña láu ínaraguni ligíbugiñe Búngiu luágu meíginbaña lan, mátun darí jáfaruni Páblo, guetó aráanseñu jáña, jagúraba rügüñein boúnabagüle.

²² Ábati loúnajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Loúnajóun Páblo lun gumádimati le Félix

²³ Ába lagúarun gumándan joun bián jádaangiñe jábutigu súaara, ába laríñagun joun lun jaráanserun bián-san súaara lun jóudin Cesaréa eíbu, úara jáma úrúwa-wein-dísi ja jawágutiña gabáyu, jáma bián-san ja táutiña efeín, lun jóudin ladaúnrun néfu gúñoun.

²⁴ Aráansegüdáti giñe gabáyu lun laweíñjaniña Páblo, ru ligía dimúrei lun jachúlüragüdüni Páblo lúmoun gumádimati Félix láu magádiei. ²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weírigubei, mábuga níña bun.

²⁷ Niján wügüri le, le núnajabei bun, daújamaali yebe juríu áni jáfaraali yebe jilágubei, dan le nasúbudirúnbalin luágu Rómata lan, ába nídin jáu nisúdaaranigu, ába neséfuruni.

²⁸ Queíti nabúseerun nasúbudiruni ca lan lidúnrunbei jarúma, ába nanúgüni jagíbugiñoun lúrudugu juríu ínutimaatiña. ²⁹ Lidúnrun jarúma luáguti buri cátei le luáguti jalúrudun, úati íríchaü lun láfarún jilágubei, ni íbini lun ladaürún. ³⁰ Quei lachúlürün lábun nagáambun luágu jaráansejaña lan juríu lun jáfaruni jilágubei, ligía lébubei núnajani bun madárasajaanga. Aríñagaadina giñe joun ja íchugubaña lidúnrun lun búma lan jaráanserei le jánibei lúma.”

³¹ Ábati janúgüni súaara Páblo quei laríñawagúniwa joun, áriebu, chülú Antípatris.

³² Larúgan, ligía jagíribudun súaara ja eíbubaña, súaara ja jawágubaña gabáyu, ába jasígiruni jaweíyasun láu Páblo. ³³ Dan le jachúlürünbei Cesaréa, ába jedégerunun gárada lun gumádimati, derége jameí giñe Páblo. ³⁴ Lárigiñe lalíjanun gumádimati gárada, ába lálügüdajan jalána lan Páblo, dánti le lasúbudirúnbalin luágu Cilíciana lan, ³⁵ ába laríñagun lun.

—Nagáambudibu dánme le jayábin ja íchugubaña bidúnrun.

Ábati líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

¹Seíngü wéyu lárigiñe, ába lachúlürün Ananías, fádiri le ñtuitimaabei, ubúrugun Cesaréa jáu wügüríña jádaangiñe juríu weírigutiña, lúma ában wügúri le subúdíjabeti lun lúru, gríti Tértulo. Ába jayábin lúmoun gumádimati lun jíchugun lidúnrun Páblo. ²Dan le lanügüniwa Páblo jagíbugiñoún, ába lagúmeserun Tértulo íchiga lidúnrun, laríñaaga.

—Luágu bareñi, gumádimati, lújadiwa láu darángiläü ya wageíra, buíti lefbugun sun cátei ya fulásurugu súnwandan lábugiñe lichú báu. ³Ibíja wamúti sun le, áni teínqui wamútibu luágu. ⁴Lun magídarun wamáni bidáani sarágu, amúriajatina búma lun badúgün murúsun fuleísei woun lun bagáambuniwa luágu murúsun óra. ⁵Níjan wügúri le Páblo, beréseti, lerédera afánreinraguagüdaña juríu lídan sun fulásu, ligía gíñe ában jádaangiñe lichügüdinabei jadámurin nazarénugu. ⁶Álugati gíñe lawíyedagüdünnun témpulu ligíbugiñe Búngiu láu lebélaagüdünnun ában wügúri le mámabei jurud tidoun. Ába wárügüdüni, ába yebe wabúseerun wagúseragüdüni láu ligáburu walúrudun, ⁷ába leméterun gumándan Lísias ñíjin, ába lagídaruni wawéi láu érei, ⁸ába laríñagun luágu ja lan íchugubaña lidúnrun lúnti lan jayábin búmoun. Gayáraati bálügüdaguni Páblo, subúdi bámugeti inárüni luágu sun cátei le, le waríñagubei luágu.

⁹Juríu buri ja ñíbaña, aríñagatiña gíñe luágu inárüni lan sun le laríñagubei Tértulo.

¹⁰Ába ladúgün gumádimati seíni lun Páblo lun ladímurejan, ában laríñagun Páblo.

—Lau sun nugúndan nadímureja nuegíñegua bigíbugiñe ladúga subúdi náani luágu lúmagiñe lan sarágu írúmu bagúseragüdagun lídan fulásu le. ¹¹Gayáraati bálügüdagun ánjein inárüni lubéi le lúnbei naríñaguni bun. Dúusurügügili wéyu luegíñe nachúlürün ubúrugun Jerusalén lun nájuduragun lun Búngiu, ¹²madarírúnwatina asígeneja ni ca úma, ni achágaraguagüdaña gürgía témpulurugu, ni tídan buri tíbiri jalgílisin juríu, ni lídan buri ámu fulásu ubúrugun. ¹³Gürgía ja, siñáti jarúfuduni luágu inárüni lan ni ában lídaangiñe sun cátei le jaríñagubei nuágu. ¹⁴Ában cátei naríñagubei bun, luágu neseríwiduña lan lun Jabúngiute nagúbürigu quei larúfudajani Jesucrístu, le uágubei jaríñaga luágu marícha lan. Afíñetina luágu sun le bürúwañubei tídan buri líburu to lánina lilúrudun Moisés lúma lé meja jabúrújabei profétagu. ¹⁵Níjein gíñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ja buídubaña quei ja wuríbaña. ¹⁶Ligía náfaagunbei súnwandan lun madúnrun nan ligíbugiñe Búngiu lúma jagíbugiñe gürgía.

¹⁷Lárigiñe átiri dan náu eíbugei ámu buri fulásu, ába nagíribudun nageíroun lun nedéregerun seínsu joun gudémetiña Jerusalén lúma lun nadágaragüdünnun lun Búngiu.

¹⁸Nadúgüñein yebe cátei le témpulurugu lárigiñe narúmudaguagüdünnun nungua quei le igáburu, ligía jadárirunina átiri juríu loúbawaguna Ásia ñi témpulurugu, úatiña sarágu gürgía ñi, ni chagáguauí. ¹⁹Jagía lúnbaña jayábin arúfudagua jóungua ya lun jaríñaguni le lúnbei jaríñaguni ánjein níjein lubéi lúnti jaríñaguni nuágu, ²⁰jaríñaguni lan ja yábaña ánjein darí jabei nidúnrun dan le ligíbugiñe nubei líñun-ágei lúru luágu juríu. ²¹Siñáti jaríñagun ni cáta nuágu, lueidügüya luágu lan ában wéyu dan le jádaañadina lubéi, ába nagúaragun aríñaga. “Jagúseragüdüñadina ugúñe luegíñe afíñe nan luágu jásaaruba lan jiláaña lídaangiñe óuweni lúnya jabágaridun.”

²²Subúsi sarágu luágu larúfudajan Jesúsú lun gumádimati Félix, ítara líña, dan le lagáambunbalin le laríñagunbei Páblo luágu jásaarun jiláaña, ába lagúmchaguagüdüni adamurini, aríñageina ligía.

—Nagúseragüdübe wügúri le dánme le lachúlürün gumándan Lísias.

²³Ábati laríñagun Félix lun jábuti súaara lun lasígirun Páblo daúwañu, lun furáangu lan lun gayára lan jóudin lumádagun aríjei, eténira lun.

²⁴Átiri wéyu lárigiñe, ábaya lachúlürün Félix túma Drusíla to lúmari, to juríu, ubúrugun Cesaréa, ába lagúaragüdünnun luágu Páblo lun ladímurejan lun luágu Jesucrístu. ²⁵Dan le ladímurejaanbei Páblo lun luágu ibágaru le surúbei, lúma luágu ágüdaagüni únguauí luefi

le wurfbabei, lúma luáguti wéyu le lúnbei lagúseragüdüniña Búngiu sun gürgia, ába lanúfudedagun Félix, ába laríñagun lun.

—Beíba yebe, dánme le gadáani nan, nagúarayaba bun.

²⁶Agúrabatí yebe giñe Félix lun líchugun Páblo seínsu lun lun lígiragüdüni, ligía, dan méme lubei wájali luágu lun layánujan lúma. ²⁷Sügüti bián irúmu ítara, ábati lagúmuchun lagúmadijan Félix, ába lárügüdüni Pórcio Fésto lufúlasun. Queíti busén lan Félix leréderun buídu jáma jurú, ába lígiruni Páblo daúwañu.

25

Páblo ligíbugiñe Fésto

¹Ábati lachúlürün Fésto lun lárügüdüni lufúlasun queísi gumádimati, úruíwa wéyu lueígiñe, ába lamúdeirun Cesaréagiñe lun ubúrugin Jerusalén. ²Ába jachúlürün jábutigu fádirigu ñíjin jáma jurú ja weírigutimaabaña íchiga lidúnrun Páblo ligíbugiñe Fésto. ³Ába jamúriajan fuleísei lúma lun loúnajan anúgei Páblo Jerusalén. Le jaráansejanbei, lún yebe jáfaruni jilágubei luágu úma. ⁴Ába loúnabun Fésto luágu Cesaréa lan ladaürúwa Páblo, áni jarítagua lan lídin ñi madíse. ⁵Ába laríñagun joun.

—Ligía lúnti lubei jóúdin ja weírigutimaabaña jídaangiñe Cesaréa úara núma, áni ánjein adúgaali lubei wügüri ligía dúru, gayáraabei jaríñaguni.

⁶Wídü rügüñein o díisi lan wéyu láu Fésto Jerusalén, ába lagíribudun ubúrugin Cesaréa. Larúgan, ába lárügüdüni lufúlasun lun lagúseragüdün, ába loúnajan luágu Páblo. ⁷Dan le lebelurunbei Páblo, ába jagúriridágun jurú ja ñúbinbaña Jerusaléngiñe láu, ába jíchugun sarágu lidúnrun le júrüti, áni siñáti jarífuduni luágu inárüni lan ni cáta lídaangiñe le jaríñagunbei. ⁸Ábati laríñagun Páblo lídan ladímurejan lueígiñegua.

—Madúgüngidina ni murúsun dúru ni lun jalúrudun jurú, ni tun témpulu, ni lun urúei César.

⁹Queíti busén lan Fésto leréderun buídu jáma jurú, ába laríñagun lun Páblo.

—¿Buséntibu bídin Jerusalén lun nagúseragüdünibu ñi?

¹⁰Ába loúnabun Páblo.

—Ligíbugiñeñadina lagúseragülei urúei César, le ñí lubei lúnti lan nagúserún. Queísi basúbudiruni buídu, madúgüngidina dúru joun jurú. ¹¹Ánjein adúgaadina lubei dúru le garíchatí lun nafarún jilágubei lueígiñe, mebéresegúntina noúnwen, ánjein úa lubei ni cáta lánina inárüni lídan sun le aríñawagúbei nuágu, úati ni ában garíchatí lun ledéregunina joun jurú. Amúriajatina lun César lan agúseragüdána.

¹²Lárigiñeti layánujan Fésto jáma lánigu cába lan ladúga láu Páblo, ába laríñagun lun.

—Amúriajaadibu lubeígia lun César lan agúseragüdabu, beíbugati lun César.

Páblo ligíbugiñe urúei Agrípa

¹³Átiri wéyu lárigiñe, ába lídin urúei Agrípa túma Bereníce Cesaréa aríjei Fésto. ¹⁴Quei reídei jabeí átiri wéyu ñi, ába labájüdaguni Fésto luáguti lagúserun Páblo lun urúei Agrípa, laríñaga lun.

—Ñíjein ában wügüri lígirun Félix dáuwañu ya. ¹⁵Dan le Jerusalén nubeí, rútiña jábutigu fádirigu jáma wügüriña jurú weírigutiña lidúnrun nigíbugiñe, amúriajatiña núma lun nasíadiruni. ¹⁶Ába naríñagun joun luágu magáburi láani lúruđu Rómána lun lasíadirun ában gürgia lun ouweni maríjinga láña ja íchugubaña lidúnrun ligíbugiñe, lun gayára lan ladímurejan lueígiñegua. ¹⁷Ligía, lídan lubei le jayábinbei ya úara núma, meféridirúntina dan, larúgan, ába nárügüdüni nufúlasun lídan agúseragülei, ába noúnajan luágu wügüri ligía. ¹⁸Ja ñúbinbaña lun jíchugun lidúnrun, maríñaguntiña ni cátei luágu lídaangiñe lé yebe uágubei narítagua. ¹⁹Lé buri cátei le jaríñagubei luágu, luágu múaradun lán nege jáma luágu ligáburi jafiñen, lúma luágu ában nege wügüri gríti Jesús—jiláti nege, laríñajare Páblo luágu wínwanya lán nege. ²⁰Queíti ibídiñe lan nun cába lan nadúga lídan

ában cátei líbe le, ába nálügüdüni Páblo ánjein busén lubei lídin Jerusalén lun lagúserún luágu cátei le ñi. ²¹Quei lamúriajan lun urúeiba lan Augústo César agúseragüdeí, ába nariñagun lun lasígrun dáüwañu daríme gayára lan nouñajani lun Augústo César.

²²Ábati lariñagun Agrípa lun Fésto.

—Buséntina gíñe nagáambuni wügúri ligía.

Ába lariñagun Fésto lun.

—Bagáambubei jarúga.

²³Larúgan, dan le jachúlürünbei Agrípa túma Bereníce, ába jebélurun láu oúnwenbun uweírigin múnadoun, jáma jábutigu súdaara jáma wügúriña weírigitüña ñi ubúru. Ába louñajan Fésto luágu Páblo, ²⁴ába lariñagun.

—Urúei Agrípa, jáma wügúriña ja adámurigubaña wáma ya, niján wügúri le. adímurejaña sarágu jádaangiñe jurú wuríba nun luágu, dándu Jerusalén quei ya Cesaréa, áni añájagua ariñaga nun láu sarágu éregu luágu lúnti lan louñwen. ²⁵Laganóun nun camá madúgüngili ni cáta le lúnti lafarún jilágubei lueígiñe, áni queiti ligía guánarügü lan amúriajabei lun urúeiba lan Augústo César agúseragüdei, nouñajaali lun. ²⁶Queiti úa lan cába lan cátei uágu nabúrúja lun Augústo luágu wügúri le, ligía nanúgübalin jigíbugiñoún, bigíbugiñountimá urúei Agrípa, lun bálügüdaguni, níjein lámuga cába lan nabúrúja. ²⁷Ladúga garábaguati nun lun nouñajan ában adaüríti, mawísajaanga áu ca lan lidúnrunbei.

26

Ladímurejan Páblo lueígiñegua ligíbugiñe urúei Agrípa

¹Ábati lariñagun Agrípa lun Páblo.

—Gayáraati badímurejan bueígiñegua.

Ába liñúrui Páblo lújabu lun jagáambuni, ába lagúmeserun adímureja, ába lariñagun.

²—Oúnwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le ariñaga jamáalibeí jurú nuágu, ³gúndaatimáatina ladúga subúdi báni jagáburi jurú lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴Subúdi jamúti sun jurú ligáburi meja nabágaridun jádan, nageíra lúma ubúru. Jerusalén, lúmagiñe irájügídina. ⁵Lúja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdabei lídan luwúyeri wafíñen, wagía jurú. ⁶Guetóti, jagúseragüdüñadina luágu eménigini le nuágubei, luágu lásaaragüdübaña lan Búngiu jiláaña lídaangiñe ouweni lúnya jabágaridun, queí meja lariñaguni joun binádu wagúbürigu. ⁷Dúusugubei familia le jadúgawagunbei lirájüñü Israel agúrabatiña jaríjini lagúnfulirun dimúrei le, ligía jájuduragunbei lun Búngiu, seríwi Jameí wéyuagu, áriebu. Lueígiñe méme eménigini le, jadárira jurú nidúnrun, urúei Agrípa. ⁸¿Mafíñetün funági luágu gayára lan lásaaragüdüniña Búngiu jiláaña?

Labájüdagun Páblo luágu meja leíbaajaniña afíñetiña

⁹Nugúya guánarügü, jarítaguatina méja luágu lúnti lan neíbaajaniña ja afálarunbalin Jesútu Nazarétna, ¹⁰áni ítara líña nadúgiñi ubúru. Jerusalén. Láu ubáfu le jíchugubei jábutigu fádirigu nun, dátina sarágu jádaangiñe lánigu Búngiu furisunrugun, áni dan lé buri jasádirúniwa lun jóunwen, nugúya ában jádaangiñe ja abúdujabaña lun ítara lúba lan. ¹¹Níjeinja dan, súfurigüda numútiña lún yebe jeyéedagun luágu jafíñen luágu Jesucrístu. Adágua numúti meja cátei le tídan sun jalígilisín afíñetiña, áni weíríti meja nigáni joun darí lun neíbaajaniña chülú lídoun buri ubúru le díseti.

Labájüdagunya Páblo luágu lasálbaran

¹² ‘Ligía yebe cátei le gabúgürübalina ubúrugun Damásco ában dan, jóunajan jábutigu fádírugu. ¹³ Luágu úma, nurúeite, amídirugu, ába naríjin ában larúgounga siélugiñeti, jéreti sügú lau larúgounga wéyu, ába ladúnraagun geyégua náu jáu sun ja úarabaña núma. ¹⁴ Súngubei wagía, ába wáburujan múarugun, ába nagáambun ában umálali aríñaguti nun lídan hebréo, le jerérun juríu. “Sáulo, Sáulo, ¿ca uágu beíbaajana? Basúfuriraguagüdüñatia búngua láu bamánjarun nun quei ladúga bágasu dan le líchaagun quíqui luágun cátei gágiriti.” ¹⁵ Ábati naríñagun. “¿Cátabusan, Nabúreme?” Ába laríñagun nun. “Jesúsu áu, le guánarügü beíbaajabei. ¹⁶ Sarába, ráramabá, ladúga narúfudagunbei núngua bun lun besériwidun nun, lun geféen ban luágu le aríja báalibei guetó lúma le lúnbei narúfuduni bun. ¹⁷ Neséfurubadibu jawéi juríu lúma jawéi ja mámabaña juríu, ja únbaña núnajabu guetó. ¹⁸ Núnajañadibu jámoun lun béfegechagüdüni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Núnajañadibu joun, afíñe jamámuga nuágu, ferúdunawa lámuga jafígoun, ibíja jamámuga alágan jádan ja jarúmagüda láañabaña Búngiu láu jafiñerun nuágu.”

Labájüdagun Páblo luágu luwádigimari

¹⁹ Ítara líña lubefti, urúei Agrípa, ába nadúgüni le laríñagunbei Jesúsu nun lídan le lasáliragunbei nun. ²⁰ Furúmiñe, ába napúrichijan joun ja Damáscobaña, aríñagatina joun lun jaságüríjan luágu jafígoun, lun jagíríbudun lun Búngiu, lun jadúgün cátei bufti, arijúa lámuga luágu sáansiguuáli lan jagáburí. Lárígiñe, ába napúrichijani cátei méme le joun ja Jerusalénbaña, ja mámabaña juríu. ²¹ Ligía lébubei járiügüdüni juríu témpulurugu, ába jálugun jáfarunina jilágubei. ²² Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürríga, dándu ja weírígubaña queísi ja únabugubaña, chülú lúmoun óra le. Maríñaguntina ni cáta joun gürríga bougudin luef le uágubei jaríñaga Moisés jáma profétagu luágu lasúsereduba lan— ²³ luágu lúnti lán meja lasúfuriruba lan Crístu, luágu lárígiñe lánme louñwen, ligíaba lan furúmiñeti ásaaruti jádaangiñe jiláña láu ibágari magúmuchaditi, luágu gíñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafiñeragüdüni Agrípa luágu Jesucrístu

²⁴ Lídan le laríñagunbalin Páblo cátei le buri lídan ladímurejan lueígiñegua, ába lagúaragun Fésto.

— ¡Lúlüjaali báu, Páblo! Lúlügüdá sarágu atúriajani báu.

²⁵ Ába louñabun Páblo, ába laríñagun.

— Málülúnti náu, gumádimati, inárüni le naríñagunbei. ²⁶ Niján urúei Agrípa le subúdíjabúbei lún buri cátei le buídu, ligía gayára lubeí nadímurejan ligíbugiñe, furáangu, ladúga chouuru náni luágu subúdi láani gíñe sun cátei le asúseredubei lun Jesúsu, ladúga máma cátei le adúgüti arámudaguarügü. ²⁷ ¿Afíñetibu luágu le jaríñagubei profétagu, urúei Agrípa? Subúdi numúti luágu afíñe ban.

²⁸ Ába laríñagun Agrípa lun.

— ¡Jarítaguatibusan luágu baffíneragüdübadina lan luágu Jesucrístu ítara ufúresen?

²⁹ — Furése yebe, o darása yebe, amúriajatina lúma Búngiu, mámarügü buágu, jawágu gíñe sun ja añájabaña agáambana ugúñe, lun jayábin lun jafiñerun quei nugúya, úouga gürríngüri jawágu.

³⁰ Lárígiñe laríñaguni Páblo cátei le, ába lásaarun urúei, sará gíñe gumádimati úara túma Bereníce jáma sun ja núnbaña ñi, ³¹ ába jadíñurun nígiñe lun jadímurejan luágu cátei le. Jaríñagati buri jámagua.

— Wügúri le, madúgünti ni cáta le lúnti lafarún jilágubei lueígiñe, moún lumuti ni fbini leréderun furísunrugu.

³² Ába laríñagun Agrípa lun Fésto.

—Lun jamúga mamúriajan lan wügúri le lun lagúseragüdüni Augústo César, gayáraati jamúga lígirawagüdün.

27

Louñajouñ Páblo ubúrugun Róma

¹Lídan le jaráanserunbei lun jouñajaníwa Itálioun, ába ledéregérún Páblo jáma ja jíbbiri adaürútiña lábu laríjin ában súdaara gíriti Júlio, ligía gumándanbei lun jadámurin súdaara le gíribei “lisúdaaranigu Urúei Augústo.” ²Ába wádinagun tídoun ában ugúnein nñubintu Adramítioigiñe lun Ásioun. Níñein gíñe Aristárco wáma, le Tesalónicana, Tesalónica ában ubúruwu láni Macedónia. ³Larúgan, ligía wachúlürün Sidón, lídan fulásu ligía, buíti loúseruni Júlio, le gumándan, Páblo, ígira lumúti lun bisída lániña lumádagu lúma lun jeténirun lun. ⁴Lídan wáfuridun Sidóngiñe, ába wóudin únabugiñe libíti uboúju Chíppe ladúga wabánrouñein lan garábali. ⁵Ába wájiñuraguni barána ligíbugiñe lubéyaari Cilícia lúma Panfília, ába wachúlürün lídoun fulásu le gíribei Míra, ában ubúruwu láni Lícia.

⁶Ni ladárra gumándan ában ugúnein Alejandríana teíbuga Itália, ába ládinagüdüniwa lun wasígiruni waweyasun. ⁷Áfayajatiwa jámaru luágu sarágu wéyu, láu lénreengun wachúlürüa ligíbugiñe ubúruwu le gíribei Gnido. Queíti wabánroun mémegili lubeí garábali, ába wáfayajan únabugiñe libíti uboúju Créta, sügüüna wagía ligíbugiñe Salmón, ⁸wasígira láu méme lénreengun lárú lárú, ába wachúlürün lídoun ában ubúruwu gíriti Buíti Fulásu, yaráfa lun ubúruwu Laséa.

⁹Féridjadiwa sarágu dan, dénychajaliti áfayajani baránaja ladúga yaráfaali lidáani luríbuga, sügújali jafédun jurú le lánina ferúdu figoú. Ligía lewéridirunbaliña Páblo, laríñaga joun.

¹⁰—Aríja numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei gíñe weféridiruni wabágari.

¹¹Lubáragiñe ladúgün gumándan gásu láu le laríñagunbei Páblo, ába lídin láu le lubeíbei tabúreme ugúnein lúma le abúgajabei. ¹²Queíti mabuidun lubeí fulásu ligía lun lásügürün luríba dan ní, ába jarítangun jíbe-ágei luágu buídutima lán yebe lun wáfuridun nígiñe, lun waríjin ánjein gayára wachúlürün Feníce, ában fulásu láni uboúju Créta, lun wasügürüni luríbaniga ní. Ni Feníce, níjein barána lueígiñe núru lúma suédi.

Luríba dan baránaja

¹³Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun lárú lárú Créta. ¹⁴Málüti lueígiñe jáfayarun, ába láfurun ában nodísi jéreti, ¹⁵ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdün wóungua lun lanúgüniwa. ¹⁶Ába wásügürün únabugiñe libíti ában liraúraü uboúju gíriti Cláuda, le ní lubei mére lan láfujan garábali, ába wádinagüdünun tisálufun wagúne to atoujeina waboún, láu ában lénreengun. ¹⁷Lárigiñe wiñúrurun ugúneirugun, ába lásügüragüdüniwa gúruwu tábugiñegiñe ugúnein lun jagúragunun, derébugu támuga. Queíti janúfudebei lueí joudin adágara luágu sándala le gíribei Síрте, ába jagídaraguní bíra, ába jígiraguágüdün joungua lun lanúgüniwa garábali. ¹⁸Larúgan, quei jére mémegili lubeí dan, ába jagúmeserun achágajei tíla ugúnein baránajouñ, ¹⁹luágu lúruwan wéyu, ába jachágajani lídaangiñe tumégegung ugúnein baránajouñ láu jájabu guánarügü. ²⁰Marjíntiwa wéyu ni warúguma lídan sarágu wéyu, láuti oúnwenbun luríban dan le, féridi wamáali wáññen luágu weséfuruba lan.

²¹Queíti sügújadiwa lubeí sarágu dan meíginga, ába laráramun Páblo wádan, ába laríñagun.

—Wügúriña, aríñagatiná yebe jun lun mayábin wamá Crétagiñe, buídutimaati jamúga lueí wasúfuriruni dánu le, áni féridi wameí wálagu. ²²Gagúraasun jumá, úabei ni ában

jídaangiñe ouweti, láu sun teféridiruba lan ugúnein. ²³ Chülújali ában láni Búngiu ánjeli númoun áriebu to, loúnagüle Búngiu le Nabúreme le giñe únbei nesériwida, ²⁴ laríñajare ánjeli ligía nun. “Manúfudedabá, Páblo, ladúga barúfudaguba búngua ligíbugiñe urúei César Augústo, áni badúgaba leséfuraña Búngiu sun ja tídaanbaña ugúnein búma luef ouweni.” ²⁵ Gagúraasun jumá lubeiti, ladúga jeménigitina luágu Búngiu, áni chouuru numúti luágu ítara lúba lan quei laríñaguni ánjeli luágu nun, ²⁶ láu sun, wadágaruba lan luágun ában ubouju.

²⁷ Bián dimáasu wáu luágu waweyasun, lubáranarugúñadiwa Ádria, labánreinja mémeñadiwa garábali, ligía, amídi áriebu, ába jasándirun mádulungu luágu achúlúreina wáña lan luágun múa. ²⁸ Ába jamísurajani lujúlilin dúna, san-wein ugúdi lujúlilin, ábaya jamísurajan jabáruaguouún mémeraü, gádürü-wein-díisi ugúdi. ²⁹ Léti janúfude luef jabúguchun luágu dúbü, ába jágurun gádürü ounguru tiyúnagiñe ugúnein, ába jagúrabajan larúgadun láu idjferi. ³⁰ Súnti dan le, añaja mádulungu asáminara lun jeséfuragun jóungua láu jeíbaagun tídaangiñe ugúnein, ába jagúmeserun aráriragúdoún salúfu dúnarugun, jadúga camá jágura ounguru tígiriñe ugúnein. ³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jeséfurun.

³² Ábati jíbuguni súdaara tugúrudun salúfu, ába jígiragúdinun dúnarugun.

³³ Lubá larúgan, ába laríñagun Páblo joun súngebui lun jeígin, laríñaga joun.

—Bián dimáasu guetó luegiñe marúmugun jumá buídu, meígin sarágu, ladúga idjferi le juágubei. ³⁴ Ayúmuraguatina jun lun jeígin, líchuguba érei jun lun jeséfurun. Chouuru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanúgün ában fein lújaburugu, ába líchugun eteíngiruni lun Búngiu jagíbugiñe súngebui. Ábati lagúbachagunun, ába leígin. ³⁶ Ába járugüdün ja jíbiri gurásu, ába giñe jeígin. ³⁷ Bián-sañadiwa úrtüwa-wein-díisi-sísi gürígia tídan ugúnein. ³⁸ Dánti le jóujáña quimúle, ába jáguruni túrígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ní jabei mádulungu joun, ába jarjín ában beídi gebéyaariti, ába jóuchun lun janúgünun ugúnein níjin. ⁴⁰ Ába jíbuguni lagúriuga ounguru, ába jígiruni baránaja, ába jasílacürüni fágaayu le esériwidubei lun jabúgurunun ugúnein. Ábati jaweinragúdüni lúgubu bíra, ába tagúmeserun ugúnein ayárafajoua lun láru béya. ⁴¹ Ába tídin lídoun ában fulásu le ní lubei biángua lan ébeeni, ába tadágarun, siñá lánjingichun tígiri ni murúsun, ába tagúmeserun abouchágu tiyúnagiñe, le lére lugúdi barána. ⁴² Ába yebe jabúseerun súdaara jáfaraguniña adaúrútiña jilágubei luef janúrajan áfulijeina. ⁴³ Ánjein le gumándan, quei busén lubei leséfuruni Páblo, mígiruntí lun jadúgüni súdaara le jaritagubei. Ábati laríñagun lun lan jachúbaragun ja gáfulijadíbaña baránajoun furúmiñe lun jachúlürün múarugun, ⁴⁴ jáme jíbiri, jóúdinme ligíbuagu buri fuláansu lúma buri tífe ugúnein. Ítara líña jachúlürün súngebui múarugun séfuñu.

28

Páblo luágu ubouju le giríbei Málta

¹ Dan le séfujadiwa sun wagía láru béya, ligía wasúbudiruni luágu Málta lan líribei ubouju ligía. ² Buíti jóuseruniwa gürígia ja aganoúbaña ní, ába jáfuragun ában ouñwenbun wátu quei dílga lubei áni niján júya ájuya, ába jamísurajaniwa sun wagía lun wabácharagun. ³ Ábati labúdajan Páblo wátu mábeiti, líchuguñein yebe waturugun, ligía táfuridun ában jéwe tanúrajaña luef lára wátu, ába tárügüdün luágu lújabu, ába tágürüni. ⁴ Dan le jarjínbarun lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügúri gáfarajati wügúri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúseredunt ni cáta lun. ⁶ Agúrabatiñá yebe sùngubei láludun lújabu, o láburrugun lan ouwe. Lílíwagu jagúrabajan, dan le jarjínbe luágu masúseredun lan ni cáta lun, ába lasáansirun jaritagun, ába jagúmeserun aríñaga luágu ában lan búngiu Páblo.

⁷ Yaráfa lun fulásu ligía, ñíñein lufúlasun ában wügúri le weirigutimaabei lídan sun ubouju ligía, Públio líríbei, resíbi lumútiwa lúbiñe, seríwi láwa buídu luágu úruwa wéyu. ⁸ Roun liñáti lúguchi Públio láu sándi, abíruaü, lúma denési. Ába lídin Páblo aríjei, lásun layúmurugun lun Búngiu luágu, ába líchuguni lújabu luágu, ába lareídagun. ⁹ Lárigiñe lira, ába gíñe jayábíngua jíbiri sánditiña ja lídaanbaña fulásu ligía, ába jareídagun. ¹⁰ Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachúlürün dan lúnnya wádinagun lun wasígiruni wawéiyasun, ába jíchuguni sun le wemégeirubei woun lun wawéiyasun.

Lachúlürün Páblo ubúrugun Róma

¹¹ Lárigiñe úruwa játi wáu luágu ubouju ligía, ába wádinagun tídoun ában ugúnein to eréderuboun ásügürei luríbouga ñi luágu ubouju ligía. Alejandríana ugúnein tugúya, ñíñanu jayáwa bián sándu luágu tigíbu ugúnein tugúya, Cástor lúma Pólux. ¹² Ába wachúlürün ubúruğu Siracúsa, ába weréderun úruwa wéyu ñi, ¹³ ñígíñe wasígira lárú lárú darí wachúlürün ubúruğu Régio. Larúgan, ába láfujan suédi, luágu libíaman wéyu ába wachúlürün lídoun liraúraü aúdü le gíríbei Puteóli. ¹⁴ Ñi wadárira átiri affñetiña, ába jamísurajaniwa lun weréderun ában dimáasu jáma, lárigiñe, ába wígiragüdün lun ubúrugun Róma. ¹⁵ Agáambaña affñetiña ja Rómabaña wawágu luágu awánte lan, ába jóúdin wabároun, jíbiri chúlú lúmoun fulásu le gíríbei Fóro, le luágubei úma gíríti Ápio, jíbiri, dúnguatiña wáma lídan fulásu le gíríbei Úruwa Jában Chúlúdügütiña. Dan le larjínbaliña Páblo, ába líchugun eteíngiruni lun Búngiu, ába lárügüdün gurásu. ¹⁶ Dan le wachúlürünbei Róma, ába ledéregeruniña gumándan adaúruítiña lun jábuti oúnigirutiña, ánjeinti Páblo, ígira lumúti lun leréderun lábugua láu ában súdaara oúnigirei.

Lapúrichijan Páblo Róma

¹⁷ Úruwa wéyu lárigiñe lachúlürün Páblo, ába louñajan jawágu juríu weirigutiña ja Rómabaña, dan le adamuriguuaña, ába laríñagun joun.

—Nidújeñu, láu sun madúgün nan ni cáta wuríbati joun juríu, ni lun le uágubei jéchuda binádu wagúbürigu, derégawatina dáüwañu joun Rómána ubúruğu Jerusalén. ¹⁸ Lárigiñe jálügüdágúnina, álugatiñá yebe jígiragüdünina ladúga madári jamá nidúnrun le lúnti nafarúniwa jilágubei lueígiñe, ¹⁹ májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásiñun nun. ²⁰ Ligía lubefí lébubei nouñajan juágu lun narjínün lúma lun nadímurejan jun, ladúga lueígiñe cátei le uágubei weménigida wagía Israelítagu anája lubeí gurágu láu güringüri le.

²¹ Ábati jaríñagun lun.

—Wagía, merésibirúngidiwa ni ában gárada buágu Judéagiñe, úagili gíñe ni ában wapaásanu jádaangiñe ja núbinbaña ñígíñe aríñaguti wuríbati woun buágu. ²² Buséntiwa jamúga wagáambuni ca lan barítagebei, ladúga subúdi wamúti luágu adímurejóua lan wuríba luágu iséri adámurini le, le lánina lémeri Jesúsu, lídan sun fulásu.

²³ Ábati jíridun ában wéyu lun, ába jachúlürün sarágu gürgía le ñí lubei lagánawa Páblo. Ába ladímurejan joun lúmagiñe bináfin darí guñoun luágu larúeiñan Búngiu. Loúchun lun lafiñeragüdüniniña luágu Jesúsu lan asálbaragüleibe le jagúrabajabei láu layúsuruni lílürudun Moisés lúma le jabúrújabei profétagu. ²⁴ Jíbiri, affñetiña luágu le

laríñagubei Páblo, jíbiri maffñetiña. ²⁵ Queíti múaradun jamá jámagua luágu jarítangun, ába jagúmeserun ñúdüngua, ábati laríñangun Páblo joun.

—Ligía laríñangunbei Sífiri Sándu joun binádu wagúbürigu lídaangiñe proféta Isaías.

²⁶ Beíba, baríñagame joun güirígia ja jurúbaña.

Jugúya, jagáambuba ában ugánu sarágu dan, úabei gunfaráanda jumáni laníchigu dimúrei le jagáambubei.

Jaríjuba sarágu cátei, meféenbadün luágu,

²⁷ ladúga deréeru janígi güirígia ja, áni wuríbati jagáambun,

darú jamuti jágu, lueí jaríjini laníchigu cátei le jaríjubei,

úati giñe gunfaráanda jamáni cátei le jagáambubei,

derétu giñe janígi,

máluajan jamútina lun nareídaguagüdünun jawáni.

²⁸ Subúdi jumeí luágu oúnaja láali lan Búngiu ugánu luáguti Jesúsu le méme Wasálbaragülebei joun ja mámabaña jurú, áni jagía, jánjaruba lun.

²⁹ Dan le laríñangunbei Páblo ítara, ába jóúdingua jurú, adímurejeina jámagua luágu cátei le.

³⁰ Reídeiti Páblo bián irúmu dayáruti tídan lúban ájayajóutu, resíbi lumútiña sun ja ñúdümbaña aríjei. ³¹ Apúrichijati luágu larúeijan Búngiu láu furáangu, arúfudaja ligía luágu Wabúreme Jesucrístu, mebérésejanga ni ában lun.

LIGÁRADAN PÁBLO JOUN RÓMANA

Labúrrijan Páblo joun tílana liglisi to Rómaboun

¹ Anája áu, Páblo, nabúrrijañoun gárada to jun, jugúya lánigu Búngiu ja aganoúbaña ubúruгу Róma. Aban esériwiduti lun Jesucrístu áu, anúadira lumútina Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le araanse láalibei jaba gürígia. ² Sabúdigüda lumúti Búngiu ugánu le lúmagiñé meja binárü jádaangiñe profétagu, bürúwati le jadfmurejabei tídan Lerérun Búngiu. ³ Núbinti asálbaruni ligía woun lídaangiñe Wabúreme Jesucrístu. Gürígia uboúaguna Jesucrístu, Búngiu méme gríne. Queisi gürígia, jádaangiñeti méja lufámilian Urúei David Jesucrístu, ⁴ arufudúati luágu Liraú lan Búngiu láu luweírin miláguru le ladúgübei láu lásaaragüdüni Jesucrístu lídaangiñe oúweni. ⁵ Fuleisei lumútiwa Búngiu lídaangiñe Jesucrístu lun loúnajaniwa lídan líri lun wasúbudiragüdün joun gürígia luágu queisi Wasálbaragüle lídan sun fulásu, gayára lámuga jaffínerun luágu, adúga jameíme le lubeíbei. ⁶ Anjúnjein jagánagua gürígia jagía, jugúya le únbei lagúara Búngiu lun lánigu jumá Jesucrístu.

⁷ Nabúrrijaña lubeíti jun, jugúya le aganoúbei ubúruго Róma, ja jínsiñebaña lun Búngiu, wa ligía jun lun jabágaridun ában ibágari derégeguañu júngua lun. Ibíja jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Buséti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírin neteíngiruni Nubúngiute lídaangiñe Jesucrístu juágu, sun jugúya, lugúndun adimurejóati luágu jaffínen luágu Jesucrístu lídan sun fulásu. ⁹ Áni Búngiu, le únbei nesériwida táu sun nanígi apúrichijei ugánu luáguti Liraú, geféenti luágu luweírin nayúmuragun juágu súnwandan lídan nayúmuragun lun. ¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubei lugúndaanbei. ¹¹ Lugúndun buséntina narjínün lun níderagunün lídan jaffínen, lúntima derégedagu jumá, ¹² lun gíñe wíchugun gurásu wádaangua láu affíneni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álugaadina nídin lun níderagunün lídan jawáanserun lídan jebugun lúma Búngiu, queisi narjini jawáanserun jíbiri affínetiña lídan buri ámu fulásu. ¹⁴ Lúnti níderaguniña sun gürígia, dándu ja chúlúguatiña queisi ja machúlaaguntiña, dándu chu táu queisi ibídougua táu. ¹⁵ Lueígiñe lubeíti noúbadina, buséntina gíñe lun napúrichijani ugánu luáguti Wasálbaragüle jun, jugúya le aganoúbei ubúruго Róma.

Lubáfu ugánu lánina asálbaruni

¹⁶ Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja affíñebaña luágu, juríu furúmiñe, lárigiñe, ja mámabaña juríu. ¹⁷ Arúfuda lumúti ugánu ligía woun ída líña lan larícharaguagüdüniña Búngiu gürígia ligíbugiñe, lun gayáraabei lan lerésibiruniña queisi lánigu. luwúyeri igáburi ligía, láurügü laffínerúniwa luágu, libijúa. Ítara líña tarfínguni Lerérun Búngiu. “Le gürígia le richáguabei ligíbugiñe Búngiu láu laffínerun luágu, libíjubei ibágari magúmuchaditi.”

Jadúnrun gürígia ligíbugiñe Búngiu

¹⁸ Aríja wamúti láburujan lanárimel ligáñi Búngiu siélugiñe jawágun sun gürígia ja wuríbababaña, jáma ja minébenejababaña lun, ja mígirunbabaña lun lasúbudirúniwa linárün Búngiu, lurúma jaríban. ¹⁹ Subúdi jamúti le gayáraabei lasúbudirúniwa luágu Búngiu buídu buídu lugúndun ligía guánarügü arúfuda láali joun, ²⁰ le marijínbei luágu Búngiu, gayáraati lasúbudirúniwa láu buri cátei le ladúgübei. Aríjuaali furáangu lúmagiñe lagúmeserun

ubouú luágu Búngiu lan ligía, luágu gñe Súnti Gabáfu lan ligía lun súnwandan. Gadúnrun-jaña lubefti luágu jaríban, ²¹ lugúndun láu sun subúdi jamáni Búngiu ítara, míchugugiña inébesi lun queísi Búngiu, meteíngirun jameí. Queísi libídiouniga láu ligáburu jarítangun luágu Búngiu, féridi jamúti murúsun larúgounga luágu Búngiu lé meja jabíjibeí. ²² Láu sun aríñaga jamá luágu chu lan jáu, ibídiouguati jáu, ²³ lubáragiñe jájuduragun lun Búngiu le weírigubei, le mouwedadibeí, jájuduraguariña joun jayáwa gürígia ja goúwedaditiña, lúma gñe joun jayáwa dunúru, jéwe jáma anímaalu ja gádürügua tugúdi.

²⁴ Ligía ígira láaña lubeí Búngiu láu luríban ayúmajani le gádaanbaliña, darí lún buri jadúgün cátei buri nibúsigarídünati jámagua. ²⁵ Ítara líña ligáburu jabágaridun lugúndun mafñerun jamá luágu inárüni luáguti Búngiu, jafñera luágu iyéeni, jájuduragua láu inébesi lún buri cátei le ladúgübei Búngiu lubáragiñe jamúga jájuduragun lun Búngiu, le gadúnabei inébesi súnwandan. Ítaralá.

²⁶ Ligía ígira láaña lubeí Búngiu lun jadáagun cátei nibúsigarídünati, ásta würíña adágutiña cátei jáma würíña jáledi lubáragiñe jamúga jagámaridun wügüri queísi lubúdubú. ²⁷ Ítara méme gñe ígira jamáali wügüriña jayúsurun würíña lun jayúsuragun jóungua. Adáaguatiña wügüriña cátei buri nibúsigarídünati jámagua, ábati jasúfuriruni lafáyeiruaja jawíye jawoúgua.

²⁸ Queísiti mabúserúnjaña lan jíchuguni lilúgaarun Búngiu lun, ígira láañati láu lagúbüri jasáminan, lun jadúgüni le mouñ lubei jadúgüni. ²⁹ Buin jáña láu sun luwýyeri maríchaü, salúfuri, wuríbani, meménijabuni, iyéreejabuni, gimúgäu, áfarajadi, lanígiwa wuríbu, ayéeraguní, íbíbuni, marásualugu. ³⁰ Adímurejatiña wuríba jawágu jíbiri gürígia, iyéreeguti Búngiu joun, minébenejabutiña, barúguatiña jóungua, pántatiña. Gachúgütiña lun jaságarun iséri buri cátei wuríbati, mabájüdün jamútiña jagúbürigu, ³¹ ibídiouguati jáu, magúnfulirun jamúti jerérun, mínsiñejabutiña ni ca un, úati ferúduna jamá, magúdeme-jaabutiña. ³² Subúdi jamúti le laríñagubei Búngiu buídu buídu, subúdi jamúti luágu ja lan adúgüfti buri cátei le, lúnti lan jóunwen lueígiñe. Láu sun líra, adúga méme jamúti, darí lun gúnda jamá dan l jasáminan, lun jadúgüni lee jaríjin ámu gürígia adúgei.

2

Agúseragüdáti Búngiu láu inárüni

¹ Ligía gadúnrun lubeí le adímurejabei luágu le ladúgübei ámu, cáteinein lan, lugúndun dan le ladímurejan luágu wuríbani le ladúgübei ámu, líchuguña guánarügü dúru luouúgua, lugúndun líbe méme gñe cátei wuríbati ligía ladúgübei. ² Subúdi warúti luágu láu lan inárüni lagúseragüda Búngiu dan le lasádiruniña ja adúgübalin buri cátei l jasáminan, lun jadúgüni lee. ³ Bugúyati le adímurejabei jawágu ja adúgübalin buri cátei wuríbati le, áni ligía méme gñe badúgübei, ¿jarítanguatibu funági luágu beséfuruba lan lueí ligáñi Búngiu? ⁴ ¿Ódi mebéresentibu láu lareíni Búngiu le magúmuchadibeí lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburu, máma lun basígirun afgounja? ⁵ Derétu banígi, májatibu basáansiruni bigáburu. Ligía abúnja lubeí agánwoundagüda lafáyeija bifígoun lubáme luwéyuri lagúseragüdü Búngiu dánme liábin lun líchuguni lísiadin le richábei, ⁶ dánme le lafáyeiruni cáda ában según le ladúgübei. ⁷ Líchuguba íbágaru magúmuchaditi joun ja áluajabalin uweíriguni, inébesi, lúma cátei lé buri magúmuchaditi yágüta siélu láu jadúgüni le buídubei súnwandan ya ubouágu. ⁸ Anjaña sun gürígia ja magáambadibaña lun Búngiu, ja májabaña lun jafálaruni linárün Búngiu, jafálarei wuríbani, lafáyeirubaña Búngiu láu sun ligáñi. ⁹ Níjeinbei asúfuriruni lúma igárigu joun sun ja adúgübalin le wuríbabei, joun juríu furúmiñe, lúma gñe joun ja mámabaña juríu. ¹⁰ Anjeinti joun sun ja adúgübalin le buídubei, líchuguba Búngiu uweíriguni, inébesi, lúma darángilaü, juríu furúmiñe, lúma gñe joun ja

mámabaña juríu. ¹¹ Lugúndun ában lan lanúgüniña Búngiu sun güirgía. ¹² sun ja afgounjabaña masúbudirunga jameí lilúrudun Búngiu le lederegerubei joun güirgía lídaangiñe Moisés, jagúserawagüdúba boúgudin lueí lúrudu ligía, tídiba jawáni máfiougatin. Játi afgounjabaña láu sun subúdi jamáni lilúrudun Búngiu, jagúserawagüdúba láu lúrudu ligía, tídiba gñe jawáni máfiougatin. ¹³ Lugúndun máma ja agáambarügübalin lúrudu richáguabaña ligíbugiñe Búngiu, anáti ja agúnfulirubalin. ¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadúgüni le lubeíbei Búngiu láuriügü laríñagun jarítangun guánarügü joun luágu le buídubei lúma le wuríbabei. ¹⁵ Láu jagáburi, arúfuda jamúti luágu níjein lan lilúrudun Búngiu bürúñu tídan janígi, arúfuda tumúti janígi líra, áni laríñagubei jarítangun joun ánjein gadúnrun jabeí lúmoun madúnrun jamá. ¹⁶ Luágume wéyu le lagúseragüdüniña Búngiu sun güirgía lídaangiñe Jesucrístu, larítaguba luágu sún buri cátei le, ladúga lagúseragüdübei gñe ásta cátei lé buri arámudagúabei tídan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdüni luágu lilúrudun Moisés lun basálbarun, luágu Búngiu lan le inárüni Bubúngiutebei. ¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei. ¹⁹ Jarítaguatibu búngua luágu gayára lan badúndejan maríjintiña lídoun úma buíti lúma luágu gayára lan bíchugun larúgounga joun ja eíbugubaña lídan lubúriga. ²⁰ Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni úma joun ja isérigiñababaña lídan jafñen, queísi barítangun luágu íbja báani sun subúdi lúma inárüni lídan lilúrudun Moisés. ²¹ Wel, ánjein lubeíti arúfudaja bubeí joun ámu, ¿cági uágu marúfudajan bubeí bun guánarügü? Ánjein apúrichija bubeí luágu lúnti lan míwerujoun lan, ¿cági uágu bíweruja? ²² Ánjein aríñaga bubeí luágu moún lumuti lan jagámaridúniwa jámari güirgía marfeitiña, ¿cámegi badúgei? Ánjein iyéreegu lubeí cátei lánina sándu bun, ¿cámegi bádaragua búngua lídoun buri cátei jánina sándu láu bíwerujani tirísín jalígilisin? ²³ Pántatibu láu lilúrudun Búngiu, ába bíchugun minébesei lun Búngiu láu magúnfulirun báani. ²⁴ Tinárün Lerérün Búngiu dan le taríñagun. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adúga jumúti jugúya juríu igáburi le circuncisión lé meja liseíni lídaradun Búngiu jáma lánigu. Buíti igáburi ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá, manúgünti circuncisión ni cáta jun, queígubeirügü madúgüniwa lan. ²⁶ Güirgía ja mámabaña juríu, ánjein jadúga buri cátei le lubeíbei lilúrudun Búngiu, janúgüba queísi lánigu Búngiu láu sun merésibirun jamáni circuncisión. ²⁷ Güirgía ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalibei circuncisión, ja magúnfulirunbalin Lerérün Búngiu, láu sun jun lan labúrüdúwa. ²⁸ Le juríubei le tímatimaati, máma boúgudigiñerügü líbíti juríu lan, máma gñe láuriügü wadúgün cátei le boúguditi wabíti lánigu wamá Búngiu. ²⁹ Láu wafálaruni Búngiu táu sun wanígi, lánigu wagía le tímatimaati, wáfaaguba táu sun wanígi lun wadúgüni lugúndan, lugúndun ni cáta circuncisión lun Búngiu. Ítara líña lubeíti, güirgía le lánigubei Búngiu tídaangiñe lanígi, ligía buídubei ligíbugiñe Búngiu íbini jarítangun güirgía luágu mabuídun lan.

3

¹ Queísi ítara líña lubeí, ¿jalíñeinti jagáñiragüle güirgía lueígiñe juríu jamá? ¿o cági lubuíduna lerésibirúniwa circuncisión? ² Sarágu, áni gíbeti gñe lébuna. Furúmiñeti cátei, rúlumuti Búngiu lerérün joun juríu. ³ Ánjaña ñi jádaangiñe juríu, múaraantiña lúma Búngiu, ¿magúnfulirunbei funági Búngiu láu lerérün ladúga líra? ⁴ ¡Máma líña!

Lubáragiñe líra, lagúnfuliruba Búngiu láu lerérun láu sun yé jama sun güriquia ubouagu. Tariñajare Lerérun Búngiu.

Babájüdüba queisi richáti lídan le baríñagubei, áni buídubei báfuridun dánme le bagúserawagüdü.

⁵ Ábanya álügüdjani. ánjein seríwi lubei luríban wagáburi lun larúfuduni luágu richágu lan Búngiu, ¿cábagi waríñaga? ¿Maríchati funági Búngiu lugúndun larúfuduni ligáni luágu luríban wagáburi? (Nadímurejañatia queisi güriquia.) ⁶ ¡Máma líña! Lugúndun lun jamúga múaran lan Búngiu, ¿ída líña jamúgagi lagúseragüdüniña güriquia?

⁷ Ánjein gñe seríwi lubei wayéeni lun weírigutimá lan linárün Búngiu, ¿cáti uágu larinawagúa wawágu luágu gaffigoun wamá? ⁸ ¿Lúnti lubei jamúga ladügün wuríbani lun larijóuniwa le buídubei? Niján cátei le jariñagubei sarágu güriquia luágu ligía lan warúfudajabei. Güriquia ja aríñagubaña ítara, lúnti jamúga jasiádirúniwa.

Sun wagía gadúnruntiwa ligíbugiñe Búngiu

⁹ ¿Ída liñági? ¿Buítimaatiwa wagía juríu sügü jáu güriquia ja mámabaña juríu? ¡Uá! Lugúndun arúfuda wamáali luágu dándu lan juríu queisi máma juríu lábugiñeñanu lubáfu figoú. ¹⁰ Tariñajare Lerérun Búngiu.

Úati ni ában güriquia richáguati ligíbugiñe Búngiu, ni íbini ábanrügü,

¹¹ úati ni ában áñaruti lun gunfaráanda lan,

úati ni ában áluajati Búngiu.

¹² Yuríguaaña súnagubei, ñúdüñjaña lídoun féridi.

Úati ni ában adúgüti le buídubei, ni íbini ában.

¹³ Eyéeraguatiña láu jayúma,

júnren líña jayúma lun jadímurejan lagúburi dimúrei le mínsiñeguti queisi limínsiñegun líjeme umúajaü júnren lárigiñe líchugúniwa jílaali ñíjin.

Yúsu jamúti jayúma lun jagádeirun jíri güriquia furése queisi láfajaran lupeísini jéwe.

¹⁴ Anábajani rügüñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barúti jagáburi güriñguaü lúma igárigu,

¹⁷ áni ibídiñeti úma lánina darángilau joun.

¹⁸ Marítagungubeítiña luágu lanúfudewa luef Búngiu.

¹⁹ Subúdi wamúti luágu sun lan le larinagubei binádu lilúrudun Búngiu, joun lan ja lábugiñebaña lúru luágu ligía larinagei, lun jasúbudiruni güriquia jagía luágu gaffigoun jamá. Ítara líña lubeíti, gadúnrun jamá sun güriquia ligíbugiñe Búngiu, dándu juríu queisi ja mámabaña juríu. ²⁰ Lugúndun úabei ni ában eréderuti richágu ligíbugiñe Búngiu luegiñerügü ladügüni le lubeíbei lúru, lúnrügü lasúbudiragüdüni lúru woun luágu gaffigoun wamá lesériwida.

Lídaangiñe afñeni liábin asálbaruni

²¹ Guetóti arúfuda láali Búngiu woun ída lúba lan ligáburi gayára lan weréderun richáguañu ligíbugiñe bougudin luef lúru lé meja líchugubei lídaangiñe Moisés. Gayáraati wasúbudiruni líra láu walíjanun lílíburuna to meme lilúrudun Moisés, túma jalíburun profétagu. ²² Láu wafñerun luágu Crístu, gayára lan weréderun richáguañu ligíbugiñe Búngiu, áni ában lan ladügüni Búngiu líra joun sun güriquia, ²³ lugúndun afígounjaaña sun güriquia áni siñáti lagúndaarun Búngiu jáu. ²⁴ Láu lareíni Búngiu, resíbi lumútiña sun güriquia queisi lánigu, mafáyeijaanga jagía luágu, lugúndun fáyeijali Crístu luágu waffigoun lun gayáraabei lan weréderun richáguañu ligíbugiñe Búngiu. ²⁵ Adúgati Búngiu lun lébunabei lan ferúdu Crístu láu louñwen luágu waffigoun, áni lídaangiñe wafñerun luágu queisi Wasálbaragüle liábin ferúdu woun. Láu louñwen Crístu queisi afáyeiragüle luágu figoú, ába larúfuduni Búngiu luágu úaragua lan áni iyéreeguti figoú lun. Ába lachíbuni líta Crístu jaffigoun güriquia já meja aganoubaña lídan dan le sügüjalíbei,

le uágubei mafáyeijagüdün láañabaña lan, ²⁶ chibá lumuti gñe jafígoun ja aganoúbaña lídan buri dan le, lun larúfuduni luágu úaragua lan, áni sun ja afñeña luágu Jesucristu queísi Jasálbaragüle barú lumútiña queísi úaraguatiña.

²⁷ Queísiti ítara líña lubeí, ¿cáti asúseredubei lun japántan güriágu luágu lubuídun jagáburi? Gumúguati. ¿Cági uágu? Lugúndun lun jamúga gayára lan wasálbarun láu lubuídun wagúnfulirun luma binádu lilúrudun Búngiu, gayáraati jamúga wanáangun woúngua, queísi sálbañu wáña lubeí láurügü wafñerun luágu Crístu, gumúgua lébuna wanáangun woúngua. ²⁸ Subúdi wamáali lubeíti buídu luágu resíbi láani Búngiu güriágu le afñeti luágu Crístu queísi güriágu richáguati, mebéresegúnga ánjein gúnfulijali lubeí luma lilúrudun Moisés lúmoun magúnfulirungili lan.

²⁹ ¿Juríu rügúñanu funági Gabúngiutei Búngiu? ¿Ma funági gñe Jabúngiute ja mámabaña juríu? Jabúngiute gñe. ³⁰ lugúndun ában rügúñein Búngiu, le erésibirubaliña sun güriágu ja afñeña luágu Jesucristu queísi Jasálbaragüle, mebéresenga ligía ánjein resíbi jabálin circuncisión lúmoun merésibirun jamáni. ³¹ ¿Wayúsuruñein lubeíti afñeni luágu Crístu lun warúfuduni luágu mebégi lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligía.

4

Jémpulu luáguti Abrahám

¹ ¿Cábatí waríñaga luágu Abrahám, le binádu wáguchi, wagía juríu? ² Lun jamúga lueigiñe lan ladúgün cátei buíti lerésibirei Búngiu queísi ában güriágu richáguati, gébunati jamúga lapántajan, máma ligíbugiñe Búngiu. ³ Tariñajare Lerérun Búngiu. “Afñeti meja Abrahám luágu Búngiu, luágu lafñein lerésibirei queísi wügúri richáguati.” ⁴ Dan le ladúgün güriágu ában wadágimanu, fáyeiti le libjubei lebégi luwádigimari, máma edéweejani. ⁵ Ánjeiti güriágu le asálbaruti lídaangiñe lifígoun láurügü lafñerun luágu Búngiu le erésibirubaliña gafigountiña, lerésibirubei Búngiu queísi ában güriágu richáguati luágu lafñein, anáti líra, edéweejani. ⁶ David guánarügü adímurejati luágu jagúndan güriágu ja lerésibirubaña Búngiu queísi richáguatiña luágurügü jafñein, mebéresenga ligía ca lán meja jadúgubei. ⁷ Laríñajare David.

Gúndaatiña güriágu ja ferúduna lubáña Búngiu jaríban, áni chibáwa ligía jafígoun.

⁸ Gúndaati güriágu le lanúgubei Búngiu queísi güriágu mafígounjaangili.

⁹ ¿Jóunti rügúñein funásan ja erésibirubalin circuncisión, ódi jóunti gñe ja merésibirubalin? Jóunti sun jawúyeri güriágu ugúndani ligía. Aríñagaadiwa luágu resíbi láani Búngiu Abrahám queísi wügúri richáguati, luágu lafñein. ¹⁰ ¿Ída bugági lerésibirei, larigiñe lerésibiruni circuncisión ligía ódi lubáragiñe? Máma larigiñe, lubáragiñe. ¹¹ Larigiñe larúfuduni Abrahám lafñein luágu Búngiu, ligía lerésibiruni circuncisión queísi seíni luágu resíbi láali lan Búngiu queísi wügúri richáguati ladúga lafñein luágu. Ítara líña gñe liábin Abrahám lun jáguchibeí lan sun ja afñeña luágu Búngiu merésibirunga circuncisión, áni resíbi lumútiña gñe Búngiu ítara queísi richáguatiña. ¹² Jáguchi gñe ja resíbi jamáalibeí circuncisión Abrahám, ja afñeña luágu Búngiu queísi lafñerun Abrahám lúmagiñe lubáragiñe meja lerésibiruni circuncisión.

Gúnfuliti Búngiu láu lerérun

¹³ Aríñagati meja Búngiu lun Abrahám luágu líchugubei lan ubou lun jáu sun linébaanfaangu queísi jalágaante, máma ladúga lagúnfuliruni Abrahám lilúrudun Búngiu líchugúa dimúrei le lun, ladúga lafñerun luágu Búngiu, ába lerésibiruni Búngiu queísi ában wügúri richáguati. ¹⁴ Lun jamúga já rügúñanu lan íchugubalin jeménigi luágu jagúnfulirun luma lilúrudun Búngiu erésibira alágan, málati lubeíti jamúga jafñerun ja eménigidubaña luágu jafñein luágu Búngiu lun jerésibiruni. Málati jamúga gñe dimúrei le líchugubei Búngiu luágu alágan lugúndun lídan linárün cátei, mabáfutiña güriágu lun jagúnfulirun

lúma lilúrudun, ¹⁵barúrügü lumúti lilúrudun Búngiu ligáñi jawágun gürgia luágu magúnfulirun jamáni. Ánjein le ñí lumuti úa lan lúru, úati gñe dúru luágu ladúraawagún.

¹⁶Ligia, lun lubei derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani luágurügüti affñeni. Mámariügü jóunti ja lábugiñebaña lilúrudun Búngiu le líchugubei joun jurú lídaangiñe Moisés dimúrei ligia, jóunti gñe sun ja mámabaña jurú áni máma gñe lábugiñeñanu lúru luágu ligia, ába jaffñerun luágu Búngiu queísi laffñerun Abrahám luágu. ¹⁷Ligibugiñe Búngiu, ñúbinti lubei Abrahám lun wáguchibe lan sun wagía le affñebei luágu Búngiu, queísi tariñagun Lererun Búngiu. “Adúga náadibu lun jáguchi ban sarágu mútu.” Gabáfuti Búngiu lun ladúgüni líra queísi gabáfu lan lun líchugun ibágari joun jiláaña, nñeingingüdalei buri cátei le úagili.

¹⁸Láu sun uá lán yebe eménigini luágu Abrahám lun garaú lan ladúga weíyaali lan, weíya tugúya Sára, affñeti dán meja le laríñagubei Búngiu lun luágu ítara lúba lan jíbe ladúgawagun queísi warúguma. Ába lasúseredun ítara lun jáguchibe lan sarágu mútu. ¹⁹Meféridirun lumúti laffñen luágu dimúrei le laríñagubei Búngiu lun, láu sún meja yaráfaali lan lun lagúnfulirun san irúmu, áni weíyaaru gñe Sára lun tagáraüdü. ²⁰Malóguadunti laffñen luágu dimúrei le laríñagubei Búngiu lun, weíritimáariügüti laffñen. ²¹Rúti uweírugini lun Búngiu láu ában ichóuruni le tímátimaati luágu gabáfu lan Búngiu lun ladúgüni sun le uágubei laríñaga. ²²Ligia lerésibirunbalin Búngiu queísi wügüri richáguati, luágu laffñen.

²³Cátei le, luáguati lerésibiruniña Búngiu gürgia luágu jaffñen, mámariügü luágu Abrahám labúrújóu, ²⁴labúrújóuña gñe wawágu. Lugúndun luágu waffñen, resíbi lumútiwa gñe Búngiu queísi richáguatiña, wagía le affñebei luágu le ásaaragüdübalin Wabúreme Jesúsu lídaangiñe óuweni. ²⁵Jesúsu le edéregerúabei lun loúnwen luágu waffgoun, ába lásaarun lídaangiñe óuweni lun larúfuduniwa richáguañu ligibugiñe Búngiu.

5

Niján lébubei weréderun madúnrunga

¹Queísi resíbi láadiwa lubei Búngiu láu waffñerun luágu, lídaanjadiwa dan lúma, lídaangiñe Wabúreme Jesucristu. ²Ladúga Crístu, biníwadiwa lubei láu waffñen luágu, derégüdagu wána lídan lareñi Búngiu, áni gúndaatiwa láu eménigini luágu gafáanranbadiwa lan lídan luweírigin Búngiu. ³Áni máma rügüñein líra, gúndaatiwa gñe lídan wasúfurirun ya ubóagu, lugúndun subúdi wamúti luágu ru lan asúfuriruni gurásu woun, ⁴buídugüda lumúti gurásu wagáburi, áni láu líra, gayára lan weménigidun lun gafáanranbadiwa lan lídan luweírigin Búngiu yágüta siélu. ⁵Áni máburujanbei warúna lurúma eménigini le, ladúgubei Búngiu le aríñaga lálalibe woun ladúga línsiñejabu woun. Sandí wamaali línsiñejabu, buíngüda láaru wanígi láu línsiñejabu, láu Sífiri Sándu le rúlaalbe woun.

⁶Ladúga línsiñejabu Búngiu woun, queí meja le mabáfu wabei lun wasálbaragun wóungua lídaangiñe figóu le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gafígounbei. ⁷Máma cátei ménreengunti lun loúnwen ában gürgia jawágu ámu gürgia, ni íbini lueígiñe ában gürgia le buíti le tímátimaati. ⁸Ánjein Búngiu, ába larúfuduni luweírín línsiñejabu woun láu loúnajani Jesucristu le Liraú lun loúnwen wawágu, láu sún meja gafígoungidiwa lan. ⁹Guetóti, láu resíbi láadiwa lan queísi gürgia richáguatiña láu loúnwen Crístu wawágu, chóurutimaati luágu weséfuruba lan lueí ligáñi Búngiu le lúnbei laburujan jawágun gafígountiña lídaanme luwéyuri agúseruni.

¹⁰Lugúndun ánjein ru lubáliwa Búngiu lídan dan lúmagua láu loúnwen Liraú dán meja le láganigídiwa, chóurutimaati luágu lasálbarubadiwa lan le gumúti, luágu Liraú le winwañubei lúma, siélu. ¹¹Áni máma rügüñein cátei le, gúndaatiwa gñe lúma Búngiu

lídoun buri dan le, lídaangiñe Wabúreme Jesucrístu, le ídaangiñebei lídaanjadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrügü wügüri le gírubei Adán lebélura figoú uboúagun, ába lanúgüni figoú oúweni lúmagua queísi lafáyeija, ítara líña gíñe jóuweguba lubeí sun gürígia lugúndun afígounjatiña sùngubei. ¹³ Lubáragiñé meja líchuguni Búngiu lilúrudun joun gürígia lídaangiñe Moisés, añájeinjaña méja gürígia afígounjaña uboúagu, láu sun úagili lan lúruđu ligía lun gayáraabei lan jadúraaguni. ¹⁴ Láu sun líra, lúmagiñe meja lidáani Abrahám darí lúmoun lidáani Moisés, jilátiña gürígia luágu jafígoun láu sun máma lan ladúga magáambadi jamá jafígounbei queísi ladúgüni Adán le magáambadibei lun lerérun Búngiu lun. Lueígiñe ában oúbaü, Adán liyáwa Crístu le lúnbei liábin, ladúga biángubei jagía barútiña som cátei joun gürígia.

¹⁵ ¡Ámuñegueinarügü gíñe cátei le janúgübei joun gürígia! Barúti Adán oúweni joun sun gürígia láu lafígounjan, ánjeinti Crístu, barúti asálbaruni joun sun gürígia, áni weíruti asálbaruni le líchugubei Búngiu láu lareíni woun lídaangiñe Crístu sügú láu lífígoun Adán. ¹⁶ Weíruti gíñe le líchugubei asálbaruni sügú láu le líchugubei lífígoun Adán woun. Ladúgarügü ában figoú, chülúti oúweni joun sun gürígia, ánjeinti ladúga loúnwen Crístu wawágu, ferúdunawati sun wafígoun le gíbebei, resíbi lumútiwa Búngiu queísi gürígia richáguatiña. ¹⁷ Ánjein gabáfu lubeí oúweni jawágu sun gürígia ladúga lidúnrun ábanrügü wügüri—Adán, choúrutiamaati luágu sun lan gürígia ja lerésibirubaña Búngiu láu lareíni queísi gürígia richáguatiña, jabíjubei ibágari magúmuchaditi lúma Búngiu, jarúeijaba úara lúma Crístu, ladúga ábanrügü wügüri ligía.

¹⁸ Ítara queísi líchuguniña Adán sun gürígia lábugiñe lisíadin Búngiu lun jóunwen láu ladúgüni le áubei magúndan lan, ítara líña gíñe lagídaruniña Crístu gürígia lábugiñegiñe asíadiruni ligía, rúlef ibágari magúmuchaditi joun láu ladúgüni lugúndan Búngiu lun loúnwen jawágu. ¹⁹ Ladúga lubeíti lumágaambadi ábanrügü wügüri, núbintiña sun gürígia lun jafígounjaba lan, ítara méme gíñe, ladúga lagaambadi ábanrügü wügüri, gayáraati jayábin sun gürígia lun richágua jamá ligíbugiñe Búngiu.

²⁰ Rúati lilúrudun Moisés woun lun gayáraabei lan wasúbudiruni cátei lan figoúbei. Láu sun gíbe lan figoú uboúagu, weírutiamaabei lareíni Búngiu lun lachílbuni sun figoú ligía. ²¹ Ítarati queísi gabáfu lán meja figoú lun lanúgüni oúweni, ítara gíñe gabáfuti lareíni Búngiu lun ladúgüniña gürígia richágua ligíbugiñe, lúma lun líchugun ibágari magúmuchaditi joun lídaangiñe Wabúreme Jesucrístu.

6

Jiláñu wáña lun figoú, wínwañu lun wesériwidun lun Crístu

¹ ¿Cábatí waríñaga? ¿Wasígiruba afígounja lun larúfuduntima Búngiu lídaangiñe lareíni woun? ² ¡Máma lúba! Wagía, jiláadiwa lun figoú, ¿ída lubáti gayára lan wasígirun afígounja? ³ ¿Ibidiñeti jun luágu láu lan lídan wamá ában lúma Crístu láu wabásterun, queísigubeirügü jamúga lídaañadiwa lan gíñe ában lúma lídan loúnwen, lun mabáfujali lánme figoú wawágu? ⁴ Láu wabásterun, queísigubeirügü jamúga bunáwa wamá úara lúma Crístu, áni reídeitiwa jiláñu lun figoú. Queígubeirügü sarágüda láani Wáguchi Búngiu Crístu lídaangiñe oúweni láu luweírin lubáfu, sarágüda láadiwa gíñe lun isérijali lan wabágari.

⁵ Lugúndun ánjein núbín wabeí lun lídaanbadiwa lan ában lúma Crístu lídan ában oúweni líbe loúnwen, ítara wába gíñe lídan lásaarun lídaangiñe oúweni. ⁶ Subúdi wamúti luágu dáwagua lan binádu meja wagáburi lúma Crístu luágu gurúwa lun lagún-rinchawagún lubáfu figoú lé meja wawágubei, lun merédeediwa lan queísi idámuni esériwida lun figoú queísi wayúbudiri. ⁷ Lugúndun le jiláalibei, furjali lídaangiñe

figoú. ⁸ Ánjein jiláadiwa lubeí lúma Crístu, gayáraati wafñerun luágu wabágariduba lan gñe lúma, ⁹ lugúndun subúdi wamúti luágu sará lan Crístu ában weíyaasu lídaangiñe ouweni, moúnwendügúyaali, mabáfujali ouweni luágu. ¹⁰ Dan le louñwenbei Crístu, ába lagúmuchaguagúdiñi lubáfu figoú lun sun dan, áni ibágari le labágaridubei guetó, lun méme lesériwidun lun Búngiu labágaridei. ¹¹ Jugúya gñe, rúgua jumá júngua queísi jiláguaaña lun figoú, áni wínwañu lun jesériwidun lun Búngiu, lídan ában lúma Crístu Jesúsu le Wabúreme.

¹² Ligía, mígira jumá lubeí lun gabáfu méme lan figoú juágu, afósurañi lun jadúgüni luríban jayúmajan. ¹³ Míchaagua jumá júngua lun figoú lun layúsuruni júgubu lun cátei wuríbati. Lubáragiñe líra, derégegua jumá júngua lun Búngiu queísi gürgia jiláaña, ábaya jabágaridun, derége jumeí júgubu lun Búngiu lun layúsuruni lun cátei buíti. ¹⁴ Mabáfujalíme figoú juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadúgüni lugúndan.

Ában jémpulu luágu idámuni

¹⁵ Queísiti máma lubeí lídaangiñe wagúnfulirun lúma lilúrudun Búngiu le líchugubei lun Moisés liábin wasálbarun, lídaangiñe werésibiruni lareíni Búngiu, ¿gayáraati lubeíti wabágaridun lídan figoú ladúga líra? ¡Siñáti! ¹⁶ ¿Ibídíñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeíti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati. ¹⁷ Teínqui niña lun Búngiu luágu láu sun lan lidámun jumá meja figoú, guetó jídiña láu ligáburi arúfudajani buíti le jagáambubei, táu sun janígi. ¹⁸ Mámaadün idámuni lun figoú, lidámunjadün Búngiu. ¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara queí meja lidámun jumá sun luwúyeri figoú, guetó lúnti jíábin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebéreseguntün meja lun jabágaridun ában ibágari buíti ligíbugiñe Búngiu. ²¹ ¿Ca mejáti cátei buíti lanúgübeí buri cátei ligía jun le áubei buri nibúsigari jumá guetó? Ni cáta buíti, féridi rügúñein lanúga jun. ²² Ánjeinti guetó, mámaadün lábugiñe lugúmadin figoú, lidámujadün Búngiu, barútiti cátei le arúmani tun janígi lúma ibágari magúmuchaditi jun. ²³ Lugúndun ouweni lafáyeijabei figoú, ánjeinti edéweejani le líchugubei Búngiu woun, ibágari le magúmuchaditi ladúga lídaañadiwa lan ában lúma Wabúreme Jesucrístu.

7

Ában jémpulu lídaangiñeti maríei

¹ Nidújeñu, jugúya le subúdjabúbei lun lúrudu, subúdi jumáali luágu dán rügúñein lan wínwangili ában gürgia, ligía lábugiñeñein lan lúrudu. ² Quei jamúga, ában wúri to maríeitu, rulumutu lúrudu lábun lagúmadijan túmari sun dan le wínwangili lan, ánjein ouwe túmari, bougudijaru lueí lúrudu le íchugubarun lábugiñe lagúmadijan túmari. ³ Ánjoun lubeíti agánawa lúma ámu wügúri sun wínwangili lan túmari, tadúgüña figoú le gíríbei adultériu, ánjein ouwe túmari, gidáaru lábugiñeñe lúrudu ligía, áni gayáraati tamárieidun lúma ámu wügúri, madúgüntu adultériu.

⁴ Ítara gñe jugúya, nidújeñu, láu louñwen Crístu, furíjadün lábugiñeñe lagúmadijan lilúrudun Moisés queísi wúri to jiláali túmari, ába tagámaridun ámu. Guetó, laníjadün Crístu, le saráalíbei lídaangiñe ouweni, lun gayáraabei lan jesériwidun lun Búngiu le gumúti. ⁵ Lubáragiñe meja werésibiruni Crístu, serfwiiti meja lilúrudun Moisés lun lagáguduni luríban ayúmajaní wádan, áni ligía cátei le anúgüwaliwa lídoun ouweni. ⁶ Ánjeinti guetó, jiláadiwa lun lúrudu ligía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táu sun wanígi, láu

ubáfu le líchugubei Sífiri Sándu woun, máma queísi idámuni lun binádu lilúrudun Búngiu le bürúwabei.

Igáburi lánina figou le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúrudu asúbudiragüdübalin figou nun. Ibídiñeti jamúga nun luágu figou lan lawámadirun jamégen ámu ánjein jamúga maríñagunti lúrudu. “Mawámadirabei jamégen ámu.” ⁸Ladúga méme gumádi le, ába lagáguduni igáburi lánina figou le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguña yebe lubáfu figou. ⁹Níjein meja ában dan, lubáragiñe nasúbudiruni laníchigu lilúrudun Búngiu le tímatimaati, ába narítangun luágu úaragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígoun nan, luágu lídaañadina lan úma lun féridi. ¹⁰Ítara líña, lúrudu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeiruaa. ¹¹Lugúndun lárügüdüin igáburi lánina figou le nídaanbei lueígiñe lúrudu ligía, ába leyéeragunina lun nadúgüni le wuríbabei, ába lanúgüni lídoun féridi láu meme lúrudu ligía.

¹²Sánduti lubeíti lilúrudun Búngiu lídaangua, sánduti giñe sun gumádi le lídaanbei, úaraguati, áni buíti. ¹³¿Ligía funásan cátei buíti le anúgübalina lídoun féridi? ¡Máma líña! Nífigoun anúgübalin neféridirun nun, áni ítara líña larúfuduni luágu figou lan, láu cátei le buídubei, le méme lúrudubei, lanúgana igáburi lánina figou le nídaanbei lídoun féridi, áni ítara líña larúfuduni lilúrudun Búngiu luágu wuríba lan figou le tímatimaati.

¹⁴Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügüri garaúwarügüti, alúguruáñu níña queísi idámuni lun lubáfu figou. ¹⁵Úati gunfaráanda náani ca lan susérebei nun, madúgün numúti cátei buíti le nabúseerubei nadúgün, nadúgei cátei le iyéeregubei nun. ¹⁶Ánjein le lubeí mabúseerun nubeí nadúgün ligía nadúga, úaraguati nisáminan lúma lilúrudun Búngiu luágu cátei le buídubei, áni láu líra, arúfuda numúti luágu barúnaani lúrudu quei cátei buíti. ¹⁷Mámaadina lubeíti áu adúgübalin cátei wuríbati le nadúgübei, igáburi lánina figou le nídaanbei, ligía adúgübalin. ¹⁸Subúdi numúti luágu úa lan ni cáta buíti nídan bougudin lueí Búngiu, áu queísi wügüri garaúwarügüti. Buséntina jamúga nadúgüni le buídubei, siñáti nadúgüni. ¹⁹Madúgün numúti cátei buíti le nabúseerubei nadúgün, nasígirarúga adúgei wuríbati le mabúseerun nubeí nadúgün. ²⁰Ánjein lubeíti le lubeí cátei le mabúseerun nubeí nadúgün ligía nadúga, lídan linárün cátei, máma áu le láni Búngiu adúgübalin, igáburi lánina figou le nídaangilibeí, ligía adúgübalin.

²¹Niján cátei le asúseredubei nun. dan le busén nan nadúgüni le buídubei, wuríbati rügüñein nadárra nídan. ²²Lídan nisáminan, jínsiñeti lilúrudun Búngiu nun, ²³áni aríjatina luágu níjein lan cátei nídan, ageíndaguti lúma nisáminan, cátei ligía, igáburi lánina figou le nídaanbei, le gámabalina adaürúwañu.

²⁴¡Fugíabu áu! ¿Cába eséfurana lídaangiñe igáburi lánina figou le nídaanbei, le anúgübalina lídoun ouweni? ²⁵Búngiu gubefrügü, lídaangiñe Wabúreme Jesucrístu. ¡Teínqui níña lun Búngiu! Gunfaráanda numúti lubeíti luágu áu lan láu náni nungua, úouga lubáfu Crístu nuágu, buséntina jamúga nagúnfulirun lúma lilúrudun Búngiu, siñá numuti ladúga igáburi lánina figou le nídaanbei, seríwirügütina lun figou queísi lidámun.

8

Wabágari lúma Sífiri Sándu

¹Guetó, gidáwaali jadúnrun gürrígia ja lídaanbaña ában lúma Jesúsu. ²Rúlaali Crístu láni Espíritu woun, áni Espíritu ligía, rúti iséri ibágari woun, furígüda láadiwa lábugiñeñe lubáfu figou le anúgübalíwa lídoun ouweni. ³Mabáfuti meja lilúrudun

Búngiu lun lagídaruníwa lábugiñegiñe lubáfu figoú ladúga turíban wanígi, wagía gürígia garaúwarügütiña. Ába ladúgüni Búngiu le lásíñerubei lilúrudun adúga láu loúnajani Liraú uboúagun queísi gürígia garaúwarügüti le gíñe gayáraati lafígounjan (láu sun, mafígounjan lan). Ába loúnwen Liraú Búngiu, le Jesucrístubei, luágu wafígoun, ába lagúmuchaguagüdüni lubáfu figoú wawágu láu loúnwen. ⁴Ladúgünbalin Búngiu líra, lun gayáraabei lan wadúgüniwa gürígiame richáguatiña queísi lagúmadijan lilúrudun, gürígia ja mabágaridunjañabaña lídan luríban jagúndan, ja abágariduñabaña guetó queísi lugúndan Sífiri Sándu.

⁵Ja abágaridubaña queísi jagúndan queísi gürígia garaúwarügütiña, luágu rügüñein cátei le lánina uboú jarítagua, ánjaña ja abágaridubaña queísi lugúndan Sífiri Sándu, luágu cátei le lánina siélu jarítagua. ⁶Dan le jabágaridun gürígia queísi jagúndan, marítagunga jagía luágu Búngiu, barú lumútiña lídoun ouweni, ánjeinti dan le jabágaridun queísi lugúndan Sífiri Sándu, barú lumútiña lídoun ibágarí tímatimaati lúma darángilau. ⁷Ja arítagubaña luágu cátei le lánina uboú le, láganiñu Búngiu lugúndan mája jáña, áni siñá ligía jíchaagun jóungua lábun lilúrudun. ⁸Ligía, ja lubeí abágaridubaña láu jagúndan queísi gürígia garaúwarügütiña, siñáti jadúgüni lugúndan Búngiu.

⁹Ánjeinti jugúya, mabágaridunjadün lídan jugúndan queísi gürígia garaúwarügütiña, jabágariduña lídan ában lúma láni Búngiu Espírítu, queísi aganóa lubeí jídan. Le úabei láni Crístu Espírítu lúma, máma lánigu Crístu. ¹⁰Ánjein wínwan lubeí láni Crístu Espírítu jídan, wínwanboun juwáni lun sun dan ladúga tarúfudúniwa richáguañu ligíbugiñe Búngiu, láu sun loúweba lan júgubu ladúga figoú le lídaanbei uboú le. ¹¹Ánjein wínwan lubeí láni Espírítu jídan, Búngiu méme le ásaaragüdübalin Jesucrístu lídaangiñe ouweni, líchuguba ibágarí iséri lun júgubu le goúwedadibeí, lídaangiñe láni Espírítu le jídaanbei.

¹²Ítara líña lubeíti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queísi gürígia garaúwarügütiña. ¹³Lugúndan ánjaün abágaridarügü queísi jugúndan, queísi gürígia garaúwarügütiña, jeféridiruba, mídinbadün siélu, ánjein jáfara igáburi lánina figoú le jídaanbei jílagubei, láu lubáfu Sífiri Sándu, jabágariduba lun sun dan lúma Búngiu siélu.

¹⁴Sun ja ladúndejabaña láni Búngiu Espírítu, lirájüñü Búngiu. ¹⁵Sífiri Sándu le jerésibirubei, máma ában espírítu lánina idámuni lúnya lanúfudedagüdüñun lueí láburujan ligáñi Búngiu juágun, Espírítu le jerésibirubei, ligía le adúgübalün lun lirájüñü jumá Búngiu. Ligía gayára lubeí wagúaruni Búngiu Wáguchi. ¹⁶Geféenti láni Búngiu Espírítu woun luágu lirájüñüjadíwa lan Búngiu. ¹⁷Áni ladúga lirájüñü wamá Búngiu, garíchatíwa gíñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Ánjein súfuri wabeí luágu Crístu ya uboúagu, gafánraanbadiwa lídan luweírigan yágüta siélu.

¹⁸Jarítaguatina luágu ní cáta lan le wasúfurirubei ya uboúagu lúmoun uweírigan le lúnbei wabíjini siélu. ¹⁹Láuñein sarágu ayúmajani lúma eménigini sun uboú le ladúgübei Búngiu, agúrabei dan le lúnbei jerésibiruni lirájüñü Búngiu jalágaante. ²⁰Níjein mégeiti luágu sun uboú, máma jamúga ladúga labúseerun, ladúga ítara líña lan labúseeruni Búngiu, ²¹láu sun líra, súnwandan níjein lan eménigini luágu leséfuruba lan uboú lídaangiñe asúfuriruni lúma agádeiruni le gádaanbalin lun gafánraanbei lan lídan jaweírigan lirájüñü Búngiu. ²²Subúdi wamúti luágu chülú lan lúmoun dan le, sun uboú le ladúgübei Búngiu ayájuati láu igárigu camá ában wúri to agáridutu. ²³Áni máma rügüñein uboú asúfurira, súfuritiwa gíñe, wagía afíñetiña luágu Crístu, láu sun níjeinjali lan Sífiri Sándu wama queísi lagúmeseraja cátei le lúnbei werésibiruni. Sandítiwa ában oúnwenbun igári, áni agúraba wamúti dan le lúnbei wayábin lun lirájüñüjadíwa lánme Búngiu le tímatimaati, dánme le liséridun wágubu. ²⁴Ligía lágüdaja wasálbarun. Merésibirun wamágili sun ubúdüni le lúnbei wabíjini queísi lirájüñü Búngiu, agúrabajatiwa werésibiruni yágüta

siélu. Ánjein jamúga íbja wamáaliti sun le lúnbei wabjini queisi lirájüñü, mébunaali jamúga wagúrabajan. Magúrabajaantiña gürigia jerésibiruni cátei le íbja jamáalibei.²⁵ Queíti merésibirun wamágili lubei sun le lúnbei wabjini queisi lirájüñü Búngiu, lúnti wagúrabuni láu gurásu.

²⁶ Ítara méme gíne, íderagua lumútiwa Sífiri Sándu lídan wadébilin. Queísigubeirügü njein dan, siñáti wayúmuragun lun Búngiu queisi lubúdubu. Lídan óra ligia, ába líderaguniwa Sífiri Sándu lun waríñaguni luweírin cátei le wasándirubei tídan wanígi lun Búngiu lídan ában luwúyeri le siñáti laríñawagún láu dimúrei. ²⁷ Áni Búngiu, le aríjubarun wanígi, subúdi lumúti ca lan labúseerubei Sífiri Sándu laríñagun wadaangiñe, ába loúnabuniwa Búngiu lugúndun ayúmuruwati Espíritu queisi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanúgün buiti woun, wagía le jínsiñejabúbei lun, wagía le wájali lan lun lánigu wamá queisi laritaguni. ²⁹ Lugúndun ja lasúbudirubaña Búngiu lúmagiñe lubáragiñe ladúgüni ubou luágu lánigubaña lan, fánrein lumútiña lun ítara jamá queisi Liraú, lun Liraú lan íbugañau joun sun ja lanúadirubaña lun lirájüñü jamá. ³⁰ Játi lanúadirubaña lúmagiñe binártü, wáti gíne joun, resíbi lumútiña gíne lúmagua queisi gürigia richaguatiña, áni ja lerésibirubaña, rúti gíne ufánrani joun lídan luweírigun queisi lirájüñü.

³¹ ¿Cábati waríñaga luágu buri cátei le? Queisi lueígiñeñein lubei wafúleisein Búngiu, ¿cábati jabáfu wáganiñu wawágu? ³² Mamájaanti Búngiu lun líchuguni Liraú guánarügü lun loúnwen luágu wafúleisein, lubáragiñe líra, ába ledéregeruni lun loúnwen waweígiñe, sun wagía, ¿ída lubáti míchugun láani sun ílbiri cátei woun queisi líchuguni Liraú woun? ³³ ¿Cági gayáraabei líchugun jadúnrun ja anúadaja láañabaña Búngiu queisi lánigu? Búngiu arúfudubaliña quei madúnruntiña. ³⁴ ¿Cáteiti gayáraabei lasádiruniwa lun féridi? Crístu guánarügü ouwebei wawágu, ába lásaarun lídaangiñe ouweni, guetó níjein ñun lueígiñe loúnwenren Búngiu Úguchili ayúmuruagua wawágu. ³⁵ ¿Cábati gayára lagídaruniwa lueí línsiñejabu Crístu? ¿Liyáraabadiwa funági asúfuriruni, o lénreengúnga, o ebaajouñi, o ilámaü, o manáanguni, o pelíguru, o ouweni? ¡Uá! ³⁶ Laríñajare tídan Lerérun Búngiu.

Yaráfatiwa lun woúnwen bueígiñe ságü wéyu,

ítara líña jouseruniwa wáganiñu queisi mudún anügútiña lun jafarún.

³⁷ Lídan sun cátei le, íbja wamúti luweírin lubáfu Crístu, le jínsiñejabúbei woun, lun wagáñeirun lídan sun lénreengúnga. ³⁸ Choúru numúti lubeíti luágu úa lan ni cáta lun lagídaruniwa lueí línsiñejabu Búngiu—ni ouweni, ni íbágarí, ni ánjelígu, ni máfianu, ni cátei le guetóbei, ni le lúnbei líábin, ³⁹ ni le siélubei, ni le ubouagubei, ní buri ámu cátei le ladúgübei Búngiu—siñáti lagídaruniwa lueí línsiñejabu le larúfudubei woun lídan Wabúreme Jesucrístu.

9

Anúadaja láaña Búngiu Israelítagu lun lánigu jamá

¹ Inárüni le lúnbei naríñaguni guetó jawágu nirásan, áu queisi ában affñeti luágu Crístu, áni meyéejantina, aríñaga tumúti nanígi nun to úraguaboun luma Sífiri Sándu luágu inárüni lan. ² Weíriti nírun, áni súnwandan njein lan gáriti tídan nanígi jawágu nirásan. ³ Buséntina jamúga lun gíne lábugiñe nan líñaragun Búngiu, díseñu lueí Crístu, ánjein jamúga ítara lúba lubei gayára lan jerésibiruni Jesucrístu queisi jasálbaragüle lun jasálbarun. ⁴ Linébaanfaangu Israél jagía, áni resíbi lumútiña Búngiu queisi lirájüñü. Reídeítí meja Búngiu jádan láu sun luweírigun áni rulumuti gíne darádu buri joun luma lilúrudun lídaangiñe Moisés. Arúfudati igáburi joun lun jesériwidun lun, ligíliserugu, áni joun laríñaga luágu loúnajaba lan ában Asálbaragülei. ⁵ Janébaanfaangu Abrahám, Isáac

lúma Jacób jagía, lídaangiñe jarásan líabin Crístu, le Búngiubei, le gíñe Súnti Gabáfu, le gadúnamabei lun liñurúniwa líri lun sun dan. Ítaralá.

⁶ Mámata luágu jamúga reidei lan lerérun Búngiu joun ladúgawagun Israél magúnfulirunga, ladúga máma sun Israelítagu lánigu Búngiu le tímatimaati. ⁷ Mámá sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.” ⁸ Arúfuda lumúti líra woun luágu úa lan ni ában liraú Búngiu luágurügü lirásan, ja rügüñanu lirájüñü ladúga jafíñerun luágu lerérun, jagía anügúbaña queisi lirájüñü ja tímatimaatiña. ⁹ Lugúndun niján dimúrei le líchugubei Búngiu lun Abrahám. “Niábinba dánme le lachúlürün dan ligía, ábame tagaráüdün Sára ában irájü.”

¹⁰ Áni máma rügüñein líra, niján ábanya jémpulu luágu lanúadajan Búngiu. Bíangubei meja tirájüñü Rebéca ában jáguchi, le binádu wadúje Isáac, ¹¹⁻¹³ áni dán meja le magúria-jóungüña, madúgüñüña gíñe ni cáta ni buíti ni wuríbati, ába laríñagun Búngiu tun Rebéca. “Lumúsunbei amúleñein le íbugañü.” Úraguati gíñe líra lúma le aríñawagúbei tídan Lerérun Búngiu. “Jínsiñetí meja Jacób nun, ánjein Esaú, iyéreeguti nun.” Ítara líña guffírümawa lan lirícha Búngiu lun lanúadajaniña ja únbaña labúseera lagúarun lun lánigu jamá queisi labúseeruni, mebéresenga ligía ca lan jadúgübei.

¹⁴ ¿Cábati waríñaga? ¿Waríñaguba luágu múaran lan Búngiu? ¡Siñáti! ¹⁵ Lugúndun laríñajare lun Moisés. “Gareñinbadina lun le nabúseerun, gudémejabu áume lun le únti nabúseera.” ¹⁶ Ítara líña lubeíti, máma lídaañein wabúseerün o wáfaagun, lugúdemejabu Búngiu woun, lídaañein lugúndan. ¹⁷ Tídan Lerérun Búngiu, búruwáñu líña dimúrei le laríñagubei lun urúei Ejiptona. “Nadúgüñbálibu urúeime lun narúfuduni nubáfu buágu, lun gíñe nasúbudiragüdüni níri lídan sun fulásu.” ¹⁸ Gudémejabuti lubeíti Búngiu lun le labúseerun gudémejabu lan, derégüdalóun lanígi le únti labúseera ledéreragüdünnun.

¹⁹ Bariñaguba lubeíti nun. “Ánjein ítara líña lubeí, ¿cáti uágu líchiga Búngiu dúru jawágu güriquia? ¿Cági gayáraabei ladúgün cátei bouguditi luef lugúndan Búngiu?”

²⁰ Wel, ¿cátabuñadíbugi lun baléjejan lúma Búngiu? ¿Laríñaguba funági soúdiaru lun le adúgübalin. “¿Cáme badúgana ítara?” ²¹ Garíchati le adáagubei soúdiaru lun ladúgüni le labúseerun láu lubúñe soúdiaru, gayáraati ladúgün ában soúdiaru le díseguati layúsurun, lúma ában le ayúsurúti lun furúmiegurügü cátei lídaangiñe ában méme ubúñei.

²² Ítara méme líña, gabáfuti Búngiu jawágu güriquia, aráanseñu líña lun larúfuduni luweírín ligáñi jawágu güriquia ja gadúnabaña jagúnrinchawagún. Áfaaga lumúti jaríban láu sarágu gurásu darí guetó ²³ lúnrtügü gayára lan larúfuduni luweírín luweírígün woun, wagía le únbaña gudémejabu lan, ja gíñe laráanserubaña lúmágiñe binárü lun gafánraanbadiwa lan lídan luweírígün. ²⁴ Wáti Búngiu woun, ¡jbiri jádaangiñe juríu, ¡jbiri jádaangiñe ja mámabaña juríu, ²⁵ queisi laríñagun Búngiu tídan lílburun Oséas.

Já meja mámabaña nánigu, naríñaguba joun. “Nánigu”, güriquia méja ja mínsiñebaña nun, naríñaguba joun. “Jínsiñetün nun”.

²⁶ Áni lídan méme fulásu le ní lubei laríñawagúa joun. “Máma nánigu jugúya”, ñíba laríñawagúa joun. “Lirájüñü Búngiu le wínwanbei”.

²⁷ Ánjeinti jawágu Israelítagu, ja méme juríubaña, laríñajare Isaías. “Láu sun gíbe jamá ladúgawagun Israél quei ságoun láru béya, bíanraürügübaña jádaangiñe erédera lun jasálbarun, ²⁸ lugúndun lagúnfulirubei Búngiu lerérun ligíbuagu ubou lun lagúnrinchaguniña ja magáambadibaña lun, lídan ában igáburi le gumúti, le gíñe furéseti.” ²⁹ Queisi méja laríñagun méme Isaías.

Lun jamúga meja mígirun lan Súnti Gabáfu jádaangiñe wadúgawagun woun, wayábiña jamúga lun ítara wamá queisi ubúrgu buri Sodóma lúma Gomórra.

Juríu lúma ugánu luáguti Crístu

³⁰ ¿Cábati waríñaga? Luágu ja lan mámabaña juríu, ja mibíjnbalin lilúrudun Búngiu lun jasúbudiruni le buídubei lúma le wuríbabei, jagía anúgúbaña quei richáguatiña ligíbugiñe Búngiu ladúga jaffínerun luágu. ³¹ Ánjañati ladúgawagun Israel, ja áfaagubaña lun jerésibirúniwa queísi gürígia richáguatiña láurügü jagúnfulirun lúma lilúrudun Búngiu, siñá jamuti lúru luágu agúnfulira, machúlüntiña lun richáguá jamá ligíbugiñe Búngiu. ³² ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jaffínen, jadúgeirüga láu cátei le guánarügü jadúgübei. Ligía jachúgeragunbei luágu Jesucrístu queísi “dúbü le achúgeraguágülei”, ladúga siñá lan jaffínerun luágu queísi Jasálbaragüle. ³³ Laríñajare tídan Lerérun Búngiu.

Rútina ában wügüri le queísigubeirügübei dúbü le achúgeraguágülei Sión, dúbü giñe le eíguadagüdúti gürígia.

Ánjeinti le afíñeruti luágu, maságürijanbei.

10

¹ Nidújeñu, le cátei le uágubei tayúmaja nanígi, lúma le uágubei nayúmragun lun Búngiu jawágu Israeltagu, ja méme juríubaña, lun jasálbarun. ² Aríñagatiña luágu jafúleisein luágu níjein lan ában oúnwenbun gúnfuli jádan lun Búngiu, máma queísi laríñagun subúdi jagúnfulin. ³ Ibídiñeti joun ída líña lan ligáburi líchuguniña Búngiu gürígia richáguáñu ligíbugiñe, láu igáburi le jabúseerubei jáluajan jeréderun richáguáñu ligíbugiñe Búngiu, madúgünga jamef le labúseerubei. ⁴ Lugúndun Crístu lébejabei lagúnfulirúniwa lilúrudun Moisés, áni adúgati lun sun lan ja afíñebaña luágu, jeréderun richáguáñu ligíbugiñe Búngiu.

⁵ Luágu lerésibiruniña Búngiu gürígia queísi gürígia richáguatiña láu jagúnfuliruni lilúrudun, laríñajare Moisés. “Gürígia ja agúnfulirutiña lúru le gumúti, jabágariduba luágu lúru.” ⁶ Luáguti lerésibiruniña Búngiu gürígia queísi richáguatiña ligíbugiñe luágu jaffínen, laríñajare. “Maríñagabá tídan banígi. ¿Cába amúdeira siélun?” — queísigubeirügü barárigüdúñe in lan Crístu le Wasálbaragüle siélu giñe. ⁷ Maríñagabá giñe. “¿Cába arárrira le níjin jabeí jiláaña?” — queísigubeirügü bamúdeiragüdúñe in lan Crístu jádaangiñe jiláaña ítara. Úati ni cáta lun wadúgüni lueídügüya lun waffínerun luágu. ⁸ Cáteiti laríñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein giñe ugánu ligía tídan banígi.” Ugánu le, elun?” — queísigubeirügü barárigüdúñe in lan Crístu le ligía ugánu le lánina afíñeni luágu Crístu le Wasálbaragüle, le wapúrichijabei. ⁹ Ánjabu aríñaga láu biyúma luágu Jesúsú lan Babúremebei, afíñe amúrü tídan banígi luágu sarágüda láani Búngiu lídaangiñe oúweni, basálbaruba. ¹⁰ Láu bafínerun luágu Jesucrístu táu sun banígi, lerésibirabu Búngiu queísi ában gürígia richáguati ligíbugiñe, láu bíchugun fe luágu láu biyúma, basálbara.

¹¹ Taríñajare Lerérun Búngiu. “Úati ni ában gürígia le afíñeruti luágu Jesucrístu lun laságürijan luágu lárigiñe.” ¹² Ában jáu juríu jáma ja mámabaña juríu, Wabúreme Jesucrístu, ligía Jabúremebei sùngubei, áni fuleísei lumútiña sun ja agúarubaña lun lun líderaguniña. ¹³ Ítara líña quei laríñawagún tídan Lerérun Búngiu. “Sun ja aguáruti líri Wabúreme, jasálbaruba.” ¹⁴ ¿Ída lubáti gayára lan jagúaruni lun lasálbaruniña ánjein maffínerungiña lubeí luágu? ¿Ída lúba giñéti gayára lan jaffínerun luágu, ánjein magáambungiña lubeí luágu? ¿Ída lubáti gayára lan jagáambun luágu, ánjein uá jabeí apúrichijati ugánu luáguti asálbaruni joun? ¹⁵ ¿Ída lubáti giñe gayára lan japúrichijan gürígia joun ánjein uá cába lan oúnajaña apúrichija? Queísi laríñawagún tídan Lerérun Búngiu. “¡Ma lubúñun jachúlürün ja anúgübalin ugánu luáguti aráandaruni lúma Búngiu, apúrichija jamef ugánu buíti luáguti asálbaruni!”

¹⁶ Másutiña gürígia ja agáamba jamáalibeí ugánu luáguti asálbaruni ebéresera láu. Queísi laríñaguni Isaías tídan lílíburun. “Wabúreme, míbetiña afíñerutiña luágu ugánu luáguti

asálbaruni le wapúrichijabei.” ¹⁷ Ítara líña lubeíti, lídaangiñe jagáambuni güriña uganu luáguti Crístu gayára lan jafíñerun luágu.

¹⁸ Ába nariñagun. ¿Magáambun jamúba giñéti gayára lan jafíñerti funásan uganu luáguti asálbaruni? ¿Agáamba jamúti! Tariñajare Lerérun Búngiu.

Agaambúaali jamálali lídan sun fulásu,

chülújali jerérun lídoun lagúmujuún larígei uboú.

¹⁹ Ába nariñagun. ¿Úagili funásan gunfaráanda jamáni Israelítagu uganu luáguti Wasálbaragüle? Gunfaráanda jamáali, lugúndun lídan furúmiñeti cátei lariñajare Búngiu liyúmulugugiñe Moisés.

Naméendidagüdúbadün jadúga ában rása ja máma náni,
nagáñidagüdúbadün jadúga ában rása ja ibídiñegidina joun.

²⁰ Aríñagati giñe Búngiu liyúmulugugiñe Isaías.

Darí jamutina ja máluajaanbalina,

arúfudaguatina núngua joun ja málügüdajánbaña nuágu.

²¹ Ábaya lariñagun jawágu Israelítagu. “Sun wéyu náu agúaja joun güriña magáambadiña, mabuídun.”

11

Israelítagu ja sálbabaña

¹ Aríñagatinati guetó. ¿Májaali funásan Búngiu joun Israelítagu ja lumútuniña? ¿Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámilian Benjamín. ² Barú lumútiña Búngiu Israel-ítagu queisi lánigu lúmagiñé meja binarú, guetó, mamájaanti joun. ¿Magáambun jumúti le tariñagubei Lerérun Búngiu luágu Elías, lé meja proféta, luágu líchuguni dúru jawágu Israelítagu lídan layúmuragun lun Búngiu? Laríñaga. ³ “Nabúreme, áfaragua jamá profétagu jilágubei, güriña jameí buri báni latarú, áu rügáli erédera jádaangiñe bánigu, áni buséntiña giñe jáfarunina jilágubei.” ⁴ Ába lariñagun Búngiu lun. “Anuádajaadina sédü mílu wügúriña nubárua ja májuduragúngiñabaña ligibugiñe liyáwa búngiu le Baal.” ⁵ Ítara méme giñe lídoun buri wéyu le, reideijaña átiri jádaangiñe juríu ja anúadaja láañabaña Búngiu láu lareíni. ⁶ Ánjeinti láu lubeí lareíni Búngiu lanúadiraña, mámaali láu cátei le liyáraati güriña guánarügü adúga, lugúndun lun jamúga ítara líña lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le jáluajabei, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei afíñeni luágu Búngiu, ába lígiriñiña Búngiu táu tidere janígi. ⁸ Queisi tariñagun Lerérun Búngiu. “Adúga lumútiña Búngiu lun deré lan jachúgü lun cátei lánina Búngiu, rúti águu le maríjinti joun, arígeirugu le magáambuti. Ítara liñáti chülú lúmoun dan le.” ⁹ Aríñagati Davíd.

Garábagua lámuga jefédujan lun sádrame,

lun jáburujan tídoun, lun jasúfurirun.

¹⁰ Darú lámuga jágu, maríjin jamámuga,

sebúgua lámuga giñe janágan lábugiñe janúgün lun sun dan.

Jasálbarun ja mámabaña juríu

¹¹ Nálügüdajaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¿Máma líña! Lubáragiñe líra, láu jamájarun juríu lun jerésibiruni Crístu, jayábin ja mámabaña juríu lun jabíjubei lan asálbaruni, lun jáyeijabaña lan Israelítagu. ¹² Ánjeinti seríwi lubeí dúru le jadúgübei juríu buítime lun uboú, áni ánjein buíti lubeí lanúgübei jeféridirun joun ja mámabaña juríu, ¿sarágume buídutimaabei lan dánme le jasálbarun sun juríu!

¹³ Níjein gíne ában cátei lun naríñaguni jun, jugúya le mámabei juríu. Quei loúna-jañadina lan Búngiu apúrichija luágu Cristu joun ja mámabaña juríu, weíriti nubéresen láu nuwádigmari, ¹⁴ lun gayára lan jabúseerun nirásan jáyeijanün, lun gíne jasálbarun. ¹⁵ Ánjein ladúga lubeí lamájarun Búngiu joun juríu, jayábin ja mámabaña juríu lun jaráandarun lúma Búngiu, ¿ídatimá lubáti dánme le jerésibirúniwa? Ítara lúba joun queísi ásaaruni lídaangiñe ouweni. ¹⁶ Ánjein derégewa tubeí furúmiñetu fein to adúgútu tídaangiñe fulúwaaru añóundawagutu lun Búngiu, derégewatu gíne sun fulúwaaru ñóunwaguatu to ídaangiñeboun tiábin fein tugúya. Ánjein gíne derégewa lubeí tflagúle ában tídibu wéwe lun Búngiu, derégewañu líña gíne tilímun.

¹⁷ Añájein jádaangiñe juríu, queísi tilímun olívo tímatimaati, chaúnwatiña, gidáwatiña jagánaguagiñe lumútuniña Búngiu ladúga mafiñeni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olívo to áraabuna. Ítara líña jiábin lun gabára jumá lídan tflagúle lúma lídan tibágari olívo, resíbi jugúyame labínirun Búngiu, queísi lumútuniña. ¹⁸ Marítagua jumátia luágu buídutimá jumá lueí límu le ñígubeibei méja. Ánjaün arítagua luágu buídutima jumá, jarítagua jumá luágu máma lan jugúya ágúdajabalín íflagúlaü, luágu íflagúlaü lan ágúdajabalün.

¹⁹ Fágua jaríñaguba. “Ánja, ába jagídarúniwa juríu lun wíchugún jawéñegua luágu olívo.” ²⁰ Jinárün luágu gidáwa jamá jagánaguagiñe lumútuniña Búngiu, jagídarünbei lugúndun mafiñen jamá luágu Wasálbaragúle, jugúya, gabára jubeí ladúga jafiñen luágu. Manáangua jumá lubeíti júngua, duárirügü jumá. ²¹ Lugúndun ánjein úa lubeí ferúduna láníña Búngiu juríu já meja lanúadajabaña lun lánigu jamá, úabei gíne ferúduna lánün, jugúya le mámabei juríu, ánjaün ñúbin lun mafiñen jumá. ²² Aríja jumeí lubeíti luweírín lareídun Búngiu, derégúdati gíne. Derégúdati joun ja mafiñebaña, areídati joun ja afínebaña. Lúnti jasígirun lídan lareíni láu sun jafiñen luágu, ánjein madúgün jumá ítara, jagídarúba gíne. ²³ Ánjaña ñúbin juríu lun jafiñerun luágu Cristu, jíchugúyaba lídoun jabára jagánagua lumútuniña Búngiu, lugúndun gabáfuti Búngiu lúnya líchuguniña járigouñ. ²⁴ Jugúya le mámabei juríu, chaúnwatün tueígiñe ában olívo to áraabuna, ába jíchugún tuágun olívo to buítu, gúbume ladúgúwa joun juríu ja tilímunbaña olívo buítu ja tímatimaatiña, jíchugúyaba járigouñ tuágun olívo to ñígiñe lubeí jagídarúa, naríñaguña luágu lachúlürüba lan wéyu lun jerésibiruni juríu Jasálbaragúle.

Jasálbarun Israelítagu le lagúmujoín

²⁵ Nidújeñu, buséntina lun jasúbudiruni cátei le luáguti laráansejan Búngiu, lé meja arámudagúabei, lun mapántajan jumá luágu chu lan jáu lídan le jálígúdagun júngua luágu buri cátei le. luágu deréraügüda láaru lan Búngiu janígi Israelítagu murusun lun Jasálbaragúle darírügü dánme le gumújali jerésibiruni ja mámabaña juríu Cristu. ²⁶ Dánme le lasúseredun líra, ábame jasálbarun sun Israelítagu, ja méme juríu, lugúndun tariñajare Lerérun Búngiu.

Liábinba Asálbaragúlei Sióngiñe,
ábame lagídarun wuríbani jádaangiñe juríu.

²⁷ Nijánba nidáradun jáma,
dánme le nagídaruni jafígoun.

²⁸ Luágu ugánu le luáguti asálbaruni, barúwatiña juríu queísi láganiñu Búngiu luágu jufúleisein, láu sun líra, jínsiñegiña lun Búngiu lugúndun anúadaja lumútiña binádu jagúbürigu juríu. ²⁹ Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña. ³⁰ Jugúya, magáambaditún meja lun Búngiu, guetó, láu jamájarun juríu jagáambuni, ába gudémejabu lan Búngiu jun. ³¹ Magáambaditiña juríu lun Búngiu guetó, ánjein líra, lúnrügi gudémejabu lan Búngiu joun queísi gudémejabu lan jun. ³² Ígira lumútiña Búngiu súngebui lan magáambun jamáni, lun gayáraabei lan gudémejabu lan joun.

³³ ¡Luewéirin lareídun Búngiu, lúma lichú láu! Siñáti wasúbudiruni larítangun, siñá gunfaráanda wamáni lémeri. ³⁴ ¿Cági gunfaráandabalin larítangun Búngiu? ¿Cági arúfudajabei lun? ³⁵ ¿Cági gürígia rújaliabei som cátei lun Búngiu furúmiñe lun lerésibirun som cátei fáyeitime larigiñe? ³⁶ Úati ni ában, lúmagiñe Búngiu liábin sun cátei, ligía giñe ágüdjabalín sun cátei, áni lúngua giñe ladúgei. ¡Uweíríguni lun Búngiu lun sun dan! Ítaralá.

12

Ibágari le derégewati lun Búngiu

¹ Amúriajatina lubeíti júma, nidújeñu, lun jederegeragun júngua le gumúti lun Búngiu queísi gürígia abágaridutiña lun jesériwidun lun, jarúmañu lan jibágari ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadúgüni lugúndun weíruti lareíni woun. ² Jebé jabágaridun queísi lirájüñü ubou le, lubáragiñe líra, sáansi jumeí ligáburu jisáminan, sáansi lámuga giñe ligáburu jabágaridun. Ítara lúba jiábin lun jasúbudiruni le lugúndaanbei Búngiu jun—le buídubei, le uáraguabei.

³ Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jídaangiñe arítaguti luoúgua weíri sügú láu le ligíabei. Lubáragiñe líra, cáda ában lúnti lasúbudiragun lúngua, según afñeni le rúlaalíbei Búngiu lun. ⁴ Lugúndun ítara quei gíbe lán buri umégeguni luágu ábanrügü úgubu, áni máma ában méme líffisiute sun umégeguni ligía, ⁵ ítara wáña giñe, wagía afñetiña, láu sun gíbe wamá, ában rügüñadiwa úgubu lídan ában lúma Crístu, áni íderaguatiwa woúngua wádaangua queísi lumégegun ában méme úgubu.

⁶ Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu luegiñe Jesucrístu. Lúnti buídu lan wayúsurun ubáfu ligía. Ánjein rújali lubeí Búngiu ubáfu woun lun ladímurejan wayúmulugugiñe, lúnti wadúgüni según afñeni le wádaanbei, ⁷ ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani. ⁸ Le gíchigaditi dúgüdaguá joun ámu, lúnti líchaagun lúngua lun ladúgüni. Le edéweejati, lúnti magúrabun lan láguyun lun, le ábutíbei, lúnti lagúmadíjan láu sarágu duári, le íderaguti gudémetiña, lúnti ladúgüni láu ugúndani.

Ligáburu jabágaridun lánigu Crístu

⁹ Jínsiñe jamá jidújeñu luegiñe Jesucrístu jun láu ínsiñeni le inárüni. Iyéreegulá wuríbani jun, falájumei le buídubei. ¹⁰ Lúnti jínsiñegua jumá júmagua queísi idújeñu. Furése jumá lun jínúragüdüni jiri jidújeñu.

¹¹ Mamágualigu jumá lídan luwádigimari Wabúreme, seríwi jumeí táu sun janígi.

¹² Abágarida jumá gúndaañu láu eménigini le juágubei, gagúraasun jumá dan le jasúfurirun, ayúmuragua lun Búngiu, eteíngirei, súnwandan.

¹³ Íderagua jumáña afñetiña lídan jemegeirun, resíbi jumáña ja bisídabalün láu ugúndani.

¹⁴ Amúriaja jumá labínirun Búngiu jawágun ja oúserutün wuríba, amúriaja jumá abíniruni joun, máma wuríbani.

¹⁵ Gúnda jumá jáma ja gúndaabaña, jayájua jáma ja ayájubaña.

¹⁶ Abágarida jumá lídan úraguni júmawagua. Manáangua jumá júngua, gamádagua jumá jáma ja gudémebaña. Marítagua jumá juoúgua queísi sábiugu.

¹⁷ Mafáyeira jumá wuríbani luágu wuríbani lun ni ában. Áfaagua jumá lun jadúgüni le buídubei jagíbugiñe súngebui. ¹⁸ Adúga jumeí sun le juáraati lun jabágaridun lídan dan jáma súngebui. ¹⁹ Nidújeñu jínsiñetiña nun, máguyugüda jumeí wuríbani, ígira jumeí lun Búngiu lan afáyeigüda luágu. Tariñajare Lerérun Búngiu. “Áu lúnbei nafáyeigüdüniña gürígia luágu jaríban, líña Jabúreme.” ²⁰ Aríñagati giñe Búngiu. “Ánjein lámá lubei

bágani, rúba efgini lun, ánjein mágürabu lubeí, rúba dúna lun, lugúndun láu badúgüni líra, lebelúruba busíganu lun luágu luríban louuserunibu.” ²¹ Mígraguagüdadá búngua lun lagáñeirunibu wuríbani lun báguugüdün wuríbani luágu wuríbani, lubáragiñe líra, gáñibeí wuríbani láu buídu le badúgübei.

13

¹ Lúnti jíchaagun súngebei júngua lábun jalúrudun gumádimatiña, lugúndun ítara líña laráansejan Búngiu lun ñibeí lan lúrudu, áni gumádimatiña ja lídaanbaña jabára, labúseerun Búngiu añájein lubeí ñi. ² Gürígia lubeíti le awúgürijóuti lun gumádi, múaraanti láu le laríñagubei Búngiu, áni ja awúgürijóutiña ítara, gadúnruntiña luágu líra áni jafáyeiruba luágu. ³ Máma lúnñanu jíchugun gumádimatiña anúfudei joun ja adúgübalin le buídubei, aná joun ja adúgübalin le wuríbabei. ¿Buséntibu babágaridun manúfudeiga lueí lúrudu? Buídulá bouserun, ábame buídu ban lurúma lúrudu, ⁴ lugúndun lesériwiduña lun Búngiu luágu bufúleisein. Ánjein wuríba bouserun, lúnti janúfude ban, ladúga máma luágu ni cáta gabáfu lan lúrudu lun lafáyeijagüdün luágu dúru, quei lesériwiduña lubeí lun Búngiu lun lafáyeijagüdün luágu dúru. ⁵ Ligía lúnti lubeí úaragua wamá lúma lilúrudun wageíra, mámarügü lun máburujan lan asúfuriruni wawágun, lúnti ítara lan lun jarúmañu lan warítangun. ⁶ Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cátei le jeténira.

⁷ Ru jumeíme le jáni cáda gürígia joun. Fáyei jumeí le lagúburajabei gumádi luágu jufúlasun, lúma buri ámu cátei libe líra, fáyei jumeí le lúnti jafáyeiruni luágu cátei le ñúbinbei jun bougudigiñe lueí jageíra. Gagáambadi jumá joun gumádimatiña, ru jugúyame inébesi joun queísi lubúdubu. ⁸ Máni jumá dúweiti ni ca úma, lueídügüya lidúweitina ínisiñeni le jadúweirubei júmagua. Le jínsiñejabuti lun gürígia líledi, adúga láali sun le lubeíbei lilúrudun Búngiu láu ladúgüni líra. ⁹ Taríñajare Lerérun Búngiu. “Magámaridabá gürígia maríetiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun.” Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia bíledi bun queísi bñsiñegua búngua.” ¹⁰ Le jínsiñejabúbei, madúgünti wuríbati lun ni ában, ánjava lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburí wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfatiimaajali óra lun lagríbudun Wasálbaragüle ubouágun sügü láu dán meja le waffínerunbei luágu ugánu luáguti asálbaruni. ¹² Belújali áríebu buídu, yaráfaali larúgadun, ligía lúnti lubeí wígiruni wadúgüni cátei wuríbati le adúgübei lábugiñe lubúriga, lun wadáurunun wadáurangun queísi súdaara ja lábugiñetiña larúgouna. ¹³ Eíbuga wamá queísi lubúdubu ítara queísi gürígia ja buídubaña, úouga ni cáta luágu jagáburí lun jarámudangun lueí jaríjin gürígia. Mabágarida wamá lídan bacháruaü, lúma buri lanárima fédu, ni lídan salúfuri lúma iwíyeni, ni lídan gáganiguaü lúma gimúgaü. ¹⁴ Lubáragiñe líra, rújumei Crístu guánarügü jubáragiñe lídan sun cátei, masáminara jumá lun jíchugun ugúndani lun lagúbüri ayúmajani.

14

Madímurejabá luágu bidúje lueígiñe Jesucrístu

¹ Ánjein débili lubeí ában gürígia lídan lafíñen, resíbi jumeí, maríñagunga ni cáta lun luágu cátei le machourunbei luágu. ² Queí buri, añájein derégüdati jafíñen, jarítaguatiña luágu gayára lan jeígin afíñetiña furúmieguaügü cátei áni jeréderuba jarúmañu ligíbugiñe Búngiu. Añájein jíbiri, débilitiña lídan jafíñen, meígintiña úwi. ³ Le eígiti furúmieguaügü cátei, mouñ lumuti únabu lan lanúgüni le meíginbalin, le gíñe májabei leígin furúmieguaügü cátei, mouñ lumuti gíñe ladímurejan luágu le efgibalin, lugúndun resíbi láali Búngiu gürígia ligía queísi lánigu. ⁴ ¿Cátabuñadíbúgi lun badímurejan luágu

gürigia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdúni buídu.

⁵ Nijánya ában jémpulu. Añajein gürigia weíriti janúgüni ában wéyu lueí ámu wéyu, añajein jíbiri, affínetiña luágu ában lan lábu sun wéyu. Cáda ában lúnti lachóururuni le uágubei larítagua. ⁶ Le areídubei som wéyu, ladúgüñein lun líchugun inébesi lun Búngiu. Le eígubei furúmiegurügü cátei, leígini lun líchugun inébesi lun Búngiu, lugúndun rúti eteíngiruni lun Búngiu luágu eígini ligía. Le meíginbei úwi ladúga liloúguan laffínen, lun líchugun inébesi lun Búngiu ladúgei, rúti gíñe eteíngiruni lun Búngiu luágu cátei le gayáraabei leígin según laffínen.

⁷ Naríñagubalin líra lugúndun úa lan ni ában wádaangiñe abágariduti lun guánarügü, úa ni ában ouweti lun guánarügü. ⁸ Ánjawa abágarida, wabágariduña lun wadúgüni lugúndan Búngiu, ánjawa ouwe, woúnweña según lugúndan Búngiu. Ítara líña lubeíti, dándu lídan ibágari queísi lídan ouweni, láni Crístu wagía. ⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banúgei quei ni cáta? Búngiu rügüñein lun lagúseragüdün, áni sun wagía, waráramuba ligíbugiñe lun wagúserun, ¹¹ queísi tariñagun Lerérun Búngiu.

Inárüñiti ítara quei gabágarari nan, líña laríñagun Búngiu, luágu jájuduraguba lan sun gürigia nigíbugiñe,

áni jasúbudirubadina súngubei ligíbugiñe guríriguái.

¹² Cáda lubeíti ában wádaangiñe, lagúseruba luougua lúma Búngiu.

Machúgeraguagüdadei bidúje

¹³ Ligía, moún lubeí wadímurejan jawágu wadújeñu lueígiñe Jesucrístu. Lubáragiñe líra, derébugulá jarítangun lun madúgün jumá ni cáta le gayáraati lachúgeraguagüdüni jíbiri, o láburegüdúni lan lídoun figoú. ¹⁴ Subúdi numúti luágu úa lan ni cáta le leígubei gürigia lun lawíyeduni ligíbugiñe Búngiu, áni chóuru numúti líra, áu queísi affíneti luágu Jesucrístu. Láu sun líra, ánjein jarítagua lubeí ában gürigia luágu marúman lan ában cátei, marúmaanti lun, áni figoú lun lun leígini. ¹⁵ Ánjeinti bañáwurija laffínen bidúje láu cátei le beígubei, mámaali bagáburiduña láu ínsiñejabuni. Madúgabá lun leferídirun ában gürigia le ueígiñebeí louwe Crístu, ladúgarügü beígin ítaga cátei. ¹⁶ Míchiga jumá lubeíti lúgaaru lun ladímurejoún wuríba luágu cátei le gayáraabei jadúgüni queísi affínetiña luágu Crístu. ¹⁷ Larúejjan Búngiu máma cátei luáguti le eígubei o atúbei, luáguti ában ibágari le lánina ísuruni, darángilaü lúma ugúndani le líchugubei Sífiri Sándu woun. ¹⁸ Le esériwiduti lun Crístu lídan igáburi le, gúndaati Búngiu láu, áni buíti gíñe jarúma gürigia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wíderagun wámagua lun wawáanserun lídan cátei le lánina Búngiu. ²⁰ Magúrinchaguabeí luwádigimari Búngiu lídan libágari ában gürigia láu cátei le beígubei. Inárüni luágu jarúma lan sun eígini ligíbugiñe Búngiu, le wuríbabei, lun leígín cátei le áburugüdütiña ámu gürigia lídoun figoú. ²¹ Buíti lun meígin ban úwi, matún bínu, madúgün ni cáta le achúgeraguagüdüti bidúje, o láburegüdüni lan lídoun figoú, o ledébilragüdüni lan laffínen. ²² Affíneni le buágubei, lúnti buágu guánarügü lan ligíbugiñe Búngiu. ¡Gúndaati gürigia le gayáraabei laríñagun luágu buídu lan cátei le ladúgübei, masándiragunga ligía lúngua láu dúru! ²³ Ánjeinti le eígubei ában cátei láu machóuruni luágu buídu lan leígini queísi affíneti luágu Crístu, gadúnrunti ladúga leígini, lugúndun meígin lumúti láu affíneni. Sun le wadúgübei, ánjawa arítagua luágu fágua lan moun láani wadúgüni, figoú woun.

¹ Wagía le jébebei lídan waffñen, lúnti gagúraasun wamá jabá ja louguagiñabaña affñe, lúnti warítangun luágu le buídubei joun, mámarügü luágu wíchugun ugúndani wouniwagua. ² Cáda ában wádaangiñe, lúnti lagúndaaraguagüdüni gürrígia líledi láu le buídubei lun gürrígia ligía, lúma láu le gayáraati lagánwoundagüdüni lafiñen. ³ Ni Crístu, míchugunti ugúndani lúniwagua, lubáragiñe líra, suséreti le abúrrijuóbei tídan Lerérun Búngiu lun. “Núguchi, áburujati janábajan ja anábubalibu nuágun.” ⁴ Sun le aríñawagübei tídan Lerérun Búngiu lúmagiñe binárü, lun larúfudajoún woun labúrrijuóá, búrúwati meja dimúrei buri ligía lun wanúgün gurásu lúma dúgüdaguai lídaangiñe, gayára lámuga weménigiduntima luágu Búngiu. ⁵ Búngiu le íchugubei gurásu lúma dúgüdaguai, íderagualáún lun jabágaridun lídan dan jáma jibirigu, queísi ladúgüni Jesucrístu. ⁶ Ítara lúba, sun lan wagía lídan ában, láu ábanrügü umálali, wíchuguba uweíriguni lun Búngiu, le Lúguchi Wabúreme Jesucrístu.

Agáambatiña ja mámabaña juríu luágu Wasálbaragüle

⁷ Resfíbigua jumá lubefti júniwagua quei gíñe lerésibiruniwa Crístu, lun liñurúniwa líri Búngiu. ⁸ Le nariñagubei, luágu liábinbei lán meja Crístu lun lesériwidun joun juríu, lun lagúnfulirun dimúrei le íchugúbei joun binádu wagúbürigu, lun larúfudún luágu gúnfuli láani Búngiu lerérun. ⁹ Liábinbei gíñe lun jíchuguba lan ja mámabaña juríu uweíriguni lun Búngiu luágu lareidun, quei tariñaguni Lerérun Búngiu.

Ligía níchuguba lubeí uweíriguni bun jagánaguagiñe ja mámabaña juríu, nerémujaba gíñe luágu buweírigun.

¹⁰ Tariñajare gíñe Lerérun Búngiu.

Gúnda jumá, jugúya le mámabei juríu, úara jáma ja lánigubaña Búngiu.

¹¹ Tariñajare gíñe.

Rújuma sun ja mámabaña juríu inébesei lun Búngiu,

adímureja jamá sun gürrígia luágu luweírigun.

¹² Laríñajare gíñe Isaías tídan Lerérun Búngiu.

Liábiba ában ladúgawagun Isaí,

le lúnbei lagúmadiruniña ja mámabaña juríu.

Jagía, jeménigiduba luágu.

¹³ Búngiu, le íchugubalin eménigini woun, buíngüdaláún láu ugúndani lúma darángilau lídan jaffñerun luágu, lun buíñu jumá láu eménigini, láu lubáfu Sífiri Sándu.

¹⁴ Nidújeñu, chouruguatina núngua luágu buin jíña lan láu areíduni lúma subúdi luágu waffñen luágu Crístu, luágu gíñe gíchigadi jumá dimúrei bufti joun jibirigu. ¹⁵ Tídan gárada to, abúrrijaadina jun láu sun furáangu luágu buri cátei le lun mabúlieidun jumáni. Nadúgüñein luágu wadágimanu le rúlaalíbei Búngiu nun láu lareíni, ¹⁶ lun nesériwidun lun Jesucrístu jagánagua ja mámabaña juríu. Seríwi le nadúgübei, napúrichijani ugánu lúmagiñeti Búngiu luágu Wasálbaragüle lun nanúgübaña lan ja mámabaña juríu lun Búngiu, lun lerésibiruniña queísi gürrígia ja jarúmaaru janígi láu luwádigimaridun Sífiri Sándu jádan.

¹⁷ Ítara líña lubefti, áu queísi ában affñeti luágu Jesucrístu, gébunati gúnda nan lídan nesériwidun lun Búngiu, ¹⁸ luágu rügüñein buri cátei le ladúgübei Crístu guánarügü nídaangiñe nadímureja, lun jayábin ja mámabaña juríu lun jagáambubei lun Búngiu. Yúsu láali Crístu nerérun lúma náfaagun, ¹⁹ luweírin buri seíni lúma buri milágaru le nadúgübei láu lubáfu Sífiri Sándu nídan, lun lanúgüniña ja mámabaña juríu lúmoun. Láu igáburi le, jóustagüda náali lapúrichijoún ugánu luáguti asálbaruni lídaangiñe Crístu, lúmagiñe Jerusaléngiñe darí loubawagun Ilírico. ²⁰ Ítara líña áfaaguaadina lan lun napúrichijani ugánu luáguti Wasálbaragüle le ní lumuti magaambúngili lan líri Crístu. Mabúseeruntina nuwádigimaridun lun Crístu lídan fulásu le ní lumuti chülújali lan ámu láu ugánu luágu,

nubáragiñe, ²¹ lubáragiñe líra, súnwandan busén nan nagúnfuliruni dimúrei lébei le tariñagubei Lerérun Búngiu.

Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

²² Ladúga nesériwiduña lan lun Crístu lídan ámu fulásu, siñágili lubei nídin bisídaün, láu sun gíbeeli lan weíyaasu nabúseerun nadúgüni. ²³ Guetóti, quei gumúnaali lan nuwádigimari luegiñe oúbaü le, áni quei lúmagiñe lan binárü nabúseera nídin aríjaün, ²⁴ agúrabatina násügürün bisídaün dánme le nídin Espáña. Lárigiñeme aríja náadün lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun. ²⁵ Ánjein guetó, neíbuga Jerusalén, bartúina cátei joun wadújeñu luegiñe Jesucrístu ñi. ²⁶ Lugúndun wadújeñu ja Macedóniabaña jáma ja Acáyabaña jarítaguaaña joúndarun seínsu jádaangua lun jounajani joun idújeñu gudémetiña ja Jerusalénbaña. ²⁷ Jarítaguaaña luágu buídu lan lun jadúgüni cátei le, áni richátíña, lugúndun dúwei jamúti joun le tímatisaati, lugúndun ítara quei jafánreinraguni afñetiña ja juríu jarísin le lánina siélu jáma ja mámabaña juríu, lúnti giñéti jíderaguniña afñetiña ja mámabaña juríu afñetiña ja juríu luágu jemegeirun ya ubouagu. ²⁸ Dánme lubeiti gumúnaali cátei le, derége neíme seínsu le joun, ábame nídin lun Espáñoun, bisída naúnme dánme le násügürün. ²⁹ Chóuru numúti luágu dan lánme nachúlürün júmoun, nachúlürüba lan buin láu abíniruni lúmagiñe Crístu.

³⁰ Nidújeñu, ayúmuraguatina jun luágu jínsiñejabu lun Wabúreme Jesucrístu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu. ³¹ Amúriaja jumá lúma Búngiu lun leséfurunina jawéi mafñetiña ja Judéabaña, lun gíñe buídu lan lerésibirúniwa íderawaguni le nanúgübei joun wadújeñu ja Jerusalénbaña, ³² lun gúndaabadina lan dánme le nachúlürün júmoun eméraagua murusun, ánjein ligía lubei lugúndaabei Búngiu. ³³ Júmalá Búngiu le íchugubei darángilau. Ítaralá.

16

Mábugaü lun cáda ában

¹ Táu gárada to, nasúbudiragüdüñoun Fébe, wadúje luegiñe Crístu to esériwiduboun wáma tídan ligíli to Cencréaboun, jun. ² Dánme le tachúlürün júmoun, resíbi jumóun buídu lídan líri Wabúreme, queisi lúnti lan ladügün jádan idújeñu lídan afñeni. Íderagua jumóunme lídan furúmequarügü cátei le temégeirun, lugúndun tugúya, sarágujaña tíderagun, íderagua táadina gíñe.

³ Mábuga níña tun Priscíla, lúma lun Aquíla ja nidújeñu lídan nesériwidun lun Jesucrístu. ⁴ Jagía, rújamuti jabágari guánarügü lídoun lénreengúnga lun jasálbaruni nibágari, teínqui níña lubeiti joun, áni mámarügü áu, sun gíñe wadújeñu ja tílana jalígilisin ja mámabaña juríu, rújamuti jeteíngirun joun luágu líra. ⁵ Mábuga níña gíñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebei nun, le furúmiñebei afñeruti luágu Crístu ubúrugu Acáya. ⁶ Mábuga níña tun María to ñadágimeinjáruboun sarágu jagánagua, jugúya Rómana. ⁷ Mábuga níña joun nupáisanu Andrónico lúma Junías já meja níbirigubaña furísunrugu, buíti jadímurejan láni Crístu apóstolugu jawágu, jagía gíñe afñerubaña luágu Crístu nubáragiñe.

⁸ Mábuga níña lun Amplías, numáda jínsiñeti nun queisi lánigu Crístu. ⁹ Mábuga níña lun Urbáno, wóuba lídan wawádigimari luágu Jesucrístu, lúma lun Estáquis, numáda le jínsiñebei nun. ¹⁰ Mábuga níña lun Apéles, le arúfuda láalíbei lafíñen luágu Crístu sarágu weíyaasu, mábuga níña gíñe joun tílana lúban Aristóbulo. ¹¹ Mábuga níña lun nupáisanu Herodión lúma joun tílana lúban Narciso ja afñeabaña luágu Wabúreme. ¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme,

lúma gíñe tun wadúje Pérsida to jínsiñeboun woun, to adúgaaruboun sarágu lídan líri Crístu. ¹³ Mábuga níña lun Rúfo, wügúri le buídubei igáburi le tímatimaati ligíbugiñe Crístu, mábuga níña gíñe tun lúguchu, to gíñe ítarajaruboun quei ában úguchuru nun. ¹⁴ Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámabaña. ¹⁵ Mábuga níña gíñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu lueígiñe Crístu ja jámabaña.

¹⁶ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun tílana lilígilisin Crístu jun.

¹⁷ Nidújeñu, ayúmuraguatina jun lun jarjiniña cátaña lan ja afánreinraguagüdübaña gürígia, ru jagía achúgeraguágülei lun jafñen. Múaraanti le jadúgübei lúma le arúfudajoúbei jun. Díse jumá jaweí gürígia jagía, ¹⁸ lugúndun gürígia jagía, mesériwiduntiña lun Wabúreme Jesucrístu, joúngua guánarügü jesériwida. Jeyeedañati gürígia ja únabugutiña láu buri liñúlun lúma lubuídun lagaambún jerérun. ¹⁹ Subúdi jamúti sun gürígia luágu ñúdüñ jumá láu le lubefbei Búngiu, ligía gúnda nubei, buséntina gíñe lun furése jumá lun jadúgüni le buídubei, máma lun le wuríbabei. ²⁰ Búngiu le íchugubalin darángilaü, lagáñeiragüdübadiün luágu Máfia, furése. Binílaün Wabúreme Jesucrístu.

²¹ Mábuga líña Timotéo jun, le nouba lídan wadágimanu, mábuga jaña gíñe Lúcio, Jasón lúma Sosípater, ja nupaísanu, jun.

²² (Áu, Tércio, le abúriujabarun gárada to, mábuga níña gíñe jun, nidújeñu lueígiñe Wabúreme.)

²³ Mábuga líña Gáyo jun. Naganouña tídan lúban to gíñe lafúrederúboun joun sun tílana ligílisi. Mábuga líña gíñe Erásto jun, le ágüdejabin liseínsun fulásu, lúma gíñe wadúje Cuarío.

²⁴ Binílaün Wabúreme Jesucrístu sun jugúya. Ítaralá.

Rúwama uweírighi lun Búngiu

²⁵ Guetóti, rúwama inébesi lun Búngiu, le gayáraabei ladúgünün lúntima derégüdagü jumá lídan jafñen, según ugánu luáguti asálbaruni le napúrichijabei, lúma arúfudajani luágu Jesucrístu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun ubou, láu sun abúrija jamá meja profétagu luágu. ²⁶ Guetó, láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jafñerun luágu, gagáambadi jagfame lun Búngiu.

²⁷ ¡Uweírighi lun Búngiu le ligíarügüti, ábanrügüti, le ligíarügüti chu áu, uweírighi lun, lídaangiñe Jesucrístu, lun sun dan! Ítaralá.

FURÚMIÑETU LIGÁRADAN PÁBLO JOUN CORÍNTONA

Labürüjjan Páblo joun tílana liglisi Corínto

¹ Áu Páblo, wálaadina Búngiu láu lugúndan lun ábanbadina la láni Jesucrístu apóstolu, le méme gíribei ában le loúnajan. Nabürüjañoun gárada to, úara lúma wadúje Sóstenes, jun, ² jugúya le wadújeñu lueigiñe Jesucrístu ja tílanabaña lilfgilisin Búngiu to ubúrugouboun Corínto, ja lánigubaña Búngiu ladúga lídaañadün lan ában lúma Jesucrístu. Wájali Búngiu jun lun jedéregeregagun júngua lun le gumúti, queísi wájali lan joun sun ja agúarubalin líri Wabúreme Jesucrístu lídan sun fulásu lun jedéregeregagun jóungua lun. Jesucrístu Jabúremebei, ligía gíñe Wabúremebei. ³ Resíbi jumeí abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Abíniruni le wánibeí lídaangiñe Jesucrístu

⁴ Súnwandan neteñgiruni Búngiu juágu, luágu abíniruni le rúlaalíbei jun láu lareíni, lídaangiñe Jesucrístu. ⁵ Ladúga lídaañadün lan ában lúma Crístu, rújali Búngiu sun luwúyeri irísini le lánina siélu jun, rújali ában oúnwenbun subúdi jun luougua, lun gayáraabei lan jadímurejan luágu láu ában lichú áu. ⁶ Ítara líña geféen jumá luágu inárüni lan le waríñagubei jun luágu Crístu. ⁷ Láu igáburi le, úati ni cáta jemégeirun lídaangiñe le líchugubei Crístu, sun anjúnja lan agúrabajei wéyu le lúnbei lagríbudun Wabúreme Jesucrístu ubouagun. ⁸ Lágüdjabadün Búngiu derégüdagu lídan jafíñen darí lúmoun lagúmujoún, lun úa lan ni ában ichuguti jidúnrun luágu ni cáta dánme le liábin Wabúreme Jesucrístu. ⁹ Súnwandan lagúnfuliruni Búngiu lerérun, áni ligía agúarubei jun lun lídan jumá ában lúma Jesucrístu, le Liraú, le Wabúreme.

Fánreinguauü jádan lánigu Búngiu

¹⁰ Nidújeñu, ayúmuraguatina jun luágu líri Wabúreme Jesucrístu, lun júradun, lun meréde jumá fánreinguañu. Abágarida jumá lídan úarani le gumúti, láu ában méme luwúyeri asáminaruni lúma ayúmajani. ¹¹ Naríñagunbalin le, nidújeñu, lugúndun aríñagaaña ja jádaangiñebaña lufámilian Cloé luágu njein lán nege múarani jagánagua. ¹² Ámuñegueinarügü lán nege cátei laríñagun cáda ában jádaangiñe, añájein nege jídaangiñe, aríñagatiña. “Áu, lánigu Páblo áu”, jaríñaga jíbiri. “Áu, lánigu Apólos áu”, jaríñaga jíbiri. “Áu, lánigu Pédro áu”, jaríñaga jíbiri. “Áu, lánigu Crístu áu”. ¹³ ¿Cámegi sun le? ¿Fánreinwaguati funági Crístu? ¿Dáwaguatina funági luágu gurúwa luágu jufúleisein? ¿Ódi lídan níri jabásterá? ¹⁴ Teínqui níña lun Búngiu luágu mabásteragüdün nan ni ában jídaangiñe luefdügüya Críspo lúma Gáyo, ¹⁵ Ítara, úati ni ában lun laríñagun luágu lídan lan níri labásterá lun nánigu lan. ¹⁶ Narítaguñein guetó luágu badíseigüda náani gíñe Estéfanás jáu sun tílana lúban, marítaguntina ánjein badíseigüda nubeí ámu. ¹⁷ Mouúnajan lumútina Crístu abásteragüdaja, loúnajañadina apúrichijeí ugánu luágu lasálbaruniña gürrígia, máma láu apúrichijani le weíriguburiti, lueí lagídarun lídaangiñe laníchigu loúnwen Crístu luágu gurúwa.

Arijúati lubáfu Búngiu lúma lichú láu lídan Crístu

¹⁸ Ítara líña ugánu luágu loúnwen Crístu luágu gurúwa quei libídiouniga áu joun ja lúnbaña jeféridirun, ánjein woun, wagía le lúnbei wasálbarun, subúdi wamúti luágu lídaangiñe lan ugánu luágu loúnwen Crístu larúfudeí Búngiu lubáfu lun lasálbaruniña gürrígia. ¹⁹ Bürúwati tídan Lerérun Búngiu.

Nagúrinchagubei lichú áu le lánina uboué le,

nadúgübei jafúrendeí furéndeitiña lun ni cárame ánjein máma lubeí númagiñe liábin.

²⁰ ¿Cáti un ju lan le chúbei áu, o le arúfudajabei, o le lan gasgínejadibalín buri cátei le lánina uboué le? Úati ju lan lun ni cáta, adúga láali Búngiu lichú láu uboué le lun

libídiounigame áu. ²¹ Láu lichú láu, adúgati lun masúbudirun jamáni ja lánigubaña ubouú láu lichú áu le jawágubei. Láu gíñe lichú láu, ába laráansejan lun lasálbaruniña ja affíñebaña luágu lárígíñe jagáambuni ugánu luágu loúnwen Crístu jawágu, láu sun barú jamaani jíbiri gürígia ugánu le quei libídiouniga áu.

²² Buséntiña juríu jarjín miláguru lun jafíñerun luágu Crístu, ja mámabaña juríu, buséntiña lun láubei lan lichú áu arúfudajani lun gayáraabei lan jerésibiruni. ²³ Ánjein wagía, wapúrichija luágu Crístu le ádarawagúbei luágu gurúwa. Jayábiti juríu, siñáti jerésibiruni ában asálbaragúlei le ouwebei láu ában luwúyeri ouweni le busíganudúnati líbe líra, játi mámabaña juríu, janúgüni quei libídiouniga áu. ²⁴ Láu sun líra, añájein jádaangiñe juríu jáma ja mámabaña juríu ja agáambubalin lagúarun Búngiu joun lun lánigu jamá. Jagía, gayáraati jarjini lubáfu Búngiu lídan loúnwen Crístu, lúma lichú láu lun lasálbaruniwa ítara. ²⁵ Joun lirájüñü ubouú, libídiouniga áu laráansejan Búngiu, wel, weíriti lichú láu Búngiu sügú láu le chútimaabei áu ubouágu. ²⁶ Nidújeñu, lúnti jasúbudiruni luágu wájali lan Búngiu jun, láu sun mibe jamá jádaangiñe chúti jáu según ubouú, áni míbetiña gíñe jádaangiñe weírígutiña, o jádaangiñetiña lan familia íñugutiña. ²⁷ Anúadaja láaña Búngiu ja ibídiouguabaña áu según ubouú lun líchugun busíganu joun ja chúbaña áu, láu jarjini luágu ni cáta lan lichú jáu ligbugiñe Búngiu. Anúadaja láaña gíñe ja lanúgübaña ubouú quei mabáfutiña lun líchugun busíganu joun ja gabáfubaña, láu jarjini luágu ni cáta lan jabáfu ligbugiñe Búngiu. ²⁸ Anúadaja láaña Búngiu ja mawéirigunbaña ubouágu, ja áubaña mebéresenwa lan, ja ni cátabaña, lun larúfuduni luágu ni cáta lan ja anáangubaña jóungua ubouágu. ²⁹ Úati lubefti ni ában gayáraati lanáangun lúngua ligbugiñe Búngiu. ³⁰ Rúláadün Búngiu guánarügü jugúya affíñetiña lídoun ában lúma Jesucrístu. Ladúga cátei líra, íbjatiwa lichú áu lúmagiñe Crístu, gayáraati lerésibiruniwa Búngiu queísi richáguatiña, derégeguañu wóungua lun, sálbañu. ³¹ Ítara líña lubefti adúga wameí quei taríñagun Lerérun Búngiu. “Le busénti ladímurejan luágu uweíríguni, adímurejalá luágu luweírín cátei le adúga láalibeí Wabúreme Crístu woun.”

2

Ugánu luáguti Crístu le ádarawagúbei luágu gurúwa

¹ Nidújeñu, dán meja le níninbei lun nadímurejan jun luágu linárün Búngiu, adúga numúti mayúsurunga dimúrei buri íñuguti. ² Dan lé meja júma nubeí, máluguntina meja napúrichijan luágu ámu cátei lueídügüya luágu Jesucrístu le ádarawagúbei luágu gurúwa. ³ Ába narúfudagun nungua jun queísi ában wügúri gudémeguti, adádagareina láu anúfudei lueí jamúga níjein lan mégeiti lídan nuwádigimari luágu Wabúreme. ⁴ Dán meja le nadímurejanbei jun, ába napúrichijani Lerérun Búngiu jun, máluajantina nagáñeirunün láu buri dimúrei le jadímurejan wügúriña chu táu. Lubáragiñe líra, láurügü lubáfu lání Búngiu Espírítu nadímureja jun, ába jasúbudiruni luágu inárüni lan le naríñagubei jun. ⁵ Ítara líña jafíñerun lídaangiñe lubáfu Búngiu, máma lídaangiñe lichú jáu gürígia.

Arúfudaguati Búngiu lúngua lídaangiñe lání Espírítu

⁶ Láu sun líra, adímurejatiwa luágu ában luwúyeri lichú áu joun ja weínamujañábaña lídan jafíñen. Ánjeinti lichú áu ligía, máma lánina ubouú le, máma gíñe jáni ja agúmadijabaña ya ubouágu, ja madíseelibeí ánjañame gumúgua. ⁷ Luágu lichú láu Búngiu wadímureja, le áubei laráanseja lúmagiñe lubáragiñe ladúgüni ubouú lun lasálbaruniwa lun sun dan, gafánran wamámuga lídan sun luweírígün Crístu. Ligía rügüñein meja asúbudirei aráansejani ligía, guetó, subúdigüda láali woun. ⁸ Játi gumádimatiña lánina ubouú le, siñáti gunfaráanda jamáni laráansejan Búngiu lubá wasálbarun, lugúndun lun jamúga gunfaráanda jamáni, mádaragun jamúti jamúga Crístu luágu gurúwa. ⁹ Ítara líña queísi taríñaguni Lerérun Búngiu.

Marjíñaja jamágili gürígia cátei bufti lé buri laráansejabeí Búngiu joun ja jínsiñejabúbaña lun,

magáambuñajagiña gürigia luágu cátei buíti líbeina líra, marítaguntiña ída lúba lan.

¹⁰ Ába lasúbudiragüdüni láni Búngiu Espíritu, le méme Sífiri Sándu, luáguti buri sun lubuidun cátei ligía woun, wagía affñetiña. Ariaaja lumúti Sífiri Sándu sun cátei, áni subúdi lumúti lujúlilin-ágei larítangun Búngiu.

¹¹ ¿Ca jádaangiñe gürigia gayáraabei lasúbudiruni ca lan tídaanbei lanígei ában gürigia, lueídügiya espíritu le lídaanbei gürigia ligía? Ítara líña gñe, láni rügúñein Búngiu Espíritu asúbudirei sun cátei le lánina Búngiu. ¹² Wagía affñetiña, máma ában espíritu le lánina ubou werésibirubei, Sífiri Sándu le ñúbinbei lúmagiñe Búngiu, ligía werésibirubei, lun gunfaráanda wamáni le rúlaalíbei Búngiu woun láu lareíni. ¹³ Adímurejatiwa luágu lareíni Búngiu láu buri dimúrei le larúfudajabei Sífiri Sándu woun, máma láu buri dimúrei le wafúnrendeirun láu lichú wáu, le jáni gürigia. Ítara líña, laú lubáfu Sífiri Sándu, wafúnraanguagüdei linárün Búngiu joun gürigia ja íbjubalin Sífiri Sándu.

¹⁴ Gürigia le mibjñibalin Sífiri Sándu, májati lun larítangun Búngiu le larúfudajabei láni Búngiu Espíritu jádaangiñe gürigia, lugúndun libídiouniga áu lanúgüni, siñá lumuti gunfaráanda, lugúndun cátei lán buri le, láu rügúñein lubáfu Sífiri Sándu gayára lan gunfaráandawa lan. ¹⁵ Ánjeinti gürigia le gámati Sífiri Sándu, gáma lumúti larúgounga le líchugubei Sífiri Sándu luágu sun cátei, jayábiti ja lirájüñü ubou, siñáti gunfaráanda jamáni cáteinein lan gürigia le ebugubei lídan larúgounga le líchugubei Sífiri Sándu. ¹⁶ Queísi laríñawagun tídan Lerérun Búngiu. “¿Ca gunfaráanda jamáalíbei lisáminan Búngiu? ¿Ca gayáraabei larúfudajan lun Búngiu?” Láu sun líra, wagía affñetiña, njein lisáminan Cristu wádan ladúga íbja wamáali Sífiri Sándu.

3

Luwádigimari Páblo lun Búngiu lídan ában jáma jíbiri

¹ Láu sun líra, nidújeñu, dán meja le júmañadina lan, siñáti méja nadímurejan jun queísi joun gürigia ja lagúmadirubaña Sífiri Sándu, adímurejatina meja jun queísi joun gürigia ja míchaagugiñábaña jóungua lábugiñoun lagúmadíjan Sífiri Sándu le gumúti—queísi joun irájüñü—luágu buri cátei le luáguti Cristu. ² Ába nichugun arúfudajani le ménreengunti jun, queísi líchugúniwa úri lun ában irájü le gurágili lewéñegua eígini le deréguati, lugúndun siñágili lan lájuluchun eígini le deréguati. Siñá jumuti meja líla lujúlilin-ágei larítangun Búngiu gunfaráanda, áni chúlú lúmoun dan le, siñá meme jumágili, ³ lugúndun gagáburigidün queísi jagáburi lirájüñü ubou. Njeingua ligía gimúgaü jídan, gáñiguaü, fánreinguaü, máma jígiraguagüdüña júngua lun labúgurunün Sífiri Sándu, áni jadúgüñein le jadúgübei sun mútu. ⁴ Lugúndun láu laríñagun ában. “Lánigu Páblo áu”, laríñagaya ában. “Áu lánigu Apólos”, jadúgüña queísi gürigia ja lánigu ubou le.

⁵ ¿Cátanagi? ¿Cáteigi Apólosbei? Esériwidutiñarügü lun Búngiu wagía, ja ídaangiñébaña jíabin affñera luágu Crístu. Wadágimanu le líchugubei Wabúreme lun cáda ában wádaangiñe, ligía wadúgübei. ⁶ Áu ábunagubalin Lerérun Búngiu queísi nádü tídoun janígei, Apólos áturaguei nádü ligía láu larúfudajan méme jun luágu Crístu. Búngiu aweíridagüdúbalin nádü, ligía edérebugüdúbalin jafñen. ⁷ Ni lubéfti le ábunagubei, ni le áturagubei, ni cáta jagia, ánjeinti Búngiu, sun cátei ligía, lugúndun ligía aweíridagüdúbarun nádü. ⁸ Ában jáu ja ábunagubaña jáma ja áturagubaña, láu sun lafáyeirubei lan Búngiu cáda ában según luwúyeri lesériwidun lun. ⁹ Íbirigu wagía lídan wadágimanu esériwida lun Búngiu, jugúya, ítara jíña quei múa le luwádigimaridubei Búngiu.

Ítara jíña gñe queísi ában múna to lábunaguñounboun Búngiu. ¹⁰ Fuleísei láadina Búngiu láu líchugun ubáfu nun lun nuwádigimaridun úara lúma. Niábiti queísi ában wügúri le subúsjabúbei lun labunún wagábu buídu—áú le íchugubalin ébuu lun jafñen. Ámuti gürigia ábunagubei ligíbuagu ébuu ligía—jagía maésturugu ja arúfudajabaña luágu

Jesucristu jun, nárigi. Cáda ában, lúnti goúnigi lan ída líña lan lábunagun ligíbuagu ébuu ligía. ¹¹ Rúaali ébuu lun jaffñen, áni siñáti líchugúniwa ámu ébuu. Ébuu ligía, Jesucristu guánarügü. ¹² Gayáraati lábunagun gürígia ligíbuagu ébuu ligía laú cátei gebégiti le siñábei lágudúniwa, queísi gólu, pláta, lúma dúbü gebégiti, o gayáraati lábunagun láu cátei le mebégibei sarágu, le gayáraabei lágudúniwa, quei fuláansu, murísi o mabúru. ¹³ Lachúlürüba wéyu lun louchuni Búngiu jawádigimari sun gürígia ubouágu lun larjini ída líña lán meja, ánjein gebégi lubeí lúmoun mebégi lan. Louchagubei wawádigimaridun quei láu wátu geméti, aríja lámugei ánjein gayára lubeí lawándun, ánjein gebégi lubeí. ¹⁴ Ánjein buídu lubeí wawádigimaridun luágu Búngiu áni madúnamati lun lagúnrinchawagúniwa, queísi siñá lan tagúnrinchawagúniwa múna to adügútu láu cátei derébuguti, werésibirubei wafáyeiruaja lúmagiñe Búngiu. ¹⁵ Ánjein mabuídun lubeí wawádigimaridun luágu Búngiu, lagúnrinchawagúba sun wawádigimari, weféridirubei sun cátei, wawánirügüba wasálbara, quei le séfugarügüti lúngua lídaangiñe wátu geméti.

¹⁶ ¿Ibídñetísan jun luágu lilígilisin lan Búngiu jugúya, áni agánawa lan Sífiri Sándu jídan? ¹⁷ Ánjoun lagúnrinchagua ában gürígia lilígilisin Búngiu tugúya, lagúnrinchagubei gñe Búngiu gürígia ligía, lugúndun Búngiu jabúremebei tílana lilígilisin, áni jugúya guánarügü tílanabei ligísi tugúya.

¹⁸ Mayéeragua jumá júngua. Le arítaguti luágu sábiu lan según lichú áu le lánina ubou le, lúnti labúlieiduni lichú áu ligía, lun lanügúniwa queísi ában ibídiougua táu según ubou, gayára lámuga lerésibiruni lichú áu le tímataati le líchugubei Búngiu. ¹⁹ Lugúndun lichú áu le lánina ubou le, ában libídiouniga áu lun Búngiu. Taríñajare Lerérun Búngiu. “Áburugüda lumútiña Búngiu ja chúbaña áu según ubou le tídon lisádaraana jabibun guánarügü.” ²⁰ Aríñagatu gñe. “Subúdi lumúti Wabúreme Búngiu luágu mála lan jasáminan sábiugu.” ²¹ Ligía mouñ lubei lun janáangun júngua luágu arúfudajati le jafálarubei, ladúga gürígia rügúñadiwa sun wagía, áni rúlaali Búngiu sun cátei jun lun lesériwidun jun. ²² Rúlaadina jun láu sun Apólos lúma Pédro, lun warúfudajan jun. Rúlaali gñe sun cátei le ubouagubei jun lun jayúsurun. Rúlumuti gñe ibágari lúma ouweni jun. Sun le asúseredubei jun uguñe lúma sun le lúnbei lasúseredun jun, jáni. ²³ Jáni sun cátei ladúga lánigu Cristu jugúya, áni Cristu láni Búngiu.

4

Jawádigimari apóstolugu

¹ Lúnti lubeíti janügúniwa queísi rügü esériwidutiña lun Cristu, ja íchugúbaña lun jarúfudajani linárün Búngiu lé meja arámudaguabei jun. ² Le lubeíti íbjiti ában wadági-manu, lúnti ladúgüni buídu lun larúfuduni luágu gadúna lan lun leménigidun liyúbudiri luágu. ³ Ánjein luágu noubadina, maweírinti nebéreserun luágu ída líña lan janügüni nesériwidun lun Búngiu, ni jugúya ni furúmieguarügü le ubouáguna. Ni áu guánarügü, siñáti naríñagun ánjein buídu lubeí nesériwidun lun, o ánjein níjein lubeí mégeiti luágu, ⁴ láu sun madúnrun nan luágu ni cáta lurúma narítangun, máma lueígiñe líra lun madúnrunbadina lan. Nabúreme agúseragüdúbalina. ⁵ Magúseragüda jumá lubeíti luágu buri cátei lubáragiñe dan, agúra jumá lagíribudun Wabúreme Jesucristu ubouágun lun laságaruni cátei le arámudaguabei lídoun larúgounga. Lasúbudiragüdúbei Wabúreme tarítangun cáda ában anígi, ca lan ueígiñe wadúgei sun le adúga wamaálabei. Ábame ladímurejan Búngiu buíti luágu gürígia le buídubei adúga.

⁶ Nidújeñu, adímurejaadina nuougu lúma luágu Apólos queísi ában jémpulu jun lun gayáraabei lan jafúnrendeirun lídaangiñe le naríñagubei wawougu. Le lúnbei jafúnrendeiruni, lun manúgün jumá ában gürígia weíri lueí le lúnbei lanügúniwa, queísi bürúwañu lan, lun gñe manáangun lan ni ában lúngua luágu ában arúfudajati le lafálarubei, áni lanúgeime le ában quei ni cáta. ⁷ ¿Cági adúgübalibu buídu jaweí jíbiri? ¿Cági cátei búmabei

le mámabei líchugun Búngiu bun? Ánjeinti Búngiu lubeí íchugubalin sun cátei bun, ¿cáti uágu banáangua búngua camá jamuga íbjarügü bumúti le búmabei láu báni búngua?

⁸Jaganoún camá jamuga rísjadün lídan cátei lánina Búngiu, íbja jumáli sun le gayáraabei jabúseeruni lídaangiñe le líchugubei. Sandíguatün júngua camá jamuga jarúeijaña lúma Crístu, ígira wagía. ¡Buíti jamúga lun urúeigu jumá le tímatimaati lun jamúga gafánran wamá lídan jarúeijan! ⁹Laganoún nun luágu ígira láadiwa lan Búngiu wagía apóstolugu lídan lagúmujuún ubáraü. Ítara wáña queísi gürrígia ja siádiwafañabaña lun ouweni, ñúbinjadiwa lun ábanbadiwa lan aríawasei lun jaríaguniwa sun lílana ubou, dándu ánjeligu queísi gürrígia. ¹⁰Barúwatiwa queísi íbídíougua táu lueígiñe wesériwidun lun Crístu, sun jarítaguñu jumá juoúgua luágu chu lan jáu lídan cátei lánina Crístu. Según jugúya, wagía débilitiwa, jugúya jéretün. Barú jamutiwa gürrígia quei ni cáta, ánjein jugúya, inébetün joun. ¹¹Chülú lúmoun wéyu le, áfagaadiwa ilámaü, mágürabu, lúma manáanguni, wuríbatí jouseruniwa gürrígia, mábantiwa, ¹²wefriti wawádígmari láu wájabu lun wágüdaagun woúnga darí lun labúcharun wawágu. Anába jamútiwa gürrígia, ába woúnabun láu abíniruni. Ebaajouatiwa, awánda wamúti. ¹³Adímurejatiña wuríba wawágu, rútiwa dimúrei buíti joun láu gurásu. Chülú lúmoun wéyu le, ousera jamútiwa camá ífei láni ubou, quei cátei le mabúseerun jamáali gürrígia.

¹⁴Máma nabúrújañein le jun lun janúgün busíganu, nabúrújañein jun lun narúfudajan jun queísi joun nisáanigu jínsiñetiña nun. ¹⁵Láu sun jamúga añajein lan dísi-mílu maésturugu arúfudajatiña jun luágu Crístu, áu rügúñein júguchi lídan jaffñen luágu, ladúga áu lan anúgübalin ugánu jun luágu Wasálbaragüle lun gayáraabei lan jaffñerun luágu. ¹⁶Amúriajatina lubeíti júma lun jáyeijani nigáburi.

¹⁷Ligía noúnajaanbalin Timotéo lun líderagunün luágu cátei le. Jínsiñeti nun sarágu, ítara líña queísi ában niraú lídan Jesucrístu, gayáraati neménigidun luágu. Larítaguagüdübadün luágu ligáburi nabágaridun queísi afíñeti luágu Crístu, lun jáyeijani. Niján luwúyeri igáburi le narúfudajabei tídan sun ligílisi lídan sun fulásu. ¹⁸Añajein jídaangiñe, buin jáña láu anáanguni únguau, jarítaguatiña luágu mídinbadina lan bisídaün ladúga nanúfudei lun nagágibudagun júma. ¹⁹Bulíeiguatiña, agúrabatina nídin aríjaün madíse, ánjein busén Wabúreme. Ábameti naríjini ca lan jayáraabei barúgua túngua ja adúga lun jeseríwidun lun Búngiu, mámarügü le jaríñagubei. ²⁰Lugúndun dan le larúeijan Búngiu tídan wanígi, máma láurügüti dimúrei, níjein lubáfu wádan lun wadúgüni lugúndan. ²¹¿Cáteiti jímein jubeí. lun nabeíchunün dánme le nachúlürün, ódi lun nídin aríjaün láu ínsiñeni lúma uálíni?

5

Lagúserawagüdüñ ában le adúgübei figou

¹Agaambúali luágu níjein lan ában jídaangiñe lagámaridunoun lúmari lúguchi. Ában ouñwenbun iwíyei líra, le majouabei lun ni jádan ja íbídínejabubaña lun Búngiu. ²¡Áni laú sun líra, anáanguagüdüñ júngua! ¡Lúntirügü jamúga jírudagun luágu líra! Gürrígia le adúgübalin lanárime iwíyei le, lúnti labugún jídaangiñe. ³Láu sun úa nan júma le ní jubei, anájein júma narítangunrugu, áni darínaali lidúnrun le adúgübalin figou le, camá jamuga ñíñadina júma lun nagúseragüdüni. ⁴Guetó, le lúnbei jadúgüni, lun joundaragun lídan líri Wabúreme Jesucrístu, ñíbadina júma narítangunrugu, ñíbei gíñe lubáfu Wabúreme Jesúsú júma. ⁵Lúnti lubeíti jedéregeruni wügúri ligía lun Máfia láu jaságaruni lídaangiñe jídamurin, lun lagúnrinchawagún lúgubu, sálba támuga luwáni dánme le lagiribudun Wabúreme Jesúsú ubouágun.

⁶Mouñ lumuti janáangun júngua luágu le jadúgübei. ¿Magáambun jumágili cátei le. resígüda lumútu murúsun ísi sun fulúwaaru to ídounboun líchugúa? Ítara méme gíñe, murúsun figou jagánagua gayáraati lagádeirunün sungubei. ⁷Gidájumei lubeíti sun

iwíyei le lánina binádu igáburi le ígirubei jídan, le ítarabei quei ísi le pasáali. Ábame jarúma jumá le tímatimaati. Ítara júba quei fein to eigíþoun lídan fédu le páscoa, to adügúþoun táu fulúwaaru to sún umuti tañoúndawagún, to magánatu ísi. Jarúmaali wadáriragun woúngua ligíþugiñe Búngiu ladúga derége láani Búngiu Cristu lun loúnwen luágu wafígoun quef meja ladágaragüdúniwa mudún lídan fédu le páscoa luágu figoú. ⁸ Ítara líña lubefti, queísi sálbaadiwa lan, lúnti wagáburidun ában igáburi jarúmami, falá wamefme inárüni. Igáburi ligía, ítara líña quei fein to magánatu ísi. Moún lumuti wagáburidun queísi meja wagáburidun furúmiñe, moún lumuti woúserun wuríba, ni lun wasígirun láu tiwíye wanígi. Sun igáburi ligía, ítara líña quei ísi pasáali.

⁹ Aríñagatiná meja jun tídan to ában nigáradan luágu moun lan lun jeréderun lídan ában jáma ja abágaridubaña lídan salúfuri. ¹⁰ Mára meja nariñaguña jun lun jadisedun le gumúti jaweí sun lirájüñü uboú le, ja salúfuribaña, o ja lan meménijabutiña, o jíwerutiña, o ájuduragutiña joun sándu, lugúndun lun jamúga mánbadün lan ni cáta jáma, gásu jamúga jáfuridun uboúagugiñe. ¹¹ Le nabúseerubei nariñagun jun, lun meméterun jumá lúmoun ni ában le aríñaguti luágu idújei lan lueígiñe Jesucristu áni salúfuriti, o meménijabuti, o judúguati joun sándu, o marásualuguti, bachárua o jíweru. Moún lumuti ni lun jeígin lúma idújei le ítarati. ¹²⁻¹³ Mára áu lúnbei nagúseragüdúniña ja boúgudibaña lueí Cristu, Búngiuba agúseragúdaña. Wagía, lúnti wagúseragüdúniña wadújeiu lueígiñe Jesucristu ánjein jadúgiña lubeí wuríbatu. Ligía gidájumei lubeí gaffígounti le jagánaguagiñe.

6

Wuríbu buri jagíþugiñe agúseragüdútiña ja máma afíñetiña

¹ Dan le níjein lan cátei lúnti laríñaajan ában jídaangiñe líri ámu, ¿cági uágu jídin jámoun agúseragüdútiña ja ibídiñebei Cristu joun, lubáragiñe jamúga jídin jámoun lánigu Búngiu? ² ¿Ódi ibídiñeti jun luágu jagúseragüdúbaña lan lánigu Búngiu lánigu uboú? Ánjeinti jagúseragüdúbaña lubeí lánigu uboú, ¿siñá jumuti buri cátei ñübüriti le aráansera? ³ ¿Ibídiñeti jun luágu wagúseragüdúbaña lan gíñe ánjeligu? ¿Gúbuméti gayára lan wagúseragüdün luágu buri cátei lánina ibágari le! ⁴ Ánjein níjein lubeí buri wuríbu jagánagua luágu buri cátei le lánina ibágari le, ¿cámegi jídin aríñaaja joun ja maffínebaña luágu Jesucristu, ja málabei lichú áu le jádaanbei ladúga máma lan lúmagiñeti Búngiu? ⁵ Nariñaguñein le lun janúgün busígau. ¿Úati funági íbini ában chu táu jídan le gayáraati laráanseruni ában cátei jídan lidújeñu lueígiñe Jesucristu? ⁶ ¿Lúnti lídin ában idújei aríñaaja líri lidúje joun agúseragüdútiña ja maffíñetiña luágu Cristu?

⁷ Láurügü jawúribujan júmagua, ábanjali mabuíduni le gumúti líra. Buítimaati lun jawánduni maríchaü le adügúþei jun sügú láu jageíndagun ladúga. Buítimaati lun jígirun lun líwerujoún juef. ⁸ Ánjein jugúya, lubáragiñe líra, adúgatün maríchaü, íweruja jugúya, íbini jaweí jidújeñu guánarügü.

⁹⁻¹⁰ ¿Ibídiñeti jun luágu ja lan adügúbaña wuríbani, mafánranbaña lan lídan larúeijan Búngiu? Sun ja agámaridubaña mamárieidunga, ja ájuduragubaña joun sándu, ja agámaridubaña ja marfeitiña, ja wügúriña ja agámaridutiña wügúriña jáledi, jíwerutiña, meménijabutiña, bacháruatiña, marásualugutiña, ja anúgúbalin láni ámu láu jabíþun—sun ja adügúbaña wuríbani líbe buri le, siñábei jebélurun lídoun larúeijan Búngiu siélu. ¹¹ Anájein jídaangiñe, ítara jañá meja, ánjein guetó, chibáwaali jíffígoun, derégeguaadün júngua lun Búngiu, áni resíbi láadün queísi lánigu ladúga le ladúgúþei Wabúreme Jesúsú juágu, lúma sun le ladúgúþei láni Búngiu Espírítu juágu.

Wágubu, ában cátei derégewati lun Búngiu

¹² Aríñawagúati. “Gayáraati ladúgüni gürígia le labúseerun ladúga.” Inárüni líra, áni máma sun cátei lun buídu lan lanügún. Gayáraati ladúgüni gürígia le labúseerun, wel, moún lumuti lígiraguagüdün lúngua lun lagúmadiruni layúmajan. ¹³ Inárüni le

aríñawagúbei luágu ladúgüni lan Búngiu eíginí lun weígini, adúgaleí warágeirugu lun ladúgüni wadágimanu láu weígin. Inárüni, áni lagúmuchaguagüdübei Búngiu biángubei cátei le, mamégeirun wamáalime. Ánjeinti wágubu, madúgünti lun wadúgün salúfuri láu, ladúgün wágubu lun Crístu, lun ligíaba lan labúreme, áni ligía íchugubalin ubáfu lun wágubu lun gayáraabei lan wesériwidun lun, láu. ¹⁴Ítara quei lásaaragüdüni Búngiu Crístu lídaangiñe ouweni láu sun lúgubu, lásaaragüdübadiwa gíñe láu sun wágubu, láu lubáfu.

¹⁵¿Ibídiniētisan jun luágu líbiri lan cátei le únbei wagúara lúgubu Crístu cáda ában jídaangiñe? ¿Nanúgeiméti núgubu le líbiribeí lúgubu Crístu lun nadúgüni líbirime túgubu ában jóru? ¿Madúgün nubeí! ¹⁶¿Ódi ibídiniēti jun luágu dan lan le leméterun ában güriḡia túmoun ában jóru, biángubei jagía núbintiña lun ítara jabá lan quei ában méme úgubu? Tariñajare Lerérun Búngiu. “Jayábinba biángubei lun ítara jamá quei ábanrügü.” ¹⁷Anjein dan le líábin ában güriḡia lun lídan lan ában lúma Crístu, ában líábin láni Crístu Espírítu lun ában lan lúma láni güriḡia ligía espírítu lun ábanrügü jamá espírítu.

¹⁸Anúraja jumá lubeíti lueí salúfuri. Mítaraanti salúfuri queísi ámu figoú, furúmiñegarügü ámu figoú le jadúga güriḡia, boúgudin lueí jágubu ladúga dáñu, ánjein le agámariduti mamárieidunga, ladúgüña figoú luágu lúgubu guánarügü. ¹⁹¿Ibídiniēti jun luágu lúban lan Sífiri Sándu wágubu, le líchugubei Búngiu woun lun laganouñ wádan? Máma wagía labúriñabei wágubu, Búngiu labúremebei. ²⁰Agáñija lumútiwa Búngiu séru lun lánigu wamá. Ligía lúnti lubeí wíchugun inébesei lun Búngiu dándu láu wágubu quei láu wáni espírítu lugúndun láni Búngiu biángubei.

7

Dimúrei buri luáguḡi maríei

¹Guetó núnabaali lé buri uágubei jálügüdana tídan jigáradan to jabúrújaboun nun. Inárüni luágu buídu lan lun wügúri lun magámaridun lan, ²quei níjein lubeí sarágu salúfuri, buítimaati lun lagámaridun wügúri, lun gíñe tagámaridun wúri, súnwandan láu amárieiduni. ³Lúnti lagúnfulirun wügúri túma lúmarí queísi úmari, lúnti gíñe tagúnfulirun wúri lúma túmari. ⁴Máma úmari to wúri labúremeḡibun túgubu guánarügü, láni gíñe túmari. Mámá gíñe úmari le wügúri labúremebei lúgubu guánarügü, táni gíñe lúmarí. ⁵Mamájara jumá lun jesériwidagun júniwagua, ánjaün gubeírügü adúga darádu lun mayúsuragun jumá júngua luágu átiri dan lun jíchaagun júngua lúnrügü jayúmuragun lun Búngiu. Láriḡiñe líra, lúntiya jayúsuragun júngua, lueí lásiñerun jágúdaagun júngua, ábame lafígoungüdünün Máfia láu jeméterun jámoun ámu jaweí jámarigu.

⁶Máma naríñaguña luágu lúnti lan jagámaridun, gayáraarügüti jáluaḡan úmari lun jamárieidun jáma ánjaün busén. ⁷Áu, buséntina jamúga lun sun lan güriḡia gayára lan jágúdaagun jóungua lun magámaridun jamá queísi áu. Subúdi numúti luágu siñá lan ítara, rújali Búngiu ámuñegueinarügü ubáfu lun cáda ában, ában luwúyeri joun jíbiri, ámu joun jíbiri.

⁸Ja mámarigiñabaña, jáma ja jílaañabaña úmari, aríñagatina joun luágu buídu lan jamúga lun jeréderun mámariga queísi áu. ⁹ánjein siñá lubeí jágúdaagun jóungua, buíti lun jagámaridun (súnwandan láu amárieiduni) sügú láu lun jeréderun láu ában luweírín ayúmajani le siñábei jawánduni.

¹⁰Ánjaña ja maríeijañabaña, aríñagatina joun lun mígirun táani wúri túmari. Gumádi le, lídan lubúḡubu máma nugúmadin, lugúmadin Wabúreme. ¹¹Láu sun líra, ánjein tígira wúri túmari, lúnti teréderun mámariga, o taráandarun lan lúma túmari. Moún lumuti gíñe lígirunun wügúri lúmarí.

¹²Joun jíbiri, aríñagatina queísi dimúrei le náni, máma láni Wabúreme, luágu ánjein lan mafiñen tubeí lúmarí ában le afiñeti luágu Crístu, áni gagúndaantu lun tasígirun agánawa lúma, moún lumuti lafánreinragun túma. ¹³Ánjein gíñe mafiñen lubeí túmari

ában wúri to affñetu luágu Crístu, áni gagúndaanti lun lasígirun agánawa túma, moún lumuti tafánreinragun lúma. ¹⁴ Úmari le maffñebei, derégewaali lun Búngiu láu lídaañein lan ában túma lúmari to affñetu luágu Crístu, úmariti to maffñetu, derégewaaru gñe lun Búngiu láu lídaañoun lan ában lúma túmari le affñebei luágu Crístu. Lun jamúga máma líña lan, ítara jáña jamúga jisáanigu quei jasáanigu ja maffñebaña, ítara, derégewañu jáña lun Búngiu. ¹⁵ Ánjein busén lubei úmari le maffñebei luágu Crístu lun lígirunun lúmari, o wúri to maffñeboun lun tígiruni túmari, ígiragua jamá. Lídan oúbaü líra, moún lumuti jafósuruniña úmarigu ja affñebaña úmarigu ja maffñebaña lun jeréderun jáma, lugúndun wájali Búngiu woun lun wabágaridun lídan darángilau. ¹⁶ Ában gñe cátei, ¿cági basúbudirubei, amúrú wúri, ánjeindügü gayára lubei basálbaruni búmari láu beréderun lúma? ¿O cági basúbudirubei, amúrú wügúri, ánjeindügü gayára lubei basálbarunun búmari láu beréderun túma?

¹⁷ Lídan sun luwúyeri, lúnti labágaridun cáda ában quei líchuguni Wabúreme lun, áni quei lubei meja gñe, dan le lagúarunbei Búngiu lun lun lánigu lan. Ítara líña naríñaguni tídan sun ligílisi. ¹⁸ Ánjein agúara Búngiu lun ában gürígia le resíbi lálalibe circuncisión, lé meja liseñi lidáradun Búngiu jáma lánigu, lúnti leréderun ítara, ánjein gñe agúara lun ában le merésibirungli circuncisión, moún lumuti lerésibiruni. ¹⁹ Mebéresenwati ánjein resíbi lubei circuncisión lúmoun merésibirún lán, le busénwabei, lun lagúnfulirúniwa lugúmadin Búngiu. ²⁰ Cáda gürígia lúnti leréderun lídan igáburi lé meja gádaanbalin dan le lagúarunbei Búngiu lun lun lánigu lan. ²¹ Ánjein meja idámuni bubei dan le lagúarunbei Búngiu bun, madjíeribá luágu líra, ánjeinrügü líñáti gayára lubei báfuridun lídaangiñe idámuni ban, adúgabef. ²² Lé meja idámunibei lun labúreme ya ubouágu dan le lagúarunbei lun lun laffñerun luágu Crístu, gidáali luei lubáfu figou lun lesériwidun lun Wabúreme Jesucrístu, ítara méme gñe, lé meja mámabei idámuni lun ában gürígia ubouágu dan le lagúarunbei lun, lidámunjali Crístu, ligíajali Labúreme. ²³ Agáñija láadün Búngiu luágu oúnwenbun ebégi, mógira jumá lun janúgünün wügúriña lidámunme jagúndan, lidámun jumá lugúndan Búngiu. ²⁴ Ítara líña lubeiti, nidújeñu, madjíeri jumá cátañañadün lan bougudigiñe jibíti, reidei jumá ligíbugiñe Búngiu lídan méme igáburi lé meja gádaanbalün dan le lagúarunbei jun.

²⁵ Jawágu gürígia ja mámarigiñabaña, úati ni ában gumádi núma le jamúga lúmagiñeti Wabúreme, naríñagaali le narítangun, áu queisi ában le gadúnati lun laffñerúniwa luágu, luágu lareñi Wabúreme le rújalibe murúsun lídaangiñe lichú láu nun. ²⁶ Lídan narítangun, lúnti leréderun gürígia quei lubei, ladúga buri lidere dan le gádaanbaliwa. ²⁷ Ánjein gámari bubei, málugabá bígiragun, ánjein mámari bubei, málugabá bagámaridun. ²⁸ Ánjabu amárieida, máma figou, ánjour gñe amárieida ában irájü, máma gñe figou, láu sun líra, ñibeí asúfuriruni joun ja gámaribaña, áni buséntina jamúga masúseredun lan líra.

²⁹ Nidújeñu, niján le nabúseerubei naríñagun. Murúsun rügáali dan wabá lun wesériwidun lun Búngiu. Lúmagiñe lubeiti guetó, ja gámaribaña, lúnti jesériwidun lun Búngiu táu sun janígi camá jamuga mámaritiña. ³⁰ Moún lumuti wíchugun dan lun íruni o ugúndani le gádaanbaliwa, o lun umégeguni le wámabei, lun lagídaruníwa luei wadúgüni le lúnbei wadúgüni quei esériwidutiña lun Búngiu, ladúga louguati dan. ³¹ Masáminara jumá sarágu luágu lubuídun cátei lánina ubou le, le jánibeí lun jayúsuruni, ladúga ubou le, le warjíibeí, lagúmuchaña, lúnti jarítangun luágu cátei le magúmuchadibeí.

³² Buséntina lun madjíeri lan jarítangun luágu ni cáta. Dan le mámari lan ában wügúri, larítangun luágu buri cátei le luágu Búngiu lúma lun lesériwiduni buídu. ³³ Ánjeinti dan le gámarijali, larítangun luágu buri cátei le lánina íbágarí le, lúma lun lesériwidunun lúmari buídu, ³⁴ biánguañein cátei lun leténirun lun—lun lesériwidun lun Búngiu lúma lun latoúnigirunun lúmari. Ámuti gñe touúserun wúri maríteu tueí to mámariboun. To mámariboun, tarítangun luágu buri cátei le luágu Wabúreme Búngiu, lun derégeguñu tan

túngua lun Búngiu dándu láu túgubu queísi táu tanígi. Ánjounti to gámariboun, tarítangun luágu buri berésegu lánina ibágari le, lúma lun tesériwidun buídu lun túmari.

³⁵ Nariñaguñein le jun luágu jáni fuleísei, máma nariñaguñein lun mamárieidun jumá. Nariñaguñein lun jabágaridun lídan ában igáburi le buíti, esériwideina lun Wabúreme, derégeguñu júngua lun, marítangun sarágu luágu cátei lánina ibágari le.

³⁶ Agúbürigu ja arítagubaña luágu buídutima lan lun tamárieidun jaraú lugúndun taweíyaaduña lan, áni ánjein buítima lubeí líra, lúnti jadúgüni le uágubei jarítagua luágu buídu lan—gayáraati jíchugunun lun tadári lun tamárieidun lúma, máma figou líra. ³⁷ Ánjein añajein lubeí ámu agúbürigu, derégüdaguatiña lídan jarítangun luágu mouñ lumuti lan lun tamárieidun jaraú, áni memégeiruati lun tíchugúniwa, áni gayáraati jadúgüni le jabúseerunbei, buíti jadúga lun míchugun jamánun jaraú lun tamárieidun. ³⁸ Ja lubeíti íchugutu jaraú lun tamárieidun, buíti jadúga, ja míchuguntu, buítimaati jadúga.

³⁹ Wúri to maríeitu, lábugiñeñoun leréreejan túmari, lurúma lúrudu, sun wíngwángili lan, ánjein ouwe túmari, gayáraati tamárieidun lúma le tabúseerun, afíñeti rügáali ligía luágu Crístu. ⁴⁰ Láu sun líra, buítimaabei dan tun ánjourya mamárieidun. Ligía narítangunbei, áni affñetina luágu ligía lan gñe larítangunbei láni Búngiu Espírítu.

8

Eígini buri le adágarawagüdüti joun sándu

¹ Guetó nadímureja luágu eígini le adágarawagüdüti joun sándu. Inárüni luágu subúdi wamáni luágutí buri cátei le, queísi jaríñaguni, awáansegüda lumútiwa wasúbudin lídan cátei málati, ánjein ínsiñeni, awáansegüda lumútiwa lídan lubuídun igáburi. ² Le arítaguti luágu nñein lan lasúbudirun, ibídiñegilirügü líña ni cáta lun queísi lubúdubú. ³ Ánjein le jínsiñejabúbei lun Búngiu, subúdi lumúti Búngiu gürígia ligía queísi lánigu.

⁴ Luáguti lubeíti leigín eígini le adágarawagüdüti joun sándu, inárüni luágu ni cáta jamá sándu ubouágu, máma jamá búngiugu ladúga subúdi wamúti luágu ában rügúñein lan Búngiu. ⁵ Añajein mútu ubouágu, jarítaguatiña luágu añajein lan búriúbünu búngiugu jáma abúremeigu siélu lúma ubouágu, ⁶ ánjeinti woun, wagía le afíñebei luágu Crístu, ában rügúñein Búngiu, le Wáguchibeí. Ligía adúgübalin sun cátei, áni ligía le únbei wesériwida táu sun tarúman wanígi. Ában rügúñein gñe Wabúreme, le Jesucrístu, le ídaangiñebei ladúgüwa sun cátei, áni ligía le ídaangiñebei wibíjei ibágari magúmuchaditi.

⁷ Másutiña ja afíñebaña luágu Crístu gayára jaffñerun luágu ni cáta jamá sándu, añajein já meja jéchubaña ájuduragua joun sándu, jou jamágili eígini ligía queísi cátei adágarawagüdüti joun búngiugu. Queíti lougua lubeí jaffñen luágu gayára lan jeígini affñetiña eígini ligía, ába mabuídun lan lasándiraguagüdüniña joungua ligíbugiñe Búngiu láu jeígini eígini ligía. ⁸ Inárüni le jaríñagubei luágu máma lan cátei le weígibeí gayáraagüdübalin lerésibiruniwa Búngiu, mabuíduñtimaabadiwa ligíbugiñe Búngiu lueígiñe weígin, maríbaduntima wagífame lueígiñe meígin wáma. ⁹ Gayáraati jeígin eígini le adágarawagüdüti joun sándu, lúntirügü gounígi jumá lueí jeíguadagüdüniña jidújeñu lueígiñe Crístu ja lougubaña jaffñen ánjein buídu lubeí lúmoun mabuídun lan.

¹⁰ Quei jamúga guetó, amúru le subúdiñabúbei luágu gayára lan beígin furúmieguarügü eígini, bañúura eíga lídan ában fulásu le joúnti sándu, laríjaba ában idújei le débiliti laffñen luágu buri cátei le, ñi, lanúgüba gurásu buágu lun gñe leígin lídaangiñe eígini le, le adágarawagüdüti joun sándu. ¹¹ Ítara, ladúga bisúbudin, féridigüda bumúti bidúje le débilibei lídan laffñen le gñe ueígiñebei louwe Crístu. ¹² Dan lubeíti le jañáwarijani jarítangun idújeñu ja débilibaña lídan jaffñen, jadúgüña lun jaffgounjan jidújeñu, áni jugúya guánarügü jaffgounjaña gñe. ¹³ Ligía, ánjein lubeí náburugüda nidúje lídoun figou ladúga cátei le neígibeí, buítimaati lun meígingütya nan úwi lueí nafgounjagüdüni.

9

Lirícha buri ában apóstolu

¹ Áu, furáangutina lun nadúgüni le nabúseerubei, garíchatina gíñe queísi ában apóstolu, aríja náali Wabúreme Jesúsú, áni jugúya guánarügü asálrubaña lídaangiñe nuwádigi-maridun luágu Wabúreme. ² Fágua manúgün jabádina jíbiri queísi apóstolu, ánjeinti jugúya, gásu janúgünina queísi apóstolu, lugúndun láu affíne jumá luágu Crístu, arífuda lumúti líra luágu inárüni lan luágu ában nan apóstolu.

³ Niján nouñabagülebei joun ja adímurejabaña nuágu. ⁴ Garíchatina lun nerésibiruni sun le ichugúbei nun lun neígini lúma lun nátuni queísi nafáyeiruaja luágu nuwádigimari luágu jáni fuleísei. ⁵ Garíchatina gíñe lun namárieidun túma ában wúri to affínetu luágu Crístu, lun gíñe nanúgünun númagua luágu nuweíyasun quei ladúgüni Pédro jáma ja jíbiri apóstolugu, jáma gíñe ja lamúlenu Wabúreme. ⁶ ¿Ódi jarítaguatün luágu áu rügüñein lan lúma Bernabé marícha lun werésibirun wágüda ja júmangiñe lun gayára lan wígiruni wawádigimariidun láu wájabu lun wapúrichijani Lerérun Búngiu? ⁷ Queísigubeirügü, máma sudaara guánarügü afáyeirubalin cátei lé buri layúsurubei, le ábunagubei beíbei, jóuti tídaangiñe, le ónigirubei bágasu, guráti lídaangiñe míligi le lamíligijabei. ⁸ Áni marítagua jumátia luágu naríñaguñein lan le queísirügü jarítagun gürígia, lugúndun aríñaga lumúti gíñe lilúrudun Moisés. ⁹ Laríñajare tídan lilíburuna lúru. “Magúraguabeí liyúma bágasu le lánina wadágimanu luef léigin lídaangiñe ílaü le léferejabei.” Máma laríñaguñein Búngiu líra jawáurügü bágasu, ¹⁰ laríñaguñein gíñe queísi ában jémpulu woun. Luágu wáni fuleísei labírúdíwa lúru le, lugúndun dándu le awotíjabinlun múa, queísi le éferejabalin líla nádü, lúnti jadúgüni láu eménigini luágu jerésibirubei lan jafánran lídaangiñe alúbajani. ¹¹ Queísi bunágua wamáali lubeí Lerérun Búngiu tídan janígi, ¿gíbeti funági laríjin jun lun walúbajan murúsun cátei júmangiñe lun wágüdaagun woungua? ¹² Ánjein garícha jabeí ámu lun líra júmangiñe, garíchatimáatiwa.

Mayúsu wamúti íríchaü le wawágubei. Lubáragiñe líra, awánda wamáali sun le wemegeirubei luef lejénreendun jun agáambeí wapúrichijani Lerérun Búngiu, ladúga wamúriajan wágüda ja júmangiñe. ¹³ Subúdi jumúti luágu ja lan ñadágimeinbaña liglísirugu, lídaangiñe le liglísirugubei jawínwanda. Ja eténirubaña lun latárü le ní lubei líchugúa adágaragüdüni, jóutiña úwi jádaangiñe anímaalu ja adágarawagüdübaña ñi. ¹⁴ Ítara líña gíñe laríñaguni Wabúreme Jesúsú lun ja lan apúrichijabalin ugánu luágu, lun gíñe jádaangiñe lan ja agáambubalin ugánu ligía jawínwanda. ¹⁵ Áu, mayúsugidina ni ában lídaangiñe íríchaü le, máma gíñe nabúrújañein le jun lun jíchugun som cátei nun. ¡Jímein numúti nouñwen niláma lubáragiñe neféridiruni ugúndani le nuágubei láu napúrichijani ugánu luáguti asálbaruni, magúburajanga luágu!

¹⁶ Máma cátei lúnti napántajan luágu láu napúrichijani ugánu luáguti asálbaruni jun, lugúndun mósu nadúgüni. ¡Fugiábu áu ánjein mapúrichijan nan ugánu le! ¹⁷ Lun jamúga mínsiñe lan nun lun napúrichijan, láu sun luwúyeri mósu nadúgüni ladúga ligía lan wadágimanu le líchugubei Búngiu nun. Queísi apúrichija nan láu sun nugúndan, gafáyeiruajata, ¹⁸ afáyeiruajau ligía, lun gayára lan napúrichijan luágu Wasálbaragüle, magúburajanga ni cáta, márügüdünganeí nirícha lun nawínwandun lídaangiñe nuwádigi-mari queísi apúrichijati.

¹⁹ Láu sun mábuti nan ubouágu lun nagáambuni, rúguaadina núngua jadámunme súngubei, lun nagáñeirun sarágu gürígia lun Crístu. ²⁰ Dan le jagánagua nan juríu, ába nadúgün camá juríu áu, lun nagáñeiruniña lun Crístu. Queísi jabágaridun juríu lábugiñe lilúrudun Moisés, rúguatina núngua lábugiñoun lúru ligía lun nagáñeiruniña, láu sun mámañadina lan lábugiñe lúru ligía. ²¹ Lun nagáñeiruniña ja mámbaña juríu, ja mabágaridunbaña lábugiñe lilúrudun Moisés, rúguatina núngua quei jagía, láu sun lábugiñeñadina lan lilúrudun Búngiu, quei lábugiñeñadina lubeí lilúrudun Crístu.

²² Dan le jáma nan ja louguabaña affíne luágu cátei le gayáraabei jadúgüni affínetiña, madúgüntina ni cáta le uágubei jarítagua luágu mabuídun lan ladúgüniwa, lun gayára lan nagáñeiruniña. Rúguaadina núngua queísi cáda jawúyeri güriquia lun añáein lan nasálbarun lídan furúmieguaugü luwúyeri. ²³ Nadúgüñein sun le lun lasúbudirúniwa ugánu le lánina asálbaruni, lun gafánraanbadina lan lídan buídu le lanúgübei ugánu le.

²⁴ Subúdi jumúti luágu gíbe jamá eíbaagutiña lídan ában eíbaaguni, áni ában rügüñein jádaangiñe agáñeira. Eíbaagua jumá lubeíti lídan ibágari le lídan ában luwúyeri lun gayáraabei lan jagáñeiruni ledéweejan Búngiu jun. ²⁵ Sun ja aráansejabaña lun jebélurun lídoun juráraü, jóuchatiña lun madúgün jamá ni cáta le gayáraabei lásíneragüdüni jájurerun. Áni jadúgüni lun jagáñeirun ában rídi le láuti ubánaü. Ánjeinti wagia, wáfaaguña lun wibíjin ában rídi siélu le lúnti ladúrarun lun sun dan. ²⁶ Áu, neíbaaguña lídan ibágari le, rúñunef naríjin luágun ubuíduni le lúnbei líchuguni Búngiu nun, siélu. Mítaraantina queísi ageíndaguti le agáyuajabei garábalirugu, ²⁷ lubáragiñe líra, áfara numúti lugúndan nógubu, fósunef lun lagáambunina, lueí lubeígia neféridiruba lan lárigiñé buga arúfudajadina lan joun ámu luágu lubuídun úma lun wachúlürün lúmoun Búngiu.

10

Dimúrei luágu ájuduraguni joun sándu

¹ Nidújeñu, buséntina lun narítaguaagdünün luágu lé meja asúseredubei joun binádu wagúbürigu lídan lé meja lídan jamá fulásu mageírawati, luágu níñein lán meja Búngiu lídan ában juánriñu jóugiñe lun loúnigiruniña. Séfuti gíñe lanúgüniña súnugubei dan le jájiñuragunbalin Barána Funáti. ² Ítara líña queísi ában abásteruni joun láu jásiügürün labádinaguagiñe barána, lúma juánriñu jóugiñe. Lídaañanu ában lúma Moisés lun jafálaruni ladúga ligía lan abúgurubaliña. ³ Jóutiña gíñe sun jagía lídaangiñe ában méme eígini le líchugubei Búngiu joun, siéluigiñe, ⁴ rúati gíñe dúna joun súnugubei lídaangiñe ában dúbü lun játun. ⁵ Láu sun líra, madúgün jamúti jíbe-ágei lugúndan Búngiu, ába lamágundarun Búngiu jáma. Ligíati jóúwegunbei lídan fulásu mageírawati.

⁶ Sun le asúseredubei joun, ában jémpulu woun, lun mayúmajan wamá buri cátei wuríbati, queí meja jadúgüni. ⁷ Ligía májuduragua jumá lubeí joun sándu queí meja jadúga jádaangiñe, queísi taríñaguni Lerérun Búngiu luágu jefédujan joun sándu. “Ába jañúurun güriquia eíga lúma áta, lárigiñe, ába jásaarun eféduja.” ⁸ Moún lumuti wadúgün salúfuri queí meja jadúga jádaangiñe, ába larúfuduni Búngiu luágu wuríba lan le jadúgübei láu loúwegüdüniña mílu güriquia jádaangiñe lídan ában wéyu. ⁹ Moún lumuti gíñe wáluajani lében lugúraasun Búngiu woun láu luríban wagáburi, queí jadúgüni jádaangiñe, ába jóúwegun láu lágüragüdüniña joun jéwe. ¹⁰ Mamágundara jumá gíñe lúma Búngiu queí jadúga jádaangiñe, ába loúnajani Búngiu ánjeli lun láfaraguniña jilágubei.

¹¹ Suséreti sun le joun binádu agúbürigu, ába labúriüdn tídan Lerérun Búngiu queísi jémpulu woun, wagía le wíwanbei lídan lagúmujoñun dan le, lun wasúbudiruni buídu luágu mínsiñe lan figoú lun Búngiu. ¹² Le lubeíti jarítaguabei luágu derégüdagua lan leíbugun lúma Búngiu, toúnigilá, máburujalá lídoun figoú. ¹³ Oúchawaguni buri le jasúfurirubei, ában láu lúma buri le jasúfurirubei ja jíbiri. Gayáraati jeménigídn luágu Búngiu, mígirunbei lun jibíjin oúchawaguni le jásiñerun awánda. Lubáragiñe líra, dánme liábin oúchawagúni, larúfudubei gíñe Búngiu jun ída lúba lan jáfuridun lídaangiñe, ítara lúba gayára lan jawánduni.

¹⁴ Ligía lubeíti, nidújeñu jínsiñetiña nun, mádaragua jumá júngua lídoun cátei le jánina sándu. ¹⁵ Nadímurejaña jun queísi joun güriquia gunfaráandatiña, samína jumá júngua ánjein buídu lubeí le naríñagubei jun, lúmoun mabuídun lan. ¹⁶ Dan le werésibirun, dan

le wátun lídaangiñe uníñein le uágubei wíhiga eteíngiruni lun Búngiu, arífuda wamúti luágu lídaañadiwa lan ában lúma Crístu luágu líta le áwiyurubei, dan lé meja loúnwenbei luágu gurúwa wawágu. Dan le weígin tídaangiñe fein to wagúbachaguboun, arífuda wamúti luágu lídaañadiwa lan ában lúma Crístu luágu lúgubu le ledéregerubei lun ouweni luágu gurúwa ligía. ¹⁷ Queísi jou wabeí tídaangiñe ában méme fein, arífuda lumúti líra luágu lídaañadiwa lan ában láu sun gíbe wamá.

¹⁸ Aríja jumá lun násiñun le linásiñun Israél. Ja eígbaña lídaangiñe eígini lé buri adágarawagüdúti lun Búngiu luágu latárü, lídaañañu lan ában jámagua, lúma lúma Labúreme latárü. ¹⁹ Mára nariñaguña luágu wíwan jamá sándu, maríñaguntina gíñe luágu weírgutima lan úwi le adágarawagüdúbei joun sügú láu ámu úwi. ²⁰ Le nariñagubei, luágu dan lan le jadágaragüdün ja íbídiñejabubaña lun Búngiu joun sándu, joun máfianu jadágaragüda, máma lun Búngiu, áni mabúseerúntina lun lídan jumá ában jáma máfianu. ²¹ Siñáti játun lídaangiñe lícópun Wabúreme Jesucrístu úara lúma játun lídaangiñe jacópun máfianu. Siñáti gíñe jeígin luágu lidábulan Wabúreme Jesucrístu úara lúma jeígin luágu jadábulan máfianu. ²² ¿Ódi buséntün jeméendügüdüni Wabúreme láu jañúurun luágu jadábulan máfianu? ¿Jéretün funági lueí Búngiu lun manúfudebadün lan lueí ligáñi?

Lúnti jínsiñejabu jamá lánigu Crístu

²³ Inárüni le aríñawagúbei luágu gayára lan jadúgüni gürígia le jabúseerun, láu sun líra, máma sun cátei buíti láburujan. Gayáraati jadúgüni gürígia le jabúseerun, láu sun, máma lan sun cátei lun líderaguniña ámu gürígia lun jóúdin jabáruaguouñ lúma Crístu. ²⁴ Lúnti warítangun luágu le buídubei joun ámu gürígia, mámarügü lan wawóuguoun warítangun.

²⁵ Niján le lúnbei jadúgüni luágu úwi. Jóújuma lídaangiñe sun cátei le alúgura-jóubei mágidirugu, málgüdjajanga jugúya ánjein dágüdwawa lubéi joun sándu lúmoun madágarawagüdün lan, ²⁶ maríbadalá jarítangun luágu, gayáraati jeígini, lugúndun lání Wabúreme múa láu sun le lídaanbei.

²⁷ Ánjaün lamísuraja ában gürígia le maffñeti luágu Crístu lun jídin eíga lúma, gayáraati jídin ánjaün busén. Jóújumei le íchugúti jun, málgüdjajanga ni cáta, mebéresen jumá ánjein dágüdwawa lubéi eígini ligía joun sándu furúmiñe, lúmoun madágaragüdünwa lan.

²⁸ Ánjein aríñawagua jun luágu dágüdwawaali lan eígini ligía joun sándu, meíga jumeí, lueí jadúgün dáñu lun le aríñagubalin jun, lueí gíñe laríbadun larítangun. ²⁹ Nadímurejañatia luágu larítangun le ában, máma luágu barítangun.

Gayáraati jamúga funa laríñagun mútu. “¿Cásan uágu lúnti lubéi lafálaruni ában gürígia le larítangun ámu? ³⁰ Ánjein gayára lubéi níchugun eteíngiruni lun Búngiu luágu le neígíbei, ¿cábaga uágu jadímureja nuágu lueígiñe neígini?” ³¹ Ánjaün lubéiti eíga o áta o jadúgün furúmieguarügü cátei, adúga jumeí súngubei lídan ában luwúyeri le íchugubei inébesei lun Búngiu. ³² Míchiga jumá lébuna eíguaduni lun ni ában, ni joun juríu, ni joun ja mámabaña juríu, ni joun ja lánigu Búngiu. ³³ Áu, jóúchatina lun nagúndaaragüdúniña súngubei lídan sun cátei, máma rügúñein nuouguá narítagua, jarítaguatina gíñe jawágu jíbiri lun gayáraabei lan jayábin lun jaffñerun luágu Jesucrístu lun jasálbarun.

11

¹ Áyeija jumeí nigáburu queísi náyeijani ligáburu Crístu.

Wúríña lídan jóúndaragun affñetiña

² Nidújeñu, gúndaatina jáu luágu súnwandan lan jarítangun nuágu, lúma luágu falá jumani arífudajani le níchugubei jun. ³ Guetó, níjein ámu arífudajani le nabúseerubei lun gunfaráanda jumáni, luágu Crístu lan lichúgüdinabei cáda wügúri, wügúri tichúgüdüna lúmari, ítara quei Búngiu lan lichúgüdinabei Crístu. ⁴ Nibúsigarídünati lun ladáuragun ában wügúri láu lálbulugu dan le layúmuragun lun Búngiu, eteíngirei lídan jadámurin affñetiña, o dan lan le laríñagun ugánu le ladímurejan Búngiu liyúmulugugiñe wügúri ligía, ladúga

láu líra, larúfuduñein luágu njein lan ában wügúri weírigutimaati lanúgüni lueí lídan adámurini ligía, áni Crístu rügúñein weírigu jádan sun wügúriña. ⁵ Nibúsigarídünati gñe lun madáuragun tan wúri láu tábulugu dan le tayúmuragun lun Búngiu, eteingirei lídan jadámurin afñetiña, o dan lan le ladímurejan Búngiu tiyúmulugugiñe, ladúga láu líra tarúfuduñein tamájarun lun tanúgüni wügúri weírigu sügú táu, wuríbati líra, queísigubeirügü jamúga lasarún tídburi queísi wügúri. ⁶ Ánjoun madáuragun ában wúri láu tábulugu, buftimaati lun tásaruni sun tídburi, áni ánjein busíganudúna lubeí tñbuguni wúri tídburi o tásaruni lan tábulugu, darúguatá láu tábulugu. ⁷ Mouñ lumuti ladáuragun wügúri láu lábulugu lídan jadámurin afñetiña lugúndun liyáwa Búngiu ligía, áni arúfuda lumúti luweírigun Búngiu. Ánjounti wúri, arúfuda tumúti luweírigun wügúri, ⁸ lugúndun dan le ladúgünbalin Búngiu wügúri, máma tídaangiñe wúri ladúgei, wúri ladúgúboun lídaangiñe wügúri. ⁹ Adúga lumútu Búngiu wúri lun wügúri, máma wügúri tun wúri. ¹⁰ Ligía lúnti lubeí tadáuragun wúri láu tábulugu lídan jadámurin afñetiña queísi liseíni deréguadaguaü lábugiñe lagúmadijan wügúri, lúma lun jagúndaarun ánjeligu láu tagúfurumadun. ¹¹ Láu sun líra, lídan wabágari queísi afñetiña, mégei lumútu wügúri wúri, mégei tumúti gñe wúri wügúri. ¹² Queísi inárüni lubeí luágu lídaangiñe lan wügúri tadúgúwa wúri, ítara líña gñe inárüni lan luágu wúri lan íchugubalin wügúri uboúagu, áni sun cátei lúmagiñe Búngiu liábin.

¹³ Ítara líña lubeíti, samína jumá júngua ánjein buídu lubeí lun tayúmuragun wúri lun Búngiu lídan adámurini madáuragunga láu tábulugu. ¹⁴ Jéchutiwa wagía gürgía lun waríttagun luágu busíganu lan lun migínagu lan lídburi wügúri. ¹⁵ Ánjoun wúri, ában uwéndeni tun lun migínagu lan tídburi, ligía líchugúnbei ídburi migínaguti tun lun tadáuragun láu tábulugu. ¹⁶ Ánjein njein lubeí busénti lasígenejan luágu cátei le, lúnti lasúbudiruni luágu ni lan wagía, ni já buri jíbiri tñlana liligilisin Búngiu masúbudiruntiwa ámu igáburi lueí líra.

Luríban jagáburi afñetiña dan le jeígin luágu lidábulan Wabúreme Jesucrístu

¹⁷ Nabúrúja jun guetó luágu ában cátei le siñábei nariñagun luágu buídu lan jadúgüni, lugúndun genége lumúti luágu adúga lán buri jóundaragun dáñu jun lubáragiñe jamúga ladúgün bufti. ¹⁸ Furúmiñeti cátei, aríñawagúati nun luágu dan lan le jóundaragun, njein lan fánreinguaü jídan, áni afñetina luágu njein lan inárüni lídan le aríñawagúbei. ¹⁹ ¡Fágua lúnti ñi lan fánreinguaü jídan lun lasúbudirúniwa cátaña lan afñetiñabaña ja tímatimaatiña! ²⁰ Láu buri fánreinguaü le, dan le jóundaragun lun jeígin luágu lidábulan Wabúreme Jesucrístu, siñáti jeígin láu ában igáburi le íchugubei inébesei lun, ²¹ lugúndun dan le lachúlürün óra lun jeígin, meígintún nege lídan ában. Lubáragiñe líra, cáda ában, ába louífudajan eígei eígini le lanúgúbei. Ja siñábei janúgün gñbeti, ába jeréderun láu jaláma. Jayábiti jídaangiñe, ába játun sarágu darí lun jabácharuadun. ²² ¿Mábantün funági lun jeígin lúma lun játun ñi? Láu igáburi le, barú jumutiña tñlana liligilisin Búngiu quei ni cáta, rújumaña ja úabei ni cáta jáma lídoun busíganu. ¿Cábagi nariñaga jun luágu líra? ¿Lúnti nagúndaarun jáu? ¿Luágu líra siñáti!

Adíneruni le arítaguagülei luágu louñwen Wabúreme

²³ Lúmagiñe guánarügü Wabúreme Jesucrístu nerésibirei igáburi le warítaguagüle luágu louñwen, lé meja níchugubei jun. Queísi le nubeíbei jun, luágu le lan áriebu le lalúgurúnbei Wabúreme, ába lanúgünun fein lújaburugu, ²⁴ lásun líchugun eteingiruni lun Búngiu tuágu, ába lagúbachagunun lun lafánreinragunun jádan lánigu, ába laríñagun. “Joujúma, núgubu le, le nedéregerubei luágu jufúleisein. Adúga meme jumeí cátei le, jarítaguagüleme nuágu.” ²⁵ Ítara gñe, lásun jeígin, ába lanúgüni cópu táu diweín lújaburugu, ába laríñagun. “Cópu le táu diweín to, liseíni iséri lidáradun Búngiu

júma, le achoúrurúabei láu níta le lúnbei láwiwurun lídaangiñe nógubu juágu. Ságüme játuni, adúga jumeí lun jarítangun nuágun.”²⁶ Ítara líña lubeíti, daríme le lagribudun Wabúreme uboúagun, ságüme jeígin fein, gurá jugúya diweín to jarítaguagüle luágu Jesúsú, jarífuduñein luágu to lounwen Jesúsú wawágu.

Ligáburi leigín eíginí le arítaguagülei luágu Jesúsú

²⁷ Furúmieguarügü le eígitu fein tugúya, guráloun diweín to láni Wabúreme Jesucristu lídan ában igáburi le míchuti inébesei lun Búngiu, ladúgüña figou ladúga líchugüña lan minébesei lun lógubu Wabúreme lúma líta. ²⁸ Ítara líña lubeíti, cáda ában lúnti lasúbudiragun lúngua buídu ánjein jarúma tubeí lanígi lubáragiñe lerésibirun. ²⁹ Lugúndun ánjein erésibira marítagunga luágu laníchigu lánina lógubu Wabúreme, labeíchubei Búngiu. ³⁰ Ligía añájein lubeí sarágu jídaangiñe, sánditiña, débilitiña, jilágu jíbiri. ³¹ Ánjawa jamúga asúbudiragua wóungua buídu lubáragiñe werésibirun, mabeíchun lumútiwa jamúga Wabúreme ítara. ³² Dan le labeíchuniwa Wabúreme, ladúgüñein líra lun wasúbudiragun wóungua, gayára lámuga wasáansiraguni wagáburi lueí weféridirunme úara jáma lirájüñü uboú.

³³ Ítara líña lubeíti nidújeñu, dan le jóundaragun lun jerésibirun, agúrabagua jumá júngua. ³⁴ Ja lamátiña, jóújama jábiñe, mabeíchun lámugaña Búngiu luágu luríban ligáburi jóundaragun. Lé buri líbiri cátei naráanserubei dánme le nídin arjájun.

12

Ubáfu buri le líchugubei Sífiri Sándu lun cáda afñeti

¹ Nidújeñu, níjein buri cátei nabúseerun lun jasúbudiruni luágu buri ubáfu le líchugubei Sífiri Sándu lun cáda afñeti luágu Jesucristu.

² Subúdi jumúti buídu luágu dan lán meja le mámagidün lánigu Crístu, ádajoútün meja lun jeíbugun járigi sándu ja mariñagadibaña. ³ Ligía nabúseerunbei naríñagun jun guetó lun gayára lan jasúbudiruni ánjein lubáfu lubeí Sífiri Sándu ádajabalín ában gürígia lun ladímurejan lúmoun lubáfu lan espíritu wuríbati. Siñáti ládajani Sífiri Sándu ában gürígia lun lanábaguni Jesúsú láu laríñagun luágu máma lan Liraú Búngiu, espíritu wuríbati ádajabalín lun ladúgüni líra. Áni láu rügüñein lubáfu Sífiri Sándu gayára lan laríñagun ában gürígia luágu Jesúsú lan Wabúremebei.

⁴ Níjein sarágu luwúyerigu ubáfu le gayáraati lerésibiruni gürígia le afñebei luágu Jesucristu, áni ában méme Sífiri Sándu íchugubalin. ⁵ Níjein sarágu luwúyeri ligáburi esériwiduni lun Wabúreme Jesucristu láu ubáfu buri le líchugubei Sífiri Sándu woun, áni lun méme ában Abúremein wesériwida. ⁶ Lídan gíñe sarágu luwúyeri wayúsurei ubáfu buri le rúaalibeí woun, áni ában méme Búngiu le íderagubaliwa lun wayúsuruni ubáfu ligía. ⁷ Arúfudaguati Sífiri Sándu lúngua wádaangiñe láu ubáfu le líchugubei woun, lun gayára lan wíderaguniña jíbiri afñetiña. ⁸ Añájein jíbiri, rúti Sífiri Sándu ubáfu joun lun gayára lan jadímurejan láu lichú áu, añájein úntiña líchiga ubáfu lun jadímurejan láu sarágu subúdi. ⁹ Jíbiri resíbítiña ában afñeni weíríti lúmagiñe méme Sífiri Sándu ligía, jíbiri resíbítiña ubáfu lun jareídaguagüdün sánditiña. ¹⁰ Añájein resíbítiña ubáfu lun jadúgün miláguru, jíbiri resíbítiña ubáfu lun ladímurejan Búngiu jayúmulugugiñe. Joun jíbiri, rúti ubáfu lun jasúbudiruni ánjein Sífiri Sándu lubeí ádajabalín ában gürígia lun ladímurejan o ámu lan luwúyeri espíritu, jíbiri íbjatiña ubáfu lun jadímurejan ámuñegueinarügü luwúyeri dimúrei lueí jerérun. Añájein íbjatiña ubáfu lúmagiñe Sífiri Sándu lun jafúnraanguagüdüni le aríñawagúbei lídan buri dimúrei teréncha ligía. ¹¹ Sún buri cátei le, ában méme Sífiri Sándu le ábanrügübei, ligía adúgubalin, le afánreinjabalín ámuñegueinarügü ubáfu ligía lun cáda gürígia queisi labúseerun.

Lánigu ában méme úgubu súnugubei

¹² Gíbeti umégeguni lídan wágubu, áni sun umégeguni ligía ában rügüñein úgubu ladúga. Ítara líña gíñe le únbei wagúara lógubu Crístu, cáda ában afñeti ában lídaangiñe

lumégegung lúgubu Crístu. ¹³ Sun wagía affñetiña—jurú, máma jurú, idámuni, máma idámuni, furúmieguarügü le wawúyeribe—láu wabásterun, ába ladúgüniwa Sífiri Sándu lun ában wamá jáma sun jíbiri affñetiña, áni sun wagía, resíbi wamúti méme Sífiri Sándu ligía.

¹⁴ Níchiga ában jémpulu jun luágu wágubu láu sun lumégegung lun jasúbudiruni luágu ítara wáña lan queísi lumégegung lúgubu Crístu. Wágubu, máma rügúñein ában umégeni luágu, gíbeti umégegung luágu. ¹⁵ Ánjein jamúga aríñaga ugúdi. “Máma nugúya líbiri úgubu lugúndun máma nan újabu”, máma luegíñe líra lun mámabei lan líbiri úgubu, ¹⁶ ánjein lan jamúga aríñaga arígei. “Máma nugúya líbiri úgubu lugúndun máma nan águu”, máma luegíñe líra lun mámabei lan líbiri úgubu. ¹⁷ Lun jamúga águu lan sun úgubu, ¿ída líña jamúgagi wagáambun? O lun jamúga arígeirugu lan sun úgubu, ¿ída líña jamúgagi wirímichun? ¹⁸ Rúlaali Búngiu cáda lumégegung úgubu le ñí lumuti labúseera. ¹⁹ Lun jamúga ában rügúñein lan umégeni luágu úgubu, moustarunti jamúga úgubu ligía. ²⁰ Láu sun gíbe lan lumégegung úgubu, ában rügúñein úgubu.

²¹ Siñáti laríñagun águu lun újabu. “Memégeirun numútibu”, siñáti gíñe laríñagun ichúgü lun ugúdi. “Memégeirun numútibu.” ²² Lubáragíñe líra, lé buri lumégegung úgubu le laganoúnbei camá débiliti, ligíatima buri mégeiwabei, ²³ lé buri lumégegung úgubu le wanúgübei quei ni cáta, ligíatima wadáuraguagüdübei láu uwéndeni. Le buríti líbiri lumégegung wágubu le arámudaguabei, ligíatima wóuserunbei láu goúnigi, ²⁴ le madúgünwabei lún buri líbiri lumégegung wágubu. Ítara líña laráanseruni Búngiu úgubu lun le lán buri líbiri umégegung le anúgübei quei ni cáta, ligíatima lan weírigu, ²⁵ lun níjein lan ában úarani luágu úgubu lídan le luwádigimaridun sun umégegung lídan ában, láu ában toúnigi jóuniwagua. ²⁶ Ánjein asúfurira ában lídaangíñe lumégegung úgubu, súfuriti gíñe buri le líbiri, ánjein gíñe oúserúa ában lídaangíñe buídu, ába lagúndaarun lé buri líbiri lídan ában.

²⁷ Ítara méme líña gíñe, lúgubu Crístu jugúya, cáda ában jídaangíñe, lumégegung úgubu ligía. ²⁸ Rújali Búngiu wadágimanu jun tídan lilígilisin lun juwádigimaridun luágu ában queísi luwádigimaridun lumégegung úgubu. Furúmiñetiña, apóstolugu líchuguniña Búngiu lun jesériwidun joun jíbiri affñetiña, jabíaman, profétagu, júruwan, arúfudajatiña luágu cátei lání Búngiu, lárígíñe, ja adáagubaña miláguru, lárígíñe, ja areídaguagüdübaña sánditiña, ja ídejabaña, ja láubaña gumádi, jáma ja íbjubaña ubáfu lun jadímurejan dimúrei buri le teréncha. ²⁹ ¿Apóstolugu funági súngebuei? ¿Profétagu funági súngebuei? ¿Arúfudajatiña súngebuei? ¿Ódi sun jagía adáaguatiña miláguru? ³⁰ ¿Gabáfutiña súngebuei lun jareídaguagüdü sánditiña? ¿Adímurejatiña súngebuei dimúrei buri teréncha? ¿Gayára jamúti súngebuei míni lán buri dimúrei ligía aríñaga? Uá. ³¹ Buíti lubeíti lun jáfaagun lun jibíjini lubuídun-ágei buri ubáfu lúmágiñe Búngiu, áni níjein ában cátei lun jáfaagun lun jibíjini, buítimaati sùgú láu sún buri ubáfu ligía, ínsiñeni cátei ligía, narúfudaja jun luágu.

13

Ínsiñeni

¹ Ánjawa jamúga gabáfu lun wadímurejani sun luwúyeri dimúrei le adímurejóubei uboúagu lúma sun luwúyeri dimúrei le jadímurejabei ánjeligu, áni mínsiñejabutiwa, málati jamúga wadímurejan. Ítara wáña jamúga quei ában garanwoun le adaúnjati, o quei lan ában ásedu le arefínchuti. ² Ánjein jamúga gayára ladímurejan Búngiu wayúmulugugíñe, subúdi wamef sún buri lujúlilin-ágei inárúni arámudaguati áni níjein sun luwúyeri subúdi wáma, áni weíri ligía wafíñen darí jamúga lun gayára lan wagídaruni ában wúbü lídaangíñe lubára láu affñeni ligía, sun líra áni mínsiñejabutiwa, ni cáta wagía. ³ Ánjein wíchiga sun le wámabei murúsun murúsun joun gudémetiña darí lagúmuchun, madúgünga wamef láu ínsiñejabuni, mesériwinti woun lun ni cáta. Lun jamúga weíri lan

wesériwidun lun Búngiu darí lun wágudúniwa jilágubei luágu, mesériwidunga wagía láu ínsiñejabuni, maláti gñe woun.

⁴ Le jínsiñejabúbei gagúraasunti, areídati, áni magímugati, mapántati, manáan-gun ligía lúngua. ⁵ Manáriméguti, máma rügúñein luóguá laritagua, magáñidunti, máguuyugüdünti wuríbani luágu wuríbani. ⁶ Magúndaarunti láu jafígoun ámu, lagúndaarun dan le janúgün gürígia ában úma le richábei. ⁷ Awánda lumúti sun cátei, affñeti buídu jawágu súngebui, affñeti luágu gayára lan leménigidun jawágun gürígia lun jarúfuduni lubuídun jagáburi, úati ni cáta lun gayára lan lagídaruni línsiñejabu.

⁸ Lachúlürüba dan, dánme le lagíribudun Jesucrístu ubouágun, lun madímurejan lánme Búngiu jayúmulugugiñe gürígia, madímurejoún ligíame dimúrei buri teréncha, memégeirunwalime gñe subúdi. Ánjeinti ínsiñeni, leréderuba lun sun dan. ⁹ Guetó, murúsun rügúñein wasúbudirun, murúsun rügúñein gñe wafúraanguagüdüni dimúrei le ladímurejabei Búngiu wayúmulugugiñe. ¹⁰ Ánjeinti dánme le lagíribudun Jesucrístu, wasúbudirubei sun cátei le gumúti. Murúsun ubáfu le wabíjibe guetó, memégeirunwabei, lagúmuchaguba.

¹¹ Dán meja le irájüñgüdiwa, queí meja irájüñü wadímureja, queí meja irájüñü wasámí-nara, queí gñe meja irájüñü waritagua, ánjeinti dan le wügüríñajadiwa, ába wígiruni le jáni irájüñü. ¹² Guetó, louguati wasúbudirun luágu Búngiu lúma luágu luwádígimari, waríjini camá buri cátei le maríjinti buídu tídan ában isúbusein. Lachúlürüba wéyu lun waríjini Búngiu furáangu. Guetó, louguati wasúbudiruni buri cátei, wasúbudirubei Búngiu le gumúti lídanme wéyu ligía queísi lasúbudiruníwa Búngiu guetó. ¹³ Affñeni, eménigini lúma ínsiñeni ladáuraruba lun sun dan, áni ínsiñeni, weiritimaabei lídaangiñe úrúwagubei.

14

Ladímurejoún dimúrei teréncha

¹ Ítara líña lubeíti, lubáragiñe sun cátei, áfaagua jumá lun jínsiñejabu jumá, ayúmaja jumá gñe lun líchugun Búngiu ubáfu le líchugubei joun affñetiña lídaangiñe Sífiri Sándu jun, létima ubáfu lánina ladímurejan Búngiu jayúmulugugiñe gürígia. ² Buítimaati lun jáluajan ladímurejan Búngiu jiyúmulugugiñe sügü láu jáluajan jadímurejan dimúrei teréncha, lugúndun gürígia le adímurejati dimúrei buri teréncha, lun Búngiu ladímureja máma joun gürígia, lugúndun Búngiu rügúñein asúbudirei líla dimúrei le ladímurejabei. Le laríñagubei, lídaangiñe Sífiri Sándu laríñagei, ánjeinti laníchigu, arámudaguati luef jasúbudin gürígia. ³ Ánjeinti le iyúmulugugiñebei ladímureja Búngiu, adímurejati láu jerérun ja agáambubalin lun lawáanseragüdüniña lídan cátei lánina Búngiu, lun líchugun dúgüdaguatü joun lúma gurásu. ⁴ Le adímurejati dimúrei teréncha, lúngua rügúñein líderagua lídan lefbugun lúma Búngiu, ánjeinti le iyúmulugugiñebei ladímureja Búngiu, awáansgüda lumútiña lánigu Búngiu lídan jefbugun lúma.

⁵ Buséntina jamúga lun gabáfu jumá sun jugúya lun jadímurejan dimúrei teréncha, laú sun, buséntimaatina jamúga lun gayára lan ladímurejan Búngiu jiyúmulugugiñe, lugúndun buítimaati líra sügü láu ladímurejoún dimúrei teréncha, ánjein gubeírügü aríñawagua ca lan míni lan le aríñawagúbei lídan dimúrei ligía lun gayára lan jawáanserun tífana ligíflisi lídan jefbugun lúma Búngiu. ⁶ Ligía lubeíti nidújeñu, ánjana nñúdin bisídaün, ábame nadímurejan jun láu dimúrei teréncha, mesériwinbei líra jun lun ni cáta, ánjana gubeírügü gñe adímureja jun lídan werérun luágu cátei le lasúbudiragüdüñ Búngiu woun, o nichugun lan ában subúdi luáguti inárüni jun, o ában lan arúfudajani, o ladímurejan lan Búngiu jun niyúmulugugiñe.

⁷ Rúwamei jálagu áfarutiña queí ában jémpulu. Ílagu buri ligía, mabágariti, queí buri fídu, gidára, ánjein wásiñera asúbudira furáangu ca lan nóta afarúbei, ibidíñebei woun ca lan urému le wagáambajabei. ⁸ Ánjein mínwirun fídu ában ínwiruni furáangu

wuríburugu, úabei ni ában aráanseruti lun lídin ageíndagua. ⁹ Ligía méme gíñe asúsere-dubei wáma. ánjawa maríñagun dimúrei le gayáraati gunfaráandawa lan, ¿ida lubági lasúbudirúniwa ca lan waríñagubei? ¿Wadímurejaña lun garábalí! ¹⁰ Gíbeti luwúyerigu dimúrei ubouágu, áni sún buri dimúrei ligía richátí joun ja gunfaráandabalin, ¹¹ ánjein úa lubeí gunfaráanda náni dimúrei le áubei ladímurejóua nun, terénchabadina lun gürígia le adímurejabei nun, áni terénchabei gíñe gürígia ligía nun. ¹² Ligía, quei weíri lubeí jayúmajan lun jibíjin lídaangiñe ubáfu le líchugubei Sífiri Sándu joun affíñetiña, áfaagua jumá jibíjini ubáfu buri le gayáraabei lawáanseragüdúniña tílana ligílisi.

¹³ Gürígia lubeíti le adímurejati dimúrei teréncha, lúnti lamúriajan lúma Búngiu lun líchugun ubáfu lun lun lafúnraanguagüdúni le laríñagubei lídan dimúrei ligía. ¹⁴ Ánjana ayúmuragua lun Búngiu láu dimúrei teréncha, inárúni luágu nayúmuraguña lan láu náni espíritu, líla le naríñagubei, ibídiñeti nun. ¹⁵ ¿Cáteiti lúnbei wadúgüni? Lídan adamurini gayáraati wayúmuragun láu dimúrei teréncha, lúnti gíñe wayúmuragun láu dimúrei le gunfaráandawati. Gayáraati werémujan láu dimúrei teréncha, lúnti gíñe werémujan láu dimúrei gunfaráandawati. ¹⁶ Ánjein badímurejaña lubeí lun Búngiu luágu luweírigan láu dimúrei teréncha, gürígia únabugutiña ja agáambubalibu siñábei júaradun búma, lugúndun úati gunfaráanda jamáni le baríñagubei. ¹⁷ Gayáraati ában lan eteíngiruni buíti le bíchugubei lun Búngiu láu dimúrei teréncha, míderagun lumútiña jíbiri gürígia láu líra. ¹⁸ Teínqui numúti Búngiu luágu gayára lan nadímurejan dimúrei teréncha sügú jáu sun jugúya, ¹⁹ áni jímein numúti naríñagun seíngü dimúrei le gunfaráandawati lídan jóundaragun tílana ligílisi, lun gayára lan jafúnrendeirun númagiñe, lubáragiñe naríñagun díisi-mílu dimúrei teréncha le úati gunfaráanda láni ni ában.

²⁰ Nidújeñu, masáminara jumá quei irájúñü luágu buri cátei le. Ítara jumá quei irájúñü lún buri cátei le wuríbati, ítara jugúyame queísi weínamujaña lídan ligáburí jasáminarun. ²¹ Laríñajare tídan líliburun lúru. “Nadímurejaba joun lílana fulásu le lídan ámu luwúyeri dimúrei, lúma jayúmulugugiñe teréncha, ni ítara, mebéresenbaña náu, líña laríñagun Jabúreme Búngiu.” ²² Ubáfu lubeíti lun ladímurejóuniwa ámuñegueinarügü dimúrei, seríwiti líseínime lubáfu Búngiu joun ja maffínebaña, máma joun ja affínebaña. Ánjeinti ubáfu lun ladímurejan Búngiu jayúmulugugiñe gürígia, seríwiti líseínime lubáfu Búngiu joun affíñetiña luágu Jesucristu, máma joun ja maffínebaña. ²³ Dan lubeíti le oúndaragua jamá sun tílana ligílisi, ánjein jadímurejaña lubeí sun jugúya dimúrei teréncha, ába jebélurun maffíñetiña jánwoun, o gürígia lan ja íbídiñegilibei luágu ubáfu le joun, ¿ma jaríñaguba luágu lúlújali lan jáu? ²⁴ Ánjein ladímurejaña lubeí Búngiu jiyúmulugugiñe, ába lebélorun ában le maffíñeti, ladáriraguba lúngua luágu gafígoun lan dánme le lagáambuni le jaríñagubei. ²⁵ Ítara lúba lafúnraanguadun cátei arámudaguati le tídaanbei lanígi, ábame lájuduragun íchiga inébesei lun Búngiu, aríñaga ligíame luágu níjein lan Búngiu júma le tímatimaati.

Adúga jumeí sun cátei lídan lubúdubu

²⁶ Nidújeñu, níjan lubeíti igáburí le lúnbei jóuseruni lídan jidámurin. Dan le jóundaragun lun jájuduragun lun Búngiu, añájeinbaña jídaangiñe láu urému o arúfudajani, o cátei le lasúbudiragüdün Búngiu jun, o adímurejani lídan dimúrei teréncha, o lafúnraanguagüdúniwa adímurejani ligía, sun líra adúga jumeí lun méme jawáanserun tílana ligílisi lídan cátei le luáguti Búngiu. ²⁷ Dan le ladímurejóun lídan dimúrei teréncha, bíamarügü jamá gürígia adímureja, o úrtüwa, áni ában ábanlá gíñe jadímurejan, lúnti gíñe níjein lan ában lun lafúnraanguagüdúni le jaríñagubei. ²⁸ Ánjein úa lubeí ni ában le gayára lumúti afúnraanguagüda, buítimaati lun madímurejóun lan lídan dimúrei teréncha lídan adamurini, ladímureja cáda ában lúmagua lúma lun Búngiu. ²⁹ Ánjein gíñe luáguti lubeí ladímurejan Búngiu jayúmulugugiñe gürígia, bíamarügü o úrtüwa jamá gürígia adímureja, ja jíbiri lun jaríjin ánjein lúmagiñeti lubeí Búngiu le aríñawagúbei lúmoun máma lan lúmagiñeti. ³⁰ Ánjein asúbudiragüda Búngiu ában cátei lun ámu gürígia le

ñun umúti lun líchuguni lun guríriguaü, lúnti lámánichun le adímurejabei lun líchugun dan lun, lun ladímurejan. ³¹ Ítara, sun jugúya le iyúmulugugiñebei ladímureja Búngiu, gayáraabei jadímurejan ában ában lun jafúrendeirun súnqubei, ragú jugúyame gurásu. ³² Ja iyúmulugugiñebaña ladímureja Búngiu, lúnti jágüdaagun jóungua darí lachúlürün jadáani lun jadímurejan, ³³ lugúndun Búngiu le íchugubalin ugánu ligía joun, lánina darángilaü, máma lánina chagáguai.

Queísi jagáburi jíbiri wadújeñu lídan wafñen dan le jadámuridagun, ³⁴ moún lumuti jadímurejan wúrñna lídan jadámurin afñetiña lugúndun majoúati lun cátei le. Lúnti gagáambadi jamá queísi laríñaguni lilúrudun Búngiu. ³⁵ Ánjein busén jabei jasúbudirun ában cátei, álügüda jameí jámari jábiñe, lugúndun mabuídunti laríajóun lun tadímurejan ában wúri lídan jadámurin afñetiña.

³⁶ Ánjaün magúnda láu nerérun, lúnti jasúbudiruni luágu máma lan júma lagúmesera Lerérun Búngiu, áni mámarügügidün gíñe jugúya erésibirei. ³⁷ Le jarítaguabei luágu gabáfu lan lun ladímurejan Búngiu liyúmulugugiñe, o jarítagua lan luágu ru lan Sífiri Sándu ámu ubáfu lun, lúnti lasúbudiruni luágu ában lan lugúmadin Wabúreme Jesucrístu cátei le nabúrrijabei jun. ³⁸ Ánjein manügún lan ítara, reideilá lídan libídiouniga láu.

³⁹ Ítara líña lubeíti nidújeñu, áfaagua jumá lun gayára lan ladímurejan Búngiu jiyúmulugugiñe, mamájara jumá lun ladímurejóun lídan dimúrei teréncha, ⁴⁰ adúgarüga jumeí sun cátei lídan lubúdubu.

15

Lásaarun Crístu lídaangiñe óuweni

¹ Guetóti nidújeñu, buséntina lun jarítagun luágu ugánu lé meja apúrichija náalibei jun luágu Jesucrístu le Wasálbaragüle. Niján ugánu ligía le jerésibirubei, le gíñe idaanbei derégüdagun lan jafñen. ² Sálbatün gíñe lun sun dan ladúga jafñen luágu ugánu le, ánjein jafálara le uágubei napúrichija jun, ánjein gíñe láu lubeí jinárün jafñera.

³ Furúmiñeti cátei, arúfudaja náali le furéndeí náalibei luágu Wasálbaragüle jun, luágu jilá lan Crístu luágu wafígoun, queísi taríñaguni Lerérun Búngiu luágu lúnti lan lasúseredun. ⁴ Lárigiñe meja loúnwen, ába labunún, ába lásaarun lídaangiñe óuweni luágu lúruwan wéyu queísi taríñaguni Lerérun Búngiu luágu le lúnbei lasúseredun. ⁵ Ligía larúfudagun lúngua lun Pédro, lárigiñe, ába larúfudagun lúngua joun jíbiri apóstolugu.

⁶ Lárigiñe, ába larúfudagun lúngua joun sügú jáu seíngü-san afñetiña ja óundarañubaña lídan ában, áni añájeingua sarágu jádaangiñe, wínwangiña chúlú lumoun dán le, ja jíbiri, jilágu. ⁷ Lárigiñe, ában larúfudagun lúngua lun Jacóbo, lárigiñe, joun sun apóstolugu.

⁸ Agúmujóuni, jarigiñe súnqubei, ába gíñe larúfudagun lúngua nun, láu sun ítara níña lan quei ában le agúriajóuti lídan ában igáburi le múraanti, ⁹ lugúndun áu lan ni cátatimáabei jádan apóstolugu, madúnatina ni lun nanügún quei apóstolu, lugúndun ebaaja numútiña méja tílana lílglisin Búngiu. ¹⁰ Áu le áubei guetó lugúndun lareídun Búngiu nun, áni merédeti larefíni nun maságarunga ni cáta buiti nídaangiñe, lubáragiñe líra, ñadágimeinjaadina sügú jáu jíbiri apóstolugu, láu sun máma lan áu ñadágimeinbei, Búngiu le nómabei láu larefíni, ligía ñadágimeinbei nídaangiñe. ¹¹ Mebéresentina ca lántima ñadágimeinjaabaña, jagía lan o áu lan, niján ugánu le wapúrichijabei luágu lásaarun Crístu lídaangiñe óuweni, áni niján gíñe uágubei jafñera.

Lásaarun jiláña lídaangiñe óuweni

¹² Queísi wapúrichijan luágu saráali lan Jesucrístu lídaangiñe óuweni, ába jerésibiruni, ¿ída líñati añájein lubeí jídaangiñe aríñagatiña luágu másaarun jamá jíbiri jiláña?

¹³ Ánjein másaarun jabeí jíbiri jiláña, másaarunti lubeí gíñe Crístu lídaangiñe óuweni,

¹⁴ áni ánjeinti másaarun lubeí Crístu lídaangiñe óuweni, málati ugánu le wapúrichijabei luágu asálbaruni, málati gíñe afñeni le juágubei. ¹⁵ Ánjein ítara líña lubeí, waríñaguña iyéeni luágu Búngiu, lugúndun aríñagaadiwa lan luágu sarágüda láani Búngiu Crístu

lídaangiñe ouweni, ánjein máma lubéi inárüni luágu sará jamá jiláaña, máma gñe inárüni luágu sarágüda láani Búngiu Crístu lídaangiñe ouweni.¹⁶ Lugúndun ánjein másaarun jabeí jiláaña, ni Crístu, másaarunti gñe lídaangiñe ouweni,¹⁷ áni ánjeinti jiláñugili lubéi Crístu, mesériwinti jaffñen lun ni cáta, lídaangidün jiffgoun ligbugiñe Búngiu.¹⁸ Áni ánjein ítara líña lubéi, féridiñu jáña gñe ja ouwegubaña láu jaffñen luágu Crístu.¹⁹ ¡Ánjein lúntirügü lubéi ibágarí le weménigi luágu Crístu, fugiábu wagía jádaangiñe súngubei!

²⁰Le inárünitibi, saráti Crístu lídaangiñe ouweni lúnya labágaridun, ligía furúmiñetibi ásaaruti lídaangiñe ouweni lun moúnwendügúyaali lan, áni ítara lúba jásaarun sun lánigu.

²¹Ítara quei lídaangiñe lan ában wügúri lagúmesera ouweni ubouágu, lídaangiñe gñe ában wügúri lagúmesera jásaarun jiláaña.²² Ítara quei jówegun súngubei ladúga lídaangiñe lan Adán jayábin, ítara lubá gñe gabágaríya jamá súngubei lárigiñe ouweni ladúga lánigu jamá Crístu.²³ Lúnti lásaarun cáda ában lídan lidáani. furúmiñeti meja ásaaruti, Crístu, lárigiñeme, dánme le lagiribudun Crístu ubouágun, ligíame jásaarun lánigu lídaangiñe ouweni.²⁴ Ligíabati líabín lagúmuhagüle sun cátei, ábame lagúnrinchaguni Crístu sun líbiri luwúyeri arúejiani, ubáfu, lúma érei le ubouágubei, ábame ledéregeruni arúejiani lun Búngiu Úguchili.²⁵ Larúejíba Crístu daríme gáñeigüda láali Búngiu wuríbu lun jawágu sun láganiñu,²⁶ ouweni, ligíaba lagúmujoún ágani agúnrinchawagúti.²⁷ Rúlaali Búngiu sun cátei lábugiñoun lubáfu Crístu, dan le taríñagun Lerérun Búngiu luágu rúa lan sun cátei lábugiñoun lubáfu, subúdiwati luágu úa lan Búngiu lábugiñe lubáfu, lugúndun Búngiu íchugubalin sun cátei lábu lubáfu Crístu.²⁸ Dánmeti le reideijali sun sun cátei lábugiñe lubáfu Crístu, ábame leréderun Crístu, le Liraú Búngiu, lábugiñe lubáfu Búngiu, le íchugubalin sun cátei lábugiñoun lubáfu Crístu. Búngiurügüba urúei, le Súnti Gabáfu.

²⁹Añájein jídaangiñe, abásterutiña jewéñegua ja ouwetiña mabásterunga. ¿Cámegi jadúgei lira? Ánjein másaarun jabeí jiláaña, ¿cámegi ju lan jabásterun jewéñegua?

³⁰Ánjein siñá jásaarun jiláaña, málati wapúrichijan súnwandan lúnrügü weíbaajoún lueígiñe.³¹ Ságu wéyu yaráfa wamá lun woúnwen, inárüni líra nidújeñu, queísi ugúndani le nasándirubei juágu queísi affñetiña luágu Wabúreme Jesucrístu.³² Ageíndaguatiña wügúriña ja ítaraña quei anímaalugu janárimetiña ya Éfeso núma, ladúga mínsiñe lan cátei le napúrichijabei joun, ¿cági nagáñeirubei láu líra? Ánjein jamúga inárüni lubéi luágu úabei lan ibágarí lárigiñe ouweni, richátiña jamúga ja aríñagubaña. “Jouwama, guráwama, lugúndun jarúga woúwegua.”

³³Mayeedúa jumá. Aríñawagúati. “Féridigüda jamúti jagúbüri umádagu lubuídun igáburí.” Inárüni líra.³⁴ Darígua jumá júngua, giríbu jumá lun ában ibágarí le surúti, mafígouja jumá. Añájein jídaangiñe, ibídiñeti Búngiu joun. Naríñaguñein le lun janúgün busiganu.

Ída lúba ligáburí jásaarun jiláaña

³⁵Fágua níjeinbei álügüdjati. “¿Ída lúbasan ligáburí jásaarun jiláaña? ¿Cábasan luwúyeri úgubu jawágu?”³⁶ Libídioniga láu álügüdjani líra. Dan le labunún ában ílaü, gásu lañáladun lábugiñe múa furúmiñe lubá gayára lan labouçhun.³⁷ Máma nádü le lúnbei lájüchün abunúbei, flaü abunúbei, furúmieguárügü le luwúyeribeí.³⁸ Lárigiñe labunúniwa, jilá ligía, ába líchuguni Búngiu úgubu le labúseerubei luágu ílaü ligía, ába líchuguni úgubu le lúnbei cáda ílaü.³⁹ Máma ában lábu sun úgubu, ámu luwúyeri jágubu gürígía, ámu jágubu anímaalu, ámu jágubu dunúru, ámu jágubu úduraü.⁴⁰ Níjein gñe buri cátei siéluna queísi wéyu, játi, warúguma, queísigubeirügü níjein lan ubouáguna, ámu lubuídunmeraiü buri le siéluna lueí le ubouáguna.⁴¹ Ámu larúni wéyu lueí larúni játi, ámu gñe jarúni warúguma, áni jádaanguanarügü warúguma, ámuñegueinarügü jarúni jawáriuagua.⁴² Ítara líña gñe lídan jásaarun jiláaña, ámubei jágubu, labunúa ában úgubu le gañáladaditi, lásaarame le moúnwenjali.⁴³ Labunúa ában úgubu le mabuídunjali, lásaarame ában le buídumeraüti. Labunúa ában úgubu le débiliti, lásaarame ában le

jéreti. ⁴⁴ Labunúa ában úgubu le ídaanbei wabágarida ya ubouágu, lásaarame ában úgubu le ídaanbei wabágarida yágüta siélu. Ánjein ibíja wabei wágubu lánina ubouá, wibíjibeí gíñe wágubu lánina siélu.

⁴⁵ Ítara líña taríñagun Lerérun Búngiu. “Adán le furúmiñeti wügúri, ában meja wügúri wínwanti”, ánjeinti Crístu, le gíribei gíñe lagúmujouán Adán, ában espíritu ligía le íchugubei ibágari. ⁴⁶ Furúmiñe íbíja wamúti ibágari le ubouáguna, lárigiñe, ábame wibíjini ibágari le lánina siélu. ⁴⁷ Lé meja furúmiñeti wügúri le adügúbei láu múa, ubouáguna meja, libíaman wügúri le Wabúreme Jesucrístu, siélu. ⁴⁸ Sun gürígia ubouágu ítara líña jágubu quei lúgubu Adán le adügúbei láu múa, sun lánigu Crístu, jabíjuba jágubu quei lúgubu Crístu, le siélu. ⁴⁹ Wágubu guetó, líbe lúgubu Adán, le lánina ubouá, lachúlürüba wéyu lun wibíjin ámu luwúyeri úgubu líbe lúgubu Crístu, le lánina siélu.

⁵⁰ Le nariñagubei, nidújeñu, luágu siñá lan jebélurun gürígia láu jágubu le ubouáguna lídoun larúeijan Búngiu siélu, lugúndun cátei le gouwedadibeí siñáti gabára lan lídan fulásu le ní lubei úa lan ouweni. ⁵¹ Buséntina lun jasúbudiruni cátei lé meja arámudaguabei le. Máma sun lánigu Crístu lun jouweguba lan, jasáansirawagúba súngebuei, ánjein wínwangiña lubeí dánme lagíríbudun Jesúsú o jiláaña lan, ⁵² lídan murúsun óra, furése furése quei ában léfegechun luma lámurudun águu, dánme le lagaambúniwa lumálali fídu, le liseíni lagúmujouán sun cátei. Línwiruba fídu, ábame jásaarun lánigu Crístu ja jiláañabaña lun mouñwendügüyaaña lan, ja mouñwengiñabaña, ábame jasáansirawagún lídan méme óra ligía. ⁵³ Wágubu le wawágubei le gayáraabei lañáladun, lasáansiraguba lídoun ában luwúyeri le siñabei lañáladun, wágubu le gouwedadibeí, lasáansiraguba lídoun le mouwedadibeí. ⁵⁴ Dánme le sáansiguaali wágubu le gouwedadibeí lídoun le mouwedadibeí, ábamei lagúnfulirun le búrúwañubei tídan Lerérun Búngiu. “Gumúja lubáfu ouweni, féridilá wuríbu. ⁵⁵ Ouweni, ¿jigeígi bubáfu lun bagúmuchaguagüdüniwa? ¿jigeígi agáñeiruni lé nege lúnbei badügüni?” ⁵⁶ Figou lébunabei ouweni, áni binádu lílúrúdu Moisés, ligía aráfudubalin woun cátei lan figoubei lun wayúmajani. ⁵⁷ Teínqui waña lun Búngiu luágu lagáñeiragüdüniwa luágu sún buri cátei le, láu lubáfu Wabúreme Jesucrístu.

⁵⁸ Ligía lubefti nidújeñu jínsiñetiña nun, ítara méme jumá derégüdagü lídan jafíñen, meréderagunga, ñadágimein súnwandan, gánwoun gueñnarügü lídan luwádigimari Wabúreme, lugúndun subúdi jumúti luágu máma lan luágu ni cáta jadúgei wadágimanu le jadúgübei lídan ában luma Wabúreme Jesucrístu.

16

Loúndarún seínsu joun idújeñu lueígiñe Jesucrístu

¹ Luágu loúndarún seínsu joun wadújeñu lueígiñe Jesucrístu ja gudémebaña yágüta Jerusalén, adúga jumeí quei naráfudajani tídan sun liglísi loúbawagu Galácia. ² Ságü wéyu dimáasu, cáda ában jídaangiñe lúnti ladíreirun murúsun lídaangiñe le lagáñeirubei, ábame lareíduni lun dánme lan nachúlürün, merédedünme oundaragua seínsu. ³ Dánmeti le nachúlürün, nouñajabaña gürígia ja janúadajabaña ubúrugu Jerusalén, ábame níchugun gárada joun lun janügüni seínsu le joundarubei joun wadújeñu ja ñíbaña. ⁴ Ánjein gíñe lun lubeí nídin, jouídiba núma.

Laráansejan Páblo lubá luweíyasun

⁵ Lídan nuweíyasun, násügürüba loúbawagüñe Macedónia lun neréderun átiri wéyu ñi, nachúlürüba lubefti ubúrugu Corínto lárigiñe. ⁶ Fágua neréderagun júma átiri dan, o násügürüni lan sun juyáabun ñi, gayáraabeiti jíderagunina lídan nuweíyasun léme ñíjin lumúti nídin lárigiñe nebélujan júmoun. ⁷ Mabúseerúntina chúlúguarügü nan aríjaün, buséntina neréderagun átiri dan júma, ánjein busén Wabúreme. ⁸ Neréderuba ya ubúrugu Éfeso darí luwéyuri Pentecostés, ⁹ lugúndun níjein ában ouñwenbun cháansi nuágu lun

nadímurejan luágu Wabúreme Jesucrístu ya, áni buídubei lanúgün. Añájein gíñe gíbetiña gürígia mabúseerúntiña lun nuwádigimaridun luágu Wabúreme ya, ligía siñábei lubei nígiruni Éfeso guetó.

¹⁰ Dánme le lachúlürün Timotéo, jócha jumá lun gúnda lan jagánagua, lun úa lan sarágu samínaü luágu, lugúndun luwádigimariña luágu Wabúreme Jesucrístu queísi áu.

¹¹ Manúga jumeí quei ni cáta. Dánme le gumúlaali lidáni júma, jíderagueime lun gayára lan lagríbudun númoun láu ában ugúndani tídan lanígi luágu lubuídun lidáni júma. Nagúrabañein ya Éfeso jáu sun jíbiri wadújeñu lueígiñe Jesucrístu ja lúnbaña jayábin úara lúma.

¹² Ayúmuraguatina yebe lun Apólos lun lídin jáma jíbiri wadújeñu aríjaün, jénreenguti lídin guetó, lídiba dánme le gayára lan.

Lagúmujóun buri mábugaü

¹³ Ítara méme jumá agágudañu, toúnigiñu lueí cátei le jamúga gayáraabei ladíñurunün lueí lubuídun úma le gádaanbalün, derégüdagü jumá lídan jafíñen. Agáburida jumá quei wügúriña ja awáanserubaña lídan le inárünibeí, manúfudeiga, jére jumá, gáñei jumámuga luágu wuríbani. ¹⁴ Sun cátei le jadúgübeí, adúga jumeí láu ínsiñejabuni.

¹⁵ Nidújeñu, subúdi jumúti luágu Estéfanos lan jáma sun tílana lúban furúmiñebaña louábawagua Acáya ígirutiña binádu jagáburí lun jerésibiruni Crístu, luágu gíñe derégeguaaña lan jóungua lun jesériwidun joun wadújeñu lídan afíñeni lídan furúmieguaügü cátei le jayáraati. ¹⁶ Buséntina lubeíti lun gíñe jíchaagun júngua joun, lúma joun sun ja ídejabaña, ñadágimein jagía ítara. ¹⁷ Gúndaatina láu jayábin Estéfanos, Fortunáto, lúma Acáico ñájoun. Weíriñajati nisáminan juágu, áni siñáti jíabin sun jugúya, ¹⁸ ába jíchugun wügúriña jagía gurásu nun láu janúgün ugánu nun juágu. Afíñetina luágu janúgüba lan gíñe gurásu jámagiñe luágu jadímurejan jun nuágu. Lúnti jeteíngiruni Búngiu jawágu gürígia ítaraña.

¹⁹ Mábuga jáña tílana ligíli buri to louábawaguboun Ásia jun. Mábuga jáña gíñe Aquíla túma Priscíla jáma sun ja oúndaragubaña jábiñe jun, queísi afíñetiña luágu Crístu.

²⁰ Mábuga jáña sun idújeñu ja yábaña jun. Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

²¹ Áu Páblo, noúnajañein mábugaü le jun le nabúrújabei láu nújabu lúma nilétüan.

²² Le mínsiñejabuti lun Wabúreme Jesucrístu, reídeílá lábugiñe líñaragun Búngiu. ¡Giríbubá furése ubouágun, Wabúreme!

²³ Binílaüin Wabúreme Jesucrístu. ²⁴ Oúnaja numúti nínsiñejabu lídan Jesucrístu jun, sun jugúya. Ítaralá.

TIBÍAMAN LIGÁRADAN PÁBLO JOUN CORÍNTONA

Abúsuraguni

¹Áu Páblo, ában láni Jesucrístu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje luefiñe Jesucrístu, nabúrijañoun gárada to jun, jugúra le tñlanabei ligílisi to ubúruguboun Corínto, lúma joun sun lánigu Búngiu ja loúbawagubaña Acáya. ²Resibi jumá abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Lasúfurirun Páblo

³Úati quei Búngiu, le Lúguchibei Wabúreme Jesucrístu! Ligía Wáguchibei le gudéme-jabubei woun, aráanseñu líña lun líchugun gurásu woun furúmieguarügü óra. ⁴Rúti gurásu woun lídan sun wasúfurirun, lun gíñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwúyeri igáburi le líchugubei woun. ⁵Lugúndun ítara quei luwefirin wasúfurirun luágu líri Crístu, ítara gíñe weresibirun ában oúnwenbun gurásu lúmagiñe. ⁶Ligía lébubei wasúfurirun, lun gagúraasun jumá, sálba jugúyame, resíbitiwa gurásu lúmagiñe Búngiu lun gíñe gayára lan jerésibirun gurásu wámagiñe, subúdi jumeñe Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu. ⁷Derégúdati wafíñen juágu luágu jasígeramémeba lan derébuguñu lídan jafíñen, láu sun weíri lan jasúfurirun. Subúsi woun luágu láu sun lan jasúfurirun luágu líri Crístu queísi wasúfurirun, jerésibiruba lan gíñe gurásu lúmagiñe Búngiu queísigubeirügü weresibiruni.

⁸Nidújeñu, buséñtiwa lun jasúbudirun luágu sarágu lénreengúnga le wasúfurirubei loúbawagu Ásia. Deréti oúchawagúni ligía, darí yebe lun méreediwa lan lun wawánduni láu wáni wóungua. Jarítaguatiwa yebe luágu wóuweguba lán meja lubáragiñe wáfuridun nígiñe. ⁹Sandíguaaadiwa yebe wóungua queísi güriñia ja síadiwaaña lun jóunwen. Wel, lasúseredunbei líra lun wafúnrendeirun lídaangiñe lun weménigidun luágu Búngiu le gabáfubei lun lásaaragüdüniña jiláña, máma lun wawóungua lan weménigida. ¹⁰Séfu lumútiwa Búngiu dán buri meja ligía le yaráfa wabeí lun wóunwen, áni leséfuramémeñadiwa lídaangiñe lénreengúnga le gádaanbaliwa guetó, áni rúwamaali weménigi luágu, luágu leséfuramémebadiwa lan, ¹¹ánjawa jíderagua láu jayúmuragun lun Búngiu wawágu. Áni ánjaña ayúmuragua sarágu güriñia wawágu lun Búngiu, sarágubaña íchugutiña eteíngiruni lun Búngiu luágu fuleísei lániwa láu leséfuruníwa.

Ca lan uágu lasánsiraguei Páblo larítagun luágu luweiyasun ubúrugun Corínto

¹²Níjein ában cátei agúndaaragüdütiwa. laríñagun warítagun woun luágu gagáburi wamá ában igáburi jarúmati, furáangu, ya uboúagu, jagánaguatima. Íderagua láadiwa Búngiu láu lareíni lun buídu lan wagáburidun ítara, madúgüntiwa ni cátei láu lichú wáu guánarügü. ¹³Lídan le wabúriñanbei jun tídan wagáradan, úati ni cáta arámudaguati ñi le jásiñerun alíja o gunfaráanda. ¹⁴Guetó subúdirañjadün luágu gayára lan jagúndaaragun wáu quei jumáesturungu, chíulú lámuga wéyu lun gayáraabei lan jasándiragun júngua buídu buídu láu ugúndani wawágu, ítara quei wagía juágu lídaanne wéyu le lagribudagüle Jesucrístu uboúagun.

¹⁵Queísi méja afíñe nubeí luágu gúnda jumá wáu queísi láni Crístu apóstolugu jun, jarítaguatina yebe meja nídin aríjaün furúmiñe, lun nagúndaaragüdüñun láu bisída nánün bián wefyaasu— ¹⁶jarítagutiná yebe nachúlaagun aríjaün lídan nuweiyasun Macedónioun, dan jamúga le nagribudun Macedóniagiñe, ábaya jamúga nachúlaagun aríjaün. Ítara líña jamúga gayára lan jíderagunina lun nasígiruni nuweiyasun Judéoun. ¹⁷Madúgün numúti. ¿Ílálügüdaguñañan júngua ca lan ueíñe madúgün nubálin? ¿Masáminarun

numúti funásan quei lubúdubu dan lé meja naríñagubei jun luágu nadúgübeí lan cátei le? ¿Jarítaguatün luágu ítara níña lan queísi lirájüñü ubou ja aríñagubaña ában cátei áni magúnfuliruntiña láu jerérun? ¹⁸ Geféenti Búngiu luágu maríñagun wamá ában cátei jun magúnfulirunga wagía láu. ¹⁹ Sun wagía—Silváno, Timotéo, áu—apúrichijatiwa jun luágu Jesucrístu, le Liraú Búngiu. Áni mítaraanti Crístu quei güirgía ja aríñagubaña ában cátei áni magúnfuliruntiña láu jerérun, Crístu, súnwandan ladúgüni le laríñagubei. ²⁰ Gúñfuli lumúti Crístu sun lidáradun Búngiu jáma lánigu, woun. Ligía lébubei dan lan le lásurun wadímurejan lúma Búngiu luágu luweírigun, ayúmuragua wagía lun, ába waríñagun “ítaralá” lun warúfuduni wafíñerun luágu ladúgüwaba lan lídan líri Jesucrístu. ²¹ Búngiu adúgübeí lun derégüdagu wamá, wagía júma, lídan wafíñen luágu Jesucrístu, ligía anúadajabaliwa lun wesériwidun lun. ²² Rúlaali Sífiri Sándu wádoun lun larúfuduni luágu lánigu wamá. Sífiri Sándu le wádaanbei, ligía queísibeí lasúbudiraja le lúnbei werésibiruni queísi lánigu Búngiu. Queísi ítara líña lubeí, ¿gayáraati funásan ítara wamá queísi güirgía ja aríñagubaña ában cátei áni magúnfuliruntiña láu? Siñáti.

²³ Mídingidina Corínto aríjaün luágu nuweíyasun ñájoun Macedónioun quei yebe narítaguni lugúndunrügü mabúseerun nan nírudaguagüdüñün láu ában ébechuni, geféenti Búngiu luágu líra. Ánjein máma lubeí líña, aráansetina lun noúnabun láu nibágari guánarügü. ²⁴ Máma jamúgati wabúseeruña waríñagun jun. “Nijánba jafíñera”, derégüdaguadün lídan jafíñen, busénrügütiwa wíderagunün lúntima lagánwoundun jagúndaarun.

2

¹ Ligía mídinya nubeí bisídaün lun nírudaguagüdüñün. ² Lugúndun ¿ída lubásan gayára lan jamúga nagúndaarun larígíñe níchuguni íruni joun güirgía ja agúndaaraguagüdübalina? Siñáti jamúga. ³ Ligía nabúríjanbei jun ítara, lun gayára lan jaráanseruni cátei le mégeibeí jídaangua lubáragíñe nachúlürün júmoun, dánme lámuga nachúlürün, mibíjin námuga íruni júmágiñe, jugúya le lúnbei nibíjin ugúndani júmágiñe. Subúdi numúti luágu láu lan jamúga nasándirun ugúndani, jasándiruña lan jamúga gíñe ugúndani. ⁴ Dán meja le nabúríjanbarun gárada tugúya jun, weíríti meja nidjéri jagúgu darí lun nayájun lídan le nabúríjibarun. Máma meja lun nírudaguagüdüñün nabúríjoun jun ítara, nabúríjanun lun jasúbudiruni luweírin nínsíñejabu jun.

Ferúdon lun lé meja afígounjabei

⁵ Le rújalibeí íruni láu luríban leménerun, máma rügüñein nun líchiga íruni, rúlumuti gíñe jun lídan ában luwúyeri. Naríñagunbei “lídan ában luwúyeri” lun maweírin lan naweíridaguagüdüni jun. ⁶ Abeíchuni lé meja jaríñagubeí lídan jadámurin lun líchugúniwa luágu güirgía ligía, buídurúgaali. ⁷ Guetó, lúnti ferúduna jumáni, ru jugúyame gurásu lun lueí ladúgün sarágu íruni wuríbati lun. ⁸ Ligía nayúmuragunbei jun lúnya jarúfuduni jínsíñejabu lun. ⁹ Abúríjatina jun luágu cátei le lun gíñe nasúbudiruni ánjein aráanse jubeí lun jadúgüni le nubeíbei jun. ¹⁰ Guetóti, le únti ferúduna jumá furúmieguarügü cátei, ferúdana nubeí gíñe, ánjein gíñe níjein lubeí cátei le lúnti ferúduna náni güirgía ligía luágu, ferúdana numúti ligíbugíñe Crístu, jueígíñe. ¹¹ Lídan ában cátei líbe líra, mabúseerúntiwa wíchugun lúgaaru lun Máfia lun lanúgün ában güirgía le máma lání larígoún lídoun lubáfu, subúdiwatu lumáñaan Máfia buídu buídu.

Madárangilan lan larítangun Páblo ubúruгу Tróas

¹² Dán meja le nachúlürünbei ubúruгу Tróas lun napúrichijani ugánu luáguti Crístu, ába nibíjin ában oúnwenbun cháansi ñi lun nuwádigimaridun luágu Wabúreme. ¹³ Madárangilaanti narítangun lugúndun madári náni wadúje Títo Tróas lun nagáambun lúma juágu. Ligía nayóuragunbei joun wadújeñu ja Tróasbaña, ába nídin loubawagun Macedónia lun nadúnragun lúma Títo ñi.

Gãñeitiwa láu lubáfu Crístu

¹⁴ Buíti lasábirun sun cátei. Teínqui wamúti Búngiu le anúgübaliwa lídoun sun fulásu, amáhareina wagía lábugiñe lagúmadijan Wábuti Jesucrístu, le súnwandanbei lagãñeiragüdüniwa lídan sun lénreengúnga. Yúsu lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lirímichúniwa líjeme cupáli. ¹⁵ Lugúndun ítara wáña quei cupáli le lágudajabei Crístu lun Búngiu, ñúdüntiwa láu ugánu luáguti Crístu, le queíbei líjeme cupáli, joun ja lúnbaña jerésibiruni ugánu ligía lun jasálbarun, jáma gíñe ja lúnbaña merésibirun jamáni ugánu ligía lun jeféridirun. ¹⁶ Joun ja merésibirunbalin ugánu ligía, ítara líña quei ában íjemeni le gáfarajati, ánjein joun ja erésibirubalin, ítara líña quei ában árani le areídaguagüdüti. ¿Cáti gabáfubei lun lasúbudiragüdüni ugánu luáguti Crístu? ¹⁷ Wagía le lóunajabei Crístu, gabáfutiwa, ladúga mítaran wamá queísi arúfudajatiña yéetiña jagánagua, ja asáansiragubalin linárün Búngiu quei jabúseerun lun jaríjin cába lan jagãñeira lídaangiñe. Lubáragiñe líra, apúrichija wamúti Lerérun Búngiu quei lubei, ligíbugiñe Búngiu, wagía queísi lóunajan Búngiu ja lídaanbaña ában lúma Crístu.

3

Ugánu luáguti iséri darádu

¹ Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawóugua? ¿Ódi gásu funági warúfudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruníwa, o wamúriajan lan gárada júmagiñetu joun ámu mútu, quei jadúga jíbiri mútu? ² Uá, lugúndun jugúya afíñetiña, ítara jíña queísi ában gárada to adímurejatu luágu lubuídun wawádigimaridun jagánagua, ítara jíña quei ában gárada to bürúwanutu tídan wanígi, to gayáraaboun jalíjanun sun gürígia, asúbudiragüdei cátawa lan. ³ Ítara jíña queísi ában gárada to labúrújan Crístu guánarügü, to wedéregeruboun, ában gárada jugúya to abúrújouaboun láu láni Búngiu le wínwanbei Espíritu, máma láu tínta, áni tídan janígi ladúgei Espíritu ligía wadágimanu, máma luágu dúbü.

⁴ Gayáraati waríñagun luágu buídu lan wesériwidun lun Crístu ladúga wadúgüni jeméniñu luágu Búngiu lun líchuguni ubáfu woun lídaangiñe Jesucrístu. ⁵ Mabáfutiwa lun ni cáta láu wáni woúngua, sun le wayáraabei adúga, lúmagiñe Búngiu liábin. ⁶ Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mítaraanti quei lé meja binádu, lé meja lánina lúrudu bürúwati le lúnbei lagúnfulirúniwa láu, lánina ában ibágari le erésibirúti lúmagiñe Sífiri Sándu. Lúrudu ligía, le lilúrudun Moisés, arúfudarügü lumúti waffgoun ligíbugiñe Búngiu, figóu ligía, oúweni lafáyeijabei. Ánjeinti Sífiri Sándu, rúti ibágari joun sun ja ánjabaña lun.

⁷ Lilúrudun Moisés le, abúrújouati luágu dúbü. Dan le lerésibirubalin lúrudu ligía lúmagiñe Búngiu lun líchuguni joun Israelítagu, ñíñein ában oúnwenbun larúgounga lúmagiñeti Búngiu ligíbuagu darí lun siñá lán meja jaríaguni gürígia jagía ligíbu Moisés, lugúndun weíríti lámiridun ligíbu. Láu sun líra, ába éñegucheina lan larúgounga ligía murúsun murúsun. Ánjein láu lubei sarágu uweíríguni liábin lúrudu ligía le asíadijabei gürígia lun oúweni, ⁸ ¿weírítimaati luweírígün ugánu le lanúgübei Sífiri Sándu woun luágu Wasálbaragüle! ⁹ Ánjein weíri lubei luweírígün meja lúrudu le esériwidubei lun larúfuduni wadúnrun ligíbugiñe Búngiu woun, ¿weírítimaati luweírígün ugánu luágu Wasálbaragüle le adúgübalíwa richágu ligíbugiñe Búngiu! ¹⁰ Ni cáta luweírígün lilúrudun Moisés ligíbugiñe luweírígün Wasálbaragüle. ¹¹ Ánjeinti weírígu lubei meja darádu le lúnbei ladúrarun murúsunrügü dan, weírítimaati luweírígün darádu le lúnbei ladúrarun lun sun dan.

¹² Ladúga njein lan eménigini le wawágu, luágu siñá lan leféridiruni ugánu luáguti Crístu luweírígün, wapúrichijánbei furáangu. ¹³ Madúgüntiwa queí meja Moisés,

adáuragua láu ligíbu táu ában bélu lun maríjin jamáni Israelítagu léñeguchun larúgounga ligía le siñábei ladúrarun, marámudaguntiwa láu ugánu lánina wasálbarun ni murúsun. ¹⁴ Derétu janígi Israelítagu jagía lun laníchigu lilúrudun Moisés joun, queísigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiñe líburu to lilúrudun Moisés, bélu méme tugúya to luáguboun jasáminan, mígirun tumútiña lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lídan Crístu le Wasálbaragüle. ¹⁵ Chülú lúmoun dan le, dan le jalíjanun líburu buri to labúrjaboun Moisés, darúguatu ában bélu láu jachúgü lueí gunfaráanda jamá. ¹⁶ Ánjeinti dan le lígiruni ában güriá binádu ligáburu lun leibugun lúma Crístu, ába tagídarán bélu tugúya lueí. ¹⁷ Wabúreme Crístu, ligía Espírítu le íchugubei íbágaru. Láu Espírítu ligía (le méme Sífri Sándu) wádan, sálbatiwa, máfaagunga wagía lun wagúnfulirun láu lilúrudun Moisés. ¹⁸ Ligía sun lubeí wagía affñetiña luágu Crístu, gidáwaarú bélu lueí wasáminan, subúdi wamúti Crístu furáangu, láu sun luweírigun. Ítara wáña quei ában ísubúsein to arúfudubalin luweírigun Wabúreme Crístu, áni láu wasígirun íchigei warítagn luágun, sáansiguagüda lumútiwa láni Espírítu murúsun murúsun lun ítara wamá quei ligía.

4

¹ Máburujalá lubeíti warúna, lugúndun rúlaali Búngiu wadágimanu le lábun waríajaan, láu lareíni. ² Mayúsuruntiwa íbíbuni lun wafíneragüdúniña güriá luágu Crístu, rúwamuti wanágn luágun cáte le adügúbei arámudaguartügü, le nibúsigaridúnabei. Masáansiragun wameí Lerérun Búngiu, inárúni rügúñein waríagna. Ítara líña jasúbudiruni sun güriá cátawa lan ligíbugiñe Búngiu. ³ Ánjein mafúraangun lubeí werérun luáguti Wasálbaragüle, jóun rügúñein ja lúnbaña jeféridirun mafúraangun lan. ⁴ Quei maffínen jabeí luágu werérun, darúlaali Máfia, le lubúngutebei ubou le, jaríjin lun siñá lan larúgoungadagüdúni ugánu luáguti Crístu le weírigubei, le liyáwabei Búngiu wínwanti, jasáminan. ⁵ Dan le wapúrichijanbei, máma wawougua wapúrichija, luágu Jesucristu wapúrichija, queísi Wabúreme, waríñagati wawougua luágu esériwidutiñarügü lan wagía jun, luágu wínsiñejabu lun Jesúsú. ⁶ Lugúndun Búngiu, le méme íchugubalin lámpu síelu lun lagídarániwa lubúriga, ligía gíne adúnraaguagüdúbalin lilámpun tídan wanígi, lun gayáraabei lan wasúbudiruni luweírigun Búngiu le waríjibeí lídan Jesucristu.

Abágariduni láu eménigi luágu Búngiu

⁷ Larúgounga le wibíjubei luágu luweírigun Búngiu le lídaanbei Crístu, ítara líña quei ában írisini woun. Barú wamuti írisini ligía lídan fugiábu wágubu, le ítaraabei quei ában soudíeru, lun laríjiniwa luágu lúmagiñe lan Búngiu líabin ouñwenbun ubáfu le wawágubei, máma wámagiñe. ⁸ Ítara, láu sun súfuri wamá sun luwúyeri lénreengúnga, súnwandan larúfudun Búngiu ában úma woun lun wáfuridun lídaangiñe furúmieguarügü lénreengúnga. Níjein dan, weíruti wadíjeri luágu cába lan wadúga, máburujaanti warúna, lugúndun íderagua láníwa Búngiu. ⁹ Eíbaajouátiwa, mígirun lumútiwa Búngiu joun wáganiñu. Gayáraati jájuchuruniwa, ígira jamáwa múarugu quei jiláña, siñáti jagúmuchaaguagüdúniwa. ¹⁰ Le ñilumuti wóudin, buséñtiña wáganiñu jáfaraguniwa jilágubei quei jáfaruni láganiñu Jesúsú jilágubei. Lúnti ítara lúba lan lun gayáraabei lan laríjiniwa lubáfu Crístu le wíwanbei wádaangiñe. ¹¹ Wagía, sun awánja lan abágarida, yaráfañu wáña lun wouñwen furúmieguarügü wéyu lueígiñe Jesúsú, lun gayára lan laríjiniwa libágaru Jesúsú wádaangiñe. ¹² Ítara líña lubeíti, láu yaráfañu wamá lun ouweni lun wíchuguni ugánu jun luágu Wasálbaragüle, resíbi jumúti íbágaru magúmuchaditi.

¹³ Laríñajare Dauid tídan Lerérun Búngiu. “Afíñetina, ligía nadímurejánbei”, ítara gíñeti affñetiwa luágu Búngiu láu méme ligáburu affñeni le meja luágubei Dauid. Ligía wapúrichijánbei luágu. ¹⁴ Lugúndun subúdi wamúti luágu Búngiu lan le ásaaragüdúbalin Jesúsú lídaangiñe ouweni, lásaaragüdúbalíwa lan gíne lúnya wabágaridun, úara lúma

Jesúsu, ábame lanúgúniwa úara júma ligíbugiñoun. ¹⁵ Luágu jáni fuleísei nasúfurirei sun cátei lun gayára lan jagíbedun ja áñarubaña lun larefni Búngiu joun, gíbe jamámuga gíñe íchugutiña eteíngiruni lun luágu larefni. Ítara lúba iñurúañu lan líri Búngiu.

¹⁶ Ligía máburujan lubeí warúna. Oúwedeina líña wágubu murúsun murúsun, wawáni, tedérebuguduña ságú wéyu. ¹⁷ Ni cáta le wasúfurirubei lídan ibágari le, lídan le wasáminarun luágu oúnwenbun ugúndani le lúnbei wibíjini yágüta siélu dánme le ñi wamá lúma Crístu lídan luweírigin. Mawefrinti lidáani wasúfurirun woun ya ubouágu dan le wasáminarun luágu lúntibei lan dan magúmuchaditi wagúndan siélu. ¹⁸ Marítagutiwa sarágu luágu cátei lánina ubou le, ladúga murúsuraü lan dan ladúrarun. Le uágubei wíhigei warítagin, luágu cátei lánina siélu, ladúga cátei ligía, lúnbei sun dan ladúrarun.

5

¹ Subúdi wamúti lubeíti luágu gayára lan wounwen lubáragiñe lagíribudun Jesucrístu ubouágun, gayáraati loúnwen wágubu quei teíguadun ában múna weíyaaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan. Úgubume ligía, mámabei lánina uboué quei ában múna adúgútu láu újabu, ábanbei úgubu lánina siélu. ² Buchá wawágu láu úgubu le wawágubei guetó, buséntiwa jamúga tadáurawagún wawáni láu iséri wágubu le lánina siélu. ³ Láume iséri úgubu ligía wawágu, mítaranbádiwa quei uwáni to úati úgubu táu. ⁴ Sun awánja lan abágarida láu úgubu le wawágubei, darítiwa mégeiti luágu, sandígua wagía woungua láu idíjeri. Máma jamúga wabúseeruña wounwen lun weréderun quei uwáni úouga úgubu táu, le wabúseerubei, lun lasáansiragin wágubu le gagúmuchadibeí furése furése lídoun wágubu le magúmuchadibeí, mouñwenga wagía. ⁵ Búngiu aráanserubaliwa lun gabágarí wamá le magúmuchaditi, áni rúlaali Sífiri Sándu woun queísi larúfudajan luágu ítara lúba lan.

⁶ Gúndaatiwa lubeíti súnwandan, láu sun subúdi wamá luágu sun lan awánjagua lan ubouágu abágarida lídan wágubu, bougudiñadiwa lan tueí wában yágüta siélu, máma lan lúmañadiwa Wabúreme. ⁷ Ya ubouágu, siñáti waríjini Crístu, gayáraarúgüti wafíñerun luágu. ⁸ Gúndaatiwa láu furúmieguarügü cátei le gádaanbaliwa, láu sun jamúga jímeín wamáni lun wígiruni ibágari le ya ubouágu lun wouúdin agánawa lúma Wabúreme Jesucrístu siélu. ⁹ Ligía wáfaagunbei lun wadúgüni lugúndan Wabúreme súnwandan, ya wagía yebe ubouágu, yágüta wagía yebe siélu. ¹⁰ Lugúndun sun wagía, waráramuba ligíbugiñe Crístu lun weresibiruni cáda ában le lúnbei weresibiruni, según buíti o wuríbati lé meja wadúgübei dán meja le ubouágugiwa.

Ugánu lánina darángilau

¹¹ Ligía, quei subúdi wabálin lanúfudewa lueí lagúseragüdü Wabúreme, áfaaguatiwa lun wafíñeragüdüniña sun gürígia. Subúdi láali Búngiu cátawa lan, áni agúrabatina lun gíñe subúdi jumáni. ¹² Máma wadímurejañaya buídu wawoungua, wíhuguña ában cháansi jun lun jasándiragin júngua gúndaañu wáu, lun gayára lan jounabuniña arúfudajatiña jagánagua ja apántajabaña luágu lubuídun jarúfudagin jóungua bougudi jabíti, áni tídan janígi mabuúduntiña. ¹³ Ánjein weíri lubeí wesériwidun lun Búngiu darí lun waríjín camá lúluñein wáu, ladúga luweírín wínsiñejabu lun Búngiu lasúsereda. Ánjein genége lubálin luágu wesériwiduña lan lun Búngiu láu ában lidíli íchúgü, ladúga luweírín wínsiñejabu jun wadúgei. ¹⁴ Mósu nesériwidun lun Crístu táu sun nanígi larígiñe larúfuduni luweírín línsiñejabu woun láu loúnwen lídan wafúlasun súngebei. Queísigubeirügü jamúga jilá jamá sun gürígia úara lúma dán meja le loúnwenbei. ¹⁵ Jiláti Crístu jawágu súngebei, lun sun lan ja ánjabaña lun jerésibiruni ibágari lídaangiñe, mámaali lámuga joun guánarügü jabágarida, lun jabágaridun lun Crístu le ouwebei jawágu, sará ligía lídaangiñe ouweni. ¹⁶ Ligía manúgün wabefí ni ában quei janúgün lirájüñü ubou gürígia, según bougudi jabíti. Luágu méja ában dan, barú wamuti meja Crístu quei janúgüni lirájüñü ubou, mítaranjaali

guetó. ¹⁷ Le lubefti lídaanbei ában lúma Crístu, ábanjali gürrígia iséri, gumúja sun cátei le lánina binádu ligáburí, labágariduña ában iséri ibágari lúma Crístu.

¹⁸ Adúga lumúti Búngiu sun cátei le. Gáganiguatiwa meja lúma ladúga waffgoun, ába loúnajani Crístu lun lachíbuni waffgoun, gayára lámuga gamádagua wamá luma. Rúlumuti wadágimanu ligía woun lun waráandaragüdüniña sun gürrígia lúma. ¹⁹ Le naríñagubei, láu loúnwen Crístu lídan wafúlasun, arúfudati Búngiu ában úma woun lun gayára lan lagídarúniwa wadúnrun luágu waffgoun ligíbugiñe, gayára lámuga gamádagua wamá lúma. Oúnaja lumútiwa lun waríñaguni le joun sun gürrígia. ²⁰ Wayábiña lubefti queísi wügúriña ja loúnajabaña Crístu, queísigubeirügü jamúga layúmuragun Búngiu guánarügü jun wadaangiñe. Ayúmuraguatiwa lubefti jun lueígiñe loúbadina Crístu. aráandara jumá lúma Búngiu. ²¹ Madúgünti Crístu ni ában figoú, rúlumuti Búngiu sun lidúnrun waffgoun luágun Crístu lun láu lan lídan wamá ában lúma, lun wachúlürün abágaridei ibágari lánina ísuruni le labúseerubei Búngiu lun wabágaridun.

6

¹ Wagía, queísi ñadágimeintiña úara lúma Búngiu, ayúmuraguatiwa jun lun jarúfuduni láu lubuídun jigáburí luágu máma lan luágu ni cáta jerésibirei lareíni Búngiu jun.

² Laríñajare Búngiu tídan Lerérún.

Nagáambubei bagúajan nun lídan nidáani lun fuleíseijabu nan joun gürrígia, níderagubadibu lídan nuwéyuri lun nasálbarun gürrígia.

Chülújali lídáani Búngiu lun fuleíseijabu lan joun gürrígia, niján buri wéyu le luwéyuribei Búngiu lun lasálbaruniña gürrígia.

³ Áfaaguatiwa lun úaragua lan wagáburí lúma wapúrichijan, lueí jamúga jeréderúniwa gürrígia lueí jagáambuniwa. Mabúseerúntiwa jamúga wanúgün minébesi lun luwádigi-mari Búngiu láu wagáburí, ⁴ busénrügütiwa warúfuduni lídan sun cátei luágu eséri-widutiña lan lun Búngiu wagía, láu luweírin wagúraasun lun wawánduni asúfuriruni, mégei, lúma lénreengúnga. ⁵ Beíjamaadíwa, dáüjamáwa, ínchajóutiña gürrígia lun jeíbaajaníwa, jéreti wawádigimari lun Búngiu darí lun wasándirun oúnwenbun lubúcha uágu. Reídeijadiwa marúmugunga, áfaaga wagía ilámaü. ⁶ Arúfuda wamúti giñe luágu esériwidutiña lan lun Búngiu wagía láu larúman wabágarí, láu lisúbudin linárün Búngiu woun, láu wagúraasun lúma wareíni, láu warúfuduni lubáfu Sífiri Sándu le wadaanbei, láu wínsiñejabu le tímati maati, ⁷ láu wáni ugánu le lánina inárüni, lúma láu lubáfu Búngiu wádan. Yúsu wamúti lárumatena lubuídun ibágari, dándu lun wóudin jabároun wáganiñu quei lun waráramuniña dan le jayábin wabároun. ⁸ Níjein dan íbíjatiwa inébesi, níjein dan anábawaguatiwa. Níjein dan adímurejóuati buídu wawágu, níjein dan adímurejóuati wurí-bati. Níjein dan, oúsera jamútiwa quei yéetiña, níjein dan quei wügúriña ja aríñagutiña inárüni. ⁹ Níjein dan, oúsera jamútiwa quei íbidiñewatiña, níjein dan quei subúdiwatiña buídu, níjein dan, agúrabañu wáña lan wóunwen, awánjagua wínwanlu, ígirati Búngiu lun wasúfurirun, lun wafúnrendeirun lídaangiñe, ¹⁰ moúnwentiwa lídaangiñe asúfuriruni ligía. Láu sun níjein lan cátei lun lírudaguagüdüniwa, níjein giñe ugúndani lumagiñe Búngiu tídan wanígi. Láu sun gudéme wamá según uboú, aríñagatiwa joun gürrígia luágu irisíni inárüni le gayáraabei jadáriruni lídan Jesucrístu, láu sun úa lan ni cáta wáma según jaritagun lánigu uboú, íbija wamúti sun cátei lídaangiñe Crístu.

¹¹ Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírin jínsiñe nun. ¹² Masáansiragúnti wínsiñejabu jun, láu sun affínetina luágu sáansigua lan jínsiñejabu woun. ¹³ Ayúmuraguatiwa jun quei layúmuragun ában úguchili joun lirájüñü lun jínsiñejabu jumá woun le gumúti, queísi wínsiñejabu jun.

Aganoúati Búngiu wádan

¹⁴ Magámarida jumá gürrígia ja maffínetiña luágu Crístu, lugúndun janúgüba ában ibágari le múaraanti. Mamádaguati ísuruni lúma wuríbani, siñáti giñe gamádagua lan larúgounga lúma lubúriga. ¹⁵ Siñáti níjein lan úarani lídan Crístu lúma Máfia, siñáti giñe úaradun ában

afñeti luágu Cristu lúma ában le maffñeti. ¹⁶ Siñáti gadúnama jamá sándu tídan lúban Búngiu, áni lúban Búngiu le wínwanbei wagía, quei laríñagun Búngiu guánariügü.

Naganoúba jagánagua, eibuga áume jagánagua, áuba Jabúngiute, jagíame nánigu.

¹⁷ Ligía gíne laríñagunbei Wabúreme Búngiu.

Furíjuma jagánaguagiñe ja maffínebaña nuágu, díse jumá jaweí, líña Jabúreme.

Mádaragua jumá júngua lídoun le wíyebeli.

Ábame nerésibirunün,

¹⁸ ábame ában nan úguchili jun,

jugúyame nirájüñü, líña laríñagun Jabúreme, le Súnti Gabáfu.

7

¹ Ítara líña lubefti, nidújeñu jínsiñetiña nun, niján buri dimúrei le líchugubei Búngiu woun. Ligía lúnti lubeí wachíbuni sun luwúyeri iwíyeni wawáriu, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladúga luweírin inébeseli le wawágubei lun Búngiu.

Lasáansiragun jagáburi Coríntona

² ¡Rújuma ában ubaráü woun tídan janígí! Madúgüngidiwa dáñu lun ni ában, maríbadagüdün wagía ni ában, mayéedagun. ³ Máma naríñaguñein le lun nichugun jidúnrun, lugúndun quei buga naríñaguni jun, tídaañadün nanígí, lídaañadiwa ában ínsiñejabúni le mébejati, lídan yebe ibágari o lídan yebe ouweni. ⁴ Weíríti nafíñen lúma nugúndan jáu, labádinagua sun le nasúfurirubei, sandítina dúgüdaguaü, áni buin níña gíne láu ugúndani, jueígiñe.

⁵ Lúmagiñé meja wachúlürün Macedónioun, meméraagüngidiwa, darírügiñetiwa lén-reengúnga lídan sun fulásu geyégua wáu, geyéguati wuríbu wáu, weíríti wadíjeridun juágu. ⁶ Anjeinti Búngiu, le íchugubei gurásu joun ja magúraasunbaña, ába líchugun gurásu woun láu lachúlürün Títo, ⁷ áni mámarügü láu lachúlürün, lugúndun gíne gagúraasun lan juágu. Aríñagati woun luágu luweírin jabúseerun jaríjiniwa, abájüdagua ligía woun luágu íruni le juágubei luágu le asúseredubei lúma luágu luweírin jabúseerun lun jóudin láu nerérun jun. Ábatima nagúndaarun láu líra.

⁸ Láu sun jírugua jumá tadúga gárada to nabúrijaboun jun, maságüríjaantina luágu, guetó. Aságüríjatiná meja furúmiñe láu nasúbudiruni luágu jírugua jumá tadúga gárada tugúya luágu murúsun dan. ⁹ Guetó gúndaatina, máma ladúga jírudagun, ladúga saansiguagüda láni írudaguni ligía jigáburi. Áfaga jumúti íruni ligía lídan ában igáburi le áubei lagúndaara Búngiu, ítara líña lubefti madúgüñtiwa ni murúsun dáñu jun. ¹⁰ Lugúndun dan le wíchugun úma lun Búngiu lun layúsuruni íruni le wawágubei ladúga luríban wagáburi lun lasáansiraguni wagáburi, barú lumútiwa lídoun asálbaruni le magúmucha-diti, maríbaanti íruni ligía woun. Anjein wanúga íruni ligía queísi janúgüni lirájüñü ubou, magáraragunga wagía lun Búngiu, lanúgübadíwa lídoun féridi lun sun dan. ¹¹ Awánda jumúti íruni queísi labúseeruni Búngiu, áni jaríja jumefti le asúseredubei guetó lídaangiñe jawánduni íruni ligía! Tadúga gárada tugúya, ába jatátirun asáminara buídu cába lan jadúga láu wügúri le afígounjabei jagánagua. Arúfuda jumúti luágu magúndan jumá láu figou le ladúgübei, áni gánitün luágu busíganu le líchugubei jun, janúfudetün lueí jamuga jabeichúniwa lueígiñe. Ába jabúseerun jaríjinina lun nasúbudiruni jínsiñejabu nun. Weíríti jabúseerun lun jadúgüni le richábei, lun jabeíchuni le adúgübalin figou, adúga jumáali sun le lúnbei jadúgüni lun jaráanseruni cátei le. Madúnrunjadün guetó.

¹² Dan lubefti le nabúrijanbarun meja gárada tugúra jun, mámadügüya jamúga ladúga nasáminaruña lan sarágu luágu gürrígia le adúgübalin wuríbani, ni luágu le asúfurirubalin

luéfiñe, nabúrjanbarun lun geféen júma ligíbugiñe Búngiu luágu luweírin jínsiñejabu woun. ¹³Ligía ragúguaaðiwa lubeí woúngua.

Lánwoun sun gurásu le barú wamáalibei juágu, oúnwenbun wagúndan láu waríjini luágu gúnda lan Títo, íderagua jumáali sun jugúya lun lasándirun darángilaü. ¹⁴Adímurejatina bugája buíti juágu lun Títo, áni gúnfuli jumúti nerérun juágu. Quei sun lan le aríñaga wamáalibei jun, inárüni, ítara líña gíñe inárüni lan le waríñagubei lun Títo, luágu gunda wamá jáu. ¹⁵Áni weíritimaati jínsiñe lun dan le larítagn luágu jadúgüni sun jugúya le lamúriajabei júma, lúma luágu jerésibiruni láu ában inébesi lúma idíjeri lueí jamúga jemégeiruba lan lídan jagúnfulirun láu lerérun. ¹⁶Gúndaatina láu gayára lan naffínerun juágu le gumúti.

8

Wíchugun joun gudémetiña

¹Guetó, nidújeñu, buséntina nabájüdagun jun luágu lareíni Búngiu joun tílana sun liglísi buri to louábawaguboun Macedónia. ²Láu sun ában lan oúnwenbun ouchwaguni lun jafíñen lénreengúnga le jadárirubei, gúndaatiña buídu, áni láu sun gudéme jamá, rújaña lídan jíderawagún ja gudémebaña Jerusalén camá jamuga rísitiña. ³Geféentina luágu rújamaali lan sun le jayáaraabei láu sun tarúman janígi, ru jagía sügú láu lé yebe jayáaraabei. ⁴Ayúmuraguatiña sarágu woun lun wígiruniña lun jíchuguni jafáran lídan jíderawagúniwa idújeñu lueíñe Jesucrístu. ⁵Adúgatiña sügú láu lé yebe wagúrabubei jadúgün, furúmiñe, ába jedéregeragun jóungua le gumúti lun Wabúreme Jesucrístu, lárigiñe ába jedéregeragun jóungua woun, queísi lugúndan Búngiu. ⁶Weíriti jabúseerun jíchugun, darí lun wayúmuragun lun Títo lun lagíríbudun júmoun lun gayáaraabei lan lagúmchaguagüdüni labúdajóun seínsu lé meja lagúmeserubei jídan. ⁷Jugúya ubáraübei lídan sun cátei—lídan jafíñen, lídan jisúbudin luágu Lerérun Búngiu lúma jubáfu lun jarúfudajani furáangu joun ámu, lídan jabúseerun jesériwidun lun Crístu, lúma lídan insíñejabuni woun—lúnti lubeíti gíñe ubáraü jumá lídan ídejani le.

⁸Máma naríñaguñein le jun quei ában gumádi, busénrügütina jasúbudiruni jabúseeruni ja jíbiri jídejan, lun gayáaraabei lan gíñe jarúfuduni jínsiñejabu láu jíchugun táu sun janígi quei jagía. ⁹Jarítagua jumá luágu lareíni Wabúreme Jesucrístu woun. rísiti bugája dan le siélu lan, ába lagúdemedun láu líabin uboúagun ladúga línsiñejabu woun, lun gayáaraabei lan wayábin lun warísidun lídaangiñe lugúdeme.

¹⁰Luágu jáni fuleisei naríñagei narítagn jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adúga jumúti gíñe táu sun janígi. ¹¹Guetó lubeíti, ítara méme jumá darí jagúmchuni abúdajani luágu, láu méme ugúndani lé meja juágubei lúmagiñe furúmiñeti, íchigeina según le júmati. ¹²Lugúndun ánjein íchiga ában gürígia sun le liyáraati según le lúmabei, láu sun lugúndan, gúndaati Búngiu láu, áni resfbi lumúti le líchugubei gürígia ligía, mamúriajan lumúti Búngiu le úati jáma gürígia.

¹³Máma lun jáfagn mégei ladúga jíderagun ámu, ¹⁴le busénwabei, lun ñi lan úarani jídan. Guetó, njein júma lun jabuínchagüdüni le jemégeirubei ámu, lídaanme ámu dan, njeinbei jáma lun jabuínchagüdüni le jemégeirubei. Ítara lúba ñi lan úarani, ¹⁵quei taríñagn Lerérun Búngiu. “Le gíbebei úma, mígiragunti lúma, le mibebei úma, memégeirunti lun.”

Títo jáma lóbirigu

¹⁶Teíñqui numúti Búngiu luágu líchuguni ayúmajani méme le líchugubei nídown tídown lanígi Títo lun líderagunün. ¹⁷Gúndaati Títo lúnya lídin aríjaün quei namúriajani lúma, áni affíñetina luágu weíri lan labúseerun lúnya laríjinün darí jamúga lun lídin láu láni lúngua maríñagunga áu ni cáta lun.

¹⁸Úara lúma Títo, wóunajaña ában idújei le uágubei buídu lan jadímurejan tílana sun ligílisi, luágu lubuídun luwádigimari lun labúruchagun ugánu luágu Wasálbaragüle. ¹⁹Áni mámarügü líra, anúadaja jamúti gíne tílana buri ligílisi idújei ligía lun ladúgün weíyaasu wáma lun líderagun lídan loúndarún seínsu le. Wadúgüñein wadágimanu le, le lánina idejani, lun wíchugun ugúndani lun Búngiu, lun gíne warúfuduni luágu busén jamá afíñetiña lun jíderaguniña jadújeñu ja gudémebaña. ²⁰Waráanseruñein sun cátei lébei lun míchugun wamá lúgaaru lun ladímurejoún wuríba wawágu lueígiñe loúndarun seínsu le wadúgübei. ²¹Wáfaaguña lun wadúgüni sun cátei láu arúmani, mámarügü ligíbugiñe Wabúreme, jagíbugiñe gíne gürígia.

²²Wóunajaña gíne ábanya jádaangiñe wadújeñu lúma Títo lúma le ában. Wügúri le, arúfuda láalibe luweírín labúseerun lesériwidun lun Crístu woun lídan sarágu luwúyeri, guetótima láu oúnwenbun afíñeni le luágubei luágu jíchuguba lan sarágu seínsu láu sun jugúndan. ²³Le álügúdajati libúgürü Títo, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álügúdaja jabúgürü bíama idújeñu lueígiñe Jesucrístu ja lúmabaña, jaríñagame joun luágu jóunajan lan tílana ligílisi buri, luágu jíñúragüdüñein lan líri Crístu láu lubuídun jagáburi. ²⁴Ítara líña lubeíti, reslbi jumáña láu ában ínsiñeni le timatimaati lun gayáraabei lan jaríjini wügúriña jagía luágu inárüni lan lubuídun werérun juágu, áni lun gíne jasúbudirun sun jíbiri tílana buri ligílisi luágu ínsiñejabuni le juágubei jádaangiñe wügúriña jagía.

9

Loúndarún seínsu joun idújeñu ja gudémebaña

¹Luágu loúndarún seínsu joun idújeñu lídan afíñeni, memégeirunwati lun nabúrújan jun, ²lugúndun subúdi náali lubuídun jugúndan lun jídejan. Súnwandan naríñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan irúmu le sügújalibe, áni jíbe-ágei Macedóniana ragújaña gíne dúgüdaguaü láu jagáambun luágu luweírín jáfaagun luágu idejani le. ³Láu sun líra, nouñajaña idújeñu jun nubáragiñe lun jaráanseruni luáguti labúdajóun seínsu, lun mámaabei lan iyéeni, buíti le naríñagubei juágu libúgürü cátei le, lun abúdajóuali lan sun seínsu lubáragiñe nachúlürün jumón. ⁴ñúdündügü jañeín jádaangiñe Macedóniana núma, jadárirarünme maráanserunga. Líchuguña jamúga líra busíganu woun, júntima, lárigiñe rúwamaali lan sarágu wafíñen juágu. ⁵Ligía narítangunbei namúriajan jáma idújeñu ja lun jóúdin bisídaün nubáragiñe, lun gíne jíderagunün abuíñchagüdei seínsu le uágubei jaríñaga jóúndarun. Ítara, aráanseñu lúba seínsu le jóúndarubei lun jarúfuduni jareíni, máma quei ában cátei le lúnti wafósurunün luágu.

⁶Jarítagua jumá luágu cátei le. Le loúguati lábunagun, loúguabe gíne lalúbajan, le gíbeti lábunagun, gíbebei gíne lalúbajan. ⁷Cáda ában jídaangiñe, lúnti líchugun queísi ligáburi larítangun, máma láu magúndani ni ladúga aríñawagúta lan jun lun jíchugun, lugúndun jínsiñejabuti Búngiu lun le íchugubei láu ugúndani. ⁸Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligíame gíne sarágu júma lun jídejan. ⁹Taríñajare Lerérun Búngiu luágu gürígia le íchugubei sarágu.

Rújali sarágu joun gudémetiña,

áni reídeiti cátei buíti le ladúgübei lun sun dan.

¹⁰Búngiu, le íchugubalin flaü lun lábunún, ában lalúbajagüdüún sarágu lídaangiñe lun gayára lan weígin buídu, líchuguba gíne jun lun gayáraabei lan jedéweejan sarágu joun gudémetiña queísigubeirügü flaü le ábunúbei. Ábame laweírídagüdüni Búngiu murúsun fuleísei le jadúgübei joun, daríme lun jabíjin oúnwenbun abíniruni lúmagiñe Búngiu queísi ában oúnwenbun alúbajani. ¹¹Jugúya, jíbájuba sarágu súnwandan lun gayáraabei

lan jíchugun sarágu, áni dánme le jerésibiruni wadújeñu seínsu le lúnbei jóunajani joun wáma, wefríbei jateíngiruni Búngiu. ¹² Lugúndun láu wíchuguni íderawaguni le joun wadújeñu, máma wíchiga rügúñein seínsu le jemegeirun joun, wadúgúña gñe lun jíchugun sarágu eteíngiruni lun Búngiu láu líra. ¹³ Jíchuguba uweíriguni lun Búngiu lugúndun arúfuda lumúti ídejani le joun luágu adúga jumáni le lubeíbei Crístu, jíchuguba gñe uweíriguni lun Búngiu luágu íderawaguni le jíchugubei joun lúma joun súngebui. ¹⁴ Ábame jayúmuragun lun Búngiu juágu láu sarágu ínsínejabuni jun luágu luweírin lareíni Búngiu le larúfudubei jídaangiñe. ¹⁵ ¡Teínqui wáña lun Búngiu, luágu rújali lan ában oúnwenbun cátei woun le siñá wabeí adárira dimúrei le buídurügüti ubuídun lun wadímurejan luágu! Cátei ligía, Liraú.

10

Lubáfu Páblo queísi apóstolu

^{1,2} Aríñawagúati luágu gudémeгу nan dan le júma nan, ánjein lan dan le díse nan jueí, derégüda lan nouserun júma. Áu Páblo, ayúmuraguatina jun láu ában únabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdüñin luágu wuríbati le jadúgübei, dánme le nachúlürün júmoun. Sáansi jumeí ligáburi jaritagun wawágu, jugúya le aríñagubei luágu lun lan waríjin cába lan waságara lí-daangiñe wesériwidun lun Crístu. Ánjein madúgün jumá, aráansetina lun nagágibudagun júma. ³ Inárüni luágu uboúaguna wamá láu sun jadébilin gürgía uboúaguna, máma queísi wügúriña lánina uboú le wawúribuja luágu wuríbani. ⁴ Máma uboúaguna áruma to áuboun wawúribuja, larúmate Búngiu wayúsuruboun lun tagúnrinchagun érei. ⁵ Ítara líña lubeíti, láu lubáfu Búngiu güríngua wamúti sun arítaguni le múaraanbei lúma linárün Búngiu, lúma sun cátei le abúseerúbei leréderuni lasúbudirúniwa Búngiu. Sun gñe jasáminan gürgía uboúagu rúwamuti lábugiñoun lubáfu Crístu lun lúaraduba lan láu le lubeíbei. ⁶ Áni larígiñe jíchaagun júngua le gumúti lábugiñoun lagúmadijan Crístu, aráanseñu wáña lun wasúfuriragüdüñiña ja magáambadigiñabaña lun.

⁷ Barú jumuti cátei quei laríjiniwa bougudigiñe libíti. Aríñagatina jun luágu ánjein lan choúruga lubeí ában gürgía lúngua luágu lánigu lan Crístu, lúnti gñe lasúbudiruni luágu ítara méme líña lan lánigu wamá gñe Crístu. ⁸ Fágua jaritagun luágu néredun murúsun lueí le lubúdubu luágu nubáfu queísi láni Crístu apóstolu, úabei nibúsigari nan luágu líra, lugúndun Búngiu guánari rúlaali ubáfu le nun lun nawáanseragüdüñin lídan cátei lánina Búngiu, máma lun nagúnrinchaguni jaffínen, queísi jadúgüni arúfudajatiña jagánagua guetó. ⁹ Mabúseerúntina lun jaritagun luágu náluguña lan nebélaagüdüñ anúfudei jídoun táu nigáradan. ¹⁰ Aríñagatiña náganiñu luágu abúrija nánun gárada queísi ában gürgía láuti sarágu ubáfu, áni derégüdati nege nerérun jun tídan, dan le júma nan, débilitiná nege, áni mínsiñegu lán nege ligáburi nadímurejan. ¹¹ Furúmieguarügü le aríñagubalin cátei le, lúnti gñe lasúbudiruni luágu ítara lan quei nubeí láu dimúrei díse jueí, ítara núba lan gñe dánme le júma nan.

¹² Míchaaguntiwa woúngua jámoun ja adímurejabaña buídu jawoúgua, mítaraantiwa quei jagía. Jagía, adúgatiña ában libídiouniga áu láu jamísuraagun jóungua láu guánarügü jamísuraagüle lúma láu jíchaagun jóungua jámagua. ¹³ Wagía, mapántajaanbadiwa luágu wawádigimaridun lun Búngiu lídan ában fulásu le ñilumuti míchugun lan Búngiu úma woun lun wesériwidun lun ñi, queísi jadúgüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía ánjarubei lun wachúlürün júmoun ubúrugin Corínto. ¹⁴ Ligía mídin wabeí sügü láu le labúseerubei Búngiu wadúga lídan le wáfaagun lun wíderagunün, ladúga wagía anúgübalin ugánu luáguti Crístu jun furúmiñe. ¹⁵ Mapántajaantiwa láu wadágimanu le jadúgübei ámu, camá jamuga wadúga. Agúrabarügütiwa lun quei lan lagánwoundun jaffínen, gayáraabei

lan wawádigimaritima jagánagua, súnwandan quei lugúndan Búngiu. ¹⁶ Lárighiñeme, jarítaguatiwa wadíseduntima lun wapúrichijani ugánu lánina asálbaruni lídan buri fulásu le díseti juef, le ñi lumuti magáambungiña lan luágu Crístu, luef wapántajan luágu wadágimanu le jadúgübei ámu, camá jamuga wadúga.

¹⁷ Le busénti ladímurejan luágu uweírighuni, ladímureja luágu luweírighun Crístu, máma luágu luweírighun guánarü. ¹⁸ Lugúndun gürgia le buídubei, máma le adímurejabei buídu luoúgua, le uágubei buídu lan ladímurejan Wabúreme Crístu, ligía buídubei.

11

Páblo jáma yéetiña ja aríñagubaña luágu apóstolugu jamá

¹ ¡Buséntina jamúga lun jawánduni libídioniga náu murúsun! Awánda jumá, ² lugúndun eméendütina jáu láu ában eméendüni le lúmagiñeti Crístu, luef jamuga jígruni Crístu. Áu asúbudiragüdübalin Crístu jun, ába júaradun lúma, áni le nabúseerübei, lun gayáraabei lan nedégerunün lun quei ában irájü jarúmatu to amárieidutu lúma ábanrügü wügúri.

³ Ítara quei layéedunun Máfia Éva, janáfudetina luef gñe jígraguagüdün júngua lun jeyeedún lídan jaritagun, luef jeséridun lúnrügü Crístu táu sun tarúman janígi.

⁴ Nariñagubalin le, ladúga resíbi jumáaña ja ñúbintiña admureja iyéeni jun luágu Crístu, áni bulfeiguatün luef cátei inárüniti le warúfudajabei jun. Resibitün gñe ában espíritu láu ugúndani ámu luef Sífiri Sándu le resíbi jumáalibei láu warúfudajan jun, resibitün gñe ában ugánu lánina asálbaruni jámagiñe le ámu luef ugánu lánina asálbaruni le agáamba jumáalibei wámagiñe. ⁵ ¡Affñetina luágu múnabun nan sügü jáu súper-apóstolugu ja jafálarubaña! ⁶ Fágua ibídiouguati láu ligáburi nadímurejan, mabídioungati láu nisúbudin, áni arúfuda wamáali le jun súnwandan lídan sun le adúga wamáalibei.

⁷ ¿Ódi wuríbati nadúga napúrichijani ugánu lánina asálbaruni jun magúburajanga áu ni cáta, únabudaguagüda núngua ítara lun niñúragunün lídaangiñe binádu jigáburi?

⁸ Barútina seínsu jámagiñe tílana ámu buri ligíli láu nerésibiruni le jafáyeirubei nun, lun nayúsuruni esériwida jun magúburajanga naün. ⁹ Áni dan lé meja níjein lan nemégerun dan le júma nubei, merédetina quei ijúrügu lun ni ában, idújeñu ja ñúbinbaña Macedóniagiñe, jagía íchugubalin le nemégerubei nun. Ítara líña náfaagun lun mámadadina lan ijúrügu jun lídan ni cáta, áni ítara méme lúba nadúga. ¹⁰ Ítara quei chouuru náni luágu subúdi náni linárün Crístu, ítara líña gñe nasúbudiruni luágu manúgübadina lan seínsu lúmagiñe ni ában lídan sun Acáya, luef jamuga lagúdarúniwa lébuna ugúndani le nuágubei, lun gayára lan nesériwidun jun magúburajanga. ¹¹ ¿Cásan uágu nadímureja ítara? ¿Ladúga funásan jimísiñe nun? Subúditi luweírighun jínsiñe nun lun Búngiu.

¹² Nadúga mémebei le nadúgübei lun míchugun nan lúgaaru joun arúfudajatiña jagía ja áluajabaña lun gayáraabei lan jaríñagun luágu ítara méme líña lan jesériwidun jun queísi wagía. ¹³ Máma Crístu oúnajabaliña yéetiña jagía jagánaguóun láu sun jafámurun camá lánigu Crístu apóstolu jagía. ¹⁴ Áni máma cátei terénchati le, lugúndun Máfia guánarügü arúfudaguati lúngua quei ánjeli le íchugubalin larúgounga, ¹⁵ ligía giñéti jafámurubei ja esériwidubaña lun queísi gürgia ja adúgütiña buíti. Wel, lachúlürüba wéyu lun jerésibiruni le jadúnabei luágu wuríbani le jadúgübei.

Lasúfurirun Páblo luágu lesériwidun lun Crístu queísi apóstolu

¹⁶ Nariñaguñaya jun. Úa la ni ában arítaguti luágu ladúga lan lúlü lan náu nadímurejan-bei jun ítara, ánjein jarítagua jubálin ítara, ígira jumána lun nadímurejan jun quei ában lúlü táu, lun gñe gayára lan napántajan murúsun. ¹⁷ Dan le nadímurejan buíti nuouúgua, madímurejaantina láu ában únabuni quei ligáburi ladímurejan Crístu, nadímurejan quei jadímurejan ibídiouguatiña áu. ¹⁸ Queísi japántajan arúfudajatiña jagánagua láu buri cátei le lánina ubou le, napántajaba gñe. ¹⁹ ¡Quei lanárimebei lichü jáu, awánda jumútiña lúlü

táu láu ugúndani! ²⁰ Lugúndun awánda jumútiña ja afósurbalün lun jesériwidun joun, jáma gíñe ja aságarubalin le júmati, ja anúgübalün jánime, ja ouserubalün quei ni cáta, ja agáyuajabaña jigíbuagun. ²¹ Láu sun nibúsigari nan lun naríñaguni, ¡weírítí buga wedébilin lun wadúgüni cátei líra!

Ánjeinti le uágubei gayára lan janáangun jóungua, gayáraati gíñe nanáangun núngua luágu (nadímurejaña méme queísi ában lúlü táu). ²² ¿Jarásan Hebréona jagía? Áu sun. ¿Linásiñuna Israel jagía? Áu sun. ¿Linébaanfaangu Abrahám jagía? Linébaanfan gíñe áu. ²³ ¿Esériwidutiña lun Crístu jagía? Sügútimaatina jáu láu sun nadímurejaña lan queísi ában lúlü táu dan le naríñaguni. Nádágimeinjaadina sügú jáu, beíwaadina sügú jáu, dáúwaadina sügú jáu, sarágujali weíyaasu yaráfa nan lun nouñwen. ²⁴ Seíngüjali weíyaasu jabeíchun-ina juríu láu darándi-néfu beíti. ²⁵ Úrüwa weíyaasu jíchaagun Rómána wéwe nuágu, ában weíyaasu jachúrágun juríu dúbü nuágu. Úrüwa weíyaasu tabúluchun ugúnein to ídaanboun náfayaja náu, ában weíyaasu sügútina ában áriebu lúma ában wéyu anágü baránaja lárígíñe tabúluchun ugúnein náu. ²⁶ Aweíyasujaadina sarágu luágu luwádígimari Wabúreme, áni luágu buri weíyaasu ligía daríguaadina núngua lídan pelíguru dúnarugu, jádan jíwerutiña, jádan nupaísanu, lúma jádan teréncha. Daríguaadina núngua lídan pelíguru ubúru, áraabu, lúma baránaja, lúma lídan pelíguru jádan gürígia aríñagutiña luágu idújeñu jamá lueígiñe Jesucrístu, le jayéeni. ²⁷ Deréti nuwádígimaridun láu sarágu lénreengúnga, reídeijadina marúmugunga sarágu weíyaasu, súfurijadina ilamaü lúma mágürabu, ayúnaraadina gíbe, súfurijadina lidífliga lúma tiloígua anáanguni.

²⁸ Bougudi lueí buri cátei le lúma buri ámu cátei, ságü wéyu nasándiruni lijúrti nidíjeri jawágu tílana sun ligílisi. ²⁹ Ánjein débili lubeí ában gürígia, sandítina camá jamuga áu débilibei. Ánjein áburuja ában gürígia lídoun figóu, weírítí nigárigu luágu. ³⁰ Ánjein lúnti lubeí napántajan lun gayáraabei lan jerésibirunina queísi apóstolu, napántajaba láu buri cátei le, le arúfudubalin nidébilin. ³¹ Búngiu, le Lubúngiute áni Lúguchi Wabúreme Jesucrístu, le únbei lúnti lan líchugúniwa uweíríguni lun sun dan, subúdi lumúti luágu inárüni lan naríñagubei. ³² Dán meja le ubúru nubeí Damásco, ába líchugun gumádimati le esériwidubei lun urúei Arétas óunigirutiña luágu buri lubéneri fulásu ligía lun janúgünina adáüra. ³³ Ába jaráriragüdünina numádagu lídan ában faníñe lídaangíñe ában funédere láni lubárierun ubúru, ítara líña neséfurun jájaburugugiñe náganiñu.

12

Labájüdagun Páblo luágu buri cátei le larúfudubei Jesucrístu lun

¹ Magáñeirunti gürígia ni cáta láu ladímurejan buídu luóúgua. Láu sun líra, nabájüdagua jun guetó luágu buri cátei lé meja larúfudubei Jesúsú nun. ² Catoúrusu írúmu guetó lueígiñe nanúgúniwa lídoun lúruwan siélu, áu le afíñebei luágu Crístu. Ibídíñeti nun ánjein láu sun lubeí núgubu nídin, lúmoun máma lan láu, Búngiu asúbudirubalin. ³ Subúdi numúti luágu barúwa nan lídoun lúruwan siélu, le méme gíribei paraíso, ibídíñeti nun ánjein láu sun lubeí núgubu o máma lan láu sun núgubu, Búngiu rügúñein asúbudirei. ⁴ Ni siélu, arúfudati Búngiu cátei nun lé buri uágubei siñá lan nadímurejan ni ca un ladúga arámudaguati buri cátei ligía lueí jasúbudin gürígia. ⁵ Gayáraati jamúga napántajan luágu naríjini buri cátei líra, láu sun líra, siñátí napántajan nuóúgua, nadímurejanrügü luágu luweírín mabáfu nan nurúmwagua. ⁶ Láu sun ánjana lan jamúga busén nadímurejan buídu nuóúgua, máma jamúga libídiouniga áu líra, lugúndun inárüni lan jamúga le naríñagubei luágu le asúseredubei nun. Madúgün nubeí lun úa lan ni ában anúgútina weíri sügú láu laríjinina o sügú lan láu le lagáambubei naríñagun.

⁷ Buídu burítí bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámabei lan lúba, ába líchugun ában sándi nuágu camá jamuga ában jíyu charúñu nuágu, liábín quei ában lumégen Máfia lun lasáfuriragüdünina.

⁸ Úrúwaali weíyaasu namúriajan lúma Nabúreme Crístu lun lagídaruni sándi ligía nueí, ⁹ laríñaga Nabúreme nun. “Anájein búma láu nínsiñejabu, áni buídurügüiti líra lun bawánduni sun asúfuriruni, buítimaati laríjín nubáfu jawágu gürígia dan le débili jamá.” Gúndaatina lubeíti láu nidébilin, lun larúfuduni Crístu lubáfu nuágu. ¹⁰ Ligía nagúndaarún-bei láu débili, anabúni, mégei, eíbaajouíni, lúma buri lénreengúnga le nasúfurirubei luágu nesériwidun lun Crístu, lugúndun dántima le débili nan, weíritimaabei nasándiruni lubáfu Crístu nuágu.

Lidíjeri Páblo jawágu tílana ligílisi Coríntona

¹¹ Ábanjadina lúli táu láu nadímurejan buíti nuóúgua, áni jugúya adúgagüdúbalin nun, lugúndun jugúya yebe lúnbei jadímurejan buídu nuágu, máma áu. Múnabuntina sügú jáu súper-apóstolugu ja jafálarubaña, láu sun ni cáta nan. ¹² Lídan wadágimanu le nadúgübei láu sarágu gurásu jagánagua, arúfudúati láu seíni lúma miláguru weíriti le nadúgübei luágu ában lan apóstolu tímatimaati áu. ¹³ Mouserun numútün únabu jaweí tílana tíbiri ligílisi, ánjein gubeírügü láu lubeí meréde nan quei ában ijúrúgu jun. ¡Ferúduna jumána luágu líra!

¹⁴ Guetó aráanseedina lun nídin bisídaün lúrwíwan weíyaasu, áni mámabadina ában ijúrúgu jun. Máma náluguñein le júmabei, jugúya nálugubei lun jedéregeragun júngua le gumúti lun Crístu. Ítara jíña nun queísi isáanigu, áni agúbürigu lúnbaña jóundarun seínsu jabá jasáanigu, máma isáanigu jabá agúbürigu. ¹⁵ Nagástarubei le núbabei láu ugúndani juágu, daríme lun níchaagun núngua le gumúti luágu jufúleisein lun gayáraabei lan jeíbugun buídu lúma Crístu, láu sun genége lání luágu dántima lan le jínsiñe jumá nun, mínsiñetimaatina jun.

¹⁶ Añájein, láu sun subúdi jamáni luágu meréde nan quei ában ijúrúgu jun, aríñagatiña luágu barú nan seínsu júmagine lídan ámu luwúyeri láu íbíbuni. ¹⁷ ¿Ayéeda numútün funági láu ában jádaangiñe gürígia ja nouñajabaña jun lun lanúgüni seínsu júmagine nubá? ¹⁸ Amúriajatina lúma Tito lun lídin bisídaün, oúnaja áu ában idújei lúma. ¿Yéegua lumútün funági Tito? ¿Ma ában láu wóuserun wagía bíangubei, áni ában méme Sifiri Sándu abúgurubalíwa?

¹⁹ Fágua jarítaguatün luágu weséfuraguña lan wóungua jigíbugiñe, máma líña. Lubáragiñe líra, wadímurejaña ligíbugiñe Búngiu queísi lánigu Crístu. Sun le aríñaga wamaalibei, waríñaguñein lúnriügü jawáanserun lídan jeíbugun lúma Búngiu, nidújeñu jínsiñetiña nun. ²⁰ Nidíjeritina lueí dan lánme nídin aríjaün, fágua madárirun nubádün agáburida queísi nabúseerun jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina lueí nadárirunün ageíndagua, láu gimúgaü, lúma igáni tidan janígi, láu jáfaagun lun jawáanserun láu júnabudagüdúniña jidújeñu lueígiñe Jesucrístu, láu marásualugu, agúseragüdúña jidújeñu, láu pántaü, lúma lídan chagáguauü.

²¹ Nidíjeritina lueí lídan lánme nídyna bisídaün, lanúgagüdünina Nubúngiute busíganu jáu, lueí gíñe nayájun jawágu sarágu jídaangiñe ja affgounjañaña lúmagine binárü áni mígirun jamágili iwíyei, salúfuri, lúma buri ámu luwúyeri wuríbani.

13

Ewéridijani lúma lagúmujuún buri mábugaü

¹ Níjánme lúrwíwan weíyaasu nídin bisídaün. Dánme le nachúlürün júmoun, lagúser-agüdúwaba cáda ában le gadúnrunti ánjein añájein lubeí biáma o úrúwa geféentiña luágu lidúnrun. ² Luágu meja libáman nuweíyasun júmoun, wéridi numútiña meja ja adáagubaña wuríbani lun jasáansiraguni jagáburi. Láu sun díse nan jueí guetó, naríñaguñaya joun sun ja asígirubaña adáagua wuríbani, luágu dánme lan nídin bisídaün lúrwíwan weíyaasu, nasúfuriragüdúbaña lan láu ában érei weíriti. ³ Narúfudubeiti jun luágu adímureja lan Crístu nídaangiñe. Áni medébilinti Crístu lídan ligáburi louserunün,

arúfudarügü lumúti luweírin lubáfu jagánagua. ⁴ Inárüni luágu jilá lan luágu gurúwa queísi débiliti, ába labágaridun láu lubáfu Búngiu. Débilitiwa gíne queísi ligía dán meja le laganouñbei ya ubouágu, áni quei sará lan Cristu lídaangiñe ouweni láu sun lubáfu Búngiu luágu, wachúlürüba júmoun láu sun lubáfu Búngiu wawágu ladúga lídaañadiwa lan ában lúma Cristu.

⁵ Joúchagua jumá júngua lun jarjini ánjein lánigu jubeí Cristu le tímatimaati, joúchagua jumá júngua, mouchugua jumána. ¿Ibídñeti jun luágu nñjein lan Cristu jídan ánjein afñe jubeí le tímatimaati luágu? ⁶ Agúrabatina jasúbudiruni luágu afñe wamá luágu Cristu le tímatimaati, áni nñjein lan agánawa wádan láu sun lubáfu, ⁷ ladúga mabúseerun wamá warúfuduni wabáfu quei apóstolugu láu wasúfuriragüdünün luágu luríban jigáburí. Busénrügütiwa lun buídu lan jeíbugun lúma Búngiu láu sun jamúga ígirúa wamá marúfudunga wabáfu quei apóstolugu. ⁸ Dan rügüñein múaran lan lagáburidun gürígia lúma linárün Búngiu, labúseerúa larúfudúniwa nubáfu queísi apóstolu lun nasúfuriragüdüni gürígia luágu lífigoun, dan le buídu lan jóúdin lúma Búngiu, mabúseerúnwati narúfuduni nubáfu láu abeíchuni. ⁹ Gúndaatina lun naganouñ quei mabáfuti ánjein buídu lubeí jigáburí, áni wayúmuraguamémeba lun jíábin lun jabuídurun le gumúti. ¹⁰ Nabúrújañoun gárada to jun lubáragiñe nídin arjáün, lun gayáraabei lan jasáansiruni jigáburí lubáragiñe nachúlürün júmoun, lun memégeirúniwa lan narúfuduni nubáfu juágu quei apóstolu láu nasúfuriragüdünün. Lugúndun rúlumuti Búngiu ubáfu nun queísi apóstolu lun nawáanseragüdünün lídan jeíbugun lúma, máma lun neréderunün lueí.

¹¹ Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburí, ragújuma dúgüdaguauí, abágarida jumá lídan úarani lúma darángilaü. Ítara lúba júmabei lan Búngiu láu lidárangilan lúma línsiñejabu. ¹² Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua. ¹³ Mábuga jáña sun wadújeñu lídan afñeni jun.

¹⁴ Resíbi jumeí labíniragüle Jesúsu, lúma línsiñejabu Búngiu, sandí jumeíme Sífiri Sándu júmagua. Ítaralá.

LIGÁRADAN PÁBLO JOUN GALÁCIANA

Labúrrijan Páblo joun tílana liglisi buri to Galáciaboun

¹ Anája áu Páblo, le láni Jesucrístu apóstolu. Máma gürígia anúadirubalina lun apóstolu nan, máma gíne gürígia óunajabalina apúrichija luágu, Jesucrístu guánarügü lúma Wáguchi Búngiu le ásaaragüdübalin lídaangiñe óúweni, jagía óunajabalina quei apóstolu. ² Áu jáma sun wadújeñu lueígiñe Jesucrístu ja númabaña ya, wabúrújañoun gárada to jun, jugúya le tílana sun liglisi to Galáciaboun. ³ Binílaün Wáguchi Búngiu lúma Wabúreme Jesucrístu, ibija jumá gíne darángilau jámagiñe. ⁴ Rúlumuti Jesúsu libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina uboué le, queísi labúseeruni Búngiu. ⁵ ¡Uweíríguni lun Búngiu lun súnwandan! Ítaralá.

Ában rügúñein luwúyeri ligáburi wasálbarun

⁶ ¡Weíríti nanígi láu lufúresen jígiruni Búngiu le agúarubei jun lun lánigu jumá luágu le ladúgübei Crístu juágu, láu luweírín línsiñejabu! Furéseti jasáansiruni jafñerun afálara ámu arúfudajani lún nege jadáriruni jasálbarun lídaangiñe, ⁷ iyéeni arúfudajani ligía. Chúlújaña wügúriña jagánaguóun, ja buséntiña jañawurijani jarítangun lun jafálarun ában úma le maríchati—ámu lueí jafñerunrügü luágu Jesucrístu lun jasálbarun. ⁸ Wel, furúmieguaarügü gürígia le ñúbinbei adímureja jun luágu ámu luwúyeri asálbaruni lueí le arúfudaja wamáalibeí jun, cáteínein lan gürígia ligía, ñeideilá lábugiñe líñaragun Búngiu lun sun dan, áu yebe, ában yebe ánjeli siélugiñe! ⁹ Aríñaga náali meja áni naríñagayaali guetó. Ánjein ñúbin ában gürígia arúfudaja ámu luwúyeri ligáburi asálbaruni lídaangiñe figuó jun lueí le resbí jumáalibeí, ñeideilá lábugiñe líñaragun Búngiu!

¹⁰ Dan le naríñaguni le, ¿náluguña neréderun buídu jagíbugiñe gürígia, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe gürígia? Lun jamúga ligía lan nabúseerúbei, mámaadina jamúga ában eseríwiduti lun Crístu.

Ligáburi lachúlürün Páblo lun ábanbei lan láni Jesúsu apóstolu

¹¹ Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe gürígia liábin, ¹² máma lúmagiñe ni ában gürígia nibíjei, máma gíne larúfudajan ni ában gürígia nun, Jesucrístu guánarügü asúbudiragüdübalin nun.

¹³ Agáamba jumáali ída líña lán meja nigáburi dán meja le gúnfuligidina lúma Búngiu láu luwúyeri jagúnfulirun jurú, subúdi jumáali ída líña lán meja lanárime neíbaajaniña tílana lilígílisin Búngiu, áfaagaa áu lun nagúmchaguagüdüniña. ¹⁴ Lídan ligáburi jagúnfulirun jurú lúma Búngiu, furésetina meja sügú jáu sarágu jádaangiñe nupáisanun ja madíseguati jagúriajouñ núma, ladúga derégüdatimáatina meja lídan nagúnfulirun láu jagáburi binádu nagúbürigu. ¹⁵ Ánjeinti Búngiu, anúadira láadina méja lubáragiñe nagúriajouñ lun neseríwidun lun, ába lagúarun nun luágu luweírín línsiñejabu lun lánibadina lan. ¹⁶ Lídan lidáni, ligía lugúndaanbei Búngiu lun lasúbudiragüdüni Liraú nun lun gayáraabei lan napúrichijani lubúidun ugánu joun ja mámabaña jurú luágu ligía lan Wasálbaragülebei. Lárigiñe nasúbudiruni Jesucrístu, mídintina álügüdaja ni ca úma, ¹⁷ mídin áu Jerusalén aríjaña ja apóstolubaña nubáragiñe, lubáragiñe líra, ába nídin furése louábawagun Arábia. Lárigiñe, ábaya nagíríbudun ubúrugin Damáscu.

¹⁸ Darí úruwa írúmu lárigiñe, ligía nídin Jerusalén, ligíati nasúbudiruni Pédro, ába neréderagun queínsi wéyu lúma. ¹⁹ Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesúsu. ²⁰ Ninárün jáu ligíbugiñe Búngiu luágu inárüni lan le nabúrújabei jun.

²¹ Lárigiñe líra, ába nídin loúbawagun Síria lúma Cilícia. ²² Ja wadújeñu lueígiñe Crístu ja tídaanbaña lillíglisin Crístu to loúbawaguboun Judéa, maríjin jamáginá meja lídan dan ligía, ²³ agáambarügütiña laríñawagún. “Wügúri lé meja esbaajabaliwa, lapúrichijañein ugánu le lánina affíneni luágu Crístu queísi Wasálbaragile guetó, áni ligía lé meja busénbei lagúnrinchaguni wafínen luágu Crístu.” ²⁴ Ába jíchugun uweíriguni lun Búngiu luágu lasáansiraguni nigáburi ítara.

Resíbi jamúti jíbiri apóstolugu Páblo

2

¹ Catoúrusu irúmu lárigiñe, ábaya nídin Jerusalén úara lúma Bernabé, barú numuti gíñe Títo númagua. ² Nídinbei ñi ladúga arúfuda láali lan Búngiu nun luágu lúnti lan nídin. Ñi Jerusalén, ába nadámuridagun jáma ábutigu affíñetiña, ába nabájüdaguni joun ída líña lan narúfudajan joun ja mámabaña juríu luágu wasálbarun, nadúgünbalin líra lun gayára lan jánjarun lun le narúfudajabei, lueí leréderun le adúga náalibei lúma le nadúgübei quei ni cáta. ³ Resíbi jamúti, áni ni Títo, le noúbabei, mafósurun jamúti lun lerésibirun circuncisión, láu sun máma lan juríu. ⁴ Inárüni luágu añájein lan eyéjatiña luágu idújeñu jamá lueígiñe Jesucrístu, ádaragutiña jóungua wagánaguouún arámudaguarügü, buséntiña lun líchugúniwa gumádi luágu lúnti lan lerésibiruni Títo circuncisión ánjein busén lubei lun láni lan Búngiu. Belútiña yéetiña jagía quei arfaajatiña lun jaríjini ída líña lan wagáburi boúgudi lueí lilúrudun Moisés lídan woúndaragun lúma Jesucrístu, buséntiña jamúga lúnya wayábin lun idámunime lun lúrudu ligía. ⁵ Mígraguagüdüntiwa woúngua joun ladúga busén wamá lun ñi méme lan inárüni le lánina ugánu luáguti asálbaruni júma, jugúya le mámabei juríu, meméterunga ámu buri cátei lánwoun le lúnbei jadúgüni lun jasálbarun lueídügüya lun jafíñerun luágu Jesucrístu.

⁶ Ja asúbudirúabaña queísi ábutigu—láu sun, mebérese nan láu cátañañanu lan ladúga magúseragüdünti Búngiu luágu cátei le genégerügüti —míchuguntiña ábutigu jagía ni ában iséri luwúyeri arúfudajani nun lun níchuguni jun lánwoun le napúrichijabei. ⁷ Lubáragiñe líra, ábarüga jasúbudiruni luágu Búngiu lan íchugubalin wadágimanu le lánina lapúrichijoún ugánu luáguti asálbaruni joun ja mámabaña juríu nun, ítara quei buga líchuguni wadágimanu lun Pédro lun lapúrichijani ugánu méme ligía joun juríu. ⁸ Arija jamáli luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan gíñe ñadágimeinbei nídaangiñe quei apóstolu jádan ja mámabaña juríu.

⁹ Queísi subúdi jamáni Jacóbo, Pédro lúma Juan, ja anügúbaña quei weírigutimaatiña, luágu Búngiu lan fuleíseibalina lun líchuguni ubáfu le nun, ába jíchuguni jájabu woun, áu lúma Bernabé, quei jánigu lídan luwádigimari Crístu, luágu gíñe gúnda jamá lun woúdin ñadágimein lídan jageíra ja mámabaña juríu, sun añája lan jagía ñadágimein lídan jageíra juríu. ¹⁰ Amúriajarügütiña wáma lun warítagn jawágu gudemetiña, áni nijánti cátei le nouchubei nadúgün láu sarágu goúngi.

Ladeínjan Páblo lun Pédro ubúругu Antioquía

¹¹ Dan le lídinbei Pédro ubúругu Antioquía, ába nadeínjan lun ligíbuagun, lugúndun mabuídun lan le ladúgübei. ¹² Furúmiñe meja, jóúti meja jáma affíñetiña luágu Crístu ja mámabaña juríu (ja mebéresenbaña láu circuncisión lúma buri ámu gumádi lídan lilúrudun Moisés). Ánjeinti lárigiñe jachúlürün gürígia loúnajan Jacóbo, ligía lagúme-serun Pédro adíseða jawéi ja mámabaña juríu, ába meíngjali lan jáma ladúga lanúfude lueí le gayáraabei jariñagun ja afíñebaña luágu lúnti lan jerésibiruni wügúriña circuncisión lun jasálbarun, lun gíñe meígin jamá juríu lídan ában jáma ja mámabaña juríu. ¹³ Játí jíbiri juríu ja affíñebaña luágu Crístu, ába júaradun lúma Pédro lídan cátei mabuídun le ladúgübei, ába gíñe lúaradun Bernabé jáma lídan cátei ligía. ¹⁴ Dan le naríjinbei luágu meíbugun jamá úara lúma inárüni le larúfudajabei ugánu luáguti asálbaruni (luágu man lan asálbaruni ni

cátei lúma lilúrudun Moisés), ába naríñagun lun Pédro ligíbugiñe sun adámurini. “Amúru le jurú, berédera abágarida quei ja mámabaña jurú, mabágariduntibu quei jurú. ¿Ída líñati babúseerúnbei bafósuruniña ja mámabaña jurú lun jabágaridun quei jurú?”

Sálbawatiña jurú, queísigubeirügü sun güriña, luágurügü jafiñen luágu Jesucristu

¹⁵ Ába nasígirun aríñaga joun.

—Jurú wagía lúmagiñe wagúriajoun, aríñagatiwa luágu maffigoun wamá, luágu mítaran wamá quei ja mámabaña jurú ja agúriajoubaña bougudi lueí lilúrudun Búngiu. ¹⁶ Láu sun líra, subúdi wamúti luágu úabei lan ní ában eréderuti richágu ligíbugiñe Búngiu luágu ladúgüni le lubeíbei lilúrudun Moisés, láurügübei lafiñerun luágu Jesucristu lerédera richágu ligíbugiñe Búngiu. Ligía giñe lébubei wafiñerun luágu Jesucristu, wagía le juríubei, lun gayáraabei lan weréderun richágu ligíbugiñe Búngiu lídaangiñe afiñeni le, máma lídaangiñe wadúgüni le lubeíbei lilúrudun Moisés, lugúndun úabei ní ában eréderuti richágu ligíbugiñe Búngiu lueígiñe ladúgüni le lubeíbei lilúrudun Moisés.

¹⁷ Ítara líña lubeíti, quei wáluajan weréderun richágu ligíbugiñe Búngiu lídaangiñerügü Jesucristu, ába waríjin luágu gaffigoun méme wamá queísi ja mámabaña jurú ladúga wabágariduña lan giñe guetó bougudi lueí lilúrudun Moisés, ¿gayáraati wariñagun lueígiñe líra luágu Crístu lan gaffigoungüdüwaliwa? ¿Ni cátei líbe líra! ¹⁸ Lubáragiñe líra, lun jamúga wagíribudun lun weménigidun luágu wagúnfulirun lúma lilúrudun Moisés lun wasálbarun lárigiñe weménigidun luágurügü wafiñerun luágu Crístu, warúfuduñein luágu magúnfulirun wamá lúma linárün laníchigu lúru luágu ligía, áni gaffigountiwa. ¹⁹ Áu, queígiubeirügü jiláadina lan lun lilúrudun Moisés, lúru méme ligía ouwedagüdübadina lun, lun gayára lan nabágaridun lun Búngiu. ²⁰ Rúguatina núngua quei jiláadina lun figou, dáwaguañu luágu gurúwa lúma Crístu. Mámaadina lubeíti áu méme abágaridubei nídaangua, Crístu abágaridubei nídan. Ibágarí le nabágaridubei lídan nógubu, nabágariduñein láu sun nafiñen luágu Liraú Búngiu le jínsiñejabúbei nun, ába ledéregeragun lúngua lun lounwen nuágu. ²¹ Mabúseerúntina lubeí namájarun lun lareíni Búngiu láu nagíribudun lún buri igáburi lánina lilúrudun Moisés, lugúndun lun jamúga gayára lan leréderun güriña richágu ligíbugiñe Búngiu láu lagúnfulirun lúma lúru luágu ligía, úati jamúga ju lan lounwen Crístu.

Lúru ódi afiñeni

3

¹ ¡Jugúya Galáciana, magáambaditün giñe! ¿Ca abíñaragubadün lun magáambun jubeí lan ugánu le inárünibeí libúgürü wasálbarun? Lídan meja wapúrichijan jun, arúfuda wamúti laníchigu lounwen Crístu luágu lugúruwan jun, furáangu. ² Aríñaga jumeí cátei le nun. ¿Lueígiñe jagúnfulirun lúma lilúrudun Moisés jerésibirei Sífiri Sándu ódi lueígiñe jafiñerun luágu le jagáambubei luágu Crístu? ³ ¿Ída líña ítara lubeí jumágaambadi? Gumésütün eíbuga lúma Crístu láu lubáfu Sífiri Sándu, ¿guetó jarítaguatün funági luágu buftimaabei lan jeíbugun lun jígiruni Sífiri Sándu lun jagúnfulirun lúma jagáburi jurú? ⁴ ¿Marúfudajaangili sun le jasúfurirubei jun? ¡Arúfudajaali lámuga jun! ⁵ Dan le líchuguni Búngiu lání Espíritu jun, adúga ligía miláguru jagánagua, ¿cásan uágu ladúgei líra? Máma lugúndun adúga jumáni le lubeíbei lilúrudun Moisés ladúgei, ladúgünbalin lugúndun afiñe jumá luágu le jagáambubei luágu Liraú.

⁶ Jarítagua jumá luágu Abrahám. Rúlumuti meja sun lafiñen luágu Búngiu, luágu lafiñen, ába lerésibiruni Búngiu queísi ában wúgüri richáguati. ⁷ Ligía lubeíti jugúya, lúnti jasúbudiruni luágu ja lan afiñebaña, jagía lan linébaanfaanbaña Abrahám tímatimaatiña. ⁸ Queísi subúdi lání Búngiu lubáramegiwa luágu ñibaña lan jádaangiñe ja mámabaña jurú lun jayábiba lan lun jeréderun richágu ligíbugiñe láu jafiñerun luágu Jesucristu, ába lariñaguni ugánu bufti lun Abrahám lubáramegiwa, queísi búruwañu lan tídan lílburun.

“Jabínirúaba sun gürígia uboúagu bídaangiñe.” ⁹Ítara líña lubeíti, ja afíñebaña, biníwatiña úara lúma Abrahám le afíñerubei luágu Búngiu.

¹⁰Ja afíñerubaña luágu jasálbaruba lan láu jagúnfulirun lúma lilúrudun Moisés, buléiguatiña, lábugiñeñanu líñaragun Búngiu, lugúndun taríñajare Lerérun Búngiu. “Sun ja magúnfulirunbalin sun le bürúwañubei tídan lílburun nilúrudun le níchugubei lídaangiñe Moisés, lábugiñeñanu níñaragun.” ¹¹Furáanguti lubeíti luágu úa lan ni ában eréderuti richágu ligíbugiñe Búngiu luágu ladúgüni le laríñagubei lilúrudun Moisés, lugúndun taríñajare Lerérun Búngiu. “Láu lafíñerun gürígia luágu Búngiu lerédera richágu ligíbugiñe, íbjaleíme íbágari magúmchaditi.” ¹²Ánjein lilúrudun Moisés máma cátei lánina afíñeni, lánina cátei le adúgúwarügüti ladúga laríñajare lúrudu ligía. “Láu rügúñein jamúga lagúnfulirun gürígia láu sun igáburi lánina lúrudu le, libíjei íbágari magúmchaditi.”

¹³Wagía queísi gürígia garaúwarügütiña, mabáfutiwa lun wagúnfuliruni sun lúrudu ligía. Ába laséfuruniwa Crístu lídaangiñe líñaragun Búngiu lé lúnbei yebe láburujan wawágun lueígiñe magúnfulirun wamáni sun lilúrudun Búngiu le líchugubei woun lídaangiñe Moisés. Barú lumuti Crístu líñaragun Búngiu luoúgua wewéñagua lídan le loúnwenbei luágu gurúwa.” ¹⁴Adúga lumúti loúnwen Crístu lun liábinba lan abíniruni le uágubei laríñaga Búngiu lun Abrahám, lídaangiñe Jesucrístu joun gíñe ja mámbaña jurfu, lúma lun werésibiruni, sun wagía, Sífiri Sándu le uágubei laríñaga Búngiu, láu wafíñen.

Lilúrudun Moisés, lúma lerérun Búngiu lun Abrahám

¹⁵Nidújeñu, níchiga ában jémpulu jun lídaangiñeti jabágari gürígia. Dan le ladúgün wügüri ában darádu, ába laseñiruni, úati ni ában lun gayára lan lagúluuduni ni lun líchugun ni cátei lánwoun. ¹⁶Ítara líña gíñe, rúlumuti meja Búngiu lerérun lun Abrahám lúma lun linébaanfan. Maríñaguntu Lerérun Búngiu “binébaanfaangu”, camá jamuga jawáguti sarágu gürígia, taríñajare “lun binébaanfan”. Laníchigu líra, “ábanrügü gürígia”, le Crístu. ¹⁷Niján le naríñagubei. Adúgati Búngiu ában darádu lúma Abrahám, ába lachoúruruni, gádürü-san darándi irúmu lárigiñe, ába líchuguni lilúrudun lun Moisés lun lafúnraanguagüdüni joun gürígia. Ligía darádu lubeí lé meja ladúgübei Búngiu lúma Abrahám siñáti lagúluudúniwa láu ában lúrudu le núbinbei gádürü-san darándi irúmu lárigiñe, lun lígüriuni lerérun Búngiu lun Abrahám mebébiga. ¹⁸Lun jamúga lídaangiñeti lan agúnfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúnfulirún láu lerérun. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibei cátei ligía madúgünga ni cátei lun lagáñeiruni.

¹⁹¿Cáti un ju lan lilúrudun Moisés ánjein siñá lubei lasálbaruniwa? Núbinti lúrudu ligía sarágu irúmu lárigiñe lidáradun Búngiu lúma Abrahám lun larífuduni jaffigoun gürígia joun, lúntirügü ladúrarun darí liábin linébaanfan Abrahám, le Crístu, le gíñe úmabei ladügüwa darádu ligía. Rúlumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüdüni lúrudu ligía joun gürígia. ²⁰Ánjeinti dán meja le ladúgübalin Búngiu lidáradun lúma Abrahám lun labíniruniña sun gürígia lídan, mayúsurunti ánjeligu, mayúsurun ligía gürígia, ligía adúgübalin sun cátei.

Ca lan uágu níjein lubei lilúrudun Moisés

²¹¿Laríñaguña funági le luágu múaradun lan lerérun Búngiu lúma lilúrudun le líchugubei lídaangiñe Moisés? Máma líña. Lun jamúga rúa lan ában lúrudu le íchugubei ubáfu woun lun wagúnfulirun láu, gayáraati jamúga jayábin gürígia lun jeréderun richágu ligíbugiñe Búngiu láu jagúnfuliruni le lubeíbei lúrudu ligía. ²²Lídan linárün cátei, mabáfutiwa lun wagúnfulirun lúma lilúrudun Búngiu, le líchugubei lídaangiñe

Moisés, queísi laríñagun Búngiu tídan Lerérun. “Sun gürígia lábugiñeñanu lubáfu figoú.” Ítara líña lun lídaangiñerügü lan affñeni luágu Jesucrístu gayára lan jáfuridun gürígia lábugiñeñe lubáfu figoú lun jeréderun richágu ligíbugiñe Búngiu láu jaffñen luágu Jesucrístu, queísi meja laríñagun Búngiu lun Abrahám.

²³ Lubáragiñebei liábin Crístu lun gayáraabei lan wafñerun luágu lun wasálbarun, lábugiñeñadiwa buga lubáfu lúru agúraba liábin. ²⁴ Ába lubeíti lanúgüniwa lilúrudun Moisés lánime camá jamuga irájüñü wagía lun latoúnigiruniwa lueí wurfbani darí liábin Crístu lun dánme lan wafñerun luágu, gayáraajalíme weréderun richágu ligíbugiñe Búngiu. ²⁵ Guetóti, quei chülújali lubeí Crístu, mámaadiwa lábugiñe loúnigirun lilúrudun Moisés.

²⁶ Guetóti lirájüñü Búngiu sun jugúya luágu jaffñen luágu Crístu, lídaañadün ában lúma. ²⁷ Sun jugúya le belújalíbei lídoun ában lúma Crístu láu jabásterun, ibíjaadün ában igáburi líbe ligáburi Crístu. ²⁸ Mámaali cátei lánina lun juríu jumá o máma jumá juríu, o idámuni o máma idámuni, wügúri o wúri, ladúga láu lídaañadün lan ában lúma Crístu Jesús, sun jugúya ábanrügüñadün. ²⁹ Ánjein lánigu jubeí Crístu, linébaanfaangu Abrahám jugúya, jerésibirubei le uágubei laríñaga Búngiu lun Abrahám queí jalágaante.

4

¹ Níjan cátei le nabúseerúbei naríñagun. Dan le loúnwen ában úguchili áni nüräügili liraú le lúnbei lerésibiruni alágan, mabuúduñtimaati dan lun irájü sügü jáu lumúsuniña lúguchi, láu sun ligía lan labúremebei alágan, ladúga siñágili lan layúsuruni. ² Añajein gürígia oúnigiruti, aríja jagía láu lalágaante darí lachúlürün dan le líridubei lúguchi lun lerésibiruni. ³ Ítara líña lasúseredun wáma. Lubáragiñebei liábin Crístu ubotúagun, lábugiñeñadiwa meja lúru lúma buri igáburi le mámabei lúnti ladúrarun lun sun dan. ⁴ Dan le lagúnfulirunbei dan, ába loúnajani Búngiu Liraú, le agúriajoúbei tídaangiñe ában wúri, ába liábin quei juríu lábugiñe lilúrudun Moisés. ⁵ Liábinbei ítara lun laságaruniwa lábugiñeñe lúru ligía, lun lerésibiruniwa Búngiu queísi lirájüñü.

⁶ Lúnti larúfuduni Búngiu luágu lirájüñüjadiwa lan, ába loúnajani láni Liraú Espíritu, le méme Sífiri Sándu, tídoun wanígi, áni agúajati Espíritu ligía wadaangiñe lun Búngiu. “¡Núguchi!” ⁷ Lirájüñü lubeíti Búngiu wagía, mámaadiwa idámuni, áni ladúga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le buídubei joun ja afñebaña

⁸ Dán meja le ibídiñegili Búngiu jun, jadámuñadün meja “búngiugu” ja mámabaña búngiugu lídan linárün cátei. ⁹ Ánjein guetó, láu subúdi jumáali lan Búngiu, —lídan lirícha cátei, láu subúdi láadün lan Búngiu — ¿ída lubáyan gayára lan jarítangun lúnya jíchaagun júngua queísi idámuni lábugiñoun lúru lúma buri igáburi le mabáfubei lun ladúgün ni cáta jun? ¹⁰ Adáguatün buri fédu ítaga wéyu, ítaga játi, ítaga dan, ítaga írúmu queísi laríñaguni lilúrudun Moisés lun jeréderun richágu ligíbugiñe Búngiu, lídan jarítangun. ¹¹ Janúfudetina lueí masériwidun lan wadágimanu le nadúgübei jagánagua lun ni cáta.

¹² Nidújeñu, ayúmuraguatina jun lun jarítangun queísi áu luágu buri cátei le, ladúga furíjadina lun mámaadina lan lábugiñe lilúrudun Moisés queísi meja mámaañadün lan lábugiñe lúru ligía. Madúgüntün ni ában wurfbani nun lídan meja júma nan, ¹³ quei subúdi jumáni, ladúga meja ában sándi le nuágubei gayára lubeí neréderun júma furúmiñeti dan lun napúrichijani ugánu lánina asálbaruni jun. ¹⁴ Sándi ligía lé meja nuágubei, ában meja ochúni nun, múnabunti janúgüniwa luágu líra. Lubáragiñe líra, ába jerésibirunina queísi ában láni Búngiu ánjeli, camá jamuga Jesucrístu guánarügü áu. ¹⁵ ¿Ca susérebei lun ugúndani lé meja jasándirubei náu? Gayáraati naríñagun luágu jáni fuleísei luágu ánjein lan jamúga meja lúnti, jaságaruñein lan jamúga jágu lun jíchuguni nun. ¹⁶ Guetó, ¿jáganijadina funági lueígiñerügü naríñaguni inárüni jun?

¹⁷ Weíríti juwámaan joun mútu ja, mabuídunti jarítangun jubá. Le jabúseerubei, lun jadisedagüdüniün wawéi lun ában lánme jawámaadun jun. ¹⁸ Buíti lun juwámadirun joun ámu, ñi áu yebe júma o úaadina lan júma, ánjein láu lubei lubuídun arítangun ladúguwa. ¹⁹ Nirájüñü, nasúfuriruñaya igárigu juágu quei ában úguchuru dan le tagáridun, áni itara méme núba asúfurira daríme lun jarúfuduni luágu ñjein lan Crístu jídan. ²⁰ ¡Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan naritagua juágu!

Jémpulu tuáguti Agár túma Sára

²¹ Jugúya le busénbei jíchaagun júngua lábugiñoun lilúrudun Moisés, aríñaga jumeí cátei le nun. ¿magáambun jumágili le laríñagubei lilúrudun Moisés? ²² Laríñajare luágu garájüñü lán meja Abrahám bián irájüñü, ában táu lidámun, le ában táu lúmari to ában wúri to máma idámuni. ²³ Le tiraú idámuni, itara líña lagúriajóun quei jagúriajóun sun irájüñü, ánjein le tiraú to máma idámuni, lagúriajóun lun lagúnfuliruba lan le uágubei laríñaga Búngiu lun Abrahám. ²⁴ Itara líña cátei le queísi ában jémpulu. Bián wúriña ja, itara jáña queísi bián darádu le ladúgubei Búngiu. Adúgati ában darádu lúma Moisés dan le líchugunbalin lilúrudun lun luágu wúbü Sinaí. Darádu ligía, itara líña queísi Agár ladúga sun lan gürígia ja lábugiñebaña lúru luágu idámuni lun jagúnfulirun lúma, queísi idámuni jamá sun tirájüñü Agár. ²⁵ Wúbü le Sinaí lídaañein fulásu le gírubei Arábia (le ñi lubei jagánoua ladúgawagun tiraú Agár). Agár liyáwaboun wúbü ligía lúma lúru luágu le íchugubei ñi. Ubúru luágu le Jerusalén le guetóbei, itara líña quei wúbü Sinaí lídan dan le sügújalibe, ladúga ubúru luágu ligía jáu sun lílana, itara jáña quei idámuni lun igáburi lánina lilúrudun Moisés. ²⁶ Ánjeinti Jerusalén le siélubei, máma lánina idámuni queísi máma lan idámuni lúmari Abrahám, áni lirájüñü Jerusalén le siélubei wagía. ²⁷ Taríñajare Lerérun Búngiu.

Gúndaaguabá, wúri marajújeitu, amúru to maráuboun, wáguabá láu ugúndani, amúru to ibídiñebe agáriduni bun, lugúndun amúru to áuboun mebésenwa lan, gíbetimaabaña birájüñü sügú táu wúri to garaúboun láu búmari.

²⁸ Nidújeñü, queísigubeirügü Isáac lan irájü le líchugubei Búngiu lun Abrahám lun lagúnfulirun láu lerérun lun, wagía afíñetiña ladúgawagunbaña Abrahám ja uágubaña laríñaga Búngiu lun. ²⁹ Itara queí meja dan ligía, isáani le agúriajóubei lídan ában igáburi quei furúmieguarügü agúriajóuni eibaaja lumúti meja isáani le agúriajóubei láu lubáfu Sífiri Sándu, itara líña gíne lasúseredun guetó—ja lábugiñebaña lilúrudun Moisés eibaaja jamútiña ja mámabaña lábugiñe lúru luágu ligía. ³⁰ ¿Cáteisan taríñagunbei Lerérun Búngiu? Taríñajare. “Bugáboun idámuni láu sun tiraú, lugúndun siñáti gafánran lan tiraú idámuni lídan alágan lúma tiraú to mámaboun idámuni.” ³¹ Nidújeñü, mítaraantiwa lubeíti quei tirájüñü idámuni, itara wáña quei tirájüñü wúri to mámaboun idámuni.

5

Míchaaguaya jumá júngua idámunime

¹ Furígüda láadiwa Crístu lídaangiñe idámuni wamá lun lúru luágu buri lúma igáburi. Reídeí jumá lubeíti le ñi lubei líchugaün Crístu, míchaaguaya jumá júngua idámunime.

² Agáamba jumána. Áu páblo aríñagatina jun luágu ánjaün lan íchaagua júngua lábugiñóun igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun. ³ Naríñagayaali lun furúmieguarügü wúgúri le resíbinbalin circuncisión luágu lúnti lan ladúgüni sun líbiri le lubeíbe lilúrudun Moisés lun gayáraabei lan leréderun richágu ligíbugiñe Búngiu. ⁴ Jugúya le jarítaguabei luágu richágu jumá ligíbugiñe Búngiu láu jagúnfulirun lúma lilúrudun Moisés, ígira

jumáli Crístu, díseedün lueí asálbaruni le láurügüti lareíni Búngiu. ⁵ Wagía, láu lubáfu Sífiri Sándu lúma láu waffínen luágu Jesucrístu, jeménigitiwa luágu weréderuba lan richágu ligíbugiñe Búngiu. ⁶ Ánjein lídaañadiwa lubeí ában lúma Crístu Jesúsú, málati werésibiruni circuncisión lúmoun merésibirun wamáni. Le busénwabei, lun affíñe wamá luágu Jesucrístu lúma lun warúfuduni affíñeni le wawágubei láu wínsiñejabu joun güriña wáledi.

⁷ Buíti meja jeíbugun lúma Crístu, ¿ca ígiragüdübalin lagaambúniwa inárüni jun? ⁸ Mára Búngiu le agúarubei jun adúgübalin líra. ⁹ Mabúlieida jumeí luágu furése lan lawáraüdagun arúfudajani le maríchatí lun lagúnrinchaguni jaffínen sarágu güriña queísigubeirügü résigüda lánun murúsun ísi sun to añóundawaguboun láu. ¹⁰ Neménigíduña luágu Wabúreme Crístu lúnya lasáminaragüdüünün queísi áu luágu buri cátei le. Áni cáteíñein lan güriña le añáwuriñejabi jun, labeíchubei Búngiu.

¹¹ Aríñagatiña arúfudajatiña yeétiña jagía luágu apúrichija nan luágu lúnti lan jerésibirun wügüriña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeíbaajana meme juríu? Lun jamúga napúrichijani circuncisión, maríbaanti jamúga láburujan dimúrei luáguti loúnwen Crístu luágu gurúwa joun. ¹² Ánjeinti jawágu ja abúseerúbaña jádaruni jídoun luágu lúnti lan jerésibiruni circuncisión, ígúndaatina jamúga lun íjbugunun jawáriuwa gumúgubei!

¹³ Ánjeinti jugúya, nidújeñu, agúajati Búngiu jun lun lagídarunün lábugiñegiñe igáburi lánina lilúrudun Moisés, manúga jumeírügü liñáti líra lun lébume gayára lan jasígiruni ugúndani buri le lánina ubou le. Lubáragiñe líra, seríwigua jumá júniwagua láu ínsiñejabuni le jídaanbei jubáruagua, ¹⁴ lugúndun láu jagúnfulirun lúma lúrudu le aríñagubei. “Jínsiñelá güriña bíledi bun queísi bísiñegua búngua”, gúnfulijadün láu sun lilúrudun Moisés. ¹⁵ Góunigi jumá, ánjaün ageíndagua júmagua, jagúmuchaguagüdüba júniwagua.

Ugúndani le lánina ubou, lúma eíbuguni lúma Sífiri Sándu

¹⁶ Niján cátei le naríñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina ubou. ¹⁷ Ugúndani le lánina ubou máma lúmagiñeñein Sífiri Sándu, áni Sífiri Sándu, máma lúmagiñeñein ugúndani le lánina ubou. Gáganiguati ában lúma le ában, ligía lásíñerunbei jadúgüni jugúya cátei le jabúseerúbei yebe jadúgün. ¹⁸ Ánjein Sífiri Sándu lubeí abúgurubadün, mámaadün gíñe lábugiñe lilúrudun Moisés.

¹⁹ Ménreengúnti larijíníwa cátei lán buri cátei le jadúgübei ja afálarubalin ugúndani lánina ubou. Gámariguatiña jámagua mamárieidunga, adáguatiña buri cátei wýyeti, úati nibúsigari jamá láu jasálufurin, ²⁰ judúguatiña joun sándu, abíñaraja jagía. Níjein iyéeejabuni jádan, gáganiguau, lúma emeéndüni. Ménreengúnti jagáñidun, jawougua rügüñein jarítagua súnwandan, fánreinguagüda jamúti adámurini. ²¹ Gimúgatiña, gáfarajadi, gátadi, weínamu jeígin, adúga jagía ámu buri cátei lenége líra. Naríñaguñein jun quei naríñaguni lubáramegiwa luágu ja lan adúgübalin cátei le, mebélorunbaña lídoun laréijan Búngiu.

²² Niján buri igáburi le líchugubei Sífiri Sándu. ínsiñejabuni, ugúndani, darángilaü, gagúraasuni, areíduni, lubuídun igáburi, úaraguni, ²³ manáanguni únguau, ragúguau únguau. Úaraguati buri igáburi le lúma furúmiegurügü lúrudu. ²⁴ Ja lánigubaña Crístu, dágua jamáli sun luwámaan cátei le lánina ubou le joun luágu lugúruwan Crístu. ²⁵ Ítara quei wabágaridun lídaangiñe Sífiri Sándu, lúnti gíñe wígirun lun labúguruníwa Sífiri Sándu lídan le wadúgübei.

²⁶ Moún lumuti wanáangun woúngua, añáwuriñejabi joun wbírigu ítara, rúti gíñe gimúgaü wádaangua.

¹ Nidújeñu, ánjaün aríja luágu áburujaali lan ában jídaangiñe lídoun figoú, jugúya le eíbugubei lúma Sífiri Sándu lúnti jíderaguni lun lagídarun lídaangiñe figoú ligía, adúga jumeí láu mawéiriguni. Lúnti giñe goúnigigua jumá júngua lueí giñe jáburujan lídoun figoú queísi ligía. ² Ídaragua jumá júmawagua lun jawánduni jijúrúgu, ítara lúba jagúnfulirun lúma lilúrudun Crístu, le lánina ínsiñejabuni.

³ Lúnti wideraguniña wibirigu lugúndun ánjein anáangua güriquia lúngua áni ni cáta ligía, leyéedaguña lúngua. ⁴ Cáda ában güriquia lúnti lagúserun lúmagua ída líña lan ladíñurun. Ánjeinti adáriragua lúngua buíduñu, ligíaba buídu guánarú lúngua, máma ámu, ⁵ lugúndun sun güriquia geféenbaña lun Búngiu jawoúgua, máma jawágu ámu.

⁶ Le únbei larúfudajouá Lerérun Búngiu lúnti lafánreinjani sun luwúyeri íbñini lúma le arúfudajabei lun.

⁷ Mayéedagua jumá júngua, siñáti jéjerajan láu Búngiu. Le lábunagubei güriquia, ligíaba giñe lalúbaja. ⁸ Ánjein ábunagua ában güriquia cátei le íchugubei ugúndani le lánina uboú lun, le méme lábunagubei, líchuguba ában alúbajani le lánina férídi lun. Ánjein ábunagua ában güriquia cátei le íchugubei ugúndani lun Sífiri Sándu, líchuguba Sífiri Sándu ában alúbajani le lánina íbágarí magúmchaditi lun. ⁹ Moún lumuti lubeíti labúchadun wawágu adúgei cátei le buídubei, lugúndun ánjava ítara méme adúgei, walúbajaba buíti dánme le lachúlürün dan lun werésibiruni. ¹⁰ Ligía, adúga wameí lubeí le buídubei joun súnigubei ságú gayára lan, joúntima wadújeñu lueígiñe Crístu.

Ewéridijani lúma lagúmujuún ayóuraguni

¹¹ Aríja jumá luweínamu létera le áubei nabúrúja jun guetó láu nújabu guánarúgi. ¹² Ja abúseerúbaña jafósurunün lun jíchaagun júngua lábugiñoun igáburi le lánina circuncisión jadúgüñein lúnrügi jeréderun buídu jagíbugiñe juríu, lun meíbaajóuniwa jamá lueígiñe jamúga jaríñagun luágu lídaangiñe rügüñein lan loúnwen Crístu wasálbara. ¹³ Ni ja íchaagubaña jóungua lábugiñoun igáburi le lánina circuncisión, madúgün jamúti sun le laríñagubei lilúrudun Moisés, busénrügiñe lun jerésibiruni jugúya circuncisión lun gayára lan japántajan luágu jafósurunün lun jibñini circuncisión. ¹⁴ Ánjeinti áu, mabúseerúntina napántajan ni ca uágu, ában rügüñein cátei uáguti nadímureja weíri—luágu loúnwen Wabúreme Jesucrístu luágu lugúruwan wawágu. ¡Lídaangiñe lugúruwan Crístu jiláañu líña cátei le lánina uboú nun áni jiláañu níña giñe lun cátei le lánina uboú! ¹⁵ Lun Búngiu, ni cáta ánjein íbñi wabálin circuncisión lúmoun mibíjin wamáni, le busénwabei, lun iséri wamá güriquia. ¹⁶ Sun ja abágaridubaña ítara, jagía lánigubaña Búngiu le tímatimaati, resíbi jamá lubeíti darángilau lúma gudémejabu lúmagiñe.

¹⁷ Lúmagiñe dan le ugüñe, mabúseerúntina lun nibíjin lénreengúnga ni ca úmagiñe. Arúfuda lumúti lárígi buri bíti le nuágubei luágu ában nan esériwiduti lun Nabúreme Jesúsu.

¹⁸ Nidújeñu, binflaün Wabúreme Jesucrístu, sun jugúya. Ítaralá.

LIGÁRADAN PÁBLO JOUN ÉFESONA

Labúrújan Páblo joun tílana liglisi to Éfesoboun

¹ Anája áu Páblo, le láni Jesucrístu apóstolu láu lugúndan Búngiu, nabúrújañoun gárada to jun, jugúya le lánigubei Búngiu ja afiñebaña luágu Crístu Jesúsú lídan ubúrugú le Éfeso. ² Binílaün Wáguchi Búngiu lúma Wabúreme Jesucrístu, ibíja jumá gñe darángilau íamágiñe.

Abíniruni le wánibei lugúndun lídan wamá ában lúma Jesucrístu

³ Rúwama uweíriguni lun Búngiu, Lúguchi Wabúreme Jesucrístu, lugúndun láu lídan wamá ában lúma Wabúreme Jesucrístu, biní laadiwa láu sun luwúyeri abíniruni le lánina siélu. ⁴ Lubáragiñebefi meja ladúgüni Búngiu uboú, anúadira lumútiwa lun lánigubadiwa lan láu le lúnbei ladúgüni Crístu wawágu, lun weréderun madúnrunga ligíbugiñe, derégeguñu woungua lun. ⁵ Fánrein lumútiwa lúmagiñe binárü, láu línsiñejabu, lun lerésibiruniwa queísi lirájüñü lídaangiñe Jesucrístu, ladúga ligía lan lugúndaanbei woun. ⁶ Ligía súnwandan lubeí wíchugun uweíriguni lun Búngiu luágu luweírin lareíni le áubei labínirawa dan le lídan wamá ában lúma Liraú le jínsiñebefi lun. ⁷ Láu luweírin lareíni Búngiu, sálba láadiwa láu líta Liraú le áwiyrubei wawágu dan le loúnwenbei luágu gurúwa, ferúdualeí wafígoun. ⁸ Arúfuda láali Búngiu lareíni woun le tímátimaati láu líchugun sun luwúyeri subúdi lúma gunfaráandaü woun, ⁹ subúdigüda láali layúmajan lé meja arámudaguabei woun, o aritaguni lan le lasáminarubei ladúgün. ¹⁰ Según aritaguni le, le lúnbei lagúnfulirun quei lubúdbu dánme le lachúlürün lídáani, ladúnraguagüdübei Búngiu sun cátei lábugiñe lagúmadíjan Crístu, dándu lé buri siélubei quei le ubouagubei.

¹¹ Láu lídaañadiwa lan ában lúma Crístu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lídaañein lugúndan Búngiu le adúgübalin sun cátei quei labúseeruni. ¹² Anúadira lumútiwa lun wabágaridun, wágia le afiñebefi luágu Crístu furúmiñe, lun líñurúniwa líri Búngiu luágu luweírigun. ¹³ Jugúya gñe, dan le jagáambunbalin ugánu le lánina inárüni—ugánu le anúgübalin asálbaruni jun—ába jafiñerun luágu Crístu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sífiri Sándu le uágubei laríñaga, jun. ¹⁴ Sífiri Sándu ligía ában líchoúrún Búngiu woun luágu werésibirubei lan alágan le lúnbei líchuguni Búngiu woun dánme lagúmuchuni lasálbaruníwa, wágia le lánigubei, lun líñurúniwa líri luágu luweírigun.

Lamúriajan Páblo lúma Búngiu lun líchugun subúdi joun afiñetiña

¹⁵ Ligía dan le lubeí nagáambunbei luágu afiñeni le jídaanbei luágu Wabúreme Jesúsú, lúma luágu ínsiñejabuni le juágubei joun sun ja lánigubaña Búngiu, ¹⁶ másuti neteíngiruni Búngiu juágu dan le narítagnun juágu lídan nayúmuragun lun. ¹⁷ Amúriajatina lúma Lubúngiute Wabúreme Jesucrístu, Úguchili Weíriguti, lun líchugun subúdi íñugiñeti jun lun gunfaráanda jumáni le lasúbudiragüdübei jun, lun gñe jasúbudirunitima Búngiu buífdu. ¹⁸ Amúriajatina lúma Búngiu lun larúgoungadagüdüni jisáminan lun jasúbudiruni ca lan uágubei lagúara jun lun jeménigidún luágu, lúma lun jasúbudiruni ída líña lan luweírigun lúma lírisin alágan le líchugubei Búngiu joun lánigu. ¹⁹ Amúriajatina gñe lúma lun lasúbudiragüdüni jun ída líña lan luweírin lubáfu le mébejabei le ñadágimeinbei wádan, wágia le afiñebefi luágu. ²⁰ Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe oweni, ába lañúuragüdüni lueígiñe loúnwenren yágüta siélu. ²¹ Rúlumuti lougiñe sun gumádi, ubáfu, érei lúma arúejani lé buri siélubei, lúma lougiñe sun le gayáraabei liritún, dándu lídan dan le queísi lídan le lúnbei líabín. ²² Rúlumuti sun cátei lábun lubáfu Crístu, rúlei gñe Crístu guánarügü lun

ligíaba lan ichúgüdinaü joun sun güriǵia ja lánigubaña, ja gíribaña lilǵilisin. ²³ Güriǵia jagía, ja méme lúgububaña Crístu, buin jáña láu libágarí Crístu (láu lubáfu láni Espírítu), áni Crístu guánarügü adúgübalin sun catei áni ágüdjaleí.

2

Sálbaadiwa láu lareíni Búngiu

¹ Rújali Búngiu ibágarí magúmuchaditi jun úara lúma Crístu le lásaaragüdübei lí-daangiñe óuweni, láu sún meja jiláñugidün lan lun cátei le luáguti Búngiu, lurúma wuríbani lúma figou buri le gádaanbalün. ² Lídan meja dan ligía, falá jumuti láni ubou le jémpulu, adúgei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu. ³ Ítara líña meja gíñe wabágaridun, sun wagía, luágu ában dan, afálarei wayúmajan, agúnfulira lúma lugúndan wagáburi lúma lugúndan wasáminan, queísi güriǵia garaúwarügütiña. Ligía lúnti lubeí yebe láburuan lanárime ligáni Búngiu wawágun queísi ja jíbiri. ⁴ Weíríti lugúdemejabu Búngiu, ⁵ ába larúfuduni luweírin línsiñejabu woun láu sún meja jiláñugidiwa lan lun cátei le luáguti Búngiu lurúma wafígoun. Ába ladáraruni lubéneri ibágarí magúmuchaditi woun láu lásaaragüdüni Crístu lídaangiñe óuweni. Sálbatiwa lubeíti láu lareíni Búngiu. ⁶ Sarágüda lumútiwa gíñe Búngiu lídaangiñe óuweni lánina figou láu lásaaragüdüni Crístu lídaangiñe óuweni, ába líchuguni wabára woun lúma Crístu yágüta siélu, lúma uweíríguni lánina ubáraü ligía. ⁷ Ladúgünbalin líra lun larúfuduni luweírin wínsiñe lun lúma lareíni woun lídan Crístu Jesúsu lídounme dan le lúnbei liábin. ⁸ Sálbawádiwa luágu lareíni Búngiu, luágu wafíñen luágu. Máma jamúga ában cátei le wagía guánarügübei adúgübalin, Búngiu íchugubalin wasálbarun woun. ⁹ Máma lídaangiñeti cátei le jamúga ladúga mútu, lun úa lan ni ában apántajati lueígiñe. ¹⁰ Lugúndun Búngiu adúgübaliwa, iséri güriǵia wagía lídan Crístu Jesúsu lun wadúgün cátei buíti, quei larítaguni lúmagiñe binárü.

Waráandarun lúma Búngiu lídaangiñe Crístu

¹¹ Jarítaqua jumá lubeíti luágu ída jíña lán meja furúmiñe. Máma meja lídaangiñetün jarásan juríu, ligía lébubei güriǵia ja juríu, ja erésibirubalin circuncisión, ába jagúarunün, “güriǵia ja merésibirubalin circuncisión”, o güriǵia ja mámabaña lánigu Búngiu. ¹² Lídan meja dan ligía, ibídiñegili meja Crístu jun, mámagidün meja lílana linásiñun Israél, ja lumútuniñabaña Búngiu, bougüdiñadün meja lueí lidáradun Búngiu joun lánigu lúma sun le lúnbei líchuguni joun lábugiñe darádu ligía. Jabágariduñá meja ubouagu meménigiga, ibídiñega Búngiu le inárütíbei jun. ¹³ Ánjeinti guetó, quei lídaañadün lan ában lúma Crístu Jesúsu, jugúya meja le dísebei lueí Búngiu, guetó yaráfaadün lun, láu loúnwen Crístu. ¹⁴ Barú laadiwa Crístu lídoun aráandaruni, ladúga adúga láaña juríu jáma ja mámabaña juríu lun ában méme jamá mútu, güriǵia lumúti gáganiguaü lé meja afánreinragubaliña. ¹⁵ Gumúguaguída lumúti cátei le lílirudun Moisés láu sún buri gumádi lánina lírudu ligía láu loúnwen, adúgeina láña juríu jáma ja mámabaña juríu lun ában mémebaña lan lídan. Ítara líña ladúgüni aráandaruni wadaangua. ¹⁶ Láu loúnwen Crístu luágu gurúwa, ába lagúmuchaguagüdüni wuríbu lé meja jádaanbei juríu jáma ja mámabaña juríu, ába laráandaragüdüniña bíangubei lúma Búngiu, adúgeina láña bíangubei lun ábanrügü lan mútu—lumútuniña Búngiu jagía.

¹⁷ Núbinti Crístu, ába lapúrichijani ugánu buíti luáguti aráandaruni lúma Búngiu joun sun güriǵia, dándu jun, jugúya le mámabei juríu já meja dísebaña lueí Búngiu, quei woun, wagía juríu já meja yaráfabaña lun Búngiu. ¹⁸ Lídaangiñe Crístu, sun wagía, juríu máma juríu, gayáraati wayárafadun lun Búngiu láu lubáfu ában méme espírítu, le Sífiri Sándu. ¹⁹ Ligía mámaadün lubeí teréncha lun larúeiñan Búngiu, lílanaadün larúeiñan quei sun ja lánigubaña. Lufámiliangu Búngiu jugúya. ²⁰ Sun wagía afíñetiña, dándu juríu quei máma juríu, ítara wáña quei ában ligílisi to ligíbuaguboun wagábu le jábunubei apóstolugu jáma

profétagu. Cátei lé buri jarúfudajabei, ligía wagábubei, Jesucrístu meme ligía dúbü le weirigutimaabei lídan ébuu ligía. ²¹Luágu ébuu ligía le Crístubei tiñúrawagua múna tugúya (wagía affñetiña), aráanseñu sun tuméegun buídu darí lun tiábin lun ában tan ligílisi to derégewatu lun Crístu, to gíñe lídaantu ában lúma. Ítara wáña wagía le affñebei luágu Crístu. ²²Ítara líña lubeíti, jugúya gíñe le mámabei juríu, lídaañadiñ ában lúma Crístu, oúndaraguatün jáma súngubei ja jíbiri lun wayábin sun wagía lun ítara wamá quei ában múna to ñí lubei lagánawa Búngiu láu láni Espíritu.

3

Luwádigimari Páblo lun lapúrichijan luágu Crístu joun ja mámabaña juríu

¹Ligía lébubei nayúmragun, áu Páblo, lun Búngiu juágu. Daíwáñu níña luegiñe luwádigimari Crístu le adúga náalibe jagánagua, jugúya le mámabei juríu. ²Mósu subúdi jumáali lan luágu rúlaali lan Búngiu wadágimanu le nun láu lareíni, luágu jáni fuleísei. ³Queísi nabúrújan jun, adúga lumúti meja Búngiu ában aráansejani juágu, jugúya le mámabei juríu, arámudaguati aráansejani ligía, ába lasúbudiragüdüni nun. ⁴Láu jalíjani le nabúrújabei, jasúbudirubei luágu gunfaráanda náni laráansejan Búngiu luágu Crístu, lé meja ligárügúbei asúbudirei. ⁵Masúbudirawagüdünti aráansejani ligía lun ni ában lídan meja dan le sügújalibe, ánjeinti guetó, láu lubáfu Sífiri Sándu, arúfuda láali Búngiu joun láni apóstolugu jáma profétagu ja derégeguabaña jóungua lun le gumúti. ⁶Niján aráansejani ligía. Lídaangiñe ugánu le lánina asálbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lúgubu Crístu, gafánraantiña gíñe lídan méme dimúrei le líchugubei Búngiu joun juríu luágu gayára lan weréderun richágu ligíbugiñe Búngiu lídaangiñe Jesucrístu. ⁷Fuleísei láadina Búngiu láu líchugunina lun napúrichijani ugánu ligía láu lubáfu, laú sun madúna náni yebe fuleísei ligía. ⁸Únabutimaatina sügú láu le únabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírin jarísin lídan Crístu le mébejabei. ⁹Rúlaadina Búngiu, le adúgübalin sun cátei, lun nafúraanguagüdüni joun sun güriñe ída líña lan lanúgün aráansejani ligía lé meja arámudaguabei fulásu. ¹⁰Arámudaguati meja aráansejani ligía lun guetó lan gayára lan jayábin sun láni Búngiu ánjeligu ja arúejabaña siélu lun jasúbudiruni lichú láu Búngiu lídan sun luwúyerigu jádaangiñe affñetiña, ja lilígilisinbaña Crístu. ¹¹Úraguati sun le lúma larítágun Búngiu le larítágabei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu. ¹²Lídaangiñe Crístu, gayáraati wayárafadun lun Búngiu láu eménigini le líchugubei wafíñen luágu Jesucrístu woun. ¹³Ligía nayúmragunbei jun lun máburujan lan jarúna luegiñe le nasúfurirubei juágu, lugúndun weírügüti cátei líra jun.

Línsiñejabu Crístu

¹⁴Ligía lubeíti lébubei nájuduragun ligíbugiñe Lúguchi Wabúreme Jesucrístu, ¹⁵le Jáguchibe sun lufámilian Búngiu uboúagu lúma siélu. ¹⁶Amúriajatina lúma Búngiu lun líchugun érei lúma ubáfu jun según luweírin ubáfu le lúmabei, lun jídin jubáruaguóún láu Sífiri Sándu le jídaanbei. ¹⁷Amúriajatina gíñe lúma lun jíchugun fulásu tídan janígi lun laganóñ Crístu ñí, láu sun jafíñen luágu, ¹⁸lun gíñe láu lan ában ínsiñeni weíríti, deréguágu jídan, gayára lan gunfaráanda jumáni lítulen, limígifen, lujúlilin lúma líñun línsiñejabu Crístu buídu, jáma sun jíbiri affñetiña. ¹⁹Amúriajatina lubeíti lun jasúbudiruni ínsiñejabuni le, le weírítimaabei luei sun le wayáraabei asúbudira, lun lúma jumá Búngiu le gumúti.

²⁰Guetóti, iñurúalá líri Búngiu le gabáfubei lun ladúgün gíbe sügú láu le wamúriajabei o le lan wasáminarubei, láu lubáfu le ñadágimeinbei wádan. ²¹¡Arijúalá luweírigun Búngiu lídaangiñe sun le ladúgübei jádan lánigu lúma lídan Crístu Jesúsú luágu sun sígulu lúma sun dan! Ítaralá.

4

Lídaañadiwa ában láu lubáfu Sífiri Sándu

¹ Ladúga sun le adúga láalibeí Búngiu jun, ligía namúriajabei júma, áu le adaürúbeí luefígiñe luwádigimari Crístu, lun jóuseragun júngua quei lúnti lan jadúgüni ja únbaña wájali lan Búngiu lun lánigu jamá quei lagúarun jun. ² Únabugu jumá, jínsiñejabu, gagúraasun jumá, areída jugúyame joun jíbiri. ³ Jóucha jumá lun lídan jumá ában súnwandan láu lídejan Sífiri Sándu, eibuga jumá lídan darángilau júmgua, ítara lúba lídaanbadün lan ában súnwandan. ⁴ Lúnti wanáangun wóungua lídan ában, lúma jáma jíbiri lánigu Búngiu ladúga lumégegung lan ában méme úgubu le gírubeí lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme emenígini luágu walágaante lídaangiñe. ⁵ Ligía méme Abúremein Wabúreme súngebéi, ligía méme wafíñen luágu Jesucrístu, badíseitiwa sun wagía lídan líri Abúremein ligía. ⁶ Ában rügúñein Búngiu Jáguchi súngebéi, jóugiñeñein súngebéi, ñadágimeinti jáu súngebéi, áni níjein jádan súngebéi.

⁷ Rújali Crístu sarágu luwúyeri ubáfu joun lánigu, rúlaali ubáfu le labúseerubeí líchugun lun cáda ában wádaangiñe, woun. ⁸ Ligía laríñawagunbei tídan Lerérun Búngiu luágu Crístu.

Múdeiti siélun barúina láña adaürútiña lúmgua, ába buri líchugun ubáfu joun gürígia.

⁹ ¿Cáti míni lan “múdeiti”? Míni lan luágu rarí lan furúmiñe lídoun ubáraü buri le únabutimáabei ubouágu. ¹⁰ Crístu le arárirubeí lun ubouágu, ligía méme gíñe le amúdeirubeí lídoun líñun-ágei siélu láu sun luweirigun lun labuñchagüdüni súngebéi láu guánarügü. ¹¹ Ába líchugun ubáfu lun cáda ában jádaangiñe affíñetiña luágu. Añájein rúti joun lun apóstolugu jamá, jíbiri lun ladímurejan Búngiu jayúmulugugiñe, jíbiri lun jóudin apúrichijeí ugánu buíti lánina asálbaruni joun ja magáambun jamágilibeí ugánu ligía, jíbiri lun jafádirijan lúma lun jarúfudajani Lerérun Búngiu. ¹² Ítara líña laráanseruniña lánigu lun gayáraabei lan jesériwiduni buídu, ¹³ lun jedérebudagüdüniña jíbiri lídan Crístu daríme wachúlürün sun wagía lun lídan wamá ában lídan wafíñen luágu Jesucrístu, le Liraú Búngiu, lúma lídan lisúbudinwa. Ítara lúba gürígia wamá weínamujaña lídan weíbugun lúma Crístu, ítara lúba wagáburidun queísi lagáburidun Crístu. ¹⁴ Mítaraanjádiwame quei irájüñü lun ménreengun lan wasáansijan lun ladúrujaníwa ligárabalin furúmieguarügü iséri luwúyeri arúfudajani lun wáburujan lídoun jayéeni gürígia bíbutiña ja abúseerúbaña janúgüniwa lídoun úma le maríchabei. ¹⁵ Lubáragiñe líra, wadímurejabei inárüni láu ínsiñeni lun wawáanserun lídan sun luwúyeri lídan ában lúma Crístu le ichúgüdinaübeí joun sun lánigu ja gíribaña lúgubu. ¹⁶ Sun wagía le lúgubu Crístu, úraguatiwa lídan ában lábugiñe lagúmadijan Crístu, cáda ában wádaangiñe gayáraati wíderaguniña ja wíbiri. Ítara lúba gayára lan wawáanserun súngebéi lídan weíbugun lúma Crístu, awáanse wagíame lídan ínsiñeni.

Iséri íbágarí lídan Crístu

¹⁷ Níjan lubeíti cáteí le naríñagubeí jun lídan líri Wabúreme. lun jebé lan jabágaridun quei ja íbídiñejabubaña lun Búngiu, ja abágaridubaña úragua lúma jasáminan le málabei. ¹⁸ Darúgu líña láu jasáminan, úati íbágarí le ñúbinbei lúmagiñe Búngiu jádan lugúndun íbídiñeti ni cáta joun lurúma tidére janígi. ¹⁹ Féridi jamáali jabúsigarí, derégeguaaña jóungua lun wuríbani, adúgatiña sun luwúyeri iwíyei láu ugúndani. ²⁰ Ánjeinti jugúya, máma líña jafúnrendeirun lúmagiñe Crístu, ²¹ ladúga inárüni lan luágu agáamba jumá luágu Crístu, arúfudajouáti inárüni lé meja larúfudajabei, jun. ²² Ánjeinti luágu binádu ligáburí jabágaridun, arúfudajouáti jun lun jígiruni binádu meja jigáburí le mabuídunjaliibeí láu jagúnfulirun lúma luríban ayúmajani le gayéeraguadibeí, ²³ arúfudajouáti jun lun iséri

jumá lídan jáni espíritu lúma lídan jisáminan, ²⁴ lun iséri lan jigáburu, buíduña, jarúmañu le gumúti queísi ligáburu Búngiu.

²⁵ Ligía jebé lubei jayéejan, adímureja jumeí inárüni jáma jíbirigu lugúndun lánigu ában meúme úgubu sun jugúya, le lúgubu Crístu.

²⁶ Moún lumuti jagáñidun le lánina affigoujani, moún lumuti gñe jálüdüñ sarágu dan arítagua luágu cátei le agáñidagüdübalün— ²⁷ míchiga jumá lúgaaru lun Máfia ítara.

²⁸ Le jíwerubei, jebé líwerujan, luwádigimarida láu ában arúmani lun lagúriaragun lúngua, lun gñe gayára lan líderaguniña ja gudémebaña.

²⁹ Madímureja jumá liwíye dimúrei, jarúmalá jadímurejan lun gayára lan jíderaguniña ja agáambubalün, íbija jagíame abíniruni lídaangiñe jererun. ³⁰ Majírudaguagüda jumeí Sífiri Sándu, lugúndun nñjein Sífiri Sándu jídan lun jasúbudirúniwa queísi lánigu Búngiu daríme lachülürün wéyu lun jasálbarun le gumúti.

³¹ Ígira jumeí sun magúndani, sun iyéreejabuni, sun agúaraguní lánina igáñi, sun anábajani, lúma sun wuríbani. ³² Buídu jumá, gudémejabu jugúyame júmagua, ferúdnagua jumá júmagua ítara quei ferúduna lánün Búngiu lídan Crístu.

5

Ída lúba lan ligáburu jabágaridun lirájüñü Búngiu

¹ Quei lirájüñü jubeí Búngiu ja jínsiñetiña lun, jóucha jumá lun ítara lan jigáburu quei ligáburu. ² Jínsiñegua jumá júniwagua ítara quei wínsiñedun lun Crístu, ába ledéregeregun lúngua wawágu queísi ában mudún le adágarawagüdüti lun Búngiu. Ítara líña línsiñejabu Crístu woun queísi cupáli le buíti líjeme, le águdajóubei lun Búngiu, resíbi lumúti láu ugúndani.

³ Quei lánigu jumá Búngiu, moún lumuti ni lun jadímurejan luágu salúfuri, ni ámu luwúyeri iwíyei, ni luweñnamu águu. ⁴ Mawíyelá jíyúma, maríñagun jugúyame libídiouniga áu, ni dimúrei málati, ladúga mabuídunti buri cátei le. Lubáragiñe jadímurejan cátei líbeina líra, yúsu jumeí jíyúma lun jíchugun eteñgiruni lun Búngiu. ⁵ Subúdi jumúti luágu le lan agámariduti mamárieidunga, o ladúgün lán buri cátei wíyeti, o labágaridun lídan luweñnamu águu—le queísigubeirügübei lanúgüni irísini lisándunme—síñáti gafánran lan lídan jarúejan Crístu lúma Búngiu. ⁶ Mayéedagualaún ni ában láu lagúbüri buri dimúrei, lugúndun ladúga buri cátei wuríbati le, láburuja lanárime ligáni Búngiu jawágun ja magáambadibaña lun. ⁷ Dírei jumá jaweí jíbe güriña jára.

⁸ Lídaañadún meja lubúriga, ánjein guetó, quei lídaañadün lan ában lúma Wabúreme, lídaañadün larúgounga. Ítara líña lubeíti agáburida jumá queísi güriña ja eíbugubaña lídan larúgounga. ⁹ Güriña jagía, areídatiña, surúti jabágari, jínsiñeti inárüni joun. ¹⁰ Jóucha jumá jafúnrendeiruni ca lan jínsiñebei lun Wabúreme. ¹¹ Mádanlaún buri cátei málati le jadúgübei ja lánigubaña lubúriga, sagárügü jumeí lídoun larúgounga láu lubuídun jigáburu. ¹² Rúti busíganu íbini lun ladímurejóuniwa luágu buri cátei le jadúgübei arámudaguariügü, ¹³ dan le larúfuduni larúgounga luágu wuríba lan jagáburu, ába jasúbudiruni luágu inárüni lan, gayáraati jayábin ja lídaanbaña lubúriga lun lídoun larúgounga. ¹⁴ Ligía laríñawagúnbei.

Agáguduabá, bugúya le arúmugubei,
sarába jádaangiñe jílaña,
ábage larúgoungadágüdüñ Crístu báu.

¹⁵ Toúnigi jumá lubeíti buídu ída líña lan jóuserun. Mabágarida jumá quei íbídiougu táu, jabágarida quei chu táu. ¹⁶ Yúsu jumeí jídáni lídan cátei buíti, lugúndun níjein sarágu wuríbani lídoun buri dan le. ¹⁷ Ligía mabídiouniga lubeí jáu, jóucha jumá gunfaráanda jumáni ca lan lugúndaanbei Wabúreme. ¹⁸ Mabácharuada jumá, lugúndun barú lumútiña líra güriña lídoun féridi, lubáragiñe líra, buñjuma láu Sífiri Sándu. ¹⁹ Adímureja jumá júmagua luágu luweírigun Búngiu, erémuja jumá luágu, jerémuja táu sun janígi lun

Wabúreme. ²⁰ Rújuma eteñgiruni lun Búngiu Úguchili súnwandan luágu sun cátei lídan líri Wabúreme Jesucrístu.

Igáburí le lúnbei wagáburiduni jáma ja wábiñebaña

²¹ Derégegua jumá júniwagua, ítara lúba jarúfuduni linében Crístu jun.

²² Lúnti derégeguñu tan wúri túngua lun túmari quei lun Wabúreme Jesucrístu, ²³ lugúndun wügúri tichúgüdinabei lúmari ítara quei Crístu lan tichúgüdinabei lilígilisin. Crístu gñe Jasálbaragülebei güirgía ja gíribaña lilígilisin, ja méme gñe gíribaña lúgubu Crístu. ²⁴ Ítara quei jagáambadi afñetiña lun Crístu, ítara líña gñe lúnti lan gagáambadi jamá wúriña joun jámarigu lídan sun cátei.

²⁵ Jínsiñetá lúmari wügúri lun quei luweírin wínsiñe lun Crístu, wagía le lilígilisin, ába líchuguni libágari wawágu. ²⁶ Ladúgünbalin líra lun larúmadagüdüniwa lídaangiñe le binádubei láu wabásterun lúma gñe láu lerérun, ²⁷ lun larúfuduniwa ligíbugiñe queísi ában wúri to ayárafaduboun lun túmari—buídumeraütu, jarúmañu, aráanseñu, ni cáta mégeiti tuágu, ában wúri derégüdaguatú, úraguatú. ²⁸ Ítara líña lúnti lan tínsiñedun lúmari wügúri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladúga ábanjali lan láu jágubu. ²⁹ Úati güirgía mebéresenti láu lúgubu guánarügü, jóugúdarügü lumúti, touñigileí. Ítara líña gñe ladúga Crístu tun lilígilisin, ³⁰ ladúga lúgubu tan, áni wagía líbiri úgubu ligía, ábanjadiwa lúma. ³¹ Larfñajare tídan Lerérun Búngiu. “Ligía lígirubei lubei wügúri lúguchi túma lúguchu lun lamárieidun túma lúmari, ábame jayábin jagía biángubei lun camá jamá ábanrügü.” ³² Níjein ában óunwenbun inárüni arámudaguati lídan dimúrei ligía. Aríñagatina luágu luáguati lan lúaradagun Crístu jáma lánigu ja gíribaña lilígilisin. ³³ Laríñaguña gñe dimúrei ligía luágu cáda lan ában jídaangiñe lúnti lan jínsiñe tan lúmari lun quei línsiñegua lúngua, lun gñe inébe lan túmari wúri tun.

6

¹ Isáanigu, le lúnbei jadúgüni queísi afñetiña lun gagáambadi jumá joun jagúbürigu, lugúndun ligía richábei. ² Niján ában gumádi weíríti lídaangiñe ligúmadin Búngiu le anúgübei buíti woun láu wagúnfuliruni. “Inébelá bóguchi túma bóguchu bun lun buídu lan dan bun, ³ gabágari amúrúme migífe ya ubouágu.”

⁴ Jugúya agúbürigu, magañidagüda jumáña jisáanigu, agúriajarügü jumáña buídu lun gagáambadi jamá, arífudajeina joun lun jafñerun luágu Wabúreme.

⁵ Músu, gagáambadi jumá joun jiyúbudirigu ya ubouágu láu inébesi, láu anúfudei, lueí ñi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida. ⁶ Seríwi jumáña buídu, mámarügü dan le ariágu jáña lan jun lun jeréderun buídu jáma, seríwi jumáña buídu súnwandan quei esériwidutiña lun Crístu, adúgeina lugúndan Búngiu táu sun janígi. ⁷ Adúga jumeí juwádigimari láu ugúndani, camá jamuga lun Wabúreme jadúgei máma joun güirgía, ⁸ ladúga subúdi jumáali luágu cáda lan ában jídaangiñe, dándu idámuni quei máma idámuni, lafáyeirubei Wabúreme según buíti le ladúgübei.

⁹ Jugúya iyúbudirigu, buídulá gñe jóuseruniña jumúsuniña, masádira jumáña. Jarítagua jumá luágu dándu lan jugúya quei jagía, lábugiñeñadün lagúmadijan Wabúreme le siélubei, áni ában lan láu lanúgüniña Búngiu sun güirgía.

Cátei lé buri áubei wageíndagua lúma Máfia

¹⁰ Guetóti nidújeñu, jere jumá lídaañu ában lúma Wabúreme, láu lére le gabáfubei.

¹¹ Daújumoun sun daúguauí to líchuguboun Búngiu joun sun lánigu lun derégüdagú jumá lueí leyéedagunün Máfia. ¹² Lugúndun máma jáma güirgía ja láutiña úgürügü lúma ábuu wageíndagua, jáma buri espíritugu gabáfutiña ja lánina wuríbani yágüta íñu lúma jáma espíritugu ja gáambaña gumádi, lúrudu lúma érei luágu buri cátei lánina lubúriga lídan ubou le wageíndagua. ¹³ Ligía ragújumoun lubei sun daúguauí to líchuguboun Búngiu jun

lun gayára lan jawánduni wuríbani lídan wéyu le jabúseerubei espíritugu jagía jageíndagun júma, áni lárigiñeme jawánduni, ábame jeréderun derégüdagu. ¹⁴ Derégüdagu jumá lubefti, daúgu táu láni Búngiu daúguaü queísi ában lisúdaaran. Daúgua jumá láu inárüni queísi láu ában béliiti le güragu umúti buídu luágu jiránaagua, areidúañu láu ísuruni quei láu cátei le adáuragubei láu laníguagu súdaara. ¹⁵ Aráanseñu jumá lun japúrichijani ugánu luágu Wasálbaragüle, le íchuguti darángilaü, queísi laráanserun súdaara dan le ladáürunun lisábadun. ¹⁶ Louígiñe sun cátei, barújumei jafñen quei lárügüdüni súdaara cátei láuti gürábu ligíbugiñe, lun jaráramunun sun gimára durúnguatu to lachúüjaboun Máfia juágun. ¹⁷ Barújumei jeménigidun luágu jasálbarun quei ladáüruni súdaara lubúnidin lun latoúnigiruni lábulugu, barú jumeíme Lerérun Búngiu quei efeín to líchuguboun Sífiri Sándu jun. ¹⁸ Adúga jumeí sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúañu jumá, máburujalá jarúna, ayúmuragua jumá jawágu sun ja lánigubaña Búngiu. ¹⁹ Ayúmuragua jumá gíñe nuágu lun líchugun Búngiu dimúrei nun dan le nadímurejan, lun gíñe nadímurejan láu manúfudei lun nasúbudiragüdüni ugánu luagu gayára lan gíñe jasálbarun ja mámabaña juríu queísi ja juríubaña. ²⁰ Oúnaja láadina Búngiu lun napúrichijani ugánu le, le ueígiñebei nadaürüwa guetó. Ayúmuragua jumá lun napúrichijani ugánu le láu manúfudei, queísi lubúdubu.

Lagúmujoún buri mábugaü

²¹ Tíquico, wadúje jínsiñeti woun, le íderagubaliwa buídu lídan luwádigimari Wabúreme, ligíaba íchiga ugánu jun nuágu lúma luágu le nadúgübei. ²² Ligía noúnajaanbalin jun lun laríñagun jun ída wáña lan, lun líchugun gurásu jun.

²³ Rúlá Búngiu Úguchili lúma Wabúreme Jesucrístu darángilaü lúma ínsiñeni láu affñeni jun, wadújeñu lueígiñe Jesucrístu, ²⁴ biní láñame Búngiu sun ja jínsiñejabúbaña lun Wabúreme Jesucrístu láu ában ínsiñeni le masáansiraguati. Ítaralá.

LIGÁRADAN PÁBLO JOUN FILÍPOSNA

Labúrrijan Páblo furisunrugugiñe joun tilana ligilisi to Filíposboun

¹ Anája áu Páblo lúma Timotéo, esériwidutiña wagía lun Jesucrístu, wabúrrijañoun gárada to jun, sun jugúya fadirigu jáma esériwidutiña liglísirugu ja ubúrugubaña Filípos, jáma jíbiri lánigu Búngiu ja lídaañabaña giñe ában lúma Crístu Jesúsu. ² Binílaun Wáguchi Búngiu lúma Wabúreme Jesucrístu, íbija jumá giñe darángilau jámagiñe.

Layúmuragun Páblo jawágu afñetiña

³ Ságü narítapun juágu neteíngiruni Nubúngiute. ⁴ Súnwandan nayúmuragun lun Búngiu juágu láu ugúndani, ⁵ Láu narítapun luágu luweírin jíderapunina abúruch-aguagüdei ugánu le lánina asálbaruni lúmagiñe wéyu le jagáambubalin chúlú lúmoun wéyu le ugúñebei. ⁶ Chóuru numúti luágu Búngiu lan le agúmeserubei adúgei lubuídun luwádigimari jídan, lasígira mémeba lan adúgei daríme wéyu le liábingüle Jesucrístu. ⁷ Richáti lun narítapun juágu itara lugúndun weíruti jínsiñe nun, lugúndun giñe gafánran jumá lídan abniruni le nánibeí dan le furisunruguañadina lan luágu nesériwidun lun Crístu, o dan lan le naráramun ligíbugiñe lúrudu lun nadímurejan lueígiñe loubadina ugánu le lánina asálbaruni lun nachóururuni joun luágu inárüni lan. ⁸ Subúdi lumúti Búngiu luágu weíri lan nálugun juágu lugúndun jínsiñetün nun queísigubeirügü jínsiñe jumá lun Jesucrístu.

⁹ Amúriajatina lídan nayúmuragun lun Búngiu juágu lúntima laweíridun jínsiñejabu láu sarágu subúdi lúma gunfaráandaü lídan sun cátei, ¹⁰ lun gayára lan janúadajani cátei le buídubei súnwandan. Ítara lúba jabágaridun ában íbágarí jarúmati, madúnrun jumámuga dánme liábin Crístu. ¹¹ Amúriajatina lúma Búngiu lun buin jumá láu lubuídun igáburí, láu lubáfu Jesucrístu le jídaanbei, lun líchugúniwa uweíriguni lun Búngiu luágu.

Crístu íbágaríbei nun

¹² Nidújeñu, buséntina jasúbudiruni luágu cátei lán buri le suséreelibeí nun, ñúbinjali lídan linárün lun líderapun lídan lapúrichijóun ugánu le lánina asálbaruni. ¹³ Subúdi jamúti lubeíti sun tisúdaraana lúban urúei jáma sun ja jíbiri luágu nadaürüña lan lueígiñe nesériwidun lun Crístu. ¹⁴ Játi jíbiri idújeñu, láu jarijin luágu nadaürüña lan lueígiñe napúrichijani ugánu luágu Crístu, ragújaña anígi lun japúrichijani méme ugánu ligía manúfudeiga, láutima afñeni luágu Crístu.

¹⁵ Inárüni luágu añájein lan adímurejatiña luágu Crístu ladúga jagímugan, busén jagía janúgüniña gürígia jánigume. Ánjaña jíbiri, japúrichijani luágu Crístu láu lubuídun arítapuni. ¹⁶ Gürígia jagía, luágu ínsiñejabuni japúrichija, lugúndun subúdi jamáni luágu lueígiñe lan nadímurejani ugánu le lánina asálbaruni nadaürüña lan. ¹⁷ Ánjaña ja jíbiri, máma láu janárün japúrichija, lun jarijiniwa weírigu jadúgei, lúma lun jíchugun líbe samínaü nun guetó le nadaürüña lan. ¹⁸ Wel, úati cátei luágu líra, lídan sun luwúyeri, láu yebe janárün o máma lan láu, luágu Crístu jadímureja, áni gundaatina luágu líra.

Áni nagúndaarúba giñe, ¹⁹ lugúndun subúdi numúti luágu buídubei lan nasálirun lídan sun cátei le, ladúga jayúmuragun lun Búngiu nuágu lúma ladúga líderapunina láni Jesucrístu Espírítu. ²⁰ Cátei le nabúseerúbei lúma le nagúrabubei, lun madúgün nan ni cáta lun jamúga nanúgün busíganu luágu, gayáaarügü lámuga nadímurejan manúfudeiga, arijiya mémetima lámuga luweírigun Crístu nuágu guetó quei súnwandan, wínwañu áu yebe, jílañu áu yebe. ²¹ Lugúndun ánjana abágarida méme, lúmba Crístu nabágarida, ánjana ouwe, buítimaabei nun lugúndun lúmounbadina Crístu. ²² Ánjein gayára lubeí nasígirun ñadágimein luágu láni nabúreme Crístu fuleísei láu nasígirun abágarida, íbídiñeti nun ca lan buítimaabei, ánjein lun lubeí nasígirun wínwañu ódi lun nouñwen. ²³ Jénreenguti

nun lun nanúadajan lídan bián cátei le. lídan ában oúbaü, buséntina jamúga nouñwen lun nídin erédera lúma Cristu, lugúndun buítimaati jamúga líra nun, ²⁴ lídan le ában oúbaü, buítimaati jun lun nasígirun abágarida. ²⁵ Áni quei chouúru náni cátei le, subúdi numúti luágu nerédera mémeba lan júma lun níderagunün lun jasígirun jubáruaguouün, lun gíñe jagúndaaruntima lídan jafíñen. ²⁶ Ítara lúba jiñúragüdüni líri Cristu Jesúsu luágu lagríbudagüdüniina júmoun.

²⁷ Joucha jumá lun úragua lan ligáburu jabágaridun lúma larúfudajan Cristu. Ítara lúba, ánjana núdüñ arjáün o ánjein díseñu níña lubei juef lun agáambarügü nan juágu, gayára lámuga nasúbudiruni luágu derégüdagu meme jíña lan áni lídaañadün lan gíñe ában, áfaagua súnqubei lídan ában lun labúruchagun afíñeni luágu Jesucristu queísi Wasálbaragüle, ²⁸ mígiraguagüdünga júngua lun janúfudedagun jaweí jáganiñu. Ladúga jáganiñu lan gürígia jagía, arúfuda lumúti líra furáangu luágu joudíña lan lídoun gürínguau, arúfuda lumúti gíñe jasálbarun jugúya le afíñebei, áni lúmagiñe Búngiu liábin cátei le. ²⁹ Ladúga Cristu, gayáraati mámarügü lun jafíñerun luágu, gayáraati gíñe jasúfurun lueígiñe. ³⁰ Jugúya núma, lídaañadiwa ában méme áfaaguni. Arjá jumáli meja ída líña lan náfaagun, guetó agáambatün luágu ída líña méme lan náfaagun.

2

Lúnabugun Cristu lúma luweirigun

¹ ¿Sanditünsan dúgüdaguaü ladúga lídaañadün lan ában lúma Cristu? ¿Barútünsan gurásu luágu línsiñejabu jun? ¿Eibugatünsan sun jugúya lúma Sífiri Sándu? ¿Subúdi jumútisan lugúdemejabu Cristu jun lúma lareífun? Afíñetina luágu ítara líña lan. ² Ligía lébubei namúriajan júma lun jaganouün lídan úarani lúma ínsiñejabuni júmawagua, lun ában lan jarítangun, ában lan gíñe jáfaagun luágu buri cátei le láni Cristu. Láu jabágaridun ítara, buin lúba nugúndan jáu. ³ Madúga jumá ni cáta juouguarügü lun janügúniwa weíri, ni luágu pántaü, adúga jumeí cátei láu únabuguni. Buídulá janügúniña ámu gürígia juef guánarügü. ⁴ Mámarügüla cátei le buídubei jun jáluaja, áluaja jumeí gíñe le buídubei joun ámu.

⁵ Ítaramemelá ligáburu jasáminarun queí meja ligáburu lasáminarun Cristu Jesúsu. ⁶ Láu sún meja Búngiu Irajü lan ligía, málugunti lárügüdüni lírícha quei Búngiu. ⁷ Lubáragiñe líra, ába lígiriñe le lánibeí, ába ladúgün quei músu láu lagúriajouñ quei wügúri. ⁸ Dánti le ítarañeí quei wügúri, ába lúnabudaguagüdüntima lúngua, áni ladúga lagaambadi, ába loúnwen luágu gurúwa láu sun nibúsigarídüna lan ouwene luágu gurúwa. ⁹ Ligía líchugunbalin Búngiu líñun-ágei uweiriguni lun lúma íri le weirigutimaabei lídaangiñe súnqubei, ¹⁰ lun dan lan jagáambuni sun ja siélubaña, ja múarugunbaña, jáma ja lábugiñebaña múa líri Jesúsu, lun jájuduragun lun, ¹¹ lun gíñe jasúbudiruni súnqubei, aríñaga jagíame luágu Jesucristu lan Wabúremebei, lun líñurún líri Búngiu Úguchili.

Ítara jáña lánigu Cristu quei larúgounga ubouagu

¹² Ítara líña lubeíti nidújeñu jínsiñetiña nun, ítara quei agáamba jumánina súnwandan dan lé meja júmañadina lan, agáambatima jumána guetó dan le díse nan. Efbuga meme jumá jubáruaguouün lídan lémeri Cristu láu únabuguni lúma inébesei lun Búngiu daríme jebélurun siélun. ¹³ Búngiu íchugubalin lubuídun ayúmajani jun lun jeíbugun lúma, íderagualaün lun jadügüni quei labúseeruni.

¹⁴ Adúga jumeí lun cátei láu ugúndani, masígenejaanga, ¹⁵ madárirúniwa lámuga dúru juágu, ni mégeiti, lirájüñü jumámuga Búngiu jarúmatiña jagánagua gürígia wuríbatíña, magáambaditiña lun Búngiu. Jugúya, jarúgoungadagüdatün jagánagua gürígia jagía quei warúguma lídan ában fulásu búrigati, ¹⁶ íchigeina ugánu luáguti ibágaru magúmuchaditi joun. Láu jigáburidun ítara, gúndaabadina juágu dánme le lachúlürün wéyu le liábingüle Jesucristu, láu nasúbudiruni luágu máma lan luágu ni cáta nuwádigimarida jagánagua.

¹⁷ Íbini lun lan níchuguni nibágari guánarügü lun loustarun jaffñen, le queísibeí ában edéweejani buíti lun Búngiu, gúndaabadina úara júma luágu lubuídun wedéweejan lun Búngiu. ¹⁸ Lun jamúga lasúseredun ítara lun nouñwen luágu nesériwidun lun Crístu, lúnti gíñe jagúndaarun úara núma.

Timotéo lúma Epafrodíto

¹⁹ Ánjein busén lubei Wabúreme Jesucrístu, nouñajabei Timotéo aríjaün madíse, lun gayáraabei lan nagúndaarun dánme le lagíribudun láu ugánu nun juágu. ²⁰ Úati ámu núma le asámaruti quei áu, le áfaaguti lun buídu lan lídin jun, ²¹ súngubei jawougua rügúñein jarítagua, mebèreseguntiña láu le labúseerubei Crístu Jesúsu. ²² Ánjeinti Timotéo, subúdiiti ligáburu jun, ída líña lan lesériwidun núma lídan lapúrichijouñ ugánu le lánina asalbaruni queísi ában isáani le íderaguti lúguchi. ²³ Agúrabatina lubeiti nouñajani aríjaün larígíñeme nasúbudiruni ánjein náfuriduba lubeí furísunrugugiñe, ²⁴ láu sun affíñe nan luágu niján lan lugúndaanbei Búngiu, lun nídin aríjaün núngua madíse.

²⁵ Genége lumúti gíñe nun luágu lúnti lan nouñajani nibíri Epafrodíto lárigoún júmoun. Quei jasúbudirun, ligía nouúbabei lídan luwádigimari Crístu lúma lídan áfaaguni, le jounajabei jugúya guánarügü nun lun leténirun lun le nemégeirubei. ²⁶ Weíríti labúseerun jaríjiniñ áni gíbeti larítagan ladúga jagáambun luágu lasándirun. ²⁷ Inárüni luágu sándi lán meja, yaráfa lun louñwen, ába gudémejabu lan Búngiu lun lúma nun lun mabíjin nan írúni lánwoun le núagubei, ába lareídaguagüdüni. ²⁸ Ligíatima nabúseerúnbei nouñajani lun jagúndaarun láu jaríjini. ²⁹ Resíbi jumeí láu sun ugúndani queísi idújei luegíñe Wabúreme Jesucrístu, áni jínsiñe jagíame sun ja ítaraña quei ligía jun súnwandañ, ³⁰ quei chílú lubei yaráfa lun louñwen ladúga lesériwidun lun Crístu. Derégeguati lúngua, mebèresegunga cába lan asúsereda lun, lun lesériwidun nun, cátei le jásíñerubei adúga lugúndun díseñu jíña lan nueí.

3

Úma le ináriüti lun weréderun richágu ligíbugiñe Búngiu

¹ Lagúmujoún cátei, nidújeñu, gúnda jumá lídan Wabúreme. Mabúchati nuágu abúriñjei le abúrtija náalibeí jun, lugúndun buíti jun. ² Cátei ligía, lun touñigigua jumá júngua jawei ja ítaraña ouserun quei ouñli, ja adúgúbalin le wuríabei, ja íbagubalin úgubu. ³ Aríñagatiña yéetiña jagía luágu lúnti lan jerésibiruni wügúriña circuncisión lun lánigu jamá Búngiu, iyéeni líra. Lirájüñü Búngiu le tímatimaati wagía le agúñfulrubei lúma láu lubáfú láni Espírítu le wádaanbei, wagía le gúndaabei láu lánigu wamá Crístu Jesúsu áni míchu wamúti weménigi luágu cátei bougudinti lueí lun wasálbarun. ⁴ Lun jamúga gayára lan wasálbarun luágu cátañañadiwa lan bougudin lueí Jesucrístu, garíchatina jamúga lun neménigidun luágu buri cátei ligía, úati jamúga ní ában garíchati nueí lun leménigidun luágu buri cátei ligía. ⁵ Wídü wéyu luegíñe nagúriajouñ, ligía nerésibiruni circuncisión lugúndun jarásan Israelftagu áu, jádaangiñetina lufámilian Benjamín, hebréo áu lúmagiñe nagúriajouñ, hebréogu gíñe nagúbürigu. Fariséo meja áu lídan ligáburu gunfaráanda náni jalúrudun juríu, ⁶ janárimeti meja neméendün darí neíbaajaniña affíñetiña luágu Jesucrístu. Luáguti ílsurun íbágari según jalúrudun juríu, úati meja ní ában lun gayára lan laríñagun ní cáta nuágu. ⁷ Ánjeinti guetó, sún buri meja cátei le, lé meja weírítibeí cátei nun, barú numuti quei ní cáta lun gayáraabei lan nasígiruni Crístu. ⁸ Sügú láu líra, sun cátei le gayáraabei jamúga níjein lan núma, rúnumuti quei ní cáta ligíbugiñe ouñwenbun agáñeiruni le luágubei nasúbudiruni Wabúreme Crístu Jesúsu. Féridi náali sún buri cátei le ladúga nasúbudiruni Crístu, áni barú numuti sun le quei ífeí lun nagáñeiruni Crístu, ⁹ lun nadáriragun núngua lídan ában lúma. Guetó, gumúja náfaagun lun neréderun richágu ligíbugiñe Búngiu luágu lubuídun nagúñfulirun lúma lilúrudun, lugúndun barúlaadina Búngiu richágu ligíbugiñe láu naffíñerun luágu Jesúsu. Richáguauí ligía ában cátei le

lídaangiñeti affñeni, máma adúgüni. ¹⁰ Le nabúseerúbei, lun nasúbudiruni Crístu buídu buídu, lun nasándiruni lubáfu meme Búngiu le ásaaragüdúbalin Jesúsu lídaangiñe ouweni nuouguá, lúma lun nasúfurirun luágu queisi lasúfurirun nuágu, ¹¹ lun ítara nan quei ligía lídan loúnwen láu eménigini luágu násaaruba lan lídaangiñe ouweni quei ligía.

Áfaaguni lun lachúlürün lídoun lébeja

¹² Máma nariñaguña luágu chúlújadina lan lúmoun lébeja lídan sun cátei le, maríña-guntina gñe luágu buídujali lan nigáburí lídan sun cátei, le nadúgübei, nubáruaguouñadina méme lun ítárabadina lan queisi meja labúseerun Crístu lun ítárabadina lan dán meja le lasálbarúnbalina. ¹³ Nidújeñu, maríñaguntina luágu ibíja náali lan sun cátei le, le nadúgübei, nabúlieiduni sun le eréderubei árigi lun náfaagun lun nárügüdüni le nigíbugiñebei, ¹⁴ lun nachúlürün lúmoun lébeja eíbaaguni ligíbuagu ubou le, lun nagáñiruni le lúnbei líchuguni Búngiu siélu joun sun ja lídaanbaña ában lúma Crístu Jesúsu.

¹⁵ Sun wagía le weínamujalíbei lídan waffñen, lúnti wasáminarun ítara. Ánjañ asáminara lídan ámu luwúyeri lídan som cátei, larúfudubei gñe Búngiu cátei le jun. ¹⁶ Luágu sun luwúyeri, lúnti wasáminarun lúma lun wabágaridun úaragua lúma cátei le furéndeí wamáalíbei.

¹⁷ Nidújeñu, amúriajatina júma lun ában lan jarítagun lun jafálaruni náni jémpulu, aríja jumáña gñe ja abágaridubaña según jémpulu le wíchugubei jun. ¹⁸ Aríñaga náali jun sarágu weíyaasu áni nariñagayaali jun láu águirai, luágu añajein lan sarágu ja aríñagatiña luágu affñe jamá luágu Crístu, abágaridutiña queisi láganiñu Crístu le ouwebei lun larúmadagüdüniwa. ¹⁹ Lídaanme lagúmujoún dan, güriñguabei cátei joun—jasúfuriruba luágu jafígoun lun sun dan. Lé buri cátei le wámaabei joun, ligía jabúngiutebei, apántajatiña láu buri cátei le jamúga lúnbei nibúsigari jamá láu. Luágu rügüñein buri cátei ubouaguna jarítagua. ²⁰ Ánjein wagía, siéluna wagía, áni wagúrabaña liábin Wabúreme Jesucrístu le Wasálbaragüle siélugiñe. ²¹ Lídaanme wéyu ligía, lasánsirubei wágubu le emégeirubei sarágu lun ítara lan quei lúgubu, le úabei lemégeirun. Áni ladúgübei láu méme ubáfu le luágubei lun líchuguni sun cátei lábugiñe lagúmadíjan.

4

Gúnda jumá súnwandan lídan Wabúreme

¹ Ligíati nidújeñu jínsiñetiña nun, ítara méme jumá derégüdagu lúma Wabúreme.

Oúnwenbun nabúseerun naríjinün, jugúya nugúndanbei lúma nafáyeiruaja luágu nesériwidun lun Crístu.

² Ayúmuraguatina tun Evódia túma Síntique lun jebélurun lídoun úarani queisi idújeñu luegiñe Crístu. ³ Ánjein bun, nouba buíti lídan wadágimanu, amúriajatina búma lun bíderaguniña ítunu ja lun gamádagua jamá, lugúndun áfaaguatiña noubagiñe lídan lapírichi-jouñ ugánu le lánina asálbaruni, úara lúma Cleménte jáma buri jíbirí ja ñadágimeinbaña meja núma. Bürúwaali jíri sun jagía tídan lílburuna íbágarí magúmchaditi.

⁴ Gúnda jumá súnwandan ladúga lídaañadün ában lúma Wabúreme. Aríñagaya numúti. ¡Gúnda jumá! ⁵ Subúdiwa jumá quei güriñga areídatiña ladúga madíseeli liábin Crístu.

⁶ Magíbedalá jarítagun luágu ni cáta, aríñagarügü jumeí sun cátei lun Búngiu súnwandan dan le jayúmuragun lun, amúriaja jumá lúma, mabúlieidagunga lun jíchugun eteñgiruni lun. ⁷ Ábamei líchuguni Búngiu lídarángilan jun, darángilaü le, weíritimaabei lubáfu lun lagídarun jídjéri sügú láu jubáfu lun jarítaguni cátei le lúnbei jadúgüni, áni darángilaü ligía, loúnigiruboun janígi lúma sun jisáminan lueí idíjeri lídan le jeménigidun luágu Búngiu lídaangiñe Crístu Jesúsu.

Samíja jumá luágu le buídubei

⁸ Lagúmujoún cátei nidújeñu, samína jumá luágu sun le inárütibeí, sun le gadúnabei inébesei, sun le richábei, sun le jarúmabei, sun le gúndaawabei láu, sun le uágubei buídu lan ladímurejoúa. Samína jumá luágu sun le buídubei lúma sun le gadúnabei uweíriguni.

⁹ Falájumei sun le arúfuda náalibeí jun lúma sun le resíbi jumáalibeí númagiñe. Gúnfuli jumá láu le naríñagubei jun, áyeija jumeí nigáburi. Ábame júma lan Búngiu láu lidárangilan le líchugubei.

Jedéweejan Filíposna seínsu lun Páblo

¹⁰ Oúnwenbun nugúndan lídan Wabúreme luágu jarítaguayaadün lan nuágu. Maríña-guntina luágu bulíei jumáadina lán yebe, madárirügü jiñáalin ligáburi ída lúba lan líderagunina. ¹¹ Mabúseerúntina jamúga jarítapun luágu nadímurejañein lan lueígiñe nemégeirun, lugúndun furéndeijadina lun gúndaañu nan láu le númati, ¹² subúdi numúti labágaridúniwa lídan gudémeín, subúdineí giñe gámawa lan gíbe. Furéndeijadina lawandúniwa furúmieguaugü igáburi, ilámaü yebe o quimúle, níjeín lan darí lun lígiragún o úa lan ni cáta. ¹³ Úati cátei jénreenguti nun ladúga lídaañadina ában lúma Crístu le íchugubei ubáfu nun. ¹⁴ Láu sun líra, buíti jadúga láu jíderagunina lídan lénreengúnga nun.

¹⁵ Queísi giñe jasúbudiruni, jugúya Filíposna, lárigiñe meja napúrichijani ugánu le lánina asálbaruni jun, ába náfuridun Macedóniagiñe, jugúya rügúñadün tílana liglísi oúnaja seínsu nun quei ateíngiragúlei luágu nesériwidun jun. ¹⁶ Sun meja anájagua lan ubúruyu Tesalónica, oúnajatün edéweejani nun, mámarügü ában weíyaasu, lun le nemégeirubei. ¹⁷ Máma jamúga nasáminarun lun gubeírügü nibjín som cátei, le nabúseerúbei, lúntima lagánwoundun le lúnbei jibjini lúmagiñe Búngiu. ¹⁸ Áu, resíbi náali súngubei lúma sügú láu lé yebe lúnbei nerésibiruni, láu le jóunajabei nun lúma Epafrodíto ígiraguaali núma. Le jóunajabei nun, ítara líña quei líjeme cupáli le águdajoúti lun Búngiu, ában edéweejani le lerésibirubei láu ugúndani. ¹⁹ Líchugubei lubefti Nubúngiute sun le jemégeirubei jun queísi buri luweírigun lirísín, lídaangiñe Crístu Jesús. ²⁰ Uweíriguni lun Wáguchi Búngiu lun sun dan!

Lagúmujoún buri mábugaü

²¹ Rújumei numábugaü lídan líri Jesucrístu joun sun ja lánigubaña Búngiu. Mábuga jáña wadújeñu lueígiñe Jesucrístu ja yábaña núma jun. ²² Sun ja yábaña Róma ja lánigu Búngiu, játima tílana lúban urúei, mábuga jáña giñe jun.

²³ Binílaüin Wabúreme Jesucrístu sun jugúya. Ítaralá.

LIGÁRADAN PÁBLO JOUN COLÓSASNA

Labúrrijan Páblo joun tílana liglisi to Colósasboun

¹ Anája áu Páblo, le ában lání Jesucrístu apóstolu láu lugúndan Búngiu. ² Úara lúma Timotéo le wadúje lueígiñe Jesucrístu nabúrrijañoun gárada to jun, jugúya le lánigu Búngiu ja gúnfulibaña lúma Crístu le uágubei jaffiñera, ja ubúrugubaña Colósas. Binílaün Wáguchi Búngiu, ibíja jumá gñe darángilau lúmagiñe.

Layúmuragun Páblo jawágu afiñetiña lun Búngiu

³ Súnwandan weteíngiruni Búngiu, le Lúguchi Wabúreme Jesucrístu, dan le wayúmura-gun lun juágu. ⁴ Agáambaadiwa luágu jaffiñen luágu Crístu Jesúsu lúma luágu jínsiñejabu joun sun ja lánigubaña Búngiu, ⁵ ladúga eménigini le juágubei luágu le areidúañubei jubá siélu. Chúlútün ártügüdei eménigini le lárigiñe jagáambuni ugánu le inárütihei, ugánu le luáguti asálbaruni. ⁶ Ugánu méme le, lé meja apúrichijóubei jun, labúrchaguña lídan sun ubou, lasáansiraguña jagáburi güriñia ítara quei lasúseredun jídan lúmagiñe jagáambuni ladímurejóun luágu línsiñejabu Búngiu, ába jasúbudiruni luágu inárüti lan ínsiñejabuni le. ⁷ Ligía cátei le larúfudajabei Epáfras jun, le ñadágimeinjalabei wáma. Jínsiñeti woun, subúdi wamúti luágu gayára lan meja weménigidun luágu lun lesériwiduni Crístu buídu jagánagua wawéñegua. ⁸ Barújali ugánu woun juágu lúma luágu jínsiñejabu le rúlaalbei Búngiu jun.

⁹ Ligía lúmagiñe lubei wéyu le wasúbudirunbalin cátei le, merédeti wayúmura-gun lun Búngiu juágu, lúma wamúriajan lúma lun lasúbudiragüdüni lugúndan jun buídu, ru ligíame sun luwúyeri subúdi lúma gunfaráandau jun luágu cátei le larúfudajabei lání Espírítu jun. ¹⁰ Ítara lúba gayára lan jagáburidun queísi lúnti lan jagáburidun lánigu Wabúreme, adúgei le áubei lagúndaara súnwandan, arúfudeina ában alúbajani le lánina sun luwúyeri cátei buíti, lun gñe jasúbudirunitima Búngiu. ¹¹ Amúriajatiwa lúma lun léredagüdünnün láu luweírin lubáfu lun gayára lan jawánduni sun cátei láu sarágu gurásu lúma ugúndani, ¹² lun gñe jeteíngiruni Wáguchi Búngiu luágu aráanse láadiwa lan lun werésibiruni wafánran lídaangiñe le lúnbei líchuguni joun lánigu lídaanme larúeijan le lánina larúgouna. ¹³ Séfu lumútiwa Búngiu lídaangiñe lubáfu lubúriga, ába líchuguniwa lídun larúeijan Liraú le jínsiñebei lun, ¹⁴ le asálbarubaliwa láu loúnwen, chibálei waffgoun.

Aráandaruni lúma Búngiu láu loúnwen Crístu

¹⁵ Wáguchi Búngiu le siñábei jarjini güriñia, ába liábin ubouágun lídan ában luwúyeri le gayáraati jarjini güriñia lídan Liraú le Jesucrístu, le weírigutimaabei lídaangiñe sun cátei le níjeinbei. ¹⁶ Lídaangiñe Crístu ladúgei Búngiu sun cátei le siélurugubei lúma le ubouágubei, dándu buri cátei le maríjnbei quei le aríjuabei. Lídaangiñe Crístu ladúgei arúeijani, gumádi, lúrudu buri lúma buri ubáfu le jáni ánjeligu, áni lun gñe Crístu ladúgüwa. ¹⁷ Lubáragiñebei sun cátei, níjeinjali meja Crístu, áni láu lubáfu, níjein lubei sun cátei lídan lubára. ¹⁸ Lougíñe sun líra, Crístu jachúgüdinabei lánigu, ja giribaña lúgubu, ja gñe giribaña lílglisin. Ligía le íchugubei íbágarí lun úgubu ligía, ligía furúmiñebei ásaara lídaangiñe ouweni lun moúnwendügüyaali lan, lun ligía lan láu furúmiñeti ubárau lídan sun cátei. ¹⁹ Ítara líña labúseeruni Búngiu lun níjeinbei lan sun le ligíabei lídan Crístu. ²⁰ Lídaangiñe Crístu, ába laráandaragüdüni Búngiu sun ubou dayárugubei lúmagua, dándu buri cátei le ubouágubei quei lé buri siélubei, ladúgüni aráandaruni ligía láu loúnwen Crístu luágu gurúwa.

²¹ Jugúya, teréncha buri meja jugúya lun Búngiu, lágani buri meja Búngiu jugúya tídan janígi ladúga buri cátei wuríbati le jadúgübei. ²² Ánjeinti guetó, aráandaragüda láadün Búngiu lúmagua láu loúnwen Crístu lun larúfudunün jarúmañu, madúrunga,

queísi lánigu ligíbugiñe. ²³ Ítara méme lúba gíñe ánjaün asígira derégüdagu lídan jaffñen, ragúñu buídu luágu Crístu, mígirunga jumeí eménigini le juágubei le íchugubalin ugánu lánina asálbaruni le jagáambubei. Ligía ugánu le apúrichijóubei lídan sun uboú, le gíñe napúrichijabei, áu Páblo.

Rúlumuti Búngiu Páblo lun lesériwidun joun títana buri ligílisi

²⁴ Guetó gúndaatina láu le nasúfurirubei juágu, lugúndun láu igáburi le, gayáraati níderagun láu núgubu guánarügü lun loustaragüdüniwa le lúngilibeí lasúfuriruni Crístu jawágu lánigu, jawágu lilígilisin ja lúgubu. ²⁵ Núbinjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei juríu, lun napúrichijani ugánu le láni Búngiu jun quei lubúdubu. ²⁶ Ugánu ligía, cátei lé meja arámudañu lubeí Búngiu lúmagiñe sarágu dan, áni guetó subúdigüda láali joun lánigu. ²⁷ Joun lánigu Búngiu labúseera lasúbudiragüdüni luweírín irisini le lídaanbei cátei arámudaguati le, le júnbei jugúya le mámabei juríu dándu joun ja juríubaña. Cátei arámudaguati ligía, luágu njein lan Crístu jídan, juríu yebe, máma yebe juríu, áni ligía le ídaanbei jíchigei jeménigi luágu uweíriguni le lúnbei jibfjini siélu.

²⁸ Luágu Crístu wapúrichija, aríñagatiwa joun sun güriúa lun jártügüdüni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu. ²⁹ Ligía nuwádigimaridunbei, áfaagueina láu sun érei lúma ubáfu le líchugubei Crístu nun.

2

¹ Buséntina lubeíti lun jasúbudiruni luágu luweírín lidjjeri narítagnun juágu, lúma jawágu affñetiña ja Laodicéabaña, lúma jawágu sun jíbirigu affñetiña ja maríjin jamáginidabaña. ² Weíríti nayúmagan lun gagúraasun jumá tídan janígi, lun lídan jumá ában láu línsiñejabu Crístu juágu joun jíbirigu, lun gunfaráanda jumáni linárün Búngiu buídu buídu lun derégüdagu jumá lídan le uágubei jaffñera, gayára lámuga jasúbudiruni laráansejan Búngiu lé meja arámudaguabei, le luáguti Crístu guánarügü. ³ Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibeí ában ouñwenbun irisini woun. ⁴ Nariñaguñein buri cátei le jun lun mayéedun lánün ni ában láu buri dimúrei buiduburiti. ⁵ Láu sun úa nan jigíbugiñe lun gayára lan jamúga jaríjinina, anájein júma lídan esprítu, áni gúndaatina láu naríjini luágu lídaañein lan dan sun cátei jurúma áni derégüdagu jíña lídan jaffñen luágu Crístu.

⁶ Ligía, ítara queísi jerésibiruni Wabúreme Jesucrístu láu sun jaffñen luágu, lúnti ítara lan jabágaridun lídan ában lúma, ⁷ lun ragúñu lan jibágari luágu lídan le jídin jubáruaguouñ lúma, derégüdagu lídan jaffñen ítara queísi larúfudajóuniwa jun, láu eteingiruni lun Búngiu súnwandan.

Iséri ibágari lídan Crístu

⁸ Tounigi jumá, mígiraguagüda jumá júngua joun ja busénbaña jayéegan láu buri arúfudajani málati. Máma lúmagiñeti Crístu cátei le jarúfudajabei, lúmagiñeti jagáburi binádu mútu lúma buri ligáburi jarítagnun güriúa lánina uboú le luágu cátei.

⁹ Níjein sun le Búngiubei lídan Crístu, ¹⁰ áni jugúya, buin jíña láu Búngiu lugúndun lídaañadün ában lúma Crístu. Jéreti Crístu lueí sun lúrudu lúma ubáfu le uboúagubei lúma le siélubei. ¹¹ Láu gíñe lídaañadün lan ában lúma Crístu, queísisgubeirügü resíbi jumáali lan circuncisión lé meja jerésibirubei binádu juríu lun jarúfuduni luágu lánigu jamá Búngiu. Circuncisión le jibjubei, máma le adügúbei láu bíti luágu úgubu, jáni circuncisión, láu jasálbarun lídaangiñe figoú le áubei jíabin uboúagnun. Niján luwúyeribeí ladügüniwa Crístu lun lánigu wamá Búngiu. ¹² Láu jabásterún, arúfudajumúti luágu bunáwa jumá lúma Crístu lun ibágari le binádubei, sarátün gíñe lúma lun ibágari le iséribei ladúga jaffñerun luágu lubáfu Búngiu le ásaaragüdübalin lídaangiñe ouweni. ¹³ Luágu meja ában dan, jílánü jíná meja lun cátei lánina Búngiu ladúga jíffgoun, ladúga gíñe jabágariduña lan queísi güriúa bouguditiña lueí lilírudun Búngiu, agúnfulireina lúma sun luríban layúmagan júra.

Ánjeinti guetó, rújali Búngiu iséri ibágari jun úara lúma Crístu. ¹⁴ Láu loúnwen Crístu, ferúduna láali Búngiu sun waffigoun, ába lagúmuchaguagüdüni Búngiu lilúrudun Moisés lúma buri sun gumádi le lánina lúru luágu le áubei mabáfu wamá lun wagúnfulirun, queígubeirügü jamúga dáguá láni Búngiu lúru luágu luágu lugúruwan Crístu. ¹⁵ Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbati, ába lúnabudagüdüniña ligíbugiñe guríriguaü, ába lanúgüniña quei adaürütiña lun.

Áluaja jumeí buri cátei le lánina siélu

¹⁶ Úa la ni ában añáwarijati jarítangun luágu buri arúfudajani lánina cátei le lúnbei jeígini o le lan lúnbei játuni lun jagúnfulirun lúma Búngiu, o luágu lán buri fédu le jarítaguagüle luágu iséri irúmu, lúma iséri játi, o luágu lan wéyu le eméraaguagülei. ¹⁷ Sún buri cátei le, lúntirügü lagúnfulirúniwa lúma darí meja liábin Crístu ubouágun, liyáwa rügüñein le lúnbei liábin, Crístu ligía linárünbei. ¹⁸ Mígiraguagüda jumá júngua joun ja afámurubaña quei únabugutiña, ja ájuduragubaña joun ánjeligu, lun janúgüni jagañirun jueí. Weíríti jadímurejan luágu nege buri cátei le ayáwadaguti joun, ába buri janáangun jóungua luágu ligáburu jasáminan, le jáni güirgia. ¹⁹ Mámañanu lídan ában lúma Crístu, le ichúgüdünaü joun sun lánigu ja giribaña lúgubu, le ágüdaajabalin úgubu ligía, le awáanseragüdübadiwa lídan cátei le lánina Búngiu, ru ligía ubáfu woun lun gayáraabei lan lídan wamá ában queísi labúseeruni Búngiu. ²⁰ Jugúya, ígira jumáli binádu jigáburu, queísi lídaanjadün lan ában lúma Crístu, gidáadün lídaangiñe ligáburu jarítangun güirgia luágu buri cátei. ¿Cáti uágu jabágaridunbei camá jamuga lánigugidün ubou, ²¹ íchaagua júngua lun ligáburu ubou lun jagúnfulirun lúma Búngiu queí buri jamúga lúru luágu le aríñagubei. “Magúurabeí le, meígabeí líra, márügüdaabei cátei ligía?” ²² Sún buri gumádi le, luágu buri cátei le gagúmuchaditi láu layúsúrún, áni máma ámu cátei uef gumádi buri lúma arúfudajani le jáni güirgia. ²³ Inárüni luágu gayára lan genege láni buri cátei lánina subúdi lugúndun labúseerúniwa agúnfuliruni lúma únabuni lun lagúnfulirúniwa láu, áni deréti líra woun. Láu sun líra, mabáfuti lúru luágu ligía lun lídejan luágu luríban jayúmagan güirgia.

3

¹ Queísiti jabágariduña lan ában ibágari iséri ladúga lídaanjadün lan ában lúma Crístu, áluaja jumeí buri cátei le lánina siélu, le ní lubei Crístu ñun lueígiñe loúnwenren Búngiu. ² Samína jumá luágu buri cátei le lánina siélu, máma luágu buri le lánina ubou. ³ Jilátün lúma Crístu lun ubou le, guetó, níjein jibágari le tímatimaati lúma Crístu le yágütabei siélu lúma Búngiu. ⁴ Dánme lagríbudun Crístu, le úmabei lídan wamá ában, wachúlaaguba gíñe lúma, ábame gafánran wamá lídan luweírigan.

Binádu ibágari lúma iséri ibágari

⁵ Ígira jumeí sun le jigáburibeí le láninabei ubou le. Úa la ni ában jídaangiñe agámariduti mamárieidunga, madúgün jugúyame cátei wíyeti, mafálara jumeí luríban ayúmajani, mawéinamulá jágu luágu cátei le máma jáni, le méme ájuduraguni joun sándu. ⁶ Lueígiñe buri cátei le, láburujan lanárime ligáñi Búngiu jawágun ja madúgünbaña gásu láu. ⁷ Jugúya, adúga buri jumúti meja cátei le lídan meja binádu jibágari, ⁸ ánjeinti guetó, ígira jumeí sún buri cátei le. ígáñi, iyéreejabuni, wuríbani, anábajani, lúma buri dimúrei wíyeti. ⁹ Mariñaga jumá iyéeni júmagua quei ígira jumáli lan binádu jigáburu lúma lé buri meja jadúgübeí. ¹⁰ Iséríjali jigáburu le isérideinábei quei méme ligáburu Búngiu guánarügü le adúgübalin, daríme jasúbudiruni Búngiu buídu buídu. ¹¹ Iséri ibágari ligía, mámaali cátei lánina jurú jumá o máma jumá jurú, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machúlaaguntiña, idámuni, máma idámuni, Crístu, ligía sun cáteibeí, áni níjein gíñe jádan sun lánigu láu láni Espírítu.

¹² Jñsniñetün lun Búngiu, anúadaja láadün lun lánigume. Ítara líña lubeíti, abágarida jumá queísi lánigu, láu gudémejabu, areíduni, manáanguni únguau, gagaámbadi, lúma gagúraasuni. ¹³ Gagúraasun jumá jubáruagua, ferúduñagua jugúyame júmawagua, ítara

quei ferúduna lánün Crístu, ítaralá gñe jadúga. ¹⁴ Louúgiñe sun cátei, jínsiñejabu jumá, ligía cátei le íchugubalin sun cátei lídan ában, áni jóústagüdaleí lubuídun jigáburí. ¹⁵ Abúguraleí lídarángilan Búngiu sun le jadúgübei, ladúga ligía lagúarunbei Búngiu jun lun ábanrügi jumá úgubu, abágarideina láu darángilaü. Geteingiradi jumá gñe.

¹⁶ Buíngüdalóun láni Crístu ugánu janígi le gumúti. Arúfudaja jumá júmawagua, aríñagagua jugúyame júmawagua láu lichú áu. Jerémuja luágu luweírigun Búngiu láu eteingiruni lun tídan janígi. ¹⁷ Furúmieguarügü cátei le jadúga o le lan jaríñagun, adúga jumeí lídan ában luwúyeri le íchuguti inébesei lun Wabúreme Jesucrístu, eteingireina Búngiu Úguchili lídaangiñe Jesucrístu.

Igáburí le lúnbei wagáburiduni jáma ja wábiñebaña

¹⁸ Würíña, gagáambadi jumá joun júmarigu, ligía cátei buíti le lúnbei jadúgüni queisi affñetiña luágu Wabúreme Crístu. ¹⁹ Wügúríña, jínsiñe jamá júmarigu jun, magáñida jumá jáma. ²⁰ Isáanigu, agáamba jumáña jagúbürigu lídan sun cátei, ladúga ligía jínsiñebei lun Búngiu. ²¹ Agúbürigu, másügüragualá jagúmadiruniña jisáanigu, ragú jáñein magúraasuni. ²² Esériwidutiña, gagáambadi jumá joun jiyúbudirigu lídan sun cátei, mámarügü dan le aríagu jáña lan jun lun jeréderun buídu jagíbugiñe, adúga jumeí súnwandan táu sun janígi ladúga luweírin linében Búngiu jun. ²³ Furúmieguarügü cátei le jadúga, adúga jumeí láu ugúndani, camá jamuga jadúgüñein lun Wabúreme Crístu máma joun gürígia. ²⁴ Subúdi jumáli luágu líchugubei lan Búngiu alágan jun queisi jafáyeiruaja, ladúga lun Wabúreme Crístu le Jabúreme le tímatimaati jesériwida. ²⁵ Ánjeinti le adúgüti wuríbati, lerésibirubei lafáyeiruaja wuríbati le ladúgübei, áni ában láu lanúgüniña Búngiu sun gürígia.

4

¹ Iyúbudirigu, lúnti buídu lan jigáburí jáma jumúsuniña, ousera jumáña láu úarani lúma íríchaü, jarítagua jumá luágu níjein lan gñe ában Jabúreme yágüta siélu.

² Ítara méme jumá ayúmuragua lun Búngiu sarágu, agáguduañu, eteingireinei Búngiu. ³ Ayúmuragua jumá gñe wawágu lun ladáranun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ní lan Crístu jádan lánigu, juríu yebe, máma yebe juríu. Luegiñe napúrichijani cátei le, nadaürúwa. ⁴ Ayúmuragua jumá lun nasúbudiragüdüni furáangu quei lubúdubu.

⁵ Buídulá jóuserun jáma ja maffñebaña, yúsu jumeí jidáani lídan cátei le buídubei. ⁶ Lúnti gúndaawa lan láu jiyáanu súnwandan, lúnti gñe semé lan, lúnti gñe jasúbudiruni fda lúba lan jóunabuniña gürígia.

Lagúmujóun buri mábugaü

⁷ Laríñaguba wadúje Tíquico nuágu jun. Jínsiñeti wügúri ligía woun sarágu, ligía ában ídejati buíti le gñe esériwidubei lun Wabúreme Crístu núma. ⁸ Ligía nouñajaanbalin jun lun laríñagun jun ída waña lan, lun gñe líchugun gurásu jun. ⁹ Níngira gñe Onésimo lúma, wadúje úraguati le jínsiñebei woun, le jupaísanun. Jagíaba abájüdagua jun luágu sun le asúseredubei ya.

¹⁰ Mábuga líña Aristárco le nouba furísunrugu jun, mábuga líña gñe Márcos le lidúje Bernabé jun. Aríñawagúaaü jun luágu Márcos, ánjein nüdün arjáun, resíbi jumeí buídu.

¹¹ Mábuga líña gñe Jesúsú, le gñe gríbeí Jústo, jun. Jagía rügúñanu jádaangiñe juríu affñetiña ja ñadágimeinjáñabaña núma luágu larúeijan Búngiu, áni jayábin nun quei ában ouñwenbun dúgüdaguaü. ¹² Mábuga líña Epáfras le jupaísanun, le esériwidubei lun Crístu, jun. Ligía, súnwandan layúmuragun juágu lídan layúmuragun lun Búngiu lun derégüdagu jumá lídan jaffñen áni derégeguñu júngua buídu buídu lun jadúgüni lugúndan Búngiu. ¹³ Geféentina luágu jarítagua lan Epáfras juágu, lúma gñe jawágu ja ubúrügubaña Laodicéa lúma Hierápolis. ¹⁴ Mábuga líña Lúcas, le wasúrusian, le jínsiñebei woun, jun, lúma gñe Démas.

¹⁵ Mábuga níña joun idújeñu lueígiñe Crístu ja ubúrugubaña Laodicéa. Rújuma gíñe mábugaü tun Nínfas lúma joun sunagun juágu lídan layúmuragun lun Búngiu lun derégüidagu jumá lídan jaffñen áni derégeguñu júngua buídu buídu lun jadúgüni lugúndan Búngiu. afiñetiña ja oúndaragubaña túbiñe lun jájuduragun lun Búngiu. ¹⁶ Lásunme jalíjanun gárada to júmagua, joúnajounme lun jalíjanun tílana ligílisi Laodicéa, alíja jumounme gíñe gárada to achúlürüboun jun Laodicéagiñe to nabúrijaboun. ¹⁷ Aríñaga jumá lun Arquípo lun ladúgüni wadágimanu le rúlaalbei Wabúreme Crístu lun, buídu.

¹⁸ Niján numábugaü le nabúrijabei jun láu nújabu guánarü—áu Páblo. Jarítagua jumá luágu nadaürüña lan. Binflaün Búngiu. Ítaralá.

FURÚMIÑETU LIGÁRADAN PÁBLO JOUN TESALÓNICANA

Labúrïjan Páblo jáma líbirigu joun tílana liglísi to ubúruguboun Tesalónica

¹ Áu Páblo lúma Silváno láu Timotéo, wabúrïjañoun gárada to jun, jugúya tílana liglísi to Tesalónicaboun, ja lánigubaña Wáguchi Búngiu lúma gñe Wabúreme Jesucrístu. Resíbi jumeí abíniruni lúma darángilau jámagiñe.

Jémpulu lánina afñeni le meja jarúfudubei Tesalónicana

² Súnwandan weteíngiruni Búngiu juágu, sun jugúya, jarítagua wagía juágu súnwandan lídan wayúmuragun lun Búngiu. ³ Jarítaguatiwa ligíbugiñe Wáguchi luágu lubuídun jeseríwidun lun Jesucrístu ladúga jafñen luágu, lúma lubuídun jóuseruniña wánigu ladúga buin tíña lan janígi láu insíñejabuni, lúma lubuídun jawánduni sun asúfuriruni ladúga jeménigidun luágu Wabúreme Jesucrístu le ídaangiñebei lan jachúlúra siélun. ⁴ Nidújeñu, jínsiñetün lun Búngiu, áni subúdi wamúti luágu anúadaja láadün lan. ⁵ Lugúndun dán meja le wapúrichijanbalin ugánu luáguti asálbaruni jun, merésibirun jumúti queísirügü dimúrei, ñadágimeinti tidan janígi, láu lubáfu Sífiri Sándu, lun lasáansiraguni jigáburu. Resíbi jumúti meja ugánu ligía láu ichoúruni le tímatimaati luágu inárüni lan. Subúdi jumúti lubuídun woúserun jagánagua, lun ábanbadiwa lan jémpulu buiti jun.

⁶ Ába jáyeijani wagáburu, lúma ligáburu Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barú lan jerésibiruni Crístu asúfuriruni jun. ⁷ Ítara líña jíábin lun ábanbadün lan jémpulu joun sun afñetiña ja loúbawagubaña Macedónia lúma Acáya. ⁸ Burúguaali ugánu luágu Wabúreme Jesucrístu jámagiñe, mámarügü loúbawagu Macedónia lúma Acáya, burúguaali lídan sun fulásu, áni subúdiwaali luágu afñeni le jibíjubei luágu Búngiu lídan sun fulásu. Memégeirunwati wabájüdagun luágu jafñen joun güri-gía, ⁹ lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruniwa, lúma luágu jígiruni jájuduragun joun sándu lun jafálaruni Búngiu, ába jagúmeserun esériwida lun Búngiu le wíwanbei, le gñe tímatimaatibe. ¹⁰ Abájüdaguatiña gñe juágu luágu jagúrabajañein lan lagiribudun Liráu Búngiu siélu-giñe—Jesús le lásaaragüdübei Búngiu lídaangiñe ouweni, le asálbarubáliwa lueí lanárimé afáyeirujau luágu figou le lúnbei líábin.

2

Luwádigimari Páblo Tesalónica

¹ Jugúya guánarügü, nidújeñu, subúdi jumúti luágu máma lán meja luágu ni cáta woúdin aríjaün. ² Queísi jasúbudiruni, wuríbati meja jóuseruniwa güri-gía ja Filíposbaña, ába wayábin júmoun ladúgarügü líchugun Búngiu an-gi woun lun wadúgüni. Ába wapúrichijani ugánu le lánina asálbaruni jun, mebéresenga wagía láu le lúnbei wasúfuriruni jámagiñe güri-gía ja mísiñejabúbaña lun ugánu ligía. ³ Máma wapúrichijaña ladúga jamúga bulféguatü, queísi jaríñaguni wáganiñu, ni láu luríban arítaguni, ni lun wayéedagunün. ⁴ Lubáragiñe líra, aríja lumúti Búngiu luágu buídu wamá, ába líchuguniwa lun wapúrichijani ugánu le lánina asálbaruni, ítara líñati wadímurejan lun wagúnfulirun lúma eménigini le lánbei Búngiu wawágu. Máfaaguntiwa lun gúnda jamá güri-gía wáma, wáfaagun lun gúnda lan Búngiu wáma, le asúbudirubarun wanígi. ⁵ Queísi jasúbudiruni, siñáti lariñawagún luágu adímureja wamá meja jun láu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le. ⁶ Málujantiwa lun wibíjin uwefriguni jámagiñe ámu güri-gía, ni jámagiñe, láu sun gayára lan jamúga wasándiragüdüni lijürü wagúmadijan queísi láni Crístu apóstolugu. ⁷ Lubáragiñe líra, ouserarügü wamútiün láu ában uálini queísi ában úguchuru to agúriajabaliña tirájüñü,

ounígira táña. ⁸Weíríti jínsiñe woun darí lun máma rügúñein lan jamúga láni Búngiu ugánu wabúseera wíhugun jun, buséntiwa jamúga wíhuguni wabágari guánarügü jun, le luweírín jínsiñe woun. ⁹Nidújeñu, jarítagua jumúti ligáburi wawádigimari lúma ligáburi wáfaagun lun wawínwandun. Nadágimeintiwa meja wéyuagu áriebu lun mámabadiwa lan ijúrtügu lun ni ában jídaangiñe, sun awánja lan apúrichijei láni Búngiu ugánu jun.

¹⁰Geféentün, geféenti giñe Búngiu luágu reidei wamá meja láu ában igáburi le jarúmati áni surú jídan, jugúya le afñebei, míchugunga wagía lúgaaru lun ni ában lun líchugun wadúnrun. ¹¹Subúdi jumúti giñe ída líña lan wíhugun gurásu jun lúma derégüdaguau lun jafñen, cáda ában jídaangiñe, quei ladúga ában úguchili joun lirájúñü. ¹²Aríñagaadiwa jun lun buídu lan jóuserun quei lúnti lan jóuserun lánigu Búngiu le agúarubei jun lun gafánran jumá lídan larúeijan lúma luweírigin.

¹³Ligía, súnwandan lubeí weteíngiruni Búngiu, lugúndun dán meja le jagáambunbalin láni Búngiu ugánu le wapúrichijabei jun, resíbi jumúti queísí ugánu láni Búngiu, máma queísí ugánu jáni wügúriña. Áni inárüni luágu láni lan Búngiu ugánu, le íchugubalin ubáfu jun lun jagáburidun buídu, jugúya le afñebei. ¹⁴Nidújeñu, dan le jeíbaajanbalün jupañsanun, suséreti jun quei méme le asúseredubei joun tílana buri ligílisi to Judéaboun, ja lánigu Búngiu lídaangiñe Jesucrístu, eibaaja jamútiña giñe juríu ja japañsanun. ¹⁵Juríu, jagía áfarubalin Wabúreme Jesúsu jilágubei, áfaragua jamáña profétagu, áni bugá jamútiwa giñe boúgudin luef jageíra. Magúndaanti Búngiu jáu, jáganiñu giñe sun gürgía. ¹⁶Dan le wabúseerun wadímurejan joun ja mámabaña juríu lun giñe jasálbaran, májatiña yebe juríu lun wadúgüni. Láu igáburi le, gánwoungugüda jamúti jafígoun. Ánjeinti guetó, liábindügúrtüga lanárime ligáñi Búngiu jawágoun.

Busényati Páblo lídin arjaña Tesalónica

¹⁷Nidújeñu, murúsun dan lárigiñe wígirunün (láu sun ajúnja méme lan tídan wanígi) ounwenbun wabúseerun wouídinya arjañu. ¹⁸Jóuchatiwá yebe wouídn, áu Páblo, sarágu weýyaasu yebe nouchun nídn, áni ságü nouchun nadúgüni, mígirun lumútina Máfia. ¹⁹Ladúga jugúya guánaru íchugubalin ugúndani woun, jugúyaba arúfudei lubuídun weseríwidun lun Wabúreme Jesucrístu le uágubei gayára lan weménigídun lun werésibiruni wafáyeirujaja dánme le lagíribudun, áni jugúyaba wagúndaaragüle dánme le jaráramun ligíbugiñe. ²⁰Jugúya lébunabei wagúndan, áni rújadün lébuna wadímurejan buíti joun ámu juágu.

3

¹Dán meja le siñá wamaali awánda masúbudirunga ída líña lan sun cátei júma, ába warítagn luágu buídutima lan lun weréderun Aténas, áu lúma Silváno, ²lúma lun lídn wadúje Timotéo, le ában eseríwiduti lun Búngiu lídn lapúrichijóun ugánu luágu Crístu le Wasálbaragüle, arjañu. Oúnaja wamúti júmoun lun líderagunün arárama buídu lídn jafñen, ru ligía gurásu jun, ³lun úa lan ni ában efguaduti larúna luefígiñe buri lénreengúnga le lasúfurirubei luágu lafñerun luágu Crístu. Jugúya guánarügü subúdi jumúti luágu lúnti lan wagúrabajani asúfuriruni líbe le. ⁴Dán meja le awánjagua lan júma, aríñagatiwa meja jun luágu lúnti lan wagúrabajani asúfuriruni luágu líri Jesucrístu, áni ítara líña lasúseredun, quei jasúbudiruni. ⁵Ligía lébubei dán meja le siñánaali lan awánda, ába nouñajan álügüdjaja ída jíña lan lídn jafñen, ladúga nanúfude luef jamuga línchajani Máfia lun jígiruni jafñen luágu Crístu, ába jamúga liábin wawádigimari jídn lun ni cáta me.

⁶Guetó, giríbujali Timotéo Tesalónica giñe, áni barúti ugánu buíti woun luágu jafñen lúma jínsiñejabu. Laríñajare woun luágu jarítagua jumá wawágu láu insiñeni súnwandan, luágu giñe luweírín jabúseerun jarjiniwa, ítara giñe quei busén wamá warjiniñ. ⁷ítara líña lubeíti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le wasúfurirubei guetó. ⁸ítara líña quei iséri ibágari woun wasúbudiruni luágu derégüdagu jíña lan lúma Búngiu. ⁹Ída lubá funasan wíhugun eteíngiruni buídurügüti

lun Búngiu juágu, lúma luágu sarágu ugúndani le rújumaalíbei woun? ¹⁰Wéyuagu, árieibu, wayúmuragun lun Búngiu lun gayáraaya lan warjiniün, gúnfuli lámuga le mégeibeí lídan jafínen.

¹¹Buséntiwa lun líderaguniwa Wáguchi Búngiu lúma Wabúreme Jesucrístu lun gayára lan wóudin aríjaün, ¹²lun gíne laweíridagüdüni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun. ¹³Derégeguagüda lámugaün Wabúreme Búngiu júngua lun le gumúti, madúnrunga jugúyame ligíbugiñe dánme liábin Wabúreme Jesúsú jáu sun lánigu.

4

Igáburi le áubei lagúndaara Búngiu

¹Nidújeñu, subúditi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuraguatiwa jun láu líri Wabúreme Jesucrístu lun ítaramemetima lan jagáburidun queísi labúseeruni Búngiu.

²Jarítaguatiün luágu arúfudajani le wíhugubei jun láu lugúmadin Wabúreme Jesúsú.

³Le labúseerúbei Búngiu, lun jabágaridun derégeguañu júngua lun, lun úa lan ni ában agámariduti mamárieidunga, ⁴lun cáda lan ában láluajanun lúmari lau lubuídun arítaguni queísi labúseeruni Búngiu, lídan lubúdubu, ⁵máma láu luríban ayúmajani quei jadúgüni gürígia ja ibídiñejabubaña lun Búngiu. ⁶Úa la ni ában adúgüti wuríbani lun lidúje láu lagámaridunun lúmari, jéreti labeíchuni Búngiu le adúgüti cátei le, queísi waríñaguni jun. ⁷Máma lun wabágaridun lídan iwíyeni lagúara Búngiu woun lun lánigu wamá, busénti lun wabágaridun derégeguañu wóungua lun. ⁸Ítara líña lubeíti, le amájaruti lerésibiruni arúfudajani le, máma lun ni ában wügúri lamájara, lun Búngiu lamájara, Búngiu le íchugubalin Sífiri Sándu woun.

⁹Luágu jínsiñejabu joun lánigu Búngiu, úati ni cáta lun nabúrújani jun lugúndun arúfudajaali Búngiu guánarügü jun lun jínsiñegua jumá, ¹⁰áni ítara líña jadúgüni joun sun jidújeñu lueígiñe Jesucrístu ja lídaanbaña sun ubúruge Macedónia. Láu sun líra, nidújeñu, ayúmuraguatiwa jun lúntima lagánwoundun jínsiñejabu. ¹¹Jóúcha jumá jabágaridun darángilañu, beréseguñu lídan le lúnbei jadúgüni. Nadágimein jumá lun janúriragun júngua, quei waríñaguni jun, ¹²inébe jumámuga joun ja mafíñebaña luágu Jesucrístu, úa lámuga gíne jemégeirun.

Liábin Crístu

¹³Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, lueí jajírudagun quei ja meménigidunbaña luágu níjein lan ában ibágari lárigiñe ouweni. ¹⁴Ítara quei affíne wamá luágu jilá lan Jesúsú áni sará ligía lídaangiñe ouweni, ítara líña gíne affíne wamá luágu lásaaragüdübaña lan Búngiu ja ouwegubaña affíneñu luágu Jesúsú.

¹⁵Ligía waríñagunbei jun queísi larúfudajan Wabúreme Jesúsú, luágu wagía lánme le wínwangilibeí dánme liábin, mámaba wagía núdün jabáragiñe ja jiláguaañabaña. ¹⁶Dánme le arárireina lan Wabúreme Jesúsú siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lífidun Búngiu. Gürígiameti ja ouwegubaña affíneñu luágu Crístu, jagiaba ásaara furúmiñe. ¹⁷Lárigiñeme, ábame wásaarun, wagía affíñetiña ja wínwangiñabaña, ábame wanügúniwa úara jáma lídoun juánriñu lun wadúnragun lúma Wabúreme Jesúsú garábalirugu. Ábameti weréderun lúma Wabúreme Jesúsú lun sun dan. ¹⁸Ligíati rújuma lubeí gurásu júngua láu dimúrei buri le.

5

¹Ánjeinti luágu cába lan dan lasúsereda buri cátei le, nidújeñu, mabúseerúnwati nabúrújan jun. ²Subúdi jumáali buídu buídu luágu lachúlürüba lan wéyu ligía dánme magúrúbuniwa lan, queísi liábin ában íwerujati árieibu. ³Dánme añája lan gürígia aríñaga. “Lídaañein dan sun cátei áni úati mégeiti”, ligíame liábin gürínguau jawágun sódini quei

liábin agáriduni tun wúri dageínatu, siñábeiti jeséfurun. ⁴ Ánjeinti jugúya, nidújeñu ja afiñebaña luágu Jesucrístu, máma lídaañadün lubúriga luágu cátei lánina Búngiu lun lárügüdünün luwéyuri liábin Crístu quei lárügüdün ában jíweruti. ⁵ Lídaañadün larúgounga sun jugúya, máma wagía lánina áriebe lúma lubúriga. ⁶ Ligía mouñ lubei lun maráanserun wamá quei ja mafñebaña luágu Jesucrístu, lúnti deréñuma wamá lubá lagríbudun, lídan wagíame lubuídun wachúgü. ⁷ Ja arúmugubaña, áriebe jarúmuga, ja abácharuadubaña, áriebe jabácharuada. ⁸ Ánjein wagía le lánina wéyuagu, lúnti lídan wamá lubuídun wachúgü. Lúnti wadáuragun woúngua láu afñeni lúma láu ínñeni queísi ladáuragun súdaara láu laníguagu lun loúnigiruni. Lúnti gíñe jeménigi wamá luágu wasálbarun le ítarabei quei bunídi le áubei ladáurei súdaara lábulugu lun loúnigiruni. ⁹ Máma lun labeíchuniwa Búngiu lanúadajawa, lun wibíjini asálbaruni lídaangiñe Wabúreme Jesucrístu lanúadajawa. ¹⁰ Jiláti Jesucrístu wawágu lun wabágaridun úara lúma, wínwañu wagía yebe, jiláñu yebe wéyume le liábin. ¹¹ Ligía rúmeme jumá lubei gurásu lúma érei júniwagua ítara quei jadúgüni guetó.

Laríñaguni Páblo joun afñetiña ída lúba lan jagáburidun

¹² Nidújeñu, ayúmuraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja jagía jun lídan líri Crístu. ¹³ Lúnti jíñsiñe jamá jun sarágu luágu wadágimanu le jadúgübei. Abágarida jumá lídan dan jáma jíbirigi.

¹⁴ Aríñagatiwa gíñe jun, nidújeñu, lun jerérun joun ja májatiña jawádigimaridun, lun jíchugun gurásu joun ja magúraasunbaña, lun jíderaguniña ja débilibaña lídan jafñen, lun gíñe gagúraasun jumá jabá súngebei.

¹⁵ Úa la ni ában afáyeiruti wuríbani luágu wuríbani. Joucharügü jumá jadúgün buíti jagánagua, lúma joun sun güriña.

¹⁶ Gúnda jumá súnwandan. ¹⁷ Ayúmuragua júma lun Búngiu sun dan. ¹⁸ Teínqui jumeí sun le asúsereduti—buíti, wuríbati, niján le labúseerúbei Búngiu júmagiñe, queísi afñetiña luágu Jesucrístu.

¹⁹ Merédera jumeí luwádigimari Sífiri Sándu tídan janígi. ²⁰ Mamájara jumá lun dimúrei le laríñagubei Búngiu jayúmulugugiñe jídujeñu luegiñe Jesucrístu. ²¹ Joucha jumeí sun arúfudajani aríja jumeíme ánjein lúmagiñeti lubei Búngiu, ábame jeréderun lau le inárñibebei. ²² Dise jumá luef sun luwýeri wuríbani.

²³ Búngiu guánarügü, le íchugubei darángilaü, derégeguagüdalaün júngua lun le gumúti, areída loume juwáni, janígi luma júgubu dayáruagu, jarúmañu, lubá liábin Wabúreme Jesucrístu. ²⁴ Úaraguati Búngiu le agúarubei jun lun lánigu jumá, lagúmuchubei ladúgüni sun cátei buíti le jídan.

Lagúmujoún buri mábugaü lúma abíniruni

²⁵ Nidújeñu, ayúmuragua jumá lun Búngiu wawágu.

²⁶ Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷ Aríñagatiwa jun láu lugúmadin Wabúreme, lun jalíjanun gárada to joun sun wadújeñu luegiñe Jesucrístu.

²⁸ Binílaün Wabúreme Jesucrístu. Ítaralá.

TIBÍAMAN LIGÁRADAN PÁBLO JOUN TESALÓNICANA

Labúriijan Páblo jáma líbirigu joun tílana liglisi to Tesalónicaboun

¹ Áu Páblo lúma Silváno láu Timotéo, wabúriijañoun gárada to jun, jugúya tílana liglisi to ubúruguboun Tesalónica ja lánigubaña Wáguchi Búngiu lúma Wabúreme Jesucristu. ² Reslbi jumeí abíniruni lúma darángilau jámagiñe.

Lagúseragüdübaña Búngiu gafigountiña dánme liábin Crístu

³ Nidújeñu, teínqui wamúti Búngiu súnwandan juágu, queísi lúnti lan wadúgüni, lugúndun laweírduña jafiñen sarágu, áni ínsiñeni le jídaanbei jubáruagua aweírdeinatima líña súnwandan. ⁴ Adímurejatiwa buíti juágu tídan buri lilígilisin Búngiu, luágu gurásu lúma afñeni le jarúfudubei lídan sun eíbaajoúni lúma idíjeri buri le jasúfurirubei lueígiñe Crístu. ⁵ Arúfuda lumúti lubuidun jawándun luágu úaragua lan Búngiu lídan ligáburu lagúseragüdün, láu lanúgünün quei garíchatiña lun jebélurun lídoun larúeijan, le uágubei jasúfurira.

⁶ Ladúga gíñe úaragua lan Búngiu, lachúlürüba wéyu lun lasúfuriragüdüniña ja asúfuriragüdübalün, ⁷ lúma gíñe lun líchugun eméraaguni jun, jugúya le asúfurirubei ítara quei wagía, lídaanme wéyu le lúnbei lachúlaagun Wabúreme Jesúsú sielugiñe lídan wátu geméti jáu láni ánjeligu ja gabáfubaña. ⁸ Liábinba lun labefchuniña ja masúbudirunbalin Búngiu, madúgün jagía gásu láu ugánu luáguti asálbaruni le wabíjibeí lídaangiñe Wabúreme Jesúsú. ⁹ Agúnrinchawagúni le magúmuchaditi, ligíaba jabeichúagüle, jabugúba díse lueí laríjin Búngiu lúma luweírigan lúma lubáfu. ¹⁰ Dánme le liábin Crístu, larijúba luweírigan jádan lánigu, ábame laweírduñan janígi sun ja afñeñabaña luágu, áni jugúya, jádaanbadün gurígía jagía queísi afñeedün lan luágu le waríñagubei jun luágu.

¹¹ Ligía lébubei súnwandan lan wayúmuragun juágu, amúriaja wagía lúma Wabúngiute lun jarúfuduni luágu garícha jumá lun jádaanbadün lan ja únbaña lagúara. Ayúmuraguatiwa gíñe lun Búngiu lun lagúnfulirun sun jayúmajan lun buídu lan jigáburu, láu lubáfu, lúma buri sun wadágimanu le jadúgübeí ladúga jafiñen. ¹² Láu igáburu le, líchugúba uweíriganu lun líri Wabúreme Jesúsú lídan jibágari, ábame líchugún uweíriganu jun luágu lareídun Wabúngiute lúma Wabúreme Jesucristu.

2

Le lúnbei lasúseredun lubáragiñe lagíribudun Jesucristu ubouágun

¹ Guetóti, nidújeñu, libúgürü liábin Wabúreme Jesucristu, dánme liábin oúndaraguawa lúma, ² amúriajatiwa júma lun masáansirun jumáni ligáburu jarítagnun ítara uménrengun, masústarun jugúyame luágu ní ában ugánu, o dimúrei buri le uáguti laríñawagua luágu lúmagiñeti lan Búngiu, ní tuágu gárada to uáguboun jariñaga luágu wámagiñetu lan, to aríñaguboun luágu chúlújali lan luwéyuri Wabúreme lun lagíribudun ubouágun. ³ Mígiraguagüda jumá júngua lun jeyeedúniwa ítara. Lugúndun lubáragiñeme lachúlürün wéyu ligía, níjeinbei awúribujani lúma Búngiu, lachúlaaguba gíñe lágani Crístu, le lunbei lagúnrinchawagún. ⁴ Ligía láganibeí Búngiu, liñúraguba lúngua luágu sun cátei le luáguti Búngiu, lachúlürüba gíñe añúura tídan lilígilisin Búngiu, camá jamuga Búngiu ligía, ligía guánarügü aríñagati luágu Búngiu lan.

⁵ ¿Marítagnun jumútisan luágu aríñagañaja náni méja buri cátei le jun dán meja le anájeingua lan júma? ⁶ Subúdi jumúti gíñe ída líña lán meja nadímurejan luágu ában ubáfu le lúnbei leréderuni liábin lágani Crístu lubáragiñe lidáani. ⁷ Luwadíjimariña wuríbani guetó, arámudagu, áni lúnti lagídarúniwa le eréderubalin lágani Crístu ligía lubáragiñe

gayára lan láfuridun lídoun larúgounga. ⁸ Ligíaba larijóuniwa, áni lagúnrinchagubei Wabúreme Jesúsu ágani ligía láu ában dimúrei, lúma láu luweírigan le áubei liábin. ⁹ Ladúgaba Máfia liábin lágani Crístu ligía, lachúlürüba láu sarágu ubáfu, ladúgüba buri miláguru yéeti lun layéedaguniña gürígia. ¹⁰ Layúsuruba sun luwúyeri wuríbani lun layéejaniña ja lídaanbaña úma lun gürínguau, quei mája jabeí lun jerésibiruni inárüni luáguti Crístu lun jasálbarun. ¹¹ Ligía líchugunbáliña Búngiu lídoun bulfeiguau lun jeyeedúniwa lúma lun jaffínerun luágu iyéeni, ¹² lun jasiadirúniwa lun máfiougati sun ja májabaña jaffínerun luágu Crístu, jínsiñerügü ligía wuríbani joun.

Anúadajóutiña lun jasálbarun

¹³ Ánjein jugúya, wadújeñu jínsiñetiña lun Crístu, súnwandan teínqui wamúti Búngiu juágu lugúndun anúadaja lumútun lúmagiñe lagúmeserun dan lun jasálbaruba lan láu Sífiri Sándu le arúmadagüdúbarun janígi, lúma inárüni luágu wasálbarun lídaangiñe Jesucristu, le uágubei jafíñera. ¹⁴ Ligía lagúarunbei Búngiu jun, lun jasálbarun láu ugánu le wapúrichijabei, lun gafánraanbadün lan lídan luweírigan Wabúreme Jesucristu.

¹⁵ Ítara líña lubefti nidújeñu, derégüdagu meme jumá, mabúleidagan jugúyame lueí buri arúfudajani le rúwamaalíbei jun láu dimúrei lúma táu gárada. ¹⁶ Wabúreme guánarügü Jesucristu lúma Wáguchi Búngiu, le arúfuda láalíbei línsiñejabu woun láu lareídun, ¹⁷ ru ligía ámalijouni le magúmuchaditi woun lúma ában eménigini bufti, rúla dűgüdagau tun janígi, derégüdaguağüda laúnme lun jaríñaguni lúma lun jadúgüni sun le buídubei.

3

Amúriajati Páblo jáma lun jayúmuragun lun Búngiu luágu

¹ Lagúmujóun cátei, nidújeñu, ayúmuragua jumá wawágu, burúgua lámuga ugánu luáguti Wasálbaragüle furése lídan sun fulásu, resíbiwa ligíame láu ugúndani queísi lasúseredun jagánagua. ² Ayúmuragua jumá giñe lun gayára lan weséfurun jaweí wűgüríña wuríbatiña, lugúndun máma sun gürígia uboúagu affíñetiña luágu Crístu. ³ Ánjeinti Búngiu, gayáraati wafíñerun luágu, luágu lagúnfuliruba lan láu lerérun, lárügüdübadün derégüdagu, goúnigilaúnme tueí lisádarán Máfia. ⁴ Jeménigitiwa luágu Wabúreme Búngiu luágu adúga jumáni le waríñagubei jun áni luágu jadúga mémebei lan. ⁵ Íderagualaún Búngiu lun jasiándiruni lísiñejabu jun, lúma lun gagúraasun jumá quei Crístu luágu jasífurirun.

Lúnti wawádigimaridun

⁶ Nidújeñu, aríñagatina jun lídan líri Wabúreme Jesucristu lun jadísedun lueí furúmieguarügü jídaangiñe le májati luwádigimaridun, le mabágaridunti úaragua lúma arúfudajani le jibíjubei wámagiñe. ⁷ Subúdi jumúti ída lúba lan luwúyeri wabágaridun jagánagua lun jafálaruni wáni jémpulu, merédetiwa mawádigimariga jagánagua. ⁸ Meígin wamúti jeígin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebu, lun mámbadiwa lan ában ijúrügu lun ni ában jídaangiñe. ⁹ Láu sun garícha wamá yebe lun wamúriajan júma lun jíderaguniwa, ñadágimeinrügütiwa lun wíchugun ában jémpulu jun lun jafálaruni. ¹⁰ Dán meja le júma wamá, rúwamuti meja gumádi le jun. “Le májabei luwádigimaridun, meígalá.” ¹¹ Agáambatiwa luágu añájein lan jídaangiñe májatiña jawádigimaridun, jerédera madúgünga ni cáta, eténira lun le moún lubei jeténirun lun. ¹² Waríñaguña jóun buri gürígia jagía láu lugúmadin Wabúreme Jesucristu lun jawádigimaridun darángilañu lun jagáñeirunun jeígan fein.

¹³ Nidújeñu, mabúchadalá juágu adúga bufti. ¹⁴ Ánjein ñi ában le madúgünti gásu láu le waríñagubei tídan gárada to, aríja jumeí cátei lan, memétera jumá lúmoun, barú lámuga busíganu. ¹⁵ Manúga jumeí quei ágani, erérarügü jumá lun queísi idújei.

Lagúmujóun abíniruni

¹⁶ Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

¹⁷ Áu Páblo, nabúrújañein mábugaü le jun láu guánarü nújabu lúma nilétüran. Ítara lúba jasúbudiruni luágu áu lan óunajabarun gárada to. ¹⁸ Binílaün Wabúreme Jesucrístu sun jugúya. Ítaralá.

FURÚMIÑETU LIGÁRADAN PÁBLO LUN TIMOTÉO

Labúrrijan Páblo lun Timotéo

¹ Áu Páblo, láni Jesucrístu apóstolu áu, noúnajoún láu lugúmadin Búngiu le Wasál-baragüle lúma Wabúreme Jesucrístu, le uágubei wemenigida lun webélurun siélun.

² Nabúrújañoun gárada to bun, Timotéo, niraú le tímátimaati lídan wafñien luágu Jesucrístu. Resíbibeí abíniruni, gudémejabu lúma darángilau lúmagiñe Wáguchi Búngiu lúma lúmagiñe Jesucrístu le Wabúreme.

Ewéridijani lueí arúfudajani le maríchabei

³ Queí meja nayúmuragun bun dán meja le nídinbei Macedónia, reídeimemebá ubúругu Éfeso lun bariñagun joun itaga gürgia lun marúfudajan jamá cátei le maríchabei, ⁴ meténi jagíame lún buri úraga le magúmuchaditi jawágu jenébaanfaangu binádu mútu. Cátei buri le, barúrügüti sigénei le málati, ani mideragun lumútiña gürgia lun jesériwiduni Búngiu láu jafñierun luágu.

⁵ Le lúnbei barúfudajani joun affñetiña jagía, lun jínsiñegua jamá jámagua lugúndun jarúmaaru tan janígi, míchujali jaritagun dúru jawágu, áni buídujali jafñierun. ⁶ Añájein, adíreirutiña lueí buri cátei le, ába jíchaagun jóungua lídoun buri sigénei málati. ⁷ Buséntiña buri lun arúfudajatiña jamá lídan lúru du le líchugubei Búngiu lun Moisés, úati gunfaráanda jamáni ni le guánarügü jaríñagubei ni le jarúfudajabei luágu lúru du ligía láu sarágu affñeni.

⁸ Subúdi wamúti luágu buídu lan lúru du, yúsuwarúgaali ligía quei lubúdubu. ⁹ Lúnti lasúbudirúniwa luágu máma lan joun ja adúgübalin le buídubei ladúgüwa lúru du, lúru du jóunti ja wuríbabaña, ja magáambadibaña, ja mebéresenbaña láu Búngiu, ja gafígounbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña, ¹⁰ joun ja agámaridubaña mamárieidunga o ja agámaridubaña wügúriña jáledigu, joun ja íwerujabaña gürgia, joun ja yéebaña, jáma ja áfiñurubaña luágu iyéeni. Jóunti gñe sun ja adúgübaña ámu cátei múaradunti láu arúfudajani jarúmati. ¹¹ Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei lálalibei gürgia, apúrichija.

Eteíngiruni luágu lugúdemejabu Búngiu

¹² Teínqui numúti Wabúreme Jesucrístu, le íchugubei ubáfu nun lun wadágimanu le, luágu lanúgünina queísi ában wügúri derégüdaguati, lúma luágu líchugunina lun nesériwidun lun. ¹³ Adúga lálali sun cátei lé buri nun láu sún meja anábagua náni, eibaaja numútiña meja ja afálarubalin, adúga numúti meja sun le nuáraati lun nagú-muchaguagüdüni jafñien. Ába gudéme nan lun Búngiu lugúndun mámagidina meja affñeti luágu Jesucrístu áni íbídñetí meja nun ca lan nadúgübei. ¹⁴ Ligía luweírinbei nasándiruni labñirunina Búngiu, úara lúma affñeni lúma ínsiñejabuni le gñe wawágubei luágu lídaañadiwa lan ában lúma Jesucrístu.

¹⁵ Inárüni cátei le, le tímátimaati, áni lúnti jafñierun súngubei luágu inárüni lan. luágu “líábin lan Jesucrístu uboúagun lun lasálbaruniña gafígountiña”, áu furúmiñeti jádaangiñe. ¹⁶ Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gafígountiña. Ítara líña niábin lun ábanbadina lan jémpulu joun ja lúnbaña jafñierun luágu, lun jabíjini íbágari magúmuchaditi. ¹⁷ ¡Ligía rúwama lubeí uweíriguni lúma inébesei lun Búngiu le Warúeitebei lun sun dan, súnwandan, le móuwedadibeí, siñá ligía larijiniwa, le Búngiu le ábanrügüti, le sábiu! Ítaralá.

¹⁸ Timotéo, niraú, rúnumuti gumádi le bun lun bageíndaguni luwúribun Búngiu buídu, queí meja lariñaguni Búngiu jayúmulugugiñe wadújeñu lueígiñe Jesucrístu bun,

ragúñubei inárüni lánina asálbaruni, adúgeina le basúbudirubei luágu richá lan. ¹⁹ Añájein gürígia, féridi jamúti jaffñen ladúga madúgün jamá gásu láu le jasúbudirubei luágu richá lan. ²⁰ Ítara líña lasúseredun lun Himenéó lúma Alejándro ja nedéregerubaña lun Máfia lun jafúnrendeirun lun manábagan jamáni Búngiu.

2

Arúfudajani libúgürü ayúmuraguni lun Búngiu

¹ Furúmiñeti cátei, amúriajatina lun ladúgúniwa ayúmuraguni lun Búngiu jawágu sun gürígia. ² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágari darángilati, le derégewati lun Búngiu, le gñe inébewati lídan sun luwúyeri. ³ Buíti cátei le, gúndaati gñe Búngiu le Wasálbaragüle láu, ⁴ le busénbei lun jasálbarun sun gürígia, lun gñe jayábin lun jasúbudiruni inárüni lánina wasálbarun. ⁵ Ában rügúñein Búngiu, ában rügúñein gñe gayára ladímurejan waweígiñe ligíbugiñe Búngiu, wügúri le Jesucrístubei. ⁶ Derégeguati Jesucrístu lúngua lun loúnwen lun lafáyeiruni lebégi jasálbarun sun gürígia, ában lasúbudirawagúdün cátei le lídan lidáani. ⁷ Lun cátei le, loúnajana Búngiu lun narúfudajan joun ja mámabaña jurú libúgürü inárüni le, lun gayára lan jaffñerun luágu Crístu queísi Jasálbaragüle. Áu, queísi ában affñeti luágu Crístu, inárüni naríñagubei, mayéejatina.

⁸ Ligía nabúseerúnbei lun jayúmuragun wügúriña lídan sun fulásu, inúrañu jájabu láu tarúman anígí, úouga igáñi ni asígenejani jádan jáma jíbiri gürígia lídan le jayúmuragun lun Búngiu. ⁹ Manárimelá tuwéndegun jadáuragun würiña, lun máma lan láu amúriguni janárimeguti jaráanseragua jóungua, ni láu gólu, pérlas, o daúguaü séruburitu, ¹⁰ lun láu lan lubuífundun igáburi jadáuragua jóungua quei lúnti lan jadúgün würiña ja derégeguañabaña jóungua lun Búngiu. ¹¹ Lúnti maní jamá würiña dan le larúfudajóuniwa joun, lúnti jerésibiruni arúfudajani ligía láu ában únabuni. ¹² Májatina lun tarúfudajan würi lídan jadámurin affñetiña, ni lun tagúmadiruni würi wügúri, lúnti teréderun maníñu. ¹³ Lugúndun Adán ladúgübei Búngiu furúmiñe, lárigiñe, ladúgoun Éva. ¹⁴ Máma gñe Adán leyédubei Máfia, würi ayeedúaboun, áni láu tayeedúniwa, ába táburujan lídoun figoú. ¹⁵ Láu sun líra, jasálbaruba würiña láu jagúnfulirun láu le lúnbei jagúnfuliruni queísi úguchuru, ánjein ítara méme jaffñerun luágu Crístu, arúfuda jagía ísiñejabuni lúma arúmani láu igáburi buíti.

3

Ligáburi ída lúba lan jóuserun fádirigu

¹ Inárüni cátei le. Ánjein abúseera ában gürígia lun fádiribeí lan, ában wadágimanu buíti labúseerúbei ladúgün. ² Lun fádiribeí lan ában gürígia, lúnti labágaridun ában ibágari le míchuti lúgaaru lun ladeinjóuniwa lun. Lúnti túmari lan ábanrügü würi, lúnti gñe lanúgün ában ibágari sériuti, buíti lichúgü, inébewa. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan, ³ moún lumuti gátadi lan, manígí wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, díli ligíame, manígí ligíame seínsu. ⁴ Lúnti gayára láníña tflana lúban agúmadira buídu, lun gñe ladúgün lun gagáambadi jamá lirájüñü, inébejabu. ⁵ Lugúndun ánjein magúmadirun lubáliña wügúri tflana lúban, ¿ída lubági gayára lan laríjin jáu tflana lilígilisin Búngiu? ⁶ Moún lumuti lubefti fádiri lan ában iséri affñeruti lueí lanáangun lúngua sarágu luágu lubára, ábame láburujan lábugiñoun íñarawaguni le gádaanbalin Máfia. ⁷ Lúnti buídu lan ligáburi, lúnti gñe inébe lan joun ja maffñebaña lueí ladímurejóun wuríba luágu, ábame láburujan tídoun lisádarán Máfia lun lagúnrinchawagúniwa lubuífundun líri.

Ligáburi ída lúba lan jóuserun ja esériwidubaña liglísirugu

⁸ Ja gñe esériwidubaña liglísirugu lúnti wügúriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun. ⁹ Lúnti járúgüdüni inárüni lánina afiñeni le arúfuda lálalbei Búngiu woun, buídu, lun gñe jarúma tan janígi. ¹⁰ Lúnti jouchún, lárigiñeme, ánjein úa lubei mégeiti luágu lubuídun jagáburi, ligiaba gayára lan jesériwidun liglísirugu. ¹¹ Würiña ja esériwidubaña liglísirugu, lúnti gñe inébewa jamá, moún lumuti marásualugu jamá, lúnti sériu jamá, derégüda lídan sun cátei. ¹² Ában esériwiduti liglísirugu, lúnti túmari lan ábanrügü wúri, lúnti gñe lagúmadiruniña lirájüñü buídu jáu sun tílana lúban. ¹³ Lugúndun esériwidutiña liglísirugu ja adúgübalin jawádigimari buídu, buídubei ladímurejóuniwa jawágu, áni ragútimaatiña anígi lun jadímurejan luágu jafiñen luágu Jesucrístu.

¹⁴ Agúrabatina nídin aríjabu madíse, ¹⁵ nabúrújaní buri cátei le bun lun ánjana lan adárasaragua, lun subúdi bání ída líña lan lun louserun gürígia jádan lufámilian Búngiu, to lilígilisinboun Búngiu le wíwanbei lun sun dan. Lilígilisin Búngiu ágüdajabalin linárün, toúngítei inárüni ligia buídu. ¹⁶ Siñáti lasigenerúniwa luágu weírugu lan Wasálbaragüle Jesucrístu, le subúdigüda lálalbei woun.

Arúfudaguati Búngiu lúngua queísi gürígia lídan Jesucrístu,
arúfudaleí Sífiri Sándu luágu úaragua lan Jesucrístu.

Aríja jameí ánjeligu.

Apúrichijouati luágu joun lílana sun fulásu,
afiñewa luágu lídan sun fulásu,
resíbiwa ligia siélu.

4

Ja lúnbaña jígiruni jafiñen

¹ Furánguti laríñaguni Sífiri Sándu luágu lídoun lánme lagúmujoún dan, añájeinbaña lan gürígia ígiruti jafiñen luágu Crístu, jafálarame espíritu ja ayéejatiña lúma arúfudajani le jámagiñeti máfianu. ² Jagáambajaba arúfudajani jámagiñe gürígia biángua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu súti. ³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eígin moún lumuti leigín, láu sun ladúga lan Búngiu eígin buri ligia lun jeígini ja afiñebaña jáma ja subúdíbalin inárüni, láu ateíngiruni lun Búngiu luágu. ⁴ Sun cátei le ladúgübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adúga lálalbei, teínqui wameíme luágu. ⁵ Lugúndun láu wamúriajan lúma Búngiu lun labíniruni sun weígin, ñúbinti lun labuídurun láu lerérun, lúma láu wayúmuragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágüdañoiba buwáni láu buri dimúrei le lánina wafiñen, lúma arúfudajani buíti le falábaalíbei. ⁷ Meféridirabeí bidáani asígeneja luágu buri libídiegun úraga le ni cáta ligíbugiñe Búngiu, lubáragiñe líra, áfaaguabá lun bagúnfulirun lúma Búngiu. ⁸ Láu sun ju lan lánjingichún úgubu, jútimaati bánjingichagun búngua lídan bagúnfulirun lúma Búngiu, lugúndun barúti cátei buíti woun lídan ibágarí le lúma lídan ibágarí le lúnbei wabíjini. ⁹ Inárüni cátei le, áni lúnti jafiñerun súngebui luágu. ¹⁰ Ligia lébubei wawádigimaridun, sáfuri wagía anabúni, lugúndun rúwamaali lan weméngi luágu Búngiu le wíwanbei, le aráansejaalíbei asálbaruni joun sun gürígia, áni ja afiñebaña luágu, jeresibirubei asálbaruni ligia.

¹¹ Ligia buri cátei lúnbei barúfudajani lun jagúnfulirun gürígia láu. ¹² Sériulá bigáburi lun manügúniwa ban quei ni cáta lueígiñe ñúraügídibu lan, lubáragiñe líra, lúnti ában ban jémpulu buíti joun ja afiñebaña, lídan ligáburi badímurejan lúma bouserun, lídan ínsiñejabuni, lídan bafiñen luágu Búngiu, lúma lídan larúma bibágarí. ¹³ Rúguabá

búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachúlürün. ¹⁴ Yúsubei ubáfu le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

¹⁵ Derégeguabá búngua lún buri cátei le, lun gayára lan larijíniwa bawáanserun lídan cátei lání Búngiu. ¹⁶ Goúniguabá búngua, lúma láu le barúfudajabei, ítaramemebá derégüidagu lídan sun cátei. Ánjein badúga ítara, basálbaruba, sálba jagíame giñe ja agáambubalibu.

5

Ída lúba lan ligáburi louóserun Timotéo jáma afíñetiña

¹ Madeínjabá lun ában weírei mútu, lubáragiñe líra, adímurejabá lun camá jamuga lun búguchi, oúsera báñame wügúriña núbürigiña queísi bamúlenu. ² Oúsera báña wefyaaña würiña quei boúserunun búguchu, oúsera báñame würiña irájüñü quei bítonu, láu lubúidun aríttaguni.

³ Íderagua báña würiña ja jiláañabaña úmari, ja arijúabei luágu mégei jamá iderúni. ⁴ Ánjein garájüñü tubeí ában wúri to jiláali túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámilian lúma lun jáguyugüdüni ínsiñejabuni le jadúweirubei joun jagúbürigu, lugúndun buíti cátei le, gúndaati giñe Búngiu láu. ⁵ Wúri to jiláali túmari, to eréderuboun tábugua le tímati-maati, rítumuti teménigi luágu Búngiu, merédeti giñe tayúmragun lun Búngiu áriebe, wéyuagu. ⁶ Ánjounti to edéreggeraguboun túngua lun ugúndani lánina ubou le, jiláñu tíña lun cátei lánina Búngiu láu sun wínwangiru lan. ⁷ Aríñagabeí buri giñe cátei le joun, úa lámuga ni cáta lun ladeinjouñ joun luágu. ⁸ Le maríttagunti jawágu lánigu, játima lidújeñu, magúnfulinjali lúma lafíñen, wuríbatimáatiti sügú láu ában güriña le maffíñeti.

⁹ Lun labúrüdúniwa tíri wúri to jiláalibei túmari tídan gárada lánina íderawagúni, to rügúboun njeinjali lúmagiñe úrúwa-wein írúmu táu, lun giñe ábanrügügili lán meja túmari. ¹⁰ Lúnti tasúbudirúniwa luágu buíti le tadúgübei quei buri jamúga ánjein meja agúriaja tubáliña tirájüñü buídu, ánjein buídu lubeí toúserun jáma ja achúlürübaña túbiñe, ánjein seríwi tubáliña idújeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adúga tubeí furúmieguarügü ámu cátei buíti.

¹¹ Würiña ja jiláaña úmari ja núbürigiña, mabúrüdabeí jíri tídan gárada, lugúndun lachúlürüba dan lúnya jabúseerun jámari. Ábamei jígiruni jeseríwidun lun Búngiu ligílisirugu lúnya jamárieidun. ¹² Ábamei jadímurejan güriña jawágu ladúga jadúraaguni jadáradun lúma Búngiu le lánina jeseríwidun lúnrügi súnwandan. ¹³ Ába jayábin lun jamágualigudun, mámarügü jamágualigudun, ába giñe marásualugu jamá, eméteja lídoun sun cátei, adímureja cátei le mouñ lumuti. ¹⁴ Ligía nabúseerúnbei lun jamárieidunya ja núbürigiñabaña, lun garájüñü jamá, lun jounigirunun jában, lun míchugun jamá lúgaaru joun ja maffíñebaña lun jadímurejan wuríba jawágu. ¹⁵ Añájein würiña, ígira jamáali Búngiu, ába jafálaruni Máfia.

¹⁶ Ánjein añájein jabeí würiña ja jiláalibei jámari jádan lufámilian ában afíñeti wúri o wügúri, lúnti íderaguniña, mígirun ligíame lun ában jamá ijúrúgu tun ligílisi, ítara lúba gayára lan jíderaguniña tílana ligílisi würiña ja busénbaña jíderawagún.

¹⁷ Fádírugu ja lábugiñeñounboun jariaajan ligílisi, ja adúgübalin jawádigimari buídu, lúnti inébewa jamá sarágu, játima gaffsiutebalin apúrichijani lúma arúfudajani.

¹⁸ Taríñajare Lerérun Búngiu. “Magúragua jumeí liyúma jilúgün bágasu le lánina wadági-manu lueí lásínerun leígin lídaangiñe tubúñe fulúwaaru le uágubei ladúgüragua lun lagídaruni túra.” Aríñagatu giñe. “Garíchati ñadágimeinti lun libíjin lafáyeirua.”

¹⁹ Madúgabá gásu luágu líchugún lidúnrun ában fádiri ánjein úa jabeí biáma o úrúwa lun jíchugun fe luágu lidúnrun. ²⁰ Ánjaña ja asígirubaña lídan figou, lúnti badeñjan joun jagíbugiñe sun affñetiña lun janúfudedun súngebei luef jafígounjan. ²¹ Ayúmuraguatina bun ligíbugiñe Búngiu lúma Wabúreme Jesucrístu, lúma jagíbugiñe ánjeligu ja lanúadirubaña, lun bagúnfulirun lúma buri gumádi le, lun ában lan láu janúgúniwa sun gürígia. ²² Míchigabádúgabá gásu luágu líchugún lidúnrun ában fádiri ánjein úa jabeí biáma o úrúwa lun jíchugun fe luágu lidá ni ában queísi fádiri tídan liglísi lídan loufudagun, lúnti batúriajani ligáburi buídu luefídügü gaffigoun lan, larijiwameti camá gúndaatibu láu lifígoun. Dísebá luef sun le wuríbabei.

²³ Quei súnwandan lan gári lan burágeirugu, mátabá dúnarügü, gurába gíñe murúsun diweín.

²⁴ Lídan le báluajaniña wügúriña lun jesériwiduni Búngiu liglísirugu, jarítaguabá luágu añájein lan gürígia arijuáti jaffigoun furáangu lubáragiñe jagúserun, añájein gíñe, marijinti jaffigoun darí lárigiñe. ²⁵ Ítara méme líña gíñe, cátei buíti le jadúgübei gürígia, arijuáti furáangu, áni íbini marijín lan, siñáti leréderun arámudagu lun sun dan.

6

¹ Affñetiña ja músubaña, lúnti weíri lan jinében jayúbudirigu joun, lun madímurejóun lan wuríba luágu líri Búngiu, ni luágu cátei le warúfudajabei. ² Ánjein añájein luef eseríwidutiña gayúbudiritiña affñetiña, moún lumuti lougua lan jinében joun ladúgarügü jadújeñu jamá luefígñe Crístu. Lubáragiñe líra, lúnti jesériwiduniña buídutima, lugúndun ja eresíbirubalin lubuídun jesériwidun, affñetiña, idújeñu gíñe jínsiñegutiña. Arúfudajabei cátei le, apúrichijabeíme.

Arúfudajani maríchatí lúma irisini inárünti

³ Ánjein arúfudaja ában gürígia cátei maríchatí áni múaraanti lúma larúma arúfudajani le lání Wabúreme Jesucrístu le íderagubaliwa agúnfulira lúma Búngiu, ⁴ ában barúgua túngua gürígia ligía, le ibídiñeti ni cáta lun. Ganígiti lasígenejan luágu buri dimúrei, lídaangiñeti asígenejani le líabin buri gimúgaü, gáñiguaü, anábajani, maffñeni joun gürígia, ⁵ lúma buri wuríbu magúmuchaditi. Jíbiri gürígia ja, wuríbati jasáminan, ibídiñejabutiña lun inárüni, jarítaguatiña luágu lébuna lan lagáñeirun irisini agúnfuliruni lúma Búngiu. Dísebá jaweí gürígia ja ítarabaña. ⁶ Inárüni luágu ában lan ouñwenbun irisini agúnfuliruni lúma Búngiu lun le gufúrumabei láu le lúmabei. ⁷ Manúgúntiwa ni cáta wámagua ñájoun ubouágoun, siñábei gíñe wanúgün ni cáta yágiñe, ⁸ ánjein geígin wabei, ganáangun, lúnti gufúruma wamá láu líra. ⁹ Ánjaña ja busénbaña jarísidun, mawándun jamúti ouchwagúni, ába jáburujan tídoun lisádaraana sarágu lagúbüri ayúmajani le málati, le asíneragüdübei gürígia jebélurun siélun, ába jóúdin máfiougatin. ¹⁰ Línsiñegu seínsu ligía lílagülebei sun luwúyeri wuríbani, áni añájein sarágu gürígia ladúga jóuchun jabíjin seínsu, ába jígiruni jaffñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le lání affñeni

¹¹ Ánjabuti amúrü, Timotéo, queísi ában ban wügúri derégeñuti lun Búngiu, anúrajabá luef buri cátei le. Barúba ában ibágari le lánina ísuruni, le lánina gúnfuli lúma Búngiu, le lánina affñeni, le lánina ínsiñeni, le lánina gagúraasuni lúma areíduni. ¹² Áfaaguabá buídu luágu lání waffñen fuleísei, ábame bagáñeiruni ibágari le magúmuchaditi, lun líra lagúara Búngiu bun dán meja le barúfudunbalin jagíbugiñe sarágu gürígia luágu aráanseñu bíña lan lun bafálaruni Crístu. ¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja gíñe geféenbei luágu le inárünibeí ligíbugiñe Piláto, ¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoá bun, darí líabin Wabúreme Jesucrístu. ¹⁵ Dánme lachúlürün dan ligía, le lanúadajabei Búngiu, lagríbuduba Crístu ubouágoun, Búngiu rügúñein weírigu, Súnti

Gabáfu, Jarúeite urúeigu, Jabúreme abúremeinigu. ¹⁶ Ligía rügúñein mouwedadi, le abágaridubei lídan larúgounga le ñjín lubeí mayárafadun lan ni ában. Marjín lágili ni ában gürígia Búngiu, siñáti gñe larijiniwa. ¡Rúalá uweíriguni lun, arúfudualá lubáfu lun sun dan! Ítaralá.

¹⁷ Ja gámabaña irisini lánina ubou le, aríñagabá joun lun manáangun jamá jóungua luágu, míchugun jameíme jeménigi luágu irisini ligía, lugúndun machouúrunti, lun jíchuguni jeménigi luágu Búngiu, le wíwanbei, áni rúleí sun cátei woun gíbe lun wagúndaarun luágu. ¹⁸ Aríñagabá joun lun jadúgüni le buídubei, lun buídu lan jóuserun le tímatimaati, lun aráanseñu jamá lun jíchuguni lúma lun jafánreinruni le jámabei. ¹⁹ Ítara lúba jóundaragun irisini jóungua siélu le adúrarubei lun sun dan, ítara lúba jabijini ibágari tímatimaati le magúmuchaditi.

Lagúmujóun dimúrei lun Timotéo tídan gárada to

²⁰ Timotéo, touñigibeí le íchugúbei lábugiñe baríaajan. Magáambabá dimúrei buri le lánina lisúbudin ubou, ni sigénei le lánina cátei le gíridügubei subúdi, ²¹ añájein jádaangiñe ja afálarubalin luwúyeri subúdi le, ígira jamáli jafíñen.

Biní lábu Búngiu. Ítaralá.

TIBÍAMAN LIGÁRADAN PÁBLO LUN TIMOTÉO

Labúrújan Páblo lun Timotéo

¹ Áu Páblo, láni Jesucrístu apóstolu áu, loúnajañadina Búngiu láu lugúndan lun gayáraabei lan nídin aríñagei ugánu buíti joun gürígia luágu ibágari le líchugubei joun ja lídaanbaña ában lúma Jesucrístu. ² Nabúrújañoun gárada to bun, Timotéo le nanúgübei queísi niraú le jínsiñebei nun, resíbibá abíniruni, gudémejabu, lúma darángilau lúmagiñe Wáguchi Búngiu, lúma lúmagiñe Wabúreme Jesucrístu.

Adímurejani luágu Crístu

³ Dan le nayúmragun lun Búngiu buágu ságü nayúmragun áriebe lúma wéyuagu, teínqui numúti Búngiu le únbei nesériwida láu tarúma nanígi quei jadúgüni binádu nagúbürigu. ⁴ Súnwandan narítágun luágu bayájun dán meja le nígrunibu, buséntina jamúga naríjinibu lun nabuínchun láu ugúndani. ⁵ Jarítáguatina luágu afíñeni inárüni le buágubei, Lóida to bagútü, túma Euníce to bóguchu, jagía meja gawágubalin afíñeni le furúmiñe, áni choúru numúti luágu níjein lan gíñe buágu.

⁶ Ligía naríñagunbei bun lun bayúsuruni méme ubáfu le líchugubei Búngiu bun dán meja le níchugunbalin nújabu bábulugu. ⁷ Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadúgüni furúmieguarügü cátei, ínsiñeni, lúma ubáfu lun wasáminarun buídu líchugubei woun. ⁸ Mabúsigaribá lubefti lun bapúrichijani le larúfudajabei Crístu, mabúsigaribá gíñe náu, áu le adaürübei luegíñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawánduni. ⁹ Sálba lumútiwa Búngiu, wa ligía woun lun wanúgün ában ibágari le derégewati lun, máma jamúga luegíñe níjein lan cátei buíti wadúga, ladúga ítara líña lan laráanseruni lubáragiñe ladúgüni ubouú lun larúfuduni lareídun lúma línsiñejabun woun lídaangiñe Jesucrístu. ¹⁰ Guetó larúfudei ínsiñeni le láu loúnajani Jesucrístu le Wasálbaragüle lun lagúnrinchaguni lubáfu ouweni, ru ligía ubáfu woun lun wibíjini ibágari magúmuchaditi láu werésibiruni ugánu buíti luágu.

¹¹ Rúlumutina Búngiu lun napúrichijani ugánu le, oúnaja lána quei apóstolu lun narúfudajan joun ja mámabaña jurú. ¹² Ligía nasúfurirunbalin sun cátei le. Láu sun líra, úati nibúsigari nan, lugúndun subúditi nun ca lan uágu níchigei nafiñen, áni choúru numúti luágu gabáfu lan lun loúnigiruni le líchugubei lábugiñe naríajaan daríme lachúlürün wéyu ligía lun lagíribudun Crístu ubouágün.

¹³ Mígirabeí luwúyeri arúfudajani jarúmati le níchugubei bun, abágaridabá láu bafiñen luágu Crístu, arúfudeina ínsiñeni joun sùngubei ladúga lídaañadiwa ában lúma Jesucrístu. ¹⁴ Láu lubáfu Sífiri Sándu le wádaanbei, goúnigibeí arúfudajani le líchugubei Búngiu lábun baríajaan lun madarúniwa lan iyéeni lídoun.

¹⁵ Queísi basúbudiruni, ígira jamáadina sun afíñetiña Ásiana nábugua, níjein Figélo jádan, lúma Hermógenes. ¹⁶ Gudémejabulá Búngiu joun lufámilian Onesíforo, lugúndun barújeiti gurásu nun sarágu wéyaaasu, úati gíñe nibúsigari lan láu nadaürüña lan, ¹⁷ lubáragiñe líra, dan le líabinbei ubúrugu Róma, merédeti lálujanina darí ladárirunina. ¹⁸ Darí lámugei lugúdemejabu Búngiu lídaanme wéyu ligía le lagíribudagüle Wabúreme Crístu ubouágün. Subúsiti gíñe bun buídu ida líña lan líderaguniwa ubúrugu Éfeso.

2

Ában lisúdaaran Jesucrístu buíti

¹ Anjeinti amúri, niraú, resíbibá érei lídaangiñe abíniruni le wibíjibeí láu lídaañadiwa lan ában lúma Jesucrístu. ² Le cátei lánina wafiñen le agáamba báalibeí nariñagun

jangbugiñe sarágu geféentiña arúfudajabei joun wügúriña ja affñewati jawágu, ja gayáarati jarúfudajani joun ámu.

³ Awándabei lubeiti sáfuri quei ában lisúdaaran Jesucrístu buíti. ⁴ Úati súdeara le esériwiduti ádaraguti lúngua lídoun ámu cátei luei le lánina súdeara, lugúndun gásu leréderun dayáru gu lábugiñe lerénjan lugúmandan. ⁵ Ítara líña gíñe, ában güriña le ádaraguti lúngua lídoun jurárai, siñabei lagáñeirun ánjein máfaagun quei lubúdubu. ⁶ Le ábunagubei, garíchati lun ligía lan furúmiñe ibíjei lufánran lídaangiñe alúbajani. ⁷ Samínabá luágu úruwa jémpulu le, ábame gunfarándagüda láni Wabúreme súngubei bun.

⁸ Jarítaguabá luágu Jesucrístu. ligía ában güriña wáledi, jádan linébaanfaangu urúei David, áni sarágüda lumúti Búngiu lídaangiñe óuweni. ⁹ Niján ugánu le lánina asálbaruni le napúrichijabei, áni luegiñe napúrichijani, awándatina asúfuriruni dari lun nagúrawagún láu güriñgüri camá ában güriña wuríbati áu. Siñáti leréderúniwa labúruchagun láni Búngiu ugánu, ¹⁰ ligía nawándunbalin sun cátei, luágu jáni ja anúdaja lánabaña Búngiu fuleisei, lun gíñe jayábin lun jabíjini asálbaruni luma uweírguni magúmchaditi siélu ladúga lídan jamá ában luma Jesucrístu.

¹¹ Ináriini cátei le.

Ánjein jiláadiwa lubei luma Crístu, wabágariduba gíñe luma,

¹² ánjawa awánda sáfuri luegiñe, gafánraanbadiwa lídan larúejan.

¹³ Ánjawa múaran, ligía úaramemebei, lugúndun ítara líña ligáburi Búngiu.

Ában ñadágimeinti buíti

¹⁴ Jarítaguagüdabei cátei le joun ja affñebaña, áni aríñagabá joun ligíbugiñe Wabúreme lun masigenejan jamá luágu buri cátei luáguti dimúrei. Mabuídun buríti sigénei le lun ni cáta, añawurijarügü lumútiña ja agáambajabaña. ¹⁵ Jouchábei sun bubáfu lun barúfudagun búngua ligíbugiñe Búngiu queisi ában ñadágimeinti buíti, le úati cába lan uágu labúsigarida, le ayúsurbalin ugánu lánina ináriini quei lubúdubu. ¹⁶ Dísebá luei dimúrei buri málati le lánina ubou le, lugúndun ja adímurejabaña ítara, jóúintimaaña lídoun wuríbani, ¹⁷ ábame labúruchagun jarúfudajan quei cánsar. Niján le suserebei lun Himenéu luma Filéto, ¹⁸ ígira jamáali ináriini, jaríñaga luágu sügüjali lan lidáni ásaaruni lídaangiñe óuweni, jagúrinchaguñeiti jafiñen sarágu güriña ítara. ¹⁹ Wagía affñetiña, wagía lílígilisin Búngiu láu ébuu derégüdati le rúlaalíbei Búngiu, siñáti lánjingichúniwa. Búrúwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagubaña luágu lánigu jamá Crístu, lúnti jadísedun luei wuríbani.”

²⁰ Tídan ában múna weírutu, máma rügúñein umégeni gólu o pláta ñi, níjein gíñe le láuti fuláansu luma láuti múa, níjein lúnti luweírín-ágei ayúsuruni, níjein lúnti furúmieguarügü yúsu. ²¹ Lun lúnti lan ában ayúsuruni weíríguti ában güriña le deréguati lúngua lun Búngiu, ju ligía lun, lúnti jarúma lan libágarí, díse ligía luei sun le wíyebei, ítara lúba ju lan lun furúmieguarügü wadágimanu buíti.

²² Anúrajabá lubeiti luei jayúmajan wügúriña núbüriña, barúba ában ibágarí le lánina ísuruni, affñeni, ínsiñejabuni, luma darángilaü, úara jáma sun ja agúarubalin Wabúreme Crístu táu anígí jarúmatu lun líderaguniña. ²³ Madúgabá gásu láu sigénei málati, subúdi báali luágu barú lan líra wuríbu. ²⁴ Moún lumuti gádan láni wuríbu ában esériwiduti lun Crístu, lubáragiñe líra, lúnti buídu lan jáma sun güriña. ²⁵ Lúnti ában lan arúfudajati buíti ligía, lúnti gagúraasun lan jáma ja múaradúntiña luma, lúnti larúfuduni joun táu anígí únabugutu luágu marícha jamá, ladúga gayára lan lasáansiruni Búngiu ligáburi jasáminarun lun gayáraabei lan jánjarun lun le ináriiníbei. ²⁶ Gayáraati jadáriragun jóungua lun jeséfurun tídaangiñe sádara to gádaanbaliña lurúma Máfia lun ladúgüni labúseerun jáu.

3

Ída jába lan gürígia lídoun búríme lagúmujoún wéyu

¹Lúnti gñe basúbudiruni luágu liábin buríba lan wéyu jénreenguti lídounme lagúmujoún dan. ²Joúngua rügúbei buri gürígia jabúseera buíti, jínsiñe seínsu joun, pánta jagía, barúgua joúngua. Jadímurejaba wuríba luágu Búngiu, magáambun jabáña jagúbürigu, meteíngiradibaña, minébeme cátei lánina Búngiu joun. ³Mínsiñejabubaña joun jarájüñü, magúdemejabu, marásualugubaña, siñábei járügüdagun joúngua, janárimebaña, láganibaña sun le buídubei. ⁴Jalúgurubaña jamádagu, jadúgüba buri cátei mabuídunti mebésenga jagía cába lan asúsereda lárigiñe, janárimbebei janáangun joúngua, jáluajabei jagúndan guánarügü lubarágiñe jamúga jáluajani Búngiu. ⁵Jafámuruba camá gúnfulitiña lúma Búngiu áni larijúba luágu iyéeni lan láu ligáburi jabágaridun.

Meméterabá jámoun jíbe gürígia ja. ⁶Jádan buri gürígia ja, añájein já buri ebélurubaña jábiñoun mútu ayéedaña wúrña ja débilitiña, já buri buínbaña láu figou lúma láu sun luwúyeri ayúmajani. ⁷Ába jafálaruniña yéetiña jagía lun jafúnrendeirun iséri cátei, siñáti jayábin lun gunfaráanda jamáni inárüni. ⁸Ítara quei jawúgürijoun Jánes lúma Jámbres, ja gabñarajadibaña, lun Moisés, ítara líña gñe jawúgürijoun wügúriña ja lun inárüni. Wügúriña buri ja, wuríbatí jasáminan, garábaguaaña luágun waffñen. ⁹Mawáanserunbaña sarágu, ladúga geféenbei sun ubou luágu íbidiougua lan jáu, quei lasúseredun joun bián jagúra ja awúgürijoubaña lun Moisés.

Lagúmujoún dimúrei lúmagiñe Páblo lun Timotéo tídan gárada to

¹⁰Ánjein amúrü, falábaali narúfudajan buídu lúma ligáburi nagáburidun. ¹¹Subúdi báali narítagn lúma nafiñen, aríja báali nugúraasun lúma nísiñejabu, lúma ída líña lan nawánduni ebaajoúni lúma súfuri lúma líbiri lénreengun le nasúfurirubei lídan buri fulásu quei buri ubúrugu Antioquía, Icónio lúma Lístra. Subúsi gñe bun ída líña lan leséfurunina Wabúreme Búngiu lídaangiñé buri sun cátei le. ¹²Inárüni luágu jeíbaajoúba lan sun ja busénbaña jabágaridun derégeguañu joúngua lun Jesucrístu. ¹³Ánjaña ja wuríbaña jáma ja gayéejadibaña, jaríbadatimaaba, ítara mémejaba ayéega lúma ayeedúa.

¹⁴Ánjein amúrü, ítaramembá derégüdagu lídan le bafúnrendeirubei, le uágubei afñeedibu lan. Subúdi bumúti luágu inárüni lan le bafúnrendeirubei ladúga gayára lan bafñerun jawágu ja arúfudajabalin bun. ¹⁵Subúdi bumúti Lerérün Búngiu lúmagiñe ñúraügídibu. Tídan Lerérün Búngiu, ladárirúa sun lichú áu le busénwabei lun gayára lan jasálbarun gürígia, láu jafiñerun luágu Jesucrístu. ¹⁶Sun le búrwáñubei tídan Lerérün Búngiu, Búngiu guánarügü íchugubalin jarítagnrugun wügúriña lun jabúrüdüni. Jútu líburu tugúya lun tarúfuduni le inárünibe lúma gñe lun tarúfuduni le maríchabei, adúgatu lun jígiruni gürígia cátei le mabuídunbei luágu le buídubei, arúfudajatu joun gürígia lun jabágaridun surúñu. ¹⁷Líburu tugúya, jemégenboun gürígia ja esériwidubaña lun Búngiu lun jadúgüni sun luwúyeri wadágimanu le lúnbei jadúgüni lun.

4

¹Ligbugiñe Búngiu lúma Wabúreme Jesucrístu, le lúnbei liábin quei urúei agúseragüdaña wínwangiña jáma jílaguaaña, naríñaguaña bun lun bapúrichijani Lerérün Búngiu, ²aráanseñubá lun bapúrichijani, busén jagía gürígia jagáambuni, mabúseerun. Afñegüda báña, adeñjabá, eréra amúrime, arúfudajabá joun láu gurásu. ³Lugúndun lachúlürüba dan dánme le mawándun jamáni gürígia arúfudajani jarúmati, lubarágñeme líra, jáluajabei arúfudajani le gúnfulibe lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerubei jagáambun joun. ⁴Jíchugubei janágan luágun inárüni, ábame jadúgün gásu láu sun luwúyeri úraga. ⁵Ánjein amúrü, buídulá bisáminan

súnwandan, awándabeí asúfuriruni, rúguabá búngua lun bapúrichijani ugánu le lánina asálbaruni, gúnfulibá buídu láu buwádigimari.

⁶Áu, sandíguatina núngua luágu nadúgúñein lan lagúmujóun le nuáraati lun Búngiu, yaráfaali lórate nouñwen. ⁷Ageíndagua náali luwúribun Cristu buídu, efbaguaadina chúlú lúmoun lébeja, adúga náali sun le rúlaalíbei Búngiu nun lun nadúgúni, areída náali arúfudajani le lánina wafíñen jarúmañu. ⁸Guetó, lagúrabuñadina nafáyeiruaja le lebégi ában ibágari le lánina ísuruni, afáyeiruajaú le lúnbei líchuguni Nabúreme nun, le agúseragüdúti le úraguabei, lídaanme wéyu ligía. Áni mámarügüba nun líchigei afáyeiruajaú ligía, líchugubei gíñe joun sun ja agúrabajabaalin liábin láu ínsiñejabuni lun.

⁹Jouchabá biábin aríjana furése. ¹⁰Ígira láadina Démas, jínsiñetimaati cátei le lánina ubou le lun, ñúðünjati ubúrugun Tesalónica. Ñúðünja Crescénate loúbawagun Galácia, ñúðün Títo loúbawagun Dalmácia. ¹¹Lúcas rügúñein núma ya. Áluajabeí Márcos, banúgeime búmagua, gayáraabei líderagunina lídan wadágimanu. ¹²Oúnaja nan Tíquico ubúrugun Éfeso. ¹³Dánme biábin, banúgounme cápa to nígiruboun lúbiñe Cárpo yágüta Tróas nun, barúbounme gíñe buri líburu, nigáradan burítima. ¹⁴Adúgaali Alejandro, le ñadágimeinbei gürábu, sarágu wuríbani nun, lafáyeirubei Búngiu quei ligáburi cátei le ladúgübei. ¹⁵Toúnigiguabá búngua lueí, lugúndun garábaguaali luágun ugánu le wapúrichijabei.

¹⁶Dan le furúmiñeti nadímurejan nueígiñegua ligíbugiñe lúruðu, úati ni ában íderagutina, ígira jamútina súnqubei. Agúrabatina lun mabájüdüñ lání Búngiu cátei le joun. ¹⁷Láu sun líra, íderagua lumútina Wabúreme Jesucristu, ába líchugun érei nun, ítara líña lubéti gayára lan napúrichijani ugánu le lánina asálbaruni, agáambagüdanéi joun sun gürígia ja mámabaña juríu. Ítara líña leséfurunina Nabúreme lueí yebe ouweni, ¹⁸áni leséfurubadina lueí sun wuríbani, areída láname lubá larúeijan siélu. ¡Rúalá uweíriguni lun súnwandan! Ítaralá.

Lagúmujóun buri mábugaü lúma abíniruni

¹⁹Mábugaü tun Prisca lúma lun Aquila lúma joun lufámilian Onesíforo. ²⁰Reídeija Erásto ubúругu Corínto, ígira numúti Trófimo láu sándi Miléto. ²¹Jouchabá biábin lubáragiñe laríbougadun. Mábuga líña Eubúlo bun, Pudénate, Líno, Cláudia jáma sun wadújeñu lueígiñe Jesucristu. ²²Búma lámuga Wabúreme Jesucristu, biní laúnme Búngiu sun jugúya ja alíjibarun gárada to. Ítaralá.

LIGÁRADAN PÁBLO LUN TÍTO

Labúrrijan Páblo lun Títo

¹ Áu Páblo, le abúrrijarun gárada to, ában esériwiduti lun Búngiu áu, ában gíñe láni Jesucrístu apóstolu. Oúnaja lumútina lúntima níchugun dúgüdaguau lun jaffínen ja anúadaja láñabaña Búngiu quei lánigu, lun gíñe gayáraabei lan jasúbudiruni inárüni lánina waffínen, gayára lámuga jabágaridun ában ibágari derégewati lun. ² Ítara lúba gayára lan jeménigidun lun jabágariduba lan súnwandan lúma Búngiu. Búngiu, le mayéejanbei, aríñaga lumúti luágu líchugubei lan ibágari magúmuchaditi le woun lúmagíñe lubáragíñe ladúgüni ubou. ³ Guetóti, queisi chülüjali lan dan, subúdigüda láali ugánu lánina asálbaruni woun, ábati loúnajanina Búngiu le Wasálbaragüle, lun napúrichijani ugánu ligía. ⁴ Nabúrrijañoun gárada to bun, Títo, le nanúgübei queisi niraú le tímatimaati, lídan ában waffínerun luágu Crístu. Ayúmajatina lun bibíjin abíniruni lúma darángilau lúmagíñe Wáguchi Búngiu, lúma lúmagíñe Wabúreme Jesucrístu le Wasálbaragüle.

Luwádigimari Títo luágu ubouju Créta

⁵ Lébubei nígrunibu luágu ubouju le gíribei Créta, lun baráanseruni le mégeigilibei lun laráanserún, lúma lun bíchugun fádorigu lídan ságü fulásu queisi naríñaguni bun. ⁶ Ában fádiri lúnti labágaridun buídu, úa lámuga ni cáta uáguti lererúa lun. Lúnti ábanrügü tan lúhari, lúnti affíne jamá lirájüñü luágu Crístu, gagáambadi, lun gíñe buídu lan jouserun lirájüñü luef gayára lan líchugúniwa jadúnrun. ⁷ Lábugíñeñein laríjaan fádiri luwádigimari Búngiu, ligía lúnti lubei labágaridun ában ibágari le úraguati. Lúnti derégeguañu lan lúngua joun ámu, maríbanme lijéniute, moún lumuti gátadi lan, manígi ligíame wuríbu, mínsiñelá seínsu lun sarágu. ⁸ Lubáragíñe líra, lúnti aráanseñu lan súnwandan lun lerésibirun bisídatiña lúbiñe, lúnti ában lan wügúri le jínsiñejabuti lun le buídubei, lun buídu lan lichúgü, buídume louseruniña sun gürígia, derégeguañu lúngua lun Búngiu, láu ubáfu lun lárügüdagun lúngua. ⁹ Lúnti lárügüdüñ luágu ugánu inárüñiti le uágubei gayára lan weménigidun, le arúfudajoubei lun, lun gayára lan líchugun dúgüdaguau joun ámu láu arúfudajani le richábei, lun gíñe laffíneragüdüniña ja asígenerubalin.

¹⁰ Lugúndun anájein sarágu magáambaditiña, jádaantima jarásan juríu, ja arúfudajabaña libídionuniga áu, ayéeda jamáña gürígia. ¹¹ Lúnti ladaurúniwa jayúma ja, ladúga chagáguagüdatiña sarágu famíliá láu jarúfudajani le moún lubei, lun jagáñeirun seínsu láu múarani.

¹² Aríñagatí meja ában chu táu Crétana, le ní bubei guetó, jawágu lupáisanun. “Gürígia Crétana, súnwandan yé jama, machúlaaguntiña, jalíluatiña, magúali.” ¹³ Áni inárüni laríñagubei. Ligía lubefti, badeñja joun jére, lun jóudin láu arúfudajani le richábei luágu waffínen. ¹⁴ Lun gíñe mebéresen jamá láu buri úraga le jadaágun juríu, ni láu le jaríñagubei gürígia, játima íchugubalin janágan luágun inárüni.

¹⁵ Queisi laríñawagúniwa, jarúmati sun cátei joun ja jarúmabaña anígi, ánjein joun gürígia ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyeti jasáminan, wíyetu gíñe janígi. ¹⁶ Aríñagatiña luágu subúdi lan Búngiu joun, láu buri cátei le jadúgübei, arúfuda jamúti luágu ibídiñe lan Búngiu joun, lugúndun mínsiñejabutiña, magáambaditiña, mayáraatiña lun jadúgüni le buídubei.

2

Arúfudajani inárüñiti rúti ibágari buíti

¹ Ánjeinti amúrü, Títo, lúnti barúfudajani luwúyeri igáburi le lúnbei jagáburiduni affíñetiña luágu Crístu, ában ibágari le úraguabei lúma inárüni le lúmagíñebei Búngiu.

² Lúnti máttun jamá wügúriña weíyaaña mútu, inébewa jagíame, buídu jachúgü, derégüidagu lídan jafñinen luágu Crístu, buin láu ínsiñejabuni lúma gurásu. ³ Würíña gñe ja weíyaaña, lúnti gñe buídu lan jóuserun queísi lánigu Búngiu, lúnti mamárasualugu jamá, mabácharuadun jagíame. Lúnti jíchugun jémpulu buíti láu jabágaridun lúma jerérun, ⁴ lun jarúfudajan joun wúriña núbüriña jawei lun jínsiñe jamá jámari joun, jínsiñe jarájüñü joun, ⁵ lun buídu lan jachúgü, jarúma jagía, aráanseja jagía jábiñe, areída jagía, gagáambadi jagíame lun jámari. Lúnti ítara lan jabágarí wúriña, lun úa jamá ni ában adímurejatiña wuríba luágu ugánu le lání Búngiu luágu asálbaruni láu affñeruni luágu Jesucrístu.

⁶ Arúfudajabá joun wügúriña irájüñü lun buídu lan jachúgü, ⁷ rúba ában jémpulu buíti joun lídan sun cátei. Arúfudajabei lérügü inárünibeí joun láu ában igáburi derégüdati, ⁸ adímurejeina láu ában igáburi magádieti le uáguti lásínera ladárírún mégeiti. Ítara lúba janügüba báganiñu busíganu luágu luríban jóuserun áni siñábei jadímurejan wuríba buágu.

⁹ Aríñagabá joun esériwidutiña lun gagáambadi jamá joun jayúbudirigu lídan sun cátei, moúnabagun jamáñame, lun buídu lan jesériwidun joun, ¹⁰ lun míwerujan jamá, lun jarúma lan jagáburi le gumúti jáma jayúbudirigu lun laríjiniwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹ Arúfudajabei cátei le, Títo, lugúndun arúfuda láali Búngiu lareídun woun, le ídaangiñebeí gayára lan jasálbarun sun gürígia lídaangiñe luríban jagáburi. ¹² Arúfudaja láali Búngiu woun láu lareídun lun wígiruni wuríbani lúma ayúmajani lánina ubou, lun wabágaridun ában ibágarí le buíti ligíbuagu ubou le, ragúguañu woungua, derégeguañu woungua lun Búngiu. ¹³ Niján luwúyeri igáburi le lúnbei wagáburidun lídan le wagúrabajaña lan lagúnfulirun lubuídun cátei le uágubei laríñaga Búngiu—lagíribudun Wabúngiute, Wasálbaragüle Jesucrístu ubouágun láu sun luweírigin. ¹⁴ Deréeguati lúngua lun loúnwen wawágu, lun lasálbaruniwa lídaangiñe sun wuríbani lúma lun larúmadagüdüniwa le gumúti, lun lání wamá, aráanseñu lun wadúgüni le buídubei.

¹⁵ Ligía buri cátei le lúnbei barúfudajani, íchigeina dúgüdaguaü, aréjejeina láu sun ubáfu. Míchigabá lúgaaru lun banügüniwa quei ni cáta.

3

Cátei lé buri lúnbei jadúgüni affñetiña

¹ Jarítaguagüda báña affñetiña luágu Crístu, luágu lúnti lan jagúnfulirun jáma gumádimatiña lúma jáma ja oúnajabaliña, lun gagáambadi jamá joun, aráanseñu jagíame lun jadúgün furúmieguarügü cátei buíti, ² lun madímurejan jamá wuríba luágu ni ában, lun dílf lan jóuserun, areída jagíame, lun únabugu jamá lídan jóuserúniwa sun gürígia.

³ Lugúndun wagía affñetiña, ibídioguati meja gñe wáu, magáambadi wagía meja lun Búngiu, barútiwa meja ában úma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adúga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun. ⁴ Ánjeinti dan le larúfudunbalin Búngiu Wasálbaragüle lareíni lúma línsiñejabu joun gürígia, ⁵ ába lasálbaruniwa, máma jamúga ladúga wadúgün som cátei buíti, ladúga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágarí woun lun gayáraabei lan wabágaridun queísi labúseerun. ⁶ Lugúndun rúlaali Búngiu Sífiri Sándu woun lídaangiñe Wasálbaragüle Jesucrístu, lun wámabei lan láu sun luweírín lubáfu. ⁷ Láu larícharaguagüdüniwa Búngiu ligíbugiñe láu lareíni, gayáraabei werésibiruni ibágarí magúmuchaditi le wagúrabajabei lúmagiñe Búngiu siélu. ⁸ Inárüni cátei le.

Buséntina lun barúfudajani buri cátei le láu ában éregu, lun ja lan affñebaña luágu Búngiu, lun súnwandan lan jíchaagun jóungua lun jadúgüni cátei le buídubei. Buíti cátei le, áni buíti lanúgün joun sun gürígia. ⁹ Dísebá luef sigénei buri le málati, úraga buri

jawáguti binádu mútu, fáreinguaü buri, lúma buri wuríbu lueígiñe lilúrudun Moisés. Sún buri cátei líra, manúgünti buíti lun ni ában.

¹⁰ Ánjein ní lubei ában tílana liglisi le adúgübalin fáreinguaü, erérabá lun ában o bián weíyaasu, ánjein madúgün gásu báu, ígirabeí lúngua. ¹¹ Subúdi báali luágu ígira láali lan wügüri ligía úma le surúbei láu luwúyeri labágaridun.

¹² Dánme nouñajani Artémas o Tíquico lan lun lárügüdüni bubára ñi, buséntina biábin aríjiana Nicópolis lugúndun ñíba násügürei lidáni luríbouga. ¹³ Íderaguabeí Zénas, le subúdijabúbei lun lúrudu, lúma Apólos lídan sun le buáraati, rúbeíme le jemégeirubei joun lun jasígiruni jaweíyasun. ¹⁴ Furéndeí jamá gñe sun wánigu lun jadúgüni cátei le buídubei, ídeja jagíame dan le mégeiwa lan, ju lámuga jabágari lídan Crístu.

Mábugaü

¹⁵ Mábuga jáña sun ja númabaña bun, mábuga wáña joun ja jínsiñejabúbaña woun queísi idújeñu lueígiñe Crístu. Binílaün Búngiu sun jugúya ja alíjibarun gárada to. Ítaralá.

LIGÁRADAN PÁBLO LUN FILEMÓN

Labúrjjan Páblo lun Filemón

¹ Áu Páblo, le nadaürúñabei lueígiñe napúrichijan luágu Jesucrístu, nabúrjjañoun gárada to, úara lúma Timotéo, le wadúje lueígiñe Crístu, bun, Filemón, le weíribei ínsiñe woun, le gíñe wouba lídan wadágimanu. ² Gárada to, joúntu gíñe tflana liglísí ja oúndaragubaña búbiñe, queísi tun wadúje Ápia, lúma lun Arquípo, le wámabei lídan áfaaguni lídan luwádigimari Crístu. ³ Resíbi jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Línsiñejabu Filemón lúma lafñen

⁴ Teínqui numúti Búngiu súnwandan lídan le narítangun buágu lídan nayúmuragun lun, ⁵ lugúndun agáambadina luágu ínsiñejabuni lúma affñeni le buágubei lun Jesúsú lúma joun sun ja lánigubaña Búngiu. ⁶ Amúriajatina lúma Búngiu lun ja lan affñeñabaña luágu Crístu ladúga baffñen, lun jayábin lun gunfaráanda jamáni sun abíniruni le wabájibi lúmagiñe Jesucrístu, buídu. ⁷ Nidúje, oúnwenbun nugúndan lúma dúgudaguaü le nídaanbei luágu bínsiñejabu, lugúndun darángilajaru janígi ja affñeña luágu Crístu, bugúndun.

Lamúriajan Páblo ában fuleísei lun idámuni Onésimo

⁸ Láu sun garícha nan queísi ában láni Crístu apóstolu lun naríñaguni le lúnbei badúgüni bun, ⁹ jímeín numúti ayúmuragarügü nan bun luágu ínsiñejabuni le wádaanguabei wóuniwagua. Áu Páblo, weíyaadina, guetó nadaürúña lueígiñe napúrichijan luágu Jesucrístu. ¹⁰ Amúriajatina ában fuleísei búma lun Onésimo, le ítarajalñe queísi niraü lídan Jesucrístu lárígiñe lerésibiruni Crístu láu nadímurejan lúma ya furísunrugü.

¹¹ Lídan meja dan le sügújalabei, ában meja idámuni mouñti Onésimo bun, ánjeinti guetó, gebégiti bun queísi nun. ¹² Nouñajañein bun lárigoún, resíbiñe lubeíti láu ugúndani lugúndun láu nouñajani bun, queígubeirügü jamúga nouñajañoun lan nanígi, le luweírín línsiñe nun. ¹³ Gúndaatina jamúga lun leréderun núma ya, lún jamuga lesériwidun nun bewéñeua, sun anája lan adaürúwa lueígiñe napúrichijani ugánu le lánina asálbaruni. ¹⁴ Mabúseerúntina nadúgün ni cáta magúndaga amúru láu, lun máma lan láuti afósuruni fuleísei le badúgübei nun láu jamúga bígiruni núma, lun láuti lan bugúndan guánarügü. ¹⁵ Fágua lanúurunbei Onésimo bueí luágu átiri dan lun búmabei lan guetó lun sun dan, ¹⁶ guetó mámarügü queísi ában idámuni, queísi cáteí buítimaati lueí idámuni—queísi ában idújei jínsiñeguti. Weíríti línsiñe nun, lúnti jínsiñetima lan bun, mámarügü queísi wügüri, queísi gíñe ában idújei lueígiñe Crístu.

¹⁷ Ánjein lubeíti barú bubálina queísi ában bouba lídan wesériwidun lun Crístu, resíbiñe queísigubeirügü jamúga áu lan berésibirubei. ¹⁸ Ánjein adúgaali lubeí dánu bun, o ánjein dúwei lubálibu, agúburaja bána. ¹⁹ Áu Páblo, nabúrjjañein murúsun cáteí le láu nújabu lúma nilétüran. nafáyeirubei bun, láu sun, gayára lan jamúga narítaguagüdüñibu luágu dúweigua ban gíñe búngua nun lugúndun áu lan asúbudiragüdübalin Wasálbaragüle bun. ²⁰ Ánja, nidúje, adúgabeí fuleísei le nun queísi affñeti luágu Crístu, ámalijaboún nanígi queísi idújei lueígiñe Crístu.

²¹ Nabúrjjaña bun lugúndun choúru nan luágu bagáambadi, áni subúdiñi nun luágu badúgüba lan sügú láu le uágubei namúriaja búma. ²² Aráansejabá gíñe ubáraü nubá, lugúndun agúrabatina luágu lídan lánme louñabuni Búngiu jayúmuragun lun náfuridun furísunrugugiñe, lánjaruba lun nídin aríjaün.

Mábugaü lúma lagúmujoun abíniruni

²³ Mábuga líña Epáfras bun, le nouba furísunrugu luegiñe lapúrichijan luágu Jesucrístu,
²⁴ mábuga líña gíñe Márcos bun, Aristárco, Démas, lúma Lúcas, ja ñadágimeinbaña úara
núma.

²⁵ Binílaün Wabúreme Jesucrístu. Ítaralá.

GÁRADA JOUN JA ADÍMUREJABALIN HEBRÉO

Adímurejaali Búngiu lídaangiñe Liraú

¹ Lídan meja dan le sügújalibei, adímurejati meja Búngiu joun binádu wagúbürigu sarágu weíyaasu lúma lídan sarágu luwúyeri, jádaangiñe profétagu, ² guetó, lídoun buri lagúmujóun dan le, adímurejaali woun lídaangiñe Liraú. Lídaangiñe Liraú le, ladúgei ubou, áni rúlaali sun cátei lun. ³ Arúfuda lumúti Liraú Búngiu luweírigun Lúguchi luouógua, ligía méme Búngiubei, ligía ágúdajabalin sun cátei láu lerérun le gabáfubei. Lárigiñe lachíbuni wáfígoun, ába lañúurun lueígiñe loúnwenren lála Búngiu, le Súnti Gabáfu, siélu.

Weíriguti Liraú Búngiu sügú jáu ánjeligu

⁴ Núbinjali Liraú Búngiu lun weírigubei lan jawei ánjeligu, resfbijali ában ubaráti ñnugutimaati jawei queísi lalágaante queísi Liraú Búngiu. ⁵ Maríñagunti Búngiu ni ában weíyaasu lun ni ában ánjeli.

Niraú amúrü,
rúnaali ubaráti le bun ugúñe,
maríñagun ligía luágu ni ában ánjeli.

Ába Búguchi,

amúrúme nisáani.

⁶ Ánjeinti dán meja le loúnajaabalin Liraú le ábanrügüti ubouágoun, aríñagati.

Judúgua jamá sun nání ánjeligu lun.

⁷ Laríñaga jawágu ánjeligu.

Adúgatina lun ítara jamá nání ánjeligu camá garábali,

adúga áu lun ítara jamá camá wátu geméti,

ouúnagüleigu jagía ja esériwidubadina.

⁸ Ánjeinti lun Liraú aríñagati Búngiu ítara.

Búngiu, lúntibeí súnwandan bañúurun luágu bála lun barúeijan,

láu ában úaraguni bagúmadija.

⁹ Jínsiñeti le richáguabei bun, iyéreeguti le wuríbabei bun,

ligía níchugunbei, áu le Bubúngiute, gíbetima ugúndani bídoun sügú jáu bíbirigu.

¹⁰ Ariñagati gíñe.

Amúrü le Abúremein, lídan lagúmeseja, adúga bumúti ubou,

láu bújabu badúgei siélu.

¹¹ Lagúmuchuba siélu lúma ubou, ánjein amúrü, beréderuba lun sun dan.

Liábiba siélu lúma ubou lun laweíyadun quei anáanguni,

¹² babárechagubaña quei ában daúguauí,

jasáansirúaba quei anáanguni.

Ánjein amúrü, ában mémebadibu, magúmuchunbei bibágari.

¹³ Maríñagunti Búngiu ni ában weíyaasu lun ni ában ánjeli.

Ñurúba lueígiñe nouúnwenren darí lun nagáñeiragüdüñibu jawágu báganiñu,

ru náñame bújaburugun.

¹⁴ Sun ánjeligu, espíritugu esériwidutiña lun Búngiu jagía, ouúnajouítiña lun jíderaguniña ja lúnbaña jerésibiruni asálbaruni lídaangiñe jafígoun.

2

Lúnti woúnigiruni wasálbarun

¹ Queí ítara líña lubeí luweírigun Liraú Búngiu, lúnti lubeí weténiruntima lun ugánu le agáamba wamáalibei luágu, lun madíreirun wamá lueí úma. ² Chourúati lilúrudun

Búngiu lé meja íchugúbei joun gürígia jádaangiñe ánjeligu lídan meja ámu dan, áni ja adúraagubalin, madúgün jagía gásu láu, áburujati ligáni Búngiu jawágun láu íríchaü. ³Gúbuméti wafáyeija luágu waffgoun ánjein mouñigirun wamá ouñwenbun asálbaruni le resíbi wamáalíbei lúmagiñe Jesucrístu le Wasálbaragüle. Wabúreme Jesucrístu guá-narügü admurejabei luágu asálbaruni le furúmiñe, lárigiñe, ja agáambubalin, ában jásiügüragüdüni woun láu ában achoúruruni luágu inárüni lan. ⁴Nurúgüda láali gíñe Búngiu ugánu ligía woun láu buri seíni lúma sarágu buri miláguru lúma láu Sífiri Sándu le líchugubei woun láu amúñegueinarügü luwúyeri ubáfu queísi labúseeruni.

Jesucrístu quei libíríña

⁵Míchugun lumúti Búngiu ubou líte le uágubei wadímureja lábun jagúmadijan ánjeligu, ⁶lubáragiñe líra, laríñajare tidan Lerérun.

Búngiu, ¿cáteiñeinsan wügúri lun barítaguba lan luágu?

¿Cáteiñein wügúri goúwedaditi badjferidunbei láu?

⁷Rúbumuti únabu jaweí ánjeligu luágu murúsun dan,

daúguagüda bumúti láu uweíriguni lúma inébesi,

ru amúrü ubáfu lun luágu sun cátei le badúgübei,

⁸rúbumuti sun cátei lábugiñoun lagúmadijan.

Dan lubefti le líchuguni Búngiu sun cátei lábugiñoun lagúmadijan gürígia, mígirunti ni cáta lun mámabei lan lábugiñe. Láu sun líra, aríja wamúti luágu mámagili lan sun cátei ñúdünti láu le lubeíbei wügúri. ⁹Ánjeinti lídan Jesucrístu, aríja wamúti lagúnfulirun sun dimúrei le, ligía meja ában gürígia le líchugubei Búngiu únabu jaweí ánjeligu luágu murúsun dan. Láu luweírin línsiñejabu Búngiu woun, ánjati lun louñwen Crístu jawágu sun gürígia, áni guetóti, daúgu líña láu uweíriguni luágu ouweni le lasúfurirubei.

¹⁰Sun cátei níjein lun Búngiu, áni lídaangiñeti gíñe, áni buséti Búngiu lun gafánran jamá sun lirájüñü lídan luweírigun. Ligía lúnti lubeí buga lasúfurirun Liraú Búngiu, le Jesucrístu, queísi ában gürígia lun ligíaba lan ában asálbaragülei gumúti láu asúfuriruni.

¹¹Ja ederegerúabaña jarúma lun Búngiu lúma Liraú le ederegerubaliña ítara, sun jagía ában meme Úguchili—Búngiu. ¹²Ligía úa lubeí nibúsigari lan Liraú Búngiu lun lagúaruniña lamúleni jáma lítunu dan le laríñagun lun Búngiu, queísi búruwañu lan tidan Lerérun Búngiu.

Nadímurejaba buágu joun namúleni jáma nítunu, nerémujaba luágu buweírigun lagánagua adamurini.

¹³Aríñagati gíñe.

Neménigiduba luágu Búngiu.

Aríñagati gíñe.

Anája, jáma isáanigu ja líchugubaña Búngiu nun.

¹⁴Ja jasáanigu ában familia, ában meme jítaü jagía, ítara gíñe, wügúri meja gíñe garaúwarügüti Jesúsu, lun meja gayáraabei lan louñwen, gayára lámuga lagúnrinchaguni lubáfu Máfia le ídaangiñebei liábin ouweni joun gürígia. ¹⁵Ítara líña gidá lumuti Jesucrístu janúfude gürígia, já meja aganoúbaña quei idámuni lun anúfudei luef ouweni. ¹⁶Masálrágunti Crístu queísi ánjeli lun líderaguniña ánjeligu, salíti queísi wügúri garaúwarügüti lun líderaguniña gürígia líledi, ja linébaanfaangu Abrahám, ja lúnbaña jafñerun luágu. ¹⁷Lúnti líra, gásu meja ítara lúba lan queísi libíríña, lun liábinba lan lun ábanbei lan fádiri íñutimaati, le úraguati, láu gudémejabu joun gürígia, lun gíñe lachíbuni jafgoun gürígia láu lederegeragun lúngua luágu gurúwa. ¹⁸Áni quefti sáfuri lan, áni ouchagualef Máfia, guetó gayáraati gíñe líderaguniwa lídan le woúchawagün.

Weírigutimaati Jesúsu luef Moisés

3

¹ Ítara líña lubeíti, nidújeñu derégeguatiña jóungua lun Búngiu, quei jádaangiñetün lan ja únbaña wájali lan Búngiu lun jaganoun lúma siélu, téni jumá buídu lun Crístu le loúnajabei Búngiu, le gíñe fádiri íñutimaati le lánina afíñeni le wawágubei. ² Úaraguati Jesúsu lúma Búngiu lídan sun wadágimanu le únbei lanúadirei, queísi meja gíñe úaragua lan Moisés lídan sun lesériwidun jádan lufámilian Búngiu. ³ Gadúnatimaati Jesúsu uweírugini sügú láu Moisés ítara quei resbitima lan le adúgübei ában múna uweírugini sügú táu múna to ladúgüboun. ⁴ Sun múna adúgarügü lumútu som güriñgia, áni Búngiu adúgübalin sun cátei le níjeinbei. ⁵ Ítara liñáti, úaraguati meja Moisés lídan lesériwidun jádan lufámilian Búngiu queísi ában esériwiduti lun Búngiu, wadágimanu lé meja ladúgübei, ában liyáwa inárüni le lúnbei lasúbudiragüdúniwa lídan dan le lúnbei liábin. ⁶ Ánjeinti Crístu, úaraguati queísi isáani jádan lufámilian Búngiu, áni jádaangiñetiwa familia jagía ánjava derégüdagu méme, ánjava gíñe afíñe darí lúmoun woúnwen, gúndaañu lídan eménigini le wawágubei.

Eméraaguni joun lumútuniña Búngiu

⁷ Ligía lubeíti, lúnti wagáambuni le lariñagubei Sífiri Sándu tídan Lerérun Búngiu.

Ánjein jagáamba le lariñagubei Búngiu ugúñe,

⁸ medéreratá janígi quei meja tedérerun janígi magáambaditiña ja oúchagubalin Búngiu lídan fulásu mageírawati.

⁹ Lídan bián-wein irúmu le jáubei ñi,

jóuchagua jamútina binádu jagúbürigu lídan fulásu ligía, líña Búngiu,

láu sun aríja jamáni buri cátei le nadúgübei.

¹⁰ Ligía nagáñidunbei jáma güriñgia jagía,

ába nariñagun. “Súnwandan charárañu jamá tídan janígi,

májatiña jafálaruni úma le narúfudubei joun.” ¹¹ Ligía nagáñidunbei jáma,

ába náfiñurun luágu mebelubaña lan lídoun fulásu lé yebe aráanse náalibeí jabá lun jeméraagun ñi.

¹² Nidújeñu, toúnigi jumá lueí tedérerun janígi lun jadisedun lueí Búngiu le wínwanbei láu maffínerun jumá luágu. ¹³ Lubáragiñe líra, rújuma gurásu júniwagua ságü wéyu, sun níjangua lan dan. Toúnigi jumá lueí leyéedagunün figoú, edéreragúdounme janígi,

¹⁴ lugúndun ánjava ítara méme derégüdagu darí woúnwen lídan afíñeni le wawágubei lúmagiñe furúmiñeti, gafánraanbadiwa lúma Crístu.

¹⁵ Níjangua dimúrei le, le gíñe woúnbei, wagía le wínwanbei lídoun buri dan le.

Ánjein jagáamba le lariñagubei Búngiu guetó,

medéreratá janígi quei jagúra ja magáambadibaña lun Búngiu.

¹⁶ ¿Cátañati agáambubalin lumálali Búngiu, lárigiñe, ába jagáñidagüdüni láu luríban jagáburi? Sun ja laságarubaña Moisés Ejíptogiñe. ¹⁷ ¿Cáti úma lagáñida Búngiu bián-wein irúmu? Jáma ja afgounjabaña, ja oúwegubaña lídan fulásu mageírawati, ába ligirúniwa jábu ñi. ¹⁸ ¿Cáti un láfiñura Búngiu luágu mebelubaña lan lídoun fulásu lé yebe aráanse láalibeí joun lun jeméraagun ñi? Joun ja adúraagubalin le lubeíbei. ¹⁹ Ítara líña lubeíti,

goúnigi jumá lun jafínerun meme darí lúmoun jóúnwen, lugúndun ladúga maffíñeni le jawágubei binádu wagúbürigu, siñá lubeí meja jebélurun lídoun fulásu le aráanse láalibeí yebe Búngiu jabá.

4

¹ Guetó lubeíti níjeingua béna júnren woun lun gayára lan webélurun lídoun eméraaguni le aráanse láalibeí Búngiu woun siélu, lúnti goúnigi wamá, siñádügü liñeín lebelurun ában wádaangiñe, dánme lachúlürün óra lun woúnwen. ² Lugúndun apúrichijoúali gíñe ugánu luáguti asálbaruni woun queísigubeirügü joun binádu wagúbürigu, mesériwinti lun ni cáta joun jagáambuni ugánu ligía lugúndun agáamba jamúti, maffínerunga luágu.

³ Ánjeinti wagía le affñeelibe, wagíaba ebélura lídoun eméeraaguni le, le uágubei laríñaaga Búngiu.

Ligía nagáñidunbei jáma,

ába náfiñurun joun luágu mebélubaña lan lídoun fulásu le aráanse náalibe yebe jabá lun jeméeraagun.

Ítara líña lerérun Búngiu jawágu binádu wagúbürigu. Aráanserúati fulásu lánina eméeraaguni joun lúmagiñe wéyu le lagúmuchi Búngiu ladúgüni uboú, ⁴ queisi labúrüdúniwa tídan Lerérun Búngiu luágu lisédün wéyu.

Ába leméeraagun Búngiu lídaangiñe sun luwádigimari luágu lisédün wéyu.

⁵ Aríñawagúaya ligía tídan Lerérun tugúya itara.

Mebélubaña lídoun fulásu le aráanse náalibe yebe jabá lun jeméeraagun.

⁶ Láu dimúrei buri le, subúdi wamúti luágu aráanserúañu lan fulásu lánina eméeraaguni jabá güriña, ja binádu wagúbürigu, ja furúmiñebaña agáambe uganu lánina asálbaruni, mebélutiña ladúga maffñeni le jawágubei lun Búngiu. ⁷ Ligía laráanserunbei Búngiu ámu dan lun gayáraabei lan jebélurun iséri güriña lídoun jeméeraagun, lugúndun adímurejati Búngiu lídaangiñe lé meja laríñagubei David sarágu dan lárigiñe, tídan Lerérun Búngiu.

Ugúñe, láu jagáambuni le laríñagubei Búngiu, medéreatá janígi lun.

⁸ Lun jamúga fulásu lan lé meja ñijn lubeí lanúgaña Josué Israelítagu fulásubei lánina eméeraaguni le uágubei ladímureja Búngiu, madímurejaanyati jamúga Búngiu sarágu irúmu lárigiñe jebélurun Israelítagu lídoun jageira luágu “ugúñe lan dan” lun jagáambuni Búngiu, gayára lámuga jebélurun lídoun jeméeraagun. ⁹ Ítara líña lubeíti, njeingua ában eméeraaguni le gumúti joun lánigu Búngiu, ¹⁰ lugúndun le ebéluruti eméeraagua lúma Búngiu siélu, eméeraaguati lueí luwádigimari itara quei leméeraagun meja Búngiu lueí luwádigimari lárigiñe ladúgüni uboú. ¹¹ Lúnti lubeíti waffñerun le tímatimaati luágu Jesucristu lun gayára lan webélurun lídoun eméeraaguni siélu, faládügü liñálin ában wádaangiñe jáni já meja maffñerunbaña jémpulu, ábame leféridirun.

¹² Lugúndun mítaraantun Lerérun Búngiu queisi ában cátei le jiláalibe, lubarágiñe líra, gabáfuti lun lasáansiraguni wagáburi. Belútu tídoun wanígi queisi ában efeín to biángua tamána, belú tugúya chülú túmoun wawáni lúma wáni espíritu. Furáangugüda tumúti sun warítangun lúma sun wayúmajan, arúfuda tugúya cátañañadiwa lan. ¹³ Úati ni ában güriña le ladúgübei Búngiu lun gayára lan larámudagun lueí laríjin Búngiu, furáanguti sun cátei lun, le únbei lúmaba lan wagúsera.

Jesúsu wafádiriñebei le tímatimaati

¹⁴ Jesúsu le Liraú Búngiu, ligía wafádiriñebei le tímatimaati, le belújalibe siélun lun laráramun ligíbugiñe Búngiu abúyeija luágu wafúleisein. Ligía lunti lubeí derégüdagu méme wamá lídan ligáburi waffñen. ¹⁵ Gayáraati gudémejabu lan Jesucristu le wafádiriñebei woun luágu wadébilin, lugúndun ligía guánarügü súfuriti sun luwúyeri oichawaguni quei wagía, maffgounjaanti. ¹⁶ Ligía lúnti lubeí wayárafadun lun Búngiu le jínsiñe-jabúbei woun, láu affñeni, lun gudémejabu lan woun, íderagua lówame láu lareíni lídan wemegeirun.

5

¹ Según wagáburi, wagía jurú, ságü ában fádiri le ñntimáabei anúdajouáti wádaangiñe lun ligíaba lan wachügüdüna ligíbugiñe Búngiu, lun giñe líchuguni edéweejani lun Búngiu lueigiñe joubadina güriña, lúma adágaragüdüni luágu lifígoun lúma luágu jaffgoun jíbiri güriña. ² Quei débili lan fádiri guánarügü quei furúmieguarügü güriña, gayáraati gudémejabu lan joun gaffgountiña jáma acháragadutiña, ³ áni ladúga lidébilin guánarügü queisi furúmieguarügü güriña, gásu giñe ladágaragüdüni luágu lifígoun guánarügü queígubeirügü luágu jaffgoun jíbiri güriña.

⁴ Siñáti ladaágun ában gürrígia lúngua fádirime le ñnutimaabei láu láni lúngua, Búngiu anúadirubalin, rúleí ubáraü le lun queísi meja lasúseredun lun Aarón lé meja furúmiñeti fádiri le ñnutimaabei. ⁵ Ítara líña lasúseredun lúma Crístu, máma ligía íchaagubei lúngua fádirime ñnutimaati láu láni lúngua, Búngiu íchugubalin ubáraü weíriguti le lun queí buga laríñaguni lun.

Niraü amúrü,
rúnaali ubáraü le bun ugúñe.

⁶ Aríñagati gíñe tídan méme líburu to Lerérun Búngiu.

Fádiri amúrü lun sun dan,
le líbe Melquisedéc.

⁷ Dán meja le laganouñbei Crístu ya ubouágu, ayúmuraguati meja láu umálali jéreti lúma sarágu águirau lan Búngiu le gabáfubei lun leséfuruni lídaangiñe ouweni le lúnbei lasúfurirun. Ába lagaámbuni Búngiu ladúga derégeguñu líña lan Crístu lúngua lun lugúndan Búngiu. ⁸ Láu sun Liraü lan Búngiu Crístu, chülúti dan lun larúfuduni lagaámbadi láu lawánduni asúfuriruni. ⁹ Núbinti lun ábanbei lan asálbaragülei le gumúti láu lasúfurirun, lun gíñe ligíaba lan íchigei asálbaruni le magúmuchaditi joun sun ja ñúdüntiña láu le lubeíbei. ¹⁰ Ába lanúgüni Búngiu Crístu quei fádiri ñnutimaati líbe Melquisedéc.

Wuríbani le líchugubei lígirúniwa affñeni

¹¹ Gíbeti lúnti waríñaguni jun luágu Crístu lúma Melquisedéc, jénreenguti laríñawágün furáangu, lugúndan siñá lan gunfaráanda jumáni. ¹² Stügújali sarágu dan lúmagiñe jasálbarun, lúnti jamúga gayáraajali lan jarúfudajani Lerérun Búngiu joun ámu, áni busén mémegidün narúfudajaniya buri cátei létima ménreengúnbei lídaangiñe Lerérun Búngiu jun. Irájüñügidün lídan jaffñen, queísi irájüñü ja gásubaña játun míligi lubáragiñe jamúga jeígin egiñi le dúgüdati. ¹³ Affñetiña ja buséngiñabaña larúfudajouñiwa cátei létima ménreengúnbei tídaangiñe Lerérun Búngiu joun, ítara jáña quei irájüñü ja gurágiña—úagili gunfaráanda jamáni Lerérun Búngiu buídu. ¹⁴ Ja weínamujañabaña lídan jaffñen, subúditu Lerérun Búngiu joun buídu, subúdi jameí arúfudajani le buídubei lúmoun le mabuídunbei.

6

¹ Queímoun méme lubeíti wabáruaguouñ lídan wasúbudin luágu Lerérun Búngiu, ígira wamámugei arúfudajani le ménreengúnbei libúgürü Crístu lun watúriajani lujúlilin-ágei. Marítagua wamá luágurügü lébu waffñen, queí buri ligirún binádu igáburu le málati, lúma buri affñeni luágu Búngiu, ² arúfudajani luágu badísei, líchugúniwa újabu jábulugu affñetiña, jásaarun jiláaña lídaangiñe ouweni, lúma lagúmujoún lagúseragüdüniña Búngiu gürrígia, ³ queímoun wabáruaguouñ lídan wasúbudiruni lujúlilin-ágei Lerérun Búngiu, láu lubáfu wawágu.

⁴ Gürrígia ja resíbi jamáalibei larúgounga ában weíyaasu, resíbi jameí Crístu queísi jasálbaragüle, resíbi jameí gíñe Sífiri Sándu, ⁵ geféentiña luágu ugúndani le jasándirubei láu jalíjanun Lerérun Búngiu, lúma lubáfu Búngiu le siélubei jawágu ya ubouágu—⁶ ánjein jíchiga janágan luágun Crístu lárigiñe sun cátei líra, ába jagírribudun járigouñ lídoun binádu jagáburu, siñaalime jaságürjan, siñaalime gíñe lánigu jamá Crístu. Lun jamúga jíchuguni janágan luágun Liraü Búngiu lárigiñe jaffñerun luágu, queísigubeirügü jamúga jádaraguñeinya lan luágu gurúwa, jéjerajaña gíñe láu jagíbugiñe gürrígia. ⁷ Gürrígia ja eíbugubaña buídu lúma Crístu, ítara jáña quei múa le achúurubalin júya le áburujabei luágun, ában líchugun múa ligía ában alúbajani buíti joun ja ñadágimeinbalin, ladúga binílaali lán buga Búngiu múa ligía. ⁸ Gürrígia ja íchugubaña janágan luágun Crístu, ítara jáña quei múa le ñí lumuti lájücha jíyu lúma lagúbüri jíduru, úati ju lan lun ni cáta. Láburujaba lábun líñaragun Búngiu, ábame lagudún.

Eménigini le adúgübei lun derégüdagu wamá

⁹ Láu sun wadímurejan ítara, nidújeñu jínsiñetiña nun, afñetiwa luágu ítara júba lan queí múa le íchugubei inádiri buíti, áni jibjubei sun abíniruni le ñúbinbei woun luágu wasálbarun. ¹⁰ Lugúndun úraguati Búngiu, áni mabúlieidun lubeí le adúga jumáalibei, lúma ínsiñejabuni le arúfuda jumáalibei lun láu jíderaguniña jidújeñu luágu afñeni, cátei le anjúnjaguabei adúgei. ¹¹ Buséntiwa lun ítara méme lan cáda ában jídaangiñe, arúfudei afñeni le darí lúmoun jóunwen, lun gayáraabei lan jibjini le jagúrabubei—lun jebélurun siélun. ¹² Mabúseerúntiwa lun jamáqualigudun lídan cátei le láni Búngiu, busénrügítiwa lun jáyeijani jagáburi já meja afñebaña buídu buídu luágu Búngiu, awánda jameí sun asúfuriruni luágu, ába jerésibiruni le uágubei laríñaga Búngiu luágu líchugubei lan jun.

¹³ Dán meja le laríñagubei Búngiu lun Abrahám luágu labínirubei lan, fiñúti luágu guánarügü líri ladúga úa lan ámu weírigitimáati lueí lun láfiñurun luágu, ¹⁴ ába laríñagun. “Nabínirubadibu sarágu, níchuguba gñe sarágu adúgawaguni bun.” ¹⁵ Agúrabajati Abrahám láu gurásu, ába lerésibiruni le uágubei laríñaga Búngiu lun. ¹⁶ Dan le jáfiñurun gürígia, luágu ában le weírigitimáati jaweí jáfiñura, áni choúrugaña ligiati ában cátei láu fiñún, uaali ámu cátei lun laríñawagún. ¹⁷ Ligía lachoururumbalin Búngiu lerérun láu fiñún, lugúndun busén lan larúfuduni furáangu woun, wagía le lúnbei werésibiruni lalágaante Abrahám, luágu lagúnfulirubei lan lerérun luágu wasálbarun, masáansirunga ni cáta lídaangiñe. ¹⁸ Rúlaali Búngiu lerérun woun, rúlef láfiñurun luágu, bián cátei ligía, gayáraati weménigidun luágu, ladúga siñá lan leyéjean Búngiu. Áni láu cátei ligía, sun ja ñúbinbaña lun Búngiu lun jasálbarun, gayáraati janúgün gurásu, gayáraati jasúbudiruni le tímatisimáti luágu jasálbaruba lan áni jebéluruba siélun. ¹⁹ Ágüdaja lumútu eménigini le wawáni derégüdagu, choóruñu, queísi lágüdajanun oúnguru ugúnein derégüdagu. Choóruwañu líña eménigiruni le wabíjibeí buídu buídu, ragúñu líña luágu Búngiu lídan fulásu sándutimáati siélu, ²⁰ le ñjín lubeí lebelúra Jesúsu ában weíyaasu wawágu lun ladáraruni úma wabá. Níjein ñi guetó afádirija wawágu ligíbugiñe Búngiu queísi ában fádiri inútimáati le líbe Melquisedéc.

7

Jesúsu fádiri líbe Melquisedéc

¹ Melquisedéc le, urúei lídan meja fulásu le gíribeí Sálem, lufádirinein gñe Búngiu le inútimáabei. Dan le lagíríbudunbei Abrahám wuríburugugiñe lárigiñe lagáñeiruni wuríbu jawágu urúeigu, ába láfuridun Melquisedéc lubároun, ába labíniruni, ² ába líchuguni Abrahám ában lídaangiñe cáda díisi lídaangiñe le lagáñeirubei lídan wuríbu lun. Míni lan íri Melquisedéc lídan furúmiñeti cátei, “urúei richáguati” queí mejati lurúeite lubeí Sálem, áni “darángilau” míni lan Sálem, ítara líña lubeíti “lurúeite darángilau” Melquisedécbei. ³ Ibídiñewati ca lan lagúbüriegubaña, ibídiñeti gñe ca lan linébaanfaangubaña, ibídiñewati ni cáta libúgürü lagúriajóun ni libúgürü loúnwen, liyáwa Liráu Búngiu ligía, ában fádiri lun sun dan.

⁴ Aríja jumeíti luágu weírigu lán meja Melquisedéc. Abrahám guánarügü lé meja binádu wadúje, rúlumuti ában lídaangiñe cáda díisi lun lídaangiñe le lagídarubei jaweí urúeigu lídan wuríbu. ⁵ Según lilúrudun Moisés, fádirigu ja linébaanfaangu Leví lúnti jagúburajani ában lídaangiñe cáda díisi jamagiñe gürígia lídaangiñe sun cátei, láu sun jadújeñu jamá, linébaanfaangu Abrahám jáledi. ⁶ Ánjeinti Melquisedéc, láu sun máma lan linébaanfan Leví, agúburaja lumúti ában lidíisin cátei lueí Abrahám, lé buga erésibirubalin dimúrei lúmagiñe Búngiu. Ítara líña labíniruni Melquisedéc Abrahám, ⁷ áni siñáti lasígeneruni ni ában luágu weírigitima lan le abínijabei sügú láu le abínirúabei. ⁸ Ya wádan, fádirigu ja erésibirubalin cáda lidíisin cátei, wügúriña góuwedaditiña, ánjeinti luágu Melquisedéc, tadímurejan Lerérun Búngiu luágu queí luágu ában le wínwangili. ⁹ Áni gayáraati laríñawagún luágu Leví jáu sun fádirigu ja linébaanfaangu ja agúburajabalin cáda lidíisin cátei guetó, luágu fáyei jamáni gñe lun Melquisedéc lídan óra le lafáyeirunbalin Abrahám

lun, ¹⁰ lugúndun lídan ában oúbaü, barú lumutiña buga Abrahám linébaanfaangu ja magúriajoungiñabaña lídan lógubu dan le láfuridunbei Melquisedéc lubároun.

¹¹ Jádaangiñe fádorigu ja linébaanfaangu Leví jerésibirei Israeltagu lilúrudun Moisés, áni Aarón furúmiñetibeí jafádirin. Gürígia ja afálarubalin lúrudu ligia, lun jamúga gayára lan jasálbarun le tímatimaati lueígiñe, memégeirunwali jamúga lachúlaagun ámuya fádori, máma líbe Aarón, líbe Melquisedéc. ¹² Lugúndun dan le liábin fádori lídaangiñe ámu adúgawaguni, sáansiwati gíñe lúrudu lé buga lábugiñebei lafádirija. ¹³ Wabúreme Jesucrístu, queísi fádori lídaangiñe ámu adúgawaguni queísi Melquisedéc, sáansiguati gíñe lúrudu le lábugiñebei lafádirija. Taríñajare Lerérun Búngiu luágu lídaangiñeti lan ámu liraú Israel lueí Leví liábin Crístu—ában adúgawaguni le úagilibei ni ában jádaangiñe afádirijati. ¹⁴ Lugúndun subúdiwati buídu luágu jádaangiñe lan linébaanfaangu Judá liábin Wabúreme Jesucrístu, áni maríñagunti Moisés ni cáta jawágu adúgawaguni ja dan le ladímurejaanbei jawágu fádorigu.

¹⁵ Áni furángutimáati le dan le liábin Jesucrístu lun lafádirijan queísi Melquisedéc, ¹⁶ máma láu ában lúrudu le aríñagubei cába lan ídaangiñe adúgawaguni liábin, liábin lun fádoribeí lan lugúndun gabáfu lan lun labágaridun lun sun dan. ¹⁷ Niján le laríñagubei Búngiu luágu Jesucrístu.

Ában fádori amúrú lun súnwandan,
le líbe Melquisedéc.

¹⁸ Gumúguati lubeíti binádu gumádi le lilúrudunbei Moisés, le lábugiñebei jafádirijan Levítagu, lugúndun nírein lan mégeiti luágu, ¹⁹ mabáfuti lúrudu ligia lun lasálbaruniña gürígia lídaangiñe jafígoun. Lewéñeguati, níjein ában iséri aráanseruni le buítimaati, le ídaangiñebei gayára lan wayárafadun lun Búngiu.

²⁰ Áni láu ában fiñún ladúgei Búngiu aráanseruni le lun Jesúsuba lan wafádiríñe. ²¹ Ja jíbiri fádorigu, máfiñurunwati dan le líchugunbei jafúlasun joun, ánjeinti luágu Jesúsú, le láubei fiñún líchugúa lufúlasun lun, laríñajare tídan Lerérun Búngiu.

Áu Búngiu le Abúremeinbei, fiñújadina bun,
masáansiragun nubeí narítagn.

“Ában fádori amúrú lun súnwandan,
le líbe Melquisedéc.”

²² Ligía Jesúsú lubeí achoúrurubei ában darádu buítimaati lueí le furúmiñeti. ²³ Já meja jíbiri fádorigu, chülútiña agíbedagua lugúndun quei ába lán buri jóunwen, siñáti jasgírur, ²⁴ ánjeinti Jesúsú, quei móunwen lan, másügürünbei lifísiute queísi fádori lúmoun ámu.

²⁵ Ligía gayára lubeí lasálbaruniña ja ayárafadubaña lun Búngiu lídaangiñe le tímatimaati lun súnwandan, lugúndun gabágariti súnwandan lun layúmuragun lun Búngiu jawágu.

²⁶ Jesúsú lubeíti fádoribeí íñutimáati le wabúseerúbei. Jarúma ligía, úati wuríbani lídan, ni figou, máma ligía ában jáma gafígountiña, iñurúa ligía íñutima lueí sun cátei siélu lun lañúurun lúma Búngiu. ²⁷ Mítaraanti quei jíbiri fádorigu íñutimaatiña ja gásubei jáfarun anímaalu lun jadágaragüdüniña quei sacrificsiu ságü wéyu, furúmiñe luágu jafígoun guánarügü, lárigiñe luágu jafígoun jíbiri gürígia. Lubáragiñe líra, adúga lumúti Jesúsú sacrificsiu ábanrügü weíyaasu dan le líchaagunbei lúngua lun loúnwen luágu jafígoun gürígia. ²⁸ Wügüríña ja débilibañe, jagía líchugubaña lilúrudun Moisés queísi fádorigu, ánjeinti lárigiñe lidáani lúrudu, ába láfiñurun Búngiu luágu Liraú lun ladúgüni fádorime, le buídubei adúgün le gumúti lun súnwandan.

Jesúsú búyei lun ában iséri darádu

8

¹ Le buítimaabei lídaangiñe sun le waríñagubei, luágu ítara líña lan wafádirin le íñutimaabei, áni ñurújali lueígiñe loúnwenren Búngiu siélu, ² áni lesériwiduña queísi fádori lídan fulásu le sándutimáabei le ladúgübei Wabúreme Búngiu yágüta siélu, máma fulásu

le sándutimáabei le jadúgübei güriáya ya ubouágu. ³ Sun fádiri ñnutimaati líchugúniwa lun líchugun edéweejani lúma adágaragüdüni lun Búngiu, ligía gásu lubei gíne ñjein lan som cátei lúnti ladágaragüdüni Jesucristu lun Búngiu. ⁴ Lun jamúga yáñein lan Jesucristu ubouágu, mámañein jamúga fádiri, lugúndun añájeingua fádirigu adágaragüdütiña le uágubei laríñaga lilúrudun Moisés. ⁵ Fádirigu ja, jadúgüni jawádigimari láu buri cátei le liyáwarügüti lé buri siélubei. Subúdi wamúti luágu iyáwaü lan, lugúndun le lubábei ladúgünun Moisés lúban Búngiu, ába laríñagun Búngiu lun. “Adúgabeftia sun cátei queisi iyáwaü to narúfuduboun bun luágu wúbü.” ⁶ Weiriguti lafádirijan Jesucristu sügü láu jafádirijan fádirigu ubouágu, queísigubeirügü buítima lan darádu le uágubei labúyeija lúma Búngiu luágu jáni güriáya fuleisei ubouágu, áni buítimaati cátei le líchugubei iséri darádu ligía.

⁷ Lugúndun lun jamúga meja buídu lan furúmiñeti darádu le gumúti, le ladúgübei Búngiu jáma binádu wagúbürigu lídaangiñe Moisés, memégeirúnwati jamúga ábanya libíaman darádu. ⁸ Magúndaati buga Búngiu laú furúmiñeti darádu ladúga mabáfu jamá binádu wagúbürigu lun jagúnfulirun lúma darádu ligía. Ába laríñagun tídan Lerérun.

Laríñajare Jabúreme Búngiu. Lachúlürüba wéyu

lun nadúgün iséri darádu jáma buri linásiñun Judá lúma Israél.

⁹ Mítaraanbei quei darádu le nadúgübei jáma binádu jagúbürigu le wéyu le narúgüdünbalin jájabu lun naságaruniña Ejiptogiñe, magúnfulirun jamúti meja nidáradun ligía, ligiati nígirunbáliña jóungua, líña laríñagun Búngiu.

¹⁰ Niján darádu le lúnbei nadúgüni jáma linásiñun Israél lárigiñeme buri wéyu ligía, líña laríñagun Jabúreme.

Níchugubei nugúmadin lídoun jarítangun,

ábame nabúrújani tídan janígi.

Áubati Jabúngiute, jagífame nánigu.

¹¹ Memégeirúnwabei lun larúfudajouúniwa nuágu,

maríñagunbei wügúri ni lun lidúje ni lun libíri lun jasúbudiruni Búngiu le Jabúremebei, lugúndun jasúbudirubadina súngubei,

lúmagiñe le ñúraütimaabei darí lúmoun le weiritimaabei jádaangiñe.

¹² Ferúduna nubei wurfbani le jadúgübei,

nabúlieidubei jafígoun lun sun dan.

¹³ Adímurejaali ligía Búngiu luágu ában iséri darádu, rúlaalrígü líña le furúmiñeti quei binádu, áni cátei le binádujalibei, mayúsurunwadügüyaali.

9

Lúban Búngiu to ubouáguna túma Lúban Búngiu to siéluna

¹ Lídan meja le furúmiñeti darádu le ladúgübei Búngiu jáma binádu wagúbürigu, rúlumuti meja gumádi joun ída lúba lan jájuduragun lun, ññoun gíne ában múna to sánduboun ya ubouágu to lúbanboun Búngiu. ² Ítara líña ligáburi taráanserún múna tugúya. Múnada, ññein bián rúmu, lídan furúmiñeti rúmu le gíribei Fulásu Sándu, ññein lébu sanúdelu lúma dábula le ñí tubei fein to biníwaboun. ³ Ññoun ában bélu labádinagua bián rúmu ligía, Fulásu le Sándutimáabei líribei libíaman rúmu. ⁴ Lídan rúmu ligía, ññein ában latárü gólu lun lágudajouñ cupáli ñi, túma bágüsi to lánina darádu, gólu sun touba. Turágeirugu bágüsi tugúya, ññein ában ágeidinaú gólu le gádaanbalin eígni le gíribei maná, ññein gíne luwénwen Aarón le ájúchagubei, lúma dúbü le uágubei labúrújouá dísi gumádi le líchugubei Búngiu lun Moisés. ⁵ Tougiñe bágüsi tugúya, ññoun jayáwa querubínes, ja queísigubeirügübaña ánjeligu, arúfuda jamúti querubínes jagía luágu ññein lan Búngiu lídan fulásu ligía. Darúguatiña táu bágüsi tugúya, le ñí lubei

ferúdunawa lan figoú, láu jarúna. Mabúseerúntiwa wadímurejan sarágu luágu buri cátei le guetó.

⁶Aráanseñu líña buri cátei ítara, belútiña fádorigu lídoun Fulásu le Sándubei ságú wéyu lun jafádirijan. ⁷Ánjeinti lídoun Fulásu le Sándutimáabei, fádori rügúñein ínútimaati ebélura ñijn ában weíyaasu lídan irúmu, áni dan le lebélorun, gásu lanúgün játa anímaalu lun ladágaragüdün luágu lifígoun guánarügÜ lúma luágu jafígoun gürígia. ⁸Láu cátei le, larúfudajaña Sífiri Sándu woun luágu sun lan seríwigili lan Fulásu le Sándubei lúma buri sun igáburi le adügúbei ñi, madárarúngili úma lídoun Fulásu Sándutimáati. ⁹Sun igáburi lé meja adügúwabei lábugiñe binádu lidáradun Búngiu, liyáwa iséri lidáradun Búngiu wáma le seríwigilibei lídan dan le. Cátei lé buri meja íchugúbei lun Búngiu, lúma cátei le adágarawagüdúwabei lun lábugiñe binádu darádu, siñáti meja larúmadagüdünun jawáni ja agúnfulirubaña lúma Búngiu ítara. ¹⁰Lúrudu buri lánina binádu darádu luágu jagúnfulirun lúma Búngiu, luáguti eigini le lúnbei jeigin gürígia, uníñein le lúnbei játuni, lúma buri igáburi lánina arúmaduni, mabuíduragüdün lumútu buri cátei líra uwáni, lúntirügü lesériwidun darí lasáansiruni Búngiu sun cátei láu liábin Crístu.

¹¹Láu liábin Crístu, guetó ligía fádori ínútimaabei luágu iséri darádu le íchugubei ubuíduni woun sügú láu le binádubei. Lúban Búngiu le ñí lubei lafádirija, buítimaatu sügú táu tó meja ubouaguboun. úati mégeiti tuágu, ladúga máma jadúga gürígia múna to siéluboun, to uáguboun nadímureja. ¹²Belújali Crístu lídoun Fulásu Sándutimáati siélu le ñí lubei Búngiu, máma lun ladágaragüdün játa gábara jáma bágasu ñúbürigiña luágu jafígoun gürígia, dagágüda lumúti líta guánarügü. Láu ábanrügü lebélorun, ligía íbijaali asálbaruni magúmuchaditi woun. ¹³Inárüni luágu lábugiñe lan binádu darádu, gabáfuti meja játa bágasu jáma gábara, lúma jabáligin bágasu ñúbürigiña, lé buri áturawagúbei jawágun ja marúmanbaña, lun ledégeruniña lúma lun larúmadagüdüniña boúgudigiñe jabíti ligíbugiñe Búngiu. ¹⁴Áni ánjein ítara líña lubei, jgúbumégia gabáfutima lan líta Crístu! Lídaangiñe Sífiri Sándu le magúmuchadibei, rúguati Crístu lúngua lun Búngiu quei ában adágaragüdüni luágu wafígoun le úati dáseiti luágu, áni jarúmagüda lumútu líta wawáni, gidá lumútiwa lídaangiñe lidíjeri aríttaguni luágu wagúnfulirun lúma binádu darádu, adúga lumútiwa lun wabúseerun wesériwidun lun Búngiu le wínwanbei.

¹⁵Ligía Jesucrístu lubei býeibeí lun ában iséri darádu le adúga láalibeí Búngiu wáma. Loúnwenbei Crístu lun ferúdunawa lan figoú le adügúbei lábugiñe binádu darádu, lun giñe ja lan únbaña wájali lan Búngiu lun lánigu jamá, gayára lámuga jerésibiruni labínirun Búngiu le laríñagubei luágu líchugubei lan queisi alágan. ¹⁶Lugúndun dan le líchugun ában gürígia lújabu árigi tuágu ában gárada luágu alágan, mabáfutu gárada tugúya darí lun lasúbudirúniwa luágu jiláali lan gürígia ligía. ¹⁷Mebégitu gárada tugúya dan le wínwangili gürígia ligía, darí dan le jiláali. ¹⁸Ligía giñe láu lubei léserun jítaü ladügúwa furúmiñeti lidáradun Búngiu jáma lumútuniña. ¹⁹Subúdigüda lumúti Moisés sun lugúmadina lúrudu joun sun gürígia, lárigiñe, ába lanúgün gamísa funátu lúma lilímun isópo, ába ladúdüragüdüni lídan dúna lúma játa bágasu ñúbürigiña jáma gábara, ába labájichagunun lilíburuna lúrudu jáma giñe sun gürígia. ²⁰Ábati laríñagun joun. “Niján jítaü le achoúrurubalin lidáradun Búngiu júma.” ²¹Bajíguia lumútu giñe Moisés Lúban Búngiu lúma sún buri cátei le ayúsurubei lídan jájuduragun lun. ²²Según lúrudu ligía, jarúmagüdúwati sun líbe-ágei cátei láu jítaü, áni úati ferúdunawa lan figoú ánjein úa láwiyurun jítaü.

Lachíbuni loúnwen Crístu wafígoun

²³Busénwati lubei mejati ladágaragüdüniwa játa anímaalu lun larúmadawagüdün buri cátei le, sun líra, iyáwau rügúñein lun cátei le inárüni le siélubei, le ñí tubei Lúban Búngiu tímatisaatu, áni busénwati ladágaragüdüniwa jítaü le buídutimaati sügú láu játa anímaalu luágu cátei lánina siélu. ²⁴Mebéluti Crístu tídoun Lúban Búngiu tugúra to jadúga

wügüríña ya ubouágu, to meja tiyáwarügüboun Lúban Búngiu to tímatimaatu siélu, siélun méme lebélera, le ní lubei larúfudagua lúngua guetó ligíbugiñe Búngiu lun lafádirijan luágu wafúleisein. ²⁵ Belúti fádiri ínutimaati le jurú lídoun Fulásu Sándutimaati ában weíyaasu lídan irúmu lun ladágaragüdün jítaü le máma líta, ánjeinti Crístu, míchaagunti lúngua quei adágaragüdüni sarágu weíyaasu lun lachíbuni figoú. ²⁶ Lun jamúga ítara líña lan, gásu jamúga loúnwen sarágu weíyaasu lúmagiñe ladügün uboú. Masúseredunti ítara, lubáragiñe líra, dan le lagúnfuliruña lán buri dan, chúlúguaali Crístu ábanrügü weíyaasu, íchaagueina lúngua lun lagídaruni figoú. ²⁷ Ítara quei sun lan gürígia lúnti lan jóunwen ábanrügü weíyaasu, lárigiñeme ábame jagúserawagüdün, ²⁸ Ítara líña gíñe líchaagun Crístu lúngua ábanrügü weíyaasu lun lagídaruni jafígoun gürígia. Lachúlürüba wéyu lun lagíribudun Crístu uboúagun, mámaalime lun lagídaruni figoú liábin, liábinba lun lanúgüniña sun ja agúrabubalin liábin siélun lun jabíjini sun cátei lánina jasálbarun.

10

¹ Lilúrudun Moisés liyáwa rügüñein méja buri cátei buíti lé meja lúnbei lanúgüni Crístu joun gürígia, le lásiñerubei lúruđu íchiga joun. Ja lubeiti ayarafadubaña lun Búngiu lídaangiñe játa anímaalu le adágaragüdúwabei lun Búngiu según lilúrudun Moisés, lé buri adágaragüdúwabei ságü irúmu, siñáti meja jadáriruni jabuídurun le gumúti ítara. ² Lun jamúga gayára lan labuíduragüdüniña lúruđu le gumúti ligíbugiñe Búngiu, ába jamúga madügünjali lan adágaragüdüni buri le, lugúndun ja adügübalin, láu jamúga jarúmadun ában weíyaasu lídaangiñe jafígoun lun súnwandan, masándiragunjaña jamúga jóungua láu dúru luágu figoú. ³ Seríwiti adágaragüdüni buri le lun larítaguagüdüniña luágun jafígoun ságü irúmu, ⁴ quei siñá lubei lagídaruni játa bágasu lúma játa gábara figoú.

⁵ Ligía laríñagunbei Crístu lun Búngiu dan le lebélurunbei uboúagun.

Mabúseerúntibu adágaragüdüni ni anímaalu íchugúti bun, aráanserügütibu ában úgubu nun lun nedéregeruni bun.

⁶ Magúndaantibu láu buri jagudún anímaalu luágu latárü bun, ní buri láu adágaragüdüni lun ladáuragun figoú.

⁷ Ábati naríñagun. “Núbinjadina uboúagun lun nadúgüni bugúndan, Nubúngiute, ítara queísi búruwañu líña lan nuágu tídan Berérun.”

⁸ Furúmiñe, laríñaga luágu mabúseerun lan Búngiu, magúndan ligía, láu adágaragüdüni, ni jáu anímaalu íchugúti lun, ni anímaalu gudáwati luágu latárü, ni adágaragüdüni lun ladáuruni figoú, láu sun lán buri cátei le uágubei laríñaga Búngiu lídaangiñe Moisés joun gürígia lun jadúgüni. ⁹ Laríñaga Crístu lárigiñe. “Núbinjadina lun nadúgüni bugúndan, Búngiu.” Laníchigu líra, núbinjali Crístu uboúagun lun lagúmchaguagüdüni igáburi le ladágaragüdüniwa anímaalu, lun líchaagun lúngua lewéñegua. ¹⁰ Ligía lugúndanbei Búngiu, lun larúmadagüdüniwa ligíbugiñe láu loúnwen Jesucrístu ában weíyaasu lun sun dan luágu wafígoun.

¹¹ Sun fádirigu jurú, ságü wéyu jadúgüni buri ában méme adágaragüdüni, láu sun siñá lan lagídaruni adágaragüdüni ligía figoú. ¹² Ánjeinti Jesucrístu, ában rügüñein weíyaasu líchaagun lúngua luágu figoú lun sun dan, ábati lagíribudun siélun, ába lañúurun luegiñe loúnwenren Búngiu. ¹³ Níjein ní guetó agúrabaja líchuguniña Búngiu láganiñu lábugiñoun lubáfu. ¹⁴ Láu loúnwen ábanrügü weíyaasu, ába labuíduragüdüniña lánigu Búngiu, le gumúti, lun sun dan. ¹⁵ Chóuru lumúti gíñe Sífiri Sándu cátei méme ligía woun, lugúndun laríñaga le laríñagunbei Búngiu.

¹⁶ Darádu le lúnbei nadúgüni jáma lárigiñeme buri wéyu ligía, ítara lúba, líña laríñagun Búngiu.

Níchugubei nugúmadin tídoun janígi,

ábame nabúrüdüni jarítangunrugu.

¹⁷ Lárigiñe laríñaga.

Marítagundügúyaadináme luágu jafígoun ni luágu wuríbatí buri le jadúgübei.

¹⁸ Dan lubeítí le ferúdunawaali figoú lun sun dan, memégeirunwali ámu adágaragüdüni luágu figoú.

Lúnti wayárafadun lun Búngiu

¹⁹⁻²⁰ Ligía lubeítí nidújeñu, láu loúnwen Crístu luágu wafígoun, gayáraajali wayábin ligíbugiñe Búngiu manúfudeiga. Úaarú belú lun teréderuniwa lueí webélurun lídoun Fulásu le Sándutimáabei, le ñí lubei Búngiu, gidá lumutu Crístu belú tugúya láu loúnwen. Junrénti ában iserí úma woun lúmoun Búngiu, ában úma le anúgübalíwa lídoun íbágarí magúmchadítí. ²¹ Jesúsú wafádirínebei íñutimaatí tídan Lúban Búngiu siélu, ²² ligía lúnti lubeí wayárafadun lun Búngiu láu tarúma wanígi, lúma láu sun wafíñen derégüdagu luágu. Jarúmagüda láaru wanígi lun masándiragun wamá woúngua láu dúru luágu figoú lárígiñe lachibúniwa, badísejádiwa láu dúna jarúmatí. ²³ Ítara méme wamá derégüdagu lídan wafíñen, masáansiragúnga, lugúndun gayára lan weménigidun luágu Búngiu lun lagúnfuliruni lerérun lun líchuguni íbágarí magúmchadítí woun. ²⁴ Lúnti gíñe wáfaagun wideraguniña wíbirígu lun jínsíñejabu jamá, lúma lun jadúgüni le buídubei. ²⁵ Moún lumutí wafálaruni jémpulu jáni ja jéchubaña lun mídin jamá lídan wadámuridagun, wagía afíñetiña, le lúnbei wadúgüni, lun wíchugun gurásu joun wíbirígu, guetótíma láu aríja wamáni luágu yaráfaali lan luwéyurí Wabúreme Jesucrístu lun lagíríbudun uboúagun.

²⁶ Lugúndun ánjawa afígounja láu wíchuguni wanágan luágu Crístu lárígiñe wasúbudiruni luágu ligía rügúñein lan agídareí figoú, úaali ámu luwúyeri lun wasálbarun lídaangiñe wafígoun. ²⁷ Ában rügáali cáteí lun wagúrabajani, lun lagúseragüdüniwa Búngiu láu ában lanárime igáñi, ábame wagúnrichawagún jáu sun jíbiri láganiñu Búngiu lídan wátu gemetí. ²⁸ Dan le ladúraaguni ában gürígia lilúrudun Moisés, áni añájein bíama o úruwa gefeéntiña luágu, ába laríñagun lilúrudun Moisés luágu lúnti lan loúnwen gürígia ligía, magúdemejabutí lúrudu lun. ²⁹ Weíritimaatí súfuri le jadúnabei ja mebéresenbaña láu Liraú Búngiu, mebéresen jagía láu líta, anába jamef Sífiri Sándu le jínsíñejabubei joun. Líta Jesucrístu, ligía achoúrurubalin lídarádun Búngiu wáma, le adúgübalíwa jarúma ligíbugiñe. ³⁰ Subúdí wamúti ligáburí Wabúreme Búngiu le aríñagubei. “Áu le lúnbei labeíchaguniña gürígia, áu le lúnbei lafáyeigüdüniña luágu jafígoun.” Aríñagatí gíñe. “Nagúseragüdübaña numútuniña.” ³¹ ¡Fugiábu gürígia le uágunti láburuja ligáñi Búngiu le wínwanbei lun sun dan!

³² Jarítağa jumá luágu buri wéyu le sügújalíbei dán meja le jerésibirubalin larúgouna luágu Jesucrístu. Weírítí meja jasúfurirun lídoun meja dan ligía, áni awánda jumúti sun cáteí láu gurásu. ³³ Añájein jídaangiñe, anabúatiña, ouserúa jagía wuríba ligíbugiñe guríríguau ladúga jeíbugun lúma Crístu, jíbiri, súfurítíña ladúga gamádagua jamá jáma ja wuríbabaña ouserúniwa. ³⁴ Gudémejabutün meja joun ja furisunrugubaña, ásta láu ugúndani ígiraguagüdatín júngua lun lagídarún le júmabei juef, subúdiñu jumeín luágu níjein lan cáteí júma siélu le buítimaatí, le siñábei lagídarún juef. ³⁵ Guetótí, meféridira jumeín lubeítí jeménigi luágu Búngiu, lugúndun jerésibiruba lan ában oúnwenbun afáyeiragúlei siélu. ³⁶ Gagúraasun jumá, lun lárígiñeme lan jawánduni asúfuriruni queísí labúseerun Búngiu, gayára lámuga jerésibiruni le lúnbei líchuguni Búngiu jun, siélu. ³⁷ Taríñajare Lerérun Búngiu luágu lagíríbudun Crístu uboúagun.

Málújali ánjein ñúbin le lúnbei líabin, madárasarunbei sarágu dan.

³⁸ Le nerésibirubei queísí richáguatí nigíbugiñe, labágaríduba láu laffíñerun nuágu, líña laríñagun Búngiu.

Ánjein leféridira laffíñen, magúndaanbadina lúma.

³⁹ Wagía, mítaraanbádiwa quef gürígia ja eféridirubalin jafíñen luágu Búngiu, ába je-féridirun, wasígiruba láu sun wafíñen luágu daríme wounwen, belú támuga wawáni siélun.

Luáquti affñeni

11

¹ ¿Cáteigi affñenibei? Affñeni, achoúruruni le gumúti luágu wabjibe lan le wagúrabubei, lúma wachoúruruni le gumúti luágu nírein lán buri cátei láu sun marjijn wamáni. ² Niján luwúyeribei meja jaffñen jádaangiñe binádu wagúbürigu luágu Búngiu, ába lagúndaarun jáma.

³ Láu waffñen, wasúbudirei luágu Búngiu lan adúgübalin ubou lóurügü lerérun, le lubefti ubou le warjubei guetó, máma lídaangiñe cátei lé meja arijuabei ladúgüwa.

⁴ Láu laffñen Abél, dagágüda lumúti le labúseerubei Búngiu sügü láu le ladágaragüdübei Caín, ligía lerésibirunbalin Búngiu queisi richáguati, ába lerésibiruni ladágaragüdün lun. Láu sun lubefti jilá lan Abél, nijángua luwúyeri laffñen queisi jémpulu woun.

⁵ Láu laffñen Enóc, lanügüwa siélun moúnwenga, áni madárirúnwati lúgubu lugúndun barú lani meja Búngiu. Áni taríñajare Lerérun Búngiu luágu, luágu lubáragiñebei lán meja lanügün Enóc, gúndan lan Búngiu láu ya ubouágu. ⁶ Ánjeinti wagía, siñáti gúndan lan Búngiu wáu ánjein maffñen wabeí luágu, lugúndun lun wayárafadun lun, gásu waffñerun luágu níjein lan áni líchuguba jafáyeiruája ja áluajabalin.

⁷ Láu laffñen Noé, dan le lawísarunbalin Búngiu luágu ladágaruba lan ában oúnwenbun gúnran, láu sun marjijnajagili lan gúnran, ába ladúgüni le lubeíbei Búngiu, ába ladaragun ában oúnwenbun ugúnein lun lasálbarun jáu lufámilian. Arúfuda lumúti laffñen Noé oúnwenbun maffñeni le jawágubei jíbiri gürgía ubouágu. Ába lanügüni Búngiu Noé queisi ában wügüri richáguati lúma, luágu laffñen.

⁸ Láu laffñen Abrahám, dan le lagúarunbei Búngiu lun lun lígiruni lageíra lun lídin lídoun ámu fulásu le lúnbei láni lan, ába ladúgüni le lubeíbei Búngiu, ába láfuridun lageíragiñe, ibídínounga lun jalínounbei lan. ⁹ Ába laganouñ lídan iséri fulásu ligía, láu sun teréncha lan ñi, ladúga laffñen luágu lerérun Búngiu lun luágu líchugubei lan fulásu ligía lun. Laganouía tídan múna adügütu láu jára anímaalu, ligía méme giñe jadúgübei Isáac, le liraú, lúma Jacób, le libári, ladúga jalágaante lan fulásu ligía lúmagiñe Búngiu. ¹⁰ Adúga lumúti Abrahám sun líra ladúga agúrabaja lan lebélorun lídoun lubuídun ubúruyu siélu le ladúgübei Búngiu, le adúrarubei lun sun dan.

¹¹ Láu giñe taffñen Sára, láu sun meja weíyaaru tan lun tagáraüdü, resíbi tumúti ubáfu lúmagiñe Búngiu lun tagáraüdü, garaútu ában irájü ladúga taffñerun luágu lagúnfulirubei lan Búngiu le laríñagubei. ¹² Láu sun lubefti weíyaali lan Abrahám lun garaú lan, ñúbinti lun ganébaanfaangubei lan sarágu, quei warúguma ja siélubaña, quei giñe lágu buri ságoun le lárubei béya le siñábei labájüdü.

¹³ Jiláguatiña Abrahám jáma lirájüñü láu jaffñen luágu Búngiu, merésibirunga jameí sun le uágubei laríñaga Búngiu luágu líchugubei lan joun, subúdi jamúti luágu lídaanme lan dan le lúnbei líabin, lagúnfuliruba lan Búngiu láu lerérun, ába jagúndaaragun luágu. Subúdi jamúti luágu máma lan jageíra ubou le, jayábin rügüña ebéluja queisi teréncha ya. ¹⁴ Gürgía ja arítagubaña ítara, arúfuda jamúti luágu jáluaja mémeña lan ában ageíraü lun jageírame. ¹⁵ Lun jamúga fulásu lan le ñígiñe lubeí jáfurida ageíraübei le jáluajabei, gayárayati jamúga jagríbudun járigouñ ñíjin. ¹⁶ Ában buga ageíraü buítimaati jabúseerubei, ageíraü le siélubei. Ladúga níjein lan jarítagun luágu cátei le lánina siélu, ligía úa lubeí nibúsigari lan Búngiu lun jabúngiutebei lan, ába laráanserun ában fulásu joun siélu.

¹⁷ Dán meja le loúchagunbalin Búngiu Abrahám láu laríñagun lun lun láfaruni liraú le Isáac jilágubei lun ladágaragüdüni lun, affñe mémeti luágu Búngiu, rúguatí yebe lúngua lun ledéreggeruni liraú le ábanrügüti, ¹⁸ láu sun aríñagaali lán buga Búngiu lun luágu sarágubaña lan linébaanfaangu lídaangiñe Isáac. ¹⁹ Subúdirügü líñáali Abrahám luágu

gabáfu lan Búngiu ásta lun lásaaragüdüni Isáac lídaangiñe ouweni, áni ítagaraúyebe ladúgüni Búngiu láu líchuguni Isáac lárigoún lun Abrahám lubáragiñe yebe láfaruni.

²⁰ Afñeti Isáac luágu ladúgübei lán Búngiu le laríñagubei, ába laríñagun joun lirájüñü ja Jacób lúma Esaú luágu labínirubaña lan Búngiu lídan dan le lúnbei líabin. ²¹ Lau láfñen Jacób, dán meja le louwe lan, biní lumuti cáda ában jádaangiñe lirájüñü José, ába ladímurejan luágu luwefrigun Búngiu, ragúñu luágu lígiri lubádu. ²² Lau láfñen José, lubáragiñe loúnwen, arññagati luágu jáfuriduba lan Israelítagu Ejíptogiñe, arññaga ligía lun janúgüni lábu jáma dánme le jígiruni fulásu ligía.

²³ Lau jafñen lagúbürigu Moisés, dan le lagúriajounbei, ába jarámuduni luágu úrúwa játi, ladúga jarjín luágu buídumeraü lan, janúfudetiña lueí lúruđu le líchugubei urúei lun jañáradawagüdúniwa wügúriña irájüñü. ²⁴ Lau láfñen Moisés, dan le wügúrijali, májati lun lanügúniwa queísi tiraú liraú luruéite Ejípto, ²⁵ jímeín lumúti lasúfurirun jáma lánigu Búngiu lubáragiñe laganonún buíđu tídan lúban urúei, to lánina figoú. Subúdi lumúti luágu madúra lan luwúyeri ugúndani ligía sarágu dan. ²⁶ Rísitimaati lasándiragun lúngua láu lasúfurirun únabuni lueígiñe Cristu le lúnbei líabin, sügú láu laganonún lídan sun lirísín Ejípto, lugúndun luágu afáyeiruajau le lúnbei líchuguni Búngiu lun, líchigei larítagun. ²⁷ Lau láfñen Moisés luágu Búngiu, ába lígírini Ejípto, manúfudeiga lueí ligáñi urúei, reídeiti derégüdagu lídan larítagun camá jamuga arítagu líña lun Búngiu le marijínbei.

²⁸ Lau láfñen Moisés ladúgei féđu le gírubei páscua, ába loúnajan abájichaguei tubéneri jában Israelítagu láu jítaü lun dánme lan le lásügürün ánjeli le lánina ouweni, máfarun lámuga ni ában jaraú Israelítagu le íbugañaü. ²⁹ Ladúga jafñen Israelítagu luágu Búngiu, ába ladúgün Búngiu úma joun lídaangiñe dúna le gírubei Barána Funáti, lun gayára lan jásiügürün efbugeina camá jamuga múa le mábeiti. Dánti le jabúseerúnbei Ejíptona lun giñe jásiügürün quei jagía, ába ladaúrágun dúna jáu, ába jañáradagun.

³⁰ Lau jafñen Israelítagu luágu Búngiu, ába jamácharun geyégua láu lubárierun ubúruđu Jericó ságü bináafin luágu sédü wéyu, ába leíguadun loúba lubárierun ubúruđu ligía.

³¹ Afñetu Raháb, tó meja jóru, luágu Búngiu, ába tarámuduniña Israelítagu aríajatiña túbiñe. Ladúga cátei le, máfarúnwatu lídan le jáfarawagún magáambaditiña lun Búngiu lídan fulásu ligía.

³² ¿Cába ámu cátei naríñaga? Louguabei dan nun lun nabúriüjan luágu Gedeón, Bárac, Sansón, Jefte, Davíd, Samuél luma jawágu profétagu. ³³ Lau jafñen, siríguatiña buri fulásu, agúmadija jagía buíđu, íderagua lumútiña Búngiu queísi laríñaguni joun. Darú lumuti Búngiu jayúma liún jawei, ³⁴ ñegútiña wátu geméti janárimeti, séfutiña lueí jáfarawagún jilágubei táu efeín. Ába jeredun ja mérebaña, núbintiña lun gabáfubaña lan wuríburugu, ába jásiiragúniña jáganiñu. ³⁵ Níñanu wúrñiña ásaaragüdúwatiña jadújeñu lídaangiñe ouweni joun.

Añájein giñe jíbiri, jiláguatiña lídan luweírín asúfuriruni ladúga jamájan jíchuguni janágan luágun Búngiu lun jamúga gayáraabei lan jígirawagüdúniwa. Jímeín jamúti jáfarawagún jilágubei luágu líri Búngiu lun gayáraabei lan jásiügürün lídaangiñe ouweni lídoun ában íbágarí le buídutimaati siélu. ³⁶ Jíbiri, áfagatiña léjerajoun jáu, abeichúni, agúrúawagúni láu güríngüri, lúma adaürúni furísunrugu. ³⁷ Áfarawagúatiña láu dúbü, asíarajouatiña jamídan jámagua, ouchwagúatiña lun jígiruni Búngiu, áfarawagúatiña táu efeín, anúrjatiña jábiñegiñe, ába jeréderun efbugañajádügü, darúgu jóguua láurügü jára mudún lúma jára gábara, fugiábugu, láu idíjeri, ouserúa wuríba. ³⁸ Gürígia buri jagía ja ní lubei uboú madúna lumútiña, efbugañajádügü jáña buga lídan buri fulásu magefrawati, áraabu, lídan buri lilúlun dúbü weínamuti lúma lídan buri júyu le múaruguti. ³⁹ Sun jagía, láu sun buíđu lan afñeni le jawágubei ligíbugiñe Búngiu, merésibirun jamúti lé buga uágubei laríñaga Búngiu luágu líchugubei lan joun lumútuniña, ladúga machúllu lan

Wasálbaragüle ubouágun lídan jadáani, ⁴⁰ labúseerun Búngiu lun lídaanrügüba lan ában wáma jayábin lun jerésibiruni abíniruni le líchugubei Crístu joun lánigu.

12

Rúwamei warjín luágun Jesúsu

¹ Ítara líña meja jagáburidun sun jíbe gürígia jagía lídan dan le sügújalibe, láu jaffñen luágu Búngiu. Ában jémpulu jagía woun lun ítara méme lan wagáburi. Ibágarí le, queísigubeirügü ában eíbaaguni, gidáwamei sun le erédejabiliwa wawáriu, lúma figou le agúrágubalíwa, adúga wamei eíbaaguni le wabáragiñebeí láu gurásu, láu sun waffñen luágu Jesucrístu. ² Rúwamei warjín luágun Jesúsu, le ídaangiñebeí líabin waffñen, le gíñe abuíduragüdúbalin waffñen le gumúti. Súfuriti Jesúsu luágu guríwa, mebéresenga ligía láu nibúsigarídúna lan luwúyeri ouweni ligía, lugúndun subúdi lání luágu lásun lánme lasúfurirun, lagúndaaruba lan, ába lañúurun lueígiñe louñwenren Búngiu.

³ Lídan le jóuchawagúniwa, samína jumá lubeíti luágu lání Jesúsu jémpulu, luágu lawáanduni sarágu súfuri jámagiñe gafígountiña, ligía mabúchadalá lubeí juágu, máburujan ligíame jarúna. ⁴ Machúlügídün lúmoun ouweni lídan jageíndagun lúma figou queé ligía. ⁵ ¿Bulíei jumásan dimúrei le líchugubei Búngiu jun queísi lirájüñü? Láriñajare tídan Lerérun.

Niraiü, míchigabá mabájüdüni luágu abeichúni le líchugubei Babúreme Búngiu buágu lídan le wuríba lan bigáburi,

máburujan ligíame barúna dan le ladeínjan bun.

⁶ Lugúndun arúfudajati Búngiu joun ja jínsiñebaña lun, beíflumutiña gíñe ja lerésibirubaña queísi lirájüñü.

⁷ Áfaga jumeí abeichúni lúmagiñe Búngiu, lugúndun louseruñadün queísi lirájüñü. ¿Níjein funági isáani mabeichun lumúti lúguchi? ⁸ Ánjaün mabeichun lan Búngiu, queísi labeichuniña sun lisáanigu, mámarügü jíña lisáanigu ja tímatimaatiña, bástadi jugúya.

⁹ Dán meja le núbürigidiwa, beíjamutíwa meja wagúbürigu, áni inébetiña meja woun. Lúntimaati wagáambuni Wáguchi le siélubei, lun gabágaribadiwa lan. ¹⁰ Jabeichuniwa meja wagúbürigu ya ubouágu lúnrügü murúsun ibágarí le, lun jagúriajaniwa buídu según jabáfu, ánjeinti Búngiu, lun waságarun buíti lídaangiñe labeichúniwa, labeíchawa lun ladúgüniwa lun buídu wamá ítara queí buídu lan. ¹¹ Ináruni luágu úa lan abeichúni áuti wagúndaara lídan le werésibiruni, gárirügüti woun, ánjeinti ja afúrendeirubaña lídaangiñe abeichúni, íbjatiña ában ibágarí lánina ísuruni lúma darángilau lídaangiñe abeichúni ligía, lárigiñe.

Mamájara wamá lun Búngiu

¹² Rújuma lubeíti iséri érei lun jarúna le bucháalibe uágu lárigi asúfuriruni, lúma lún buri jigáchürügü le débíljalibe, ¹³ álujaja jumeí úma le surúbei. Mígira jumá lébuna chugéguau lídan úma lueí jeíguadun ja débiligiñabaña lídan jaffñen, íderaguariügü jumáña lun jóúdin jabáruaguouñ lídan jaffñen.

¹⁴ Jóúcha jumá lun lídan jumá darángilau jáma sun gürígia, abágarideina ában ibágarí le jarúmati, lugúndun le wíyebi igáburi, siñábei lachúlürün lúmoun Búngiu. ¹⁵ Touñigi jumá lueí njein lan ában jídaangiñe meíbugunti buídu lúma Búngiu, ábame lefériðiragüdüni jaffñen jíbiri queísi ladúgüni jíduru gifíti le abíñaragubalin sun le agúurubei luágu. ¹⁶ Úa la ni ában jídaangiñe agámariduti mamárieidunga, míchugun ligíame mebéreseni luágu cátei le lánina Búngiu. Ligía cátei le meja ladúgübei Esaú, ába lalúguruni lirícha queísi íbugañaü luágu ában asíedu eígini. ¹⁷ Subúsiti jun luágu lárigiñe lán buga ladúgüni, buséngili yebe lerésibiruni labínirun lúguchi queísi íbugañaü, mabjín láali, siñáali lasáansiraguni lúguchi le adúga lálalibe láu sun layájuañan Esaú láu igárigu.

¹⁸ Jugúya, mayárafaduntün lun cátei le gayáraabei jasándiruni queísi lasúseredun joun Israelítagu dán meja le jerésibiruni binádu lidáradun Búngiu jáma. Yaráfatiña meja lun wúbü le Sión, le durúngubei láu wátu geméti, le ñi lubei níjein lán meja lubúriga lúma luribouga, ¹⁹ magáambun jumúti gíñe lamúri fídu lúma lumálali Búngiu le adímurejabei joun. Ja agáambubalin umálali ligía, ayúmuruatiña lun jebé lan ladímurejan joun. ²⁰ Jadúgünbalin líra lugúndun luweírín janúfude lueí lagúmadijan Búngiu, ladúga laríña-jare. “Le íchuguti lugúdi luágu wúbü, afarúalá jilágubei láu dúbü o táu lan ában efeín, íbini ában lan anímaalu”, ladúga fulásu ligía, níjein Búngiu ñi. ²¹ Weíríti lanúfunejabu cátei le jaríjubei, darí lun laríñagun Moisés guánarügü. “Nadádagaruña láu anúfudei.”

²² Ánjein jugúya, lábugiñe iséri darádu, núbinjadün lun cátei weíríti sügú láu le únbei jayábin já buga lábugiñebaña binádu darádu. Yaráfaadün lun wúbü Sión le siélubei, lílanaadün lubúrugute Búngiu le wínwanbei, le ában Jerusalén le siélubei, le ñi lubei jagánawa sun ánjeligu, ja ájuduragubaña lun jíchugun uweíríguni lun Búngiu. ²³ Lídaañadün jadámurin lirájüñü Búngiu ja búríwañubaña íri siélu. Lun Búngiu le agúseragüdübañiña sun güriñia jayárafada, lídaañadün ában jáma ja ouwegubaña ja buídubaña igáburi ubouágu, áni buíngüda lumúti Búngiu lubuídun jagáburi siélu. ²⁴ Núbinjadün lun Jesúsu, le búyei lun iséri darádu, bajíwaguadün láu líta Jesúsu lun lachibúniwa jíffigoun, le ábanbei cátei weírítimaati sügú láu le labúseerúbei líta Abél—lun lagúseragüdúniwa Caín luágu láfaruni Abél jilágubei.

²⁵ Ligía mamájara jumá lubei jagáambuni Búngiu. Meséfujaña ligía meja Israelítagu ja mebéresenbaña láu Búngiu, dán buri meja lerérunbei joun lídaangiñe Moisés, le ábanbei lílana ubou, gúbume siñá lan weséfurun ánjein wíchiga wanágan luágun Búngiu lídan le ladímurejan woun lídaangiñe Liraú, le lílana siélu. ²⁶ Jíngígüda lumúti meja lumálali Búngiu ubou lídan dan ligía, ánjeinti guetó laríñajare. “Nánjingichagüdübeiya mámarügü ubou, ásta gíñe siélu.” ²⁷ Dan le laríñagun “nánjingichagüdübeiya”, míni lan luágu lagídarába lán buri cátei le mártigüdünbei luágu ébuu derébuguti, ábame leréderun le siñábei lánjingichúniwa. ²⁸ Arúejani le líchugubei Búngiu woun siñáti lánjingichún. Rúwama lubeíti eteíngiruni lun Búngiu luágu líra, judúga wamá lun láu inébesi lúma gúnfuli queísi labúseerun, ²⁹ lugúndun lagúmchaguagüdübei Wabúngiute sun cátei le mabuídunti queísi lagúmchaguagüdün wátu geméti cátei.

13

Ída lúba lan wagúndaaragüdüni Búngiu

¹ Jínsiñegua méme jumá jumagua queísi idújeñu lueígiñe Jesucrístu. ² Mabúlieida jumei lun jebélaagüdüniña achúlúrütíña júbiñoun láu ugúndani. Sarágu jáña güriñia, rújaña ubáraü joun ánjeligu láu jadúgüni cátei le, ibídiñoun joun.

³ Jarítagua jumá jawágu adaürítíña, queísigubeirügü jamúga gíñe jadaüríña lan jáma. Jarítagua jumá jawágu ja ouserúbaña wuríba, quei níjein lan gíñe ában úgubu juágu le gayáraati lasúfurirun.

⁴ Buíti cátei lun jagámaridun, áni lúnti jumagua jumá darí lun jóunwen. Ja asáansijatiña jámari lagúseragüdübaña Búngiu, lagúseragüdübaña gíñe ja adúgübaña salúfuri.

⁵ Míchiga jumei jínsiñejabu luágun seínsu, gúnda jumá láu le júmati, lugúndun líchugubei Búngiu le jemegeirubei jun. Aríñagaali. “Natoúnigirubadibu, mígirun nábuma.” ⁶ Gayáraati lubeíti waríñagun láu afñeni.

Nabúreme Búngiu íderagubalina, manúfudebadina.

Siñáti jadúgün güriñia ni cáta náu ánjeingubeirügü busén Búngiu.

⁷ Jarítagua jumá jawágun ja arúfudajañabaña jun, ja apúrichijabalin ugánu láni Búngiu jun, samína jumá luágu buíti le núbinjalíbei lídaangiñe jabágari, falájumei jémpulu le láni jafñen.

⁸ Masáansiragunti ligáburu Jesucrístu, ligía meme gúñaarü, ugúñe, lúma súnwandan. ⁹ Mafálara jumá arúfudajani le ámuñegueinarügüti lueí le larúfudajabei Jesúsú. Resíbitá wawáni érei lúmagiñe línsiñejabu Búngiu, siñáti teresibirun wawáni ni cáta lúmagiñe lúruđu buri luáguti eígini. Igáburu ligía, miábinti lun ladúgüba lan buíti joun ja afálarubalin.

¹⁰ Wagía affñetiña luágu Crístu, ibjatiwa giñe ában latárü, le gurúwabei le uágubei loúwe Crístu luágu wafígoun. Ja asígirubaña láu binádu jagáburu jurü, siñáti gafánran jamá lídan le líchugubei loúnwen Crístu. ¹¹ Jafádirin jurü le ínútimaabei belúgüda lumúti játa anímaalu lídoun Fulásu Sándutimaati quei adágaragüdüni luágu figou, jágubu anímaalugu jagía, bougudi lueí ubúruđu lágudúa. ¹² Ítara líña giñe jiláti Jesúsú bougudi lueí ubúruđu lun lachíbuni wafígoun láu líta guánarügü. ¹³ Queímoun lubeíti lun Jesúsú, bougudin lueí fulásu, bougudin lueí binádu igáburu, asúfurireína únabuni luágu líri queísi lasúfurirun wawágu. ¹⁴ Lídan ubou le, úati ni ában fulásu wáma le adúraruti lun sun dan, wáluajañein ubúruđu le lúnbei ñjijnbadiwa lan lárigiñe ibágari le. ¹⁵ Ligía lúnti lubeí wíchugun eteíngiruni lun Búngiu súnwandan lídaangiñe Jesucrístu le wafádiriñebei. Eteíngiruni ligía, ligía luwýeribeí adágaragüdüni le labúseerúbei Búngiu wámagiñe. ¡Rúwama lubeíti uweíriguni lun láu wayúma! ¹⁶ Mabúlieida jumá jadúgüni le buídubei, lúma lun jafánreinruni júmati jádan ja mabíjinbaña, lugúndun niján buri cátei le áubei lagúndaara Búngiu.

¹⁷ Gagáambadi jumá joun ja arúfudajabaña jun, derégegua jumá júngua joun, lugúndun jagía oúnigirubarun juwáni, áni quei jasúbudiruni, gásu jagúserun ligíbugiñe Búngiu luágu jatoúnigirunün. Joucha jumá lun medéragüdüni jumáni jawádigimari, lugúndun mabuídunbei jamúga giñe líra jun.

¹⁸ Ayúmuragua jumá lun Búngiu wawágu, chouru wamúti luágu darángilañu líña lan warítagn quei busén wabef buíđu lan wouserun lídan sun cátei. ¹⁹ Amúriajatina júma lun jayúmuragun lun Búngiu lúnya gayáraabei lan nídin aríjaün madíse.

Abíniruni buri lúma lagúmujuún buri mábugüi

²⁰ Ayúmuraguatina lun Búngiu, le íchugubalin darángilaü, le giñe ásaraagüdübalin Wabúreme Jesucrístu lídaangiñe ouweni, lun líchuguni sun ubáfu le busénwabei jun, lun jadúgüni lugúndan. Wabúreme Jesucrístu ában le atouúnigiruti lumútuniña buíđu queísi ában atouúnigiruti mudún. Ítara líña ladúga líta, le achóururubalin lidáradun Búngiu, le adúrarubei lun sun dan, wáma. ²¹ Ayúmuraguatina giñe lun Búngiu lun luwádigimaridun jídan, lídaangiñe Jesucrístu, lun gayáraabei lan jíchugun ugúndani lun. ¡Uweíriguni lun Crístu lun sun dan! Ítaralá.

²² Nidújeñu, ayúmuraguatina jun lun jeresibiruni dimúrei le abúrija náalibeí jun tídan murúsun gárada to. ²³ Niján ában ugánu jun— ¡furíjali wadúje Timotéo furísunrugugiñe! Ánjein ñúbin yájoun, nanúgübei númagua dánme le nídin aríjaün.

²⁴ Mábuga níña joun sun tábutigu ligílisi lúma joun sun jíbiri wadújeñu lídan wafíñen. Mábuga jáña wadújeñu ja Itáliano jun.

²⁵ Binílaün Búngiu sun jugúya, ítaralá.

LIGÁRADAN SANTIÁGO

Labúrújan Santiágo joun tílana liglísi buri ja chagágubaña

¹ Áu Santiágo, esériwiduti lun Búngiu lúma lun Wabúreme Jesucrístu áu, mábuga níña joun ja jadúgawagubaña dúusu lirájüñü Israél ja chagágubaña lídan sun uboú.

Subúdi le ñúbinbei lúmagiñe Búngiu

² Nidújeñu, lúnti gúndan jumá dan le jasúfurirun furúmieguarügü oúchawagúni.

³ Subúdi jumáali luágu dan lan le louchawagún jaffñen, furéndeitimaatün gagúraasuni.

⁴ Ítara líña lubeíti, maríbadalá jarítangun luegiñe jóuchawagún, lubáragiñe líra, ígira jumeí oúchawagúni ligía lun íchugun lánwoun jugúraasun, lun loustarun lubuídun jigáburu, úouga mégeiti luágu.

⁵ Dan le ibídiñe lan jun cába lan jadúga lídan ában lénreengunga, amúriaja jumá lúma Búngiu, ábame lasúbudiragüdüni jun cába lan jadúga. Rúlumuti Búngiu subúdi le jamúriajan lánigu lúma joun, quei jamúriajani, maríngunga ni cáta joun luágu.

⁶ Lúnti jamúriajan láu affñeni luágu íchugubei lan Búngiu le jemegeirubei jun, máma láu liloúguan affñeni, le lougua taffñen, ítara líña quei ában lugúdi barána le lanúgübei garábali luegiñe ában oúbaü lun luágun ámu. ⁷ Gürígia le medéraaguagüdünti laffñen, marítagonalá luágu libjuba lan ni cáta lúmagiñe Wabúreme. ⁸ Lugúndun gürígia le affñe líñabei, maffñen, siñátí lasígirun ában igáburu le derégüdaguati luágu ni cáta.

⁹ Idújei le gudémebei, majírudalá luágu, gúndaalá luágu írísini le siélubei lubá. ¹⁰ Léti idújei le risíbei, manáangualá lúngua luágu, gúndaalá luágu laráfuduni Búngiu lun luágu mebégü lan lírísini lun ni cáta lídan cátei le lánina siélu. Lugúndun ítara líña risiti quei lufúlurin jíduru, le siñábei ladúrarun. ¹¹ Dan le láfuridun wéyu, ába lásüdüñ sarágu, ába lásáürün jíduru, ába leíguadun lufúlurin, ába lagúmuchun lubuídunmeraü. Ítara lúba gíñe risiti. lachúlürüba wéyu lun louñwen, ábame lígiruni sun láfaagun luágu seínsu.

Oúchawagúni lúma adúndeijóuni lun wuríbani

¹² Gúndaati gürígia le awándubalin oúchawagúni láu gurásu, lugúndun dánme le láfuridun láu buídu, libjubei ibágari magúmuchaditi le uágubei larínaga Búngiu luágu íchugubei lan joun ja jínsiñejabúbaña lun, queisi ában afáyeiruajáü, queisi ában rídi. ¹³ Dan le lebélorun lun ában gürígia lun ladúgün cátei wuríbati, marítagonalá luágu Búngiu lan ádarubalin cátei ligía lídoun, lugúndun mebéluti lídoun Búngiu lun ladúgün wuríbani, máda lumúti gíñe jádoun gürígia lun jadúgüni. ¹⁴ Lubáragiñe líra, dan le lacháwajani luríban layúmajan mútu, ligía láburujan lídoun ladúgün le wuríbabei. ¹⁵ Lídaangiñe buri luríban ayúmajani le, liábin figoú, ában ibágari lánina figoú barúti ouweni.

¹⁶ Nidújeñu jínsiñetiña nun, mayéedagua jumá júngua arítagua luágu lúmagiñe lan Búngiu liábin wuríbani. ¹⁷ Lubáragiñe líra, sun buíti le íchugübei woun, le úabei mégeiti luágu, lúmagiñe Búngiu le adúgübalin lilámpuna siélu liábin. Búngiu súnwandan ligía méme lan, úati sáansiguau lídan quei lilámpuna siélu le gabúlubudadíbei. ¹⁸ Ligía lugúndaabei lun ladúgüniwa lirájüñüme láu wafíñerun luágu lerérun le inárünibe, lun ítara wamá quei furúmiñeti alúbajani le íchugúti lun Búngiu lídaangiñe buri cátei le ladúgübei.

Ligáburu agúñfuliruni lúma Búngiu le áubei lagúndaara

¹⁹ Ligía lubeíti, nidújeñu jínsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagáñidun, ²⁰ lugúndun gürígia le gáñibe, madúgün lumúti le áubei lagúndaara Búngiu. ²¹ Ígira jumeí lubeíti sun iwíyeni

lúma luríban igáburí le jídaangilibei, resíbi jumeí ugánu le bunáwaalibei tídan janígí láu únabuni, lugúndun gabáfuti ugánu ligía lun lasálbarunun juwáni.

²² Adúga jumeí le tariñagubei Lerérun Búngiu, máma lun agáambarügü jumáni. Ánjein jaritagua jubei luágu buídurügü lan lúnrügü jagáambuni Lerérun Búngiu, jeyéedaguña júngua. ²³ Le agáambarügübalin, madúgün lumúti le lubeíbei, ítara líña quei ában güriógia le aríagubei lúngua tídan ában isúbusein. ²⁴ Aríja lumúti ída líña lan, áni quei lídin, ítara labúlieiduni ída líña lán buga. ²⁵ Ánjeinti güriógia le jéchubei atúriajei Lerérun Búngiu le úabei mégeiti lídan, áni furáangugüda láwa lueígiñe figoú, mabúlieidun lubeí le lubeíbei, adúga lumúti le lariñagubei Lerérun Búngiu áni gúndaati le tímatimaati.

²⁶ Güriógia le jarítagubei luágu gúnfuli lan lúma Búngiu áni siñá lumutu líñeñe erédera, leyéedaguña lúngua áni úati ju lan ligáburí lagúnfulirun lun ni cáta. ²⁷ Níjan agúnfuliruni le jarúmabei, le áubei lagúndaara Wáguchi Búngiu. lun wíderaguniña magúbürigujaaña jáma wúríña ja jiláaña úmari lídan jadíjeri, lúma lun madáseirun wamá láu burí cátei wuríbati le láni uboú le.

2

Lúnti ában lan láu janúgún sun güriógia

¹ Nidújeñu, queísi jugúya lan güriógia ja afíñebaña luágu Wabúreme Jesucrístu le weírígubei, moún lumuti ámu lan janúgún ában güriógia jaweí jíbiri. ² Queí burí jamúga, lun jamúga lebélorun ában wügúri lídoun jadámurin láu bágü gólu túma anáanguni fínutu, belú ligía gñe ában gudémeti táu anáanguni juchécheeru, ³ ánjaün eténira lun le fínubei anáangun buídu, lun jaríñagun lun. “Nurúba ya lídan ubáraü buíti”, jaríñaga lun le gudémebei. “Amúri, reídeibá rára, o ñurúba ya múarugu”, ⁴ janúgüña ában güriógia ámu lueí le ában, áni jagúseragüdúña láu luríban arítaguni.

⁵ Nidújeñu jínsiñetiña nun, agáamba jumeí cátei le. anúadaja láaña Búngiu ja gudémebaña lídan uboú le lun rísi jamá lídan jafñen, lun gñe jerésibiruni arúejani le uágubei lariñaga Búngiu joun ja jínsiñejabúbaña lun luágu líchugubei lan joun queísi jalágaante.

⁶ Ánjeinti jugúya, rújumutiña gudémetiña lídoun busíganu. ¿Máma funági rísitiña ja wuríbabei jóuserunú, áni barújamaün adúruujeina ligíbugiñoun lúrudu? ⁷ ¿Máma jagía adímurejabaña wuríba luágu líri Crístu, le inébebei jun, le únbei jedéregeragua júngua?

⁸ Ánjein inárüni lubeí luágu gúnfuli jumáni líñun-ágei lúrudu queísi tariñaguni Lerérun Búngiu. “Jínsiñelá güriógia bíledi bun quei bínsiñegua búngua”, buíti jadúga. ⁹ Ánjein máma lubeí ában láu janúgüniña sun güriógia, jadúgüña figoú, dúrúgua jumúti lílúrudun Búngiu. ¹⁰ Lugúndun ánjein agúnfulira ában güriógia láu sun lúrudu, ígira lagúnfulirun ában lídaangiñe, gadúnrunti luágu ladúraaguni sun lugúmadin lúrudu. ¹¹ Lugúndun Búngiu méme le aríñagubei. “Madúgabá salúfuri”, aríñagati giñe. “Máfarajabá.” Ánjein lubeíti madúgün güriógia salúfuri, áni áfarajati, mídinti láu le lubeíbei lúrudu. ¹² Jugúya, lúnti jadímurejan, agáburida jugúyame queísi lúntiña jagúserawagüdún láu lúrudu le furáangugüdbaliwa lueí lubáfu figoú. ¹³ Ja magúdemejabubaña joun ámu, magúdemejabubei gñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáani agúseruni.

Afíñeni lúma wadágimanu

¹⁴ Nidújeñu, ¿cásan ju lan lariñagun güriógia luágu afíñe lan luágu Crístu ánjein madúgún ni cáta lun larúfuduni? ¿Gayáraati funági lasálbaruni afíñeni ligía? ¹⁵ Queí jamúga guetó, níjein ában idújei wügúri o wúri emégeiruti anáanguni lúma eígni, ¹⁶ lariñaga ában jídaangiñe lun. “Buídulá lídin bun, darúguabá bougua, jou amúrúme,” áni míchu lumúti le lemégeirubei lun, ¿cági ju lan líra? ¹⁷ Ítara líña lasúseredun lúma afíñeni. ánjein marúfudun jamá güriógia láu cátei le jadúgübei, afíñeni lábuguarügü, ítara líña quei ában cátei jiláali.

¹⁸ Fágua njeinbei aríñaguti. “Amúrú affñetibu, áu adúga numúti le buídubei.” Áu Santiágo aríñagatina lun idújei ligía. “Arúfudabefti baffñen nun bougudin luef buíti le badúgübei, narúfudeime nafñen bun láu buíti le nadúgübei.” ¹⁹ Affñetibu luágu ában rügüñein lan Búngiu, buíti badúga, affñetiña gñe máfianu luágu líra, adádagara jagía láu anúfudei luef. ²⁰ ¿Májatibu baffñerun, ibídiougua táu amúrú le, luágu jiláñu líña lan lafñen gürgía ánjein marúfudun lan láu le ladúgübei? ²¹ Resíbi lumúti Búngiu Abrahám, le binádu wáguchi, queísi richáguati ligíbugiñe luágu le ladúgübei dan le lánjarun lún yebe láfaruni Isáac le liraú jilágubei queísi adágaragüdüni lun Búngiu. ²² Aríja báali luágu arúfuda láni Abrahám lafñen láu cátei le ladúgübei, áni núbinti lafñen lun dayárubei lan láu cátei le ladúgübei. ²³ Ítara líña lagúnfulirun le bürúwañubei tídan Lerérun Búngiu. “Affñeti Abrahám luágu Búngiu, áni luágu lafñen, ába lerésibiruni Búngiu queísi wügúri richáguati ligíbugiñe.” Áni aríñawagúati luágu Abrahám, “lumáda Búngiu.”

²⁴ Aríja jumáli lubefti, luágu resíbi láni gñe Búngiu wügúri luágu buíti le ladúgübei, úara lúma lafñen, áni mámarügü luágu lafñen. ²⁵ Ligía méme meja asúseredubei tun Raháb, to jóru lídan dan le sügújalibe. resíbi lumútu Búngiu queísi richáguatu ligíbugiñe dán meja le tarúfuduni taffñen luágu láu cátei le tadúgübei—safá tumútiña lounagülegu Josué, ába tíderaguniña lun jagíribudun lídaangiñe ámu úma. ²⁶ Ítara quei jiláñu líña lan úgubu ánjein úa tubeí uwáni lídan, jiláñu líña gñe jaffñen ánjein marúfudun jumá láu cátei buíti le jadúgübei.

3

Lúnti wabúgurunun wañéñe wayúmullugu

¹ Nidújeñu, moún lumuti añájein lan sarágu jídan ja adáagutiña jóungua arúfudajatiñame lánina Lerérun Búngiu lugúndun subúdi jumáli luágu wagía lan le arúfudajabei, derégüdatimaabei lan wagúserawagüdún. ² Sun wagía adúgatiwa cátei charáti, ánjein njein lubeí ában gürgía madúgünti ni murúsun charáti lídan le laríñagubei, ában wügúri buíti le gumúti ligía, le gñe gayáraabei labúguruni sun lúgubu. ³ Dan le wagúrúni jayúma anímaalugu lun jagáambuniwa, gayáraati wabúguruni sun jágubu. ⁴ Aríja jumóun buri gñe ugúnein, láu sún buri weínamu tan áni jéreburi garábali le ádajabarun, abúgura lumútu abúguruti láu ában liraúraü simúnu le ñíjin lumúti labúseera. ⁵ Ítara líña gñe lasúseredun lúma wayúma, ában cátei núraúraüti, áni gayáraati ladúgün sarágu buri cátei weínamuti. ¡Láu murúsun wátu geméti, gayáraati lágudún ában oúnwenbun áraabu! ⁶ Ítara líña wayúma quei ában wátu geméti. Gayáraati wadúgün sarágu wuríbani láu, gayáraati lagádeiruni sun le wagiabei. Gayáraati líchuguniwa lídoun wuríbani lídan sun wabágari, Máfia guánarü lébunabei sun le. ⁷ Gayáraati lagídaruni wügúri jagáñi sun jawúyeri anímaalugu gáñitiña—dunúru, jéwe, jáma anímaalugu baránajana—áni adúga láali. ⁸ Úati ni ában lun gayára lan lagídaruni ligáñi wayúma. Ában wuríbati ligía le mígraguagüdünbei lúngua, áni buin líña láu peisini le gáfarajati. ⁹ Láu méme wayúma wadímureja buíti luágu Wáguchi Búngiu, láu gñe wínaraguaña gürgía ja ladúga Búngiu lenége. ¹⁰ Lídaangiñe méme ában iyúmaü láfurida dimúrei buíti lúma ínaraguni. Nidújeñu, moún lumuti ítara lan cátei le. ¹¹ ¿Gayáraati funági láfuridun dúna bímeti lúma dúna básuati lídaangiñe méme ában? Siñáti. ¹² ¿Gayáraatisan tagíndun ában tídibu figi fáluma, ódi gayáraati tagíndun tídibu beíbei fígi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibeí

¹³ Ánjein njein lubeí ában chu táu jídan, gunfaráanda ligía, arúfudaleí láu lubuídun loúserun, láu únabugubuni le líchugubei lisúbudin lun. ¹⁴ Ánjein njein lubeí gimúgüi tídan janígi, áni jadúgüni cátei láu jarítagun juágun guánarügü, moún lumútiti janáangun

júngua luágu jisúbudin, lugúndun iyéeni líra. ¹⁵Máma niján luwúyeri subúdi le níúbinbei lúmagiñe Búngiu, ában subúdi le lánina ubouú líra, le lánina jasáminan gürígia, le lání méme Máfia. ¹⁶Lugúndun le ní lumuti gimúgäu lúma marítawaguni jawágun ámu, níjein chagáguäu ní lúma sun luwúyeri wuríbaní. ¹⁷Ánjaña ja gámabalin subúdi le lúmagiñebei Búngiu, furúmiñe níjein ában ibágari jarúmati jawágu, gálumatiña, areidatiña, gagáambaditiña, gudémejabutiña, adúga jamúti le buídubei, ában lábu janúgüniña sun gürígia, furáangutiña. ¹⁸Ja áluajabalin darángiläu, bunáguatiña iläu lun lalúbajouñiwa ában ibágari le richáguati jádan, lúma jádan ámu.

4

Gamádaguaü lúma ubouú

¹¿Cá buri ueígiñe jabúseera jawúribujan, lúma jageíndagun? Ladúga buri lagúbüri ayúmajani le jídaanbei súnwandan. ²Buséntün som cátei, queíti siñá jumani ibíja, ába jáfarajan. Gimúgatün luágu som cátei, queíti siñá jumani ibíja, ába jageíndagun. Mibíjin jumúti le jabúseerúbei lugúndun mamúriajan jumáni lúma Búngiu. ³Ánjein jamúriaja, mibíjin jumúti lugúndun luríban jamúriajani, jabúseeruni lun jagástaruni luágu lagúbüri jugúndan. ⁴¿Gürígia múaraantiña! ¿Ibídíñetsan jun luágu ánjein lan gamádagua jubef lúma ubouú, jáganiñein lan Búngiu? ⁵¿Jarítaguatúnsan luágu mála lan le tariñagubei Lerérun Búngiu luágu buri cátei le? ¿Jarítaguatün funági luágu Espíritu lan le lagánawagüdübei Búngiu wádan ában lan espíritu le lánina gimúgäu? Uá. ⁶Íderagua lumútiwa Búngiu láu lareíni, láu líchuguni ubáfu woun lun wáfaruni gimúgäu le wádaanbei jilágubei. Tariñajare Lerérun Búngiu. “Rúlumuti Búngiu lanágan jawágun ja barúguabaña jóungua, áni íderagua lumútiña ja únabugubaña, láu lareíni.” ⁷Rúgua jumá júngua lábuginoun leréreejan Búngiu, rára jumá derégüdagu láu lubáfu Búngiu, mabáfu lámuga Máfia juágu, ábame lanúrajan jueí. ⁸Yaráfa jumá lun Búngiu, ábame gíñe layárafadun jun. Jugúya le busénbei jesériwidun lun Búngiu lúma lun ubouú, gáfígounjadün, ítara líña lubeíti, jarúmagüda jumeí jigáburí túma gíñe janígi. ⁹Lídan le jayárafadun lun Búngiu, aságüríja jumá luágu jifígoun láu águiräu. Gáritá janígi luágu luríban jigáburí lúma Búngiu, sáansigualá jugúndan lun írúni luágu jifígoun. ¹⁰Únabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹Nidújeñu, madímureja jumá wuríba jawágu jibirigu. Le adímurejati wuríba luágu lidúje, o ladárirun lan lidúnrun, ladímurejaña wuríba luágu lilúrudun Crístu le aríñagubei luágu moun lání ladúgüniwa, áni ladáriruña mégeiti luágu. Ánjein jadúga líra lubáragiñe jadúgüni le lubeíbei lúrudu, jíchaagüña júngua queísi agúseragüdüti. ¹²Ában rügüñein agúseragüdüti, le íchugubalin lúrudu lígia, le Crístubei méme, lérügü gabáfubei lun lasálbajan o lun lagúnrinchagun. Ánjein bugúya, ¿cátabuñadífubi lun badárirun lidúnrun ámu?

Machouúrurunwalá luágu jarúga

¹³Guetó, agáamba jumeí cátei le, jugúya le aríñagubei. “Ugúñe o jarúga wouídiba lídan ítaga fulásu, ábame webélujan ní ában írúmu, wawádigimaríbei waseínsun lun wabíjin lánwoun.” ¹⁴¿Ída líñasan jasúbuseruni cába lan asúsereda jarúga? ¿Cáteiñeigi jibágari? Ítara líña quei jeméereedu le asálriragubei luágu murúsun dan, lárigiñe ába lagúmuchagun. ¹⁵Aríñagarügütün jamúga. “Ánjein busén Búngiu, wabágariduba, ábame wadúgüni le o líra.” ¹⁶Ánjeinti jugúya, jadímurejan láu pántaü luágu cátei le jarítagubei lun jadúgüni, áni sun pántaü le, mabuídunti. ¹⁷Afñetina luágu ánja jumá lun sun le, wel, le subúdíjabubei lun ladúgün buíti áni madúgün lumúti, ladúgüña figouú.

5

Ewéridijani joun rísitiña

¹Agáamba jumeí cátei le, jugúya rísitiña le wuríbabei igáburi! Chúlújali óra lun jayájua-jan, wágua jugúyame luágu buri lamíselu le lúnbei jasúfuriruni. ²Ñaláli buri jirísín, jou jamáaru jamútiri janáangun to finuboun. ³Gájújali jigólun lúma jáni pláta, áni láu cátei méme le, aríjúati jarúgüen, ábame jagúnrinchawagún lueígiñe camá jamuga láu wátu geméti. Oúndaraguaadün sarágu irísini lídoun buri lagúmujoún dan le. ⁴¿Ánti fáyeiti le míchu jubel joun ja ñadágimeinbalin jichári? Ánjein jamúga gayáraati, lagújaña jamúga fáyeiti ligía luágu jidúnrun, agáamba láali Búngiu jamúriajan ñadágimeintiña jagía juágu. ⁵Rúguaadün júngua lun ában ibágari lánina wéndeí lúma ugúndani ya ubouágu, íbja jumáali sun le jabúseerúbei quei jadíbunedagüdúniwa anímaalu lubá jáfarun, yaráfaali gíñe jagúnrinchawagún sun jugúya. ⁶Rújadiün jadúnrun ja madúnrunbaña, áfaragua jumáña jilágubei, madúgünga jagía ni cáta le lébuna jáfaraguniña.

Gurásu lúma ayúmuraguni lun Búngiu

⁷Ligía lubeíti, nidújeñu, gagúraasun jumá daríme liábin Wabúreme Jesúsú. Ábunaguti le agúrabubei ladúgün alúbajani buíti, lúnti lagúrabajani furúmiñeti júya luágun líla linádirigu lúma lagúmujoún júya luágun lun láfunadun. ⁸Gagúraasun jumá gíñe, máburujan ligíame jarúna, lugúndun madíseeli liábin Wabúreme. ⁹Nidújeñu, mequejera jumá jawágu jidújeñu lueígiñe Jesucristu, magúserawagüdún jumámuga, yaráfaali lidáani Búngiu lun lagúseragüdün. ¹⁰Nidújeñu, barú jumaña profétagu já meja adímurejabaña lídan líri Wabúreme queísi ában jémpulu lánina gurásu luágu asúfuriruni. ¹¹Wagía, barú wamutiña ja awándubalin asúfuriruni queísi gürígia gúndaatiña. Agáambaadün luágu lugúraasun Job, áni subúdi jumáali gíñe ída líña lan fuleísei láni Búngiu lagúmujoún óra, lugúndun areídati Búngiu, gudémejabu.

¹²Louígiñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachoururuni jerérun. Dánme le jaríñagun “ánja”, lun ánja lan, dánme gíñe le jaríñagun “uá”, lun gíñe uá lan, míchugun lámuga Búngiu jidúnrun.

¹³Ánjein lasúfuriruña lubeí ában jídaangiñe, lúnti layúmuragun lun Búngiu. ¹⁴Ánjein sándiñein lubeí, lúnti lagúarun joun tábutigu liglisi lun jayúmuragun lun Búngiu luágu, lúma lun jájurudaguni láu áili lídan líri Wabúreme. ¹⁵Dánmeti le jayúmuragun láu affñeni, ábame lareídagun sánditi, áni ánjein gíñe afgounjaali lubeí, ferúdnawabei lífigoun.

¹⁶Ligía, gífese jumeí lubeí jífigoun joun jidújeñu lueígiñe Jesucristu, áni ayúmuragua jugúyame jawágu lun jareídagun. Weíriti lubáfu ayúmuraguni lun Búngiu le ladúgübei gürígia le buíti táu sun lanígi. ¹⁷Proféta Elías ában meja wügúri quei wagía, dan le lamúriajanbei lídan layúmuragun lun Búngiu lun májuyun lan júya, reídeiti júya májuyunga úruwa-irúmu-dimí. ¹⁸Lárigiñe, dányá le layúmuragun, ábaya lájuyun júya, ábaya tájüchün sun inádirigu ubouágu.

¹⁹Nidújeñu, ánjein egéyeda ában jídaangiñe lueí úma le richábei, liábin ámu lun lagríbudagüdüni, ²⁰subúdi jumeí luágu furúmieguarügü lan agríbudagüdüti le afgounjabei lídaangiñe luríban lémeri, lasálbaruboun lan luwáni afgounjati ligía lueí tídin máfiougati, áni ferúdnagüdaleíme sarágu lífigoun gürígia lé yebe acháragadubei.

FURÚMIÑETU LIGÁRADAN PÉDRO

Labúrrijan Pédro joun afiñetiña ja chagágubaña bougudi luei jageira

¹ Áu Pédro, ában lání Jesucristu apóstolu áu, nabúrrijañoun gárada to jun, jugúya lánigu Búngiu ja chagágubaña bougudi luei jageira loubawagu Pónto, Galácia, Capadócia, Ásia, lúma Bitínia. ² Nidújeñu, anúadaja láadün Búngiu Úguchili lúmagiñe meja binárü lun lánigu jumá, áni subúdi lumúti meja luágu lachúlürüba lan ában wéyu lun ítara lúba lan, ladúga ligía lan lugúndaanbei. Ligía larúmadagüdañañoun lubei Sífiri Sándu janígi láu líta Jesucristu, adúgalaún lun gagáambadi jumá. Ibíja jumá lubeiti sarágu abíniruni lúma darángilau lúmagiñe Búngiu.

Louchawagúba jafiñen, ábame liábin buíti lídaangiñe

³ Rúwama uweírighuni lun Búngiu, le Lúguchibeí Wabúreme Jesucristu, luágu luweírín lugúdemejabu woun. Rújali iséri ibágari woun queisi lirájüñü láu lásaaragüdüni Cristu lídaangiñe ouweni lúnya labágaridun. ⁴ Queisi lirájüñü wabeí, gayáraati weménigidun le gumúti luágu wabjubei lan ubuiduni le aráanse láalibeí wabá, gayáraati weménigidun luágu werésibirubei lan alágan le areídañu lubeí Búngiu wabá, siélu—ában alágan le lúnbei ladúrurun lun sun dan, le siñábei ladáseirun, le siñábei leféridiruni lubuidun. ⁵ Gounigi lumútiwa Búngiu láu lubáfu lugúndun afiñe wamá luágu, lun gayáraabei lan wabjini asálbaruni lídaangiñe asúfuriruni lánina ubou le, le aráanseñu lubeí wabá lárighiñeme lagúmuchun ubouí.

⁶ Ligía lébubei buin jíña lan láu ugúndani, láu sun lúnti lán funa jasúfurirun sarágu ouchwagúni luágu murúsun dan. ⁷ Lúnti jasúfuriruni ouchwagúni ladúga ítara líña lan jafiñen quei gólu—lúnti louchúniwa láu wátu geméti lun laríjiniwa ca lan luwúyeribeí. Afiñeni le awánduti ouchwagúni ligía, buíti sügú láu gólu, lugúndun gagúmuchaditi gólu. Láu lubeiti jawánduni louchawagún jafiñen, ladímurejaba Jesucristu buíti juágu dánme le lagíribudun ubouágun, jibjuba giñe uweírighuni lúma inébesei lúmagiñe.

⁸ Jínsiñeti Jesucristu jun láu sun marjín jumágili lan, áni láu sun marjín jumágili lan, rújumaali jeménigi luágu, áni gúndaatün láu ában ouñwenbun ugúndani le siñá jumuti aríñaga láu dimúrei. ⁹ Ladúga méme luweírín jafiñen luágu Cristu, jerésibiruñein tasálbarun juwáni.

¹⁰ Lídan meja dan le sügújalibeí, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe. ¹¹ Subúdigüda lumútiña lání Cristu Espíritu joun wügrüñiña jagía le lúnbei lasúfuriruni Cristu lubáramegiwa, lúma uweírighuni le lúnbei liábin lárighiñe. Jagiati, ábaja jóuchun jasúbudiruni cátei lan güriña ligía, lúma ídaba lan lasúsereda cátei le, le uágubei laríñaga Sífiri Sándu le jádaanbei joun. ¹² Ába lasúbudiragüdüni Búngiu joun luágu mámaba lan lídan jadáani lagúnfulirüa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija güriña jun lídoun buri dan le, láu lubáfu Sífiri Sándu le ñúbinbei siéluñe. Ásta ánjeligu, buséntiña jamúga giñe gunfaráanda jamáni buri cátei le.

Busénti Búngiu lun wabágaridun ában ibágari le jarúmati

¹³ Quei jagúrabañein lubeí jerésibiruni jalágaante siélu, gidájumei samínaü málati jaritagunrugugiñe, lubáragiñe líra, derégüdagulá jaritagun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucristu ubouágun. ¹⁴ Queisi isáanigu gagáambaditiña, mabágarida jumá queí meja ligáburi jabágaridun lubáragiñe meja jasúbudiruni Búngiu. ¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei. ¹⁶ Tariñajare Lerérun Búngiu. “Jarúma jumá, lugúndun áu, jarúmatina.”

¹⁷ Queſti janúgüni Búngiu quei Júguchi, Búngiu le ábanbei lábu ligáburi lagúser-agüdüni jagáburi sun gürgia, lúnti júaradun lúma láu ában goúnigi sun dan le lúnbei jabágariduni ya ubouágu. ¹⁸ Sálba láadün Búngiu lídaangiñe lagúbüri ibágari lé meja jafúnrendeirubei jámagiñe binádu jagúbürigu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queísi buri gólu o pláta, ¹⁹ láu líta Crístu le gebégibei sügú láu sun cátei lafáyeirúa. Derégewati Crístu lun louñwen luágu wafígoun quei ában mudún le buídubei lídan sun luwúyeri, sálba wamámuga. ²⁰ Lúmagiñe lubáragiñe buga ladúgüni Búngiu ubou, ába laráanserun lun Crístuba lan Wasálbaragüle, luágu lubeſti wafúleisein lachúlaagua Crístu lídoun lagúmujoún dan le, lun lasálbaruniwa. ²¹ Lídaangiñe Crístu, ába jiyábin lun jaffñerun luágu Búngiu le ásaaragüdúbalin Crístu lídaangiñe ouweni, ru ligía uweíríguni lun, ítara líña jiyábin lun jaffñerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu lueígiñe Jesucrístu jun le tímatiimaati. Lúnti lubeſti jínsiñegua jumá júngua láu sun tarúman janígi, lúma láu sun jére, ²³ lugúndun iséri gürgia jugúya. Mámaadün jasáanigu agúbürigu ja goúwedaditiña, lirájüñüjadün Búngiu láu jagáambuni lerérun le íchugubei ibágari, le giñe adúraruubei lun sun dan. ²⁴ Taríñajare Lerérun Búngiu.

Ítara jáña sun gürgia quei jíduru,

liábin jaweírigun quei lufúlurin jíduru.

Dan le lásaurün jíduru, ába láburujan lufúlurin,

²⁵ ánjein Lerérun Búngiu, duráti lun sun dan.

Áni dimúrei le, ligía ugánu le lánina asálbaruni le uágubei laríñawagúa jun.

2

¹ Ligía, queísi lirájüñüjadün lubeí Búngiu, ígira jumeí lubeſti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu. ² Ítara quei jabúseeruni irájüñü figígiña míligi jarúmati lun gayáraabei lan jaweínamudun, ítaralá giñe busén jumá lun jatúriajani Lerérun Búngiu buídu lun gayáraabei lan ledérebogudun jafñen luágu Crístu. ³ Subúdíjadün murúsun luáguti luweírin lubuídun louseruniwa Crístu, lúnti líchugun subúdi ligía ában ouñwenbun ayúmajani jídoun lúntima jasúbudiruni Crístu.

⁴ Ayárafajouá jumá lubeſti lun Crístu le gabágaribe. Rútiña gürgia mebéreseni luágu, ánjeinti lun Búngiu, ítara líña Crístu quei ában dúbü le gebégiti sarágu, le lanúadirunbei lun ligíaba lan ébuu tun lilígilisin, áni sun ja afiñebaña luágu Crístu, jagía lilígilisinbaña Búngiu. ⁵ Ítara líña lubeſti, ígiraguagüda jumá júngua lun Crístu le rúlaalíbei ibágari magúmuchaditi jun, lun tadúgüniwa ában témpulu buítu lun Búngiu jídaangiñe, lun giñe ítara jumá quei fádirigu ja derégeguatiña joúngua lun Búngiu, ja íchugubalin cátei le áubei lagúndaara lun, lídaangiñe Jesucrístu. ⁶ Ligía giñe taríñagunbei Lerérun Búngiu.

Nounajañen Crístu lun ligíaba lan dúbü le weírigutimaabei tuágu nilígilisin lídan fulásu le gíribei Sión.

Áni ja afínerutiña luágu, buídubei lídin joun.

⁷ Weíríti lebégi Crístu jun, jugúya le afíñebeí luágu, ánjeinti joun ja maffíñebaña, mebégiti quei dúbü le únbei jamájara ábunagutiña. Láu sun líra, gúnfulijali le taríñagubei Lerérun Búngiu.

Dúbü le únbei jamájara ábunagutiña,

ñúbinja lun ligíaba lan furúmiñeti lídan bunáguau.

⁸ Joun ja maffíñebaña luágu Crístu, gúnfuliti giñe le aríñawagúbei.

Ában dúbü achúgeraguágülei ligía, le eíguadagüdüti gürgia.

Ja madúgünbaña gásu láu ugánu lánina asálbaruni lídaangiñe Crístu, chugéguatiña luágu, fériditiña gñe lun sun dan, queísi laráanseruni Búngiu.

Ja lánigubaña Búngiu

⁹ Ánjeinti jugúya le affñebei luágu Crístu, ában família anúadajouátiña jugúya, fádírigo ja esérividutiña lun urúei le Búngiu, gürígia lánigu Búngiu ja derégeguaaña jóungua lun. Ítara líña cátei le, lun jadímurejan luágu buri cátei buíti le ladúgübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu. ¹⁰ Mibíjintün meja ában abúremein lun latoúnigirunün, guetó lánigujadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jesérividun lun Búngiu

¹¹ Nidújeñu jínsiñetiña nun, jugúya queísi teréncha lídan ubou le, aganoútiña bougúdi lueí jageíra, ayúmuraguátina jun lun mígiraguagüdün jumá júngua lun lagúbüri buri ayúmajani le ageíndagubei túma juwáni. ¹² Buídulá jóuserun jádan ja ibídiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadúgübei, ábame jíchugun uweíriguni lun Búngiu dánme lachúlürün wéyu lun lagúseragüdün.

¹³ Queísi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya ubouágu. Gúnfuli jumá lúma lugúmadin urúei, quei ligía lántima íñubei ufúlasun, ¹⁴ gúnfuli jumá gñe lúma jagúmadin gumádimatiña ja lóunajabaña lun jafáyeiragüdüniña ja múaradúnbaña lúma lúruđu, lúma lun jíchugun uweíriguni joun ja adúgübaña buíti. ¹⁵ Busénti Búngiu lun jadúgüni le buídubei, lun jámanichagüdüniña ja ibídiouguabaña áu, ja busénbaña jadímurejan wuríba juágu.

¹⁶ Queísi lirájüñü jumá Búngiu, ousera jumá queísi gürígia ja mámabaña idámuni lun ni ában gürígia, máma lueígiñe líra lun jadúgüni le wuríbabei, lubáragiñe líra, abágarida jumá queísi lidámun Búngiu. ¹⁷ Inébe jamá sun gürígia jun queísi lubúdubu, jínsiñe jamá jidújeñu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

¹⁸ Umúsuniña, inébe jamá jiyúbudirigo jun queísi lubúdubu, mámarügü ja buídubaña júma, ásta gñe ja wuríbabaña. ¹⁹ Lugúndun labínirubei Búngiu gürígia le awándubei asúfuriruni le mébunati láu larítangun luágu Búngiu. ²⁰ Ánjaün adúga cátei wuríbati, jafáyeira luágu, málati gagúraasun jumá luágu líra, ánjaün asúfurira lueígiñe jadúgün cátei buíti, ába jawánduni láu gurásu, buíti líra ligíbugiñe Búngiu. ²¹ Lun luwúyeri igáburi le lagúara Búngiu juágu, quei súfuri lubeí Crístu juágu láu gurásu, íchiga ában jémpulu jun lun jafálaruni. ²² Madúgünti Crístu ni ában figou, meyéeragun ligía gürígia ni ában weíyaasu. ²³ Dan le janábuni, mouñabunti láu anábajani, dan le jasúfuriragüdüni, masiadirun lumútiña, lubáragiñe líra, derégeguarügüti lúngua lun Búngiu le agúser-agüdübei lau ísuruni. ²⁴ Barú lumuti Crístu guánarügü wafígoun luoúgua luágu gurúwa lun weréderun quei jiláñu lun figou, lun wabágaridun ában ibágari le lánina ísuruni. Buleiseiwati lun wareídagun. ²⁵ Ítara jíña meja quei mudún ja féridijaña, ánjein guetó, núbínjadün lun Crístu le oúnigirubalün queísi jóuniri mudún, toúnigilóun juwáni.

3

Ligáburi jabágaridun maréitiña

¹ Ítara gñe jugúya würiña gámaritiña, derégegua jumá júngua joun júmarigo, lun ánjein lan mánjagiña lubeí lun ugánu lánina asálbaruni, gayára lámuga jayábin lun jaffínerun luágu Crístu, maríñagunga jugúya ni cáta joun luágu asálbaruni, ² láurügü jaríjini lubúidun jóuseruniña láu inébesi lúma larúman igáburi. ³ Mámala láu buri cátei bouguditi jibíti jewéndeda, queí buri lanárima aroúrangun, arígeilaü lúma buri bángüli le gólu, anáanguní wéndegutu, ⁴ tídaanlá janígi jewéndeda, le ábanbei ubuíduni le meféridirawadibeí. Ában

igáburi bímeti, darángila, ligía cátei gebégibei sarágu ligíbugiñe Búngiu. ⁵ Ítara liñá meja ligáburi jewéndedun wúriña já meja derégeguañabaña jóungua lun Búngiu lídan meja dan le sügújalibei. Jeménigitiña meja luágu Búngiu, derégegua jagía jóungua joun jámarigu. ⁶ Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadúga le buídubei, manúfudeiga lueí ni cáta.

⁷ Jugúya gíñe wügúriña, áfaagua jumá lun gunfaráanda jumániña júmarigu. Rújumei jafúlasun joun, mámarügü luegiñe mére tántima wúri, lugúndun gíñe rúlaani Búngiu ibágari méme magúmuchaditi le líchugubei jun láu lareíni, joun. Adúga jumeí ítara, úa lámuga ni cáta lun leréderunün lueí jayúmragun lun Búngiu.

Ja asúfurirubaña luegiñe jadúgüni le buídubei

⁸ Abágarida jumá sun jugúya lídan úarani lúma láu gudémjabu jídaangua, jínsiñegua jugúyame júngua queísi idújeñu luegiñe Jesucrístu. Areída jumá, únabu ligíame janáangun júngua. ⁹ Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abñiruni, lugúndun lun jerésibirun abñiruni lúmagiñe Búngiu lagúaraün. Lugúndun taríñajare Lerérun Búngiu.

¹⁰ Le busénti labágaridun ában ibágari buíti, lúma gíñe ában ibágari lánina ugúndani, lúnti loúnigiruni liyúma lueí ladímurejan wuríbani, maríñagun ligíame iyéeni.

¹¹ Lúnti ladísedun lueí wuríbani lun ladúgüni buíti, láluañani darángilaü lun labágariduni súnwanda.

¹² Lúnti ítara lan ligáburi, ladúga toúnigi lumútiña Wabúreme Búngiu ja richáguabaña ligíbugiñe, agáambaleí jayúmragun lun.

Ánjein ja adúgübaña wuríbati, magúndaati Búngiu jáu.

¹³ ¿Cábago gayára ladúgün wuríbati jun, ánjaün íchaagua júngua lun jadúgüni buíti súnwanda? ¹⁴ Áni íbini jasúfurirun ladúga lísurun jibágari, gúnda jumá ladúga fuleíseiwa jumá lídan le jasúfurirun luágu Crístu. Manúfude jumá lueí ni ában, madjjeri ligíame jarítagun. ¹⁵ Derégeguaügü jumá júngua le gumúti lun Crístu quei Jabúreme, aráanseñu jumá súnwanda lun jóunabuniña ja álügüdütün ca lan uegiñe jeménigida luágu Crístu, láu maweíriguni lúma láu inébesi. ¹⁶ Buídulá jóuserun, darángilañu támuga janígi, lun ja lan adímurejabaña wuríba luágu lubuídun jigáburi queísi afíñetiña luágu Crístu, nibúsigari jamámuga luágu jerérun guánarügü. ¹⁷ Buítimaati lun jasúfurirun luegiñe jadúgün buíti, ánjein ítara líña lubeí labúseeruni Búngiu, sügú láu lun jasúfurirun luegiñe jadúgün wuríbati.

¹⁸ Jarítagua jumá luágu luweírín lasúfurirun Crístu dán meja le loúnwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagia le wuríbabei, lun lanúgüníwa lun Búngiu. Áfarúati jilágubei, wínwantu láni Espíritu.

¹⁹ Quei Espíritu, núdünti gíñe apúrichija joun espíritugu ja lídaanbaña jafúlasun jiláaña.

²⁰ Espíritugu jagía, güriña ja wínwanbaña lídan meja lidáani Noé, magáambaditiña meja güriña jagía lun Lerérun Búngiu láu sun arúfuda láni Búngiu luweírín lugúraasun joun lídan le lagúrabajani tagúmuchún árca to ladúgüboun Noé. Mánjatiña jagáambuni Búngiu, ába jasálbarun wídürügü güriña lídaangiñe luweírín gúnran ligía. ²¹ Dúna ligía, ítara líña quei lidúnarina badísei guetó, le ídaangiñebei wanúgüwa lun wasálbarun. Mára lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu waffñerun luágu Crístu, luágu gíñe sálbaadiwa lan láu lásaarun Crístu lídaangiñe ouweni lúnya labágaridun. ²² Múdeiti Crístu siélun, áni níjein guetó ñun luegiñe loúnwenren Búngiu jáu sun ánjeligu jáma sun jíbiri ubáfu siélu lábugiñe lubáfu.

4

Wesériwidun láu ubáfu le líchugubei Crístu woun

¹Ligía, ítara quei súfuri lubei Crístu ya ubouágu wawágu, lúnti gíñe aráanseñu wamá lun wasúfurirun láu gurásu luágu. ²Le súfurijalibe luágu Crístu, ígira láali figouú lun labágariduni líbiri libágarí queísi lugúndan Búngiu, máma lun líchugun ugúndani lun lagúbüri ayúmajani. ³Lídan meja dan le sügújalibe, adúga jumúti meja luríban buri cátei le jínsiñebei joun ja íbídiñejabubaña lun Búngiu, jaganouña meja lídan íbágarí nibúsigarídunati, gúnfulitün meja lúma luríban jayúmajan, abácharuada, adaágua fédu, átagua sarágu, ájuduragua joun sándu, le mouñbei ladügúniwa. Buídúrgaali dan le abágarida jumáalibe ítara. ⁴Guetó, weíríti janígi já meja jumádagubaña láu mafála jumáaña lan lídan lagúbüri íbágarí le, ligía jadímurejanbei wuríba juágu. ⁵Ánjeinti jagía, jagúfeseeruba ligbugiñe Búngiu, le aráanseñubei lun lagúseragüdüniña wíngangiña jáma jiláguaña, madíse. ⁶Ligía apúrichijouá lubei meja luáguti asálbaruni joun ja jiláguañábaña guetó, lun gayáaraabei lan gabágarí tan jawáni láu libágarí Búngiu, láu sun jilá lan jágubu queísi lasúseredun joun sun gürgía.

⁷Yaráfaali lagúmuchun ubouú, ligía lúnti lubei aráanseñu jumá, ragúgua jugúyame júngua, derégegua jugúyame júngua lun ayúmuraguni lun Búngiu. ⁸Lougiñe sun cátei, níjeinlá sarágu ínsiñeni jídan joun jíbiriugu, lugúndun ánjaün jínsiñejabu, ferúduna jubéi jafígoun ámu juágu, láu sun gíbe lan. ⁹Resíbi jumáña gürgía júbiñe láu sun jugúndan. ¹⁰Rújali Búngiu ában ubáfu lun ságü afiñeti luágu Crístu, ítara líña lubeíti, seríwi jumá joun jíbiriugu láu ubáfu le rúlaalíbe Búngiu jun, queísi ouñiri buítiña lánina ubáfu buri le líchugubei Búngiu. ¹¹Le gabáfubei lun lapúrichijan, lúnti ladügúni queísi ában le adímurejati dimúrei lúmagiñe Búngiu. Le esériwiduti, adúgalei láu sun érei le líchugubei Búngiu lun. Sun cátei le jadúgübei, adúga jumei lídan ában igáburi le lúnti líchugúniwa uweíríguni lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweíríguni lun sun dan. Ítaralá.

Wasúfurirun queísi lánigu Crístu

¹²Nidújeñu jínsiñetiña nun, maweíridalá janígi láu buri lidíjeri ouchawagúni le jíbíjubei, camá jamuga ába cátei ámuti asúseredubei jun. ¹³Lubáragiñe líra, gúnda jumá luágu gafánran jumá lídan lasúfurirun Crístu, lun gayáaraabei lan jabuínchun láu ugúndani dánme le lagíribudun Crístu ubouágun láu sun luweírigin. ¹⁴Fuleíseiwatün ánjaün anabúa luegiñe lánigu jumá Crístu, lugúndun arúfuda lumúti líra luágu níjein lan Sífiri Sándu, le weírígubei, jídan. ¹⁵Ánjein asúfurira ában jídaangiñe, lun máma lan luegiñe láfarajan, o luegiñe lan líwerujan, ni luegiñe ladúraaguni líbiri lúruudu, ni luegiñe leméterun lídoun cátei le miábinti lun, mídin. ¹⁶Ánjeinti asúfurira mútu luegiñe lánigu lan Crístu, mouñ lumuti lanúgün busíganu, lúnti líchugun eteíngiruni lun Búngiu luágu lánigu lan Crístu.

¹⁷Chülújali dan lun lagúmeserun luweírín asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubei asúfuriruni ítara wámagiñe, weíríti-maabei jasúfurirun ja mánjabaña jerésibiruni lerérun Búngiu. ¹⁸Ánjeinti jénreengu lubei jasálbarun ja buídubaña, ¿cábagi asúsereda joun ja wuríbabaña, jáma ja gafígounbaña? ¹⁹Ja lubeíti asúfurirubaña queísi labúseeruni Búngiu, lúnti ítara méme jamá adúgei le buídubei, derége jamouñme jawáni lújaburugun Búngiu le adúgubaliña, lugúndun gayáraati weménigidun luágu Búngiu lun lagúnfulirun láu lerérun.

5

Lerérun Pédro joun afiñetiña

¹Níchuguñeinerérun jun, jugúya ja ábutigubaña lídan jadámurin afiñetiña, queísi ábuti lan gíñe áu quei jugúya, áni geféentina gíñe luágu lasúfurirun Crístu, áni gabáabadina gíñe quei jugúya lídan uweíríguni le lúnbei liábin. ²Toúngi jumáña lirájüñü Búngiu

ja lábugiñebaña jarfaajan queísi joínigiruniña joíniri mudún mudún. Adúga jumeí láu ugúndani queísi labúseeruni Búngiu, máma ladúga jafósuruña lan, adúga jumeí ladúga busén jumá jesériwidun lun Búngiu, máma ladúga línsiñegu seínsu. ³ Mousera jumá camá jamuga jabúriña ja lábugiñebaña jarfaajan jugúya, jóucharügü jumá lun ában jumá jémpulu buíti joun. ⁴ Ítara lúba, dánmeti le liábin Jesucrístu, le joíniri mudún le tímatimaati, jibjuba ában uweíriguni le weíriguti le ladúraruba lun sun dan, le mítaraanbei quei rídi le láuti ubánaü le gásaürati.

⁵ Jugúya gürrígia núbürrigiña, rúgua jumá júngua lábun jagúmadin weíyaaña mútu. Lúnti jesériwidagun súngebei joínigua láu manáanguni únguati, lugúndun taríñajare Lerérun Búngiu.

Magúndaanti Búngiu jáu ja barúguabaña jóungua, áni íderagua lumútiña ja manáangunbaña jóungua, láu lareíni.

⁶ Rúgua jumá lubeíti júngua únabu lábugiñe lújabu Búngiu le gabáfubei, lun gayára lan líchuguni uweíriguni jun dánme le lachúlürün dan ligía. ⁷ Madíjeri jumá luágu ni cáta, ígira jumeí sun cátei lun Búngiu, lugúndun laríjiña jáu le tímatimaati.

⁸ Agáguduañu jumá, ragúguañu jumá júngua, lugúndun eíbugañajádügü líña Máfia le jágani queísi líñun gáñiti áluaja cába lan lagúnrinchagua. ⁹ Mígiraguagüda jumá júngua lun, derégüdagu jumá lídan jafñen, subúdiñu jumeí luágu ligía méme lan gíñe jasúfurirubei jidújeñu lueígiñe Crístu lídan sun fulásu. ¹⁰ Lárigiñeme súfurijadün lan luágu murúsun dan, ladúgübadün Búngiu lun úa lan mégeiti luágu lubúfdun jigáburi, derégüdagu lídan jafñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírigun le magúmuchadibeí, lídan ában lúma Jesucrístu. ¹¹ Ligía le Súnti Gabáfu lun súnwandan. Ítaralá.

Lagúmujoún buri mábugaü

¹² Noúnajañoun tiraúraü gárada to jun lúma Silváno, le nanúgübei queísi ában idújei úaraguati, lun níchugun dúgüdaguati lun jafñen, geféen áume jun luágu abíniruni lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madísedagua jumá lueí línsiñejabu Búngiu ligía.

¹³ Mábuga jáña afñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraü. ¹⁴ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.

TIBÍAMAN LIGÁRADAN PÉDRO

Labúrújan Pédro joun afñetiña

¹Áu Simón Pédro, ában esériwiduti lun Jesucrístu áu, ában gíne lání apóstolu. Nabúrú-jañoun gárada to jun, jugúya le ñúbinjalibei lun gafánran jumá lídan luweírín asálbaruni le wabíjubei lídaangiñe Wasálbaragüle Jesucrístu, le méme Wabúngiute, lugúndun úaragua lan. ²Ibíja jumá sarágu abíniruni lúma darángilaü lueígiñe jasúbudiruni Wáguchi Búngiu lúma Wabúreme Jesúsu.

Igáburi le lúnbei jóuseruni afñetiña

³Rúlaali Búngiu sun le wemégeirubei woun lun wabágaridun lúma lun wesériwidun lun, láu lasúbudiragüdüni Jesucrístu le agúarubei woun lun gafánran wamá lídan luweírigin lúma lubuídun cátei le ladúgübei. ⁴Gúnfuliti Búngiu láu lerérun, lídaangiñe Jesucrístu, láu líchuguni le buídutimaabei lúma le weírítimaabei woun. Láu líra, gabáfu wamá lun wanúrújan lueí lagúbüri ayúmajani lánina ubouú le, íbija wamámugei ligáburi Búngiu wádan. ⁵Ligía lúnti lubeí jáfaagun lun jíchugun lubuídun igáburi lánwoun jáfñen, ⁶subúdi luágu Búngiu lánwoun lubuídun jigáburi, ragúguauú únguauú lánwoun jisúbudin luágu Búngiu, gurásu lánwoun ragúguauú únguauú, edéregeraguni únguauú lun Búngiu lánwoun gurásu, ⁷areíduni lánwoun edéregeraguni únguauú lun Búngiu, ínsiñejabuni lánwoun areíduni.

⁸Ánjein njein buri lubeí igáburi líra jídan le tímátimaati, mámabei luágu ni cáta jisúbudin luágu Crístu, áni líchuguba jibágari sarágu cátei buíti lun Crístu. ⁹Ánjeinti le mítaraanbei ligáburi, ítara líña queísi ában marjinti o ában lan madíse tarjín, bulfeilá luágu chibáwaali lan binádu lífígoun. ¹⁰Ligía lubeíti nidújeñu, quei wájali lubeí Búngiu jun, anúdajalaún lun lánigu jumá, áfaagua jumá lun lájüchün buri cátei le jídan, ánjein jadúga ítara, máburujabadün lídoun féridi. ¹¹Ítara lúba úa lan ni cáta ásiñeragüdüti jebélurun lídoun larúejan Wabúreme Wasálbaragüle Jesucrístu, le magúmuchadibeí.

¹²Ligía narítaguagüda mémebadün lubeí luágu, láu sun subúdi jumáali lan, áni jeíbuguña lan lídan inárüni ligía. ¹³Láu sun líra, sun wínwangidina lan, afñetina luágu buídu lan lun nagúaruni jarítagun lun luwúyeri íbágari le lúnbei jabágariduni queísi lánigu Crístu. ¹⁴Subúdigüda láali Wabúreme Jesucrístu nun luágu yaráfaali lan wéyu lun noúnwen, ¹⁵ítara líña lubeíti, nadúgübei nuáraati lun íbini lánme lárigiñe jiláadina lan, lun súnwandan lan jarítagun luágu buri cátei le.

Já buri arjübalin luweírigin Crístu

¹⁶Arúfudajani le wíchugubei jun luágu lagríbudun Wabúreme Jesucrístu ubouágun láu sun luweírín lubáfu máma meja úraga, arjja wamúti meja luweírigin láu wágu. ¹⁷Arjja wamúti dan le líchugunbei Búngiu Úguchili inébesei lúma uweíriginuni lun, ába laríñagun lumálali Búngiu lun lídaangiñe uweíriginuni lánina siélu. “Niraú le jínsiñebei nun le, le áubei oúnwenbun lan nugúndan.” ¹⁸Agáamba wamúti ladímurejan Búngiu ítara luágu Wabúreme Jesucrístu dán meja ññadiwa lan lúma Wabúreme luágu wúbü le biníwabei.

¹⁹Níjein gíne ában cátei chóurutimaati wáma luágu liábin Wasálbaragüle ubouágun—ligía ugánu le jabúrújabei profétagu. Buíti jadúga lun jatúriajani jerérun wügúriña jagía, ladúga líchuguba lan larúgouna tun janígi queísi ában lámpu le adúnraaguti lídan ában fulásu le búrigati. Lesériwiduba jerérun woun ítara daríme dan le lagríbudun Crístu ubouágun, le ítara lúbabei queísi larúgadun dan le tafuridun warúguma to lánina bináafin—wasúbudirubei sun cátei lídaanme dan ligía. ²⁰Loúgiñe sun cátei, lúnti jasúbudiruni luágu úa lan ni ában gayáraati ladáriruni laníchigu cátei le búrü jamaalíbei profétagu láu lání lúngua. Busénwati lubáfu Sífiri Sándu lun gunfaráandawa lan, ²¹lugúndun

madímurejaantiña meja wügúriña jagía láu jáni jóungua. Jagía, queí meja wügúriña jabeí deréguatiña jóungua lun Búngiu, dimúrei buri lúmagiñeti Búngiu jadímurejabei lugúndun Sifiri Sándu lan adúndejabaliña.

2

Ja arúfudajabaña iyéeni

¹ Añájein meja yéetiña jádan warásan ja aríñagubaña luágu profétagu jamá, ítara lúba gíñe añájeinbaña lan jídan, jádaruba iyéeni lagánagua arúfudajani le inárúnibei lun lagádeiruni jafiñen. Jarúfudubeiti yéetiña jagía láu luwýeri jabágaridun luágu máma lan Crístu Jabúremebei, láu sun jilá lan Crístu lun lasálbaruniña. Láu cátei líra, janúgüba agúnrinchaguni furése joun guánartügü. ² Gíbeebaña afálarutiña lídan liwiye jémeri, áni ladímurejóuba wuríba luágu úma le inárúnibei jadúga. ³ Láu línsiñe seínsu joun, jaságaruba seínsu jueí láu jarúfudajan le málabei, le núbiniñe lídaangiñertügü jachúgü, choúruti luágu jagúseragüdúwaba lan luágu luríban jadúga, yaráfati jeferídirun queísi laráanserúniwa jabá lúmagiñe binári.

⁴ Úati ferúduna lániña Búngiu ánjeligu já meja affigunjabaña, ába lachágaraguniña máfiougatin, ába lígiruniña adaúrúwa lídan lubúriga ñi agúrabajei wéyu lánina lagúser-agüdúniña. ⁵ Úati gíñe ferúduna lániña Búngiu mútu wuríbatiña já meja aganoúbaña uboúagu lídan lidáani Noé. Ába loúnajani gúnran jawágu güriña jagía, Noé rügúñein le apúrichijabei joun gaffigountiña lun jasáansiruni jagáburi, jámaya sédu güriña lánwoun asálbara. ⁶ Darí lumuti gíñe meja jadúnrun güriña ja aganoúbaña ubúrgu Sodóma lúma Gomórra. Ába láguduni fulásu buri ligía darí lun ladáagun balígime, lun larúfudajan joun güriña wuríbatiña ja lúnbaña jayábin járiñe ca lan lafáyeijabei figoú. ⁷ Séfu lumúti meja Lot, ában meja wügúri buíti, le weírubei lidíjeri luágu liwiye jagáburi güriña wuríbatiña lídan fulásu ligía. ⁸ Ságüja wéyu lasúfurirun wügúri buíti ligía tídan lanígi láu larjini lúma lagaambuni cátei buri wuríbati le jadúgübei. ⁹ Sun le, ában jémpulu luágu ligáburi lasálbaruniña Búngiu ja deréguabaña jóungua lun lueí ouchwagúni, ígira láña ja wuríbabaña lábugiñe asúfuriruni lubá jasíadirúniwa lun sun dan lídaanme wéyu lánina agúserawagüdúni.

¹⁰ Lasúfuriragüdátimabaña Búngiu ja afálarubalin liwiye jayúmajan, ru jagía mebéreseni luágu le lubeíbei Búngiu. Arúfudajatiña magáambaditiña ja jagánaguabaña, barúguatiña jóungua, mebéresentiña láu ni cáta, marúfudun jagía inébesei joun ja weírígubaña, anábarügü jamáña. ¹¹ Anjañati ánjeligu, láu sun jéretima jamá, gabáfu jagía sügú jáu arúfudajatiña jagía, míchuguntiña jadúnrun ánjeligu wuríbatiña ligíbugiñe Búngiu, láu anabúni.

¹² Anjaña arúfudajatiña ja, ítara jáña queísi anímaalugu úati gunfaráanda jamá, jagúriajoun lun járiügüdún lun jafarún. Adímurejatiña wuríba luágu buri cátei le úati gunfaráanda jamáni, jóúweguba queísi jóúwegun anímaalugu, ¹³ asúfurireina lueíñe jasúfuriragüdün ámu. Nibúsigarídunati jabágaridun, adáagua jamúti lagúburi jayúmajan lídan larúgounga, ligíbugiñe larjín sun uboú, darí lun júaradagun júma lídan jufédun queísi jamúga güriña buítiña, wiyeti jabágari.

¹⁴ Siñáti jarjín ában wúri lun úa lan suámei jamánun, mabúchati jawágu adáagua figoú. Acháwaja jamútiña débilitiña lídoun figoú, bíbutiña luágu meménijabuni. Choúruti luágu jagúnrinchagúba lan. ¹⁵ Féridiña jáña, lugúndun jígiruni úma le surúbei. Falá jamuti lání proféta Baláam, le liraú Beór, jémpulu, lé meja álugubei lagañeirun seínsu láu ladúgüni le wuríbabei. ¹⁶ Ábati ladeínjan ában burígü maríñagaditi lun luágu líffigoun, adímureja ligía lun láu jamálali güriña, ába mígirun lání lun lasígirun láu lilúlun láu.

¹⁷ Ítara jáña arúfudajatiña yéetiña ja queísi w-élu mábeiti, queísi buri juánriñu le lanúgün garábali, siádiwaaña lun jásiügürün sun dan lídan luweírín-ágei lubúriga

máfiougati. ¹⁸ Lugúndun aríñagatiña dimúrei buíduburiti, le málati, aríñaga jagía luágu gayára lan jagúnfulirun, ja afálarubaliña, lúma luríban jayúmajan, adúga jameí furúmieguariügü iwíyei le jabúseerúbei. Ítara líña jacháwajaniña ja sun líñabei jaséfurun lídaangiñe binádu luwúyeri jabágaridun lánina bulfeiguau, lun jagíribudun jarígoún lídoun liwíye ibágari. ¹⁹ Aríñagatiña joun jánigu luágu jabágariduba lan ában ibágari le ní lumuti gayára lan jadúgüni le jabúseerun, ánjeinti jagía guánarügü idámuniñanu lun Máfia, lugúndun sun güriúa lidamuñein cátei le árügüdübalin. ²⁰ Ja subúdi jamáalibei Wabúreme Jesucristu le Wasálbaragüle, ani séfujaña lídaangiñe iwíyei le lánina ubou le, ánjañaya áburuja lídoun buri cátei le lúnya lárügüdüniña, wuríbatimaabei le lúnbei gádan láníña sügü láu meja furúmiñe. ²¹ Buítimaati jamúga meja joun lun masúbudirungubei jamáni úma le surúbei, sügü láu lárigiñe lan jasúbudiruni, ába jígiruni lerérun Búngiu joun. ²² Jawágu lagúnfulira linárün dimúrei le. “Léchun oúnli lun leíginiya lewéran, léchun búuruju le sun liñabei lágoun jarúmati, lúnya lágoun lídan gubégubeti.”

3

Lagíribudun Wabúreme Jesucristu ubouagun

¹ Nidújeñu jínsiñetiña nun, nuján tibíaman gárada nabúrñan jun. Tídan biángubei gárada, jóuchatina lun narítaguagüdüñun luágu arúfudajani inárüñiti le furéñdeí jumáalibei, lun gayáraabei lan jasáminarun buídu luágu. ² Jarítagua jumá luágu buri cátei lé meja jariñagubei profétagu, lúma luágu lugúmadin Wabúreme Jesucristu le Wasálbaragüle, lé meja warúfudajabei wagía apóstolugun jun.

³ Lídaangiñe sún buri cátei le waríñagubei, rútima jumeí le jarítangunrugun. luágu lídoun lánme lagúmujoún dan, añájeinbaña güriúa éjerajatiña láu buri cátei luáguti Búngiu, jabágariduba queísi laríñaguni luríban jayúmajan joun, ⁴ ábame jariñagun. “¿Másan jariñajare luágu liábinyaba lan Cristu ubouagun? ¿Jalíñañeinsan? Lúmagiñe jóúwegun furúmiñetiña afíñetiña luágu Jesucristu, ítara mémegili sun cátei queí meja lúmagiñe ladügünbei ubou.” ⁵ Mabúseeruntiña jasúbudiruni luágu ladügüni Búngiu sun cátei lídan lidáani lun ladügüniwa. Adúga lumúti meja siélu lúma ubou lúmagiñe binárü láu lugúmadin, adúgaíe múa lídaangiñe dúna, geyégu líña gíñe múa ligía láu dúna. ⁶ Ába lachúlürün dan lun lagúnrinchaguni Búngiu ubou meja ligía láu lidúnarina gúnran. ⁷ Ánjeinti siélu lúma múa le guetóbei, lareíduñein Búngiu lubáme wéyu dánme le lagúseragüdüñ. Lídaanme wéyu ligía, lágudubei Búngiu siélu lúma ubou le gumúti láu lugúmadin. Ja madúgünbaña gásu láu Búngiu, jágudúba lídan wátu ligía.

⁸ Mabúlieida jumeí gíñe, nidújeñu jínsiñetiña nun, luágu ítara líña lan ában wéyu ligíbugiñe Búngiu queí mílu irúmu, mílu irúmu queí ában wéyu. ⁹ Mára jamúgati lugúndun ladárasarun lagúnfulirun Búngiu láu lerérun, queísi jarítangun sarágu, gagúraasunrügüti jabá güriúa lugúndun mabúseerúnti lun leféridirun ni ában jádaangiñe, labúseerun lun jaságürijan sun güriúa lídaangiñe jafígoun, gayára lámuga jasálbarun.

¹⁰ Lachúlürüba wéyu ligía lun lagíribudun Wabúreme Jesucristu ubouagun dánme le magurabúniwa lan, queísi lachúlürün jíweruti áriebe. Ábanmeti lagúmuchagun siélu láu ában lanáreme irefíni, rúrügüagüdaleíme wátu geméti sun cátei le ñibeí—játi, warúguma, wéyu—gudáme ubou láu sun cátei le lídaanbei.

¹¹ Queísiti lagúnrinchaguba lan sun cátei ítara, lúnti lubeíti jarúma lan jabágaridun, derégeguañu júngua lun Búngiu le gumúti, ¹² agúrabañu jumeí lachúlürün luwéyuri Búngiu, adúgañu jumeí le juáraati lun jóufudajani. Lídaanme wéyu ligía, lagúnrinchaguba siélu láu wátu geméti, ábame larúrüdagun sun cátei. ¹³ Ánjeinti wagía, agúraba wamúti iséri siélu lúma iséri ubou le uágubei laríñaga Búngiu woun, sun cátei ñi, úraguabei, áni buídubei gíñe.

¹⁴Ligía lubeíti, nidújeñu jínsiñetiña nun, sun anjúnja lan agúrabajeí buri cátei le, jóúcha jumá lun ladárirunün Búngiu lídan úraguni ligíbugiñe, jarúmañu, úouga mégeiti juágu.

¹⁵Subúdi jumeítia luágu lagúrabaja rügúña lan Wabúreme Jesucrístu jasálbarun gürgia lubá lagíribudun ubouágun. Ítara líña gíñe labúrújan wadúje Páblo le jínsiñebei woun sarágu, jun, láu subúdi le líchugubei Búngiu lun. ¹⁶Adímurejati tídan sún buri ligáradan luágu buri cátei le, láu sun nújein buri lan tídaangiñe, jénreenguti gunfaráandawa tan. Játi ibídouguabaña áu jáma ja louguabaña affñe, garábaguati laníchigu labúrújan Páblo según jagía, ítara quei jadúga tún buri tíbiri líburu to Lerérun Búngiu. Jeféridiruba lun sun dan ladúga cátei le.

¹⁷Ligía lubeíti, nidújeñu jínsiñetiña nun, queísi subúdi jumáli lubeí buri cátei le lubáramegiwa, toúnigigua jumá júngua lueí jeyéedunün gürgia wuríbatíña, ígiragüdei arúfudajani le inárúñiti luáguti Búngiu jun. ¹⁸Jóúcha jumá lúntima jasúbudiruni Wabúreme Jesucrístu le Wasálbaragüle, awáanse jugúyame lídan línsiñejabu. ¡Uweíriguni lun, guetó lúma súnwandan! Ítaralá.

FURÚMIÑETU LIGÁRADAN APÓSTOLU JUAN

Dimúrei le lánina ibágari

¹ Wabúrújaña jun luágu Búngiu Irájü lé buga nñeinjalibei dan le lagúmeserunbei sun cátei. Ába liabin Búngiu Irájü ubouágun queísi ában gürígia, aríja wamúti láu wágu, agáamba wameí ladímurejan. Aríja wamúti sun le ladúgübei, gurú wagía luágu láu wájabu. Ligía le ídaangiñebei liábin sun ibágari, ligía gíñe le gíríbei “Dimúrei”. ² Ába liábin ubouágun, quei nubesíbei jun, aríja wamúti, geféen wagía luágu, áni guetó wabúrújaña jun luágu. Níñein Búngiu Irájü lúma Búngiu Úguchili lúmagiñe furúmiñeti dan, ába liábin ubouágun queísi gürígia lun gayáraabei lan wasúbudiruni. ³ Wafúraanguagüdüñein lubeíti jun le aríja wamáalibei ladúgün, lúma le agáamba wamáalibei laríñagun, lun gayáraabei lan jafíñerun le tímatimaati, lídan jumámuga ában wáma lídan cátei lébei, lídaañadünme gíñe ában lúma Búngiu Úguchili lúma Jesucrístu le Búngiu Irájü, queísi wagía. ⁴ Ítara lúba dayárubei lan wagúndan, sun wagía.

Ítara líña Búngiu queísi lámpu

⁵ Níján ugánu le larúfudajabei Crístu woun, le gíñe wíchugubei jun guetó. luágu ítara líña lan Búngiu queísi ában lámpu, mánti ni cáta lúma lubúriga. ⁶ Ánjawa aríñaga luágu lídaañadiwa lan ában lúma áni madúgün wamúti le laríñagubei, lídaañagidiwa lubúriga, áni weyéedaguña woúngua láu waríñagun luágu lídaañadiwa lan ában lúma, lugúndun múaran lan wagáburu lúma linárün. ⁷ Ánjein úaragua lubeí wagáburidun lúma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucrístu sun wafígoun.

⁸ Ánjawa aríñaga luágu mafígoun wamá, weyéedaguña woúngua, maríchatu le waríñagubei. ⁹ Ánjein wagúfesera wafígoun, gayáraabei weménigidun luágu Búngiu luágu ladúgübei lan le úaraguabei—ferúduna lubeí wafígoun, jarúmagüda lówame lídaangiñe sun wuríbani. ¹⁰ Ánjawa aríñaga luágu madúgüngidiwa lan figou, wadúgüñein Búngiu camá yéeti, áni merésibirun wamágili lerérun tídan wanígi.

2

Adímurejati Crístu lueígiñe wafúleisin ligíbugiñein Búngiu

¹ Nirájüñü, nabúrújañein buri cátei le jun lun mafígounjan jumá. Láu sun líra, ánjawa afígounja, ladímurejaba Wabúreme Jesucrístu lueígiñe wafúleisin ligíbugiñe Wáguchi Búngiu, ladúga ligía rügüñein richágua ligíbugiñe Búngiu. ² Lídaangiñe Jesucrístu ferúdnawa lan wafígoun, áni mámarügü wafígoun, ferúdnawati gíñe jafígoun sun ja afíñebaña luágu.

³ Ánjein wagúnfulira lugúmadin Búngiu, wasúbudirubei luágu chülújadiwa lan asúbudirei Búngiu. ⁴ Ánjein aríñaga ában gürígia. “Subúdi numúti Búngiu”, áni magúnfulirunti táu lugúmadin, yéeti gürígia ligía, ibídiñegili Búngiu lun. ⁵ Ánjeinti gürígia le adúgübalin le lubeíbei Búngiu, chülújali Búngiu ínsiñeda lun buídu buídu, ítara líña wasúbudiruni luágu lídaañadiwa lan ában lúma. ⁶ Le aríñaguti luágu lídaañein lan ában lúma Búngiu, línti labágaridun queí meja labágaridun Jesucrístu ya ubouágu.

Le iséri gumádi

⁷ Nidújeñu, mámatia iséri gumádi le nabúrújabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úaragua lúma ugánu ligía. ⁸ Guetó narítaguagüdüñadün luágu gumádi le lagúarubei Jesucrístu iséri gumádi, áni gumádi ligía, lun jñsiñegua wamá woúniwagua. Ítara líña meja labágaridun

Jesucristu, jabágariduña gñe ítara lugúndun jeibuguña lan lídan larúgounga le linárünbei Búngiu, mámaañadün lídan lubúriga.

⁹ Le aríñaguti luágu leibuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun. ¹⁰ Le jínsiñejabuti joun lidújeñu lueígiñe Jesucristu, lídaañein larúgounga, subúdi Crístu lun, áni úati ni cáta lun láburegüdúni lídoun figou. ¹¹ Ánjeinti le iyéreejabuti lun lidúje, ítara líña queísi gürígia le eíbugubei lídan lubúriga, ibídiñeti lun jalñounbei lan lugúndun darú lani lubúriga larjijn.

¹² Nirájüñü, nabúrújaña jun lugúndun ferúduna láali Búngiu jifígoun ladúga Crístu.

¹³ Agúbürigu, nabúrújaña jun lugúndun subúdi jumáli lan Jesucristu lé meja njeinjalbei lúmagiñe furúmiñeti dan. Núbürigiña, nabúrújaña jun lugúndun gáñei jumáli lan wuríbu luágu Máfia.

Nabúrújanbei jun, nirájüñü, lugúndun subúdi jumáli lan Búngiu Úguchili.

¹⁴ Nabúrújaña jun, agúbürigu, lugúndun subúdi jumáli lan Jesucristu lé meja njeinjalbei lúmagiñe furúmiñeti dan. Nabúrújanbei jun, núbürigiña, lugúndun jéje jumá, áni resíbi jumáli lerérun Búngiu tídan janígi, lugúndun gñe gáñei jumáli lan wuríbu luágu Máfia.

¹⁵ Mínsiñedalá ligáburu ubouú jun, ní buri cátei le lánina ubouú. Siñáti lajínsiñedun cátei lánina ubouú jun, jínsiñeme Búngiu jun, ¹⁶ lugúndun úati ni cáta lídaangiñe cátei le líchugubei ubouú núbinti lúmagiñe Búngiu, lúmagiñe guánarügü ubouú liábin. Luríban jayúmajan gürígia, ayúmajani lun jabjini cátei le jarjibe le uágubei jarítagua luágu buídu lan, luma pántaü luágu cátei le jabjibe, ligía buri cátei le líchugubei ubouú. ¹⁷ Áni ubouú, agúmucheina líña láu buri sun luríban ayúmajani le lídaanbei, ánjeinti le adúgüti lugúndun Búngiu, labágariduba lun sun dan.

Inárüni luma iyéeni

¹⁸ Nirájüñü, chülújali lagúmujoún dan. Agáambaadün luágu iníte lan Lágani Crístu, quei chülúguaaña lubei sarágu láganiñu Crístu guetó, ligía wasúbudirunbalin luágu lagúmujoúnjali lán buri dan le. ¹⁹ Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun laríjiniwa furáangu luágu máma lan wánigu le tímatiamaati.

²⁰ Ánjeinti jugúya, ráalaali Crístu Sífiri Sándu jun, áni subúditün sun jugúya lun.

²¹ Nabúrújanbei lubeiti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan liábin ni murúsun arúfudajani múaraanti lídaangiñe inárüni.

²² Ja arúfudajabalin le múaraanbei, ja aríñagubaña luágu máma lan Jesúsú Crístubei le loúnajabei Búngiu ubouúgun lun lasálbaruniña gürígia, jagía láganiña Crístu, mafñetiña ni luágu Búngiu Úguchili, ni luágu Búngiu Irájü. ²³ Sun ja májabaña lun jasúbudiruni Jesúsú queísi Búngiu Irájü, ibídiñegili Búngiu Úguchili joun, ja aríñagubaña luágu Jesúsú lan Búngiu Irájü, subúdi gñe Búngiu Úguchili joun.

²⁴ Ligía, areída jumeí lubei ugánu le jagáambubei lúmagiñe furúmiñeti, tídan janígi. Ánjein jadúga ítara, jeréderuba gñe lídan ában luma Búngiu Irájü luma luma Búngiu Úguchili, ²⁵ jerésibiruba gñe ibágari le magúmuchaditi, queísi larinaguni Jesúsú woun. ²⁶ Ligía nerérunbei jun jawágu láganiñu Crístu jagía já yebe busénbaña jayéedagunün. ²⁷ Njein Sífiri Sándu júma le líchugubei Crístu jun, memégeiruntün lubeiti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabei, máma iyéeni.

²⁸ Ítara líña lubeiti, nirájüñü, ítara méme jumá lídan ában luma Crístu lun dánme lan le liábin, gayára lámuga wasúbudiruni luágu buídu wamá luma, úa lámuga busíganu wawágu ligibugiñe. ²⁹ Queísi subúdi jumáni luágu richágua lan Crístu lídan sun cátei, lúnti gñe jasúbudiruni luágu lirájüñü lan Búngiu sun ja richáguaña ligibugiñe.

Lirájüñü Búngiu

¹ Aríja jumá luweírín wínsiñe lun Búngiu Úguchili, darí lun gayára lan lagúarúniwa woun “lirájüñü Búngiu”, áni inárüni luágu lirájüñü wamá. Ligía siñá jabáliwa lánigu ubouú gunfaráanda lugúndun ibídiñetí meja Jesucrístu joun lídan linárün cátei dán meja le ya lan ubouágu. ² Nidújeñu jínsiñetiña nun, lirájüñüjadiwa Búngiu guetó, áni marúfudúngili woun cátabadiwa lan lídaanme lagúmujoún, subúdirügü wamúti luágu dánme lan le lagíribudun Crístu, ítara wába lan quei ligía, lugúndun waríjubei ítara quei lubef. ³ Áni sun le agúrababajálin buri cátei le, jarúmagüda lumúti ligáburi ítara quei jarúma lan ligáburi Crístu.

⁴ Ánjeinti sun le afgounjabei, düürügua lumúti lilúrudun Búngiu, lugúndun luágu cátei figoubei ladúraawagún lilúrudun Búngiu. ⁵ Subúdi jumáli luágu lun lan lagídaruni Jesucrístu wafgoun lábin ubouágun, luágu gíñe úa lan ni murúsun figou luágu. ⁶ Sun lubefti le lídaanbei ában lúma, máma lídaañein figou, áni sun le lídaanbei figou, maríjin lágili Jesucrístu, masúbudirun lágili gíñe. ⁷ Nirájüñü, mayéedawagua jumá, ában güriégia richáguati ligíbugiñe Búngiu adúga lumúti le richábei, queísi richágua lan Jesucrístu. ⁸ Ánjeinti le efbugubei lídan figou, lánigu Máfia, lugúndun afgoujati Máfia lúmagiñe furúmiñeti dan, ába lábin Liraú Búngiu lun lagúnrinchaguni luwádigimari Máfia.

⁹ Úati ni ában le liraúti Búngiu asígiruti lídan figou, lugúndun níjein ibágari le líchugubei Búngiu lun lídan, siñáti lasígirun lídan figou lugúndun liraú lan Búngiu. ¹⁰ Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madúgünbalin le buídubei, o mínsiñejabu lan lun lidúje lueígiñe Jesucrístu, máma lánigu Búngiu.

Jínsiñe jamá wíbirigu woun

¹¹ Níjan ugánu le jagáambubei lúmagiñe furúmiñeti dan. lun jínsiñegua wamá wámagua. ¹² Mouñ lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuríba lán meja le ladúgübei Caín, áni buíti le ladúgübei lamúlen, ligía lagímugajanbei.

¹³ Nidújeñu, maweiridalá janígi ánjaün eyéreeguda joun lánigu ubouú. ¹⁴ Wagía, ítara wáña meja queísi jiláaña, guetó ibíjaadiwa ibágari magúmchaditi, áni subúdi wamúti líra lugúndun jínsiñetiña wadújeñu lueígiñe Jesucrístu woun. Le mínsiñejabuti lun lidúje, jiláñu mémegili. ¹⁵ Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágari lan le magúmchaditi. ¹⁶ Subúdi wamúti cátei lan ísiñenibei. luágu líchuguni Jesucrístu libágari wawágu. Lúnti giñéti wánjarun lun wíchuguni wabágari jawágu wíbirigu. ¹⁷ Ánjein níjein lubeí lúma ában güriégia lun lawínwandun, áni laríja luágu níjein lan lemégeirun lidúje áni míderagun lumúti, ¿ida lubági níjein lan ínsiñeni tídan lanígi lun Búngiu? ¹⁸ Nirájüñü, mouñ lumuti wayumárurügü lan wínsiñejabu, lúnti ában lan ínsiñejabuni le gumúti, lun laríjin lídan cátei le wadúgübei.

Eménigini ligíbugiñe Búngiu

¹⁹ Ánjawa jínsiñejabu le gumúti, gayáraabei wasúbudiruni luágu lánina wamá affñeni le inárúntibei, gayáraabei gíñe wasúbudiruni luágu buídu lan weréderun ligíbugiñe Búngiu. ²⁰ Ánjoun jamúga íchiga wanígi dúru wawágu luágu som cátei, subúditimaati luagúti dúru ligía lun Búngiu, lugúndun subúdi lan sun cátei lun. ²¹ Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu weménigi luágu, ²² luágu líchugubei lan sun le wamúriajabei lúma woun, lugúndun gúnfulijadiwa láu lugúmadin áni adúga wamáali le áubei lagúndaara. ²³ Lugúmadin Búngiu, lun wafíñerun luágu Jesucrístu le Liraú, lun gíñe jínsiñegua wamá wámagua queísi meja laríñaguni Jesúsú woun. ²⁴ Ja

agúnfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbei woun.

4

Láni Búngiu Espíritu lúma láni lágani Crístu espíritu

¹ Nidújeñu jínsiñetiña nun, mafiñera jumá joun sun ja aríñagubaña luágu Búngiu lan adímurejabei jayúmulugugiñe, jóucha jumáña lun jaríjini ánjein Sífiri Sándu lubeí le jádaanbei o máma lan ligía. Lugúndun labuínchuña ubouú jáu yéetiña ja aríñagubaña luágu Búngiu lan adímurejabei jayúmulugugiñe áni jayéeni. ² Láu igáburi le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatisaati liábin Crístu ubouágun, níjein Sífiri Sándu lídan áni láu lubáfú Sífiri Sándu ladímureja. ³ Ánjeinti le aríñaguti luágu iyéeni lan, luágu mayábin lan Crístu ubouágun queísi gürígia, úati Sífiri Sándu lídan, espíritu le láganibei Crístu, ligía espíritu le lídaanbei gürígia ligía. Agáambaadün luágu liábinba lan espíritu ligía, níjeinjali ubouágu.

⁴ Nirájüñü, lánigu Búngiu jugúya, gáñei jumáña yéetiña jagía ja busénbaña jagáraguagüdünün lueí arúfudajani le inárüntibei, gáñei jumáña lugúndun gabáfutimsaati Sífiri Sándu le jídaanbei sügüú láu láni Máfia espíritu le jádaanbei. ⁵ Lánigu ubouú jagía, lánina ubouú cátei le jarúfudajabei, ligía lébubei jagáambuniña ja gíñe lánigubaña ubouú. ⁶ Ánjein wagía, lánigu Búngiu wagía. Le subúdijabubei lun Búngiu, agáamba lumútiwa, le mámabei lánigu Búngiu, májati lagáambuniwa. Ítara líña lubeíti gayáraati wasúbudiruni cátaña lan erésibirubalin linárün Búngiu lúmoun cátaña lan erésibirubalin iyéeni.

Ligáburi Búngiu lun larúfuduni ínsiñejabuni

⁷ Nidújeñu jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñejabuni. Sun le jínsiñejabubei, liraú Búngiu, áni subúdi gíñe Búngiu lun. ⁸ Le mínsiñejabuti, ibídiñegili Búngiu lun, lugúndun ligáburi Búngiu lun larúfuduni ínsiñejabuni. ⁹ Arúfuda lumúti Búngiu wínsiñe lun láu loúnajani Liraú le ábanrügüti ubouágun lun loúnwen, lun gabágari wamá lídaangiñe. ¹⁰ Niján ínsiñenibei. máma luágu wagía lan jínsiñejabubei lun Búngiu, luágu ligía lan jínsiñejabubei woun, ába loúnajani Liraú le ábanrügüti lun loúnwen, lun lébuname ferúdnawa lan wafígoun.

¹¹ Nidújeñu jínsiñetiña nun, ánjein jínsiñeediwa lubeí lun Búngiu ítara, lúnti gíñe jínsiñegua wamá wámagua. ¹² Úagili ni ában aríjiti Búngiu, láu sun líra, ánjava jínsiñegua wámagua, níjein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu. ¹³ Rúlaali Búngiu Sífiri Sándu woun lun lachoúrurun luágu lídaañadiwa lan, áni wádaañein lan gíñe. ¹⁴ Wagía guánarügü aríja wamáali Liraú Búngiu, aríñaga wamef luágu lun lan lasálbaruniwa loúnajei Búngiu ubouágun. ¹⁵ Furúmiengarügü le afíñerubei luágu Liraú lan Búngiu Jesúsú, labágariduña lídan Búngiu, áni labágariduña gíñe Búngiu lídan.

¹⁶ Ítara líña wayábin asúbudirei lúma afíñera luágu jínsiñe wamá lun Búngiu. Ligáburi Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña gíñe Búngiu lídan. ¹⁷ Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragüdiñiña Búngiu sun gürígia ladúga wagáburiduña lan ya ubouágu queísi Jesucrístu. ¹⁸ Ánjein jínsiñe Búngiu woun le gumúti, manúfudebadíwa luágu le lúnbei ladúgüni woun, láu luwefrin línsiñe Búngiu woun, gidáti sun anúfudei wawéi. Ánjein janúfude wabef lueí Búngiu, ladúga wagúrabaña lan láburujan ligáni wawágun. Ligía, ánjein janúfude lubeí ában gürígia, machúlúgilirügü líña Búngiu ínsiñeda lun le tímatisaati.

¹⁹ Wagía, jínsiñeti Búngiu woun lugúndun wínsiñedun lun furúmiñe. ²⁰ Ánjein aríñaga ában gürígia. “Jínsiñeti Búngiu nun”, áni mínsiñeti libíri lun, yéeti gürígia ligía, lugúndun ánjein mínsiñe libíri ában gürígia lun, le aríja lumúti, siñábei gíñe jínsiñe lan Búngiu lun,

le marjín lubeí. ²¹ Rúlaali Crístu gumádi le woun. le jínsiñejabuti lun Búngiu, lúnti gíñe jínsiñe lan libíri lun.

5

Wagáñeiruni wuríbu lúma ubouí

¹ Sun ja afñeña luágu Jesúsu lan Crístubei le loúnajabei Búngiu, jagía lirájüñübaña Búngiu, áni sun ja jínsiñejabubaña lun Wáguchi Búngiu jínsiñejabubaña gíñe joun lirájüñü Wáguchi Búngiu. ² Subúdi wamúti luágu dan lan le jínsiñe lan Búngiu woun áni adúga wameí le lubeíbei, jínsiñe jamá gíñe lirájüñü Búngiu woun. ³ Ladügúniwa le lubeíbei Búngiu, ligía ínsiñejabunibei lun, áni majúrúti lugúmadin, ⁴ lugúndun sun le liraúbei Búngiu, mabáfuti cátei lánina ubouí luágu. Wafíñen, ligía cátei le íchigubei ubáfu woun lun wagáñeirun luágu cátei lánina ubouí. ⁵ Le affñebei luágu Jesúsu lan Liraúbei Búngiu, ligía rügúñein gayára lagáñeirun luágu cátei lánina ubouí.

Geféenwa lan luágu Liraú Búngiu

⁶ Jesucristu ligía ñúbinbei láu bián seíni luágu ligía lan Liraúbei Búngiu. bián seíni ligía, dúna le lánina labásterun, lúma jítaü le lánina loúnwen. Mámariügü láu dúna, láu dúna lúma jítaü. Áni Sífiri Sándu guánarügü geféenti luágu cátei le, ligía arúfudubalin sun inárüni woun. ⁷ Añajein úrüwa geféentiña luágu cátei le siélu. Búngiu Úguchili, Búngiu Irájü, lúma Búngiu Sífiri Sándu, áni ában méme jagía, ⁸ níjein gíñe úrüwa cátei geféenti múarugu luágu Jesúsu lan Liraúbei Búngiu. Sífiri Sándu, dúna le lánina labásterun Jesúsu, lúma jítaü le lánina loúnwen. ⁹ Resíbi wamúti le jaríñagubei wügúriña, gúbumetí lúnti lan werésibiruni le laríñagubei Búngiu guánarügü luágu Liraú lan Jesucristu. ¹⁰ Le affñeti luágu cátei le, choóru lumúti tídan lanígi luágu inárüni lan, le maffñebei, adúga lumúti Búngiu camá yéeti, lugúndun maffñen lan luágu le laríñagubei Búngiu luágu Liraú. ¹¹ Le laríñagubei Búngiu, luágu rújali lan ibágari magúmuchaditi woun, áni lídaangiñe lan Liraú liábin ibágari ligía. ¹² Le níjeinbei Liraú Búngiu lúma, níjein gíñe ibágari le lúma, ánjeinti le úabei Liraú Búngiu lúma, úati gíñe ibágari le lúma.

Lagúmujoún buri lerérun Juan tídan gárada to

¹³ Nabúrújañein cátei le jun, jugúya le affñebei luágu Liraú Búngiu, lun jasúbudiruni luágu gabágari jumá le magúmuchaditi.

¹⁴ Jeménigitiwa luágu Búngiu, lugúndun subúdi wamúti luágu ánjava lan amúriaja furúmiengarügü cátei queísi labúseerun, lagáambubadiwa. ¹⁵ Áni ítara quei wasúbudiruni luágu agáamba láni Búngiu wayúmuragun, subúdi wamúti gíñe luágu loúnabubadiwa lan.

¹⁶ Ánjein aríja ában güriña luágu ladügúña lan ában libíri ában figou le mámabei lúnti lanúgüni lídoun féridi lun sun dan, lúnti layúmuragun lun Búngiu, ábame líchugun Búngiu ibágari lun güriña ligía. Níjein figou anúgüti güriña lídoun féridi magúmuchaditi, málati lun layúmurawagúniwa lun Búngiu luágu figou ligía. ¹⁷ Sun wuríbani figou, máma sun figou lun lanúgüni güriña lídoun féridi magúmuchaditi.

¹⁸ Subúdi wamúti luágu güriña lan le anúgübalin Búngiu queísi Lúguchi, meíbugunti lídan figou, lugúndun toúniigi lumúti Liraú Búngiu, siñáti ladügün Máfia ni cáta lun.

¹⁹ Subúdi wamúti luágu lánigu wamá Búngiu, luágu labúgiñeñanu lan lubáfu Máfia sun ja lánigubaña ubouí.

²⁰ Subúdi wamúti gíñe luágu ñúbinjali lan Liraú Búngiu ubouágun, áni rújali lan gunfarándaü woun lun wasúbudiruni Búngiu le tímatimaati. Wabágaridúña le tímatimaati lídan ában lúma Búngiu, queísi lídaañadiwa lan ában lúma Liraú, le Jesucristubei. Ligía Búngiubei le tímatimaati, ligía gíñe le íchugubei ibágari le magúmuchaditi woun.

²¹ Nirájüñü, mafálara jumáña búngiugu ja mámabaña Búngiu. Ítaralá.

TIBÍAMAN LIGÁRADAN APÓSTOLU JUAN

Inárüni lúma ínsiñeni

¹ Áu le weíríei mútu, nabúrújañoun gárada to bun, nítu to lanúadiruboun Búngiu lun lániguboun lan, lúma joun birájüñü. Jínsiñetün nun le tímatimaati, áni mámarügü áu, sun gíñe ja afálarubalin Crístu, jínsiñetün gíñe joun sarágu. ² Jínsiñetün woun ladúga jínsiñe lan larúfudajan Crístu le lúnbei wáma lan súnwandan, woun, áni níjein arúfudajani ligía tídan wanígi. ³ Búngiu Úguchili, lúma Wabúreme Jesucrístu le Liraú Úguchili, jabínirubadún, jíchugubei jagúdemejabu lúma jadárangilan jun lídan jabúruch-aguagüdüni larúfudajan Crístu lúma ínsiñejabuni.

⁴ Oúnwenbun nugúndan láu nadárirun jádaangiñe birájüñü abágarida queísi lubúdubu, ítara queísi laríñagun Wáguchi Búngiu woun lun wabágaridun. ⁵ Guetóti nítu, ayúmuraguatina bun lun jínsiñegua wamá wámagua. Máma gumádi iséri le nabúrújabei bun, ligía méme le wámabei lúmagiñe furúmiñeti dan, dan le wagáambubei luágu Crístu. ⁶ Míni lan ínsiñeni, lun wabágaridun según lugúmadin Búngiu, áni lugúmadin Búngiu lun wabágaridun lídan ínsiñeni, queísi wagáambuni lúmagiñe furúmiñeti dan.

Ja ayéejabaña

⁷ Añájein sarágu ayéejatiña ubouágu ja mafíñebaña luágu quei lan gürígia tímatimaati liábin Jesucrístu ubouágun. Le ítarabei, ligía le yéeebei, le láganibei Crístu. ⁸ Duári jumá jaweí, lueí jeféridiruni le ñúbinbei jun lídaangiñe juwádigimari luágu Crístu, resíbi jumeíme fáyeiti le gumúti luágu, siélu.

⁹ Furúmieguarügü le oufudajati sarágu lídoun iséri arúfudajani, áni merédeti láu le larúfudajabei Crístu lun, úati Búngiu lúma, ánjeinti le eréderuti láu larúfudajan Crístu, níjein Búngiu Úguchili lúma Búngiu Irájü lúma. ¹⁰ Ánjein achúlúra ában gürígia júmoun máma láu arúfudajani le, merésibira jumeí júbiñe, mabúsurun jugúyame lun, ¹¹ lugúndun le abúsuruti lun, gádan lumúti gíñe wuríbani le ladúgübei.

Lagúmujoún buri dímuerei

¹² Níjein sarágu cátei lúnti naríñaguni jun, mabúseerúntina abúrújarügü náni jun, agúrabatina nídin aríjaün lun nayánujan júma, lun lagúnfulirun wagúndan.

¹³ Mábuga jáña tirájüñü bamúlelua bun, to gíñe lanúadiruboun Búngiu. Ítaralá.

TÚRÜWAN LIGÁRADAN APÓSTOLU JUAN

Buíti ladímurejóun luágu wügüri le gíribei Gáyo

¹ Áu le weíríei mútu, nabúrújañoun gárada to bun, numáda Gáyo, le jínsiñebei nun le gumúti.

² Numáda jínsiñeti nun, nayúmuragun lun Búngiu lun buídu lan lídin sun cátei bun, lun gíne magádie ban ítara queisi buídu lan lídin bun lídan befbugun lúma Crístu. ³ Oúnwenbun nagúndaarun dan le jayábinbei jádaangiñe wadújeñu lueígiñe Jesucrístu, ába jabájüdagun nun luágu bugúnfulin quei babágariduña lubeí úaragu lúma laráfudajan Crístu. ⁴ Úati ámu cátei agúndaaraguagüdütina queisi dan le nagáambun luágu jabágariduña lan nirájüñü lídan úarani lúma laráfudajan Crístu.

⁵ Numáda jínsiñeti nun, buíti bouserun lídan esériwiduni le badúgübei joun wadújeñu lueígiñe Jesucrístu, joúntima ja lílana ámu fulásu. ⁶ Abájüdaguatiña ligfbugiñe adámurini le yábei luágu bñsiñejabu joun. Adúgabeí fuleísei le. Íderagua báña láu le jemegeirubei lun jasígiruni jawéiyasun lídan ában igáburi le áuti lagúndaara Búngiu. ⁷ Furítiña lun jesériwidun lun Crístu, merésibiruntiña ni cáta jámangiñe ja ibídiñejabubaña lun Búngiu. ⁸ Ligía lúnti lubeí weténirun joun, lun wíderaguniña lídan lapúrichijóun lerérun Búngiu.

Luríban louuserun Diótfrefes

⁹ Abúrújatina buga ában gárada joun tílana ligílisi, májati Diótfrefes lídin láu le wabeíbei lugúndun busénti ábuti lan jádan súnwandan. ¹⁰ Ánjana lubeíti núdün, neréruba lun luágu le ladúgübei, adaagua marásualugu lúma iyéeni wawágu. Bougudin lueí líra, merésibirun lumútiña wadújeñu ja achúlürütiña, áni mája ligía lun jerésibiruniña ámu, ja erésibirutiña, ába labúguniña lídaangiñe adámurini le táni ligílisi.

¹¹ Numáda jínsiñeti nun, mafálarabeí jémpulu wuríbati le, adúgamemebeí le buídubei. Le adúgüti buíti, lánigu Búngiu, ánjein le adúgüti wuríbati, ibídiñegili Búngiu lun.

Lubuídun láni Demétrio jémpulu

¹² Buíti jadímurejan súngubei luágu Demétrio, áni inárüni luágu buídu lan ligáburi. Geféentiwa gíne luágu cátei le, áni subúdi jumúti luágu inárüni lan le waríñagubei.

Lagúmujóun buri dimúrei

¹³ Gíbeti yebe lúnti naríñaguni bun, mabúseerúntina abúrújarügü náni, ¹⁴ lugúndun agúrabatina narjínibu madíse, ábameti wayánujan.

¹⁵ Darángilabá. Mábuga jáña umádagu yána bun, rúbei wamábugaü lun cáda ában jádaangiñe wamádagu ja ñíbaña.

LIGÁRADAN JÚDAS

Labúrrijan Júdas joun ja únbaña wájali lan Búngiu lun lánigu jamá

¹ Áu Júdas, eseríwiduti lun Crístu áu, áni lamúlen gíñe Jacóbo, nabúrrijañoun gárada to joun ja únbaña wájali lan Búngiu lun lánigu jamá, ja jínsiñebaña lun, ja areídañu lubáña Jesucrístu séfuñu lueí buri cátei lánina uboú le. ² Resíbi jumá sarágu gudémejabu, darángilau, luma ínsiñeni lúmagaíne Búngiu.

Ja arúfudajabaña iyéeni

³ Nidújeñu jínsiñetiña nun, wefrijali nabúseerun nabúrrijan jun luágu asálbaruni le wabíjibeí, dándu jugúya queísi áu, guetó sandíguatina núngua luágu lúnti lan nabúrrijan jun lun nayúmuragun jun lun jáfaagun luágu afíñeni le ledégerubei Búngiu ában weíyaasu lun sun dan joun lánigu. ⁴ Naríñagubalin le jun lugúndun añájein lan arúfudajatiña yeétiña ádaragutiña joúngua jagánaguouín. Gúrgia buri jagía, arúfuda táña Lerérun Búngiu lúmagaíne binárin luágu lúnti lan jasúfuriruni lafáyeiragúle jariban, buídu. Wügúriña wuríbatíña jagía, minébenti Búngiu joun, arúfudaja jagía luágu gayára lan jadúgün gúrgia furúmieguarügü cátei mabuíduñti, mabeíchun lubáña lan Búngiu lueígiñe, ladúga luweírin lareíni, ayéedagua jagía gíñe luágu Jesucrístu, Wabúreme le ligíarügüti, le únbei weseríwida.

⁵ Láu sun subúdi jumáli lan, buséntina narítaguagüdünün luágu láu lan sun sagá láníña meja Búngiu lumútuniña Israelítuga Ejíptogiñe, lárigiñe, ába lagúmuchaguagüdüniña ja maffínerunbaña jádan. ⁶ Anjeligu ja mareídunbalin jabára, ígirarügü jameí jábiñe siélu lun jagárabaagun luágun Búngiu, añájein adaürúwañu lurúma Búngiu, gúrágu lídan lubúriga láu gúringüri magúmuchaditi, agúrabajei ouñwenbun wéyu le lánina agúseruni. ⁷ Ja lílana buri ubúругu Sodóma luma Gomorra, luma fulásu buri le yaráfabei lun, ába jagárabaagun luágun Búngiu queísigubeirügü ánjeligu ja, ába jíchaagun joúngua lun salúfuri, ába jírguagüdün joúngua lun sun luwúyeri wuríbani darí lun lagámaridun wügüri wügüri líledi, wúri wúri tíledi. Ába lagúmuchaguagüdüniña Búngiu láu wátu geméti. Reídeitiña queísi ewerídiruni joun sun gúrgia, arúfudei ligáburi ída lúba lan lafáyeijan Búngiu luágu figou.

⁸ Anjeinti láu sun jémpulu líra, wügúriña buri gíñe ja jagánaguabaña, láu jafálaruni arúfudajani le maríchabei, wíyedaguatiña joúngua, májatiña lun lugúmadin Búngiu, anába jamáña ubáfu buri ja íñugutimaabaña. ⁹ Anjeinti arcánjel méme Miguél, dan le lasígenejanbei luma Máfia lueígiñe lúgubu Moisés, mouchunti lun líñaragun láu anabúni, aríñagarügüti lun. “Ébecha lábu Wabúreme Búngiu.” ¹⁰ Anjaña wügúriña ja, adímurejatiña wuríba luágu buri cátei le úabei gunfaráanda jamáni, lé buri cátei le jasúbudirubei luágurügü jasándiruni queísi jasúbudiruni ánimaalu úouga gunfaráanda jamá, ligía buri cátei le jadúgübei, ába janúgün gúringuaü jawouguouín láu jóuserun.

¹¹ ¡Fugiábugu jagía! Falá jamaali lání Cañ jémpulu, arúfudajatiña iyéeni quei Baláam lun jagáñeirun seínsu, áni magáambaditiña, féridi jagía queísi Coré le ouwebei luágu lumágaambadin lun lerérun Búngiu. ¹² Nibúsigaridünatiña lídan buri jufédun le lánina jínsiñegua jumagua, le ní lubei jeíga, gurá jagía láu ugúndani, minébenejábuga. Ítara jáña queísi jóuniri mudún ja joúnguarügübei jóunigiragua. Ítara jáña queísi juánriñu magánati dúna le lanúgübei garábali, tídiibu wéwe to magínduntu lídan tidáani, ítara jáña queísi tídiibu wéwe to ájulutu láu sun tílagúle, úaali ju jamá. ¹³ Ítara jáña queí lanárime buri lugúdi barána, arúfudei jagáburigu le nibúsigaridünati quei jacútaü. Ítara jáña quei warúguma buri ja féridi jamáli jémeri, íñarawagúaaña lun jeréderun lídan líwurin-ágei lubúriga lun sun dan.

¹⁴ Enóc gíñe le jasédün güirgía lárigiñe Adán, adímurejaali dimúrei lúmagiñe Búngiu jawágu arúfudajatiña yéetiña ja dan le laríñagunbei. “Aríja numúti Nabúreme liábin jáma sarágu mílu jádaangiñe láni ánjeligu ¹⁵ lun lagúseragüdüniña sun ja wuríbabaña luágu sun wuríbani le adúga jamáalibei, lúma luágu buri dimúrei deréti le aríñaga jamáalibei luágu. Lasíadirubaña sun gafígountiña jagía luágu le jadúgübei.” ¹⁶ Arúfudajatiña yéetiña jagía ja jagánaguabaña, magúfurumaditiña, ganígi jagía jadímurejan luágu cátei le jadúgübei ámu, lún rügúñein jagúnfulirun lúma lagúbüri jayúmajan jabúseera. Aríñagatiña dimúrei buri íñuguti, adímureja jagía buíti jawágu buri güirgía lúnrügi jaságarun cátei buíti jóungua jádaangiñe.

Lererún joun afíñetiña

¹⁷ Jugúyati nidújeñu jínsiñetiña nun, jarítagua jumá luágu le laríñagubei Jesucrístu jádaangiñe láni apóstolugu luágu buri cátei le lúnbei lasúseredun. ¹⁸ Jaríñajare. “Lídoun buríme lagúmujoún dan, añajeinbaña güirgía éjerajatiña láu buri cátei le láni Búngiu, agánawa jagíame úragua lúma jagúndan le wíyebey.” ¹⁹ Jadúga buri ja, níjein lubey fánreinguau, falá jamuti jagúndan le lánina ubou, úati Sífiri Sándu jádan.

²⁰ Ánjaün jugúya, nidújeñu jínsiñetiña nun, derégüdagu méme jumá lídan jafíñen le jarúmabei. Ayúmuragua jumá lun Búngiu láu lubáfu Sífiri Sándu. ²¹ Mabúleida jumeí luágu jínsiñe jumá lun Búngiu, agúraba jumeí wéyu le lúnbei líchuguni Wabúreme Jesucrístu ibágarí magúmuchaditi woun láu lugúdemejabu.

²² Afíñegüda jumáña ja loúguabaña afíñe. ²³ Sálba jumáña jíbiri camá jamuga jaságaruñanu lídaangiñe wátu geméti lánina máfiougati, gudéme jamá jíbiri gafígountiña jun, láu sun, goúnigi jumá luef jadúgüni wuríbani le jadúgübei, iyéeregulá jaríban jun queísi gamísa wíyetu, luef gíñe jeíguadun lídoun luríban úma quei jagía.

Lagúmujoún buri ladímurejoún luágu luweírigin Búngiu

²⁴⁻²⁵ Búngiu le ábanrügübei, le sábiubei, le Wasálbaragüile lídaangiñe Wabúreme Jesucrístu, gabáfuti lun loúnigirunün luef jeíguadun lídoun figou, lun gíñe larúfudunün jarúmañu, buin láu ugúndani ligíbugiñe, le weíriginubei. Rúwalá íñuguni lun, lúma uweíriginuni, ubáfu lúma gumádi lídaangiñe Wabúreme Jesucrístu, méja, guetó, lúma súnwandan. Ítaralá.

CÁTEI LÉ BURI LARÚFUDUBEI BÚNGIU LUN JUAN

Cátei arífudúati buri lun Jesucrístu

¹ Niján buri cátei le larúfudubei Búngiu lun Jesucrístu lun lasúbudiragüdüni joun lánigu cátei lé buri lúnbei lasúseredun madíse. Subúdigüda láali Jesucrístu cátei le lun Juan le esériwidubei lun, láu loúnajani láni ánjeli lúmoun lun larúfuduni lun. ² Aríñaga láali Juan inárüni luágu sun le larjubei, geféenti luágu láni Búngiu ugánu lúma luágu le aríñaga láalibei Jesucrístu.

³ Gúndaatiña gürgia ja alíjabin jama ja agáambubalin laliijoún ugánu le, le erési-birúabei lúmagiñe Búngiu, adúga jagía gásu láu cátei le búruwañubei ya, ladúga yaráfaali dan lun lasúseredun.

Labúrüjan Juan joun tflana sédügubei liglisi

⁴ Áu Juan, nabúrüjaña joun tflana sédü liglisi to Ásiaboun. Resíbi jumá abíniruni lúma darángilaü lúmagiñe Búngiu le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan. Resíbi jumá giñe abíniruni lúma darángilaü jamagiñe sédü espíritu ja ligíbugiñebaña lála, ⁵ lúma lúmagiñe Jesucrístu le aríñagubalin cátei le inárüti, le furúmiñebeí asaaruti lídaangiñe ouweni áni gabáfu ligía jawágu urúeigu ja ubouagubaña. Jínsiñetiwa lun Crístu, áni chibá laadiwa lídaangiñe wafígoun láu líta, ⁶ adúga láadiwa urúeigumé lúma fádirigumé lun wesériwidun lun Lubúgiute, le méme Lúguchibeí. ¡Rúalá uweíriginu lúma ubáfu lun, lun súnwandan! Ítaralá.

⁷ ¡Aríja jumá, liábinba Crístu juánriñurugu, jarjubei sun gürgia ásta giñe ja áfarubalin! Jayájuba sun gürgia ja ubouagubaña dánme le jarjini luágu wuríbani le adúga jamáalibeí. Ítara lúba.

⁸ Áu lagúmesejabei sun cátei, áu lagúmuchagülebei, quei létüra ‘A’ lúma ‘Z’”, líña larinágun Búngiu le Súnti Gabáfu, le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

Layáwadagun Crístu lun Juan

⁹ Áu Juan, jidúje lueígiñe Jesucrístu áu, gafánraantina júma lídan larúeijan Búngiu, súfurijadina úara júma luágu Crístu, resíbijadina giñe gurásu lúmagiñe Crístu. Reídeitina adaürüwa luágu ubóju le gríbeí Pátmos lueígiñe napúrichijani Lerérun Búngiu, lúma lueígiñe napúrichijan luágu Jesucrístu. ¹⁰ Luágu ában wéyu dimáasu, ába neréderun lábugiñe lubáfu Sífiri Sándu, ába nagáambun ában umálali reínti nanáangiñe quei lumálali fidu, ¹¹ larinága umálali ligía nun.

—Áu furúmiñebeí lúma agúmujoúni, quei létüra ‘A’ lúma ‘Z’. Abúrüjabeí sun le barjubei, ábame bouánajanun gáradá tugúya joun tflana sédü liglisi to louábawaguboun Ásia. Éfeso, Esmírna, Pérgamo, Tiatíra, Sárdis, Filadélfia lúma Laodicéa.

¹² Ába nagáraragun lun narjín ca lan adímurejabei nun, ába narjín sédü lébu sanúdelu gólu, ¹³ labádinagua sédü lébu sanúdelu ligía ába narjín ában camá jamuga Wügúri Garaúwarügüti—le Jesucrístubeí—táu ában anáanguni chÜlútu luágun lugúdi, lúma ában béliiti gólu yaráfa lun laníguagu. ¹⁴ Jarúti lídiburi quei líyu mudún, quei moúru, ítara líña lágu quei wátu geméti. ¹⁵ Miríti lugúdi quei brónse le íríchawagúali, le dáwaali lídoun órno, reínti lumálali quei lireín leíbaagun sarágu dúna. ¹⁶ Níñanu sédü warúguma lídan lújabu le loúnwenren, níñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásüdüñ láu sun lére.

¹⁷ Dan narjínbalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába larinágun nun.

—Manúfudedaguabá, áu le lagúmesejabei sun cátei, áu lagúmuchaja. ¹⁸ Áu le wínwanbei, jilátina, guetó wínwantina lun sun dan. Níjein ligélen ouweni núma, lúma ligélen fulásu

le ní jabei jiláguaaña. ¹⁹ Abúrújabei lubeíti le barjúbei, le guetóbei lúma le lúnbei liábin. ²⁰ Niján laníchigubei jawáuti sédü warúguma ja barjúbaña lídan nújabu le noúnwenren, lúma sédü lébu sanúdelu gólu. sédü warúguma, jagía sédü jóuniri títana sédü liglísí, sédüti lébu sanúdelu, jagía sédü liglísí.

2

Ugánu joun títana sédü liglísí. Ugánu joun títana liglísí Éfeso

¹ ‘Babúrúja lun jóuniri títana liglísí to Éfesoboun, baríñagame lun lun laríñagun joun gürígia jagía. “Ítara líña naríñagun, áu le jáubei sédü warúguma lídan nújabu le noúnwenren, le gíñe eíbugubei labádinagua sédü lébu sanúdelu le gólu. ² Subúdi numúti sun le jadúgübei, subúdi numúti lidére juwádígimari lúma jagúraasun, áni subúdi numúti luágu siñá lan jáfaguniña ja wuríbabaña. Subúdi numúti luágu jóuchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá. ³ Gagúraasunjadün, áni súfuri jugúya sarágu lídan juwádígimari nuágu, mabúcharunga juágu. ⁴ Láu sun líra, níjein ában cátei jadúga magúndaantina láu. maweírinjali nínsiñe jun queí meja furúmiñe. ⁵ Ligía lubeíti, jarítagua jumá ída jíña lán meja, sáansi jumeí jigáburí, adúga jumeí cátei lé meja jadúgübei furúmiñe. Ánjein madúgün jumá ítara, nídinba juágu furése, ábame nagídaruni lébu jisáandelun lídaangiñe lufúlasun, ábame mámaadün lan títana nilgílisin, ánjein gubeírügü jasáansira jigáburí, ligíaba madúgün náni ítara. ⁶ Láu sun líra, luáguñein jáni fuleísei, liyéreegun cátei lé buri jarúfudajabei nicoláitagu jun lúma buri cátei le jadúgübei, le gíñe iyéreegubei nun. ⁷ Le garígeirugubei lun lagáambun, agáambaleí le laríñagubei Sífirí Sándu joun títana buri liglísí. Ja ásiiragúbalin wuríbani, neígagüdübaña lídaangiñe lin tídibu wéwe to lánina ibágari, to lufúlasunruguboun Búngiu.”

Ugánu joun títana liglísí to Esmírnaboun

⁸ ‘Babúrúja lun jóuniri títana liglísí to Esmírnaboun, baríñagame lun lun laríñagun joun gürígia jagía. “Ítara líña naríñagun, áu le furúmiñeti lúma agúmujoóni, lé meja ouwebei áni winwanyaali. ⁹ Subúdi numúti sun le jadúgübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti gíñe luágu adímureja jamá ja aríñagubaña luágu juríu jamá wuríbati juágu, máma ámu cátei jagía lueídügüya lánigu jamá Máfia. ¹⁰ Manúfude jumá lueí le lúnbei jasúfuriruni, ládaraguba Máfia fiú jídaangiñe furisunrugun lun loúchawagúniwa jafíñen sun jugúya, áni jasúfuriruba sarágu luágu dísi wéyu. Derégüdagú jumá lídan jafíñen nuágu darí jóunwen, ábame níchuguni ibágari magúmuchaditi jun, jafáyeiruájame. ¹¹ Le garígeirugubei lun lagáambun, agáambaleí le laríñagubei Sífirí Sándu jóun buri títana liglísí. Ja ásiiragúbalin wuríbani, másügürünbaña lídaangiñe libíaman ouweni.”

Ugánu joun títana liglísí to Pérgamoboun

¹² ‘Babúrúja lun jóuniri títana liglísí to Pérgamoboun, baríñagame lun lun laríñagun joun gürígia jagía. “Ítara líña naríñagun, áu le gámabarun efeín to gágiriboun, to bíanguaboun amána. ¹³ Subúdi numúti sun le jadúgübei, subúdi numúti gíñe luágu Máfia lántima gabáfubei jádan gürígia ja ní lubei jagánawa, áni láu sun líra, númamemeñadün. Mígirun jumágili jafíñen nuágu, ni íbini lídan dan le láfarúnbei Antipás le gefeénbei buíti nuágu ní lídan fulásu le ní jubei, le ní lubei lagúmadíja Máfia. ¹⁴ Láu sun líra, níjein buri cátei jadúga, magúndaantina láu. Luágu añájein lan fiú gürígia júma yára Pérgamo ja májabaña jígiruni cátei lé meja larúfudajabei Baláam, le íchugubei dímuerei lun Balác lun laffgoungüdüniña Israelítagu láu jeígin eígini le adágarawagüdüti joun sándu, lúma láu jabágaridun lídan salúfuri. ¹⁵ Ítara méme gíñe, añájein ja májabaña jígiruni cátei lé buri jarúfudajabei nicoláitagu júma ní, cátei le iyéreegubei nun. ¹⁶ Ligía, sáansi jumeí lubeí jigáburí, ánjein madúgün jumá ítara, nídíba juágu madíse, ábame nageíndagun

jáma gürígia ja adúgübalin cátei buri le, táu efeín to áfuriduboun niyúmulugugiñe. ¹⁷Le garígeirugubei lun lagáambun, agáambaleí le lariñagubei Sífiri Sándu jóun buri tílana liglísi. Le ásiiraguti luágu wuríbani, neígagüdüba lídaangiñe maná le arámudúañubei lun lun líchugun érei tun luwáni, ábame níchugun ában dúbü jarúti lun láu ában íri iséri búríuwañu luágu le ibídiñeti ni ca un lueídügüya lun le erésibirubalin.”

Ugánu joun tílana liglísi to Tiatíraboun

¹⁸“Babúrüja lun jóuniri tílana liglísi to Tiatíraboun, baríñagame lun lun lariñagun joun gürígia jagía. “Ítara líña naríñagun, áu le Liraú Búngiu, le ítarabei águu quei wátu geméti, liábin lugúdi quei brónse le írichawagúaaali. ¹⁹Subúdi numúti sun le jadúgübei, subúdi numúti jísiñejabu, jaffñen, jesériwidun láu jugúraasun, subúdi numúti gíñe luágu jadúgüña lan cátei buíti guetó lueí meja furúmiñe. ²⁰Láu sun líra, nýjein ában cátei jadúga magúndaantina láu. Jígírunun Jezabél to aríñaguboun luágu proféta tan áni máma líña, lun teyéeduniña gürígia láu tarúfudajan joun nánigu lun jaganoún lídan salúfuri lúma lun jeígin eíginí le adágarawagüdúti joun sándu. ²¹Rújadina dan tun lun tasáansiruni tigáburí, májagíru tígíruni tisálufurin. ²²Ninárün jáu luágu náburugúdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadáagubei, ²³ábame náfaraguniña tirájüñü jilágubei, ítara lúba jasúbudiruni sun nánigu luágu subúdi náni lében arítaguni lúma tében anígi, ábame nafáyeiruni cára ában jídaangiñe según le ladúgübei. ²⁴Ja jíbiri ja Tiatírabaña, ja mafálarubalin arúfudajani ligía, machúlügiña gíñe asúbudirei le únbei jagúara lujúlilin láni Máfia cátei le arámudaguabei, míchubadina ámu anúgüni jawágu. ²⁵Ragújumei lubuídun jigáburí darí níábin. ²⁶Ja ásiiragúbalin wuríbani, adúga méme jameíme le nabúseerúbei ladúgún darí lun jóunwen, níchuguba ubáfu joun luágu buri fulásu. ²⁷Ítara quei líchugun Núguchi Búngiu ubáfu nun. Ábame jedéraagüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queísi sóudieru le láuti múa. ²⁸Níchuguboun gíñe warúguma to lánina bináafin joun. ²⁹Le garígeirugubei lun lagáambun, agáambaleí le lariñagubei Sífiri Sándu jóun buri tílana liglísi.”

3

Ugánu joun tílana liglísi to Sárdisboun

¹“Babúrüja lun jóuniri tílana liglísi to Sárdisboun, baríñagame lun lun lariñagun joun. “Ítara líña naríñagun, áu le jáubei sédü espíritugu láni Búngiu jáma sédü warúguma. Subúdi numúti sun le jadúgübei, subúdi numúti luágu jiláñu jíña lan lún buri cátei le nuáguti, láu sun aríñawagúa lan luágu wínwan jumá. ²Agágudúa jumá, rújuma érei lún buri cátei le nýjeinguabei, lubáragiñe loúnwen, aríja náali luágu múaran lan le jadúgübei ligíbugiñe Búngiu. ³Jarítagua jumeí lubeíti le arúfudajoúbei jun, falájumei, sáansi jumeíme jigáburí. Ánjaün magágudun, nídiba juágu quei liábin ában jíweruti ibídiñoun óra jun. ⁴Láu sun líra, añájein fiú gürígia jagánagua ñi Sárdis ja múaradungiñábaña lúma wuríbani, jagía jefbuguba núma táu anáanguni jarútu ladúga yúuti joun. ⁵Ja ásiiragúbalin wuríbani, jadáüraguba anáanguni jarútu, áni magídarun nubéi jíri tídaangiñe líburu to gáubalin jíri ja lúnbaña jabíjini íbágari magúmuchaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe láni ánjeligu. ⁶Le garígeiruguti lun lagáambun, agáambaleí le lariñagubei Sífiri Sándu joun tílana buri liglísi.”

Ugánu joun tílana liglísi to Filadélfiaboun

⁷“Babúrüja lun jóuniri tílana liglísi to Filadélfiaboun baríñagame lun lun lariñagun joun. “Ítara líña naríñagun, áu le sándubei, le gíñe inárünibeí, le gámabalin ligélen urúei David, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei. ⁸Subúdi numúti sun le jadúgübei. Rújadina ában béna júnren jigíbugiñe le lásíñerun ni ában adáura, ladúga láu sun loúgua lan jére, adúgaadün gásu

láu nugúmadin, áni meyéeraguntün luágu nánigu jumá. ⁹ Aríja jumá, nadúgüba lun jayábin lánigu Máfia ja yéebaña, ja aríñagubaña luágu juríu jamá áni mabágariduntiña queísí lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numútuniñaabaña jínsiñetiña nun, ninárün jáu. ¹⁰ Areída jumáli nugúmadin lun gagúraasun jumá, ligía nareídubadún lubeí lueí lidáani ouchwagúni le lúnbei liábin luágu sun ubouí lun jouchúniwa sun ja ubouagubaña. ¹¹ Madísebei niábin, mígira jumeí ni ában lun lagídaruni jafíñen nuágu, meféridirun jumámuga ni cátei lídaangiñe le lúnbei níchuguni jun. ¹² Ja ásiiragúbalin wuríbani, níchugubaña quei wagábu tídan Lúban Nubúngiute, máfuridundügüyaañame nígiñe, ábame nabúrüdüni líri Nubúngiute jawágu lun lasúbudirúniwa luágu lánigu jamá, lúma líri ubúrugu le láni Nubúngiute, le iséri Jerusalén le núnbinbei siélugiñe lúmagiñe Nubúngiute, nabúrüdübei gíñe iséri níri jawágu. ¹³ Le garígeiruguti lun lagáambun, agáambaleí le laríñagubei Sífiri Sándu jóun buri tílana ligílisi.”

Ugánu joun tílana ligílisi to Laodicéaboun

¹⁴ ‘Babúrüja lun jóuniri tílana ligílisi to Laodicéaboun, baríñagame lun lun laríñagun joun. “Ítara líña naríñagun, áu le inárünibeí, le gaféenbei buídu, le aríñagubalin inárüni, le ídaangiñebeí liábin sun cátei le ladúgübei Búngiu. ¹⁵ Subúdi numúti sun le jadúgübei, subúdi numúti luágu madlí jumá lídan jesériwidun nun, másü jugúya. ¡Dilígubeijadün jamúga o síjuma! ¹⁶ Quei bachárügü jubeí, madflitün, másü, newérebabadün niyúmu-lugugiñe. ¹⁷ Aríñagatün luágu rísi jumá, luágu buídu lan dan jun, luágu memégeirun jumá ni cáta, áni marjín jumúti luágu fugiábu jumá, gudémetün, marjintün, surúsu jíña. ¹⁸ Ligía níchugunbei dí múrei jun lun jagáñijan gólu le affinujouaali láu wátu gemetí númagiñe, lun rísi jumá le tímatimaati, lun gíñe jagáñijan anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jarjín. ¹⁹ Ébecha numútiña ja jínsiñebaña nun láu idérei, arúfudaja áu joun. Lúnti lubefti sériu jumá, sáansi jumeíme jigáburí. ²⁰ Anája bénabu, nagúajaña, le agáambuti numálali, ába lánjunrenchuni béna nubá, nebéloruba lúmoun, ábame neígin lúma, jou ligíame núma. ²¹ Ja ásiiragúbalin wuríbani, níchuguba ubaráu joun númagua luágu nála le lála urúei, ítara quei násiiraguni wuríbani, ába nañúurun lúma Núguchi luágu lála. ²² Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

4

Ájuduraguni lun Búngiu, siélu

¹ Lárígiñe sun cátei le, ába narjín ában béna júnren siélu, liábinti umálali le ítarabei quei lumálali fidu, lé buga adímurejabei nun, ába laríñagun nun.

—Weinba ñájoun, narúfudaali cátei lé buri lúnbei lasúseredun lárígiñe buri le bun.

² Lídan óra ligía, ába neréderun lábugiñe lubáfu Sífiri Sándu, ába narjín ában lála urúei siélu láu Búngiu ñun luágu. ³ Ítara líña camá ában dúbü miríti, le jáspe o cornalína, ññoun ában jerémuuru geyégu láu jaláú ligía, mirítu quei ában dúbü le esmerálda. ⁴ Geyégu láu lála urúei ligía arjJayatina ában wein-gádürü lála urúei, ññnanu wein-gádürü gurígia ja weirigutiña ñun luágu, táu jadáuragun jarútu lúma rídi gólu jábulugu. ⁵ Lueígiñe lála Búngiu ligía áfurijati labírijanouga lúma wayújururu, ligíbugiñe lála, ñññein sédü lámpu geméñu, jagía sédü láni Búngiu Espíritugu. ⁶ Níññein gíñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégu láu lála Búngiu, ñññnanu gádürü cátaña gabágaritiña buin láu águu, dándu jagíbugiñe quei janágangiñe. ⁷ Le furúmiñeti jádaangiñe, ítara líña quei ában liñún, le jabíaman, ítara líña quei ában bágasu wügúri, le júrüwan, ítara líña ligíbu quei ligíbu ában wügúri, le jagádürün, ítara líña quei ában ágila ájamajatu. ⁸ Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougudigiñe quei múnadagiñe jabíti, wéyuagu áriebu jáu agúaraja.

Sánder, sánder, sánder,
Wabúreme Búngiu, le Súnti Gabáfu,
le wíwanbei lúmagiñe lubáragiñe furúmiñeti dan, wíwan ligía guetó, wíwan ligíame
sun dan.

⁹Ságüti jíchugun cátaña gabágaritiña ja inébesi lúma eteíngiruni lun Búngiu le ñúnbei luágu lála, le gabágaribei lun sun dan, ¹⁰ábaja jájuduragun wein-gádürü weíyaaña mútu jagía ligíbugiñe, ába jaráfuduni jínsiñejabu lun Búngiu le gabágaribei lun sun dan, ába jíchuguni jarídin ligíbugiñe, ába jagúarajan.

¹¹Wabúreme, Wabúngiute, garíchatibu lun berésibiruni uweíriguni, inébesi, lúma ubáfu, ladúga Amúrú adúgübalin sun cátei, láu bugúndan badúgei, láu gíñe bugúndan njein lubei sun le njeinbei.

5

Líburu lúma Mudún

¹Ábati naríjin ában líburu lújaburugu Búngiu le ñúnbei luágu lála, abúrjóuatu líburu tugúya turágerirugu lúma tigíbuagu, darúatu láu sédü séyu. ²Ába naríjin ában ánjeli gabáfuti, ába lálügüdajan láu umálali reínti.

—¿Ca garíchabei lun ladáranunun líburu lúma lun lajeíridunun tiséyun?

³Úati ni ában garíchatu lun ladáranunun líburu tugúya, ni íbini lun laríjin tuágun, ni siélu, ni múarugu, ni lábugiñe múa, úati ni ában garíchatu. ⁴Ába nayájun sarágu ladúga úa lan ni ában garíchatu lun ladáranunun líburu tugúya, ni lun lalíjanun, ni íbini lun laríjinun.

⁵Ábati laríñagun ában jádaangiñe weíyaaña mútu nun.

—Jebé bayájun, ladúga Jesucrístu, le “líñún” le jádaangiñebei ladúgawagun Judá, le linébaanfan urúei Davíd, sirígua láali wuríbani lun gayára lan ladáranunun líburu lúma lun lajeíriduni sédü tiséyun.

⁶Lamídaanguati lála Búngiu jáma gádürü cátaña gabágaritiña jagía jáma weíyaaña mútu jagía, ába naríjin ában Mudún rára, camá jamuga áfarúaaali. Sédüñein ligáanchun, sédü lágu, águu buri ligía, láni Búngiu sédü Espíritugu ja oúnajóubaña lídoun sun ubóu.

⁷Ñúbinti Mudún ligía, le Jesucrístubei, ába lanúgünun líburu tugúya lújaburugugiñe Búngiu. ⁸Dan le larígüdübarun líburu, ába jájuduragun gádürü cátaña gabágaritiña jagía jáma wein-gádürü weíyaaña mútu jagía ligíbugiñe. Cáda ában jádaangiñe weíyaaña mútu jagía, ñíñoun ában gidára lúma, lúma cópu le gólu buin láu cupáli, le liyáwabei jayúmuragun lánigu Búngiu. ⁹Niján urému iséri le jerémujabei.

Garíchatibu lun banúgünun líburu, lun bajeíridunun tiséyun, ladúga áfarúa ban, ába bagáñijaniña güirgía lídaangiñe sun rása, sun luwúyeri dimúrei, fulásu lúma néchaani.

¹⁰Adúga báña urúeigumé jáma fádirigumé lun jeseríwidun lun Wabúngiute, lúma lun jagúmadijan ubóuagu.

¹¹Lídan le naríagun, ába nagáambuni jamálali sarágu ánjeligu geyégu láu lála lúma geyégu jáu cátaña gabágaritiña jagía, jáma weíyaaña mútu jagía. Níñanu míñun míñun ánjeligu. ¹²Jaríñaga láu umálali jéreti.

Yúuti ubáfu lúma írisini, subúdi lúma érei, uweíriguni lúma inébesi, lúma eteíngiruni lun Jesucrístu, Mudún le áfarúbei.

¹³Agáamba numúti gíñe jaríñaguni sun cátei le ladúgübei Búngiu siélu, le múarugubei, le lábugiñebei múa, lúma le baránajabei, lúma sun cátei lé buri lídaanbei.

Rúalá eteíngiruni, inébesi, uweíriguni, lúma ubáfu lun Búngiu le ñúnbei luágu lála, lúma lun Mudún, lun sun dan.

¹⁴Ába jaríñagun gádürü cátaña gabágaritiña jagía.

—Ítaralá!

Ába jájuduragun wein-gádürü wéyaaña mútu jagía ligíbugiñe le gabágaribeí lun sun dan.

6

To sédü séyu

¹ Ábati narjín dan le lajeíridúnbarun Mudún furúmiñetu tídaangiñe sédü séyu tugúya, ába nagáambun laríñagun ában jádaangiñe cátaña gabágaritiña jagía láu ában umálali camá lumálali wayújururu.

—¡Jigábu barjja!

² Ába narjín ában gabáyu jarúti, le waríñubei luágu, ññoun ában árco lújaburugu to áboun lageíndagua. Rúati ában rídi lánina ásiiraguni lun ladúga lúnbei lan lagáñeiruniña láganiñu. Furíti ageíndagua, ába lásiiragun lídan sun cátei.

³ Dan lajeíridúnbarun Mudún tibfaman séyu, ába nagáambun laríñagun jabíaman cátaña gabágaritiña jagía.

—¡Jigábu barjja!

⁴ Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilaü ubouáguñe, lúma lun láfaraguágüdüniña wügüríña jámagua jilágubei, ába tíchugún ában oúnwenbun efeín lun.

⁵ Dan lajeíridúnbarun Mudún túrüwan séyu, ába nagáambun laríñagun júrüwan cátaña gabágaritiña jagía.

—¡Jigábu barjja!

Ába narjín ában gabáyu wuríti, ññein ában baláansu lújaburugu le waríñubei luágu.

⁶ Ába nagáambun laríñagun ában umálali jamídaanguáñe cátaña gabágaritiña jagía.

—Ábanrügüla kilo túriгу luágu lebégi ában wéyu wadágimanu, úrüwa kilo sebáda ligía méme ebégi, áni tounigi jumeíme aili lúma bínu buídu.

⁷ Dan lajeíridúnbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—¡Jigábu barjja!

⁸ Ába narjín ában gabáyu amaríyu, le waríñubei luágu, ouweni líribeí, lárigi lárigi liábin jafúlasun jiláaña. Ába libjín ubáfu luágu ligádürün murúsun lídaangiñe ubou lun láfarajan láu wuríbu, láu ilámaü, láu sándi, lúma jáu anímaalugu janárimetiña ja ubouáguña.

⁹ Dan lajeíridúnbarun Mudún tiseíngün séyu, ába narjínun jawáni ja áfarawagúbaña luegiñe japúrichijani Lerérun Búngiu, lúma luágu jadímurejan bufti luágu Jesucrístu, lágugiñeñanu latáru. ¹⁰ Jaríñaga láu umálali jéreti.

—¿Darísan ídame, Wabúreme le gúnfuliti láu lerérun, darísan ídame bagúseragüdaña ja mísiñejabúbaña bun ubouágu, luágu wounwen? ¿Ídamésan bafáyeigüdaña luágu jáfaruníwa jilágubei?

¹¹ Ába jabjín anaánguni jarútu, ába laríñawagún joun lun jeméraagun luágu murúsun dan darí joustarun jabíriña lídan eseríwiduni lun Crístu ja lúngiñabaña jáfarawagúniwa quei jagía.

¹² Lídan le narjínbei, ába lajeíridunun Mudún tisisin séyu, ába ladágarun ában oúnwenbun járabaganáli. Ába láuridun wéyu quei lúdu, ába láfunadun játi camá jítaü, ¹³ ába jeíguadun warúguma ja siélubaña lun múarugun quei táburujan mángu tuegiñe tídibu dan le lánjingichunun garábali. ¹⁴ Ába lagúmuchagun siélu quei ában gárada dan le tabáruchawagún, ába ladíñuragunga sun wúbü lúma ubouju lídáangiñe jabára. ¹⁵ Ába jarámudagun urúeigu ja lánina ubou lídan júyu lúma buri labádinagua dúbü le luágubei wúbü, úara jáma ja weírigubaña, gurúnelugu, rísitiña, gabáfutiña, jáma sun idámuni, jáma wügüríña ja mabúremetiña. ¹⁶ Jaríñagati lun wúbü lúma lun dúbü.

—Jéguwa jumá wawágun, arámuda jumáwa lueí larjín Búngiu le ñúnbei luágu lála, lúma lueí lanáreme ligáni Mudún.

¹⁷ Chülújali weíríti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawáguti Israelíta

7

¹ Lárigiñe sun cátei le, ába narjín gádürü ánjeligu rára luágu gádürü larígei ubou, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídibu wéwe. ² Arjatina gíñe ábanya ánjeli ñúbinti lueígiñe oúbaü le ñígiñe lubeí láfuara wéyu láu liséyun Búngiu le wínwanbei. Ába lagúaragun ánjeli ligía láu umálali jéreti joun gádürü ánjeligu ja abjúbaña ubáfu lun jadúgün wurfbani lun múa lúma barána.

³ —Madúga jumá wurfbani lun múa, ni lun barána, ni lún buri tídibu wéwe daríme wíhuguni liséyun Búngiu luágu jerébe lánigu.

⁴ Agáamba numúti átiriñanu lan. san bián-wein-gádürü mílu jadaangiñe linébaanfaangu Israel.

⁵ Dúusu míluñanu jadaangiñe ladúgawagun Judá,

dúusu mílu jadaangiñe ladúgawagun Rubén,

dúusu mílu jadaangiñe ladúgawagun Gad,

⁶ dúusu mílu jadaangiñe ladúgawagun Áser,

dúusu mílu jadaangiñe ladúgawagun Neftalí,

dúusu mílu jadaangiñe ladúgawagun Manasés,

⁷ dúusu mílu jadaangiñe ladúgawagun Simeón,

dúusu mílu jadaangiñe ladúgawagun Leví,

dúusu mílu jadaangiñe ladúgawagun Isacár,

⁸ dúusu mílu jadaangiñe ladúgawagun Zabulón,

dúusu mílu jadaangiñe ladúgawagun José,

jáma dúusu mílu jadaangiñe ladúgawagun Benjamín.

Sarágu güirigia jarútu jadáuragun

⁹ Lárigiñe cátei le, ába narjín sarágu güirigia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña güirigia jagía darí lun siñá lan jabájüdún, jarútu jadáuragun táu tubána fáluma jájaburugu. ¹⁰ Ába jagúarajan sun jagía láu umálali jéreti, ába jaríñagun.

Weíríti Búngiu, le ñúnbei luágu lála,

weíríti Mudún, luágu asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu wefyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun, ¹² ába jaríñagun.

¡Ítaralá! Rúalá uweírigu, lichú áu, eteíngiruni,

inébesei, ubáfu lúma érei

lun Wabúngiute lun sun dan. Ítaralá.

¹³ Ábati lálügüdünina ában jadaangiñe wefyaaña mútu jagía.

—¿Cátañasan ja, ja jarúbaña adáuragun? ¿Jalíagiñésan jayábin?

¹⁴ Naríñaga lun.

—Amúrú jamúga aríñagei nun.

Laríñaga nun.

—Ja súfurijañabaña sarágu ja, ja chibá jamaalíbei jafígoun láu líta Mudún, jarúmagüda jamóun janígi láu. ¹⁵ Ligía ligíbugiñeñanu lubeí lála Búngiu esériwida lun, wéyuagu áriebru tídan lúban to siéluboun, loúnigirubaña Búngiu láu leréderun jáma. ¹⁶ Máfagun jáñame ilámaü, ni mágürabu, másürtin láñame wéyu, mañáurijan láñame lárouga, ¹⁷ ladúga

loúnigirubaña lan Mudún le lubádubei lála Búngiu, ábame lanúgüniña lárún dúna le íchugubei ibágari magúmuchaditi, ábame larágajani Búngiu sun águiraü lueígiñe jágu.

8

Tisédün séyu lúma lágei cupáli le gólu

¹Dan lajeíridúnbarun Mudún tisédün séyu to tuáguboun líburu, ába ñi lan maníguauí siélu queí buri luágu dimí óra. ²Ába narjiniña sédü ánjeligu ja ráraña ligíbugiñe Búngiu, ába líchugúniwa sédü fídu joun. ³Lárigiñe, ábaya liábin ában ánjeli, ába laráramun ligíbugiñe latárü, ñínein ában lágei cupáli gólu lújaburugu, ába líchugún búrübin cupáli lun, lun ladágaragüdüni úara lúma jayúmuragun sun ja lánigu Búngiu ligíbugu latárü gólu le ligíbugiñebei lála Búngiu. ⁴Ába lamúdeirun lugúmulalin cupáli ligía úara lúma jayúmuragun lánigu Búngiu lun ligíbugiñoún Búngiu. ⁵Ábati lanúgüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachúrini luágun uboú, ába lagaambún wayújururu, ireíni, labríjaníga, lúma ában járabaganáli.

Lé buri fídu

⁶Ábati jaráanserun sédü ánjeligu ja láubaña sédü fídu lun jínwiruni.

⁷Ába línwiruni furúmiñeti ánjeli lífidun, ába lasálriragun lúbara júya le deréguati lúma wátu geméti, láu gíñe jítaü, ába lachágarúniwa luágun uboú. Ába lágudun lúruwan murúsun lídaangiñe uboú, ígirúati bián murúsun mágudúnti, gudáwati gíñe lúruwan murúsun lídaangiñe buri tídi bu wéwe lúma jíduru.

⁸Ába línwiruni jabíaman ánjeli lífidun, ába lachágarúniwa ában cátei camá jamuga ában oúnwenbun wúbü durúnguati baránajoun, ába lasálriragun lúruwan murúsun lídaangiñe barána jítaüme. ⁹Jiláguatiña sun úduraü ja lídaanbaña barána le asálriragubei lun jítaüme, gürínguatu gíñe sun ugúnein to ñíboun lídan barána ligía.

¹⁰Ába línwiruni júruwan ánjeli lífidun, ába teíguadun ában oúnwenbun warúguma siéluigiñe, durúngu quei ában tóchi. Táburuja luágun lúruwan murúsun lídaangiñe dúna lúma líseesen dúna. ¹¹Igífi tíribei warúguma tugúya, ába lagífidun lúruwan dúna, ába jóuwegun sarágu gürígia ladúga lagífidun dúna ligía.

¹²Ába línwiruni jagádürün ánjeli lífidun, ába lagúrínchagun lúruwan murúsun lídaangiñe líbiri wéyu, láu sun játi, jáma warúguma. Le oúbaü le agúrínchagubei jawágu, ába labúridun, marúgoungadunti wéyuagu ni árie bu.

¹³Lárigiñe, ába narjín ában dunúru weíríti ájamaja lamídaangua siélu, aríñageina ligía láu umálali jéreti.

—¡Fugiábugume ja aganoúbaña uboúagu luágu úruwa lanárimeníga lé buri lúnbei láburuja jawágun dánme jínwiruni ja jíbiri úruwa ánjeligu jafídnun!

9

¹Ába línwiruni jaseíngün ánjeli lífidun, ába narjín ában warúguma eíguadutu siéluigiñe lun múarugun, ába líchugún ligélen júyu le mébejabei tun. ²Ába tánjunrenchuni júyu ligía, ába láfuridun gumúlali nígiñe camá lídaangiñe ában oúnwenbun órno, ába labúrígadagüdüni gumúlali ligía wéyu lúma garábali. ³Lídaangiñe gumúlali ligía ába jachúlaagun chigángaru, ába jájamajani sun uboú, ába jabíjin chigángaru jagía ubáfu líbe jabáfu águru ja uboúagubaña. ⁴Ába laríñawagún joun lun madúgün jamá wurfbani lun jíduru le uboúagubei, ni lún buri nádü, ni lun tídi bu wéwe, lueídügü joun gürígia ja úabei líseini Búngiu jeréberugu. ⁵Majóuati lun jáfaraguniña chigángaru jagía gürígia, lueídügü lun jástüjaniña gürígia luágu seíngü játi, ítara líñati ligári jástüjan quei jástüjan águru. ⁶Lídaanme buri wéyu ligía, jáluajabei gürígia oúweni, madárijabei, busén jagía yebéme jóuwegun, ladíseduba oúweni jaweí.

⁷ Chigángaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában rídi le gólu, ítara líña jagíbu quei ligíbu wügúri. ⁸ Ítara líña jádiburi quei jádiburi wúriña, liábin jári, quei lári liñún. ⁹ Darúgu líña jágubu láu ában cátei camá gurábu, ítara líña lamúri jarúna quei tamúri sarágu cárú to jáutu gabáyu dan le teibaagun wuríburugu. ¹⁰ Gálitiña quei jáli águru le gágiriti. Ñíñein ubáfu luágu jáli lun jadúgün wuríbani joun gurígia luágu seíngü játi. ¹¹ Ñíñein ában jábuti chigángaru jagía, le ánjeli le láni júyu le mébejabei. Abadón líribei ánjeli ligía lídan hebréo, lídan guríegu, Apolión o Agúnrinchaguti.

¹² Sügúja furúmiñeti lanárimeníga, mégeigili bián.

¹³ Ába línwiruni jasísin ánjeli lífidun, ába nagáambun ában umálali lídaangiñe gádürü larígei latárü gólu le ligíbugiñebei Búngiu. ¹⁴ Ába laríñagun umálali ligía lun jasísin ánjeli le láubei fídu.

—Farára báña gádürü ánjeligu ja guráñubaña láru ouñwenbun dúna le Eufrátes.

¹⁵ Ába jafáragadún gádürü ánjeligu jagía lun jafaragun ában jádaangiñe cáda úrúwa gurígia jilágubei, ladúga aráanserúaña lubá óra ligía, wéyu ligía, játi ligía, lúma írúmu ligía.

¹⁶ Ába nagáambuni átiriñanu lan jasúdaaranigu ja luágutiña gabáyu. bián-san míñun.

¹⁷ Ítara líña ligáburu jayáwadagun gabáyu jagía jáma ja waríñubaña jawágu nun. Ñíñein ában cátei janíguagu, funáti licólorun, dínguti, lúma amaríyu. Ítara líña jábulugu gabáyu jagía quei jábulugu liñún, áfurijati wátu geméti, gumúlali, lúma súfuru jayúmulugugiñe.

¹⁸ Ába láfaraguniña úrúwa wuríbani le áfuridubei jayúmulugugiñe gabáyu jagía ában jádaangiñe cáda úrúwa gurígia jilágubei, úrúwa wuríbani ligía. wátu geméti, gumúlali, lúma súfuru. ¹⁹ Jayúmuluguñein gabáyu jagía jabáfu, lúma luágu jáli, ítara líña jáli camá jéwe gábuluguti, láu gíñe jadúga wuríbani.

²⁰ Ja jíbiri gurígia ja mouwegunbaña láu wuríbani le, mígirun meme jamúti jadáaguni cátei lé buri meja jadúgubei, mígirun jamei jájuduragun joun espíritugu wuríbatíña lúma joun sándu ja gólu, pláta, brónse, dúbü, wéwe—ja siñáti jaríjin, ni jagáambun, ni jeíbugun.

²¹ Mígirun jamei jáfarajan, jabíñarajan, jasálufurijan, lúma jíwerujan.

10

Ánjeli táu tiraúraü líburu

¹ Ábati naríjin ábanya ánjeli gabáfuti, ába larárirun siéluigiñe lídan juánriñu táu ában jerémuru lougiñe lichúgü. Miríti ligíbu quei wéyu, liábin lúruna camá durúngu líña.

² Ñíñoun ában tiraúraü líburu junréngu lújaburugu. Ába líchuguni lugúdi le louñwenren lougiñe barána, le lubaúna lougiñe múa. ³ Ábati lagúaragun láu umálali jéreti quei ában liñún dan le lówoujan, dánti le lagúaragunbei, ába lagaambúniwa ladúrügüdün sédü wayújururu. ⁴ Láriigiñe ladúrügüdün sédü wayújururu ligía, ába yebe nabúrijaali lan le laríñagubei, ába nagáambun laríñagun ában umálali nun siéluigiñe.

—Maríñagabei le laríñagubei sédü wayújururu, mabúriñabei gíñe.

⁵ Ánjeli bugáti le naríjubei lougiñe barána lúma lougiñe múa, ába liñúrui lújabu le louñwenren siélu, ⁶ ába láfíñurun luágu le gabágaribeí lun sun dan, le adúgubalin ubouú láu sun siélu, barána lúma sun cátei le lídaanbei, ába laríñagun.

—Úadügüyaali darásaü. ⁷ Dánme le lachúlürün dan lun lagúmeserun jasédün ánjeli ín-wireí lífidun, gúnfulijalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸ Ábaya ladímurejan umálali lé buga nagáambubei siéluigiñe, ába laríñagun nun.

—Beíba, banúgounme tiraúraü líburu to daráguboun, to lújaburuguboun ánjeli le ráraabei lougiñe barána lúma múa.

⁹ Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, jóuboun, bímebei basándirunun biyúmulugu, tagífidame burágeirugu.

¹⁰ Ába nanúgünun tiraúraü líburu tugúya lújaburugugiñe ánjeli ligía, ába neígünun, bímeti nasándirunun niyúmulugu camá síruudu, lárigiñe neíginun, ába tagífidun nurágeirugu. ¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

11

Ja bián geféentiña

¹ Ábati líchugúniwa ában mabúru nun lenége ában wéwe le amísuraagúlei, ába laríñagun Búngiu nun.

—Sarába, amísurajaboun lilígilisin Búngiu lúma latárü, abájüda báñame átiriñanu lan ja ájuduragutiña ñi. ² Mamísurajabei bürürü le bougudibei tibíti liglísi ladúga derégewaali joun ja terénchabaña lun Búngiu, ja lúnbaña jagúnrinchaguni ubúru le sándubei luágu bián-wein-bián játi. ³ Ábame nouñajan bián geféentiña lun jadímurejan nuágu luágu mílu bián-san úrúwa-wein wéyu, táu jadáuragun lúdu.

⁴ Bián geféentiña jagía, jagía gayáwabalin bián tódibu wéwe to olívo lúma bián lébu sanúdelu le ligíbugiñebei Búngiu, le Labúremebei sun ubou. ⁵ Ánjein ñi abúseerüti ladúgün wuríbani joun, ába jígiragüdün wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguarügü le buséti ladúgün wuríbani joun. ⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña gíñe lun jadúgüni dúna jítaüme, lun gíñe jasúfuriragüdüni ubou láu sun luwúyeri wuríbani, ságü jabúseerun. ⁷ Dánme le gumú jamaali jawádigimari, lageíndaguba anímaalu le áfuridubei lídaangiñe júyu le mébejabei jáma, ábame jeféridiruni wuríbu, ábame láfaruniña jilágubei. ⁸ Ábame jeréderun riwágu lídan lémeri oúnwenbun ubúru le Jerusalén le ñi lubei ládarawagúa Jesúsu luágu gurúwa, fulásu meme le, camá Sodóma lúma Ejipto. ⁹ Ábame jaríaguniña gürígia ja lídaangiñetiña sun fulásu, sun rása, sun luwúyeri dimúrei, lúma néchaani luágu úrúwa wéyu dimí, mígirunbaña lun jábunún. ¹⁰ Ábame jagúndaaragun ja ubouágubaña láu jóuwegun, daríme lun jedéweegun cátei jámagua, le jagúndan, ladúga berése jamá meja bián lánigu Búngiu jagía joun. ¹¹ Ába naríjin, áu Juan, luágu lárigiñe lan úrúwa wéyu dimí ligía, ába láguyuaguáduniña Búngiu, ábaya jásaarun, áni sun ja aríjubaliña, weírüti janúfudedagun. ¹² Ába jagáambun bián geféentiña jagía ában umálali jéreti siéluigiñe le aríñagubei.

—Weíñjuma ñájoun siélun.

Ába jamúdeirun siélun lídan ában juánriñu, aríagu jáganiñu joun. ¹³ Lídan óra ligía, ába ladágarun ában oúnwenbun járabaganáli, ába tagúluludun ában múna tídaangiñe ságü dísi to ubúruguboun, ába jóuwegun sédü mílu gürígia ladúga járabaganáli ligía. Ja jíbiri gürígia, ába jíchugun inébesi lun Búngiu le siélubei ladúga luweírín janúfude.

¹⁴ Sügúja libíaman lanárímeníga, madísebei le ában.

Le lisédün fidu

¹⁵ Ába línwiruni jasédün ánjeli lífidun, ába lagaambúniwa laríñagun umálali buri jéreti siéluigiñe.

Chúlújali lidáni Wabúreme Búngiu lúma lidáni Crístu lun jarúejjan lídan sun ubou, áni jarúejjaba sun dan.

¹⁶ Ábati jélemuchunga weín-gádürü gürígia ja weírígutiña, ja ñúnbaña luágu jála le lála urúei, láu jagíbu múarugu, ába jájuduragun lun Búngiu. ¹⁷ Ába jaríñagun.

Teínqui wáña bun, Wabúreme Búngiu,

amúrú le Súnti Gabáfu,
amúrú le wínwanbei lúmagiñe lubáragiñe furúmiñeti dan, wínwan amúrú guetó, wínwan
amúrúme sun dan.

Teínqui wamútibu ladúga ragúbaali lan oúnwenbun bubáfu.

áni guméseedibu arúeja.

¹⁸ Gáñiburija néchaanigu,

chúlúja wéyu lun babeñan,

chúlúja giñe dan lun bagúseragüdüniña jiláguaaña,

ábame bíchuguni jafáyeiruaja báni profétagu joun,

jáma jíbiri ja derégeguabaña jóungua bun, jáma sun jawúyerigu gürgia ja íchubaña
inébesei lun bíri.

Chúlúja óra lun bagúnrinchaguniña ja agúnrinchagubalin ubou.

¹⁹ Ábati tánjunrenchun lúban Búngiu to siéluboun, ába tarijín gáfu to lágei lidáradun
Búngiu jáma lumútuniña ñi tidan lúban. Ába ñi lan labríjaniga, ireíni, wayújururu, ában
járabaganáli, lúma láburlujan lúbara júya deréguati le weñnamuti.

12

Wúri lúma anímaalu le dragón

¹ Ábati lasáliragun ában oúnwenbun seíni siélu. ában wúri darúgu líña wéyu táu
camá jamuga ában dínugu, láu játi lábugiñe tugúdi, lúma ában rídi jáu dúusu warúguma
tábulugu. ² Wúri tugúya dageñañoun, tagúaraja láu igári le lánina agáriduni, ladúga
súfuritu lun tagúriajan. ³ Ábaya lasáliragun ábaya seíni siélu. ában oúnwenbun anímaalu
le dragón funáti, sédüñein lábubugug, dísi ligáanchun, lúma ában rídi luágu cáda lábubugug.
⁴ Ába ladúrugudun dragón ligía ában jádaangiñe ságü úrtüwa warúguma láu líli, ába lajún-
runiña múarugun. Ába laráramun dragón ligía tigibugiñe wúri to lúnboun tagúriajan,
lun leígini tiraú dánme le tagúriajan. ⁵ Ába tagúriajan wúri tugúya ában wügúri irájü
le lúnbei ledéraagüdün lagúmadijan lídan sun fulásu queísi láu ában murúsun gürábu.
Ába lagdarúniwa tiraú tueí, ába lanügúniwa lun Búngiu luágun lála. ⁶ Ába tanúrajan
wúri tugúya lídoun fulásu mageírawati le ñí lubei aráanseeli lan Búngiu ubáraü tubá, lun
toúnigirúniwa ñi luágu mflu bián-san úrtüwa-wein wéyu.

⁷ Lárigiñe, ába ñi lan ában wuríbu siélu, ñí lubei lageíndagua árcanjel Miguél jáu lání
ánjeligu lúma dragón. Ageíndaguati dragón jáu lání ánjeligu, ⁸ ába jeféridiruni wuríbu,
ába mabáaraña lan siélu. ⁹ Ába lubeíti laságarún oúnwenbun dragón, le binádu jéwe ligíra
le giríbei Máfia, o Satanási, le ayéejabalin sun ubou, siéluigiñe. Ligía jáu sun lání ánjeligu,
ába jachágarún múarugun.

¹⁰ Ábati nagáambun laríñagun ában umálali jéreti siéluigiñe.

—Gáñei láali Búngiu Máfia láu luweírin lubáfu. Chúlújali asálbaruni joun gürgia
ubouágun, chúlújali larúeijan Búngiu lúma lagúmadijan Crístu, ladúga sagáwaali le
íchugubei jadúnrun wadújeñu lueígiñe Jesucrístu, le íchigañajabei jadúnrun wéyuagu,
áriebu ligibugiñe Wabúngiute. ¹¹ Sirígua jamáali láu loúnwen Mudún, le Jesucrístubei,
lúma láu jíchugun fe luágu lání Búngiu ugánu luágu asálbaragülei, manúfudeduntiña lueí
jeféridiruni jabágari, aráanseñu rügútiña lun jounwen. ¹² Gúndaalá lubeíti siélu, gúnda
jumá jugúya le aganoúbei ñi. ¡Áni fugiábugu ja aganoúbaña ubouágu, lúma baránaja!
Ñúdünja Máfia júmoun láu oúnwenbun igáñi, ladúga subúdi lumúti luágu murúsun rügáali
lan lidáani.

¹³ Dánti laríjinbei dragón luágu fíwaali lan ubouágun, ába leíbaajanun wúri tó buga
agúriajaboun. ¹⁴ Ába líchugún bián larúna dunúru le weñnamuti tun wúri tugúya lun
gayára lan tájamarun lídoun fulásu mageírawati díse lueí dragón ligía, le ñíba lubei

toúnigirúa luágu úrúwa irúmu dimí. ¹⁵ Ába lewéran dragón ligía sarágu dúna liyúmu-lugugiñe lun lañaradaguagüdünun wúri tugúya. ¹⁶ Ába líderagunun múa wúri tugúya, ába lánjunrenchun múa, ába lachúruni sun dúna le lígiragüdúbei dragón liyúmulugugiñe. ¹⁷⁻¹⁸ Gáñitimaati dragón túma wúri tugúya, ába lídin ageíndagua jáma tirájüñü ja nüdübaña láu le lubeíbei Búngiu, falájamei ugánu le láni Jesucrístu.

13

Ja mónsturugu

¹ Ába naráramun láru béya, ába narjín lamúdeirun ában mónsturu baránajagiñe, sédüñein lábulugu, dísi ligáanchun. Níñein rídi luágu cáda ligáanchun lúma ában íri le áubei lanábaguei Búngiu luágu cáda lábulugu. ² Mónsturu ligía lenége gefgusi, ítara líña lugúdi queísi lugúdi óso, liábin liyúma camá liyúma liñún. Ába líchuguni dragón lubáfu lúma lála lun, lúma sarágu ubáfu lun lagúmadijan. ³ Níñein ában chaúnti luágu ában lídaangiñe lábulugu mónsturu ligía, weíríti lún yebe láfaruni jilágubei, ába lareídagun lichaúntin. Weíríti janígi sun gürígia láu mónsturu ligía. ⁴ Ába jájuduragun lun dragón luágu líchugun gumádi lun mónsturu, ába giñe jájuduragun lun mónsturu, ába jaríñagun.

—Úati ni ában quei mónsturu le, ¿cába gayára láfaruni?

⁵ Ígirúati giñe mónsturu ligía lun ladímurejan dimúrei buíti luoúgua lúma lun lanábagan Búngiu, lúma lun lagúmadijan luágu bián-wein-bián játi. ⁶ Ába ladúgün ítara, adímurejati wuríbati luágu Búngiu, anábaleí líri, lúban, jáma ja siélubaña. ⁷ Ígirúati giñe lun lageíndagun jáma lánigu Búngiu darí lásiiragúniña, ába líchugúniwa ubáfu lun jawágu sun rása, fulásu, luwúyerigu dimúrei lúma néchaani. ⁸ Ába jájuduragun sun ja aganoúbaña uboúagu lun mónsturu ligía, ja úbaña jíri bürúwañu lúmagiñe ladúgün uboú tídán líburu to lánina ibágari, to lúmaboun Jesucrístu, le Mudún le ouwebei.

⁹ Le garígeiruguti lun lagáambun, agáambalá. ¹⁰ Ja adáürütiña ámu, jadáürawagúba giñe, ja áfarajatiña táu efeín, jáfarawagúba giñe táu efeín. Ligía busén jabeí lánigu Búngiu gurásu lúma affíñeni.

¹¹ Lárigiñe, ábaya narjín ábanya mónsturu lamúdeirun múarugugiñe. Níñein bián gánchu luágu camá ligáanchun mudún, áni ítara líña ladímurejan camá ában dragón.

¹² Níñein sun ubáfu le láni furúmiñeti mónsturu lúma lun ladúgüni cátei lueígiñe loúbadina furúmiñeti mónsturu. Ába ladúgün lun jájuduragun sun gürígia ja uboúagubaña lun furúmiñeti mónsturu, le lareídaguagüdúbei lueígiñe chaúnti le luágubei. ¹³ Adúgati giñe oúnwenbun buri miláguru, áburujagúdati wátu geméti siélugiñe lun múarugun jagíbugiñe gürígia. ¹⁴ Lídaangiñeti miláguru buri le únbei líchugúa ubáfu lun ladúgüni lueígiñe loúbadina furúmiñeti mónsturu, ába leyéeduniña ja aganoúbaña uboúagu, ába ladúgagüdün ában liyáwa mónsturu le gawágubalin chaúnti ába lareídagun, joun. ¹⁵ Ába libjín jabíaman mónsturu ubáfu lun líchugun ibágari tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun. ¹⁶ Adúgati giñe lun sun lan gürígia—wefnamujaña, nübüriñiña, rísiñiña, gudémetiña, idámuni, máma idámuni—lun labúrídün líri mónsturu luágu jájabu le jóúnwenren o luágu lan jerébe. ¹⁷ Úati ni ában gayáraati lagáñijan ni cáta ni lalúgurajan ánjein úa líri mónsturu o linúmerun líri luágu. ¹⁸ Buséntitia cátei le lichú áu, le gunfarándati, atúriajaleí linúmerun mónsturu, le ábanbei quei líri wüğüri, áni niján número le asálrubei lídaangiñe lílétürana íri ligía. sísi-san úrúwa-wein-sísi.

14

Jerémujan ja san bián-wein-gádürü mílu

¹ Lárigiñe líra, ába narjini Jesucrístu, le Mudún, rára lábulugu wúbü le Sión, le siélubei. Níñanu san bián-wein-gádürü mílu gürígia lúma, ja bürúwañubei líri Mudún lúma líri

Lúguchi jeréberugu. ²Lárigiñe, ába nagáambun ában amúri ñúbinti siélugiñe camá lamúri barána, camá giñe ladúrügüdün ában wayújururu le jéreti, itara líña giñe camá jamuga tamúri sarágu gidára. ³Ába jerémujan gürígia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürígia ja weírigitíña. Úati ni ában gayára lumúti laníchigu lerérun urému ligía gunfaráanda jaweidügüya san bián-wein-gádürü mílu ja asálbarúbaña jádaangiñe ja ubouáguabaña—⁴jagía ja mádaragúnbaña jóungua jámoun wúriña, reideitiña jarúmañu, falájamei Mudún le ñíjin lumúti lídin, sálbawatiña jádaangiñe gürígia quei furúmiñeti edéweejani lun Búngiu lúma lun Mudún. ⁵Madárirúnwati ni murúsun iyéeni luágu jayumáru ladúga jarúmatiña ligíbugiñe Búngiu.

Ugánu buri le jíchubei úrúwa ánjeligu

⁶Ábati naríjin ábaya ánjeli ájama lamídaangua siélu, ñíñein ugánu le magúmuchaditi lúma lun lapúrichijani joun ja aganoúbaña ubouágu—joun sun néchaanigu, rása, luwúy-erigu dimúrei lúma sun fulásu. ⁷Laríñaga láu umálali jéreti.

—Inébelá Búngiu jun, ru jugúyame uweírigu lun, chülúja dan lun lagúseragüdün. Judúgua jumá lun le adúgübalin siélu lúma ubou, barána lúma líseesen dúna.

⁸Ába liábin ábanya ánjeli lárigi, ába laríñagun.

—Jeigua, jeigua Babilónia to weíríguboun, ladúga tabácharuadágüdüni sun néchaani láu bínu le lánina liwíye tayúmajan.

⁹Ába liábin ábanya júrwán ánjeli, ába laríñagun láu umálali jéreti.

—Le ájuduraguti lun mónsturu lúma tun liyáwa, ígira ligíame lun labúrúdüniwa líri mónsturu luágu lújabu o leréberugu, ¹⁰látubei bínu le lánina lanárime ligáñi Búngiu le lúnbei láburujan le gumúti luágun, ábame lasúfurirun láu wátu lúma súfuru ligíbugiñe Jesucristu lúma jagíbugiñe ánjeligu ja sándubaña. ¹¹Laweíruba lugúmulin wátu le asúfuriragüdübalíña lun sun dan, úabei eméraaguni ni wéyuagu ni áriebe joun ja ájuduragubaña lun mónsturu lúma tun liyáwa, o ja búrwáñubei líri jawágu. ¹²Ligía lébubei lúnti lan gagúraasun jamá lánigu Búngiu ja ñúdüñbaña láu le luberbei áni falájamei Jesusu surúñu, lun itara meme jamá derégüdagú lídan jafíñen darí lúmoun jóúnwen.

¹³Ábati nagáambun laríñagun ában umálali ñúbinti siélugiñe nun.

—Abúrújabeí le. “¡Gúnda jamá ja ouwetiña láu jafíñen luágu Jabúreme Jesucristu!” Lúmagiñe óra ligía, jeméraaguba lídaangiñe jawádigimari, ábame lídin le jadúgübei úara jáma, líña Sífiri Sándu.

Lalúbajouñiwa múa

¹⁴Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucristu, le Wügúri Garaúwarügüti. Ñíñein ában ridi gólu lálbulugu túma ában alúbagülei jamánatu lújaburugu. ¹⁵Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagüle, ladúga chülúja dan lun alúbajani, ladúga funáli nádü.

¹⁶Ába lásügüragüdünun le ñúnbei luágu juánriñu lalúbagüle múarugugiñe, ába lalúbajan.

¹⁷Ábayati láfuridun ábaya ánjeli tídaangiñe lúban Búngiu to siéluboun táu giñe lalúbagüle jamánatu. ¹⁸Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

—Dáboun balúbagüle to jamánaboun, alúbajabuñ tirésini beíbei to múaruguboun, ladúga funáaru.

¹⁹Ába lásügüragüdünun ánjeli ligía lalúbagüle múarugugiñe, ába lalúbajanun beíbei to múaruguboun, ába líchugunun lídoun ában ágei weírüti lun taríbachawagúniwa. (Míni lan

líra, lanárime abeichúni le lúnbei liábin lúmagiñe Búngiu.) ²⁰ Ába tarfbichawagún berbei bougudi libíti ubúrugu, ába láfuridun jítaü lídaangiñe tágei chülú lúmoun líñun jafúrenun gabáyu, úrúwa-san kilómetro geyégua.

15

Ánjeligu jáma jagúmujoún sédü ígei

¹ Ába narfjin ábanya oúnwenbun seíni siélu, weírigüdati anígi. sédü ánjeligu jáu jagúmujoún sédü ígei, ja áubaña lagúmucha ligáñi Búngiu.

² Arfjatina gíñe camá jamuga ában barána le bídiriu láu wátu geméti lídan, ññianu ja agáñeirubaliña luágu mónsturu, túma liyáwa, lúma luágu linúmerun líri, rára jáña lubádu barána le bídiriu ligía táu gidára to líchuguboun Búngiu joun. ³ Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weíríti áni buíti sun le adúga báalíbei,

Wabúreme Búngiu, Súnti Gabáfu,

surúñu líña sun le badúgübei, úaragua,

amúrü le Lurúeitebei sun néchaani.

⁴ ¿Cábasan manúfude bueí, Wabúngiute?

¿Cábasan madímurejan buíti buágu?

Amúrü rügúñadibu mafígounjan,

jayábinba lílana sun fulásu, ábame jájuduragun bun,

ladúga arijúaali luágu buídu lan sun le badúgübei.

⁵ Lárigiñeti sun cátei le, ába narfjini fulásu le sándutimaabei tídan lúban Búngiu siélu, fulásu le ñí lubei lerédera Búngiu, júnren lubéneri. ⁶ Ába jáfuridun sédü ánjeligu ja jáubaña sédü ígei jagía, ñígiñe. Táunanu janáangun líno to jarúmatu, mirí, liábin jabélitin, gólu luágu janíguagu. ⁷ Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédü ánjeligu jagía, buin líña cáda cópu láu luweírin ligáñi Búngiu le gabágaríbei lun sun dan. ⁸ Ába labuñchun fulásu le sándutimaabei láu gumúlali le ñúbinbei lídaangiñe luweírigun Búngiu lúma lubáfu. siñátiti lebélorun ni ában ñíjin darí jagúmochun sédü ígei ja jámabaña sédü ánjeligu jagía.

16

Cópu buri le lágei ligáñi Búngiu

¹ Ábati nagáambun laríñagun ában umálali jéreti joun sédü ánjeligu jagía lídaangiñe fulásu le sándutimaabei.

—Jeíba áturei cópu buri láu lanárime ligáñi Búngiu ubouágun.

² Ába lídin furúmiñeti ánjeli, ába láturuni licópun ubouágun, ába lasálrirun gumeín gáriti jawágu sun ja gawágubalin líri mónsturu, judúgua jagía lun.

³ Ába láturuni jabíaman ánjeli licópun baránajoun, ába lasálriragun barána queísi játa jiláaña, ába jóuwegun sun cátaña ja gabágaribaña lídan.

⁴ Ába láturuni júrwán ánjeli licópun luágun buri dúna lúma líseesen dúna, ába lasálriragun jítaüme. ⁵ Ába nagáambun laríñagun láni dúna ánjeli.

—Úaraguatibu láu bagúseragüdüñ itara, Búngiu sándu, amúrü le wínwanbei lúmagiñe lubáragiñe furúmiñeti dan áni wínwan amúrü guetó, ⁶ladúga jagía, aseíñeigüda jamúti játa profétagu jáma ja deréguabaña jóungua bun, guetóti gurágüdaadibu jítaü joun, yúuti joun.

⁷ Agáambatina gíñe laríñawagun lueígiñe latárü.

—Ánja Wabúreme Búngiu le Súnti Gabáfu, agúseragüdaadibu láu ísuruni lúma úaraguni.

⁸ Ába láturuni jagádüriin ánjeli licópun luágun wéyu, ába libíjin wéyu ubáfu lun lachúraruñña gürgía láu lísü, ⁹ába jachúrurun súngubei. Láu sun lira, masáansiragunti

jagáburi, madímurejan jagía buíti luágu Búngiu, anábaguarügü jameí Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lála mónsturu, ába leréderun larúeijan lábugiñe lubúriga. Ába buri jágüragunun güriña jañeñe láu igári. ¹¹ Ni ítara, masáansiragunti jagáburi lun jígiruni wuríbati léñaja jadúgübei, anábaguarügü jameí Búngiu le siélubei luágu jagárigu lúma jagúmein.

¹² Ába láturuni jasísín ánjeli licópun luágun oúnwenbun dúna le Eufurates, ába lamábeidun lun ñi lan úma lun jásügürün urúeigu ja ñúbinbaña lueígiñe oúbaü le ñígiñe lubef laboucha wéyu.

¹³ Ábati narjín jáfuridun úrúwa espíritugu wuríbatiña liyúmulugugiñe dragón, liyúmulugugiñe mónsturu, lúma liyúmulugugiñe proféta le yeebei, ítara jáña espíritugu wuríbatiña jagía quei júa. ¹⁴ Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja ubouágubaña lubá wuríbu le lánina oúnwenbun luwéyuri Búngiu le Súnti Gabáfu. ¹⁵ (“Toúnigi jumátia ladúga sódinabei niábin quei liábin jíweruti áriebu. Gúndaabei le agágudúañubei, nuján lanáangun luágu, lun meíbugun lan surúsu lueí jarjini güriña le mabúseerun lubei lun jarjini luágu,” líña laríñagun Jesucristu.) ¹⁶ Ábati jóundaraguniña urúeigu lídan fulásu le gírubei Armagedón lídan dimúrei le hebreó.

¹⁷ Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le sándutimaabei le siélubei. Lumálali Búngiu ligía, le ñúnbei luágu lála ñi, laríñaga.

—Adügúwaali.

¹⁸ Ába ñi lan labírijaniga, ireíni, lúma wayújururu, ába lánjingichun múa láu ában jarábaganáli, jéreti sügú láu sun jarábaganáli le dagáalibeí lúmagiñe ñi jamá güriña ligíbuagu uboú. ¹⁹ Ába lafánreinragun ubúru gu weíruti le Babilónia lídan úrúwa murusun, ába buri lagúluludun ubúru gu ubouágubei, ába larítangun Búngiu luágu ubúru gu weíruti le Babilónia lun lájuluchagúdüni bínu le lánina abeichúni le loúnajabei lun lídan ligáñi.

²⁰ Sun uboúju lúma sun wúbü, ába lagúmuchagun. ²¹ Ába gíñe láburujan oúnwenbun buri lúbara júya deréguati siéluigiñe jawágun güriña, júriburiti chílú lúmoun san líburu, ába janábaguni güriña Búngiu luágu, ladúga ában lan abeichúni janárimeti.

17

Tasiadirúniwa oúnwenbun jóru

¹ Ábati liábin ában jádaangiñe sédü ánjeligu ja láubaña sédü cópu, ába laríñagun nun.

—Jigábu, narúfudaali tabeichún oúnwenbun jóru to ñúnboun ligíbuagu barána bun.

² Agánawaaña urúeigu ja ubouágubaña lídan salúfuri túma, bachárua jagía ja ubouágubaña láu bínu le lánina tisálufurin.

³ Ába lanúgünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába narjín ában wúri waríñu luágu ában mónsturu funáti, búrúwañu líña sun luwéyeri dimúrei le anábaguti Búngiu tuágu, sédüñein lichúgü mónsturu le uágubei tañúura, díisi ligáanchun. ⁴ Wúri tugúya, gúchu lúma funáti ticólorunbei tanáangun, liábin tuwénden, gólu, dúbü buíduburiti, lúma pérla. Níñein ában cópu gólu tújaburugu buin láu tisálufurin lúma liwíye tadáagun. ⁵ Búrúwañu líña ában íri teréberugu láu ában aníchigu arámudaguati. Íri le teréberugubei. “Babilónia to weíríboun, jáguchu jóru lúma sun luwéyeri iwíyeni uboúagu.” ⁶ Ába nasúbudiruni luágu bacháruañoun lan wúri tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucristu. Dan narjínbalin cátei le, ába laweíridun nanígi. ⁷ Ábati laríñagun ánjeli ligía nun.

—¿Cá uágu laweírída banígi? Nasúbudiragüdaali míni tan wúri to bun, láu sun mónsturu le anúgübarun, le sédübei ichúgü, díisi ligáanchun. ⁸ Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujoún loúnwen. Ja aganoúbaña uboúagu, ja úabei jíri búrúwañu tídan líburu to lánina íbágarí lúmágiñe ladügún uboú, laweíríduba janígi dánme jaríjini mónsturu lé meja gabágaríbei áni úaali, ábaya líábin.

⁹ Níjein cátei ya joun ja gayáraabei gunfaráanda jamáni. Sédü ichúgü ligía, míni lan sédü wúbü le uágubei ñun tan wúri tugúya, ¹⁰ sédü méme ichúgü ligía, míni lan gíñe sédü urúeigu. Seíngü jádaangiñe urúeigu jagía, gumújali jarúejjan, ában jádaangiñe, larúeijaña guetó, le ában, miábingili. Dánme líábin jagúmujoún, larúejjaba murúsuriñgü dan. ¹¹ Le mónsturu lé meja gabágaríbei áni úaali guetó, ligía jawídünbei urúeigu, láu sun ligía lan ában jádaangiñe sédü, lárigiñeme, ábame lídin lídoun lagúmujoún loúnwen.

¹² Díisi gánchu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágu ában óra úara lúma mónsturu. ¹³ Ában lábu jarítangun urúeigu jagía, jíchugubei jabáfu lúma jarúejjan lun mónsturu. ¹⁴ Jageíndaguba lúma Jesucrístu, láfaragubaña jílagubei, ladúga Jabúreme sun abúremein ligía, Jarúeite gíñe sun urúeigu, áni jagáñeiruba gíñe sun lánigu ja lanúadajabaña Búngiu áni derégüdagu méme jáña lídan jafíñen luágu, úara lúma.

¹⁵ Ába gíñe laríñagun ánjeli ligía nun.

—Barána le baríjubei, le igíbuagubei tañúura jóru, fulásu buri, luwúyerigu dimúrei, lúma néchaani. ¹⁶ Áni díisi gánchu le baríjubei luágu mónsturu, le méme díisíbei urúeigu, teyéereguduba jóru joun, ábame jígirunun fíwañu, surúsu, jeígubei túgürügü, ábame jágudunun láu wátu gemetí. ¹⁷ Rúlaali Búngiu tídoun janígi lun jadúgüni le labúseerubei láu júaradun lun jedéregeroni jabáfu queísi urúeigu lun jíderaguni mónsturu daríme lagúnfulirun le laríñagubei Búngiu. ¹⁸ Wúri to baríjuboun, tugúya weíríti ubúrugu le agúmadirubaliña lurúeitegu uboú, le gíríbei Babilónia.

18

Teíguadun Babilónia

¹ Lárigiñe sun cátei le, ába naríjin ábanya ánjeli larárírun siéluigiñe láu sarágu ubáfu, ába larígoungadun uboú láu límirin. ² Lagúaraguati láu umálali jéreti.

—Gumúgua, gumúgua Babilónia to weíríboun, guetó jábiñejaru máfianu, jarámudaguagüle sun jawúyeri espíritugu wuribatiña, jádibu dunúru wíyetiña queísi wadúbi.

³ Ladúga sun lan néchaanigu bacháruaaña láu bínu le lánina tisálufurin, áni agánawaaña lurúeitegu uboú túma lídan tisálufurin, alúgurajatiña buri ja uboúagubaña, risijaña lídaangiñe luwénden tóuseragun túngua.

⁴ Ábayati nagáambun laríñagun ábanya umálali ñúbinti siéluigiñe.

—Furíjuma Babilóniagiñe, jugúya le nánigu, mafánran jumámuga lídan tifígoun lúma lídan tabeichúniwa. ⁵ Gibeguaali tifígoun darí lun lachúlürün siélu, áni jarítaguaali Búngiu luágu luríban tóuserun. ⁶ Adúga jumá tun Babilónia quei tadúga joun ámu, fáyei jumóún dóbüli lueí le tadúgübei. Rújuma ában uníñein le jéretimaati bían weíyaasu tun sугú láu le tíchugubei joun ámu. ⁷ Súfurigüda jumóún quei méme tedéregeregun túngua lun anáanguni únguau lúma lun agúnrinchaguni, ladúga aríñaga tan tídan tanígi. “Ñun nína ya quei ában urúei, máma nugúya ában jíñáru mámaritu, masúfurirubadina gíñe.” ⁸ Ligía líábinba lubeí tabeichún lídan ában meme wéyu—oúweni, írúni, ilámaü—ábame tagudún láu wátu gemetí, ladúga gabáfuti Wabúreme Búngiu le asíadirubarun.

⁹ Lurúeitegu uboú ja aganoúbaña túma lídan salúfuri lúma írisini, jayájuba, gudémegua tugúyame joun dánme jaríjini gumúlali le lánina tagudún. ¹⁰ Ábame jeréderun díse, le janífudei lueí tabeichún, ábame jaríñagun.

—¡Fugiábu Babilónia, ubúruge le weírubei, Babilónia ubúruge le gabáfubei, lídaanrügü murúsun óra líabin babeíchun!

¹¹Ja alúgurajatiña buri ja ubouágubaña, ayájuatiña gíñe, gudémegua ligía ubúruge ligía joun ladúga úaaña lan cába lan agáñije ebégidinaü le janáajabei— ¹²ebégidinaü lé buri gólu, pláta, dúbü buíduburitu, pérlas, gamísa to líno to finutu, séda, colóru buri gúchu lúma funáti, lúma gíñe sun luwúyeri fuláansu le jémeti, ílagu láuti jári léfan, fuláansu buíduburiti, brónse, gürábu, lúma dúbü miríti, ¹³canéla, cátei lé buri jémeti, cupáli, mírra, ibíñei, bínu, aili, fulúwaaru finutu, lúma türígu, barútiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajoún. ¹⁴Jaríñaguba lun ubúruge ligía.

—¡Úaaru frúta buri to seméboun búma to jínsiñeñajáboun bun sarágu, féridi báali gíñe sun írsini lúma wénde le búmañajabei, féridiwaali lun sun dan!

¹⁵Jañaja alúgurajabálin buri cátei le áni rísijaña lídan ubúruge le, jeréderuba díse le janúfude lueí labeichún, ayájuajeina, aságürjeina. ¹⁶Ábame jaríñagun.

—¡Fugiábu ubúruge weíríti! Ítara liñá meja quei ában wúri táu tadáuragun to líno finutu túma anáanguni to colóru gúchu lúma funáti, láu tuwénden gólu, dúbü buíduburiti lúma pérla. ¹⁷¡Lídan murúsun óra gumúja sarágu írsini!

Sún buri tarúne ugúnein, pasajerúge, mádulungu, jáma sun ja ñadágimeinbaña baránaja, díseti jeréderun. ¹⁸Dánti le jaríjini lugúmulalin lágudun ubúruge, ába jagúaragun.

—¿Cásan meja ámu ubúruge ñíbei quei óunwenbun ubúruge le?

¹⁹Ába jíchaagun múa jábulugu, ayájuaja, aságürja, agúaragua.

—¡Fugiábu Babilónia lé buga weírubei! Rísijañá yebe sun ja gagúnebaña wapóru baránaja láu lírsin, áni lídaanrügü murúsun óra gürínwagua.

²⁰Gúnda jumá láu le asúseredubei lun Babilónia, amürü siélu, júma jugúya apóstolugu, jáma profétagu, jáma sun ja lánigu Búngiu, ladúga adúgaali Búngiu gúsei jun láu lasiadiruni.

²¹Ábati liñúrún ában ánjei gabáfuti ában dúbü le ítarabei quei ában mulí, ába láguruni baránajoun, ába laríñagun.

—Ítara lúba laráriragüdúniwa Babilónia, ubúruge le weírubei, marijándügüyáwalime. ²²Magaambúndügüyáwalime tamúri gidára, fídu, bémerirugu, úaañame gíñe ñadágimeintiña bídan ni ca uwúyeri, magaambúnjalime gíñe lamúri dúbü le mulí bídan. ²³Madúnraagúnjalime larúgounga lámpu bídan, magaambúndügüyáwalime areñjani le lánina maríei bídan, láu sun gabáfugüda báníña meja bání alúgurajatiña lídan sun uboú, eyéedagua báña sun néchaani láu babíñarajan.

²⁴Daríwaali játa profétagu, jáma ja lánigu Búngiu, lúma játa sun ja áfarawagúañabaña ubouágu, daríwaali játa sun jagía lídan ubúruge lé meja Babilónia.

19

¹Lárigiñe cátei le, ába nagáambuni jamálali sarágu gürígia, jagúarajan. ¡Alelúya! Weíríti Wabúngiute le Súnti Gabáfu, ligía asálbarubaliña lánigu.

²Agúseragüdati láu úarani lúma ísuruni, siádi láaru óunwenbun jóru to agádeirubalin uboú láu tisálufurin, ágyugüda láali jáfarawagún lánigu tuágu.

³Ábaya jagúarajan.

—¡Alelúya! Magúmubei lamúdeirun tugúmulalin.

⁴Játi weín-gádürü gürígia ja weírígutiña, jáma gádürü cátaña gabágaritiña jagía, ába jélemuchun chülú múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵Ábati lagaambún laríñagun ában umálali yaráfa lueígiñe lála Búngiu.

Rújuma uweíriginu lun Búngiu,

sun jugúya ja esériwidubalin,
áni inébelá jun,
weŷyaaña, ñúbürigiña.

Fédu siélu

⁶ Agáambayatina camá jamuga jamálali sarágu gürígia, camá lamúri sarágu dúna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadija.

⁷ Gúndaagua wamá, buñwama láu ugúndani, ru wagíame uweírighuni lun, ladúga chülúja óra lun lídan jamá ában lánigu Jesucrístu lúma, le gumúti.

Aráanseña quei ában adári lubá tamárieidun,

⁸ táu tanáangun líno to fínutu, jarúma, áni mirí.

Míni tan líno fínutu, ibágari le surúti, le jabágari lánigu Búngiu.

⁹ Ábati laríñagun ánjeli nun.

—Babúrúja. “Gúnda jamá ja amísurajoubaña lídoun fédu le lánina lúaradun Jesucrístu jáma lánigu.”

Ába laríñagun nun.

—Dimúrei buri inárúiti le laríñagun Búngiu le.

¹⁰ Ába nájuduragun ligíbugiñe ánjeli ligía, ába laríñagun nun.

—Madúgabefi le, esériwiduti áu lun Búngiu quei amúrú jáma bibíriña ja afálarubalin láni Jesús uganú derégüdaguñu, lun Búngiu lun bájuduragun.

Uganú le lanúgübei Jesús lídoun larúgounga, ligía lébubei sun le jaríñagubei profétagu.

Le aweínjabalin gabáyu jarúti

¹¹ Ábati naríjini siélu junrénu, ába lasáliragun ában gabáyu jarúti, léti aweínjabalin, Gúnfuliti lúma Inárúni, ligía líribei, ladúga láu ísuruni lagúmadija, láu gíñe ísuruni lageíndagua. ¹² Ámirijati lágu camá ligémeri wátu, ñíñein sarágu rídi lábulugu, ñíñein gíñe ában íri bürúwañu luágu, ligía rügüñein asúbudirei. ¹³ Anáangun to luáguboun, feíndiwatu láu jítaü. Lerérun Búngiu líribei. ¹⁴ Jafálareiti súdeara ja siélubaña táu jadáuragun líno to fínutu, jarúti, jarúma, waríñu jagía jawágu gabáyu jarútiña. ¹⁵ Níñoun ában efeín jamánatu liyúmulugugiñe lun láchaünguniña néchaani táu, ábame ledéraagüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárime ligáñi Búngiu joun. ¹⁶ Bürúwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷ Ába naríjin ában ánjeli rára lídan wéyu, le agúaragubei láu érei joun sun dunúru ja ámajabaña juánriñurugu.

—Jigóugu, oúndaragua jumá lun oúnwenbun ladíneragüdüni Búngiu, ¹⁸ jou jumámuga jágürügü urúeigu, gumádimatiña, jáma wügúriña ganígitiña, jágürügü gabáyu jáu sun ja aweínjabaliña, jágürügü sun jawúyeri wügúriña dándu ja jóunguatiña quei ja idámuni, dándu ñúbürigiña quei weínamujaña.

¹⁹ Ábati naríjini mónsturu jáma lurúeitegu ubou jáu jánigu oúndaraguaaña lun jageíndagun lúma le waríñubei luágu gabáyu jarúti jáma lánigu. ²⁰ Ába ladaürún mónsturu úara lúma proféta yéeti lé buga adúgübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígiraguagüdübaña jóungua lun labúrüdún líri mónsturu jawágu, judúgua jagía tun liyáwa. Dánduti mónsturu quei proféta yéeti ligía, ába jagurún wínwañu lídoun lagúnu le láubei wátu geméti lúma sáfuru. ²¹ Ja jíbiri, ába jáfarawagún táu efeín to liyúmuluguboun le waríñubei luágu gabáyu, ába jaquímuledun sun dunúru buídu láu jágürügü.

¹ Lárigiñe, ába naríjin ában ánjeli larárirun siéluigiñe láu ligélen júyu le mébejabei, lúma ában oúnwenbun güiringüri lújaburugu. ² Ába lárügüdüni ánjeli ligía dragón, le binádu jéwe, le Máfiabei áni Satanási, ába lagúraguni luágu mílu irúmu. ³ Ába láguruni lídoun júyu le mébejabei le ní lubei ladáürei. Ába lichugún ában séyu luágu béna lun mayéejandügüya láaña lan néchaanigu darí lásügürün mílu irúmu. Lárigiñeme mílu irúmu ligía, lígiragüdüwaba luágu murúsun dan.

⁴ Ába naríjini jála buri ja íbñubaña ubáfu lun jagúseragüdüni, ñun jáña luágu. Aríja numútiña giñe jawáni já meja adúrürúbaña ichúgü lueigiñe japúrichijani Lerérün Búngiu lúma lueigiñe jadímurejan luágu Jesucrístu, ja májuduragunbaña lun mónsturu ni tun liyáwa, migirun jagía lun lichugún líri luágu jerébe o luágu lan jarúna. Ába naríjin jásaarun lídaangiñe oúweni lúnya jabágaridun, ába jagúmadijan úara lúma Crístu luágu mílu irúmu. ⁵ Anjeinti ja jíbiri jiláguaaña, másaaruntiña lídaangiñe oúweni daríme lárigiñe mílu irúmu. Niján furúmiñetibeí ásaaruni lídaangiñe oúweni. ⁶ ¡Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe oúweni! Mabáfuti libíaman oúweni jawágu, lubáragiñe líra, fádiringubaña láni Búngiu lúma láni Crístu, ábame jagúmadijan úara lúma Crístu luágu mílu irúmu.

⁷ Dánme sügüjali mílu irúmu ligía, ligíame lígirawagüdüni Máfia lídaangiñe júyu le mébejabei, ⁸ ábame láfuridun lun layéejaniña néchaanigu lídan sun uboú. Láfuriduba ayéedaña ubáfu buri le Gog lúma Magóg, ábame loúndaraguniña jánigu, ja gíbebaña quei liságounte barána, lun wuríbu. ⁹ Ítara líña lubeíti, ába jáfuridun súdeara jagía lídaangiñe sun uboú, ába jegéyedaguni fulásu le ní jabei lánigu Búngiu lúma ubúrugu le jínsiñebei lun Búngiu, le Jerusalénbei. Ába loúnajan Búngiu wátu geméti siéluigiñe, ába láguduniña gumúgubei. ¹⁰ Máfiati le ayéedubaliña, ába lágurúniwa lídoun lagúnu le láubei wátu geméti lúma sífuru, le níjin lubei jágurúa mónsturu lúma proféta yéeti. Jasúfuriruba ñi wéyuagu, áriebu lun sun dan.

Wisiyu ligíbugiñe oúnwenbun jalaú jarúti

¹¹ Ábati naríjin ában oúnwenbun jalaú jarúti, níñein Búngiu ñun luágu. Ába lagúmuchagun siélu lúma uboú ligíbugiñe, ába maríjñjali lan. ¹² Ába naríjiniña jiláguaaña, weínamujaña jáma níbüriigiña rára ligíbugiñe Búngiu, ába tadárawagún líburu buri túma ábanya líburu to líburu to lánina íbágarí. Ába jagúserawagüdüni jiláguaaña luágu buri cátei lé meja jadúgübei, según le búruwañubei tídan líburu buri tugúya. ¹³ Sarátiña sun ja añáradagubaña dúnarugu, sun ja jiláguañabaña, ába jásaarun lídaangiñe oúweni, ába jagúserawagüdüni luágu buri cátei lé meja jadúgübei. ¹⁴ Ába lágurúniwa oúweni lúma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libíamabei oúweni, ¹⁵ níjin jagurúa ja úabei jiri tídan líburu to lánina íbágarí lun jasúfurirun ñi gumúgua dan.

21

Iséri siélu lúma iséri uboú

¹ Lárigiñe, ába layáwadagun iséri siélu lúma ában iséri uboú nun, gumúgua buga furúmiñeti siélu lúma furúmiñeti uboú áni úaali buga barána. ² Au Juan, aríja numúti ubúrugu biníwati le iséri Jerusalén, larárirun siéluigiñe lúmagiñe Búngiu. Aráanseñu líña quei ában adarí dáüguañu lubá tadári. ³ Ába nagáambun laríñagun ában umálali jéreti siéluigiñe.

—Aríjabá, agánawati Búngiu jádan güirgía guetó. Laganoúba jáma, jagíaba lánigu, Búngiu mémeba jáma lun ligía lan Jabúngiute. ⁴ Larágajabei sun jáguira, úaalíme oúweni ni ayájuni ni íruni ni igárigu, ladúga sügüja sún meja cátei le níjeinbei.

⁵ Ábati laríñagun Búngiu.

—Aríjabá, adúga numúti sun cátei isérime.

Aríñagati gíñe.

—Babúrúja, ladúga inárüñiti dimúrei buri le, áni gayáraati laffñerún luágu.

⁶Lárigíñe, ába laríñagun nun.

—Súnja nadúgüni sun cátei le. Áu lagúmesejabei sun cátei, áu gíñe lagúmujoúnbei, quei létüra 'A' lúma 'Z'. Le mágürabuti, níchuguba lun lun látun lídaangiñe líseesen dúna le íchugubei íbágari, mafáyeijaanga luagu. ⁷Ja ásiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü. ⁸Ánjañati ja janáfudebaña, ja maffñebaña, ja iyéeejabúbaña, ja gáfarajadibaña, ja adáagubaña salúfuri, ja abíñarajabaña, ja ájuduragubaña joun sándu, jáma ja yéebaña, jágurúba lídoun lagúnu le súbei láu wátu geméti lúma súfuru, le libíamabei ouweni, ligíaba jalágaante.

Iséri Jerusalén

⁹Ábati líabín ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jageíra lánigu Jesucrístu bun.

¹⁰Ába layáwadaguagüdüni Sífiri Sándu ában wúbü nun, weíriti, íñu, ába larúfuduni oúnwenbun ubúru gu biníwati le Jerusalén nun, larárirun siéluigiñe lúmagiñe Búngiu.

¹¹Ámirijati ubúru gu ligía láu larúgounga Búngiu, ítara líña límirin quei límirin ában dúbü buídumerauíti, quei dúbü le jáspe, jarúgoungati quei bídiriu. ¹²Níñein ában baríeru weíriti, íñu, láu dúusu béna geyégu láu ubúru gu ligía, ában ánjeli luágu cáda béna, lúma jíri dúusu túríbu ladúgawagun Israél búríuwañu luágu buri béna. ¹³Úríuwañein béna lueígiñe le nígiñe lubei laboucha wéyu, úríuwa lueígiñe nóрте, úríuwa lueígiñe sur lúma úríuwa lueígiñe oubaü le nígiñe lubei lálüda wéyu. ¹⁴Baríeru ligía, ligíbuaguñein dúusu dúbü lidébuguñein, láu jíri dúusu láni Crístu apóstolugu búríuwañu luágu.

¹⁵Níñein ában mabúru gólu lúma ánjeli le adímurejabei núma lun lamísurajani ubúru gu, lubéneri, lúma lubárierun. ¹⁶Ubúru gu ligía, ába lábu lidábuberen lúma limigífen. Ába lamísurajani ánjeli ligía ubúru gu láu lumáburu, bián-mílu bián-san kilómetros luweírín, ába lábu limigífen lúma líñun, lúma lidábuberen. ¹⁷Lárigíñe, ába lamísurajani baríeru, úríuwa-wein-gádürü métros luweírín según jamísuraagüle gürígia le layúsurubei ánjeli ligía.

¹⁸Láu dúbü le jáspe ladúgüwa baríeru ligía, ubúruguti ligía, láuti gólu le tímatimaati, mirírti queísi bídiriu le jarúmati. ¹⁹Wéndegüdáwati lébu baríeru ligía láu sun luwýeri dúbü buíduburiti. le furúmiñeti, láu jáspe, le libíaman, láu safíro, le lúríuwan, láu ágata, le ligádürün, láu esmerálda, ²⁰le liseíngün, láu ónise, le lísísin, láu cornalína, le lisédün, láu crisólito, le liwídün, láu berílo, le linéfun, láu topásio, le lidíísin, láu crisoprása, le liúnsun, láu jasínto, léti lidúusun, láu amatísta. ²¹Dúusugubei béna ligía, dúusu pérlas, cáda béna láu ábanrügü pérla ladúgüwa. Léti úma buri láni ubúru gu ligía, láuti gólu jarúgoungati quei bídiriu.

²²Maríjintina ni ában liglísi lídan ubúru gu lídan, ladúga añájein Wabúreme Búngiu le Súnti Gabáfu lúma Jesucrístu ní, mabúseerúnwatu liglísi le ní jabei. ²³Memégeirunti ubúru gu ligía larúgounga lúmagiñe wéyu ni lúmagiñe játi, ladúga le guánarü larúgounga Búngiu rúti larúgounga lun, léti Jesucrístu, ligía lilámpunbei ubúru gu ligía. ²⁴Jeíbuguba sun néchaanigu ja sálbawañabaña lídan lilámpun ubúru gu ligía, ábame janúgüni lurúeitegu ubouú jaweírígun níjín, lun jíchuguni lun Búngiu. ²⁵Madáurawagunbei lubéneri wéyuagu, úabei gíñe áriebu ní. ²⁶Lanügüba jaweírígun néchaanigu níjín, láu sun jarísin, ²⁷mebélupei ni cáta wýyeti níjín, ni le adúgüti cátei le wuríbati o gayéeraguati. Ja rügübaña búríuwañubaña íri tídan líburu to lánina íbágari to lúmaboun Jesucrístu, jagía rügübaña ebélura.

22

¹Ábati larúfudun ánjeli ligía ában dúna jarúmati nun, le íchugubei ibágari, jarúgongati quei bídiriu, lídaangiñe lála Búngiu lúma lála Jesucrístu láfurida. ²Níñein dúna ligía lamídaangua lémeri ubúrugú ligía, áni luágu bián loúba dúna ligía ñi laweírída buri tídibu wéwe le íchugubei ibágari, le agíndubei dúusu wefyaasu lídan írímu. Ságü játi lagíndun, léti lubána, seríwiti lun lagáranijoún joun néchaanigu. ³Úaalíme ni cáta ñi lun lábugiñe lan líñaragun Búngiu. Ñíbei lála Búngiu lúma lála Jesucrístu lídan ubúrugú ligía, ábame jájuduragun lánigu lun. ⁴Jagágibudaguba lúma Búngiu, ñíbei gíñe líri jeréberugu. ⁵Úaalíme áriebeu ñi, ja aganoubaña ñi, memégeirunbaña ligémeri lámpu ni ligémeri wéyu, ladúga larúgongadagüdüba Wabúreme Búngiu jáu, ábame jagúmadijan sun dan.

Madíseeli liábin Jesúsú

⁶Lárigiñe, ába laríñagun ánjeli ligía nun.

—Inárüiti dimúrei buri le, áni gayáraati lafíñerüniwa luágu, áni Wabúreme Búngiu méme le íchugubei dimúrei joun profétagu oúnaja láadina lun narúfuduni le lúnbei lasúseredun joun lánigu madíse.

⁷—¡Aríja jumál! ¡Anáte madíse! líña laríñagun Jesucrístu.

¡Gúndaalá le adúgübei gásu láu ugánu le láni Búngiu le búrüwañubei tídan líburu to!

⁸Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába jájuduragun lubádu lugúdi ánjeli le arúfudubalin nun. ⁹Ába laríñagun nun.

—Madúgabei le, eseríwiduti lun Búngiu áu quei amúrü jáma bíbíriña ja profétagu, jáma sun ja adúgübaña gásu láu le búrüwañubei tídan líburu to, lun Búngiu lun bájuduragun.

¹⁰Aríñagati gíñe nun.

—Marámudabei láni Búngiu ugánu le búrüwañubei tídan líburu to ladúga yaráfaali dan lun lagúnfulirún. ¹¹Ígirabei le wuríbabei lun lasígirun adáagua wuríbani, le wýebei, lun lasígirun lídan liwýe, ánjeinti le buídubei, buídumemelá, áni le wügúri le derégeguabei lúngua lun Búngiu, gúnfulimemelá.

¹²—Ánja, madíseeli niábin, líña laríñagun Jesucrístu, áni barú numuti afáyeiruajáü le lúnbei níchuguni lun cáda ában segúni buri cátei le ladúgübei. ¹³Áu furúmiñetibeí lúma agúmujóuni, lagúmesaja sun cátei lúma lagúmujóun quei létüra 'A' lúma 'Z'.

¹⁴Gúndaatiña ja achíbubalin jafígoun lun garícha jamá lun jeigin lídaangiñe lin tídibu wéwe le íchubei ibágari, gayára lámuga jebélurun lueígiñe lubéneri ubúrugú. ¹⁵Ánjaña ja mafíñeradibaña luágu Jesucrístu, ja abíñarajabaña, ja adáagubaña salúfuri, ja gáfara-jadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba boúgudi.

¹⁶—Áu Jesúsú, oúnaja náali náni ánjeli lun lasúbudiragüdüni sún buri cátei le jóun buri tflana ligílisi. Áu linébaanfan urúei Davíd, áu gíñe queisi warúguma to lánina bináafin.

¹⁷Aríñagati Sífiri Sándu jáma ja lánigubaña Jesucrístu.

—Jigábu lun Jesucrístu lun basálbarun.

Le gíñe agáambubei, aríñagalá.

—Jigábu lun Jesucrístu, sálba bámuga.

Le mágürabubei, ánjein busén, nübinlá, gurála lídaangiñe dúna le íchugubei ibágari, mafáyeijaanga luágu.

¹⁸Sun ja agáambubalin láni Búngiu ugánu le búrüwañubei tídan líburu to, wéridi numútiña lueí cátei le. le íchuguti lánwoun cátei le, lagánwoundagüdübaña Búngiu ígei ja uágubaña labúrújóua tídan líburu to, luágu. ¹⁹Le gíñe agídaruti som cátei lídaangiñe láni Búngiu ugánu le búrüwañubei tídan líburu to, lagídarubei gíñe lufánran lídaangiñe lin tídibu wéwe le íchugubei ibágari, lúma lídaangiñe ubúrugú sándu lé buri búrüwabei uágu tídan líburu to.

²⁰Le asúbudiragüdübalin buri cátei le, aríñagati.

—Ánja, madíseeli níábin.

Ítaralá. ¡Jigábu Wabúreme Jesúsú!

²¹ Binílaün Wabúreme Jesucrístu sun jugúya. Ítaralá.